


# God Ta Duru Javotoho



The New Testament in the Etija dialect of the Orokaiva  
Language of Papua New Guinea

**God Ta Duru Javotoho**  
**The New Testament in the Etija dialect of the Orokaiva Language of Papua New Guinea**

**Nupela Testamen long tokples Orokaiva long Niugini**

copyright © 1988 Wycliffe Bible Translators, Inc.

Language: Orokaiva

Dialect: Etija

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 21 Feb 2024 from source files dated 31 Aug 2023  
e5bce6e8-66a6-5bca-bd93-ff4c103b88af

## Contents

FRT . . . . .	1
Matthew . . . . .	2
Mark . . . . .	51
Luke . . . . .	79
John . . . . .	127
Acts . . . . .	161
Romans . . . . .	203
1 Corinthians . . . . .	223
2 Corinthians . . . . .	242
Galatians . . . . .	255
Ephesians . . . . .	263
Philippians . . . . .	270
Colossians . . . . .	275
1 Thessalonians . . . . .	280
2 Thessalonians . . . . .	284
1 Timothy . . . . .	287
2 Timothy . . . . .	293
Titus . . . . .	297
Philemon . . . . .	300
Hebrews . . . . .	301
James . . . . .	315
1 Peter . . . . .	320
2 Peter . . . . .	326
1 John . . . . .	329
2 John . . . . .	334
3 John . . . . .	335
Jude . . . . .	336
Revelation . . . . .	338
Bible reading . . . . .	359

# God Ta Duru Javotoho

## The New Testament in the Etija dialect of the Orokaiva language of Papua New Guinea

### Nupela Testamen long tokples Orokaiva long Niugini

#### *God Ta Duru Javotoho*

The New Testament in the Etija dialect of the Orokaiva language of Papua New Guinea  
[okv]

Translation by Wycliffe Bible Translators

© 1988 Wycliffe Bible Translators, Inc.

Print publication, 1988 by Bible League International

Web version  
© 2014, Wycliffe Bible Translators, Inc.  
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).

- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

## God Ta Duru Javotoho

## MATTHEW OTOHU TA EVANERIA

*Iesu ta ohihi amita javo ikerekari  
(Luke 3:23-38)*

<sup>1</sup> Eto Iesu Keriso, embomeni ta orekari embo amita ohihi amo David ra eto David ta ohihi amo Abraham ra amita ke re erevira. <sup>2</sup> Eto Abraham ta meni amo Isaac ra eto Isaac ta meni amo Jacob ra, eto Jacob ta meniundi amo Judah te amita eambopo te <sup>3</sup> eto Judah ta meni amo Perez te Zerah te ra eto enana ta e amo pamone Tamar ra. Eto Perez ta meni amo Hezron te Hezron ta meni amo Ram ra, <sup>4</sup> eto Ram ta meni amo Aminadab te Aminadab ta meni amo Nahshon te Nahshon ta meni amo Salmon ra. <sup>5</sup> Eto Salmon ta ae Rahab na meni Boaz ingena te Boaz ta ae Ruth na meni Obed ingena te Obed ta meni amo Jesse ra. <sup>6</sup> Eto Jesse ta meni amo King David ra. Eto David na embo Uriah ta ae umbuto be ikenu meni Solomon ingena. <sup>7</sup> Eto Solomon ta meni amo Rehoboam te Rehoboam ta meni amo Abijah, te Abijah ta meni amo Asa ra. <sup>8</sup> Eto Asa ta meni amo Jehoshaphat ra Jehoshaphat ta meni amo Joram ra, Joram ta meni amo Uzziah ra. <sup>9</sup> Eto Uzziah ta meni amo Jotham ra, Jotham ta meni amo Ahaz ra, Ahaz ta meni amo Hezekiah ra. <sup>10</sup> Eto Hezekiah ta meni amo Manasseh ra Manasseh ta meni amo Amon ra, Amon ta meni amo Josiah ra. <sup>11</sup> Eto Josiah ta meni undi amo Jechoniah te amita eambopo te ra. Eto iji aramiko te enda Babylon embomeni na Israel embo ga isoro eto embomeni umbuto enana ta enda Babylon ta ere pahuatera.

<sup>12</sup> Eto umbuto pambua amita ambota embo Jechoniah ta ae na meni Shealtiel ingena eto Shealtiel ta meni amo Zerubbabel ra. <sup>13</sup> Eto Zerubbabel ta meni amo Abiud ra, Abiud ta meni amo Eliakim te Eliakim ta meni amo Azor ra. <sup>14</sup> Eto Azor ta meni amo Zadok te Zadok ta meni amo Akim ra, Akim ta meni amo Eliud

ra. <sup>15</sup> Eto Eliud ta meni amo Eleazar ra, Eleazar ta meni amo Matthan te Matthan ta meni amo Jacob ra. <sup>16</sup> Eto Jacob ta meni amo Joseph ra. Eto Iesu amita javo Keriso ke eora amita e Mary avo Joseph na jimbuna (eto javo 'keriso' ta be amo ari sasapura oreketo umbari embo). <sup>17</sup> Avo eto embo Abraham eto pambuto David na kakane ena mamone te meni undi te amo tapa 14 ra. Eto embo David eto pambuto enda Babylon ta pambari iji te amo mamone te meni undi te tapa 14 nei emina kakane ena eto Babylon ta pambari eto pambuto Keriso ta iji te amo mamone te meni undi te tapa 14 nei emina kakane ena.

*Mary na Iesu ingena amita ke  
(Luke 2:1-7)*

<sup>18</sup> Eto Iesu Keriso ta ingari amo eingera, Joseph na Iesu ta e Mary ga jimbuna rate vahaita ae Ahihi Otohu na enu Mary urete ena. <sup>19</sup> Eto Mary ta ivu Joseph na Mary urete ena avo kito mana mana eto embo javotoho amina Mary meni umbuto me kiuja uje ae ue jimbari avo ondikari na toasi uje ena.

<sup>20</sup> Eto ainge hotembitinu Bada ta Anera na eture ta amita degi puvuto ke einge ena, "Joseph David ta ahije Mary no ae ra amiga irari oju aojo amo Ahihi Otohu na iketei urete etija. <sup>21</sup> Eto meni singa ingasuja amina umo eonga amita embomeni ta ari sasapura avoeto orekau datoho iresora avoeto amita javo 'Iesu' ikejo" ainge anera na ena. <sup>22</sup> Eto ari erevi tapa amo Bada na matu peroveta ta degi ari kajari einge mitia, <sup>23</sup> "Eto kakara na teho urete eto meni singa umbau amita javo Immanuel aisora" eto Immanuel ta be amo "God nango te iriuja" <sup>24</sup> Eto Joseph na eture ta kito ereto Bada ta anera na ke ena avo agi eto Mary umbuto amita bande ta ikena. <sup>25</sup> Eto enana besi eonga eonga evio meni singa ingenu Joseph na meni ta javo Iesu ikena.

## 2

### *Tarama kiari embopo na enda nei ta eto puvua*

<sup>1</sup> Eto da Bethlehem Judea enda ta King Herod na titi jigina iji aramite Iesu e Mary na ingena. Eto iji aramina tarama ta hajire kiari embopo na enda nei Judea ihane hena ta eto da Jerusalem ta puvuto embomeni ta degi einge eto ingia. <sup>2</sup> “Judea embomeni ta King eha ingetija amo naingere? amita tarama vitei kito meni amita degi tumo te pain aisi puvera.” ainge ijio ingia. <sup>3</sup> Eto King Herod na ingito Jerusalem da embomeni te tapa osaga kia. <sup>4</sup> Avo eto King Herod na Judea embomeni priests pepeni te ke pepeni kiari embopo te ainge jage enu vahaita puvuo Judea embomeni ta hondate ari embo keriso degi nainge ingasuja avo eto inginu <sup>5</sup> ke mine einge ea “Amina da Bethlehem enda Judea ai ta ingasuja amita ke avo peroveta na einge kajena, <sup>6</sup> ‘Eto da Bethlehem enda Judea ta jo ta umo da isapa rate embomeni na umo javo ambu ke mane aisoro, amita be amo no jo ta eto titi jigari embo be puvuresuja amina nau Israel embomeni unduresuja’ ainge peroveta na kajena.” <sup>7</sup> Eto ainge eo Herod na ingito ondikari na ke ikenu tarama kiari embopo puvuo meni ta tarama iji deina bitina avo eto inginu bitina iji avo harikeo enana ta degi einge ena. <sup>8</sup> “Ungo da Bethlehem ta pambuto meni eto kogo eto jombure eto tambuto egerembeto puvuto nau degi ta evujo ingito pambuto meni avo jakeka ane.” Eto ainge enu <sup>9</sup> enana king ta ke ingito amita da toto pahue tarama matu bitinu kia avo ehako kito eteteto pahuo tarama na pambuto meni ingari ju ai hetena. <sup>10</sup> Eto enana tarama avo kito tunga javotoho be ue. <sup>11</sup> Bande jo ta toreto meni avo e Mary ga mitinu kogue paunge teteri eto beto meni jakeka ea. Eto meni ta hande ikasi umbuto puvua avo hiriketo hande ikea amo ‘gold’ te i gigi mune te jeune ainge amite

i mu mune te javo myrrh ainge ikea. <sup>12</sup> Rate enana egerembeto Herod ta degi mane pambasora avo God na eture ta enu ingia avoeto degi nei ta tiumbeto enana ta enda ta pambua.

### *Herod na meni isasaraho tenu ambuvujekea*

<sup>13</sup> Eto tarama kiari embomeni pahuo Bada ta anera na Joseph ta degi eture ta puvuto ke einge ena, “Umo ereto Meni te tohota e te umbuto Egypt enda ta sau sau pambuto nau ke simba ejo. Herod na meni erevi jombure eto tau amburoja uje ere ua” ainge anera na enu. <sup>14</sup> Joseph ingito ereto meni te tohota e te umbuto mume te Egypt enda ta pambua. <sup>15</sup> (-)

### *Da Bethlehem ta meni singa isasaraho avo teo ambuvujekea*

<sup>16</sup> Eto Herod na enana tarama kiari embomeni ta ke sokova kito tumo pajire be eto enu da Bethlehem eto da nei nei amita engitita meni isasaraho teo ambuvujekea amo tarama kiari embopo na Herod ta degi tarama iji deina bitina avo hotembeto enu meni isasaraho singa perekari amita pajirari jua heriso eto amita tu ta avo pe te teo ambuvujekea. <sup>17</sup> Eto ari erevi ae kiti be kiti ta peroveta Jeremiah na ke einge kajena, <sup>18</sup> “Enda Ramah ai ta embomeni na si ijie ui ai ijio ingia amo Rachel na amita meni undi avoeto si eria, eto tapa irae pambari avo eto tunga osaga irae ari ta ke mane ingesuja.” ainge Jeremiah na kajena.

### *Joseph te Mary te meni Iesu te na egerembeto Israel enda ta pambua*

<sup>19</sup> (v 19,15a) Eto Joseph te Mary te meni Iesu te ainge enda Egypt ta mitio Herod ambunu Bada ta anera na eture ta Joseph ta degi puvuto ke einge ena. <sup>20</sup> “Meni taro amburoja uje uera matu ambuvujeke tera avoeto ereto Meni te tohota e te umbuto enda ta pambujo,” ainge Anera na eture ta ena. (v 15b) Ke avo ari amita kiti ta Bada na peroveta ta degi enu einge kajena. “Na nau Meni

Egypt enda ta eto jage etena,” ainge kajena.

<sup>21</sup> Eto Joseph na Anera ta ke eture ta ingito ereto meni te tohota e te umbuto Israel enda ta egerembeto pambua. <sup>22</sup> Eto Israel enda ta puvuto Herod ta meni Archelaus na mamota besi umbuto Judea enda King ena duru avo ingito ai irari joru ena. Eto God ta ke eture ta ingina avo eto patina ta pambuto umo enda tutumo javo Galilee <sup>23</sup> amita da vahai javo Nazareth ai mitiaetija amita ke avo peroveta na einge kajea “amina Nazareth embo aisuja.”

### 3

*John Bapataito ari embo na Iesu ta puvurari degi enu tambu ena*

*(Mark 1:1-8, Luke 3:1-18, John 1:19-28)*

<sup>1</sup> Eto Iesu da Nazareth ta pajito mitinu John bapataito ari embo na Judea enda ojagatambu ai ke einge ijie onde katena, <sup>2</sup> “God ta titi jigari iji puvuto erehua avo eto ungota ari sasapura avoeto osaga kogue ungota jo aherekavu” ainge ena <sup>3</sup> amo peroveta Isaiah na einge kajena, “Embo na ojaga tambu ta jage einge eria ‘Bada ta puvurari nununga evu. Amita puvurari degi evu tambu ai’.”

<sup>4</sup> Eto John ta bo asukari amo o camel tu na ihirari avo asuketo pupuri o hoga na ari tigitu amita indari amo iruha te o boruga te indiaetija. <sup>5</sup> Eto enda Judea embomeni te Judea ta da peni Jerusalem amita embomeni te embomeni umo Jordan engitita mitiaetera <sup>6</sup> amiga tapa John ta degi puvutuhore enana ta ari sasapura harikitiore John na umu Jordan ai ta bapataito ere uatija. <sup>7</sup> Rate embomeni nei uhoho Pharisee embomeni te Sadducees embomeni te John na bapataito aja puvuo John na kito enana ta degi ke einge ena. <sup>8</sup> “Ungo o koso o ra. Eto God na tumo eto ungota ari sasapura ta hajire au kesova avo amuna etei ingito puveve? Ungota ari sasapura hariketo toasi puveva avoeto pambuto i be

javotoho euja aingeko evujo <sup>9</sup> eto ke erena avo ingito ‘Abraham amo nangota mama ra avoeto nango inonora’ ainge avojo, ungota degi erena be ingivujo. Eto God na au atara erevi sariketo Abraham ta meniundi asora amo inonora. <sup>10</sup> Eto hogoro i susu ta iketei mitia eto i be javotoho ae kito jeto gosukau evekasuja. <sup>11</sup> Eto na ungo umo na bapataito ere ona amo ungo jo aherekari ta ate kitira ere ona. Rate embo nau ambota puvuresuja amo nombo be sovera te rate na sovera ambu ra. Na amita utu goru houketo umbuto pambari inono aera. Embo amina ungo Ahihi Otohu te i bevere te na bapataito aisuja. <sup>12</sup> Eto javotoho davore sapura davore sirikasi nununga ere ua. Javotoho avo siriketo amita harau ta ikasuja eto sapura siriketo i ta ikau evekasuja, i amita seikari amo iraera.” ainge John na ena.

*John na Iesu bapataito ena*

*(Mark 1:9-11, Luke 3:21-22)*

<sup>13</sup> Eto Iesu amo John na umu Jordan ai ta bapataito aja Galilee ta eto puvunu <sup>14</sup> John na bapataito ari uje ae ue amita degi ke einge ena, “Na inena bapataito aetea rate umo do eto nane bapataito ana puve?” <sup>15</sup> Rate Iesu na ke mine einge ena, “God na uje do aisuja avo tapa agi aisora avo eto na bapataito aisoa” ke ainge enu John na jo ahereketo Iesu bapataito enu <sup>16</sup> bitito umo hora ta hetenu Utu pe hirikitinu God ta Ahihi di dipo ainge Iesu ta hamo ta benu kina. <sup>17</sup> Eto utu ta ke einge ingia “Emo osa ari Meni nau na kito tunga javotoho ere ona.”

### 4

*Satan na Iesu ojagatambuta engekena*

*(Mark 1:12-13, Luke 4:1-13)*

<sup>1</sup> Eto Iesu amo Satan na engekaja Ahihi Otohu na enu ojagatambu ta bitina <sup>2</sup> Eto iji te mume te tapa 40 ainge indari indae avo eto beuje kognu <sup>3</sup> Satan na puvuto Iesu einge



engekena. “Umo God ta Meni be kito koro erevi e bread sarikai.” ainge enu <sup>4</sup> Iesu na ke mine einge ena, “Eto embo na mane indari pere indie iresuja rate ke tapa God ta pe ta eto puvuja amina iresuja,” ainge ena. <sup>5</sup> Eto Satan na Iesu ga Judea embomeni ta da Otohu Jerusalem ai pambuto toreo Satan na enu Iesu temple ene i be i ta pambuto hetenu <sup>6</sup> Satan na ke einge ena, “Umo God ta Meni be kito kekehuna eto be. God ta ke einge mitia, ‘God na amita anera au umo ingeni na umbuto orereto beasora avoeto umo koro ta utu mane tasoa’ ” ainge enu <sup>7</sup> Iesu na ke mine einge ena, “God ta ke nei einge mitia ‘Umo Bada God no mane engekaso’ ” ainge enu, <sup>8</sup> Satan na Iesu ga tiri koso vahai ai ta bitito pahue enda tapa eto amita sago kiari donda te avo Satan na enu eture ta kiarako enu <sup>9</sup> Satan na ke einge ena, “Inena paunge teteri eto na jakeka ijero na donda erevi tapa inena simba ao ikasona,” ainge enu <sup>10</sup> Iesu na ke einge ena, “God ta ke einge mitia ‘Umo no Bada God eonga jakeka ue agi aisoa’ avoeto, Satan, na toto pambu!” ainge enu <sup>11</sup> Satan na toto pahunu God ta anera na puvuto Iesu undua.

*Iesu enda Galilee ta pambuna  
(Mark 1:14-15, Luke 4:14-15)*

<sup>12</sup> Eto John ikeo tipura ta torenu Iesu na duru ingito enda javo Galilee ta pambuna <sup>13</sup> eto da Nazareth toto da Capernaum amo Judea embomeni te ohihi heriso javo Zebulon te Naphtali ta meniundi ta enda ra. <sup>14</sup> Avo eto Peroveta Isaiah na ke einge kajena amo ke be ra, <sup>15</sup> “Zebulon ta enda eto Naphtali ta enda umo Jordan ovitiho ta eva ta pambuora degi ai ta enda nei nei embomeni na puvuto iriora. <sup>16</sup> Eto ai ta embomeni mume ta mitiaetera amo usasa peni vahai kia. Enana ambuvujekari embomeni ta enda ta irarako ere uatera avo iho vujarako ena,” ainge peroveta Isaiah na kiti kajarira.

<sup>17</sup> Eto Galilee ta pambuna iji aramite Iesu na ke einge hande ere uatija, “God na tohota embomeni siriketo umbuto titi jigesuja avo iji auvetija avoeto ungota ari sasapura toto jo aherekevu,” ainge Iesu na ena.

*Iesu na ambotani kiti umbuna*

<sup>18</sup> Eto Galilee hora ta isa ue Iesu na umo o parari embo heriso Simon te amita namei Andrew te avo kina. Eto enana o umbari bonga umo ta gosukeo hovunu <sup>19</sup> Iesu na kito enana ta degi ke einge ena, “Ungo na ambo ambo ue have! Ungo o ere paritova avo aingeto embo paravo avo ano kesova,” <sup>20</sup> Ainge enu enana nei do ae bonga toto Iesu ambo ambo ea. <sup>21</sup> Eto hora ta pahue Iesu na embo Zebedee te amita meni heriso James te John te e nga jo ta arumbeto bonga perarari avo iheritie mitio kito jage enu <sup>22</sup> enana ta mamote e nga te toto Iesu ambo ambo ea.

*Iesu ta ate poekari  
(Luke 6:17-19)*

<sup>23</sup> Eto Iesu na Galilee enda ta tehue Judea embomeni ta ke kasari bande tapa toritie God na naingeto embomeni umbuto titi jigesuja amita duru javotoho hande ereuatija eto ambure embomeni uei kokondikitiaetera. <sup>24</sup> Eto ainge pere uei Syria embomeni te tapa na duru ingihe enana ta ambure nei te nei te umbari embomeni umbuto Iesu ta degi puvua. Eto ambure embomeni amo nei ambure jo memenga ari nei utu ingeni meni amburari nei ahihi sasapura na torari te tapa umbuto puvutuhuore uoi kokondekitiaetera. <sup>25</sup> Eto embomeni isapamane da tapa ten umo ovitiho amita embomeni te Galilee embomeni te Jerusalem embomeni te enda Judea embomeni te umo Jordan ovitiho ta mitiaetera embomeni te tapa Iesu ambo ambo ere uatera.

**5**

*Iesu na embomeni tiri hamo ta ate poekena  
(Luke 6:20-23)*



1 Eto embomeni isapamane kito Iesu na bitito tiri ta arumbenu amita ambotani puvuo <sup>2</sup> itiketo ate poekitie ke einge ena, <sup>3</sup> “Eto embo amuna amita ahihi ta sovera inono ae kito God na hondate aja penunu eora embo avo God na titi jigihirou utu ta vasiri te iresuja eto amita tunga javotoho be aisuja. <sup>4</sup> Eto embo amuna ari sasapura avo eto si aisuja avo God na au osaga irae au tunga javotoho aisuja. <sup>5</sup> Eto embo amuna ‘na na’ ainge mane euja rate God tumota euja amina enda tapa hoteto umbasuja avoeto tunga javotoho aisuja. <sup>6</sup> Eto embo amuna ari javotoho pere kesi uje peni vahai ere ua embo amita uje avo God na au kesuja avo eto tunga javotoho ere ua. <sup>7</sup> Eto embo amuna embo ta osaga kito jo euja avo God na kito jo au hondate aisuja avo eto tunga javotoho ere ua. <sup>8</sup> Eto embo amuna jo vahai eto God agi eora amina God kesora avo eto tunga javotoho ere ora. <sup>9</sup> Eto isoro peiketo peka umbari embomeni avo God ta meniundi ke aisora avo eto tunga javotoho ere ora. <sup>10</sup> Eto embo amuna ari javotoho ere ua avo eto embomeni na ari nei te nei te na matuainge taekeora embo avo God na titi jigihoi iriuja avoeto tunga javotoho ere ua. <sup>11</sup> Eto ungo na ke be eova avo eto embomeni na no javo aro sapura ururou ke sokova nei te nei te ijie ungota degi ta osaga ikasora avo kito tunga osaga avojo. <sup>12</sup> Enana na ainge nombo God ta peroveta tapa ta degi ere uatera eto iji kombu te ungo na ari jajavotoho isapamane hoteto umbasova avoeto tunga javotoho be javotoho evujo.

*Ungo enda ta aso te usasa te ra  
(Mark 9:50, Luke 11:33, 14:34-35)*

<sup>13</sup> Ungo enda tapa ta irirari aso ainge gamo te ra rate aso ta peture beau irae aisuja amo naingeto ehako peture au? Amita pure irae avoeto enda ta kehi eore beoi utu na haito jaevekeora.

<sup>14</sup> Eto ungo enda tapa ta usasa ra. Eto embo na tiri mende ta da

kogombasora amita titiha ari iraera embo tapa na kesora. <sup>15</sup> Eto embo na usasa unduketo mane ovu to ta iketo gogovo aisuja rate i ta ekau usasa ururou embo tapa kesora. <sup>16</sup> Ainge nombo ungota usasa evu embo tapa kiore eto ungota ari jajavotoho avo embomeni na kogue God Mamu Utu ta iriuja avo jakeka aisora.”

*Moses ta ke pepeni avo ate poekena*

<sup>17</sup> Eto Iesu na ke nei einge ena, “Na Moses ta ke pepeni te Peroveta ta ke kajari te ano irae aja puvuone hotembarako avojo. Na avoeto puvuraera te ke amita be avo ano peni be au ungo ingova puvena. <sup>18</sup> Na ungo ta degi ke peni be avo erena ingivujo! Eto iji kombu puvurae enda te utu te mitirou God ta ke tapa Moses ta ikenu kajena avo pere iresuja ke nei vahai mane nei aisuja rate matu kajari ainge inono ta irirou God na amita uje tapa au irae au iji kombu ta puvuresuja. <sup>19</sup> Avo eto embo amuna God ta ke pepeni isapa vahai be poekasuja rete nei embo nei ke pepeni ano poekaja engekasuja God ta titi jigari degi ai ta embo avo meni isapa ainge nombo ambu aisuja rate embo amuna God ta ke pepeni tapa jigama ue embo nei jigama ara ate poekeuja embo amina God ta titi jigari ai ta embo pajire be aisuja. <sup>20</sup> Eto na ungota degi erena Moses ta ke pepeni simba ari embomeni javo Pharisee te ate poekari embomeni te ta ari jajavotoho eora avo nembeto evujo. Eto enana ta ari jajavotoho avo nembeto ae amo God ta simba ari degi ai ta mane be mane torasova.

*Iesu na tumo eora ate poekena*

<sup>21</sup> Ungo matu ainge ingiova amo Moses na ohihi ta degi ke einge ena. ‘Ungo mane embo tavo amburesora eto ainge aisova amo koto ta ganoka aisora’ ke ainge matu ohihi na arira <sup>22</sup> rate ungota degi erena embo amuna namei ta degi tumo aisuja embo amo koto ta ganoka

aisora. Eto embo amuna namei ta degi 'uta koan irae' ke aisuja embo avo council na ganoka aisuja. Eto embo amuna biso toro ke ijie amita namei amo embo sapura ke aisuja embo amina ari amita mine avo donda sasapura gosukari degi ai ta i bevere ta evekasi auvasuja. <sup>23</sup> Avo eto inena no hande God ta degi umbuto puvuto pene gaga ta tembasi ue no namei na no degi ta tumo etija avo hotembeto <sup>24</sup> God ta hande avo pene gaga engiti enda ta iketo pambuto namei ga peka kiti ejo, eto puvuto God ta hande umbuto pene gaga ta tembejo.

<sup>25</sup> Eto embo na umo koto ta ganoka aisi ue ke au ingito mane koto simba aisoa rate sau sau pambuto aja to ijie peka ejo eto peka ae amo koto eto embo amina umo judge ta ingeni ta ikau eto judge na umbuto police ta ingeni ta ikau eto police na umo tipura ta gosukaro toreto <sup>26</sup> mitie no sapura ta mine amo isapa te peni te ikitie iresoa.

#### *Iesu na tiha paiha ate poekena*

<sup>27</sup> Eto ke nei Moses ta kajari ai ta kogova, amo 'tiha paiha mane aisoa' ainge eora <sup>28</sup> rate na ungo ta degi erena embo amuna pamone kakara kito amita jo ta uje ue hotembuja amo jo ta tiha euja amo ari sapura euja <sup>29</sup> avo eto no titi be hena na au umo sapura aisoa amo kuruketo gosukejo pambai. Amo javotohora no hamo tapa hamo memenga kiari degi ta mane pambasuja rate donda vahai avo kiti ao iraesuja. <sup>30</sup> Eto no ingeni be na au ari sapura aisoa kito ingeni avo tiuketo gosukejo pambai amita be amo ingeni amina au no hamo tapa amo memenga kiari degi ta pambasuja avo eto javotoho amo donda avo kiti gosukejo.

#### *Pamone jimbuto toari amita ke Iesu na ate poekena*

*(Matthew 19:9, Mark 10:11-12, Luke 16:18)*

<sup>31</sup> Eto ke nei Moses ta kajari ai ta kogova amo 'Embo amuna ae toasi

uje ue kito amo ahari ta ari tapa avo kaeto ae ta ingeni ta iketo toasuja' ke ainge ijioire ingiova <sup>32</sup> rate na ungota degi erena. Eto embo amuna amita ae amo tiha paiha ae rate teho sio toau pambuto embo nei jimbasuja pamone amite ivu eha amite tiha eto eora eto ivu matu amina ae touja avo eto sapura amo amitara.

#### *Bada ta javo jigama eora ate poekena*

<sup>33</sup> Eto ke nei ohihi na ijioire ingiaova amo embo amuna ari do asi ke be na Bada ta javo ta aisuja avo mane toasuja rate aisuja amo Bada ta javo jigama etija avo eto. <sup>34</sup> Rate ungota degi erena, eto inena ke be pere aisi uje aisoa amo mane God ta javo jigama ue aisoa rate javo no pere avo jigama eto aisoa. Eto nei Utu ta javo ta mane ke be aisoa amo God ta irari degi avo embo. <sup>35</sup> Eto mane enda ta javo ta ke peni aisoa amo God ta utu tembari avo eto. Eto da Jerusalem ta javo mane jigama ue ke peni aisoa amo God Mamo Utu ta king ta da ra. Eto amo da no mane ra. <sup>36</sup> Eto nei amo no siro tu ta javo mane jigama ue ke peni aisoa, amita be amo ke peni retemo isapa do aisoa amina no siro tu ta ove mane au parara rete mo mume aisuja. <sup>37</sup> Eto inena teho 'aravora' aisona ainge rete 'mane aisona' ke ainge pere ijie eto javo no pere avo jigama ejo. Eto javo nei ta ke peni do aisoa ke ainge amo Satan ta degi puvuja," ainge Iesu na ena.

#### *Ari sapura mine ikeora avo Iesu na ate poekena*

*(Luke 6:29-30)*

<sup>38</sup> Eto Iesu na ke nei einge ena "Eto ke nei Moses ta kajari ta eto ingiova amo 'Eto embo na titi teto kurukasuja amo mine teto kurukasuja. Eto ti teto poekasuja amo mine teto poekasuja' <sup>39</sup> Rate na ungota degi erena, eto embo na no degi ta sapura do aisuja amo mine asi mane hotembasoa. Eto embo na no ovo be hena ta tasuja aherekejo ovo

anga hena ta tai. <sup>40</sup> Eto embo na no ombari asari umbasuja embo amita degi no pohuketo evari te tapa ikejo. <sup>41</sup> Eto Rome ta isoro embo vahai na au umo amita emo donda umbuto pambasoa kito degi isapa koso nembeto pambujo. <sup>42</sup> Eto embo amuna no donda umbasi penunu au ingito amita ikejo. Eto nei teho jigama aisi uje aisuja ikejo jigama ai.” ke ainge Iesu na ena.

*Kitoho embo osa ari avo Iesu na ate poekena*  
(Luke 6:27-28,32-36)

<sup>43</sup> Eto Iesu na ke nei einge ena “Ohihi na eore ingiaova ‘ungo ta namei kamei avo osa ue kitoho embo avo tumo evujo.’ ainge ijiaetera <sup>44</sup> rate na ungota degi ke einge erena, ungota kitoho embo osa evujo eto tini kambari embomeni avoembo pari evujo. <sup>45</sup> Eto ainge ue God Mamo Utu ta iriuja amita meni undi be aisova. Amita be amo God na ari ainge eoi iji na embo sasapura te javotoho te tapa hondate euja. Eto God na eoi ga na embo sasapura te javotoho te ta degi beuja. <sup>46</sup> Eto ungo osa eora embomeni avo pere osa ururovo God na ungota hande javotoho ikaja ke mane hotembasova. Ungo tax umbari embomeni uje ae eova rate enana te tapa osa mine ara ari avo kiarira. <sup>47</sup> Eto ungo na ungota namei kamei pere pekeova amo ari javotoho manera. Enana God kiae embomeni amite tapa ari ainge amo eora. <sup>48</sup> No Mama God Utu ta iriuja amina ari javotoho pere euja avo eto ainge nombo ari javotoho pere ue irivujo.”

## 6

*Hande naingeto ikasora avo Iesu na ate poekena*

<sup>1</sup> Eto Iesu na ke einge ena, “Ungo ari javotoho embo na ungo jakeka ara enana ta titi ta koto mane aisova. Eto ungo ari javotoho embo na kiora araha tambuta aisova amo ungota God Mamo utu ta iriuja na no ari ta mine javotoho mane ikasuja.

<sup>2</sup> Amo enana God jakeka pe na eora te jo te tapa ae embomeni donda ambu embo ta degi hande ikasi ue kito ‘church’ jo ta da tambuta hui huintie ikeora ainge avojo. Eto ari ainge ta mine amo embomeni na koto jakeka ara uje eora. Eto ungota degi ke be na erena enana ta ari javotoho ta mine matu umbere irae etija God na hande nei mane ikau umbasora. <sup>3</sup> Rate ungo hande ikasi ue kito embo nei avo kioro ondikari na ikevujō <sup>4</sup> eto ainge amo no hande do ondikari na ikasoa eto no ari javotoho do ondikari na ere oa amo no Mama God na kito no ari ta mine javotoho ikasuja.” ainge Iesu na ate poekena.

*Pari naingeto aisora avo Iesu na ate poekena*  
(Luke 11:2-4)

<sup>5</sup> Eto Iesu na ke einge ena “Eto ungo pari asi ue kito embo pari hamo na eora aingeko avojo. Enana amo embomeni na kito jakeka ara God ta jakeka ari bande jo ta eto degi peka ta araha tambuta ereto heteto pari eora eto ari ta mine amo embo na kito jakeka eora avoeto ungota degi erena, enana ta ari ta mine matu umbere irae etija. <sup>6</sup> Rate ungo God ta degi pari aisi uje aisova kito ondikari na ungota bande jo ta toreto bokiri ahureketo ungota Mama God ta degi penunu evujo eto ungota Mama na ondikari na do aisova avo kito mine javotoho ikasuja. <sup>7</sup> Eto enana God kiae embomeni na God be ingoja ke sio sao koso vahai be ijie pari eora <sup>8</sup> ainge avojo. Amita be amo ungo penunu ae pekota ereva amo ungota osaga deire ungota Mama God na matu kiarira <sup>9</sup> avoeto pari ta ke einge ijie evujo: Mama nangota, <sup>10</sup> Utu ta irioa javo no otohu aisora Utu ta titi jigihoe uje no eora ainge nombo enda ta ikejo puvuroi. <sup>11</sup> Nangota indari ikejo iji hekeri ta <sup>12</sup> eto embomeni na nangota degi ta do sasapura eora avo hotembeto tora ainge nombo nangota ari sasapura inena hotembeto tojo. <sup>13</sup> Engekari ta nango

kiti umbaojo, eto sapura ta nango oreke (Eto no jekahoka te sovera te usasa te datohe iresora Amen.)

<sup>14</sup>Eto ari sasapura hotembeto toari amita be amo eingera, eto ungo na embo ta ari sasapura hotembeto toasova ainge nombo ungota Mama God utu ta iriuja amina ungota ari sasapura hotembeto toasuja. <sup>15</sup>Rate ungo na embo ta ari sasapura hotembeto toae amo ungota Mama na ungota ari sasapura mane hotembeto toasuja.” ainge Iesu na ate poekena.

*God ke be ijie donda ajirekeora avo Iesu na ate poekena*

<sup>16</sup>Eto Iesu na ke nei einge ena “Enana hamo na pere God tumotepain ari embomeni na indari ajireketo tombu amisa na kuteto umo kutae teho iriora amo embo na kito jakeka ara eora avoeto ungota degi erena enana ta ari javotoho ta mine matu umbere irae etija eto nei mane God na ikau umbasora ari ainge avojo <sup>17</sup>Rate ungoni indari ajirekasi uje eto kito amo umo kutitie siro suvari ue evujo. <sup>18</sup>Eto ungota Mama God vahai ungota iji tapa iriuja amina ungota ajirekari avo ondikari na kito ungota hande javotoho ikasuja.” ainge Iesu na ate poekena.

*Donda umbuora avo Iesu na ate poekena*

*(Luke 12:33-34)*

<sup>19</sup>“Ungo enda ta donda hamo ta hamo ta umbavojo amita be amo ungota hajae vajae avo soan na kahumbeuja ain timbasuja, eto pegene embo na bande pejeta umbasora. <sup>20</sup>Rate God ta degi ta avo soan irae, ain irae pegene embo irae avoeto God ta irari degi ai ta hajae vajae nununga evujo. <sup>21</sup>Eto no donda irari degi ai ta no jo te hotembari te tapa iresuja.

*No hamo ta usasa*  
*(Luke 11:34-36)*

<sup>22</sup>Eto no titi amo no hamo ta usasara. Avo eto no titi javotoho na au no hamo tapa amo usasa pere aisuja.

<sup>23</sup>Rate titi javotoho ae amo hamo tapa amo mume pere aisuja eto jo te tapa mume kambujoro aisuja.

*Indari ombari asari ta ke Iesu na ate poekena*

*(Luke 16:13, 12:22-31)*

<sup>24</sup>Eto embo vahai amina embo heriso ta ke agi ari haite manera. Amina vahai osa ue nei tumo aisuja eto embo nei amita ke agi ue nei amita ke uje ae aisuja eto ainge nombo inena iji vahai amina God ta ke te koro ta ke te agi ari haite manera.

<sup>25</sup>Avo eto na ungota degi erena. Ungo do indito iresova eto do asuketo iresova avo hotembu hotembu avojo, eto no irari amo indari pere mane eto no hamo amo asukari pere manera. <sup>26</sup>Di i ta pambuora avo kivujo. Enana donda be koveto tureto umbuto harau ta mane ikeora rate ungota Mama Utu ta iriuja amina enana ta indari ikeoi indiora. Rate embo avo God ta degi peni bera eto di avo peni be manera. <sup>27</sup>Eto embo na hotembari isapamane na au amita enda ta irari iji koso mane aisuja. <sup>28</sup>Ungo bo naingeto asukaeteve avo eto mane osaga kesova rate i buji ove nei te nei te mitera avo kogue hotembevujo. Enana pure ae eto bo kembae <sup>29</sup>rate donda embo be King Solomon amita bo asukari amo i buji emita kiari sago javotoho ainge manera. <sup>30</sup>Rate God na i buji ta degi bo asukari javotoho ikeuja eto iji nei amo karaun eto enda ta beuja, rate ungo i vuji mane ungo embo avo eto God na ungota degi asukari mane ikaute? Rate ungo God tumo ta be ae eova. <sup>31</sup>Avo eto osaga kogue ‘Do asukaro’ ainge avojo. <sup>32</sup>Ke ainge amo God ke be ae embomeni na pere eora rate ungo donda ainge jigama eova amo ungota Mama God matu kiarira <sup>33</sup>avo eto kiti be kiti amo God ta javotoho ari titi jigari avo jombure evujo eto amina ungota indari donda te irari donda te unduresuja. <sup>34</sup>Iji vahai vahai amita osaga amo inono ra avo eto evito osaga do puvuresuja avo



mane hotembasova. Do puvuresuja avo evito kito aro tambu aisuja.”

## 7

*Embo nei ta ari sapura urumbari avo Iesu na ate poekena*  
(Luke 6:37-38,41-42)

<sup>1</sup> Iesu na ke einge ena, “Umo embo nei ta ari sapura mane urumbasoa <sup>2</sup> eto ainge aisoa amo ainge nombo God na no degi ta aisuja. Eto embo nei ta ari urumbasoa amo God na ari no avo no urumbari ta hajire avo au kesoa. <sup>3</sup> Eto ungota namei ta ari sapura isapa i sirivo ainge titi ta mitia avo ere kogova rate ungota ari sapura peni amo i uhu ainge titi ta mitia avo do eto kiae ere ove? <sup>4</sup> Eto namei ta degi ‘no titi ta i sirivo mitia kondikano?’ ke ainge ijie ungota titi i uhu na peiketija avo eto naingeto avo? <sup>5</sup> Ungo ari sapura ondiketo ke sokova ari embomeni eto ungo ta ari sapura i uhu ainge titi ta mitia avo kiti umbavo irae au javotoho na kon kon eto kogoue namei ta sapura isapa i sirivo ainge titi ta mitia avo kondikevu.

<sup>6</sup> Eto God ta ke amo Otohu avo eto God ta ke ingito ke be ae embomeni ta ikavojo enana ino o ainge hotembari irae avoeto enda ta hatikaro sapura ururou jandireketo ikari embo kambuto hevasuja.”

*God ta degi penunu ara Iesu na ate poekena*  
(Luke 11:9-13)

<sup>7</sup> Eto Iesu na ke ijie einge ena, “Penunu ijiro ikau umbasoa, jombure ururo ikau kesoa, bahihiri ururo God na pe umo embo hirikasuja. <sup>8</sup> Amita be amo embo amuna penunu aisuja amita degi God na ikasuja eto jombure aisuja embo amina tambasuja eto embo amuna bahihiri aisuja God na pe harikau embo amo torasuja. <sup>9</sup> Ungo nei nei meni hatira te ra. Eto no meni na no degi ta bread penunu aisuja amo atara amita degi mane ikasoa <sup>10</sup> eto umo o penunu aisuja amo o koso o mane ikasoa.

<sup>11</sup> Ungo embo sasapura rate naingeto ungota meniundi ta degi hande javotoho ikasova avo ungo kiarira. Eto ungota mama Utu ta iriuja amo hande embo be avo eto embo na amita degi penunu au javotoho pere ikasuja. <sup>12</sup> Eto Moses ta ke pepeni tapa te peroveta ta ate poekari tapa te amita ke susu be amo erevira. ‘Eto inena embo na ari javotoho do ao kesi uje ere ua avo pere amita degi ejo kioi’.”

*Eto embomeni na degi peni toto degi isapa ta pambasora avo Iesu na ate poekena*  
(Luke 13:24)

<sup>13</sup> “Eto ari sapura embomeni ta evekari degi amita pambari degi ai ta embomeni isapamane pahuore mimiseko euja ai ta pambavojo <sup>14</sup> rate degi pe isapa orare pe timbari avo jombure eto kito aita jeneki honeki ue pambuvujo. Amita tutumota irari datoho tambasova.

*Embo ta ari amo i ta be aingera avo Iesu na ate poekena*  
(Luke 6:43-44)

<sup>15</sup> Eto embo nei nei na God ta ke hande ue ate poekari sokova aisora avo eto be kogoue irivujo. Ungo God ta undurari o ‘sheep’ aingera eto enana o sheep ta ando asuketo puvuresora rate enana ta jota amo isoro o ra. <sup>16</sup> Avo eto enana amunure avo enana ta ari na harikau kesova ke amita be amo eingera. Esi aniso ai ta hambare be mane umbuora eto nei i koririva ai ta oga mane imbuora. <sup>17</sup> I javotoho na be javotoho euja eto i sapura na be sapura euja. <sup>18</sup> Eto nei indari i ta indahu mane puvuresuja eto indahu i ta indari javotoho mane puvuresuja <sup>19</sup> rate indahu i kito tapa andage eto jaro beto evekasuja. <sup>20</sup> Eto ainge nombo enana God ta ke sokova tirari embomeni ta ari na harikau enana amunure avo ungo be kesova.

*Bada na ‘Na umo kiaera’ aisuja*  
(Luke 13:25-27)

<sup>21</sup> Eto nau degi ta ‘Bada, Bada’ ijirari embomeni nei uhoho na God

ta simba ari degi ta mane torasora rate God Mama Utu ta iriuja amita ke agi eora embomeni amina pere torasora. <sup>22</sup> Eto ari sirikari iji puvurou embo isapamane na nau degi ta ke einge aisorsa, 'Bada, Bada dago javo no ta God ta ke hande eora, eto ahihi sasapura kurumbeora eto sovera no na ari nei te nei te ere ovora.' ke ainge aro ingito <sup>23</sup> ke mine enana ta degi einge aisona, 'Na ungo kiaera. Ungo ari sasapura embomeni avo eto ke nau agi ae ere ovova toto beto pambuvu,' ke ainge aisona."

*Bande heriso gerikari embo amita hih*

*(Luke 6:47-49)*

<sup>24</sup> "Avo eto embo amuna ke nau ingito agi aisuja embo amo kiari embo bera eto embo amina bande karu hamo ta gerikenu <sup>25</sup> ga beto umo muenga puvutuhunu pisara pajire puvuto bande tena rate burereketo beae amita be amo koro hamo ta avo eto. <sup>26</sup> Eto ke nau ingito agi ae embo amo embo amita hotembari irae bande hora ta gerikenu <sup>27</sup> ga beto umo muenga puvutuhunu pisara pajire puvuto bande koheketo benu umo na umbuto pambuna." ainge Iesu na ate poekena.

*Iesu amo kiari embo bera*

<sup>28</sup> Eto ke erevi tapa enu irae enu embomeni tapa tiri ta areto mitia amina ke avo ingito mani mini ea. <sup>29</sup> Amita be amo Iesu ta ate poekari amo enana ta ke pepeni kiari embomeni ta ke ainge mane kiari embo be na ate poekitia ainge ea.

## 8

*Iesu na enu embo kondena*  
*(Mark 1:40-45, Luke 5:12-16)*

<sup>1</sup> Eto Iesu tiri ta eto vovunu embo na ambo ta oroviketo bea. <sup>2</sup> Eto embo vahai huika na andirari avo eto osaga kogue mitiaetija amina puvuto paunge teteteri eto Iesu ta degi ke einge ena, "Bada, umo uje eto kito ejo ando nau javotoho ai." ainge enu Iesu na, "Na ainge uje ere ona." <sup>3</sup> eto amita ingeni jujuruketo tame

ue ke einge ena, "Umo javotoho e." ainge enu embo ta ando javotoho enu <sup>4</sup> Iesu na ke einge ena, "Inge! embomeni ta degi mane ao ingesora, rate titi tambu eto pambuto priest ta degi ejo no ando javotoho kito embo tapa au ingore eto Moses ta ke pepeni agi ue God ta hande pene gaga ta ikejo."

*Rome ta isoro titi jigari embo ta pure embo vahai avo Iesu na enu kondena*

*(Luke 7:1-10)*

<sup>5</sup> Eto Iesu na da Capernaum ta pahunu Rome ta isoro titi jigari embo vahai avo tambunu penunu einge ena, <sup>6</sup> "Bada, nau pure embo vahai na ambure umbuto isari irae bande jo ta sereketo memenga te osaga kogue mitia." ainge enu <sup>7</sup> Iesu na ingito ke einge ena, "Aravora, na pambuto embo avo ano kondasuja," ainge enu, <sup>8</sup> "Bada, ainge manera," ena, "Na embo sapura avo eto nau bande ta mane torasoa rate ai mitie pe na ejo nau pure embo kondai. Amo eingingera. <sup>9</sup> Namo te tapa nau embo okose ta sovera jigama ue pure eona avo eto na nau isoro embo ta degi pambu aisona pambasuja eto nei ta degi hae aisona huresuja eto nau pure embo ta degi einge e aisona aisuja avo eto ainge nombo ejo kondai." <sup>10</sup> ke ainge enu Iesu ingito mana mana eto embomeni amita ambota ere puvutuhua ta degi ke einge ena, "Na ungota degi erena, embo emina na tumota be ere ua. Na Israel enda ta Israel embo eingeko tambaera <sup>11</sup> eto ungota degi ke be erena God ta degi ta pondo iji puvurou sose embo ihane embo na puvuto Abraham te Isaac te Jacob te ga pondo aisorsa. <sup>12</sup> Rate enana Israel embomeni avo God ga irora javero ikena rate umbari uje ae eora avoembo God na gosukau araha ta pambuto mume ta mitie si ijie ti kakambuketo kiroro kiroro ijie irasora" <sup>13</sup> Ke ainge Iesu na embomeni ta degi eto isoro titi jigari embo ta einge ena, "Umo pambujo. Umo do



tumota ere oa avo ano kesoa.” ainge enu embo amita pure embo na iji amina kondena.

*Iesu na embomeni isapa mane kokondekena*

*(Mark 1:29-34, Luke 4:38-41)*

<sup>14</sup> Eto Iesu na Peter ta bande ta pambuto Peter ta imboti ambure hamo bevère unu besi ta sereketo mitinu kito <sup>15</sup> ingeni ta tame enu hamo bevère irae enu ereto Iesu indari undunu indina. <sup>16</sup> Eto mume sihukitinu embomeni na ahihi sasapura na torari embomeni isapamane umbuto Iesu ta degi puvua. Eto Iesu na amita ke na ahihi sasapura kurumbenu pahuo ambure be avo enu irae enu kokondekea. <sup>17</sup> Eto ari ainge aisuja amo Peroveta Isaiiah na matu kiti ta einge kajena, “Amina nangota memenga osaga ambure tapa umbuto pambasuja.” ainge Isaiiah na kajena.

*Ambotani nei uhoho na jo tapa na Iesu ambo ambo aera*  
*(Luke 9:57-62)*

<sup>18</sup> Eto Iesu na embo isapamane areto mitio kito umu jiroromba ovitihō ta pambasi uje eto ambotani ta degi ke enu e nga nununga eto pambasi uo <sup>19</sup> Judea embo ta ke pepeni ate poekari embo na Iesu ta degi ke einge ena, “Ate poekari embo. Umō nainge pambasi ere oe avo na umote pambasi nununga ere ona.” ainge enu <sup>20</sup> Iesu na ke mine einge ena, “O koropu na enda koveto to ta iriujā eto di na nga iketo iriujā rate embo ta Meni sereketo evari degi iraera,” ainge ena. <sup>21</sup> Embo nei amo Iesu ta ambotani vahai amina ke einge Iesu ta degi ena. “Bada, na pambasona te kiti pambuto nau mama ambija avo koveto ungote pambane.” ainge enu <sup>22</sup> Iesu na, “Na ambo ambo ue hae, ahihi amburari embo na ungo eonga hamo amburari embo kovasora.”

*Eto Iesu na enu pisara te eva piri te jamo ena*

*(Mark 4:35-41, Luke 8:22-25)*

<sup>23</sup> Eto Iesu na amita ambotani ga e nga ta bitito pahuo <sup>24</sup> pisara pajire be

puvuto umu ta tenu piri peni vahai puvuto e nga jo ta overekenu huhurumbeto beasi unu Iesu e nga jo ta evo unu <sup>25</sup> amita ambotani pambuto ujeo erenu, “Bada, nango sari ara ere ua, nango hondate e!” ainge eo <sup>26</sup> Iesu na, “Ungo do oju ere ove? Ungo na be tumota ae avo eto oju ere ova.” Ke ainge eto ereto pisara te eva piri te ta degi jamo ara ke enu eva jamo eto bisi bisi ena. <sup>27</sup> Eto embomeni na kito mani mini eto “Embo emo do aingere? Pisara te eva te na amita ke agi eto jamo etera,” ke ainge ea.

*Eto Iesu na embo heriso ahihi sasapura na andirari enu javotoho ea*  
*(Mark 5:1-20, Luke 8:26-39)*

<sup>28</sup> Eto umu ovitihō ta pambuto degi javo Gadara ai ta puvuto Iesu na embo heriso ahihi sasapura na andirari avo eto embo ikari sape ari panga pe ai ta mitiaetera avo tambuna. Eto isoro embo avo eto embomeni na degi aita isa pambae joru ere uatera. <sup>29</sup> Eto ahihi sasapura na Iesu kito gagaha ijie einge ea, “God ta Meni umu nangota degi do ao? Nango iji kombu te memenga kesora iji avo puvurae kiti ta nango ta hajire ikaote?” ke ainge <sup>30</sup> eto enana ta engitita o ohu isapamane mitio kito <sup>31</sup> Iesu ta degi penunu einge ea, “Eto umu nango kurumbasi uje eto kito kurumbejo o ohu oromita jo ta pambare,” ainge eo <sup>32</sup> Iesu na, “Ungo pambuvu” ainge enu o ohu ta jo ta pambuo o tapa na heti i ta eto umu jorembe ta beto umu ta indito sasari ea. <sup>33</sup> Eto o ohu ta simba ari embopo na ari avo kito tutuveto da ta pambuto ahihi sasapura na andirari embopo ta degi vasiri do puvuna avo tirio ingia, <sup>34</sup> eto da embomeni tapa na Iesu kesi uje eto pambua. Eto pambuto kito Iesu enana ta degi avo toto pambaja ke ea.

## 9

*Iesu na utu meni-amburari embo enu kondena*  
*(Mark 2:1-12, Luke 5:17-26)*

<sup>1</sup> Eto Iesu na e nga ta bitito umo ovitihō ta pambuto amita da ta puvuna. <sup>2</sup> Eto embo vahai utu meni-amburari avo eto besi ta serekari mitiaetija avo embomeni na umbuto Iesu ta degi puvuo enana be tumota ere ua avo Iesu na kito utu meni-amburari embo ta degi ke einge ena, “No ari sasapura avo hotembeto ere toturitona avo eto tunga javotoho e.” ainge enu, <sup>3</sup> Judea embomeni ta ke pepeni kiari embopo na amita ke ingito ungo eonga ke mine ara ea, <sup>4</sup> Eto enana ta hotembari do ere puvutohua avo Iesu na kito enana ta degi ke einge ena. “Ungota jo ta hotembari sapura do eto ere puvutohoi? <sup>5</sup> Ari haiteko davore? Eto embo na no ari sasapura ere toturitona aisuja amo ari ngahia retemo embo na umo kondeto ereto pambu aisuja amo ari ngahia re? <sup>6</sup> Ungo ke be ae ere ova avo eto God na embo ta Meni ta degi sovera ikari amina enda ta embomeni ta ari sasapura hotembeto touja avo ungo ke be ava ari erevi aisona,” ainge enana ta degi eto hapereketo utu meni-amburari embo ta degi einge ena, “Ereto no besi siriketo umbuto bande ta pambujo,” ainge enu, <sup>7</sup> ereto bande ta pahunu <sup>8</sup> embomeni na kito joru ue God na embo ta degi sovera isapamane ikena avo hotembeto God jakeka ea.

*Iesu na Matthew umbunu ambo ambo ena*

*(Mark 2:13-17, Luke 5:27-32)*

<sup>9</sup> Eto Iesu na degi avo toto pahue embo ta tax sirikari embo javo Matthew avo pure ari besi ta arumbeto mitinu kito ambo ambo aja ke enu Matthew ereto Iesu ambo ambo ena. <sup>10</sup> Eto Iesu na Matthew ta bande ta indie mitinu tax sirikari embopo te Moses ta ke pepeni poekari embopo te na puvuto Iesu te amita ambotani te ga arumbeto indie mitio, <sup>11</sup> enana Pharisees embomeni na ari avo kito Iesu ta ambotani ta degi einge eto ingia, “Ungota ate poekari embo na do eto embo sasapura ga ere indei?” <sup>12</sup> ke avo ijio Iesu na

ingito mine einge ena, “Doctor na ambure umbae embomeni ta degi mane pambuja rate ambure umbari embomeni ta degi pere pambuja. <sup>13</sup> Eto God ta ke kajari ta einge mitia, ‘Ungota o teto pene gaga ta tembari avo na uje ae rate ungo embomeni kito jo ururou osa ava uje ere ona.’ ke amita be avo deire pambuto ungo eonga siriketo kivujo. Na puvuto embo jajavotoho mane rate sasapura avo ano kokonjeketo God ta degi puvurora oru ue ere ona.”

*Ajirekari be avo Iesu na ate poekena*

*(Mark 2:18-22, Luke 5:33-39)*

<sup>14</sup> Eto John bapataito ari embo ta ambotani nei uhoho na Iesu ta degi puvuto einge eto ingia, “Enana Pharisee embomeni te nango te ungotenau ari matu avo eto matuainge donda ajireketo eora rate do eto ambotani no na donda ajirekae teho iriore?” ainge eo <sup>15</sup> Iesu na ke mine einge ena, “Eto embo na kakara jimbuto pondo aisuja amo amita namei kamei na ajirekari hotembae tunga javotoho na indiora rate embo pambasuja amo namei kamei na osaga kogue indari ajirekasora ainge nombo na irae asona iji puvuto ere hua amikote enana osaga kogue indari ajirekasora.

<sup>16</sup> Eto ari mamatu ta ari amo bande sisi ainge pasarira. Eto embo na sisi eha ojeto kaeto hirasuja amo iji na kajau giroro eto tohekasuja, ehako ga beasuja. <sup>17</sup> Eto nei amo kae harau gogore na jasari ai ta kae tureto mane ikeora burereketo beasuja avo eto harau eha geriketo tureto ai ta ikasuja amo javotoho na iresuja.”

*Iesu na Judea ta embo okose ta iae matu amburari avo enu vasiri te erena*

*(Mark 5:21-43, Luke 8:40-56)*

<sup>18</sup> Eto Iesu na ke ainge ijie mitinu Judea ta embo okose vahai na amita degi puvuto paunge teteri eto ke einge ena, “Nau iae eha ahoi umo pambuto ingeni tembao vasiri te eraja ere puvutuhona.” ainge enu

19 Iesu te amita ambotani te amiga pambua. 20 Eto degi ta pahuo pamone vahai amo jua tapa 12 amita jo ta sasaga ere vovuatiya amina Iesu kito 21 einge hotembena, “na amita bo tame aisona amo kondasona,” ainge hotembitie kuhota puvuto amita bo petiki ta tame unu 22 Iesu egerembeto kito ke einge ena, “Nau iae tunga javotoho ejo. Umo na tumota be ere oa avo eto kondasoa,” ainge ijinu amikote pamone amo kondena.

23 Eto Iesu na Judea ta embo okose ta bande ta puvuto torenu bijapuri ari embomeni puvuto sisi sasi ijie mitio kito 24 “Ungo araha ta pambuvu! Kakara emo aburaera teho evo ere ua,” ainge enu enana ke avo ingito kege ganini eo. 25 Iesu na enu tambuta pahuo kakara sereketo mitina ai ta toreto amita ingeni ta jiginu vasiri te erena 26 Eto ari ainge ena amita duru avo enda embomeni tapa ingia.

#### *Iesu na titi kuru ari embo heriso enu titi kundeto kia*

27 Eto Iesu na degi avo toto pahunu titi poan ari embo heriso na duru ingito itiketo Iesu ambo ambo eto gagaha ijie ke einge ea, “David ta Meni, nango ta osaga kito jo e!” ainge ijio 28 Iesu bande jo ta torenu titi poan ari embopo ambota toreo, Iesu na enana ta degi einge eto ingina, “Eto ungo hotembiteva amo na ungota titi hirikari haite avo hotembitevete.” ainge enu “Bada, nango ainge ere hotembitera” ke ainge eo 29 Iesu na enana ta titi ta tame ue ke einge ena, “Ungo ke be do ereva ainge puvuresuja,” ainge ijinu 30 titi hirikenu kia. Eto Iesu na enana ta degi ke ngahia na einge ena, “Ari erevi embo nei ta degi mane avo ingesora,” ainge ena.

31 Rate enana Iesu ta ke agi ae eto pambuto enana ta embomeni tapa ta degi eo ingia.

#### *Iesu na enu ke ambu embo itiketo ke ena*

32 Eto titi kuru ari embo ta titi hirikenu pahuo embo vahai ahihi sapura na torari avoeto ke ambu mitiaetija avo embomeni na umbuto puvuo 33 Iesu na ahihi sapura kurumbenu pahuo embo amo itiketo ke enu embomeni na kito mani mini eto ke einge ea, “Nango ari einge Israel enda ta kiae pekota ari erevi ere kogora.” ainge ea 34 rate enana Pharisee embomeni na kito ungo eonga ari ainge avo asi ue Iesu ta degi tini kambari ue ke einge ea, “Amo ahihi sasapura ta okose na amita sovera ikeuja avoeto ahihi sasapura ere kurumbitia.”

#### *Iesu na embomeni kogunu jo ena*

35 Eto Iesu na da tapa ta tehue Judea embomeni ta giu ari bande amita duru javotoho avo hande ue embomeni ta memenga ambure enu irae ena. 36 Eto embomeni hamo mine umbae ue osaga neite neite kogue mitiaetera avo Iesu na kina rate hondate ari irae o sheep simba eora embo aingeko irae kito jo ena. 37 Avoeto amita ambotani ta degi ke einge ena, “Be na pupusumbeto sari ere ua rate ondeto umbari embo isapamane mane 38 avoeto i be mamota degi penunu evujo pure embo nei ikau be ondare.” ainge Iesu na ena.

## 10

#### *Iesu na apostel tapa 12 umbuna (Mark 3:13-19, Luke 6:12-16)*

1 Eto Iesu na amita ambotani 12 jage enu vahai ta puvuo enana ahihi sasapura kurumbara ambure nei te neite aro irae aja sovera ikenu umbua. 2 Apostel 12 amita javo amo erevira: kiti amo Simon Peter te amita namei Andrew te ra, nei amo embo Zebedee ta meni heriso James te John te ra, 3 eto nei amo Philip te Bartholomew, eto nei amo Thomas amite matu tax umbari embo, javo Matthew amite ra, eto nei amo Alphaeus ta meni James amite Thaddeus te ra eto 4 nei Simon ra (embo amita jo vahai embomeni na Rome ta gavamani isoro na taekasi uje ea.)

eto embo nei amo Judas da Kerioth embo te amina Iesu umbuto isoro embomeni ta ingeni ta ikena.

*Apostel 12 amina pure ara ikenu pambua*

*(Mark 6:7-13, Luke 9:1-6)*

<sup>5</sup> Eto Apostel 12 avo Iesu na ikenu pambasi uo onde katari ke einge ena, “Ungo enda nei embo ta enda ta mane pambasova eto Samaria embomeni ta da ta mane pambasova <sup>6</sup> rate Israel embomeni o sheep na maine pambarako ere ora amita degi pambuto <sup>7</sup> ke erevi hande evujo. ‘God na tohota embomeni siriketo umbuto titi jigésuja iji puvuto ere hua’ ainge ijie <sup>8</sup> ambure umbari embomeni evujo kokondekare eto amburari amite tapa evujo vasiri te erare eto hamo ta ambure nei te nei te tapa avo evujo hamo javotoho are eto ahihi sasapura kurumbevujo pambare. Eto ungo sovera umbeva amo koro ikae teho umbeva aingeto koro umbari mane hotembasova rate embo hondate ari javotoho evujo. <sup>9</sup> Ungo koro tapa mane juruketo umbuto pambasova <sup>10</sup> eto nei ombari asari te utu goru nei te eti savo te tapa mane umbuto pambasova, amita be amo ungo pure javotoho aisova avoeto embomeni na ungo unduresora. <sup>11</sup> Eto ere pahuma da ta puvuto toravo embo javotoho amuna ungo peketo unduresi aisuja amita bande ta toreto mitima pure irae au pambasova. <sup>12</sup> Eto bande ta toreto ‘Peka ungota degi iroi’ ainge evujo. <sup>13</sup> Eto bande amita embomeni na ungo osa ue pekasora amo javotoho ari enana ta degi iresuja rate enana ungo mine pekae asora amo ungota javotoho ari enana ta degi iketeva avo taekevujo <sup>14</sup> Eto da damina ungo pekae osa ae aisora eto ungota ke ingari uje ae aisora amo ungota utu oniho jaevekevujo beau toto pambuvujo. <sup>15</sup> Na ungota degi ke be erena, iji kombu ari sirikari iji te da ungo pekae aisora amita embomeni ta degi God na hajire ngahia be ngahia

na ikau da Sodom te Gomorrah te ta embomeni na isapa kesora aingeko mane kesora.

*Memenga osaga kiari iji puvuresuja*

*(Mark 13:9-13, Luke 21:12-17)*

<sup>16</sup> Ingivujo! Ungo ikari embo nana ungo o sheep umbuto kitoho o ta ikarako ere ona avoeto ungota pambari degi jireki poeki eto kogue siro jigama ue ari sasapura tapa hotembae pambuvujo. <sup>17</sup> Eto be kivujo. Embomeni na ungo andito umbuto ikaro koto ta hetasova nei Judea ta giu ari bande ai ta ungo esi na ejembaro memenga kesova. <sup>18</sup> Eto na avoembo embo na ungo kings te enda titi jigari embopo te ta titi ta ganoka ae ikaro heteto ke nau tapa avo avo ingesora. <sup>19</sup> Eto ungo koto asora iji te ke do aisova eto ke naingeto aisova avo hotembavujo. Iji amina ke do aisova amo God na ikau aisova <sup>20</sup> Eto ke hande aisova amo ungota mane aisuja rate ungota Mama God ta Ahihi na ijirope no ta eto puvuresuja. <sup>21</sup> Eto iji puvuresuja amikote embo na namei kitoho embo na taro amburora enana ta ingeni ta iketo toasora ainge nombo mamone na meniundi ta degi aisora. Eto meniundi na ereto emone mamone kitoho embo na taro amburoja iketo toasora. <sup>22</sup> Eto ungo nau javo vahai avoeto embo tapa na ungo ta degi tini kambari aisora rate sovera eto irirovo tutumota God na ungo orekasuja. <sup>23</sup> Rate da vahai na au memenga kesova da avo toto oju tutuveto pambuto da nei ta irivujo eto emore ke be na erena ungota ke hande ari pure Israel enda ta da tapa mane avo iraesuja rate Embo ta Meni kiti puvuresuja. <sup>24</sup> Ate poekari embo avo nombora kiari jombure ari meni avo isapara eto nei titi jigari embo amo okosera te amita pure embomeni amo isapa ra. <sup>25</sup> Avoeto atepoekari embo ta ari do aingere ke aisora avo kiari jombure ari meni ta ari ainge nombo ke aisora. Eto nei titijigari embo ta ari amo sapura ke



aisora amo pure embomeni te tapa ari sapura ke aisora. Ke amita be amo embomeni na na Satan ke eora avoeto ungota ari kito urumbitie Satan ta pure ari embomeni ke aisora.

*Ungo embomeni mane joru aisova  
(Luke 12:2-7)*

<sup>26</sup> Avo eto ungo joru avojo. God ta ke matu ahurekari tapa hirikano kesova. <sup>27</sup> Eto hi te kumumu ke na erena ungo iji te da tambuta isara na aisova. <sup>28</sup> Eto ainge ijie embo mane joru aisova. Embo amo tari amburari haite ra te embo ta ahihi tari inono aera. Rate God amo embo ta hamo te ahihi te tapa tau amburou ari sapura embo ta hajire umbari degi ai ta memenga ari kiari haitera avo eto God vahai joru evujo. <sup>29</sup> Eto di siripeta ta mine amo peni mane ra heriso avo 2 toea na ombuto umbaetera aingera rate di siripeta vahai na sio mane enda ta beto amburesuja rate amita amburari iji puvurou ungota Mama God na aravora ijie kogurou beasuja. <sup>30</sup> Eto nei amo ungota uta ta siro tu doingere matu God na eteketo kiarira <sup>31</sup> Avoeto embomeni na ungota degi do aisora avo joru avojo. Ungo nombora. Ungo di siripeta aingeko maniera.

*“Nango Keriso ta tohora” ainge  
aisora  
(Luke 12:8-9)*

<sup>32</sup> Eto embo amuna ‘Na Keriso ke be ijie ambo ambo ere ona avo eto na amita tohora’ ke ainge embomeni ta degi aisuja amo embo avo naura ainge Utu ta nau Mama ta degi aisona, <sup>33</sup> rate embo amuna embomeni ta titi ta na ke be ae aisuja amo Utu ta God ta degi embo avo naura ke mane aisona.

*Na peka umbari embo mane rate  
na isoro embora  
(Luke 12:51-53, 14:26-27)*

<sup>34</sup> Na enda embo ta peka umbuto puvurari hotembavojo, na peka umbari embo mane rate isoro umbari embora. <sup>35</sup> Na puvuto ere ona amo meni na ereto mamo ga jujune aisuja, iae na ereto e ga jujune aisuja

eto nei amo imi na ereto imbota ga jujune aisuja. <sup>36</sup> Eto ke nau avoembo embo ta kito ho embo be amo amita javo vahai na aisora.

<sup>37</sup> Eto embo amuna amita e te mamo te osa ue na osa ae aisora amo ambotani nau ari haite maniera. Eto nei amo embo amuna amita meni te iae osa ue na osa ae aisuja amo ambotani nau ari haite maniera. <sup>38</sup> Eto embo amuna amita i atahu umbuto na hatiresona tain ai ta haito pambari uje ae aisuja amo ambotani nau ari haite maniera.

<sup>39</sup> Eto embo amuna vasiri eonga ue uje amita ta pere pambasuja amita vasiri avo beto pambau irae aisuja. Rate embo amuna namo avoembo amita uje tapa jene ambu eto iresuja embo amina vasiri be avo tambasuja.”

*Ari ta mine God na ikau umbasora  
(Mark 9:41)*

<sup>40</sup> “Eto ke nau ijie pahurovo embo amuna ungo kito javo katitie besi tiresuja amo na ungo ta ikari embo avoeto nau degi ta arako aisuja eto Mama God amo ikari embo nau avoeto amita degi ta arako aisuja. <sup>41</sup> Eto God ta ke hande ari embo na God ta degi mine umbasuja ainge nombo God ta ke hande ari embo avoeto peketo omena aisuja embo amite tapa God na hande ikau umbasuja. Eto embo javotoho avo embo na kito peketo omena aisuja embo amiga tapa God ta degi hande umbasuja. <sup>42</sup> Eto ke be erena amo embo amuna nau ambotani vahai kito ambotani nau avoeto umo jamo ikau indesuja embo amo God na hande ikau umbasuja.”

## 11

<sup>1</sup> Eto Iesu na amita ambotani 12 ainge ke erevi ate poekenu irae enu da nei nei da amita engitita embomeni ate poekasi eto God ta ke hande asi da avo toto pambuna.

*John Bapataito ari embo ta ke agi  
ari embopo Iesu ta degi puvua  
(Luke 7:18-35)*

<sup>2</sup> Eto John Bapataito ari embo tipura ta mitie Keriso na ari tapa

do do ena avo duru ingito amita ke agi ari embo ikenu Iesu ta degi pambuto einge eto ingia, <sup>3</sup> “John na embo puvuresi unu duru ikena amo umo rete mo o embo amo ambota puvurou avo ejo ingore,” <sup>4</sup> ke ainge eo Iesu na enana ta degi ke mine einge ena, “Eto do ere kogova eto do ere ingihova avo pambuto John ta evujo ingoi. Ari amo erevira: <sup>5</sup> titi va-haikari embomeni titi hiriketei ere kogora, popora embomeni hae ere ora, ando sapura embomeni ando javotoho ere ua, onde susundukari embomeni onde ahimbetere ere ingihora amburari embomeni vasiri te ere kokondikitera, eto hoivo embomeni ta degi duru javotoho ke hande ere ore ingihora. <sup>6</sup> Eto na tumota ue ke be ijie embomeni na tunga javotoho be ere ora, ainge pambuto <sup>7</sup> John ta evujo ingoi” ainge enu John ta ke agi ari embomeni pambasi uo Iesu na embomeni ta degi ke einge ena, “Eto John oja-gatambuta mitina ai ta ungo do kesi pahave? Sasaha pisara na kajeoi ujiji euja avo kesi pahavete? <sup>8</sup> Nei kiari bo ove javotoho asuketo euja avo kesi pahavete? Bo ainge amo King ta bande ta pambuto kiaeteva. <sup>9</sup> Rate evujo ingone, amo peroveta vahai kesi pahavete? Amo peroveta be avo pambuto kogava <sup>10</sup> amita be amo erevira. Peroveta matu amina God ta ke einge kajari mitia ‘God na amita pure meni ta einge eria, Na nau duru hande ari embo kiti ikano pambuto no pambari degi nununga aisuja’ ke kajari ainge mitia amo John puvuresuja amita ke ra, <sup>11</sup> Avo eto ungota degi erena, embo nombo be nombo ae pekota amo John na ena. Eto God na tohota embomeni siriketo umbuto titi jigari iji puvuresuja amita duru avo John na hande uija avo eto John amo nombokora rate embo amuna God ta titi jigari ta torasuja embo amo John nembeto nombo be aisuja. <sup>12</sup> Rate John ta ke hande ari iji te eto puvuto eha oroho emite embomeni na God ta titi jigari ta torasi uje ue sunumbo sunumbo

ue putuhore embo sasapura na ai ta torasi embo nei mima mama ue ere puvutuhora. <sup>13</sup> Eto John ta iji kiti ta amo peroveta tapa eto Moses ta ke pepeni amite tapa na God ta titi jigari ta ke ere ijiaetera amo peroveta Elijah ehako puvuresuja ainge ea <sup>14</sup> avoeto ungo enana ta ke avo ke be ari haite kito John ta ari amo Elijah ta ari inono ra ainge kiaeteva. <sup>15</sup> Eto ungota onde irirou kito ke erevi ingivujo.

<sup>16</sup> Eto embomeni eha mitera amita ari mo do aingekore? Amo meni isasaraho na da tambuta arumbeto boru jumbarako ere ora nei uhoho na ereto <sup>17</sup> ‘Nango jimbari ta sesena asi ue ire tivasi uje etera rate ungo ire tivari uje ae, nei embo ambija avo sesena ue si asi uje etera rate ungo si ari uje ae’ ari aingeko ove <sup>18</sup> John puvuritaja, eto amina indari ajirekitaja nei wine indae uija avo embomeni na kito ‘Ahihi sapura na toritaja avoeto ere ua’ ainge ijiera. <sup>19</sup> Eto Embo ta Meni puvija amina indari te wine te tapa indiuja avoeto embomeni na kito ‘Embo erevi kivu, amo okope undurari embora eto jai indari embora amina tax koro umbari embomeni amite embo sasapura nei te nei te ga namei euja’ ainge eora rate God ta ari be avo kito ke be aisora” ainge Iesu na ena.

*Da nei nei avo Iesu ke be ae ra  
(Luke 10:13-15)*

<sup>20</sup> Eto da nei nei ai ta Iesu na ari sovera nei te nei te ena avo embomeni na kito ari sasapura toto egerembae avoeto da amita embomeni avo Iesu na ke ngahia na einge ena, <sup>21</sup> “Oio da Chorazin te da Bethsaida te ta embomeni ungota degi osaga pajire be puvuresuja. Eto ari sovera nei te nei te ungo keva avo da Tyre te Sidon te ta jo ta ari ainge aetena amo amita embomeni na ari sasapura matu toasi bo baiki na kajari avo asuketo amisa na kutaetera rate ungo na ari sasapura toari uje aera. <sup>22</sup> Na ungota degi ke be na erena, God na ari siriketo hajire ikari iji te ungo na hajire ngahia be avo



kesova da Tyre te da Sidon te da embomeni na osaga kesora aingeko mane kesova. <sup>23</sup> Eto ungo da Capernaum embomeni ungo eonga sovera ungota na ereto God ta degi bitesi ere ovete? Avo God na kito umbuto gosukau Satan ta degi beasova. Eto ari sovera nei te nei te ungota da ta uena avo da Sodom ta aetena amo da Sodom embomeni na kito ke be aetera avoeto mane evekaetija. <sup>24</sup> Avoeto God na ari sirikari iji te ungota ari sasapura avoeto osaga peni vahai ikau kesova eto da Sodom embomeni na isapa kesora aingeko mane.” ainge Iesu na ena.

*Nau degi ta jangu indesi have!*  
(Luke 10:21-22)

<sup>25</sup> Eto iji amikote Iesu na ke be ijie God ta degi einge ena, “Mama God, Utu te enda te ta Bada, kiari no erevi avo ondiketei siro peni embomeni na kiaera rate kiari irae embomeni ta degi hirikete ere kogora avoeto na umo jakeka erena, <sup>26</sup> Mama uje no re javotohora!” <sup>27</sup> ainge eto embomeni ta degi ke einge ena, “Nau Mama God na amita pure tapa ingeni nau ta ikena. Eto God Mamo vahai na amita Meni ta ari be kiarira eto Meni vahai amina Mamo God ta ari tapa kiuja eto embo Meni sirikasuja amina pere kesora.

<sup>28</sup> Avo eto ungo donda bouka umbari avo eto pegogo embomeni nau degi ta have jangu indari ikane. <sup>29</sup> Eto namo ga kaju evujo eto vahaita ue ungo ate poekane. Na ngahia ari embo mane avo eto ungota ahihi mine umbuto sovera aisuja <sup>30</sup> Eto ungotena pure vahaita ue bouka umbuto osaga mane kesova.”

## 12

*God ta jangu indari iji avo Iesu na ate poekena*  
(Mark 2:23-28, Luke 6:1-5)

<sup>1</sup> Eto iji isapa amita ambota God ta jangu indari iji amina Iesu te amita ambotani te na degi amo embo ta rice pure jo ta avo eto pahue Iesu ta ambotani na beuje unu rice isapa

poeto umbuto india. <sup>2</sup> Ari avo Pharisee embomeni na kito Iesu ta degi ta ke einge ea, “Amo God ta jangu indari iji rate do eto no ambotani na nangota ke pepeni poeketo pure ere ore!” ainge eo <sup>3</sup> Iesu na ke mine einge ena, “Ungota ohihi David na ari ainge nombu ena avo ungo ke eteketo kiaere? Iji vahai amina amite amita embomeni te na beuje unu indari nei tambae <sup>4</sup> eto God ta bande ta toreto bread matu God ta degi hande ikari avo umbuto india. Eto bread amo ke pepeni avo eto Priests na pere indiora rate beuje avo eto bread umbuto india. <sup>5</sup> Eto nei amo Moses ta ke pepeni kajari ai ta ke vahai mitia avo Priests na temple jo ta God ta jangu indari iji te pure eora amo ke pepeni poekeora rate amo enana ta pure avo eto eora avo eto amita sapura irae. <sup>6</sup> Na ungota degi erena, Temple ta ari avo ari eha nau degi ta eto puvuja amina nembitia <sup>7</sup> amita be amo God ta ke ta einge kajarira. ‘Amo ungota o teto heveto pene ikari mane rate jo ari avo uje ere ona.’ ainge God na eria eto ke emita be kiaeteva amo ungo na ari sapura ae embomeni erevi avo mane pehumba aeteva <sup>8</sup> ke be amo Embo ta Meni amo God ta jangu indari iji amita simba ari embora.” ainge Iesu na ate poekena.

*Ingeni meni amburari embo avo Iesu na enu ingeni javotoho ena*  
(Mark 3:1-6, Luke 6:6-11)

<sup>9</sup> Eto Iesu na degi avo toto God ta pari ari bande ta torena. <sup>10</sup> Eto ai ta embo ingeni meni-amburari mitina avo eto embomeni na Iesu koto ta pehumba asi pambuto einge eto ingia, “Eto embo na God ta jangu indari iji te embo au kondasuja amo nangota ke pepeni poekate?” ke ainge eo, <sup>11</sup> Iesu na ke mine einge ena, “Eto ungo embo vahai ta o sheep na hoto tu be ta beasuja amo o mamu na beto ohikau bitoute? aisuja, <sup>12</sup> eto o sheep ta mine amo embo ta mine ainge mane, isapara, avo eto embo na God ta jangu indari iji te embo

nei hondate aisuja amina ungotenau ke pepeni mane poekasuja” ke ainge Iesu na embomeni ta degi ijie <sup>13</sup> ingeni meni-amburari embo ta degi ke einge ena, “No ingeni jujuruke” ainge enu ingeni jujurukenu ingeni nei javotoho amiga inono ena. <sup>14</sup> Ari avo Pharisee embomeni na kito tumo eto degi amo toto pambuto naingeto Iesu taro amburesuja avo itiketo ke kasea.

*Iesu amo God ta ke agi ari Meni ra*

<sup>15</sup> Eto Pharisee embomeni na Iesu taro amburoja ke kasea avo kito degi avo toto pahunu embomeni isapamane ambo ambo ue pambua. Eto ambure embomeni avo Iesu na kito enu kokondekeo <sup>16</sup> tapa do ena avo ke hande eore amita javo peni euja taekena. <sup>17</sup> Eto ke ainge ena amita be amo God na peroveta Isaiah ta degi ke einge enu kajena avo puvuroja ena, <sup>18</sup> “Nau pure ari meni siriketo umbena amo erevira. Na embo erevi osa ere ona eto amita ari tapa kogue tunga javotoho ere ona. Na amita degi Ahihi nau ikano beto torau embo tapa ta ari siriketo hajire ikasona amita duru avo enda tapa ta hande aisuja. <sup>19</sup> Eto amina gagaha eto boru jumbari ke mane aisuja. Eto da tambuta heteto ke isara na mane aisuja. <sup>20</sup> Rate amina ivo ambu embomeni orero orero eto simba ue hondate ara uje eora embomeni avo jo au pure ngahia au irae au ari jajavotoho pere hetasuja. <sup>21</sup> Eto enda tapa na nau pure ari meni kogue ari javotoho puvuresuja avo hotembitie tunga javotoho aisora.” ainge enu Peroveta Isaiah na kajena.

*Satan ta sovera avo Iesu ta sovera na nembena*

*(Mark 3:20-30, Luke 11:14-23)*

<sup>22</sup> Eto embo vahai ahihi sapura na torari avo eto pe vahaikari eto titi vahaikari avo embo na Iesu ta degi umbuto puvuo Iesu na enu titi te pe te hirikenu kogue ke ena. <sup>23</sup> Eto Iesu ta ari avo embomeni na kito mani mini ue ke einge mine ara ea. “Embo emo ungotenau hondate ari embo David

ta Meni eha puveite?” <sup>24</sup> Eto Pharisee embo na ke avo ingito tumo ue ke mine einge ea, “Ahihi sasapura ta titi jigari javo Beelzebul amina sovera embo emita degi ikitioi amina ahihi sasapura kurumbeuja.” ke ainge eo <sup>25</sup> Iesu na enana ta jo kito ke einge ena. “Ungo do ere hotembiteve? Eto enda vahai na ereto kateketo eonga bita eto isoro aisora enda amo ivo ambu eto iji koso mane iresuja. Eto da retemo javo vahai na kateketo isoro aisora amo sapura be eto irae aisuja, <sup>26</sup> eto ainge nombo Satan ta pure ari embomeni na ungo oenga kateketo eonga bita eto isoro aetera amo matu irae aetera. <sup>27</sup> Eto na ahihi sasapura Beelzebul ta sovera na kurumbari ke ereva rate ungota ambotani na ahihi sasapura kurumbeora amo sovera amuta na ere ore? Eto ungota ambotani na ahihi sasapura kurumbeora avoeto enana na ungota ari avo matu siriketo kito sapura ke erera. <sup>28</sup> Amo Beelzebul ta sovera na ae rate God ta Ahihi na sovera ikitioi ahihi sasapura kurumbeona. Eto ari nau avo kogue God ta titi jigari iji ungota degi puvija avo ke be evujo. <sup>29</sup> Eto nei amo embo na buvure embo ta bande pejeto kiti andiresuja kito amita bande pejeto donda pegene aisuja. Kiti andirae amo mane pegene aisuja. <sup>30</sup> Eto ke be amo embo amuna namoga kajuae aisuja amo nau kitoho aisuja eto nei o togo jigari embo namoga pure aisora rate namoga pure ae embomeni amo kitoho eto o ujekari embomeni pere ra. <sup>31</sup> Avo eto ungota degi erena embo na ari sapura tapa do aisuja pe na eto ari na amo God na hotembeto toari haitera, rate embo amuna God ta Ahihi Otohu ta degi ke sapura aisuja. Ungo na ere ova avo God na mane hotembeto toasuja. <sup>32</sup> Eto embo amuna Embo ta Meni ta degi ke sapura aisuja amo God na hotembeto toari haite ra. Rate embo na Ahihi Otohu ta degi ke sapura do aisuja ke avo God na matu te eha te eto ambota mane hotembeto toasuja.

*I be javotoho te sapura te  
(Luke 6:43-45)*

<sup>33</sup> Eto i javotoho amita be amo javotohora eto i sapura ta be amo sapurara. Eto i javotoho retemo sapura re amo i be na kito teka eora. <sup>34</sup> Ungo o koso o ta meni undira, ungo embomeni sasapura avo eto ke javotoho ari inono ae ra. Eto jo enetasuja amo pe ta puvuresuja. <sup>35</sup> Eto embo javotoho na ke hande asi jo ta jombure aisuja amo javotoho tambuto hande ikasuja, rate embo sapura na ke hande aisi jo ta jombure aisuja amo ke sapura pere tambuto hande aisuja. <sup>36</sup> Eto ungota degi erena God na embo ta ari sirikasuja iji te embo na enda ta mitie ke sapura vahai do ijija avo mane teto hatiresuja rate tapa harikari perekari aisuja. <sup>37</sup> Eto ke do ere ovova amina God na ungo siriketo ungo embo javotoho retemo sapura ke aisuja.”

*Pharisee embomeni Iesu na ari vahai God ta sovera umbuto aja penunu ea*

*(Mark 8:11-12, Luke 11:29-32)*

<sup>38</sup> Eto ke pepeni ate poekari embopo te Pharisee embomeni nei uhoho na ereto ke einge ea, “Ate poekari embo, God ta sovera umbuto ari vahai e kiore.” ainge eo. <sup>39</sup> Iesu na ke einge ena, “Ungo God kiae ari sasapura na enetari embopo, na God ta hajire kesi uje ere ova rate mane kesova be! God ta hajire vahai be ano kesova amo Peroveta Jonah amita ari avo ano kesova. <sup>40</sup> Eto Jonah na iji 3 ainge eva o peni amita oti jo ta evina ainge nombo Embo ta Meni na iji 3 ainge eva jo ta ire-suja. <sup>41</sup> Eto embo Jonah na ereto da Nineveh embomeni onde katenu enana ingito ari sasapura toto God ta degi puvua avoeto sirikari iji te God na au da Nineveh embomeni na ereto ungo pehumba aisora. Eto be ingivujo. Jonah ta ari amo isapara rate ari eha umbuto ere hona amo peni vahai be ra. <sup>42</sup> Eto enda Sheba ta Queen na degi hoi be ta eto puvuto

King Solomon ta onde katari ke inginu jo haperekena avoeto God na ke sirikari iji te Sheba ta Queen na ereto ungo nau ke ingae eova embomeni avo pehumba aisuja. Solomon ta ate poekari amo isapa rate nau amo peni be ra.

*Ahihi sapura egerembeto puvuresuja*

*(Luke 11:24-26)*

<sup>43</sup> Eto ungo embo sasapura eha miteva ungo ta degi do puvuresuja avo onde katasona ingivujo. Ahihi sapura na embo toto ere pahua rate irari nei jombure ere umakara ojaga tambu pere <sup>44</sup> avoeto irari matu ta egerembeto puvuresuja eto bande gajiketo egeto ari avo kito tunga javotoho <sup>45</sup> eto pambuto namei kamei tapa 7 ungo sasapura pere amiga iresi umbuto puvuresuja. Eto embo amita sapura kiti amo isapara rate jo be egae hamo avo egetija avoeto amita sapura amo hamo ta hamo ta ere ua ainge nombo ungo na ere ova.”

*Iesu na amita e te amita namei kamei te amo amunure avo harikena*  
*(Mark 3:31-35, Luke 8:19-21)*

<sup>46</sup> Eto Iesu na embomeni ta degi ke ijie mitinu amita e te namei kamei te Iesu ta degi ke asi araha tambuta simba mitio, <sup>47</sup> embo vahai na kito Iesu ta degi ke einge ena, “Ki, no aja te namei kamei te no degi ta ke asi puvuto araha ta umo simba mitera,” ainge enu <sup>48</sup> Iesu na ke mine einge ena, “Nau aja amunure eto nau namei kamei amunure?” ainge eto <sup>49-50</sup> amita ambotani ta degi ingeni na kikiteto einge ena, “Embo amuna nau Mama Utu ta iriuja amita ke agi euja amo nau namei kamei te du emone te aja mane te ra avoeto nau namei kamei be eto aja be amo erevira” ainge Iesu na ena.

## 13

*Be urari embo ta ke*  
*(Mark 4:1-9, Luke 8:4-8)*

<sup>1</sup> Eto iji amikote Iesu na bande toto umo tiuka hora ai ta pambuto arumbeto embomeni ate poekena <sup>2</sup> Eto embo isapamane puvuto hora ta arumbeo degi inono enu Iesu bitito e nga ta arumbeto <sup>3</sup> timu hatirari ke na ke nei te nei te ate poekitie einge ena, “Iji vahai embo na rice be urasi pambuto <sup>4</sup> ihaja enu nei degi tambu ta bena avo di na kito beto irae indina <sup>5</sup> eto be nei bena amo enda ngijiri ta avoeto amo ope ena <sup>6</sup> rate susu kambae avoeto iji na kajenu giroro ena. <sup>7</sup> Eto be nei i basa ta bena amo erena rate basa na andinu sapura ena. <sup>8</sup> Eto be nei amo enda javotoho ta beto ereto be isapamane ekena amo be nei 100 nei 60 nei 30 ainge ekena. <sup>9</sup> Eto ungota onde irirou kito ke erena erevi ingivujo,” ainge Iesu na ena.

*Iesu na do eto timu hatirari ke na ate poekena avo harikena*  
(Mark 4:10-12, Luke 8:9-10)

<sup>10</sup> Eto Iesu ta ambotani na Iesu ta degi puvuto ke einge eto ingia, “Umo do eto timu hatirari ke na embomeni ate ere poekite?” ainge eo <sup>11</sup> Iesu na mine einge ena. “God na tohota embomeni siriketo umbuto titi jigesuja amita ke amo ungota degi araha tambuta ikari rate enana ta degi ta amo ondikari na ikari ra. <sup>12</sup> Ungo God ke be ereva embomeni ta degi kiari isapa mitia avoeto amita hamo ta nei God na ikau inono aisuja. Rate enana God ke be ae embomeni ta kiari isapa avo God na umbau irae aisuja. <sup>13</sup> Eto enana ta degi timu hatirari ke na ate ere poekitena amo enana titi te ra rate kiae eto onde te ra rate ingae <sup>14</sup> avoeto peroveta Isaiah na enana ta ari amo einge kajena, ‘God na ke einge eria, Embomeni emina ingito eora rate be mane ingesora eto kon kon eora rate be mane kesora. <sup>15</sup> Eto amita be amo enana ingaesira ue onde susunduketera eto titi bavahaiketera. Eto ainge ae amo titi na kiaetera eto onde na ingaetera eto jo na be hotembaetera. Eto egerembeto nau degi ta puvuraetera

amo umbuto ano kondaetera,’ ainge God na enu Isaiah na kajena.

<sup>16</sup> Rate ungo amo titi na ere kogova eto onde na ere ingihova avoeto javotoho ungota degi puvija. <sup>17</sup> Eto ungota degi erena, ke javotoho etene ere ingihova eto ere kogova avo peroveta te God ta embomeni mamatu na kesi uje ea eto ingesi uje ea rate ae ra.

*Be urari embo ta ke be avo Iesu na harikena*  
(Mark 4:13-20, Luke 8:11-15)

<sup>18</sup> Na ungota degi ve urari ta be harikasona ingivujo. <sup>19</sup> Enana God ta titi jigari ta ke avo ingito ingae sira aisora amo embo degi tambuta mitie i be puvuja aingekora. Ke gamo poekari embo na puvuto be oreto umbasuja. <sup>20</sup> Eto embo nei enda ngijiri ta mitie be puvuja. <sup>21</sup> Amo embomeni nei God ta ke ingito tunga javotoho eora rate ke avo jo ta beae avoeto God ke be ae embomeni na enana ta degi ngahia aisora amo enana osaga kito tora aingeko nombora. <sup>22</sup> Eto be nei i basa ta beari amo embo God ta ke ingarira rate enda ta vasiri amita osaga eto naingeto koro mammo aetija amita osaga na andiuja avoeto be ekari inono ae aingeko nombora. <sup>23</sup> Eto be nei enda javotoho ta beuja amo embo ai mitie God ta ke ingito ke be euja aingeko nombo amina be isapamane eketo be 100 nei 60 nei 30 ekeuja aingera.” ainge Iesu na ena.

*Bive arita timu hatirari ke*

<sup>24</sup> Eto Iesu na timu hatirari ke nei einge ena, “God na embomeni toho amita siriketo umbuto titi jigesuja amo eingekora. Embo vahai na rice be javotoho amita pure ta uritinu <sup>25</sup> mume sihukenu embomeni evopo uo kitoho embo vahai na puvuto pure jo ta bive eraja bive ta be ihaja ena. <sup>26</sup> Eto rice ereto be ekitinu bive na ereto botukenu <sup>27</sup> pure mammo ta degi pure embo na puvuto ke einge ea, ‘Bada, umo donda be perekari urita rate bive amo nainge eto eretei?’ ainge eo, <sup>28</sup> ‘kitoho embo



vahai na bive ta be umbuto puvuto ihaja uija avoeto eretija,' ainge enu pure ari embopo na, 'Nango pambuto bive ara uje ere oete?' ainge eo <sup>29</sup> pure mamona 'Mane, bive asoate rate rice ga jigito uasova avoeto bive mane aisova te <sup>30</sup> rice bive ga mitie gasa au avo pure embopo na bive ga ueto bive punduto i ta ikaro evikitirou rice avo nau harau ta ikasora.' ainge ena.

*I javo Mustard ta timu hatirari ke (Mark 4:30-32, Luke 13:18-19)*

<sup>31</sup> Eto Iesu na timu hatirari ke nei einge ena, "Eto God na embomeni amita toho siriketo ere uhua amo eingera. I javo mustard amita be amo isapa be avo ungo kiarira. <sup>32</sup> Rate embo na be vahai umbuto amita pure ta urau ereto pajito pure ta donda tapa nembeto i ainge euja. Eto di na puvuto amita hatu ta aritie ahamo eora, aingekora."

*Timu hatirari ke flour pajirari sivo ta umbuto puvuna (Luke 13:20-21)*

<sup>33</sup> Eto Iesu na timu hatirari ke einge ena, "Eto God na embomeni toho amita umbuto titi jigésuja amo flour ta pajirari sivo aingekora. Eto pamone na bread borasi ue isapa umbuto flour baiki vahai ga tava-suja amo pajito pajire be aisuja, aingekora."

*Iesu ta timu hatirari ke (Mark 4:33-34)*

<sup>34</sup> Eto Iesu na da embomeni ta degi ke be na harikae rate timu hatirari ke nei te nei te na ate ere poekitiaetija. <sup>35</sup> Eto timu hatirari ke na ate poekasuja avoeto peroveta vahai na matu einge kajena, "Eto utu te enda te ari iji te eto puvuto eha oroho emikote nau ke peni erevi ae embomeni ingae avo eto timu hatirari ke na ano ingesora." ke ainge God na ijinu peroveta na kajena.

*Bive ari ta timu hatirari ke avo Iesu na harikena*

<sup>36</sup> Eto Iesu na embomeni toto bande jo ta torenu amita ambotani

na puvuto amita degi eto ingia, "Bive pure ta erari amita ke be avo nango ejo ingore," ainge eo <sup>37</sup> Iesu na ke be harikena. "Be javotoho urari embo amo Embo ta Meni ra <sup>38</sup> eto enda tapa amo amita pure ra eto be javotoho amo embomeni God ta toho siriketo umbari ra. Eto bive erari amo embo sapura ta embomeni ra <sup>39</sup> eto kitoho embo puvuto bive eraja ihaja ena amo Satan ra. Eto be pojari iji amo iji kombu te ra eto be pojari embo amo God ta anera. <sup>40</sup> Bive ueto pupunduketo iketere eveketija ainge nomboni iji emita tutumota ari ainge amo puvuresuja. <sup>41</sup> Amo Embo ta Meni na amita anera ikau enda ta puvuto ari sasapura ara engekari embomeni te embo sasapura tapa amite umbuto hajire umbari degi ta gosukaro beto <sup>42</sup> bevere kogue sisi sasi ijie ti kakambuketo kiroro kiroro ijie iresora. <sup>43</sup> Eto God ta embomeni na God ta irari degi ta pambuto iji ta usasa aingeko eto iresora. Ungo onde irirou kito ingivujo." ainge Iesu na harikena.

*Koro enda ta koveto ahurekari amita timu hatirari ke*

<sup>44</sup> "Eto God na embomeni siriketo umbuto titi jigési ere ua amita ke be amo koro te donda javavotoho te ainge enda ta koveto ahurekari avo embo nei na koveto tambasuja amo ehako ahureketo osa osa ue pambuto amita donda tapa siriketo umbuto pambuto enda mamona ta degi donda koveto ahurekari enda avo ombuto umbasuja aingekora.

*Daremo javotoho ta timu hatirari ke*

<sup>45</sup> Eto nei amo embo na God ta titi jigari ta torasuja amo eingera, embo na daremo javotoho be umbasi jombure ere ua <sup>46</sup> eto vahai tambasuja amo sago javotoho be avo eto ombuto umbasi amita donda tapa avo ombuto koro umbuto koro amina daremo avo umbasuja aingera.

*Umo o parari amita timu hatirari ke*

<sup>47</sup> Eto God na embomeni siriketo umbuto titi jigesuja amo eingera. Umo o parari embo na amo jorembe peni ai ta beto bonga umo ta gosukeore umo o nei te nei te na <sup>48</sup> toreto pevitioi umbuto gorukeore hora ta vitioi indari o siriketo uhue indahu o gosukeore sari euja aingekora. <sup>49</sup> Eto ainge nombo iji kombu ta anera na beto enda tapa ta pahue embo jajavotoho siriketo uhue <sup>50</sup> embo saspura i peri ta gosukaro beto evekitie ti kiroro kiroro ue sisi sasi aisora.

*Kiari ehaha te manatu te*

<sup>51</sup> Eto ke erena ere ingihovete?" ainge Iesu na ambotani ta enu, "Dago ere ingihera" ainge ea <sup>52</sup> avoeto Iesu na einge ena, "Avoeto ungo God ta ke kiari umbari embomeni amuna God ta titi jigari ta toreto ambo ambo aisova amina kiari mamatu te kiari ehaha jajavotoho te avo hande aisova, pondo embo na amita oho i ta bitito donda nei te nei te hande euja ainge nombora."

*Da Nazareth embomeni na Iesu ta ke ingari uje ae ea*

*(Mark 6:1-6, Luke 4:16-30)*

<sup>53</sup> Eto Iesu na timu hatirari ke erevi enu irae enu degi avo toto <sup>54</sup> tohota pajirari da ta pambuna. Eto pambuto giu ari bande ta toreto ke ate poekitinu embomeni ingito mani mini eto ke einge ea, "Embo emina kiari te sovera te naingeto umbuto puvei? Eto ari nei te nei te erevi naingeto ere oi?" <sup>55</sup> Amita mamamo amo bande gerikari embo ra, eto amita e Mary te amita namei kamei James te Joseph te Simon te Judas te <sup>56</sup> du emone te tapa ei mitera te kiari erevi naingeto umbuto puvei?" <sup>57</sup> ke ainge ijie Iesu ta ke ingari uje ae ea.

Avoeto Iesu na enana ta degi ke einge ena, "Na ke be na erena amo Peroveta ta ke amo degi tapa be tapa na ingesora rate da amita be eto amita javo vahai embomeni na mane ingesora." ainge ena. <sup>58</sup> Eto enana Iesu tumota be ae avoeto Iesu na enana kiora ari nei te nei te ae rate isapa be enu kia.

## 14

*John Bapataito ari embo ta tunga avo Herod na tiukena*

*(Mark 6:14-29, Luke 9:7-9)*

<sup>1</sup> Eto iji amite Galilee Province ta Gavana Herod na Iesu na ari nei te nei te tapa do ena amita duru ingito amita <sup>2</sup> simba ari embomeni ta degi ke einge ena, "Embo amina sovera isapamane jigama ue ari nei te nei te ere ua amita be amo embo amo John Bapataito ari embo avo amburari ta eto ereto ere ua," ainge Herod na ena <sup>3-4</sup> amita be amo John Bapataito embo amburae mitie Herod ta namei Philip isembitie ke einge ena, "Umo ke pepeni poeketo no hovatu Herodias jimbutu mitea," ke ainge pere ere ijiaetija avo Herodias na ke avo taekasi uje eto Herod ta enu John avo andito chain na punduto tipura ta gosukena. <sup>5</sup> Eto Herod na John tau amburoja uje ena. Rate embomeni na John amo peroveta ke ea avoeto amita degi mine do aisora avo hotembeto tona. <sup>6</sup> Eto Herod e na ingena amita iji puvunu pondo uo Herodias ta iae na ire tivenu Herod na kito tunga javotoho <sup>7</sup> eto Herodias ta iae ta degi amita do umbasi uje aisuja avo hande ikasi onde enu pambuto e ta degi enu <sup>8</sup> e na ke einge ena, "Na uje ere ona avo John Bapataito embo ta tunga avo tiuketo heva ei ta siro tembeto umbuto puvujo." ainge enu <sup>9</sup> Herod na tunga osaga kina rate amina pondo ta torukea embomeni amita degi ke matu ikena avoeto toasuja inono ae avo eto osaga kogue amita pure embomeni ta enu <sup>10</sup> pambuto John tipura ta mitina ai pambuto John ta tunga tiuketo <sup>11</sup> heva ta tembeto umbuto umoro ue mitia ai ta puvuto Herodias ta iae ta ikeo umbuto pambuto e ta ikena. <sup>12</sup> Eto John ta ambotani na John ta hamo umbuto pambuto koveto ahureketo toto pambuto Iesu ta degi John ta tunga tiuketo umbua amita hihhi avo tiri ingina.



*Embo tapa 5,000 avo Iesu na unduna.*

*(Mark 6:30-44, Luke 9:10-17, John 6:1-14)*

<sup>13</sup> Eto John Bapataito ari embo ta tunga avo Herod na tiukena amita duru avo Iesu ingito eonga iresi e nga ta bitito embo irae degi ai pahunu embomeni kito enana ta da toto Iesu ambo ambo ue utu na pahuo umo ireremba hora ta jorembeto <sup>14</sup> Iesu puvuto hora ta bitito embomeni utu na puvua enana ta ambure nei te nei te avo kito jo ena avo eto enu kokondekea. <sup>15</sup> Eto ture bovonu Iesu ta ambotani na puvuto Iesu ta degi ke einge ea, “Iji irae ere ua eto degi hoi ra avoeto ejo embomeni da ta egerembeto pambuto indari koro na ombuto umbuto indito evore.” ainge eo <sup>16</sup> Iesu na ke mine einge ena, “Aravora, tovu iriroro ungo na indari ikevu indore,” ainge enu <sup>17</sup> enana “Nango ta degi indari irae rate bread tapa isasaraho pere eto umo o isasaraho 2 ainge avo pere mitia,” eo <sup>18</sup> Iesu na, “Aravora indari aravo umbuto havu,” ainge ena. <sup>19</sup> Ke ainge eto enu embomeni tapa enda ta areo bread 5 te umo o 2 amite umbuto titi i ta eto God peketo osa enu irae enu bread periketo ambotani ta ikenu umbuto pambuto embomeni undua. <sup>20</sup> Eto embomeni tapa indio inono enu indari itete siriketo umbua amo hambija tapa 12 ainge ai ta etiti eo pevitina. <sup>21</sup> Eto embo perekari tapa 5,000 ainge amina airi te meni hatira te tapa india.

*Eto Iesu na umo hamo ta haito pambuna*

*(Mark 6:45-52, John 6:15-21)*

<sup>22</sup> Eto embomeni indari indio irae enu Iesu na amita ambotani kiti ikenu e nga ta bitito umo ovitihō ta pahuo Iesu eonga mitimite enu embomeni sisiketo pahuo <sup>23</sup> pari asi umo eonga heti i ta bitito pambuna. Eto mume sihukitinu eonga mitinu <sup>24</sup> e nga kiti pambuna avo pisara peni vahai te eva piri pajire te titi vuju ta eto puvuna avoeto pambari haiteko

mane unu <sup>25</sup> iho unga itiketo vivitinu enana ta degi Iesu na eva hamo ta haito puvutuhunu <sup>26</sup> amita ambotani na kito joru ue hori gagaha ijie “embahe puvija” ainge ijio <sup>27</sup> Iesu na ke mine sausau eto einge ena, “Ke ainge tovu amo namora, joru avojo,” ainge enu <sup>28</sup> Peter na ke einge ena, “Bada, umo re te, ejo ingito umo hamo ta haito iesina,” ainge enu <sup>29</sup> Iesu na, “Aravora, beto hae,” enu Peter na e nga toto eva hamo ta haito Iesu ta degi imite <sup>30</sup> pisara ta sovera kito joru eto eva ta huhurumbeto bovue jage eto ena. “Bada na hondate e,” ainge enu. <sup>31</sup> Iesu na ingeni sau sau jujuruketo Peter jigito ke einge ena, “Umo ke be ae embo, umo do eto na tumota ae re?” ainge eto <sup>32</sup> e nga jo ta bivitio pisara jamo ena. <sup>33</sup> Eto embo tapa nga jo ta Iesu ta degi tumo te pain ue jakeka einge ea, “Umo God ta Meni be ra,” ke ea.

*Gennesaret ta ambure embopo avo Iesu na enu kokondekea*

*(Mark 6:53-56)*

<sup>34</sup> Eto umo ovitihō ta pambuto enda Gennesaret ta puvuna <sup>35</sup> amita duru avo ikeo Gennesaret da tapa ingito ambure embopo umbuto Iesu ta degi puvuto <sup>36</sup> enana amita bo petiki ta jigito kokondekasi penunu eo, aravora, ainge enu, embo tapa Iesu ta bo tame eto kokondekea.

## 15

*Pharisee embomeni ta ari*

*(Mark 7:1-13)*

<sup>1</sup> Eto Pharisee embomeni te Judea ta ke pepeni ate poekari embomeni aingeto da Jerusalem ta eto Iesu ta degi puvuto <sup>2</sup> ke einge Iesu ta degi eto ingia, “No ambotani na do eto ungotena Judea embomeni ta ke pepeni agi ae ue ingeni egae teho indari jigito indiore?” ainge eo <sup>3</sup> Iesu na mine einge eto ingina, “Eto ungo do eto God ta ke pepeni poekitie ungota ate poekari ambo ambo ereove? Amita be amo <sup>4</sup> God na einge ena, ‘No aja mama ta ke agi ue hondate ejo.’ eto

nei amo embo amuna aja mama ta degi ke sapura aisuja amina God ta ke pepeni ere poekitia eto ari ere ua amita mine amo embo na tau amburesuja. Eto God ta ke pepeni ainge mitia rate ungo ari sapura einge ate poekitie ere ova. <sup>5</sup> Embo amita donda mitia amo e mamu hondate ari haiteko rate donda emo God ta ra ijie e mamu hondate ae euja amo aravora ijie ungo na ate ere poekitova <sup>6</sup> eto ainge pere ue God ta ke pepeni be avo poekitie ungota ari avo ambo ambo ere ova. <sup>7</sup> Ungo tunga heriso embopora peroveta Isaiiah na ungo ta ari kogue ke be na einge kajena, <sup>8</sup> 'God na einge eria, 'embomeni erevi pe na Na jakeka erera rate enana ta jo amo hoi ta ra. <sup>9</sup> Enana ta ate poekari amo enda ta vasiri pere avo erera avoeto enana ta jakeka ari amo be mane ra.' ainge God na enu Isaiiah na kajena."

*Donda deina au embo ta pe avo God ta titi ta tongopa aisuja (Mark 7:14-23)*

<sup>10</sup> Eto Iesu na embomeni tapa amita ke ingora jajage enu puvuto auveto ingesi jamopo eo Iesu na ke einge ena, "Ke nau ingihe be kivujo, <sup>11</sup> donda deina embo ta pe ta toreto beasuja amina mane God ta titi ta au embo ta jo tongopa aisuja rate pe ta do puvuresuja amina au embo ta jo tongopa aisuja," ke ainge Iesu na enu <sup>12</sup> amita ambotani na puvuto kumumu ke na einge ea, "Ke eha etea avo Pharisee embomeni na ingito tini kambari ere ora amo ere kogoete?" ainge eo <sup>13</sup> Iesu na ke mine einge ena, "Ke be erena, i be tapa nau Mama Utu ta iriuja amina urae eonga erari avo uasora <sup>14</sup> avoeto ungo enana Pharisee embomeni tovujo enana titi kuru ari embopo na titi kuru ari embomeni titi jigihera, eto titi kuru ari embo amina titi kuru ari embo nei avo kiti umbuto pambuto enana pe te hoto ta beto memenga kesora." ainge enu. <sup>15</sup> Peter na ke einge ena, "Ke erea avo be harikejo ingore." ainge enu

<sup>16</sup> Iesu na "ungo enana ainge nombo be ingae re? <sup>17</sup> Eto donda pe ta toreto oti ta beasuja amo ehako araha ta puvuto irae asuja, <sup>18</sup> rate deina pe ta puvuresuja amo embo ta jo ta eto puvuja eto donda amina eoi God ta titi ta tongopa euja <sup>19</sup> amita be amo embo tari amburari tiha ari eto nei pegene ari ke sokova ari embo nei ta javo eore sapura euja, hotembari sasapura ainge amo embo ta jo ta eto puvuto eoi embo avo God ta titi ta tongopa te euja. <sup>20</sup> Rate ungo ingeni egeto indova etera rate ari amina mane au embo tongopa ambu aisuja." ke ainge Iesu na onde katena.

*Enda Canaan pamone na Iesu tumota ena (Mark 7:24-30)*

<sup>21</sup> Eto Iesu na degi avo toto da Tyre te da Sidon te mitia amita enda ta pahunu <sup>22</sup> pamone vahai amo Judea pamone manerate Canaan pamone amina Iesu ta degi puvuto jage eto einge ena, "Bada nau, David ta Meni, iae nau ahihi sapura na torari avoeto memenga osaga kogue mitovona, osaga nau kito na jo e," ke ainge ena <sup>23</sup> te Iesu na ke ingina amo mine ae enu amita ambotani na puvuto amita degi penunu einge ea, "Pamone emina ambota ue ke esosa eria avoeto ejo toto pambai," ainge eo <sup>24</sup> Iesu na, "God na Israel embomeni, amita o sheep maine pambari amita perekari na iketei puvena" ainge enu <sup>25</sup> pamone avo puvuto Iesu ta utu ta beto gogovo eto ena, "Bada, na hondate e," ainge penunu enu <sup>26</sup> Iesu na ke mine einge ena, "Amo javotohorami meni ta indari umbuto ino ta gosukarote?" ainge enu <sup>27</sup> pamone amina "Bada amo ke be rate ino mamu ta indari ite gaga suvu ta beasuja avo ino na indesora amo tehora," ainge enu <sup>28</sup> Iesu na, "Pamone, umu na tumota be ere oa avoeto umu do uje ere oa avo aisona." ke ainge enu iji vahai amina pamone ta iae kondena.

*Iesu na embomeni isapamane enu kokondekea*

<sup>29</sup> Eto Iesu na enda avo toto umo tiuka javo Galilee hora ai ta pambuto hetu vahai bitito arumbeto mitinu <sup>30</sup> embomeni isapamane na enana ta popora ari embomeni te titi kuru ari embomeni te tunga vahikari embomeni te tapa umbuto Iesu ta utu ta ikerekeo seserekeo Iesu na enu kokondekea. <sup>31</sup> Eto popora embomeni itiketo hae ea titi kuru ari titi hirikea tunga tatahimbari itiketo ke ea ari avo embomeni na kito mani mini ue Israel ta God jakeka ea.

*Iesu na embo 4,000 unduna (Mark 8:1-10)*

<sup>32</sup> Eto Iesu na amita ambotani jage enu puvuo enana ta degi ke einge ena, “Embomeni erevi nau degi ta puvuto mitie iji heriso nei vahai totora amina indari irae etija avoeto na jo ere ua. Eto ikano da ta pambasora amo degi ugorota beuje na ivo ambupu aisora,” ainge enu <sup>33</sup> amita ambotani na ke einge eto ingia, “Nango ojaga tambu ei ta naingeto indari tambuto embo isapamane erevi unduroro?” ainge eo, <sup>34</sup> “Ungota degi bread tapa doinge mitei?” ainge Iesu na enu, “Nango ta degi bread tapa 7 ainge emite umo o heriso be emite ainge avo mitia.” ainge eo <sup>35</sup> Iesu na enu embo tapa enda ta areo <sup>36</sup> bread te o te umbuto God ta degi osari iketo bread periketo amita ambotani ta ikenu umbuto pambuto embomeni undua. <sup>37</sup> Eto embomeni tapa indio inono enu Iesu ta ambotani na indari itete siriketo umbua amo hambija tapa seven ainge avo etiti eo pevitina. <sup>38</sup> Eto embomeni india amo embo perekari tapa 4,000 ainge amina airi te meniundi te tapa india. <sup>39</sup> Eto indio irae enu Iesu na embomeni ikenu pahuo e nga ta bitito pambuto degi javo Magadan ta puvuna.

## 16

*Pharisee embomeni na God ta hajire avo Iesu na au kesi eto ingia (Mark 8:11-13, Luke 12:54-56)*

<sup>1</sup> Eto enana Pharisee embomeni te Sadducees embomeni te na puvuto Iesu ta ke be kesi uje eto amina au God na Utu ta eto hajire au kesi eto ingio, <sup>2</sup> Iesu na ke mine einge ena, “Eto iji vovuoi ungo oje pinono kogue evito iji javotoho aisuja ainge eova <sup>3</sup> eto nei iho bujau kuma terou kogue ga beasuja ainge eova. Ungu utu ta hajire kiova avo kito ke be ereva rate iji eha emita hajire nei te nei te ikari amo ungo ere kogova te kiaesira ere ova. <sup>4</sup> Ungu God hotembae ari sasapura embomeni eha miteva ungo God ta hajire kesi penunu ereva avo mane kesova rate Jonah na ena hajire vahai avo kesova.” ke ainge eto enana toto pambuna.

*Pharisee te Sadducee embomeni ta ate poekari sapura amita ke (Mark 8:14-21)*

<sup>5</sup> Eto Iesu ta ambotani na indari tapa umbae jenambueto toto umo tiuka ovitihio ta puvua <sup>6</sup> eto Iesu na enana ta degi onde katari ke einge ena, “Enana Pharisee te Sadducee embomeni ta bread pajirari sivo sapura ra avoeto indovojo,” ainge enu <sup>7</sup> enana ke mine ara eto einge ea, “Dago bread toto puvera avoeto eria.” ainge ijie mitio <sup>8</sup> Iesu na ingito ke einge ena, “Ungu indari umbuto puvurae eteva amita ke do eto ere kasiteve? <sup>9</sup> Ungu ari nau mo kiae ue erevete? Embo tapa 5,000 na bread tapa 5 indio inono enu indari itete hambija isapamane ueva avo hotembae ue erevete? <sup>10</sup> Eto embo tapa 4,000 na bread tapa 7 indio inono enu indari itete hambija isapamane ueva avo hotembae ue erevete? <sup>11</sup> Na ke eha erena amo bread toto puveva amita ke aera te ke erena amita be amo ungo kiaere? Eto erena amo enana Pharisee te Sadducee embomeni ta bread pajirari sivo be kivujo amo sapurara.” ainge enu <sup>12</sup> amita ambotani kia amo bread pajirari sivo be mane rate Pharisee te Sadducee embomeni ta ate poekari avo be kito toara ue ke amore ena.

*Iesu amunure avo Peter na ena  
(Mark 8:27-30, Luke 9:18-21)*

<sup>13</sup> Eto Iesu na da Caesarea Phillipi amita enda engitita ijimite pambuna. Eto ai mitie amita ambotani ta degi ke einge eto ingina, “Na Embo ta Meni rate na amunure ke eore?” ainge enu <sup>14</sup> enana ke mine einge ea, “Embo nei uhoho na amo umu John Bapataito ari embo ke eora eto nei uhoho na umu Peroveta Elijah ke eora eto nei amo Peroveta Jeremiah eto Peroveta nei nei ainge ke eora” ainge eo <sup>15</sup> “Eto unгона amo na do ke eove?” ainge enu, <sup>16</sup> Simon Peter na ke mine einge ena, “Judea embo ta hondate ari embo, umu Kerisora. God vasiri te amita Meni avo vahai enda ta puvurarira,” ainge enu, <sup>17</sup> Iesu na, “John ta meni Simon Peter umo ke be na erea avoeto umu tunga javotoho ejo. Ke emo embo bisi te na no degi ta ae ingae rate nau Mama Utu ta iriuja amina no degi ta hariketei erea <sup>18</sup> avoeto Peter, no degi ta erena, no javo be amo atara ra eto embomeni nau siriketo umbuto nau church atara emita hamo ta gerikasona eto amita degi ahihi amburari embo na isoro aisuja rate mane nembasuja. <sup>19</sup> Eto God na Utu ta titi jigiuja degi amita bokiri ta key no ingeni ta ikasona eto key amina enda ta bokiri ahurekasi uje aisoa amo God na Utu ta kito aravora aisuja eto enda ta bokiri hirikasi uje aisoa amo God na Utu ta kito aravora aisuja.” <sup>20</sup> ke ainge Iesu na iketo Judea embomeni ta hondate ari embo eha puvurari avo Iesu ra ainge ijie ke mane hande ara ke ena.

*Iesu memenga kito amburesuja  
avo ambotani ta degi ke ikena  
(Mark 8:31-9:1, Luke 9:22-27)*

<sup>21</sup> Eto iji amina Iesu na itiketo araha ta ke be na pere amita ambotani ta harikena, “Na da Jerusalem ta pambuto embo okokose te priests pepeni te ke pepeni ate poekari embomeni te ta ingeni ta osaga isapamane kesona. Eto enana na Na taro amburesona rate iji 3 amita ambota na vasiri te erasona.” ainge

enu <sup>22</sup> Peter na Iesu umbuto degi nei ta tihineto pambuto ke ngahia na eto einge ena, “Bada, ari ainge no degi ta mane puvuresuja te God na taekasuja,” ainge enu <sup>23</sup> Iesu na egerembeto Peter ta degi ke einge ena, “Satan, na toto pambu. Ke no erea amo God ta degi ta eto puvuraera te embo ta degi ta eto ere puvutuhua. Umu nau degi mane peikasoa.” ainge eto <sup>24</sup> ambotani tapa ta degi ke einge ena, “Eto amuna ambo ambo aisi uje aisuja amina amita hamo ta uje tapa toto amita i atahu koho ta iketo umbuto na ambo ambo aisuja. <sup>25</sup> Ke be amo embo amuna amita vasiri eonga simba aisi uje aisuja amo amita vasiri iraesuja rate embo amuna na avoembo amita vasiri toasuja embo amina vasiri be tambasuja. <sup>26</sup> Eto embo na enda ta donda tapa umbasuja rate vasiri amita irae aisuja amo amita degi javotoho puveite? Javotoho puvurae be ra. Amita be amo donda no ombuto vasiri ehako umbari iraera. <sup>27</sup> Eto Embo ta Meni na amita Mamo ta usasa te kiari te amina amita anera isapamane amiga tapa puvuresi ere ua eto puvuto embo ta ari do do ere ora amita mine ikasuja. <sup>28</sup> Eto ungota degi erena embo nei nei ei ta mitera na amburari mane kesora rate Embo ta Meni na kiti puvuto King eto titi jigjesuja avo kesora.”

## 17

*Ambotani na Iesu ta usasa kia  
(Mark 9:2-13, Luke 9:28-36)*

<sup>1</sup> Eto iji 6 amita ambota Iesu na Peter te James ta namei John te umbuto tiri koso vahai ai bitito pambua. <sup>2</sup> Eto ai eonga mitie Iesu ta tombu avo enana ta titi ta iji ta usasa na arako gain eto usasa ena eto amita bo asukari parara be enu <sup>3</sup> Moses te Peroveta Elijah te matu amburari avo sariketo puvuto Iesu ga ke mine ara ijiio ambotani tiri ta bitia amina kia. <sup>4</sup> Eto kogue Peter na Iesu ta degi ke einge ena, “Bada, nango umo te puvuto mitera avoeto tunga javotoho ere ona. Eto umu uje ere



oa amo horoma einge aisona, vahai umo avoeto nei Moses ta avoeto nei Elijah avo eto ainge aisona.”<sup>5</sup> “Eto ke ainge ijie mitinu oje vahai usasa te amina puvuto enana tapa ahurekitinu oje jo ta eto ke einge ingia.” “Emo nau osari Meni ra amita ari tapa kogue tunga javotoho ere ona, amita ke tapa ingivujo.”<sup>6</sup> ke ainge ijinu ingihe Iesu ta ambotani joru ue enda ta beto gogombukitio<sup>7</sup> Iesu enana ta degi puvuto tame ue, “Ungo joru ere ova avo toto erevu.” ainge enu<sup>8</sup> ereto hangeto Iesu pere kia.

<sup>9</sup> Eto tiri i ta eto vovue enana do kia avo mane ke hande ara einge ena, “Eto Embo ta Meni ambuto vasiri te irae peko ta tapa do keva eto ingeva avo embomeni ta degi mane hande aisova,” ainge enu<sup>10</sup> amita ambotani na amita degi einge eto ingia. “Umo embo ta hondate ari embo matu puvurari rate do eto enana ke pepeni ate poekari embopo na Elijah kiti puvuresuja ke eore?” ainge eo<sup>11</sup> Iesu na “Amo ke be ra Elijah kiti puvuto degi sirikau tambu au Embo ta Meni puvuresuja.<sup>12</sup> Rate na ungota degi erena, Elijah matu puvija rate enana kito kiarako ue enana ta uje sapura nei te nei te avo amita degi uera. Eto ainge nombo Embo ta Meni na enana ta ingeni ta memenga kesuja.” ainge enu<sup>13</sup> Elijah matu puvija ena avo enana kia amo John bapataito ari embo avo kito ke be hotembea.

*Iesu na pipi konene meni enu kondena*

*(Mark 9:14-29, Luke 9:37-43a)*

<sup>14</sup> Eto Iesu na puvuto embomeni toruketo mitia ai puvuo embo vahai amina ereto Iesu ta degi paunge teteri eto einge ena,<sup>15</sup> “Embo okose, meni nau ta osaga kito jo e, hariga vitioi dipipi sapura be eto iji tapa i ta beto evekeuja nei umo ta beuja<sup>16</sup> avoeto no ambotani ta umbuto pambene ari kondari inono ae etera,” ainge enu<sup>17</sup> Iesu na ingito tunga osaga kito “Ungo God ke be ae eto ari eha umbae uta ngahia embomeni ra, na ungo te iji doinge

irono? Eto ungo ta uta ngahia avo iji doinge kiono? Aravora, meni avo nau degi ta umbuto hae.” ainge enu<sup>18</sup> umbuto puvuo Iesu na ahihi sapura meni ta jo ta mitina amita degi ke ngahia enu irae pahunu iji amikote meni kondena.<sup>19</sup> Eto amita ambota Iesu eonga mitinu ambotani na Iesu ta degi puvuto ke einge eto ingia, “Dago do eto ahihi sapura avo kurumbari inono ae etere?” ainge eo,<sup>20</sup> “Ungo God tumota be ae avoeto. Na ungo ta degi erena tumota ari hingi jo ta be isapa ainge ungota degi mitirou amo tiri emita degi ke avo eonga bitito degi nei ta pambaetija amo ari ainge aeteva. Eto tumota ari isapa amina pure tapa ungota degi ngahia mane aetija.”<sup>21</sup> (- )

*Iesu ambuto vasiri te erasuja avo harikena*

*(Mark 9:30-32, Luke 9:43b-45)*

<sup>22</sup> Eto iji vahai Iesu te amita ambotani te Galilee degi ai ta vahaita torukeo Iesu enana ta degi ke einge ena, “Embo ta Meni avo embo ta ingeni ta ikaro<sup>23</sup> umbuto taro ambuto mitima iji 3 irae au vasiri te erasuja.” ainge harikenu enana tunga osaga peni vahai kia.

*Temple ta tax koro avo Iesu te Peter te na ikea*

<sup>24</sup> Eto Iesu te amita ambotani da Capernaum ta puvuo temple ta tax umbari embo na Peter ta degi puvuto einge eto ingina, “No titi jigari embo na temple ta tax ikeoite?” ainge enu<sup>25</sup> “Ikeuja” ainge eto bande jo ta eha toritinu Iesu na ke na sunumbeto Peter ta degi einge eto ingina “Simon Peter umo do hotembite. Enda ta Kings na enda nei embo puvuto iriora enana ta degi tax koro peni umbuore te mo enda asa embomeni ta degi tax koro peni umbuore?”<sup>26</sup> “Amo enda nei embomeni puvuto iriora amina tax koro peni ikeora.” ke mine ainge Peter na enu. Iesu na, “Avo eto enda asa embomeni na mane ikeora.<sup>27</sup> Rate ungotena enana ta degi osaga mane ikasora

avoeto no umo o timbari esi umbuto umu tiuka ta pambuto umu o timbujo. Eto o kiti timbasoa amita pe jigito handeketo pe tota koro umbasoa amina umbuto pambuto tax umote namo te tapa ikejo.” ainge Iesu na ena.

## 18

*God ta titi ta embo peni mo davore?*

*(Mark 9:33-37, Luke 9:46-48)*

<sup>1</sup> Eto iji amite Iesu ta ambotani na puvuto Iesu ta degi ke einge eto ingia, “Eto God na tohota embomeni hondate eto gavamani eha itiketo King asi ere ua ai ta embo amuna embo peni au?” ainge eo, <sup>2</sup> Iesu na ingito meni isapa avo enu amita jo ta inu umbuto enana ta titi buju ta ikenu hetenu <sup>3</sup> ke einge ena, “Na ungota degi ke be na erena, eto ungo jo hapereketo meni isasaraho sira ae amo God ta titi jigari degi ta mane torasova be, <sup>4</sup> avo eto embo amuna embo peni asi hotembae ue meni isapa einge na arako aisuja embo amina God na titi jigiuja degi ai ta embo peni be aisuja. <sup>5</sup> Eto embo amuna meni isapa eingeke javo nau ta peketo osa aisuja amo na osa ue pekarako ere ua,

*Ari sapura ta engekari amita ke*  
*(Mark 9:42-48, Luke 17:1-2)*

<sup>6</sup> Rate embo amuna na tumota ari meni eingeke avo engekau vasiri sapura ta beasuja engekari amita mine pajire be puvuresuja avoeto amo javotoho eto engekae kiti ta embo amita tunga ta atara pajire avo gatahiketo tigitu eha ta gosukau beto amburesuja.

<sup>7</sup> O ve! Embo ari javotoho asi uore engekari isapamane na puvuto peikeuja eto engekari puvuresuja rate ngahia be amo engekari embopo ta degi ambota puvuresuja. <sup>8</sup> Eto no ingeni na utu na au ari sapura ta beasi ue kito amo no ingeni utu avo jirembeto gosukejo irae ai. Umo popora ue vasiri eha umbasoa amo javotoho rate utu heriso ingeni

heriso amiga i daroho evekeuja ai ta beasoa amo sapura bera, <sup>9</sup> nei amo no titi vahai na au ari sapura ta beasi ue kito titi avo kuruketo gosukejo irae ai. Eto umu titi vahai na vasiri eha ta torasoa amo javotohora te titi heriso na i daroho evekeuja ai ta beasoa amo sapura be ra.”

*O sheep vahai sio pambasuja amita timu hatirari ke*  
*(Luke 15:3-7)*

<sup>10</sup> “Ungota degi erena meni vahai einge nombo ambu ke avojo. Enana ta anera isapamane Utu i ta nau mama God ta tombu ta iriora avoeto enana nombo be ra. <sup>11</sup> (-) <sup>12</sup> Na kivu, embo vahai ta o sheep tapa 100 ainge iriora rate vahai kiae pambau 99 ainge asa heti ta toto vahai pambasuja avo pambuto jombure eto umbaute mo mane jombure eto umbau? <sup>13</sup> Toasi mane hotembasuja rate jombure eto umbuto tunga javotoho aisuja. Eto o 99 teho mitera avo kito tunga isapa javotoho aisuja rate o sheep vahai pambasuja avo umbasuja amo tunga javotoho be javotoho eto osa aisuja. <sup>14</sup> Eto ainge nombo ungota Mama Utu ta iriuja amina meni isapa eingeke ari sapura ta mane beora uje ere ua.” ainge Iesu na ena.

*Eto namei vahai ari sapura aisuja amita namei kamei na do aisora amita ke*

<sup>15</sup> Eto Iesu na ke einge ena, “Eto no namei vahai na no degi ta ari sapura aisuja amita degi umu eonga pambuto ari sapura deire avo ejo ingoi. Eto ao ingito tunga hapereketo egerembau ehako inena no namei aisoa <sup>16</sup> rate no ke ingae au kito egerembeto ari sapura kiari embomeni heriso, o heriso nei vahai ainge umbuto pambuto namei sapura etija amita degi ke ehako ejo, eto embo heriso nei vahai amina no ke ingito ke be are. <sup>17</sup> Eto ke ingae be au kito pambuto ekalesia ta ejo ingore. Eto embo amina ekalesia ta ke te tapa ingari uje ae au amo toaro pambau ungo ga ekalesia ta



hatu mane aisuja rate kitoho embo aisuja.

*Ke ari te ke toari te*

<sup>18</sup> Eto ungota degi ke be na erena ungo enda ta ke peni ainge do aisova avo God Utu ta mitie ke peni ke aisuja, eto enda ta ke peni do toasova God amo ainge Utu ta toasuja. <sup>19</sup> Eto ke nei erena amo ungo enda embo heriso na tunga vahai ue God ta degi do penunu aisova amo God Utu ta iriuja amina ikasuja.

<sup>20</sup> Eto ke amita be amo ungo embo heriso o heriso nei vahai ainge nau javo ta torasova amo na ungote iresona.” ainge Iesu na ena.

*Ari hotembeto toari amita ke*

<sup>21</sup> Eto Peter na Iesu ta degi pambuto ke einge ena, “Bada, nau namei na nau degi ta ari sapura ururou iji tapa doinge hotembeto toano? <sup>7</sup> ainge hotembeto toanote?” ainge enu, <sup>22</sup> Iesu na ke mine einge ena, “Iji tapa 7 mane rate 77 ainge no namei ta ari sasapura hotembeto tojo.” ainge Iesu na ena.

<sup>23</sup> Eto Peter ta eto ingari ke avoeto Iesu na timu hatirari ke einge ena, “God na titi jigiuja degi amo eingingera. King vahai amina amita pure ari embomeni ta degi eo ikenu india avo mine ikara amita koro simba ari embomeni ta degi ke ikenu <sup>24</sup> pambuto King ta pure ari embo vahai umbuto puvuo embo amina 7 million kina ikari indari avo ikaja enu <sup>25</sup> ikari inono ae enu King na embo amite ae te meniundi te tapa ikau embo nei na uhue koro ikaro umbasi ke enu <sup>26</sup> pure embo amo ingito tunga osaga eto beto King ta jo ai ta paunge teteri eto ke einge ena, ‘Na jo eto kito iji isapa tojo mitie no koro tapa jombureto uhue ikasona.’ ainge enu <sup>27</sup> King amina amita ke ingito jo enu koro 7 million indina tapa avo toturitie enu tunga javotoho ue pambuna.

<sup>28</sup> Rate embo amina tambuta puvuto amita koro 12 kina amita pure vahai embo amina enu ikena avo

kito embo avo tunga ta jigito jaheveto ‘Nau koro inena ete ikitana avo ike.’ ainge enu <sup>29</sup> embo amina beto paunge teteri ue. ‘Ikasona te iji isapa ikejo mitie no koro tambuto ikane.’ ainge ena <sup>30</sup> rate jo ae umbuto pambuto ikenu tipura ta torena, ‘tipura ta mitie nau koro avo ikejo.’ ainge ena. <sup>31</sup> Ari ainge ena avo pure embopo na kito tunga osaga kito pambuto King ta degi harikeo <sup>32</sup> ingito tumo eto enu embo koro 7 million indari embo avo puvunu amita degi ke einge ena, ‘Umo embo sapura bera nau koro isapamane no degi ta ikari avo hotembeto toana etea avoeto hotembeto totona. <sup>33</sup> Na no ke ingihone jo uija ainge nombo inena no namei ta degi ae etea,’ ainge <sup>34</sup> eto tini kambari pajire be eto ikenu tipura ta mitie koro tapa 7 million avo ikaja ke ena,” ainge Iesu na tiriti amita ambotani ta degi einge ena.

<sup>35</sup> “Eto ungo na ungota namei kamei ta ari sasapura jo tapa na hotembeto toae eova amo King na amita pure embo ta degi ena ainge nombo nau Mama Utu ta iriuja amina ungota degi ngahia aisuja.”

## 19

*Embo na ae tora amita ke avo Iesu na ena*  
(Mark 10:1-12)

<sup>1</sup> Eto Iesu na ke avo enu irae enu Galilee enda toto Judea ta enda tumo umo Jordan ovitihio ihane ta pambunu <sup>2</sup> embomeni isapamane amita degi puvuto amita ambure nei te nei te avo eo enu kokondekea.

<sup>3</sup> Eto ai ta mitinu Pharisee embomeni nei uhoho na Iesu ke sokova aute eto kesi amita degi ke einge eto ingia, “Ungotenau ke pepeni ta amo do ainge mitei? Eto embo na teho uje na ae toasuja aravorete? Avo ejo ingore.” ainge eo Iesu na <sup>4</sup> “Iji eha be eha ta God na embo te pamone te ena amikote God na ke einge ena, <sup>5</sup> ‘Na embo te pamone te ena avoeto embo na e mamoto ae ga kaju eto

eonga ra mane aisora te bisi vahai aisora' ainge God na eto amita ke ta kajena avo ungo kiaere? <sup>6</sup> Avoeto enana heriso mane rate vahai eora ari avo God na euja eto God na kaju eto vahai aisuja avo embo na mane kateketo ehako eongara aisuja." <sup>7</sup> Ke ainge Iesu na enu enana Pharisee embomeni na ke einge eto ingia, "Rate embo na ae toasi uje ue kito ke avo embo tapa kiora ahari ta kaeto ikau kioro toto pambasuja, ari ainge avo Moses na do eto ara enu?" ainge eo Iesu na <sup>8</sup> "Eto Moses na ungo ae toari ta ke kajena amita be amo ungo ari javotoho ate poekari avo ngahia be ra. Rate iji eha be eha ta embo te pamone te ari iji te ari ainge irae bera. <sup>9</sup> Avoeto nanena ungota degi erena. Embo amuna amita ae amo javotoho tiha mane euja rate embo amina pamone amo toto pamone nei jimbasuja embo amina pamone eha jimbasuja avoeto amina tiha aisuja," ainge Iesu na enu Pharisee embomeni pahuo <sup>10</sup> amita ambotani ke einge ea. "Eto embo te pamone te tiha eora avoeto amo javotohorami singa na kakara mane jimbau?" <sup>11</sup> amita ke mine re Iesu na einge ena, "Eto embo aka te ae iriora amo embo tapa ari mane vahai vahai na eora. <sup>12</sup> Nei amo e na ingari ta eto bau ambura eto nei amo embo ta ingeni na bau kurukari avoeto mane aka te eora. Eto embo nei amo God ta pure pere asi hotembitie akate mane eora avoeto embo amuna ari ainge ari haite kito toau aisuja" ke ainge Iesu na ena.

*Iesu na meni isasaraho ta siro ta ingeni tembena*

*(Mark 10:13-16, Luke 18:15-17)*

<sup>13</sup> Eto embomeni na Iesu na ingeni hamo ta tembitie pari aja enana ta meniundi umbuto puvuo amita ambotani na kito taekitie embomeni ta degi ke ngahia eo <sup>14</sup> Iesu na kito einge ena, "Tovujo meni isasaraho nau degi ta puvurore amita be amo God na titi jigiuja degi amo meni isasaraho ta ari aingeko embomeni

ta tohora." ke ainge <sup>15</sup> eto amita ingeni siro ta tembenu irae enu ereto pambuna.

*Embo eha koro embo avo iji datohto iresi uje ena amita ke*

*(Mark 10:17-31, Luke 18:18-30)*

<sup>16</sup> Iji vahai embo vahai amina puvuto Iesu ta degi ke einge eto ingina, "Ate poekari embo, na irari datohto ta iresi ari javotoho do ano?" ainge enu <sup>17</sup> Iesu na, "Umo do eto nau degi ta ari javotoho jombure ue eto ere ingihe God vahai amo javotohora avoeto umu irari datohto ta iresi uje eto kito God ta ke tapa agi ejo." ainge enu <sup>18</sup> "God ta ke deire agi ano" ainge enu <sup>19</sup> Iesu na mine einge ena, "Umo embo mane tao amburesuja, tiha paiha mane aisoa, pegene mane aisoa, embo nei ta ari ke be na perekari harikasoa, aja mama amo nombo ke ijie enana ta ke agi aisoa no hamo osa ere oa ainge nombo embo nei osa ejo." ainge enu, <sup>20</sup> embo amina, "Na God ta ke erevi tapa agi eona avoeto ari nei do ano?" ainge enu <sup>21</sup> Iesu na, "Eto umu embo javotoho asi uje ere oa avo no donda tapa ombuto koro umbuto donda ambu embomeni ta degi hande ao God na Utu ta hajae vajae no amo nununga aisuja. Ari ainge eto egerembeto na ambo ambo e," ainge enu <sup>22</sup> embo eha amina ingito amita hajae vajae isapamane avoeto tunga osaga kogue Iesu toto pambuna. <sup>23</sup> Eto Iesu na amita ambotani ta degi ke einge ena, "Na ungota degi ke be erena, haja bajae embomeni na tunga osaga peni vahai kogue God na titi jigiuja degi ai ta torasora. <sup>24</sup> Eto ke avo ehako erena, O javo camel amo peni vahai avoeto poma to ta toreto pambari ngahia be ra te hajae bajae embo na God ta meni asi aisuja amo ngahia be ngahia ra." ainge enu <sup>25</sup> amita ambotani na ingito mana mana ue ke be kesi einge eto ingia, "Eto hajae vajae embo na God ta meni ari inono ae kito embo amuna God ta meni au?" ainge eo <sup>26</sup> Iesu na enana titi

na jaseto kogue ke einge ena, “Embo amo ungo eonga God ta meni ari inono ae be ra te God na aisuja amo ari inono be ra.” ainge enu <sup>27</sup> Peter na ereto einge ena, “Kijo, dago donda tapa toto umo ambo ambo ere ora amo mine do umbaro?” ainge enu <sup>28</sup> Iesu na enana ta degi ke einge ena, “Na ungota degi ke be erena, enda eha utu eha aisuja iji amina na Embo ta Meni na nau avo arumba peni usasa te ai urumbeto mitirono ungo nau apostel 12 na avo arumba tapa 12 ai ta arumbeto mitie Israel embomeni javo vahai tapa 12 avo titi jigesova. <sup>29</sup> Eto tapa amuna bande te du te aja mama te meni undi te hajae bajae te tapa na embo toasuja amina donda ainge pere isapamane umbuto irari datoho iresuja. <sup>30</sup> Rate embo peni na ai ta embo teho aisora eto embo teho na ai ta embo peni aisora.”

## 20

### *God na mine ikeuja amita timu hatirari ke*

<sup>1</sup> Eto Iesu na ke ijie pambuto timu hatirari ke einge ena, “God na tohota embomeni siriketo umbuto Utu ta titi jigesuja ari amo einge ra. Embo vahai amo grape pure ari embo peni amina iho be te pambuto pure ari embo umbuto puvuto amita grape avo ururou pambuto <sup>2</sup> ture beau turete 3 kina umbara enu aravora eto pambuto pure itiketo ea. <sup>3</sup> Eto ehako iho 9 o'clock amo pambuto market besi ta embo nei teho mitia avo kito <sup>4</sup> ke einge ena, ‘Ungo pambuto nau grape pure ururovo ture voyurou mine inono ikano umbasova,’ <sup>5</sup> ainge enu ingito pambuto pure ea. Eto iji ugorota 12 o'clock amo pambuto pure embo nei umbuna eto tureto 3 o'clock amo pambuto pure embo nei umbuna. <sup>6</sup> Eto ture be te 5 o'clock auvitinu embo amo ehako pambuto market besi ai embo teho mitia avo kito ke einge ena, ‘Ungo do eto iji aijaja ue teho miteve?’ ainge enu <sup>7</sup> enana, ‘Nango

pure umbae avoeto teho mitera,’ eo ‘Aravora ungo pambuto nau grape pure aisova,’ ainge enu ingito pambuto pure isapa uo, <sup>8</sup> mume sihukitinu embo amina amita pure simba ari embo ta degi ke einge ena, ‘Pure embopo jage e puvuroro mine ike. <sup>9</sup> Eto ture be te umbera amita mine ikitie pambuto iho be te umbera avo ambota ikejo.’ ainge enu ingito jage enu puvuo pure embo ture 5 o'clock iji tutumota umbua amita mine amo 3 kina ikenu uhoo kito <sup>10</sup> ihote umbunu pure ea embomeni amina iji koso pure ea avoembo mine peni umbasi ke ea rate enana inono ainge 3 kina pere umbuto <sup>11</sup> tini kambari ue pure mamu ta degi ke einge ea. <sup>12</sup> ‘Embo turete umbea amo pure iji isapa etera te nango avo ihote eto pambuto ture betija eto iji bevere te tapa pure etera rate mine umbera amo enana ga inono ta umbera.’ ainge eo. <sup>13</sup> Pure mamu na embo vahai ta degi einge ena, ‘Namei ingijo. Na ungota degi sapura ae, rate ihote ungota degi 3 kina umbava ke etene aravora eteva <sup>14</sup> avoeto iketena umbuto da ta pambuvujo. Eto embo ture be te umbena amita mine amo nau hande na ungo ga inono ta iketene umbera. <sup>15</sup> Koro amo toho nau avoeto uje nau aisona amo tehora. Na hande iketena amita eto tumo ere ovete?’ <sup>16</sup> ke avo Iesu na tirinu irae enu tutumota ke einge ena, “Avoeto ambota amo kiti puvuresora eto enana kiti asi uje ere ora amo ambota puvuresora.”

### *Eto Iesu pambuto Jerusalem ta amburesuja avo enu ingia*

*(Mark 10:32-34, Luke 18:31-34)*

<sup>17</sup> Eto Iesu na da peni Jerusalem ta vivitie embo nei ingihirae ae rate amita ambotani 12 amita perekari ke einge ijie pambuna, <sup>18</sup> “Ungo be ingivujo, ungotena da Jerusalem ta ere vivitera. Eto Jerusalem ta puvuroro Embo ta Meni avo Priests pepeni te ke pepeni ate poekari embopo te ta ingeni ta ikaro umbuto court eto taro amburoja ke <sup>19</sup> eto enda nei,

God ke be ae embomeni, ta ingeni ta iketo toaro pe na urumbasora esi na ejembasora eto i atahu ta taro ambuto mitima iji 3 irae au ehako vasiri te erasuja.”

*James te John te embo pepeni asi uje ea*

*(Mark 10:35-45)*

<sup>20</sup> Eto embo Zebedee ta ae na amita meni heriso James te John te avoembo enana ta uje ea avo Iesu ta degi eto ingesi puvuto tumote pain unu <sup>21</sup> Iesu na, “Umo do uje ere oe.” ainge enu amina, “Umo King ururo nau meni heriso erevi avo no ingeni be ta eto no ingeni anga ta arumbeto titi jigora ejo.” ainge enu <sup>22</sup> Iesu na meni heriso amita degi ke einge ena, “Ungo do umbasi uje eteva avo be kiae ue ere ova. Na emo bouka umbuto memenga kogue pambasona avo ungo umbari inono re?” ainge enu, “Nango inono ra,” ainge eo. <sup>23</sup> “Ke be ra, ungo emo bouka avo umbasova rate embo amuna nau ingeni anga ta eto ingeni be ta arumbasuja amo na mane sirikasona rate nau Mama na embo sirikasuja amitara,” ainge Iesu na enu, <sup>24</sup> James te John te na embo pepeni asi ea amita ke avo ambotani nei 10 ainge amina ingito enana heriso amita degi tumo eo <sup>25</sup> Iesu na enana tapa jage enu puvuo ke einge ena, “Enana God kiae embo na embomeni titi jigihe enana ta sovera jigama uore embomeni na embo pepeni avo joru ue enana ta ke agi eora. <sup>26</sup> Rate embomeni na ari ainge ungota degi mane kesora. Eto inena vahai ungota okose asi uje eto kito amina nei tapa ta ke agi ue pure aisuja. <sup>27</sup> Eto inena vahai kiti asi uje eto kito amina tohota uje hotembae ue nei tapa unduresuja. <sup>28</sup> Eto ainge nombo na Embo ta Meni avo embo na undurora puvurae ra te na embomeni hondate asi ue vasiri nau avo iketo embomeni isapamane ombasi puvena.” ke ainge Iesu na ena.

*Titi kuru ari embo heriso avo Iesu na enu kondea.*

*(Mark 10:46-52, Luke 18:35-43)*

<sup>29</sup> Eto Iesu te amita ambotani te na da Jericho toto pahuo embomeni isapamane degi ta ambo ambo ue pambua. <sup>30</sup> Eto titi kuru ari embo heriso degi ahone ta arumbeto mitie Iesu puvurari ke ingito itiketo jajage ijie einge ea “David ta Meni, dagota Bada, nango kito jo e,” ainge ijie mitio, <sup>31</sup> embomeni na embo heriso amita ke ingari uje ae ue isembeto ke jamo ara ke ea, rate enana heriso na hori gagaha eto, “David ta Meni dagota Bada nango kito jo e,” ainge eo <sup>32</sup> Iesu heteto jage enu puvuo “Na ungota degi do ana uje ere ove?” ainge enu, <sup>33</sup> “Bada nango ta titi ejo hirikau kiore,” ainge eo <sup>34</sup> Iesu ingito jo enu titi ta tame enu enana ta titi hirikenu kogue Iesu ambo ambo ea.

## 21

*Iesu Keriso Judea embo ta hondate ari embo avo da Jerusalem ta torena*

*(Mark 11:1-11, Luke 19:28-40, John 12:12-19)*

<sup>1</sup> Eto Iesu te amita ambotani te na da Jerusalem ta puvuto auvitio da Bethphage tiri olives temba ta puvuto heteto Iesu na ambotani heriso ikau kiti pambara ue <sup>2</sup> ke einge ena, “Ungo heriso pambuto o donkey huega meni te da pe ai handuketere mitia avo kito bujeketo umbuto have. <sup>3</sup> Eto embo na ke do aro ingito, ‘Bada na jigama asi uje ere ua’ ainge ao mane taekasora te toau umbuto puvuresova.” <sup>4</sup> ke ainge Iesu na ena amore peroveta na Iesu enda ta puvurae iji te einge kajena <sup>5</sup> “Jerusalem embomeni ta degi ke einge evujo, kivu ungota King peka umbari embo avo embo ta ke agi ari o donkey hamo ta arumbeto ere puvutuhua.” ainge peroveta na kajena.

<sup>6</sup> Avoeto ambotani heriso avo Iesu ta ke agi eto pambuto <sup>7</sup> o donkey te amita meni te bujeketo umbuto puvuto bo houketo o hamo ta besi tirio Iesu arumbeto pahunu. <sup>8</sup> embo isapamane bo houketo enda



ta titirikeo bo hamota haito pahunu embomeni nei na i hatu kahumbeto degi ta titirikea. <sup>9</sup> Eto embomeni kiti pahua amite ambota ere puvutuhua amite tapa itiketo jakeka ijie jajage eto einge ea, “David ta Meni nombu be sovera te Bada ta javo ta puvuto ere hua God hondate e. God amo peni be ra.” ainge ijie pahuo <sup>10</sup> Iesu da Jerusalem jo ta torena. Eto da Jerusalem embomeni tapa na o a ijie embomeni Iesu ga puvua amita degi einge eto ingia, “Embo puvija amo amunure?” ainge eo, <sup>11</sup> “Amo enda Galilee da Nazareth embo amo peroveta javo Iesu ra.” ainge ea.

*Iesu temple jo ta torena*

*(Mark 11:15-19, Luke 19:45-48, John 2:13-22)*

<sup>12</sup> Eto Iesu na temple jo ta toreto embomeni di o ai ta ombuto koro uhua kito tumo eto kurumbenu pahuo koro etekari embomeni ta gaga te di dirogu ombuto umbari embomeni ta gaga te tapa jigito hapereketo <sup>13</sup> enana ta degi ke einge ena, “God ta ke ta kajari mitia amo, ‘Bande emo nau pari ari bande ra’ rate ungo na pegene embo ta bande ere ova!” ainge ena.

<sup>14</sup> Eto Iesu temple jo ta mitinu popora embomeni te titi kuru ari embomeni te temple jo ta mitiaetera avo Iesu ta degi jo enu kokondekeo <sup>15</sup> enana priests pepeni te ke pepeni ate poekari embopo te na ari javotoho avo kito tini kambari uo enana meni isasaraho na jajage eto, “David ta Meni jakeka erera.” ainge ijie mitia avo ingito tumo eto <sup>16</sup> Iesu ta degi ke einge ea, “Enana meni isasaraho na umo jakeka erera avo umo ingae re?” ainge eo, Iesu na enana ta degi ke einge ena, “Na javotoho ere ingihena te ‘God na etei meni isasaraho ta pe ta eto jakeka ari javotoho puvuja’ ainge God ta ke ta kajari mitia avo ungo eteketo kiaera?” <sup>17</sup> ke ainge eto toto da Bethany ta pambuto mume vahai ai evina.

*Iesu na i junga enu jaise ena*  
*(Mark 11:12-14,20-24)*

<sup>18</sup> Eto iho bujenu Iesu ereto da Jerusalem ta egerembeto pahunu beuje enu <sup>19</sup> i junga degi ahone ta kito imite be irae gigi pere kito i ta degi ke einge ena, “Umo ambota be ehako mane aisoa,” ainge enu i jaise enu <sup>20</sup> amita ambotani na kito mana mana eto ke einge ea. “Umo naingeto ete i sau be jaise etei?” ainge eo <sup>21</sup> Iesu na einge ena, “Na ungota degi ke be erena, eto ungo jo tapa na ke be hotembitie na ne i junga ta etena ainge nombu aisoa. Eto avo pere mane rate heti emita degi umo ereto jaruketo eva ta pambuto ve.” ainge aisoa amo aisuja <sup>22</sup> eto ke be ijie pari ta ari pepeni tapa do avo eto ingesova amo ungota degi puvuresuja.

*Priests pepeni na Iesu ta ate poekari taekasi ea*

*(Mark 11:27-33, Luke 20:1-8)*

<sup>23</sup> Eto Iesu temple ta ehako pambuto embomeni ate poekitinu priests pepeni te Judea ta okokose te aingeto puvuto einge eto ingia, “Embo amuna ke ei ingihe pure erevi ere oe? Enda embo ta ke retemo amuta ke re?” ainge eo Iesu na ke mine einge ena, <sup>24</sup> “Na ungota degi eto ingari ke vahai erevi aisona, eto ungo ke mine avo ingito embo amuta ke ingihe ere ona avo ano ingesova <sup>25</sup> amo erevira, John na embo amuta ke ingihe embo bapataito enu? God ta ke retemo embo ta ke re?” ainge enu enana ungo eonga itiketo ke taimbitie ke mine ara ijie einge ea, “Dago ke mine do aro? Eto dago John na God ta degi ta sovera umbuna ke aisora amo embo emina, ‘Avoeto ungo do eto John ke be ae ueve?’ ke aisuja <sup>26</sup> rate dago embo ta degi ta sovera umbuna ke aisora amo embomeni na John amo God ta peroveta be ke eora avoeto embomeni na nangota degi do aisora avo oju ere ora.” ainge eto <sup>27</sup> priests pepeni na ke be teto haito, “Nango be kiaera.” ke ainge eo, Iesu na enana ta degi, “Aravora



ungo ke mine ari inono ae avoeto embo amuna ke ei ingihe pure erevi ere ona avo mane ano ingesova.” ainge ena.

*Meni heriso ta timu hatirari ke*

<sup>28</sup> Eto Iesu na Judea ta okokose ta degi ke einge ena, “Ungo ke nau ingito siro pure evu. Embo vahai meni heriso te amina bugo ta degi pambuto ‘Nau meni pambuto nau grape pure ejo,’ ainge enu <sup>29</sup> uje ae ue, ‘Na mane pambasona’ ena rate ambota jo aherekenu pambuto grape pure ena. <sup>30</sup> Ehako meni ambo ta degi pambuto, ‘Nau meni umo pambuto nau grape pure ejo,’ ainge enu, ‘Aravora, Mama, pambuto pure aisona.’ ainge ena te pambuto pure ae ena, <sup>31</sup> avoeto ungota degi erena, meni damina mamu ta ke agi enu?” ainge Iesu na enu embo okokose na, “Bugu na mamu ta ke agi ena,” ainge eo Iesu na enana ta degi ke einge ena. “Avoeto ungota degi erena, tax koro umbari embopo te tiha paiha pamone te na ungo nembeto God ta titi jigari degi ta torasora. <sup>32</sup> Amita be amo John Bapataito ari embo na ungo irari javotoho degi naingeto pambasova avo harikena rate ungo ingito ke be ae ueva rate tax koro umbari embopo te tiha paiha pamone te na ingito ke be ijiera. Rate ungonana enana ta ari javotoho kogava rate ambota jo ahereketo John ke be ae ueva.”

*Grape pure Mamu na do ena avo Iesu na tirina*

*(Mark 12:1-12, Luke 20:9-19)*

<sup>33</sup> Eto Iesu na Judea ta okokose ta ke ijie einge ena, “Na timu hatirari ke nei aisona ingivujo. Iji vahai enda mamu vahai na pure andage eto grape be koveto huga tiginu irae enu grape be haito saheto mu umbasora amita hoto kovenu irae enu pegene eora simba ue iresora amita gaga i ta eto grape pure ara embo umbunu pure uo toto enda nei ta pambuna. <sup>34</sup> Eto grape sari ari iji puvunu amita ke agi ari embopo amita grape be

tuna avo amita umbara ikenu pahuo <sup>35</sup> grape pure ari embopo na grape be ikari uje ae eto embo vahai aha tea, nei teo ambuna nei karu na umbuto gosuketo tea <sup>36</sup> avo enda mamu na kito amita ke agi ari embopo isapamane ikenu pahuo grape pure ari embopo na ehako teo, <sup>37</sup> kito enda mamu na amita meni be avo ikasi ue ke einge ena, “Embo nombu kito mane tasora te otohu aisora.” ainge ijie ikenu pahunu <sup>38</sup> grape pure embopo na meni avo kito ke einge ea, “Enda mamu ta meni ere puvutuhua kivu. Ungote pambuto taro amburou enda erevi umbaro ungotenau be aja na.” <sup>39</sup> ainge eto meni avo andito umbuto huga ohio ta gosukeo benu enana huga jaruketo beto teo ambuna.” ke ainge Iesu na embo okokose ga tiritu <sup>40</sup> enana ta degi ke einge eto ingina. “Ungo do ere hotembiteve? enda mamu na puvuto grape pure ari embopo ta degi do au?” ainge enu <sup>41</sup> enana mine einge ea, “Amina puvuto embo sasapura avo tau amburoro grape pure embopo nei javotoho pere umbasuja eto enana enda mamu ta degi grape sari ari iji te ari javotoho ue donda toho amita ikasora.” ainge eo <sup>42</sup> Iesu na ke einge ena, “Ungo God ta ke ta kajari einge eteketo kiaere? ‘Bande gerikari embopo na tutuvi be enu kiari javotoho be ena.’ God ta ke kajari ta ainge mitia <sup>43-44</sup> avoeto ungota degi erena, God na ungo tohota embomeni ke ijie simba euja avo taeketo be ureto sari ikari embomeni be avo siriketo umbuto titi jigesuja.” ainge enu, <sup>45</sup> enana priests pepeni te Pharisee embomeni te na Iesu ta timu hatirari ke ikena amo enana ta degi ikena <sup>46</sup> avo be kito Iesu umbuto koto asi uje ea rate embomeni na enana ta degi do asora avo hotembitie oju ea. Amita be amo embomeni na Iesu jakeka ijie amo peroveta be ke ea avoeto.

## 22

*King ta meni na kakara jimbutu*

*pondo ena amita timu hatirari ke  
(Luke 14:15-24)*

<sup>1</sup> Eto Iesu na timu hatirari ke ehako embomeni ta degi einge ena, <sup>2</sup> “Eto God na embomeni amita toho siriketo umbuto titi jigesuja amita ari amo einge ra. Iji vahai king na amita meni na kakara jimbasi unu pondo nununga <sup>3</sup> eto amita ke agi ari embopo na embo puvuto pondo indora ikenu pondo ta duru matu ingari embomeni avo pambuto oru ea te embomeni puvurari uje ae eo <sup>4</sup> king na amita pure embomeni nei ikenu pambuto ke hande ue einge ea. ‘King na jimbari ta pondo nununga eto amina o cow meni seha te bisi te avo teto heheveketo nununga etija avo indesi pambuvujo.’ ainge eo <sup>5</sup> oru ea embomeni na ingito ingarako ue totohota uje ea. Vahai amo pure andage asi pahunu nei amita store simba asi toritinu <sup>6</sup> nei uhoho na oru puvua embo avo urumbitie andito teo ambua. <sup>7</sup> Avo kito king na tini kambari eto amita isoro embopo ikenu pambuto pondo ta pambari uje ae eto embo teo ambua embomeni avo teo ambuvujikitio enana ta da avo undukeo evekena. <sup>8</sup> Eto king na amita pure ari embomeni jage enu puvuo ke einge ena, ‘Nau meni ta jimbari pondo matu nununga etena te oru etena embomeni enana ta ujena puvurae etera amo sapura be etera <sup>9</sup> avoeto ungo pambuto degi ugorota isa ari embomeni doinge kesova avo evujo puvuto nau pondo indore,’ ainge enu <sup>10</sup> pambuto degi ugorota isa embo javotoho te sapura te tapa oru eo puvuto pondo bande ta toreto enete enete ea. <sup>11</sup> Rate King na embomeni puvua avo kesi bande ta toreto poeto kogoue pambuto embo vahai jimbari ta bo avo asukae bo nei asuketo puvuna avo kito <sup>12</sup> ke einge ena, ‘Embo umo do eto jimbari ta bo asuketo puvurae bo nei avo asuketo puvuto torete?’ ainge enu ke mine ae enu <sup>13</sup> King na amita pure embopo ta degi einge ena. ‘Embo erevi amita utu te ingeni te gatahiketo tigitio araha

mume hoi ta gosukevujo pambuto beau embomeni tapa ai ta pambuto si ijie ti kiroro kiroro aisora’.” ainge ena. Eto Iesu na ke avo enu irae enu <sup>14</sup> tutumota ke einge ena. “Na ungota degi ke be na erena. God na embo tapa oru aisuja te heriso be siriketo umbasuja.” ainge ena.

*Pharisee embomeni na Iesu na ke sokova au ingesi ke eto ingari ke ea  
(Mark 12:13-17, Luke 20:20-26)*

<sup>15</sup> Eto enana Pharisee embomeni na eonga pambuto vahaita eto naingeto eto ingari ke ngahia na aro Iesu ke sokova na harikau umbuto tasora avo ke kaseto <sup>16</sup> enana Pharisee meni ehaha amite King Herod ta tunga humbari embopo te aingeto umbuto ikeo Iesu ta degi pambuto ke gamo na poeketo einge eto ingia. “Ate poekari embo, umo ke be ari embo avo dago kiarira eto umo embo ta hajae vajae retemo kiari retemo hotembari ke vahai erevi eto ingesi uje ere ora. <sup>17</sup> Dago Rome ta gavana ta degi tax koro ere ikitera rate tax ikitie ungotena Judea embomeni ta ke pepeni avo poekitere te poekaere avo ao ingesi uje ere ora.” ainge eo <sup>18</sup> Iesu na enana ta hotembari sapura kaseto puvua amo matu kina avoeto ke mine einge ena, “Ungo jo heriso embopora na eto kesi puvuto erevete? <sup>19</sup> Avo ungota tax ikeova koro avo vahai ikevu kione.” ainge enu koro vahai ikeo umbuto kito, <sup>20</sup> “Koro emita hamo ta javo kikiva eto tombu ove eto ari amo amutare avo evu ingone.” ainge enu <sup>21</sup> “Amo Rome ta gavana ta tombu hajire ra,” ainge eo, “Rome ta hajire mitia avoeto Rome ta donda amo Rome ta ikasova eto God ta hajire kito God ta ikasova.” ainge Iesu na enu, <sup>22</sup> ingito mana mana ue Iesu toto pambua.

*Ambuto vasiri te erari amita ke avo Iesu na ena  
(Mark 12:18-27, Luke 20:27-40)*

<sup>23</sup> Eto iji amina Judea nei uhoho javo Sadducees amina embomeni ambuto vasiri te mane erasora avo be hotembitie eto ingari ke ngahia hotembeto puvuto Iesu ta degi eto

ingia. <sup>24</sup> “Ate Poekari embo ingijo. Peroveta Moses na ke einge ena, ‘eto namei na ae jimbuto umbuto ere uma meni puvurae sape aisuja amita doru amo namei nei amina jimbuto ere uma meni puvuresuja amo namei matu sape ena amita meni ke aisuja.’ ainge Moses na ena. <sup>25</sup> Rate kijo, namei kamei tapa 7 ainge ei ta mitiaetera. Eto namei bugo na ae jimbuto ere uatija meni puvurae enu ambuna amita doru avo bugo amita kakane na jimbuto ere uatija <sup>26</sup> meni puvurae enu ambunu ainge pere ue pambuto namei tapa 7 ainge pamone vahai avo jimbuto ambuvujekeo <sup>27</sup> pamone amo ambo ta ambuna <sup>28</sup> avoeto enana tapa vasiri te erasora iji te pamone amo namei amuta ae au?” ainge Iesu ta degi eto ingio <sup>29</sup> mine einge ena, “Ungo God ta ke kajari te God ta sovera te tapa kiae eova amita ue ereva. <sup>30</sup> Eto embo amburari ta eto erasora amo God ta anera Utu ta iriora ainge nombo ue mane jimbuto iresora eto nei amo ungo embo ambuto ehako vasiri te erasuja avo ke be ae eova <sup>31</sup> rate God ta ke kajari ta einge mitia amo ungo eteketo kiaere? God na ke einge ena. <sup>32</sup> ‘Na Abraham ta God eto Isaac ta God eto Jacob ta God ra.’ ainge ena avo eto God amo embo amburari ta God mane rate embo vasiri te amiga mitera amita God avo ungotena kiarira.” ainge Iesu na enu <sup>33</sup> embomeni na amita ate poekari avo kito ungo ari haiteko mane kito mana mana ea.

*God ta ke 10 amita jo ta ke nombo amo davore?*

*(Mark 12:28-34, Luke 10:25-28)*

<sup>34</sup> Eto Iesu na Sadducees embomeni ta eto ingari Iesu ta degi ikea avo ke be harikenu ingito ke mine ari inono ae ea avo Pharisee embomeni na kito vahaita toruketo <sup>35</sup> enana ta ke pepeni ate poekari embo vahai na Iesu ke sapura aja ke einge engekene <sup>36</sup> “Ate poekari embo, ke asona avo be harikejo ingone. Moses ta ke kajena ai ta ke vahai nombo be amo

deire?” <sup>37</sup> ainge enu Iesu na ke be einge harikena. <sup>38</sup> “Ke vahai nombo be amo erevira, ‘No Bada God jo tapa na ari tapa na eto hotembari tapa na osa ejo,’ <sup>39</sup> Eto ke nei nombo be amo erevira, ‘umo oenga hamo no simba ue osa eoa ainge nombo no namei kamei tapa osa ejo’ <sup>40</sup> eto God ta ke pepeni ikenu Moses na kajena amita Peroveta na kajea tapa amita ke susu be amo erena erevira.” ainge Iesu na ena.

*“Judea ta hondate ari embo amo ahije amuta re.” ainge Iesu na eto ingina*

*(Mark 12:35-37, Luke 20:41-44)*

<sup>41</sup> Eto enana Pharisees embomeni vahaita uo Iesu enana ta degi ke einge ena, <sup>42</sup> “Ungo do ere hotembiteve? Ungotenau orekari embo amo amuta ahije re?” ainge enu “Amo King David ta ahije ra.” ainge Pharisee embomeni na eo, <sup>43</sup> Iesu na, “Eto amo David ta Ahije kito Ahihi Otohu na do eto David ta degi enu, ‘Amo nau Bada ra’ ijie kajenu, <sup>44</sup> ‘Bada God na nau Bada ta degi ke einge ena ‘nau ingeni be ei ta arumbeto iriro nane no kitohe toto ikano inena utu na hatiresoa,’ ke ainge ijie David na kajena. <sup>45</sup> Eto David na ‘Nau Bada ra’ ke ena avoeto ungo do eto ungotenau orekari embo amo David ta ahije ke eove?” ainge Iesu na enu <sup>46</sup> embomeni amuna ke mine ae be ea eto iji amikote eto iji tapa amita ambota enana me kogue Iesu ta degi eto ingari ke mine ae ere uatera.

## 23

*Ke javotoho davore sapura davore avo be eto kogoeto ingora Iesu na ena*

*(Mark 12:38-39, Luke 11:43,46, 20:45-46)*

<sup>1</sup> Eto Iesu na amita ambotani te embo tapa ta degi ke einge ena. <sup>2</sup> “Enana ke pepeni ate poekari embomeni te Pharisee embomeni te na Moses ta besi umbuto Moses ta ke pepeni simba ue mitera. <sup>3</sup> Avoeto enana ari do ava aisora avo evujo. Rate enana ta ke avo agi ae eora

avoeto enana ta ari avo umbavojo, <sup>4</sup> enana eora amo eingera. Enana ta ate poekari na donda bouka be umbari haite mane avo embo ta koho ta ango eora rate ungo oenga hondate eto umbuto pambari uje ae ue <sup>5</sup> ari do eora amo embo tapa na kito embo peni ke ara eora. Enana God ta ke paper koso vahai be ai ta kaeto ingeni ta eto beo ta bavahaikeora avo kivujo nei bo uhu ta esi umbuketo handuketo bo ta tigitore beuja amo embo na kito God osa ari embo ke ara eora <sup>6</sup> eto pondo ue embo peni amita arumbari asa ta arumbeora eto ke kasari bande ta embo peni ke ijie titi vuju ta arumbeora <sup>7</sup> nei market ari besi ta puvuto 'embo emo ate poekari embora' ainge ara eora.

<sup>8</sup> Rate ungo embo tapa vahai vahai na, 'Ate poekari embo,' embo ke ijie jigama avojo. Ungo namei kamei eto ungota atepoekari embo vahai be mitia <sup>9</sup> eto nei amo enda ta mitie embo vahai ta javo jigo bivitirou, 'Nau Mamo' ke mane sio aisoa amita be amo no mamovahai be Utu ta iriuja. <sup>10</sup> Eto nei amo embo na no degi ta 'titi jigari embo' ke aisuja avo taekejo ungota titi jigari embo vahai be amo ungota orekari embo God na ikena avoeto. <sup>11</sup> Eto embo amuna embo peni asi uje aisuja amina ungo unditie simba aisuja. <sup>12</sup> Eto embo amuna umo eonga eto peni aisuja avo God na au embo peni mane aisuja rate embo amuna embo teho ke ijie embo nei unduresuja avo God na au embo peni aisuja."

*Pharisee embomeni na hotembari heriso ue pure sapura ea*

(Mark 12:40, Luke 1:39-42,44,52, 20:47)

<sup>13</sup> Eto Iesu na Judea ta ke pepeni ate poekari embomeni te Pharisee embomeni te ta degi einge ena, "Jove jove, ungo hotembari heriso embopo ungo God na titi jigauja degi ai ta torari uje ae ue amita bokiri embomeni ta titi ta ahurekitova eto ai ta torasi uje ere ora embomeni ere taekitova. <sup>14</sup> (-)

<sup>15</sup> Jove jove ungo ke pepeni ate poekari embomeni te Pharisee embomeni te na hotembari heriso na embo vahai be ungota ke ambo ambo aja hoi be hoi eva ovitihota eto enda nei ta pambuto ungo ta ke hande eova rate embo vahai ungota ke ingito ambo ambo aisuja amo ungota ate poekari na avo amita jo tongopa au ungo ga tapa ambuto Satan ta degi pambasuja.

<sup>16</sup> Jove jove ungo hotembari heriso embomeni ungo titi kuru ari na embomeni degi avo kiora arako ereova. Ungo ke sokova avo einge ate poekitie ere ova, 'Eto embo na temple ta javo jigama ue ke ikasuja amo ivo ambu avoeto ke amo toasuja amo tehora rate embo na temple ta gold javo jigama ue ke ikasuja amo sovera mitia avo eto mane toasuja,' ke ainge amo ungo sarika embo titi kuru ari na kiae kiae ue eova.

<sup>17</sup> Rate ungota degi erena, Temple amo otohavoeto amina au temple ta gold otohavoeto donda nombo amo gold retemo temple re?

<sup>18</sup> Eto ke nei einge eova, 'Eto embo na God ta pene ikari gaga ta javo uhue ke aisuja amo ivo ambu avoeto toasuja amo tehora. Rate gaga hamota hande mitia amita javo uhue ke aisuja amo sovera te avoeto mane toasuja.' <sup>19</sup> ainge titi kuru ari embo na arako kiae kiae eova. Rate erena amo pene gaga na eoi hande otohovuja avoeto donda nombo amo davore? <sup>20</sup> Avoeto embo na God ta pene gaga ta javo uhue ke aisuja amo pene gaga ta javo pere mane rate amita hamo ta do mitia amita javo uhue euja. <sup>21</sup> Eto nei embo na temple ta javo uhue ke aisuja amo God ai iriuja avoeto temple te God te amita javo uhue ke euja. <sup>22</sup> Eto embo na Utu i ta javo uhue ke ikasuja amo God ai ta titi jigauja arumbeto mitia avoeto amita javo uhue euja. Avoeto erena amo javo uhue ke eora amo ate poekari sapura be avo eova.

<sup>23</sup> Jove, jove. Ungo ke pepeni ate poekari embopo te Pharisee embopo



te tunga heriso na God ta degi hande ikasi ue donda isasaraho pujo jeune hambuga ainge kateke eto tapa 10 ainge iketo vahai amo God ta ra eova rate God ta ke pepeni avo teto haito eova amo embo nei ta irari javotoho na irora simba ari embo ta osaga kito jo tambari eto ke be ari eto ke nombo emite tapa aeteva <sup>24</sup> ungo titi kuru ari na arako o teonda umo ta beasuja avo umo ga indiona umbuto gosuikitie o camel pajire be avo pe te ungekitie ere ova.

<sup>25</sup> Jove jove, ungo ke pepeni atepoekari embomeni te Pharisee embomeni te hotembari heriso na ungota heva atungu hamo pere egitie jo egae tova rate ai ta amo donda ambu embo hotembae ue, 'Na na' ijie donda egimbeto ere uhova amo atungu jo ai ta mitia. <sup>26</sup> Ungo titi kuru ari Pharisee embomeni eto atungu jo egasoa amo hamo te tapa javotoho aisuja.

<sup>27</sup> Jove jove. Ungo ke pepeni ate poekari embopo te Pharisee embopo te na hotembari heriso hotembitie eova. Ungo embo ta hamo kovari use aingekora gajiketo koro na jorereto iketo i buji na kogombeore use hamo kiari javotoho euja rate jo ta amo masa kakesa iriuja <sup>28</sup> ainge nombo ungota hamo avo embomeni na kogue kiari javotoho ke eora rate jo ta amo ke sokova te ari sapura te na enetari.

*Pharisee embomeni na enana ta ari sapura ta mine umbasora avo Iesu na harikena*  
(Luke 11:47-51)

<sup>29</sup> Jove jove. Ungo ke pepeni ate poekari embomeni te Pharisee embomeni te hotembari heriso ue peroveta ta irari javotoho embomeni matu amburari ta use javotoho iketo donda kiari javotoho na kogombeto <sup>30</sup> ke einge eova, 'Nau mamamane na embo erevi teo ambuna iji amikote na ari ainge mane aetena,' ainge eova <sup>31</sup> eto ke ainge ijie amo ungo God ta ke hande ari embo avo tari amburari amita ahihije te ari vahai

embopo ra <sup>32</sup> avo eto pure avo ungota ohihi na itikari avo evujo irae ai. <sup>33</sup> Ungo embo sasapura koso o ta meniundi ainge ra. Ungo ta ari sasapura ta bouka amita memenga Satan ta memenga kiari degi ai ta kesoa amo naingeto toto pambavo?

<sup>34</sup> Na ungota degi erena, na peroveta te kiari embopo te ate poekari embopo te ikano ungota degi puvuto ke aisora te ungo na nei tavo amburesora, nei i atahu ta tasova nei God ta ke hande ari bande ta esi na ejembasova eto da nei ta nei ta mitera amo kurumbasova. <sup>35</sup> Eto embo jajavotoho teo ambuvujekari amita meni amo ungo na ikasova ohihi embo Abel ta eto puvuto embo Berachiah ta meni Zachariah amo ungo na temple jo eto pene gaga amita ugorota tave ambuna <sup>36</sup> eto sio ambuvujekea tapa amita bouka amo ungo eha miteva ungo na umbasova avo erena ingivujo."

*Iesu na da Jerusalem embomeni osa ena*  
(Luke 13:34-35)

<sup>37</sup> "Jerusalem, Jerusalem aja to be erena. Peroveta ta ke hande ari embomeni God na ikena amite tapa amo ungo na koro na teove ambuvujekea. Eto di ohora meni na pambuto e ta gati ta toreto gombuto iriora ainge nombo Jerusalem ta embomeni simba aisi uje eona rate na simba ana ungo uje ae eova <sup>38</sup> avoeto ungota temple ai ta embo irae teho iresuja <sup>39</sup> eto ungota degi erena iji eha eto ambota na ehako mane kesova rate ungo, 'Bada ta javo ta puvuto ere hua God hondate e.' ke ainge aisova iji amikote na ehako kesova." ainge Iesu na ena.

## 24

*Temple karaueto beasuja amita ke*  
(Mark 13:1-2, Luke 21:5-6)

<sup>1</sup> Eto Iesu na temple jo ta eto araha ta puvutuhunu amita ambotani puvuto temple gerikari javotoho avo Iesu kioja ke eo Iesu na einge ena. <sup>2</sup> "Bande erevi ungoni javotoho ere

kogova te ungota degi erena, atara vahai na nei amita hamo ta mane tembeto iresuja rate tapa araraeto beto sio sao aisuja.” ainge Iesu na harikena.

*Osaga memenga puvuresuja  
(Mark 13:3-13, Luke 21:7-19)*

<sup>3</sup> Eto Iesu tiri olives ta arumbeto mitinu amita ambotani ungo eonga puvuto einge eto ingia. “Temple amo iji deina arara eto beau? Eto nei iji emita tutumota umo puvuresoa amita hajire do aingere avo tapa ejo ingore,” ainge eo <sup>4</sup> Iesu na mine einge ena, “Embomeni ke sokova hande aisora avoeto be kogue irivujo, <sup>5</sup> embo nei nei na javo nau jigama ue ke sokova na ijie puvuto “Ungo orekasi puvena” ainge ijirou ingihe embo isapamane enana ta ke sokova avo ambo ambo aisora <sup>6</sup> eto ungoni isoro auvari ta aisora amita asavi ingesova eto hoi ta asora amo duru ingihe osaga avojo. Ari ainge puvuresuja rate iji kombu ta auvetija ainge mane hotembasova. <sup>7</sup> Enda nei na ereto enda nei ga isoro aisora eto King vahai na ereto King nei tasuja. Nei beuje iji peni vahai puvutuhourou enda tapa ta titira puvuresuja. <sup>8</sup> Eto ari erena tapa erevi amo pamone na meni ingasi ue memenga kiuja ainge nombo ra.

<sup>9</sup> Eto ungo amo embomeni na andito umbuto embo nei ta ingeni ta ikaro umbuto aro memenga kesova eto taro amburesova. Eto ungo embomeni nau avoeto embo tapa na ungota degi tini kambari matuainge aisora. <sup>10</sup> Iji amikote nau embomeni nei nei na tunga hapereketo na ke be ae ue tini kambari mine ara ue namei ungota kitoho embo ta ingeni ta ikasora. <sup>11</sup> Eto peroveta sokova amina puvuto ke sokova ijiro ingihe ambo ambo aisora <sup>12</sup> eto ari hotembari sasapura na pajito enda eneteto au namei kamei ta osari jamopo aisuja <sup>13</sup> rate embo amuna sove sove eto na ke be ijie irirou iji kombu ta embo amo God na oreketo

umbasuja. <sup>14</sup> Eto God na tohota embomeni titi jigesi siriketo ere uhua ke javotoho avo Judea embomeni te enda tapa embomeni te ta degi ke hande aro embo tapa ingesora eto amita engitita iji kombu ta puvuresuja.

*Da Jerusalem ta osaga puvuresuja  
(Mark 13:14-23, Luke 21:20-24)*

<sup>15</sup> Eto Peroveta Daniel na Donda Sapura be Sapura amita ke matu kadena avo umbuto puvuto Degi Otohu ta ikaro hetasuja (ke erevi etekari embo be ingijo) <sup>16</sup> kito ungo Judea ei ta miteva embomeni joru tiri ta pambuvu. <sup>17</sup> Eto embo bande i ta mitia amo beto amita donda mane sirikasuja. <sup>18</sup> Eto embo pure ta mitia amo mane egerembeto amita asukari umbasuja te titi tambueto pambuvu. <sup>19</sup> Eto iji amite pamone urete te eto pamone meni isapa emi ta amita degi tutuvari ngahia avoeto aja to erena! <sup>20</sup> Eto ungo joru pambasova iji avo ga iji te mane puvuresuja eto jangu indari iji te mane puvuresuja pari ta ainge evujo <sup>21</sup> amita be amo utu te enda te eha ari iji te eto puvuna iji amite memenga osaga ainge puvurae be ra eto amita ambota ari ainge ehako mane puvuresuja. <sup>22</sup> Eto osaga kiari iji avo ugorota taekae aisora amo embo tapa vasiri te mane iresora rate God ta embomeni siriketo umbari avoembo God na iji avo ugorota taekasuja. <sup>23</sup> Eto embo na no degi ta “Kijo, ungotenau Orekari Embo puvija erevira.” eto iji nei “Hoi ta ere puvutuhua,” ainge aisuja ingito ke avo be hotembavojo <sup>24</sup> amita be amo orekari embomeni sokova eto peroveta embo sokova na ereto hajire nei te nei te aro embomeni kito mana mana ue ke be hotembasora. Eto God na siriketo umbari embomeni te tapa na enana ta ari kito ke be ke ijie ambo ambo asi hotembasora, <sup>25</sup> avoeto ari avo puvuresuja avoeto kiti ere harikiteni ingivujo.

<sup>26</sup> Eto embo na ungota degi “Kivu ungotenau orekari embo puvija avo

ojagatambu aita mitia,” ke ainge ijirou ai ta pambavojo eto ke nei amo, “Kivu orekari embo puvuto degi nei ondikari ta mitia,” aisora ke avo ingovojo <sup>27</sup> amita be amo pipiri na ihane ta sariage eto pambuto sose ta beuja ainge nombo Embo ta Meni amo puvurou embo tapa kesora. <sup>28</sup> Eto o sape ta di hai na beuja aingeko nombo puvuresuja.

*Embo ta Meni naingeto puvuresuja*

*(Mark 13:24-27, Luke 21:25-28)*

<sup>29</sup> Eto osaga kiari iji avo irae au iji amo mume ururou hariga na usasa isapa aisuja eto utu ta sovera na jahevau tarama soheto beasora, <sup>30</sup> eto iji amikote Embo ta Meni ta hajire avo utu ta puvurou enda embo tapa na kito sinena ue jenge tasora, eto Embo ta Meni avo sovera te usasa te utu ta oje hamo ta heteto beto ere hua avo embo tapa na kesora eto amina toho embomeni matu siriketo umbari avo vahaita puvurora <sup>31</sup> huin hukau asavi peni vahai au amita anera isapamane ikau enda tapa kaina patina ihane eto sose ta pambuto umbaro puvuresora.

*Embo ta Meni puvurari iji avo embo tapa kiaera*

*(Mark 13:28-31, Luke 21:29-33)*

<sup>32</sup> Na i junga ta timu hatirari ke aisona ingivujo. <sup>33</sup> Eto i avo huvira oi kito iji ta iji ere puvutuhua ke eora. Eto ainge nombo ari erevi erena amo puvurou kesova amo Embo ta Meni na jo ta torasi bokiri pe ta auveto heteto mitia. <sup>34</sup> Na ungota degi ke be erena ungo eha miteva embomeni tapa mane sasari aisora rate tuna mitirovo ari erena erevi puvurou kesova. <sup>35</sup> Eto ke peni be amo utu te enda te avo irae aisuja rate nau ke avo mane irae aisuja te daroho iresuja, <sup>36</sup> rate ari erena amita puvurari iji amo embo tapa kiae be eto anera te God ta Meni te tapa kiae, Mama God na vahai kiarira.

*Be kogue irivujo*

*(Mark 13:32-37, Luke 17:26-30,34-36)*

<sup>37</sup> Eto embomeni Noah ta iji te mitaetera ainge nombo mitiroro Embo ta Meni puvuresuja. <sup>38</sup> Amita be amo embomeni indie uhe pamone jijimbukitie mitio Noah e nga jo ta toritinu <sup>39</sup> do puvuresuja amo embomeni nei do hotembae ue mitio umo na irerembeto umbunu sasari ea, ainge nombo mitiroro Embo ta Meni puvuresuja, <sup>40</sup> Eto iji amite embo heriso pure ue mitiroro puvuto embo vahai umbuto pahue vahai toasuja, <sup>41</sup> eto pamone heriso ambe pure ue mitiroro puvuto vahai uhue nei toasuja. <sup>42</sup> Avoeto jo te hotembari te tapa simba be eto kogo ue irivujo. Ungota Bada ta puvurari iji amo ungo kiae avoeto. <sup>43</sup> Eto ungo kiarira amo pegene embo ta puvurari iji amo bande mamona matu kogua avoeto evae simba ue mitirou pegene embo puvuto kito mane bande pejeto toreto pegene aisuja. <sup>44</sup> Ainge nombo Embo ta Meni avo eha mane puvuresuja ainge hotembitie irirovo amo hepureketo puvuresuja avoeto matu nununga eto irivujo.

*Embo peni ta indari agari embo amita timu hatirari ke*

*(Luke 12:41-48)*

<sup>45</sup> Eto embo peni na amita pure embo vahai ta indari ageto undurari javotoho avo bande mamona na kito au bande ta indari tapa amo amina simba aja ke aisuja. <sup>46</sup> Eto pure avo eto kogoeto ururou embo peni bande ta puvuto pure embo avo kito tunga javotoho <sup>47</sup> eto ke au pure embo na amita donda tapa simba ue osa asuja avo erena, <sup>48</sup> rate pure embo nei amo ke sokova ari embo amina, ‘Bande mamona eha mane puvuresuja,’ ijie <sup>49</sup> itiketo amita pure vahai ari embomeni torue embo sasapura ga umo sapura indito pipi konene ue bande mamona puvurari hotembae ue mitirou <sup>50</sup> iji ikae teho puvuto pure embo sapura avo kito ikau pambuto enana hotembari heriso embomeni

amiga osaga inono kesuja. <sup>51</sup> Eto ai ta embo sasapura na memenga kogue sisasisi ijie ti kiroro kiroro aisora.” ke ainge Iesu na ena.

## 25

*Kakara tapa ten amita timu hatirari ke*

<sup>1</sup> Eto Iesu na ke einge ena, “Embo ta Meni puvuresuja iji amite God na tohota embomeni siriketo umbasuja amita ari amo einge ra. Iji vahai kakara tapa ten amo jao ta jimbari pondo ta pambuto hovatu kesi usasa eonga eonga umbuto unduduketo pambua. <sup>2-3</sup> Eto kakara tapa 5 ainge amo kerosene irae au jojekasora avo hotembeto umbuto pambua <sup>4</sup> te nei 5 amo sarika ue umbuto pambae toto pambua. <sup>5</sup> Eto hovatu sau puvurae unu bande ahone ta simba ue iji koso kaso be mitio evora enu sereketo evia. <sup>6</sup> Eto tumba ugorota embo na ‘Jimbari embo ere puvutuhua pambuto ope ope karitie umbuto puvujo’ jage eto ainge eo, <sup>7</sup> kakara 10 avo ereto usasa jigio perimbenu <sup>8</sup> kakara tapa 5 teho pambua amina nei kerosene umbuto pambua, amita degi einge ea, ‘Dagota usasa irae aisi ere ua rate dago kerosene isapa hondate avote?’ ainge eo, <sup>9</sup> ‘Aja to be erera, dago jigama aisora avo inotara ungo pambuto nei ombuto puvuvujo.’ ainge eo <sup>10</sup> pahuo jimbari embo puvunu enana matu nununga ea amina amite tapa jo ta toreo bokiri ahurekena. <sup>11</sup> Eto enana pambuto kerosene umbuto puvuto bokiri matu ahurekari avo kito ke einge ea, ‘Hovatu, hovatu, dago bokiri hirikejo torare.’ ainge eo <sup>12</sup> jimbari embo na ke einge ena, ‘Na ungo be kiae ere ona pambuvujo.’ ainge ena. <sup>13</sup> Avoeto ungo mane evesova rate teho mitie simba evujo. Amita puvurari iji amo ungo kiae avoeto.” ke ainge Iesu na ena.

*Embo 3 amina koro umbua amita timu hatirari ke*  
(Luke 19:11-27)

<sup>14</sup> “Eto God na tohota embomeni siriketo umbasuja amita ari amo eingera. Embo peni amo degi nei ta pambasi ue amita pure embo 3 ainge avo jage enu puvuo amita koro kateke kateke eto enana simba ara ikena. <sup>15</sup> Vahai amo pure pajire ari haite kito amita 5,000 kina ikena nei amo pure isapa peni ari haite kito 2,000 kina ikena eto nei embo pure isapa be ari haite kito 1,000 kina iketo toto degi nei ta pambunu, <sup>16</sup> embo 5,000 kina umbuna amina pure sausau itiketo pure ue 5,000 kina nei tambuna, <sup>17</sup> nei 2,000 kina umbuna amina pure ue 2,000 kina nei tambuna <sup>18</sup> rate 1,000 kina umbuna embo avo teho hoto koveto amita titi jigari ta koro avo hoto jo ta iketo ahurekena. <sup>19</sup> Eto iji koso be amita ambota titi jigari embo ehako egerembeto puvuto koro ikena avo do do ea avo kesi ke enu <sup>20</sup> 5,000 kina umbuna embo amina puvuto ke einge ena. ‘Bada inena nau degi ta 5,000 kina ikita amo pure eto 5,000 nei tahana erevira,’ ainge enu <sup>21</sup> amita titi jigari embo na, ‘Umo pure ari embo javotohora, na no degi ta isapa ikitane javotoho na jigama etea avoeto na umu tumota ue isapamane inena simba ae ikasona. Hae! Umo namoga mitie tunga javotoho aena.’ <sup>22</sup> Ainge eto 2,000 kina umbuna amina puvuto ke einge ena, ‘Bada, nau degi ta 2,000 kina ikita amina 2,000 nei uhana erevira.’ ainge enu <sup>23</sup> kito ‘Umo pure ari embo javotohora, na no degi ta isapa ikitane javotoho na jigama etea avoeto na umu tumota ue isapamane inena simba ae ikasona. Hae! Umo namoga mitie tunga javotoho aena.’ ainge enu <sup>24</sup> 1,000 kina umbuna amina ambota puvuto ke einge ena, ‘Bada, na kogona amo umu embo ngahia ra, embo nei na pure uore donda umbuoa avoeto nau ikita avo beto pambuja <sup>25</sup> joru eto pambuto hoto koveto koro ikita avo ahurekitane mitei umu puvea avoeto ahiketo umbuto puvuto no ikari avoeto no ere ikitena, umba.’



ainge enu <sup>26</sup> ingito ke einge ena, 'Umo kupi pegogo embora. Eto na embo nei ta pure ta donda umbuto indiona avo umo kiari ke erea <sup>27</sup> avoeto do eto nau koro bank ta ikae re? Eto ainge aetea amo puvuto koro nau ikari amite koro nei amita hamo ta ikaro umbaetena.' <sup>28</sup> ke ainge eto amita pure embomeni ta degi ke einge ena, 'Aravora embo emita 1,000 kina avo umbuto embo 5,000 kina ikitana amita degi ikevujo. <sup>29</sup> Amita be amo embo donda mitia amita degi donda nei hamota ikasona, eto embo donda irae amita degi do mitia avo umbano donda ambu embo be aisuja. <sup>30</sup> Eto kupi pegogo embo erevi umbuto ari sasapura embomeni memenga kogue iriora degi ai gosukevu beto mume ta mitie si ijie ti kiroro kiroro ijie iroi,' ainge Iesu na ena.

### *Iji kombute ari sirikasuja*

<sup>31</sup> Eto Iesu na ke einge ena, "Eto Embo ta Meni na usasa kiari javotohote puvutuhurou anera tapa na gara petikita jigiriketo ope ope karitie umbuto puvuto ikaro amita avo arumba peni usasa te ai ta arumbasuja. <sup>32</sup> Eto enda tapa embomeni na puvuto vahaita ururoro o simba ari embo na o sheep te o goat te siriketo eonga eonga ikeuja <sup>33</sup> aingeko amina o sheep sirikau ingeni be ta bitesora eto o goat sirikau ingeni anga ta bitesora. <sup>34</sup> Eto King amina embomeni amita ingeni be ta ke einge aisuja, 'Ungo ari jajavotoho ari embomeni ra, <sup>35</sup> na beuje oi unгона indari te umo te ikitave indimitana, eto degi nei ta eto puvutohone ungo na peketeve tunga javotoho uena. Eto bo ambu one ungo na bo ikitave umbuto asukitana. <sup>36</sup> Eto ambure one ungo na hondate ueva eto tipura ta mitene na kesi pahava avoeto nau mama na osa ue ungo hondate aisuja. Amina enda eha ta ari iji te ungota irari degi javotoho ena ai ta toreto ungota enda hoteto umbuto mitirovo nane ungo simba aisona, have.' ke ainge au

<sup>37</sup> embomeni jajavotoho na ingito ke mine einge aisora. 'Bada, nango iji deina umo kito beuje te puvutohoe indari te umo te iketere indimitae? <sup>38</sup> Eto umo iji deina enda nei ta eto puve pekitare, bo ambu kito iketere asukitae, <sup>39</sup> ambure oe kito hondate uere eto tipura nainge mite pambuto umoro uere?' ainge aro <sup>40</sup> King amina einge aisuja. 'Ari emo nau namei vahai donda ambu teho mitiaetija amita degi ae rate nau degita ueva.' ke ainge <sup>41</sup> eto amita ingeni anga ta mitera embomeni amita degi ke einge aisuja. <sup>42</sup> 'Na beuje na ahana te ungo na nau degi ta indari te umo te ikae. <sup>43</sup> Eto enda nei ta eto puvuritana rate ungo na pekae eto bo ambu uena te ungo na bo ikae asukae eto tipura ta mitie ambure uena rate ungo puvuto na hondate ae avoeto na toto pambuto Satan te amita anera te datoho ta evikite iriora Mamo God na i nununga ari ai pambuto ungota ari sasapura ta mine umbuvujo' ainge au <sup>44</sup> enana mine einge aisora, 'Bada, inena beuje te ujeje te enda nei ta eto puvurari eto bo ambu eto tipura ta ambure te tapa nainge oe kito hondate ae uere?' ainge aro <sup>45</sup> amina ke mine einge aisuja. 'Na ungo ta degi ke be erena. Ungo namei vahai beuje te ujeje te puvuna avo kito hondate ae ueva amo namora te kito hondate ae ueva.' ke ainge au <sup>46</sup> enana pambuto datoho ta osaga kogue iresora te enana jajavotoho na tunga javotoho ue irari datoho ta iresora."

## 26

*Enana Priests pepeni te embo okokose te na Iesu taro amburoja ke kasea*

*(Mark 14:1-2, Luke 22:1-2, John 11:45-53)*

<sup>1</sup> Eto Iesu na ke tapa do asi uje ena avo enu irae enu amita ambotani ta degi ke einge ena. <sup>2</sup> "Ungo kogova amo iji tapa 2 irae au jarukari pondo aisora. Eto iji amite Embo ta Meni avo kitoho embo ta ingeni ta ikaro i atahu ta tasora," ainge ena.

<sup>3</sup> Eto Priests pepeni te embo okokose te na priest ta titi jigari embo javo Caiaphas ta bande peni ai ta toruketo <sup>4</sup> ke sokova na nainingeto Iesu umbuto taro amburesuja ke avo kasea. <sup>5</sup> Eto ke nei einge ea, “Eto eha aisora amo embomeni pondo ta puvuresora amina kito ereto jujune ue mine tara mane tara aisora avo eto ambota aisora,” ke ainge ea.

*Pamone vahai amina Iesu oil na kutena*

*(Mark 14:3-9, John 12:1-8)*

<sup>6</sup> Eto Iesu amo da Bethany ai embo Simon amo ambure sapura javo leprosy umbari ra te matu kondari amita bande ta mitinu, <sup>7</sup> pamone vahai na Iesu osa ue amita degi puvuto bottle isapa ai ta oil mune javotoho te amita mine amo koro pajire be avo umbuto puvuto Iesu gaga ta arumbeto mitinu sirota jojekenu, <sup>8</sup> amita ambotani na kito tumo ue ke einge ea, “Donda javotoho amo do eto aijaja ere oi? <sup>9</sup> Donda avo ombuto koro umbuto donda ambu embo ta hande ikae.” ainge ijio <sup>10</sup> Iesu ingito ke einge ena, “Pamone emita degi do eto ngahia ere ove? Amina nau degi ta etija amo ari javotoho be ra. <sup>11</sup> amita be amo donda ambu embo amo ungote matuainge iresora rate namo ungote iji koso mane iresona, <sup>12</sup> eto na kovasora avoeto hamo nau nununga ana amita ujena oil na kutitia. <sup>13</sup> Eto na ungota degi erena, God ta ke javotoho enda nei ta nei ta hande asora amo pamone erevi hotembitie ari do etija emiga tapa hande aisora.”

*Judas na Iesu ombasi sirikena*

*(Mark 14:10-11, Luke 22:3-6)*

<sup>14</sup> Eto ambotani tapa <sup>12</sup> rate vahai Judas Iscariot amina pambuto <sup>15</sup> priests okokose ta degi ke einge ena, “Eto na Iesu ungota degi ta ikasona te nau koro doinge ikavo?” ainge enu, <sup>16</sup> “Koro tapa 30 kina ainge ikasora.” ainge eo Judas na pambuto iji deina Iesu umbuto enana ta ingeni ta ikasuja avo iji javotoho itiketo jombure ena.

*Bada na amita ambotani ga pondo ena*

*(Mark 14:12-21, Luke 22:7-14, 21-23, John 13:21-30)*

<sup>17</sup> Eto bread pajirari sivo ikae avoeto tevoko ari amita pondo iji puvunu ambotani na Iesu ta degi puvuto ke einge ea. “Umo ‘jarukari’ ta pondo indesoa avo degi nainge nununga ara uje ere oe?” ainge eo, <sup>18</sup> Iesu na, “Embo vahai da peni amita jo ta iriujua amita degi pambuto ke einge evujo ‘Bada ta iji avutei jarukari ta pondo amita ambotani ga no bande ta indesi etija,’ pambuto ainge evujo.” ke ainge enu <sup>19</sup> pambuto jarukari ta pondo nununga ea.

<sup>20</sup> Eto pondo iji puvunu ture vovunu Iesu amita ambotani ga gaga ta arumbeto <sup>21</sup> indie mitio Iesu na enana ta degi ke einge ena, “Na ungota degi erena ungo namote ereova embo vahai amina na umbuto embo nei ta ingeni ta ikasi ere ua.” ke ainge enu <sup>22</sup> ingito tunga osaga ue enana vahai vahai Iesu ta degi einge eto ingia. “Bada amo namorami ere te?” ainge ijio <sup>23</sup> Iesu na “Embo indari umbasi namote heva ta ingeni jujuruketija amina na harikau umbasora. <sup>24</sup> Eto God ta ke matu kajari ta amo Embo ta Meni amburesuja avoeto amburesona rate harikari embo ta degi osaga isapamane puvuresuja javotoho amo amita e na ingae toaetija kito amo osaga mane kiaetija.” <sup>25</sup> Eto Judas harikasuja embo amite tapa ke einge ena, “Ate poekari embo, amo namorami ere te?” ainge enu Iesu na, “Ke emo inena etea.” ainge ena.

*Iesu na amita pondo avo enu india*

*(Mark 14:22-26, Luke 22:14-20, 1 Corinthians 11:23-25)*

<sup>26</sup> Eto enana vahaita indie mitio Iesu na bread umbuto pari eto pereto ambotani ta degi ikitie ke einge ena, “Emo hamo naura umbuto indavu.” ainge enu indio <sup>27</sup> atungu umbuto God ta degi osa eto ambotani ta ikitie ke einge ena,

28 “Emo sasaga naura umbuto indavu. Eto God na embo isapamane ta ari sasapura hotembeto toaja sasaga erevi pene eha ta ke ikari avo overeketena indavu. 29 Eto na ungota degi erena wine ajireketo mitirono ungo Mama ta titi jigari degi ai ta torasova iji aramite ungo ga wine eha avo indesona.” ainge Iesu na enu 30 haveni eo irae enu da toto tiri javo olives ta pambua.

*Peter na Iesu kiae ke aisuja avo Iesu na harikena*  
(Mark 14:27-31, Luke 22:31-34, John 13:36-38)

31 Eto tiri olives ta pahue Iesu na enana ta degi ke einge ena, “God ta ke ta einge kajari mitia ‘nane o simba ari embo tasona eto o irae joru sio sao pambasora’ ke amita be amo mume eha eremite ungo tapa na tumota ae ue toto pambasova. 32 Eto na ambuto vasiri te hoeto kiti Galilee ta pahurono ungo ambota pambasova.” ainge enu, 33 Peter na ingito ke einge ena, “Enana tapa umo toto pambarote asora te nane umo mane tumota ae aisona.” ainge enu 34 Iesu na, “Na no degi ta erena umo mume emita jo ta na kiae ke 3 ainge ijiro ohora javone aisuja” ainge enu 35 Peter na Iesu ta degi ke einge ena, “Ainge manera te umo amburesi asoa amo namote tapa amburesoa te nane mane umo kiae ke aisona.” ainge enu ambotani tapa na ke vahai ainge pere ea.

*Degi javo Gethsemane ta puvuto pari ena.*

(Mark 14:32-42, Luke 22:39-46)

36 Eto Iesu na amita ambotani ga degi javo Gethsemane ta puvuto amita ambotani ta degi ke einge ena, “Ungo ei ta irirovo na oi ta pambuto pari aisona.” ainge eto 37 Peter te embo Zebedee ta meni heriso aingeto umbuto pambuna. Eto Iesu ta degi tunga osaga pajire be puvunu 38 enana ta degi einge harikena. “Nau jo osaga na enetitia avoeto ungo ei ta na avoembo evo avojo.” ke ainge eto 39 toto bajireketo

imite enda ta beto gogovo eto pari einge ena. “Nau Mama, ari nei irirou kito osaga nau degi ta puvuresuja avo ejo na seniketo pambai rate uje nau mane rate uje no tapa avo ere ona.” pari ainge eto 40 ereto pambuto ambotani 3 avo evopo uo kito ke einge Peter ta degi ena, “Umo iji isapa namote pari ae do eto ivo ambu eto ere eve? 41 Ungo pari eto sovera ari umbuto na kiae ke mane aisovami ere evevete? Embo ta jo na uje euja rate bisi amo ivo ambu euja.” ke ainge eto 42 ehako toto bajireketo imite pari einge ena. “Nau Mama, eto osaga erevi na seniketo pambari inono ae kito aravora na no uje tapa avo aisona,” pari ainge eto 43 pambuto enana tapa pegogo ue evopo uo 44 kito egerembeto pambuto pari matu ena vahai ainge nombo enu irae enu 45 ereto pambuto ambotani ujitie ke einge ena. “Ungo jangu indie ere evevete? Ereto kivu Embo ta Meni ari sasapura embomeni ta ingeni ta ikari iji puvija 46 na harikari embo puvuto ere hua erevu ungotte pambuto degi ta tambare!”

*Iesu umbua*  
(Mark 14:43-50, Luke 22:47-53, John 18:3-12)

47 Ainge ijie mitinu, Embo puvua amo priests pepeni te embo okokose te na ikeo ki te emite umbuto ambotani vahai Judas Iscariot amiga puvua. 48 Eto harikari embo amina kiti ea “Na pambuto embo vahai andito mune aisona aravora umbuvujo” ainge matu ena, 49 avoeto Iesu ta degi titi tambueto pambuto, “Ate poekari Embo, na umo ere pekitona.” ainge eto andito mune unu 50 Iesu na, “Nau namei umo do asi puvea avo ejo.” ainge enu enana tutu tatu puvuto Iesu andito uhuo 51 ambotani vahai na amita asivo goruketo umbuto priest peni ta pure embo vahai jasi iketo araseketo onde jeto tiukena. 52 Rate Iesu na kito ke einge ena, “No asivo goru ta juruke. Embo amuna asivo goruketo umbuja

embo amo asivo na kajeoi ambuja.  
<sup>53</sup> Eto na hondate ari uje eto Mama ta degi pari aetena amo anera 70,000 ainge. ikau puvuraetija avo umu hotembae ere oe? <sup>54</sup> Rate einge ere ora amo God ta ke ta matu kajari avoeto ere ora.” ke ainge ambotani ta degi <sup>55</sup> eto isoro puvua embopo tapa amita degi ke einge ena, “Na pegene embo isoro embo kogue ki te emi te umbuto na andito umbasi puvevete? Eto na iji vahai vahai temple ta arumbeto embomeni ate poekitie ere ovona iji amikote do eto na andito umbae? <sup>56</sup> Eto ari tapa ere ova amo peroveta na matu ari kajari avo eto ere ova.” ke ainge ena. Eto iji amikote ambotani tapa na joru Iesu toto pambua.

*Priests peni te amita ke pepeni ke be kiari embomeni te vahaita ea amo Sanhedrin council ke eora ai ta Iesu ikeo heteto koto umbuna*

*(Mark 14:53-65, Luke 22:54-55, 63-71, John 18:13-14, 19-24)*

<sup>57</sup> Eto enana ke pepeni kiari embopo te embo okokose tapa vahaita torukitio Iesu andio embomeni na Iesu umbuto pambuto priest okose javo Caiaphas ta degi ikeo hetena. <sup>58</sup> Eto Peter na Iesu umbuto puvuto Priest okose ta bande peni ai ta ke do ijiroro ingesi ambota ambota ue puvuto bande simba ari embo araha ta mitia amiga arumbena. <sup>59</sup> Eto priests pepeni te Sanhedrin torukari embomeni tapa avo Iesu na ke te ari te tapa do ena avo au ingihe amita ari sapura avo eto tari amburari haite avo jombure ue popoja ke na ganoka ea <sup>60</sup> eto embo nei nei ainge Iesu ta sapura harikasi ereto ke sokova na ea, rate Iesu ta ari sapura tambae be ea. <sup>61</sup> Eto tutumota embo heriso na ereto ke einge ea. “Embo emina God ta temple avo aimbeto beau iji 3 amita jo ta gerikasona ainge ijinu ingia.” ainge eo, <sup>62</sup> priest okose na ereto ke einge ena, “Enana ke ganoka erera amo mine mane ao?” ainge enu <sup>63</sup> Iesu ke mine ae enu Priest okose na einge

ena, “Umo God vasiri te ta javo ta ke ejo. Umo God ta Meni be nango ta orekari embo keriso re?” ainge enu, <sup>64</sup> Iesu na ke mine einge ena, “Ke inena erea aravora rate ungota degi erena, iji eha eto ambota Embo ta Meni na God sovera te ta ingeni be ta arumbeto mitima Utu i ta eto oje hamo ta arumbeto puvuresuja avo ungo tapa kesova.” ainge enu, <sup>65</sup> Priest okose na ingito ke sokova ari ke ijie jo memenga enu bo amita avo jigito perara eto ke einge ena, “aravora, harikari embo nei na mane aro ingesora. Ke sapura amo God ta degi ei ungo tapa ere ingihova <sup>66</sup> avoeto do asi ere hotembiteve?” Ainge enu enana tapa na “Sapura ere ua avoeto taro amburesuja.” ainge hotembari vahai eto ke ainge <sup>67</sup> eto ingeni na torue tombu ta isuva ea. Eto embo nei nei na Iesu torue <sup>68</sup> ke einge ea, “Orekari Embo, umu peroveta kito umu amuna toroi avo kito harike ingore!” ainge ea.

*Peter na Iesu kiae ke ena*

*(Mark 14:66-72, Luke 22:56-62, John 18:15-18, 25-27)*

<sup>69</sup> Eto Iesu jo ta koto ue mitinu Peter araha ta arumbeto mitinu pure kakara vahai amina amita degi puvuto einge ena. “Umo Iesu Galilee embo amiga eoa,” ainge enu <sup>70</sup> Peter na embo tapa ingiho kakara ta degi ke einge ena, “Umo do erea amo na kiae be ra.” ainge eto <sup>71</sup> ereto pambuto degi pe ta hehetinu pure kakara nei na Peter kito embo tapa ta einge ena. “Embo emina Iesu Nazareth embo ga isa ere uatija.” ainge enu <sup>72</sup> Peter na ke ngahia na einge ena. “Ungo embo ereva amo na kiae be ra.” ke ainge pere ijie mitimite <sup>73</sup> embomeni puvuto Peter ta degi einge ea, “Umo Iesu ta embomeni ta ke hajire vahai avoeto ungo vahai ra.” ainge eo <sup>74</sup> Peter ke sasapura nei te nei te ijie einge ena, “Embo amo na kiae be ra.” ainge ijinu di ohora itiketo javone ijinu <sup>75</sup> Peter ingito Iesu na ke matu enu ingina avo hotembena, “Inena na



kiae ke 3 ainge ijiro di ohora javone aisuja.” ke ena avo hotembeto araha ta pambuto osaga tambuto si pajire be ena.

## 27

*Iesu umbuto ikeo Pilate ta titi ta hetena*

*(Mark 15:1, Luke 23:1-2, John 18:28-32)*

<sup>1</sup> Eto iho bujenu enana priests pepeni te embomeni ta okose vahaita toruketo Iesu naingeto taro amburesuja avo ke kaseo irae enu <sup>2</sup> ingeni ta jigito umbuto pambuto enana ta gavana javo Pilate ta ingeni ta ikea.

*Embo Judas ambuna*  
*(Acts 1:18-19)*

<sup>3</sup> Eto Judas, Iesu taro amburesuja ke avo ingito osaga peni vahai umbuto koro tapa 30 kina ohue ikeo umbuna avo priest pepeni te embo okokose te ta degi egerembeto ikasi pambuto <sup>4</sup> ke einge ena, “Embo amo ari sapura nei do ae rate nanena ari sapura peni be eto sio hariketena” ainge enu enana “osaga amo nangota mane, nora,” ainge eo, <sup>5</sup> Koro temple jo ta gosuketo pambuto esi umbuto ihive ta timbuto ambuna. <sup>6</sup> Eto priests pepeni na koro 30 kina gosukena avo siriketo umbuto ke einge ea, “Koro emo sasaga koro ra avoeto temple ta koro amiga vahaita mane ikasora.” ainge eto <sup>7</sup> koro amina do aisora avo ke kaseo irae enu enda nei embo puvuto amburoro kovasora amita use enda avo koro amina ombasi pambuto enda na ovu ari embo amita degi enda ombua. <sup>8</sup> Eto eha oroho enda amita javo sasaga enda ra eora. <sup>9</sup> Eto ainge nombo Peroveta Jeremiah ta ke kajari ta amo einge mitia. “Israel ta menundi na embo amita mine 30 kina ra etera <sup>10</sup> eto koro amina ovu enda na euja embo ta degi enda umbera, ainge Bada na ana etija” ke ainge ijie Jeremiah na kajena.

*Iesu Pilate ta titi ta hetena*  
*(Mark 15:2-5, Luke 23:3-5, John 18:33-38)*

<sup>11</sup> Eto Iesu avo gavana ta titi ta ikeo hetenu gavana Pilate na amita degi ke einge ena, “Umo Judea embomeni ta king re?” ainge enu Iesu na, “Erea aravora,” enu <sup>12</sup> Priests pepeni te embo okokose ta na ke nei te nei te ijie ganoka ijio Iesu ke mine ae enu <sup>13</sup> Pilate na amita degi einge ena, “Enana ke nei te nei te ijie umo ganoka erera amo umo ingae re?” ainge enu <sup>14</sup> Iesu enana ta degi ke mine ari uje ae enu gavana na kito mana mana ena. (v 18) Eto gavana na kina amo embomeni na tini kambari ue jo memenga ari na Iesu tasi uje eto umbuto puvua

*Iesu taro amburoja ke ena*  
*(Mark 15:6-15, Luke 23:13-25, John 18:39-19:16)*

<sup>15</sup> Rate Pilate na Judea embomeni ta pondo ari iji te tipura embo vahai avo embomeni na tambuta puvuroja uje eto eore Pilate na eoi araha ta pahuatera ari ainge pere uatija <sup>16</sup> avoeto tipura embo vahai javo Barabas amo embo sapura be avo embo tapa na kia avoeto embomeni isapamane vahaita puvuo <sup>17</sup> Pilate na enana ta degi ke einge ena, “Na do ana uje ere ove?” ke ainge <sup>18</sup> (-) <sup>19</sup> eto embomeni ke mine do aisora avo simba ue amita avo arumba peni ai ta arumbeto mitinu Pilate ta ae na ke einge ikenu puvuna. “Ari sapura ae embo avo na eture ta kena avoeto osaga kogue mitena. Avoeto embo avo tojo pambai.” ainge ena <sup>20</sup> rate Priests pepeni te embo okokose te na embomeni na ke einge ara, “Barabas avo au araha ta pahurou Iesu taro amburesuja,” ainge jo kajeo, <sup>21</sup> Gavana enana ta degi, “Ungo embo amunure araha ta pambaja uje ere ove?” ainge enu enana, “Barabas araha ta pambasuja,” ainge eo <sup>22</sup> Gavana na ke einge ena, “Eto ainge ue Iesu ungota orekari embo ke eora amo do ano?” ainge enu, “Ejo i atahu ta

taro amburoi,” ke ainge eo <sup>23</sup> Pilate na “Do eto? Embo emita sapura deire?” enu, ke mine ae ue aruketo einge ea, “Ejo i atahu ta tare” ainge pere ijio <sup>24</sup> Pilate na nei do aisuja avo hotembae eto embomeni ungo eonga mine tara aisora avo joru eto umo isapa heva ta timbuto embo tapa ta titi ta ingeni egitie ke einge ena, “Embo ari sapura irae embo ta sasaga avo ingeni nau ta mane یرهسۇجا، اری ۇنگو ەونگا ەۋۇ.” ainge enu <sup>25</sup> embomeni tapa tunga vahai na ke mine einge ea, “Embo amita sasaga amo nangota eto nangota meniundi ta hamo ta یرهسۇجا، تەھورا.” ainge eo <sup>26</sup> Pilate na enu Barabas araha ta pahunu Iesu avo esi na ejembeto umbuto pambuto i atahu ta tara ke ena.

*Iesu ta siro ta esi pepe te ikeo asukena*

*(Mark 15:16-20, John 19:2-3)*

<sup>27</sup> Eto gavana ta isoro embopo na Iesu umbuto gavana ta bande peni ta toreto isoro embopo tapa avo jage eo vahaita puvuo <sup>28</sup> amita bo ujuketo bo pangari avo king ta asukari ke ijie ikeo asukenu <sup>29</sup> king ta siro pohanu ke ijie esi pepe te jigito egoveketo siro ta ikeo asukenu patuna uhu ingeni ta ikeo jigini urumbitie paunge teteri eto mitie ke einge ea, “Judea embomeni ta King umo ere pekitora.” ainge ijie <sup>30</sup> isuva eto patuna uhu egimbeto umbuto uta ta tea. <sup>31</sup> Eto Iesu urumbeo irae enu bo pangari ikeo asukena avo houketo uhue bo amita avo ikeo asukenu umbuto i atahu ta tasi pambua.

*I atahu ta tea*  
*(Mark 15:21-32, Luke 23:26-43, John 19:17-27)*

<sup>32</sup> Eto degi ta pahue enda Cyrene embo javo Simon avo degi ta tambuto eo Iesu hondate eto amita i atahu umbuto pambuna. <sup>33</sup> Eto degi javo Golgotha (Golgotha amita be amo embo sasape ari ta uta popo) <sup>34</sup> ai ta puvuto Iesu ta degi wine te sogaga te ombuto ombuto ari avo indoja ikeo umbuto isapa indinu sogaga enu kito

tona. <sup>35</sup> Eto Iesu ta bo houketo i atahu ta teto vahaiketo amita bo avo amuna umbasuja avo kesi ituha koso te tuho te jigio koso umbunu <sup>36</sup> embo amina bo amo umbuna enana arumbeto Iesu amburoja simba ea.

<sup>37</sup> Eto ari sapura ta ke kaeto vahaikora besi ai ta ke einge kaeto amita siro kombu ta tea, “Embo emo Iesu, Judea embomeni ta king ra.” ke ainge kaeto tea.

<sup>38</sup> Eto iji amina donda pegene ari embopo heriso avo i atahu ta teto vahai ingeni be ta eto nei ingeni angata hurukea. <sup>39</sup> Eto embomeni puvuto Iesu kogue mani mani ue ke einge ijie urumbea, <sup>40</sup> “Umo temple aimbeto iji 3 amita jo ta gerikasi ijea rate umo eonga hondate ari inono ae re? Umo God ta Meni kito i atahu toto beto pambu.” <sup>41</sup> Eto priests pepeni te ke pepeni kiari embopo te embo okokose te tapa na Iesu urumbitie ke einge ea. <sup>42</sup> “Embo nei nei avo hondate uija rate umo eonga hondate ari inono aera. Eto emo Israel ta King be kito i atahu ta eketo mitia avo toto beau nango kito ke be aisona. <sup>43</sup> Embo emo God tumota ue God ta Meni ke euja avoeto God na uje eto kito au beto pambai.” ainge ijie urumbea. <sup>44</sup> Eto pegene embopo Iesu ga i atahu ta tea amina ke vahai ainge ijie Iesu urumbea.

*Iesu ambuna*  
*(Mark 15:33-41, Luke 23:44-49, John 19:28-30)*

<sup>45</sup> Eto 12 o'clock eto pambuto ture 3 o'clock amita jo ta enda tapa mume sihukena, <sup>46</sup> eto ture 3 o'clock ainge Iesu na jage eto einge ena, “Eli Eli, lama sabachthani?” ke ainge ena amita be amo “Nau God, Nau God umo do eto na toto pambe?” <sup>47</sup> ainge ijini enana heteto mitimite ingito ke einge ea, “Elijah jage eria” eo <sup>48</sup> embo vahai na Iesu umo uje ari ke eto tutuveto pambuto soi umbuto patuna uhu tutumota egeka eto wine ta jauketo umbuto pambuto Iesu na indoja ikitinu <sup>49</sup> embomeni na kito taeketo ke einge ea. “Hete, Elijah

jage eria avo puvuto hondate aute avo kesira.” ainge eo <sup>50</sup> Iesu na ehako jajage ijie amita hen jamo ena. <sup>51</sup> Eto Iesu ahunu amikote temple jo ta degi peikari bo avo eonga i ta eto sorereketo beto enda ta unu enda titira unu atara pajire be eonga haukitinu <sup>52</sup> embo kovari panga amo pe hirikitinu embo ototohu matu ambuvujekari amo vasiri te ereto <sup>53</sup> Iesu vasiri te erena amita ambota arahata puvuto da otohu javo Jerusalem ta pambuo embo nei nei na kia. <sup>54</sup> Eto enda titira unu vasiri nei te nei te tapa amo Rome ta isoro embo peni te amita isoro embopo te Iesu simba ea amina kito joru pajire be ue ke einge ea, “Ke be emo God ta Meni be ra.” <sup>55</sup> Eto pamone isapamane hoi ta heteto kogue mitia amo Galilee ta eto Iesu ambo ambo ue puvuto Iesu unditie simba ea. <sup>56</sup> Eto pamone nei nei amo Mary Magdalene te Mary nei amo James te Joseph ta e te Zebedee ta meniundi James te John te amita e te aingeto heteto kogue mitia.

*Iesu kovea*  
(Mark 15:42-47, Luke 23:50-56, John 19:38-42)

<sup>57</sup> Eto ture sosoha unu da Aramathaea embo vahai javo Joseph amo haja vaja embo Iesu ta ke ambo ambo ena <sup>58</sup> amina puvuto Pilate ta degi Iesu ta hamo penunu enu <sup>59</sup> Pilate na embo amita degi ikara enu ikeo <sup>60</sup> umbuto amita hamo avo bo eha na togeto amita embo kovari panga orina to eha kovari ai ta ikenu serekenu atara peni vahai amina aherekenu pambuto pe peikena <sup>61</sup> eto Mary Magdalene te Mary nei amite panga pe ai ta arumbeto mitia.

*Rome ta isoro embopo ikeo panga simba ea*

<sup>62</sup> Eto evito jarukari pondo nununga eo irae enu enana priests pepeni te Pharisee embomeni te aingeto pambuto Pilate ta degi ke einge ea, <sup>63</sup> “Embo okose, embo ke sokova embo amina eha irari iji te ‘na iji 3 amita ambota vasiri te

erasona’ ijija <sup>64</sup> avoeto ke ikejo no isoro embopo pambuto panga to iji 3 amita jo ta simba are. Amita be amo amita ambotani na puvuto amita hamo umbuto matu vasiri te erari ke embomeni ta degi aisora. Eto ke sokova ainge amo matu uera te eha ainge aisora amo sapura be aisuja,” ainge eo <sup>65</sup> Pilate na ingito ke einge ena. “Aravora simba ari embomeni umbuto pambuto use pe javotoho eto vahaiketo simba evujo.” ainge enu <sup>66</sup> pambuto atara peni ai ta tahi ikeo vahaikenu isoro embopo ikeo simba ea.

## 28

*Iesu vasiri te erena*  
(Mark 16:1-10, Luke 24:1-12, John 20:1-10)

<sup>1</sup> Eto jangu indari iji irae enu Sunday iho unga bivitinu Mary Magdalene te Mary nei amite Iesu kovea use avo kesi pahuo <sup>2</sup> Bada ta anera Utu ta eto beto atara jigito aherekitinu enda titira unu atara ahone ta pambunu hamo ta arumbena. <sup>3</sup> Anera ta tombu amo pipiri ainge bo asukari parara be <sup>4</sup> avo Rome ta simba ari embopo na kito tututu eto tatara gaseto enda ta beto amburarako uo <sup>5</sup> anera na pamone ta degi ke einge ena, “Ungo joru avojo. Iesu i atahu ta tetere ambija avo jombure ere ova avo ere kogona te ei ta irae ra. <sup>6</sup> Amina matu vasiri te erasi ue ijija avoeto vasiri te eretija, ungo einge huma amita panga jo ta serekari besi kito <sup>7</sup> sau sau egerembeto pambuto amita ambotani ta degi ke einge evujo ingore. ‘Iesu ambija amo ehako vasiri te ereto Galilee pahua ungo ai pambuto kivujo.’ Aravora na ke avo ano ingova puvena.” ainge eto pahunu <sup>8</sup> pamone heriso amo tunga javotoho ue joru te tapa use toto amita ambotani aro ingora tutuveto pambua. <sup>9</sup> Enana degi ta pahuo Iesu puvuto tambuto, “Ungo ere pekitena.” ainge enu ingito avoveto beto gogovo eto Iesu ta utu singi ta jigio <sup>10</sup> Iesu na ke einge ena, “Ungo

joru avo toto pambuto nau namei kamei avo evujo pambuto na Galilee ai tambare.” ainge enu pambua.

*Rome simba ari embopo ke do ea*

<sup>11</sup> Eto pamone heriso degi ta pahuo enana use simba ari Roman embo uhoho na da jo ta pambuto priests pepeni ta degi use jo ta do puvuna avo eo ingia. <sup>12</sup> Eto enana priests pepeni na embo okokose ga ke kaseo irae enu koro peni vahai umbuto Iesu ta use simba ari embopo ta degi do kia avo harikeora koro na ombua. <sup>13</sup> Eto ke sokova na einge ara ea. “Nango mumete evo ore amita ambotani na puvuto Iesu ta hamo pegene eto umbuto pambua. Ainge evujo <sup>14</sup> eto gavana na ingesuja kito nango na amita degi ke aro ungota degi mane au osaga kesova.” ainge eo <sup>15</sup> use simba ea embopo na koro avo umbuto priests pepeni ta ke agi ere uatera avoeto Iesu hoena iji eto puvuto oroho emikote Judea embomeni na Iesu ta hamo pegene ari ke avo jigama ue iriora.

*Iesu na ambotani enda tapa ta ke hande ara ena*

*(Mark 16:14-18, Luke 24:36-49)*

<sup>16</sup> Eto Iesu ta ambotani tapa 11 na Galilee ta ijimite pambuto Iesu na tiri vahai ai tambara ke ena ai pahumite <sup>17</sup> Iesu kito mana mana eto nei ke be ijie beto gombuto jakeka ea nei be hotembae ea te ambota kito jakeka ea. <sup>18</sup> Eto Iesu na enana kito puvuto auveto ke einge ena. “Utu te enda te ta sovera tapa amo nau degi ta iketija <sup>19</sup> avoeto enda tapa ta pahue ke nau hande evujo ingito ambo ambo ururoro Mamo te Meni te Ahihi Otohu te ta javo ta bapataito evujo. <sup>20</sup> Eto ari tapa do ate poeketene kogava avo evujo ingito are. Eto be hotembevu iji eha emikote eto pambuto iji tutumota na ungote iresona.”



## MARK OTOHU TA EVANERIA

*John Bapataito ari embo na onde katena*

*(Matthew 3:1-12, 11:10, Luke 3:1-18, 7:27, John 1:19-28)*

<sup>1</sup> Ke emo Iesu Keriso, God ta Meni amita ke jajavotoho te ari jajavotoho te tapa, <sup>2</sup> Eto Iesu puvurae kiti ta Peroveta Isaiah na ke einge kaeto ambuna “God na ke einge eria ‘Na nau ke hande ari embo No tombu ta ikano puvuto no embere sirikasuja. <sup>3</sup> Embo amo o jagatambu ta jage eto ke einge aisuja, Bada ta puvurari degi sirikevu, amita embere evu tambu ai’.” Ke ainge peroveta na kajena. <sup>4</sup> Eto John bapataito ari embo na o jagatambu ta mitie God na embomeni ta ari sasapura hotembeto toaja tunga hapereketo ari sasapura toari amite bapataito ari amite onde katena. <sup>5</sup> Eto enda Judea jo ta da nei te nei te embomeni te eto da Jerusalem embomeni te aingeto John ta degi pambuto enana ta ari sasapura toasi harikitiore John na ingihe umu Jordan ta bapataito ere uaetija.

<sup>6</sup> Eto John ta bo amo o ‘camel’ ta ando tu avo asuketo pupuri amo o hoga na ari avo tigitu amita indari amo o boruga te iruha te ere indi-aetija. <sup>7</sup> Eto ke amo einge hande ere uaetija, “Eto nau ambota embo, na eingeke mane, sovera te puvuto ere hua amo na amita utu goru houkari haite aera. <sup>8</sup> Na ungo umu na bapataito ere ovona te Embo Dombo amina ungo Ahihi Otohu na bapataito aisuja.” Ke ainge John na hande ena.

*John na Iesu bapataito ena*

*(Matthew 3:13-17, Luke 3:21-22)*

<sup>9</sup> Eto iji amikote Iesu na Galilee da javo Nazareth ta eto puvunu John na Iesu umu Jordan ta bapataito ena. <sup>10</sup> Eto Iesu umu ta eto eritinu Utu pe hirikenu Ahihi Otohu di dipo ainge Utu ta eto beto amita degi ta puvunu

<sup>11</sup> utu ta eto ke einge puvuna “Umu osa ari Meni nau, na umu kogue tunga javotoho ere ona.” Eto ke ainge enu irae enu

*Satan na Iesu o jagatambuta engekena*

*(Matthew 4:1-13, Luke 4:1-11)*

<sup>12</sup> God ta Ahihi na Iesu o jagatambu ta <sup>13</sup> Satan na engeka aja enu pambuto iji 40 mume 40 ai mitina. Eto o jaga tambu ai sevahe di o ga mitinu God ta Anera na simba ea.

*Iesu na ambotani kiti umbuna*

*(Matthew 4:12-22, Luke 4:4-14, 5:1-11)*

<sup>14</sup> Eto John avo umbuto tipura ta ikeo mitinu Iesu na enda Galilee ta pambuto God ta ke javotoho hande ue <sup>15</sup> ke einge ena “God na embomeni amita toho siriketo umbuto titi jigesuja amita iji puvuto erehua avoeto tunga hapereketo ari sasapura toto God ta ke javotoho tumota evujo.” <sup>16</sup> Eto ke ainge hande ue umu ireremba Galilee hora ta pahue o parari embo heriso Simon te amita namei Andrew te o bonga gosukitie uo <sup>17</sup> Iesu na tambuto ke einge ena, “Ungo na ambo ambo ue havu. Ungo o timbuova aingeto nane ano embo timbasova” ainge enu <sup>18</sup> o umbari bonga toto Iesu ambo ambo ea. <sup>19</sup> Eto degi isapa imite Iesu na embo Zebedee ta meni heriso James te John te avo e nga ta arumbeto bonga perarari avo iheritie mitio <sup>20</sup> kito jage enu embo heriso na mamu pure embo ga e nga ta mitina avo toto Iesu ambo ambo ea.

*Embo vahai ahihi sapura na torari*  
*(Luke 4:31-37)*

<sup>21</sup> Eto enana da Capernaum ta pahuo jangu indari iji puvunu Iesu na Judea embomeni ta ke kasari bande ta toreto embomeni ate poekena. <sup>22</sup> Eto enana na amita ate poekari ke avo ingito ke amo enana ta ke kajari embopo ainge mane ra te amo kiari embo na eria ainge eto haha puha ea. <sup>23</sup> Eto Iesu ke ijie mitinu embo ahihi sapura na jo ta

torari amina gagaha eto ke einge ena <sup>24</sup> “Iesu Nazareth embo umo dagota degi do asi puve? Umo ivuha eto dago irae ara puvea. Eto umo amunure na kiarira. Umo God ta Meni Otohura”. Ainge enu <sup>25</sup> Iesu na ke ngahia eto einge ena “Ke ambu eto embo ta jo ta eto puvuto pambu.” Ainge enu <sup>26</sup> ahihi sapura na enu embo amo beto titi te pe te haro haro gatari gatari enu gagaha ijie tambuta puvuto pambuna. <sup>27</sup> Vasiri avo embomeni na kito mani mini eto ke mine ara eto einge ea “Ari emo ari eha retemo deire? Amita kiari na ke eoi ahihi sasapura te tapa amita ke agi eora” ainge ea. <sup>28</sup> Eto Iesu na Judea embomeni ta ke kasari bande toto pahunu ari do ena amita duru na Galilee enda enetena.

*Iesu na embomeni isapamane enu kokondekea*

*(Matthew 8:14-17, Luke 4:38-41)*

<sup>29</sup> Eto Iesu te James te John te aingeto Simon te Andrew te ta bande ta toreto <sup>30</sup> Simon ta imboti avo ambure ue hoga bevère te tapa sereketo mitinu amita ke avo Iesu ta degi enu ingito pambuto <sup>31</sup> ingeni ta jig-inu eritinu amita hoga bevère jamo enu embo indari unduna. <sup>32</sup> Eto mume sihukitinu da embomeni tapa na ambure embomeni te ahihi sasapura na torari embomeni te aingeto umbuto Iesu na kokondekaja puvuto <sup>33</sup> bande pe ta areo Iesu na ambure nei te nei te kokondikitie ahihi sasapura kurumbena. <sup>34</sup> Eto ahihi sasapura na Iesu matu kiari avoeto enu ke ambupu ea.

*Iesu na enda Galilee jo ta ke hande ena*

*(Luke 4:42-44)*

<sup>35</sup> Eto iho unga haunkitinu Iesu ereto pambuto embo irae degi ta eonga pari ue mitinu <sup>36</sup> Simon te embo nei uhoho te Iesu pambuna avo tain ta eteteto pambuto <sup>37</sup> Iesu tambuto ke einge ea, “Embo tapa umo jombure ere ora” Ainge eo <sup>38</sup> Iesu na einge ena, “Ungotena da nei nei ta pambuto ke hande aisona, avoeto na da toto puvena.” Ainge

enu <sup>39</sup> Galilee da tapa ta isa ue Judea embomeni ta ke kasari bande ta ke hande ue ahihi sasapura embo ta jo ta torari avo kurumbena.

*Embo vahai ambure na hamo sapura ari avo Iesu na enu kondena*

*(Matthew 8:1-4, Luke 5:12-16)*

<sup>40</sup> Eto embo vahai ambure na hamo sapura ari amina Iesu ta degi puvuto paunge teteri eto penunu ijie einge ena. “Umo asi uje eto kito na e kondane.” ke ainge enu <sup>41</sup> Iesu na ingito jo enu, ingeni jujuketo tame ue “Na aisona, eto umo javotoho e.” Ainge enu <sup>42</sup> embo ta ambure irae enu javotoho ena. <sup>43-44</sup> Eto Iesu na ke vasiri na embo ta degi einge ena, “Ari erevi embo ta degi mane ao ingesora te pambuto priest ta degi ejo no hamo kiore, eto Moses ta ke pepeni agi ue no hamo ta mine avo hande ikejo embo tapa kito no ambure irae avo kogue ke be are.” Ke ainge eto enu pambuna. <sup>45</sup> Rate embo amina ke ingito ingarako ue pambuto ke hande enu da tapa ingia avoeto Iesu da ta torari inono ae enu da sahu ta mitinu enda embomeni tapa amita degi puvua.

## 2

*Embo vahai amo utu ingeni meni amburari avo Iesu na enu kondena*

*(Matthew 9:1-8, Luke 5:17-26)*

<sup>1</sup> Eto iji heriso amita ambota da Capernaum ta pambuto mitinu embomeni na duru ingito puvuto <sup>2</sup> amita irari bande jo ta toreto enete eo embo nei torari inono ae enu Iesu na God ta ke embo ta degi hande ena. <sup>3</sup> Eto embo vahai ingeni te utu te meni amburari avo embo nei heriso nei heriso na gaga eto umbuto puvuto <sup>4</sup> embo isapamane avoeto toreto Iesu kiari inono ae enu bande ene perara eto popora embo amo gaga ga tapa otohoho ta ikeo bena. <sup>5</sup> Eto Iesu na enana ta tumota ari kito popora embo ta degi “Nau meni no ari sasapura avo hotembeto ere toturutona” ainge ena. <sup>6</sup> Eto God ta ke pepeni ate poekari embopo na Iesu ta ke ingito jo ta hotembari

ke na einge ea <sup>7</sup> “Embo emo do eto ke einge erei? God vahai amina embo ta ari sasapura hotembeto touja te embo emina God ta javo ere urumbitia.” Ainge hotembetio <sup>8</sup> Iesu na kito “ungo do eto ke amo ere hotembiteve. <sup>9</sup> Eto na popora embo ta degi ‘No ari sasapura hotembeto ere toturutona’ ke ainge asona ano ereto ‘no evari gaga umbuto pambu’ ainge asona amo davo ejeha re davo ngaiha re? <sup>10</sup> Eto Embo ta Meni na sovera ari umbuto enda ta mitie embo ta ari sasapura hotembeto toasuja avo ungo ke be ava ari erevi asona,” ainge eto popora embo ta degi <sup>11</sup> “No gaga umbuto <sup>12</sup> ereto no da ta pambu” ainge enu ereto amita gaga umbuto enana ta tombu ta koguo pahunu, embomeni na kito mani mini ue God jakeka ijie ke einge ea “Ari emo matu einge kiae pekota ere kogora.” ainge ea.

*Iesu na embo Levi jage enu ambo ambo ena*  
(*Matthew 9:9-13, Luke 5:27-32*)

<sup>13</sup> Eto Iesu na bande toto tambuta puvuto umo ireremba hora ta mitinu embo isapamane amita degi puvuo ate poekena. <sup>14</sup> Eto ate poekenu irae enu isa pahue Alphaeus ta meni Levi tax umbari gaga ta arumbeto mitinu kito “na ambo ambo e” ainge enu ereto Iesu ta ambota pambuna. <sup>15</sup> Eto Iesu te amita ambotani te na pambuto Levi ta bande ta indio tax umbari embomeni te ari sasapura embomeni na Iesu ambo ambo ea avoeto enana ga tapa Iesu ta bande ta arumbea. <sup>16</sup> Ari avo Pharisee embomeni ta ke pepeni simba ari embopo na kito Iesu ta ambotani ta degi ke einge ea “Iesu do eto ari sasapura embopo te tax umbari embopo te aingeto ere indei?” Ainge ijio <sup>17</sup> Iesu na ingito ke mine einge ena, “Embo javotoho amo sivo ta mane pambuora te ambure embopo na sivo ta pambuora, avoeto na embo javotoho avoembo puvurae rate embo sapura avoeto puvena.”

*Donda ajirekari*  
(*Matthew 9:14-17, Luke 5:33-39*)

<sup>18</sup> Eto iji otohu puvunu John bapataito ari embo ta ambotani te Pharisee embomeni te aingeto indari ajirekeo embomeni na Iesu ta degi puvuto ke einge ea “Do eto John ta ambotani te Pharisee embomeni te aingeto indari ajireketera te ambotani no mo do eto indari ajirekaere?” Ainge eo <sup>19</sup> Iesu na ke mine einge ena, “Jimbari ta pondo avo ajirekari irae. <sup>20</sup> Rate iji puvuresuja amo jimbari embo jigito goruketo umbuto pambasora iji amikote ajirekasora. <sup>21</sup> Eto bo matu perarari avo bo eha na tiuketo ihirasuja amo egau umba kaumba eto tohekau to ehako peni aisuja avoeto ari ainge amo mane eora. <sup>22</sup> Eto embo na o hoga umo tigi itoko ari matu ai ta wine eha overekasora amo wine na horo vivitie pajito o hoga amo perarasuja eto wine te o hoga te tapa irae aisuja te o hoga eha ta wine overekasora amo mane perarasuja.”

*Jangu indari iji*  
(*Matthew 12:1-8, Luke 6:1-5*)

<sup>23</sup> Eto jangu indari iji puvunu Iesu te amita ambotani te embo ta pure degi ta pahue Iesu ta ambotani na ‘wheat’ be avo indesi jigito juketo umbuo <sup>24</sup> Pharisee embomeni na kito Iesu ta degi ke einge ea “Kijo, do eto no ambotani na jangu indari iji te ke pepeni poekitie pure einge emo mo ere ore?” Ainge eo <sup>25</sup> Iesu na ke mine einge ena “Eto David te amita embomeni te na beuje kito ari do ea amita ke amo ungo eteketo kiaerete? <sup>26</sup> Eto amina Priest Abiathar ta iji te God ta bande otohu ta toreto bread matu God ta titi ta hande ikari amo Priest na pere jigama eora avo David na toreto bread avo umbuto indie amita embomeni ta hande enu india, <sup>27</sup> Eto ungota degi erena, God na jangu indari iji avoeto embo ove ae rate embo ta ujeje avoeto jangu indari iji ikena. <sup>28</sup> Eto Embo ta Meni

amo jangu indari iji amita simba ari embo dombo ra.”

### 3

*Embo ingeni meni amburari avo Iesu na enu kondena (Matthew 12:9-14, Luke 6:6-11)*

<sup>1</sup> Eto Iesu na Judea embomeni ta ke kasari bande ai toreto embo ingeni meni amburari ai mitina ano kina. <sup>2</sup> Eto jangu indari iji te embo avo Iesu na au kondasuja avo Iesu uje ae embomeni na pehumba asi kon kon uo, <sup>3</sup> Iesu na embo ingeni meni amburari amita degi “einge huma embo ta titi ta hete” ainge enu ereto puvunu <sup>4</sup> embomeni ta degi ke einge eto ingina “Jangu indari iji te embo na God ta ke pepeni agi ue embo ta degi sapura autemo javotoho au? Eto nei amo embo au kondaute mo tau amburou?” Ainge enu embomeni na ke mine ae ke ambupu eo. <sup>5</sup> Iesu na jireki poeki eto embomeni kina amo embo nei jo ari embo mane avo kogue tumo ue osaga kito embo ingeni meni amburari amita degi “no ingeni jujuruke” enu jujurukenu ingeni javotoho ena. <sup>6</sup> Avo Pharisee embomeni na kito tambuta pambuto Herod ta ke ambo ambo ari embomeni ga vahaita eto Iesu naingeto umbuto taro amburesuja amita ke avo kasea.

*Embo isapamane Iesu ta degi puvua*

<sup>7</sup> Eto Iesu te amita ambotani te aingeto umu ireremba javo Galilee hora ta pahuo Galilee embo isapamane Iesu ambo ambo ue pahuo Judea embo te <sup>8</sup> da Jerusalem embo te da Idumea embo te umu Jordan ovitiho ta da embomeni te da Tyre te Sidon te ta embomeni te aingeto Iesu na ari tapa do ena amita duru ingito Iesu ta degi puvua. <sup>9-10</sup> Eto Iesu na embo isapamane enu kokondekea avoeto ambure embomeni na Iesu tame asi joeketo vahaike vahaike uo Iesu na ambotani ta degi e nga nununga ara ke ena.

<sup>11</sup> Eto ahihi sasapura na Iesu kito Iesu ta utu ta burereketo bovue gagaha ijie ke einge ea “Umo God ta Meni be ra” ainge ijio <sup>12</sup> Iesu na ke ngahia na eto ke avo mane hande ara ena.

*Iesu na ambotani 12 siriketo umbuna*

*(Matthew 10:1-4, Luke 6:12-16)*

<sup>13</sup> Eto Iesu na tiri ta bitito embo matu sirikena avo puvurora jage enu puvuo <sup>14</sup> embo tapa 12 siriketo amiga pure asi umbuto apostero ikena amina ke hande ue <sup>15</sup> sovera umbuto ahihi sasapura kurumbara. <sup>16</sup> Eto embo 12 umbuna amo embo Simon amo Iesu na javo eha ikena amo Peter ikena, <sup>17</sup> eto Zebedee ta meni James te amita eambo John te enana ta ke hajire amo utu pipiri ta hajire ainge avoeto Iesu na enana ta javo Pipiri ta meniundi ke ena. <sup>18</sup> Eto nei Andrew te Philip te Bartholomew te Matthew te Thomas te Alphaeus ta meni James amite embo nei Thaddeus te Canaan embo Simon te <sup>19</sup> Judas Iscariot amo isoro embo ta ingeni ta ikari embo amite aingeto Iesu na siriketo umbuto amita da ta pambuna.

*Iesu te Beelzebul te ra*

*(Matthew 12:22-32, Luke 11:14-23, 12:10)*

<sup>20</sup> Eto Iesu da ta pahunu embomeni isapamane torukeo pure peni vahai enu Iesu te amita pure embopo te aingeto indari indae ea. <sup>21</sup> Eto Iesu ta jekahoka na Iesu do ena ke avo ingito uta sapura ari ke ijie umbuto taekasi puvua. <sup>22</sup> Eto Judea embomeni ta ke kakajekari embopo na da Jerusalem ta eto puvuto embomeni ta degi ke einge ea. “Ahihi sasapura ta okose javo Beelzebul na Iesu ta jo ta toreto sovera ikitioi ahihi sasapura ere kurumbitia,” ainge ijio <sup>23</sup> Iesu na ingito timu hatirari ke na enana ta degi ke einge ena. “Naingeto Satan na Satan kurumbaja ereve? <sup>24</sup> Eto enda vahai na kateketo eonga eonga heteto isoro aisuja amo enda amina mane hetasuja. <sup>25</sup> Eto bande vahai



embomeni na ereto mine tara asora amo bande amo mane iresuja. <sup>26</sup> Eto Satan na ereto ahihi sasapura ga isoro aisuja amo Satan ta sovera irae aisuja. <sup>27</sup> Eto embo na buvure embo ta donda pegene aisi uje aisuja amo kiti buvure embo andito pundurou donda amo umbasuja. <sup>28</sup> Na ungota degi ke be erena embomeni na God ta degi ari sasapura eto urumbeora amo hotembeto toari inono ra <sup>29</sup> te embo amuna Ahihi Otohu urumbasuja amo mane irae aisuja eto hotembeto toari inono aera.” <sup>30</sup> Ke ainge ena amita be amo Iesu ta jo ta ahihi sapura na torari ke ea avoeto.

*Iesu ta aja te namei kamei te ra  
(Matthew 12:46-50, Luke 8:19-21)*

<sup>31</sup> Eto Iesu ta e te namei kamei te aingeto puvuto bande pe ta heteto ke ikeo <sup>32</sup> embomeni Iesu ga bande jo ta mitia amina “No aja te namei kamei te puvuto tambuta mitie umo uje ere ora” ainge eo <sup>33</sup> Iesu na ke mine einge ena. “Nau aja te namei kamei te amo amunure?” <sup>34</sup> Eto Iesu na embomeni tapa bande jo ta mitia avo poeto kito ke einge ena “Nau namei kamei te aja te amo erevira. <sup>35</sup> Embo amuna God ta ke agi aisuja amo nau aja te namei kamei te du emone te ra.” Ke ainge Iesu na ena.

## 4

*Be urari embo ta ke  
(Matthew 13:1-9, Luke 8:4-8)*

<sup>1</sup> Eto Iesu embo ate poekasi umo ireremba hora ta pambuto mitinu, embomeni isapamane puvuto enete-teo Iesu heteto ke aisuja inono ae enu e nga ta bitito umo jo ta isapa imite heteto embomeni tapa hora ta mitia avo <sup>2</sup> timu hatirari ke neite neite na einge ena <sup>3</sup> “Ingivujo, ve urari embo na pure ta pambuto ve ihaja enu <sup>4</sup> ve nei amo degi ta benu di na beto india, <sup>5</sup> ve nei amo enda ngijiri ta beto erena te enda peni mane avoeto susu be kambae <sup>6</sup> avoeto iji na giroro eto jaise ena. <sup>7</sup> Eto ve nei amo bive ta orohuta bena avoeto bive na andinu ve ae ena. <sup>8</sup> Eto ve nei amo enda

javotoho ta beto ereto ve nei 30 nei 60 nei 100 ainge ve ekena. <sup>9</sup> Eto embo amuna ungota onde mitirou kito ke erevi ingivujo,” ke ainge Iesu na ena.

*Iesu na do eto timu hatirari ke na  
ate poekena*

*(Matthew 13:10-17, Luke 8:9-10)*

<sup>10</sup> Eto Iesu pambuto eonga mitinu amita ambotani te ambotani nei uhoho te aingeto timu hatirari ke ta be avo Iesu ta degi eto ingio <sup>11</sup> Iesu na ambotani ta degi ke einge ena “Eto God na embo amita toho siriketo umbuto titi jigesuja amita ke be amo ungota degi ikari rate embo tapa arahata mitera amita degi amo na ke timu hatirari na pere eona. <sup>12</sup> Amita be amo Peroveta Isaiah na einge kajena ‘Enana kito kiaesira ingito ingaesira eora te ingito kito enana ta jo haperekau amo God na enana ta sapura hotembeto toaetija.’ Ainge Isaiah na kajena.”

*Be urari embo ta ke be avo Iesu na  
harikena*

*(Matthew 13:18-23, Luke 8:11-15)*

<sup>13</sup> Eto Iesu na ke nei einge ena “Na ke timu hatirari na etena amo ungo ingae rete? Na timu hatirari ke neite neite aisona amo ungo naingeto ingovo? <sup>14</sup> Eto ve urari embo amo God ta ke ere uritia. <sup>15</sup> Eto ve nei degi tambuta beuja amo embo na God ta ke avo ingesuja rate ke jo ta urari avo Satan na puvuto egimbeto umbuja. <sup>16</sup> Eto ve nei enda ngijiri ta urari amita ke be amo erevira. God ta ke avo embo na ingito tunga javotoho aisuja te <sup>17</sup> ke avo jo ta mane be beto pesisa eto susu kambasuja eto teho mitirou embo nei na amita degi God ta ke jigama ari ke eto ngahia au toau irae aisuja. <sup>18</sup> Eto ve nei bive ta jo ta beari amita ke be amo erevira. Embo na God ta ke uje euja <sup>19</sup> te enda ta ari te ujeje neite neite amite eto amita haja vaja amina God ta ke amo andioi ve mane euja. <sup>20</sup> Rate ve nei enda javotoho ta beto ereuja amita ke be amo erevira. Embo na God ta ke avo ingito, God tumota ue eto God

ke be euja amo ve nei 30 nei 60 nei 100 aingeko euja.”

*Horivo ijimbeto ari ta timu hatirari ke*

*(Luke 8:16-18)*

<sup>21</sup> Eto Iesu na enana ta degi ke nei einge ena, “Eto embo na horivo ijimbeto umbuto mane gaga suvu ta ikasuja eto ovu jo ta mane ikasuja te i araha ta tembau bande jo usasa aisuja. <sup>22</sup> Eto ke tapa ondikari avo umbuto araha ta puvuto ahurekari avo hirikaro keisora. <sup>23</sup> Eto embo ta onde mitirou kito avo ingesora.”

<sup>24</sup> Eto Iesu na ke nei einge ena, “Ungo ke do ere ingiheva avo onde jevito ingivujo, Eto umu doinge ikasoava avo God ta kiari inono ta umbuto nei hamo ta umbasoa. <sup>25</sup> Amita be amo embo amuta degi kiari javotoho mitirou kito amo God na kiari nei ikasuja rate embo ta degi God ta ke kiari irae kito God na embo amita degi kiari do mitia avo God na umbau iraesuja.”

*Donda ve pajirari ta timu hatirari ke*

<sup>26</sup> Eto Iesu na ke einge ena, “God na embo amita toho siriketo umbuto titi jigesuja amita ke be amo eingera. Embo amuna i ve ureto <sup>27</sup> toto pambuto evosa ururou amo eonga ope bitito pajiresuja amo embo kiae pajiresuja <sup>28</sup> amo enda na simba ururou pajito hatu kateto ve aisuja. <sup>29</sup> Eto ve sari au urari embo na egerembeto puvuto tiuketo umbasuja.”

*I javo ‘mustard’ ta ve amita timu hatirari ke*

*(Matthew 13:31-32,34, Luke 13:18-19)*

<sup>30</sup> Eto Iesu na ke nei amo einge ena, “God na embo amita toho siriketo umbuto titi jigesuja amo do aingekore? Eto timu hatirari ke naingeto ke be mo harikaro? <sup>31</sup> Eto i javo ‘mustard’ ta ve amo isapa be i nei nei ta ve aingeko mane. <sup>32</sup> Rate ‘mustard’ ta ve vahai enda ta urasora amo pajito hatu kateto peni vahai au di na puvuto nga iketo ai utumo ta

iresora.” <sup>33</sup> Eto God ta ke amo timu hatirari na ke nei te nei te enu ingia.

<sup>34</sup> Eto embomeni ta degi ke tapa amo timu hatirari ke na pere ena te amita ambotani ta degi amo ke be na pere harikena.

*Iesu na enu pisara jamo ena*

*(Matthew 8:23-27, Luke 8:22-25)*

<sup>35</sup> Eto iji aramite mume sihukitinu Iesu na amita ambotani ta degi einge ena “Ungote umu ovitihō ta pambasira.” Ainge eto <sup>36</sup> embomeni toto amita ambotani ga e nga ta pahuo e nga nei uhoho amo Iesu ta e nga ga tapa pambua. <sup>37</sup> Eto pahuo pisara peni vahai be unu umu piri peni be puvuto e nga ta torue umu na itiketo pe vitinu <sup>38</sup> ambotani joru ue Iesu e nga avo gaga ta evinu ujeto einge ea “Ate Poekari embo, dago sari asi ere ora emo umu hotembae ere oete?” Ainge eo <sup>39</sup> Iesu ereto pisara te umu te “jamo evu” ainge ke vasiri na enu pisara irae unu umu bisi bisi ena. <sup>40</sup> Eto Iesu na amita ambotani ta degi ke einge ena, “Ungo do eto oju ere ove. Eto ungo, na tumota ae re?” Ainge enu <sup>41</sup> embomeni na Iesu ta ari avo kito oju ue mani mini eto ke mine ara eto einge ea “Embo emo amunure? Pisara te umu te embo emita ke agi eto jamo etera.”

## 5

*Embo ahihi sapura na torari avo Iesu na enu kondena*

*(Matthew 8:28-34, Luke 8:26-39)*

<sup>1</sup> Eto umu ireremba ovitihō ta pambuto enda javo Gerasenes ta puvuto <sup>2</sup> Iesu e nga toto enda ta beto embo vahai ahihi sapura na jo ta torari <sup>3</sup> amo embo ikeore sape ere uatera panga to ai mitiaetija avo puvuto tambuna. Eto embo amo embomeni na andito chain na ingeni te utu te pundua <sup>4</sup> te embo ivo peni vahai avoeto chain na pundua amo usukenu andirari inono ae enu <sup>5</sup> tiri hamo ta eto use jo ta iji tapa isa ue karu umbuto hamo gajukitie hori gagaha ijie ere uatija. <sup>6</sup> Avo Iesu

pahunu hoi ta kito tutuveto pambuto Iesu tumo te pain enu <sup>7-8</sup> Iesu na ahihi sapura ta degi “Embo ta jo avo toto puvuto pambu” ainge enu embo na gagaha ijie ke einge ena, “Iesu, God sovera isapa mane te ta Meni, nau degi ta do ao. Na God ta javo ta penunu erena nau degi ta memenga ikaojo.” Ke ainge enu <sup>9</sup> Iesu na “no javo deire” ainge enu embo amina, “Dago isapamane avoeto nau javo ‘Legion ra’” ainge <sup>10</sup> eto Iesu na kurumbeoi enda nei ta pambuona penunu eto <sup>11</sup> o ohu isapamane heti ovitihio ta indie mitio kito <sup>12</sup> ke einge penunu eto ea “Dago o ohu ta jo ta kurumbejo torare” eto ainge eo <sup>13</sup> Iesu na “aravora ainge aisona” eto kurumbenu ahihi sasapura na tambuta puvuto pambuto o ta jo ta toreo o tapa 2,000 ainge umo ta overeto beto umo indito ambuvujekeo, <sup>14</sup> o simba ari embopo na tutuveto ke hande ue pambuto da ta puvuo embo tapa kesi <sup>15</sup> Iesu ta degi puvuto embo ahihi isapamane na torari rate bo asukari te uta javotoho te avo mitinu kito oju ea. <sup>16</sup> Eto embo Iesu na ahihi sasapura ta degi eto o ohu ta degi do ena tapa avo embo matu kia amina embo ehaha kiae amita degi hihi tirio <sup>17</sup> ingito pambuto Iesu enana ta enda avo toto pambaja ke ngahia na eo <sup>18</sup> Iesu pambasi e nga ta bivitinu embo matu ahihi sasapura na torari amina Iesu ga pambasi penunu enu <sup>19</sup> Iesu na “Namoga mane pambasoate Bada na umo kito jo etei no degi ta tapa do etija avo no da ta pambuto no namei kamei ta ejo ingore.” Ainge enu <sup>20</sup> amina amita da tapa ten ai ta pambuto embomeni ta degi Iesu na do enu kina tapa avo hihi tirinu embomeni ingito mani mini ea.

*Embo Jairus ta iae eto pamone Iesu tame ena ta ke (Matthew 9:18-26, Luke 8:40-56)*

<sup>21</sup> Eto Iesu e nga ta bitito umo ovitihio ta pambuto hora ta beto mitinu embo isapamane Iesu kesi puvua. <sup>22</sup> Eto Judea ta ke kasari bande ta titi

jigari embo vahai javo Jairus amina puvuto Iesu ta utu ta beto paunge teteri eto tumo te pain ue <sup>23</sup> penunu einge ena “Huma nau kakara isapa avo amburesi ere ua inena no ingeni avo hamo ta tembejo kondai” Ainge enu <sup>24</sup> Iesu ingito Jairus ga pahunu embo isapamane Iesu ga oroviketo pahuo <sup>25</sup> pamone vahai amo jua tapa 12 amita jo ta sasaga vovuoi <sup>26</sup> sivo embopo ta degi pahue koro na sivo jigama ere uatija koro irae enu amita kondari avora ae eto sapura be ue mitinu <sup>27</sup> Iesu na ari tapa do ena avo duru ingito embo kateketo Iesu kiae ku ta puvuto Iesu ta bo tame ue <sup>28</sup> ke einge hotembena, “Na amita bo tame eto kondasona,” ainge hotembitie <sup>29</sup> tame enu sasaga irae enu amita ando tapa javotoho ena. <sup>30</sup> Eto Iesu na amita sovera isapa beto pambuna avo kito overeketo embomeni poeto kogue ke einge ena. “Nau bo ta amuna tame etei?” ainge enu <sup>31</sup> ambotani na “embo isapamane vahaike vahaike ere ora te embo amuna umo tame ore ere?” Ainge eo <sup>32</sup> Iesu na tame ena embo avo kesi jombure unu <sup>33</sup> pamone kondena amina gatari gatari ue joru te tapa puvuto Iesu ta utu ta beto gombuto ke tapa Iesu ta degi harikenu <sup>34</sup> Iesu na ke mine einge ena “Nau iae no tumota ari na eto kondetea. Tunga jamo jamo te pambuto javotoho na irijo.”

<sup>35</sup> Eto Iesu ke ainge ijie mitinu embo na Jairus ta bande ta eto puvuto Jairus ta degi ke einge ea “No iae matu ambija avoeto ate poekari embo mane jigesoa te tojo pambai,” ainge ijio <sup>36</sup> Iesu ingina rate ingito ingarako ue eto ke kasari bande titi jigari embo ta degi, “Umo osaga mane kesoa te na tumota ejo,” ainge eto embo tapa enu mitio <sup>37</sup> Peter te James te amita namei John te aingeto amiga pambara enu <sup>38</sup> pambuto Jairus ta bande ta toreto embomeni jo ta sisi sasi ijie mitio <sup>39</sup> enana ta degi “Ungo do eto sisi sasi ijie miteve? Kakara emo am-

burae teho evo ere ua,” Ke ainge enu <sup>40</sup> embomeni ingito ganini ijio enu tambuta pahuo e te mamu te eto embo Iesu ga puvua amite aingeto kakara mitina ai toreto <sup>41</sup> ingeni ta jigito “Talitha cumi” ke ainge ena amita be amo “Kakara isapa no degi ta erena, ere.” Ainge enu <sup>42</sup> kakara ereto isa ena. Eto kakara amita pajirari jua amo tapa 12 ra. Eto kakara avo kondenu embomeni kito ti kakambukea. <sup>43</sup> Eto Iesu na kakara kondena avo duru hande eora taeketo “indari umbuto kakara ta ikevu indoi” ainge enu indari ikeo indina.

## 6

*Da Nazareth embomeni na Iesu ke be ae ea*

*(Matthew 13:53-58, Luke 4:16-30)*

<sup>1</sup> Eto Iesu na enda avo toto tohota da ta ereto pahunu amita ambotani na ereto avo ambo ambo ue pahuo <sup>2</sup> jangu indari iji puvunu judea embomeni ta ke kasari bande ta toreto embomeni onde katitinu embomeni na ingito mani mini eto ke einge ea “Embo emita kiari nainge umbuto ke te ari te emomo ere oi? <sup>3</sup> Embo emita mamu amo teho bande gerikari embo ra eto amita e Mary te namei kamei James te Joses te Judas te Simon te amita du emone te tapa ei mitera. Amu dago amita da vahai embora.” Ke ainge ijie ke ingari uje ae ea <sup>4</sup> avoeto Iesu na enana ta degi ke einge ena “God ta ke hande ari embo amo embo tapa na jakeka eora te amita enda vahai embomeni eto teka hoka vahai na ke embo teho ari ke ijie ke ingae eora.” Ainge <sup>5</sup> eto Iesu na amita da ta pure peni ae rate embo heriso avo enu kondea. <sup>6</sup> Eto Iesu ta namei kamei da vahai embomeni na Iesu ta ari tapa do ena avo tumota ae uo Iesu osaga kito da nei ta pahue embo ate poekena.

*Iesu na ambotani 12 ikenu pam-bua*

*(Matthew 10:5-15, Luke 9:1-6)*

<sup>7</sup> Eto Iesu na amita ambotani 12 jage enu puvuo ahihi sasapura kurumbara sovera ari ikenu umbuo

embo heriso heriso ainge hande au pambara <sup>8</sup> onde katitie ke einge ena “Ungo donda nei eti te bread te eto koro pupuri ta mane huvakaso te hetu vahai avo jigito pambuvujo. <sup>9</sup> Eto utu goru avo asukasova te bo heriso mane asukasova te vahai asuketo pambuvujo. <sup>10</sup> Eto pambuto da ta puvuto amo bande nei ta nei ta mane evesova te bande vahai ta evie pure avo irae au da nei ta pambuvujo.

<sup>11</sup> Eto da damina ungo kito pekari uje ae eto ungota ke ingari uje ae aro kito amo God na enana ta degi tumo ere ua avoeto ungota utu oniho avo torovikevujo beau embomeni tapa koguroro toto pambuvujo.” Ainge ijie onde katenu irae enu <sup>12</sup> ikenu pambuto embomeni ta ari sasapura avo toto jo aherekau God ta ke agi ara onde katitie <sup>13</sup> ahihi sasapura embo ta jo ta torari avo kurumbeo puvuto pahuo ambure embomeni avo ‘oil’ na overeketo hamo ta kutitio kokonjekea.

*John Bapataito ari embo ta tunga tiukea*

*(Matthew 14:1-12, Luke 9:7-9)*

<sup>14</sup> Eto Iesu ta javo peni vahai enu amita duru avo Israel ta Gavana okose javo Herod na ingina. Eto embo nei uhoho na Iesu kiae avoeto ke einge ea, “John bapataito ari embo avo God na etei vasiri te ereto Iesu na amita sovera na pure erevi ere ua” ainge ijio <sup>15</sup> embo nei na “Amu peroveta Elijah na ere ua.” Ainge ijio embo nei na “Ungotenau peroveta matu ta ari vahai avo ere ua.” Ke ainge ea <sup>16</sup> eto Herod na Iesu ta duru ingito ke einge ena “Nane etene tunga tiukitara amina vasiri te hoetija” ainge ere ijiaetija.

<sup>17-20</sup> Eto Herod na John ta tunga tiukena amita ke amo erevira. Eto Herod na amita eambo ta ae javo Herodias avo pegene jimbunu John bapataito ari embo na kito Herod ta degi ke einge ena, “Umu God ta ke peni poeketo no eambo ta ae jimbea” ainge enu pamone Herodias na ke



avo ingito tumo eto John tau amburoja ke ena. Rate John amo embo javotoho eto embo otohu avo Herod na kito John ta ke ijioi ingihe tunga osaga ere koguatija rate Herodias na teoi ambuja oju eto John andito punduto tipura ta gosukenu mitinu Herodias na tasuja avo inono ae ena. <sup>21</sup> Rate iji vahai Herod ta umbari iji puvunu amina gavana ta okokose te isoro embopo te enda ta embo pepeni te aingeto oru enu puvuo pondo peni vahai <sup>22-23</sup> unu Herodias ta iae na puvuto ire javotoho tivitinu Herod na embo tapa ta titi ta kakara ta degi ke einge ena “Umo do umbasi uje eto kito ejo ingito ikane, eto na enda simba ari embora umo uje ao kito kateketo tuna no ikasona,” ainge ke isara na enu <sup>24</sup> kakara amo ingito tambuta pambuto e ta degi “na do umbano?” ainge enu e na “pambuto ejo John bapataito ari embo ta siro avo tiukaro umbujo” ainge enu <sup>25</sup> kakara na pambuto Herod ta degi “na John Bapataito ari embo ta siro avo tiuketo heva ta iketo ikao umbasona,” ainge enu <sup>26</sup> Herod na osaga peni vahai kito embo ta titi ta ke vasiri na ena avoeto toari inono ae enu kakara ta ke agi eto <sup>27</sup> tipura simba ari embo vahai ikenu pambuto John tipura ta mitinu tunga tiuketo <sup>28</sup> siro heva ta iketo umbuto puvuto kakara ta ikenu umbuto pambuto e ta ikena. <sup>29</sup> Eto John ta ambotani na ke avo ingito puvuto John ta hamo umbuto pambuto kovea.

*Embo tapa 5,000 avo Iesu na unduna*

*(Matthew 14:13-21, Luke 9:10-17, John 6:1-14)*

<sup>30</sup> Eto Iesu na ambotani heriso heriso hande enu pambua avo ehako egerembeto puvuto pure do ea avo Iesu ta degi eo ingina.

<sup>31-32</sup> Eto embo isapamane purahango parahango ere ora avoeto arumbeto indari inono ae avoeto Iesu na kito ambotani ta degi ke

einge ena, “Ungote pambuto oja-gatambu ai ta embo irae degi jangu indesira havu,” ainge enu e nga ta bitito pahuo <sup>33</sup> embomeni na enana ere pahua avo kito da nei ta nei ta amina utu na tutuveto pambuto Iesu ere puvutuhuna degi ai seniketo puvuto mitio <sup>34</sup> Iesu hora ta puvuto beto embomeni isapamane o sheep ta simba ari embo irae itoko kito jo enu itiketo ke ate poekitinu <sup>35-36</sup> pambuto ture vovunu amita ambotani na puvuto Iesu ta degi ke einge ea “Degi emo da te embo te irae avoeto iji irae ere ua, ejo embomeni egerembeto da ta pambuto indari koro na ombuto indore.” Ainge enu <sup>37</sup> Iesu na einge ena, “Ungo na indari ikevu indore” ainge enu ambotani na “Dago 200 kina na donda umbuto embo undurorote? Eto 200 kina tambuto embo unduraetera amo mane inono aetija.” Ainge eo <sup>38</sup> Iesu na “Ungota degi bread tapa doinge mitei pambuto kivu” ainge enu pambuto kito puvuto Iesu ta degi “Bread tapa 5 eto umo o heriso ainge mitia” ainge eo <sup>39-40</sup> Iesu na ingito enu embomeni tapa kateketo 100 eonga 50 eonga ainge eto eo momoru ta arumbeo <sup>41</sup> Iesu na bread 5 eto umo o heriso amite aingeto umbuto titi i ta eto jigito God peketo bread jigito pereto embomeni ta ikaro indora ambotani ta degi ikenu <sup>42</sup> embo ta ikeo indio oti pevitinu <sup>43</sup> ambotani na bread sirivo te umo o heriso amita sirivo te ainge eto sirikeo hambija tapa 12 amo pevitina. <sup>44</sup> Eto embo tapa 5,000 eto airi te meniundi te tapa amina india.

*Eto Iesu na umo hamota haito pambuna*

*(Matthew 14:22-33, John 6:15-21)*

<sup>45</sup> Eto Iesu na amita ambotani da Bethsaida ta kiti pambara enu e nga ta bitito pahuo embomeni tapa avo enu sisiketo pahuo <sup>46</sup> Iesu tiri ta pari asi bitina. <sup>47</sup> Eto mume sihukitinu pisara pambari hena ta puvuna avoeto ambotani e nga tavitie ere pahua <sup>48</sup> te e nga ivo eto pambae

unu Iesu tiri ta eonga mitie ambotani do ere ora avo kina. Eto iho uranga bitito hunu kito Iesu umo hamo ta haito puvuto ere humite e nga senekasi unu <sup>49</sup> ambotani na Iesu umo hamo ta haito ere puvutuhuna avo kito joru ue embahe ke ijie jajavone ijio <sup>50</sup> Iesu na kito ke einge ena “Joru mane aisova te ivo evu, Namora.” Ke ainge <sup>51</sup> eto e nga ta bitinu pisara jamo enu ambotani kito ti kakambuketo haha puha ea. <sup>52</sup> Amita be amo enana ta hotembari ngahia eto Iesu na embo isapamane bread na unduna amite tapa amo enana be hotembae ea.

*Da Gennesaret embomeni avo Iesu na enu kondea*

*(Matthew 14:34-36)*

<sup>53</sup> Eto Iesu te amita ambotani te aingeto e nga ta puvuto umo ovi-tiho enda javo Gennesaret ta puvuto <sup>54</sup> hora ta beo embo amunure avo embomeni na kito <sup>55</sup> tutuveto pambuto embomeni eo ingito ambure embomeni gaga ta ikeo arumbeo umbuto Iesu ta degi puvua. <sup>56</sup> Eto Iesu na isa da peni ta rete da isapa ta rete degi ta rete market ari degi ta rete pambasuja amo embomeni na ambure embomeni umbuto puvutuhore ere kokondikiaetija eto nei amo embo na Iesu ta bo tame ue kokondekea.

## 7

*Ohihi ta ate poekari*

*(Matthew 15:1-9)*

<sup>1</sup> Eto Judea embomeni ta ke pepeni ate poekari embopo da Jerusalem ta eto puvuto Pharisee embomeni ga vahaita eto Iesu ta degi puvua. <sup>2</sup> Eto Iesu ta ambotani na Judea embo ta ke pepeni amo ungo ingari rate ingito ingarako ue ingeni tongopa te tapa indari indio embomeni puvua amina kito ujeae ea. <sup>3</sup> (Amita be amo Judea ta Pharisee ari embomeni te Judea embomeni tapa te aingeto indari teho mane indiora te enana ta ohihi ta ari avoeto ingeni egeto donda indiora. <sup>4</sup> Eto enana market ta pambuto puvuto amo enana ta hamo

egeto otohu eto indari indiora eto ainge nombo age te atungu te heva te tapa amo egeto otohu eora.)

<sup>5</sup> Eto Judea ta ke pepeni ate poekari embopo te Pharisee embopo te aingeto Iesu ta degi ke einge ea, “Eto no ambotani na do eto ungotenau ohihi ta ke pepeni poeketo ingeni tongopa te ere indere?” ainge eo <sup>6</sup> Iesu na ke mine einge ena, “Ungo hotembari heriso embomeni, Peroveta Isaiah na kajena amo ungota ari avo einge kajena, ‘Embo einge emo hamo na na jakeka eora te enana ta jo avo tumo nau degi ta eora, <sup>7</sup> eto enana teho sio na jakeka ue emo God ta ke ijie embo ta hotembari na embo ate poekeora,’ ainge Isaiah na kajena <sup>8</sup> eto ungo na God ta onde katari ke avo toto ungota ohihi ta ari avo jigama eova. <sup>9</sup> Eto ungo God ta ke tiumbeto ungota ari avo jigama eova amo ungo kiari peni vahai embopora. <sup>10</sup> Eto amita be amo erevira, Moses na kaeto einge ena ‘No aja te mama te otohu ejo, eto embo amuna aja mama ta javo sapura ke aisuja embo avo taro amburesuja’ ainge Moses na kajena <sup>11</sup> te ungo na ari einge eova. Eto donda tapa matu God ta degi hande ikari ke ijie e mammo ta degi hande ikae God ta ke tiumbeto ungo ta ujeje avo eova. <sup>12-13</sup> Eto ari nei te nei te ainge amina God ta ke amo teho ke ijie ungota ari matu avo jigama ue ungota meniundi ta ate poekeova.” Ke ainge Iesu na Judea embo okokose ta degi

*Donda deina eoi embo tongopa euja*

*(Matthew 15:10-20)*

<sup>14</sup> Eto embo tapa jage enu puvuo ke einge ena “Na ke aisona ingivujo. <sup>15</sup> Eto embo na indari nei te nei te indesuja amina au embo ari sapura mane aisuja <sup>16</sup> te hotembari sapura hotembeto ke aisuja amina ari sapura aisuja avoeto ungo ta onde mitirou kito ke erena ingivujo.” Ke ainge <sup>17</sup> eto embomeni toto Iesu na ambotani ga bande ta toreto Iesu na

ke ena amita ke avo au ingesi eo <sup>18</sup> Iesu na “Ungo te tapa kiae embopore? Eto donda deina embo ta oti ta torasuja amo au embo ta ahihi sapura mane aisuja. <sup>19</sup> Indari donda amina embo ta hotembari jo ta mane pambasuja te oti ta beto pambau irae aisuja avoeto indari tapa amo javotohora <sup>20</sup> rate embo ta hotembari jo ta eto pe ta puvuja amina sapura puvuja. <sup>21</sup> Eto embo na amita jo ta siriketo ari einge euja: tiha paiha ari, pegene ari, embo tari amburari, <sup>22</sup> embo nei ta donda javotoho kito umbasi jo ta sirikari, tumo ari, ke sokova ari, hoviro ari, embo nei ta javo ari, sapura ari, ke sapura ari, me kiari, kiari embo ke eria, hajae vajae na biso ari, sarika ari, <sup>23</sup> aingeto embo ta hotembari jo ta eto pe ta puvuto pambuja.” Ainge ijie Iesu na ambotani ta degi harikenu ingia.

*Pamone vahai Iesu tumota ena (Matthew 15:21-28)*

<sup>24</sup> Eto Iesu na ereto enda avo toto pambuto da Tyre te Sidon te amita engiti ta embomeni kiae ondiketo bande vahai ta iresi uje ena te inono ae enu embomeni na tambua. <sup>25</sup> Eto enda Syrophenicia pamone Greek ke kiari amina amita iae isapa ahihi sapura na jo ta beari avo Iesu ta ari tapa do ena avo duru ingito puvuto <sup>26</sup> Iesu ta utu ta beto gombuto Iesu na iae ta jo ta ahihi sapura avo kurumbaja penunu enu, <sup>27</sup> Iesu na timu hatirari ke na einge ena, “Meni isasaraho ta indari umbuto ino ta gosukasora amo sapura avoeto meni isasaraho na kiti indesora,” ainge Iesu na ena amita be amo Judea embomeni avo kiti hondate aisuja eto ambota enda nei embomeni hondate aisi timu hatirari ke na enu <sup>28</sup> Pamone amina ke mine einge ena, “En, Bada, ino gaga suvu ta mitera amina meni isasaraho ta indari sirivo indiora.” Ainge enu <sup>29</sup> Iesu na “Umo ke be erea avoeto umo no bande ta pambujo. No iae ta jo ta ahihi sapura amo matu toto pambija.” Ainge enu <sup>30</sup> Pamone amo pambuto bande ta

toreto amita iae ahihi sapura matu pambunu sereketo mitina avo kina.

*Embo vahai pe vahaikari eto onde sundurari avo Iesu na enu javotoho ena*

<sup>31</sup> Eto Iesu na da Tyre toto enda Sidon te enda Decapolis te amita orohuta tiuketo pambuto umo Galilee ta puvunu <sup>32</sup> embo na embo vahai pe vavaikari eto onde sundurari avo Iesu na ingeni hamo ta tembaja umbuto puvuo. <sup>33</sup> Iesu na embo tapa toto embo vahai avo umbuto eonga imite ingeni singi heriso onde to heriso ai ta iketo ingeni ta isuva eto embo amita ivivi ta kaimbeto jo unu usiga pagitie <sup>34</sup> Utu i arerembeto kogue ke einge ena “Epatha” ainge ena amita be amo “ejo hirikare” ainge enu <sup>35</sup> onde ahimbitinu pe haunkitinu ainge enu embo amina ke javotoho enu <sup>36</sup> Iesu na ari avo ke hande eora taekitie enu ingia <sup>37</sup> te ingito ingaesira eto ke hande ea. Eto embomeni na ti kakambuketo haha puha ijie ke einge ea “Eto Iesu na ari jajavotoho onde susundukari ta pe vavaikari te tapa oi javotoho ere ora.” ainge ea.

## 8

*Eto Iesu na embo tapa 4,000 unduna (Matthew 15:32-39)*

<sup>1</sup> Eto iji amite embomeni isapamane puvuto Iesu ta ke ingihe mitio Iesu na embomeni amita indari irae avo kito amita ambotani jage enu puvuo <sup>2</sup> ke einge ena, “Na embomeni erevi iji amita jo ta indari indae teho mitera avo kogone jo ereua. <sup>3</sup> Embo nei da hoi ta eto puvera avoeto ikaro beuje te da ta pambasora amo degi ta pahue titivi na amburesora” ke ainge enu <sup>4</sup> ambotani na ke mine einge ea “Eto degi emo ojabatambu ra te naingeto indari umbuto embo isapamane emomo unduroro?” Ainge eo <sup>5</sup> Iesu na “Ungota degi bread tapa doingere” ainge enu eto enana na ea “7” ainge eo,

<sup>6</sup> Eto Iesu na embomeni enda ta arumbara enu arumbeo bread umbuto God ta degi peketo ingeketo amita ambotani ta ikenu umbuto embomeni ta ikea. <sup>7</sup> Eto umo o heriso memeni amite aingeto umbuto God peketo embomeni ta ikaro indora ambotani ta ikena. <sup>8</sup> Eto indio inono enu ambotani na indari sirivo siriketo hambija tapa pevitina. <sup>9</sup> Eto india amo embo tapa 4,000 ainge amina indio. Iesu na enu embomeni sisiketo pahuo <sup>10</sup> Iesu e nga umbuto ambotani ga pambuto enda Dalmanutha ta puvua.

*Pharisee embopona ari peni be kesi penunu ea*

*(Matthew 16:1-4)*

<sup>11</sup> Eto Pharisee embomeni na Iesu engekasi puvuto Iesu ga pe na jujune ue Utu ta hajire au kesi eo, <sup>12</sup> Iesu na jo memenga unu ke einge ena “Ungo eha vasiri te irari embomeni na Utu ta hajire kesi erevete? Nanena erena ungo embo eha miteva amina Utu ta hajire mane be mane kesova” ainge eto <sup>13</sup> enana toto e nga umbuto umo ovitihō ta pahue

*Pharisee ta bread pajirari sivo*

*(Matthew 16:5-12)*

<sup>14-16</sup> Iesu na embo sasapura ta ari avo mane jigama ara ambotani ta degi ke einge ena, “Ungo be kivujo. Pharisee embomeni te Herod te amita bread pajirari sivo avo be kon kon eto kivujo.” Ainge timu hatirari ke na ena avo ambotani na indari peni umbae bread vahai umbuto e nga ta ere pahua avo Iesu na kito ari ke eo, <sup>17</sup> Iesu na ingito ke einge ena “Ungo do eto bread umbae ari ke ereve? Ungota jo ngahia avoeto ke erena emo ingae ue erevete? <sup>18</sup> Ungo titi mitia te kiae eto onde mitia te ingae, iji tapa ungo hotembae ereova. <sup>19</sup> Eto na bread 5 amina pereto embo tapa 5,000 unditana eto ungo na bread sirivo tapa hambija doinge ueve? Eto enana 12” ainge ea. <sup>20</sup> Eto Iesu na ehako ena, “Eto bread tapa 7 amina periketo embomeni 4,000 unditana amita sirivo hambija tapa doinge ueve?” ainge enu “7” ainge

ea. <sup>21</sup> Eto Iesu na “ungo ari erevi kogava te kialesira ue ereva.” ainge ena.

*Iesu na enu titi vahaikari embo kina*

<sup>22</sup> Eto aingeto da Bethsaida ta puvo embomeni na embo titi vahaikari avo <sup>23</sup> Iesu na titi ta tame aja umbuto puvo Iesu na titi vahaikari embo amita ingeni jigito gosuketo da ahone ta umbuto pambuto titi ta isuva eto tame ue ke einge ena “Umo no titi na kon kon eto kogoete?” ainge enu <sup>24</sup> embo amina titi hangeambu eto kito ke einge ena. “Na embo re ere kogona te i uhu na pahuore kiarako ere ona,” ainge enu <sup>25</sup> ehako Iesu na ingeni titi ta tame enu embo amina kon kon eto kiari javotoho na kogunu <sup>26</sup> Iesu na da ta ikenu pambasi unu ke einge ena, “Umo da ta pambuto ari erevi ke hande aojo.” Ainge eto ikenu da ta pambuna.

*Iesu amunure avo Peter na ke ena*  
*(Matthew 16:13-20, Luke 9:18-21)*

<sup>27</sup> Eto Iesu na amita ambotani ga da nei nei Caesarea Philippi degi ta pahue ke einge ambotani ta degi ena, “Namo mo amunure ke eore?” Ainge enu <sup>28</sup> enana ke mine einge ea, “Eto embo nei na John bapataito ari embo ke eora, eto embo nei na Elijah ke eora eto nei amo peroveta vahai ke eora” ainge eo <sup>29</sup> Iesu na ke einge ena. “Eto nei ungo na na amunure ke eove?” ainge enu Peter na “Umo Iesu Keriso God na Judea embo hondate ae enda ta ikenu puvura.” ainge enu <sup>30</sup> Iesu na ke avo embomeni ta hande eora ke ngahia na eto taekena.

*Iesu memenga kito amburesuja avo ambotani ta degi ke ikena*

*(Matthew 16:21-28, Luke 9:22-27)*

<sup>31</sup> Eto Embo ta Meni na osaga te memenga te kesuja amita be amo Judea embo pepeni te priest pepeni te eto Judea ta ke pepeni simba ari embopo te aingeto Iesu amo Judea ta hondate ari embo manera ainge ijie taro amburesuja eto iji 3 ehako vasiri



te erasuja ke ainge Iesu na amita ambotani ta itiketo onde katena. <sup>32</sup> Eto Iesu na ke emo timu hatirari ke na ae rate ke be na pere harikena avo Peter na ingito einge ena “Ke avo to. Ari avo no degi ta mane puvuresuja” ainge enu <sup>33</sup> Iesu na overeketo amita ambotani kogue Peter ta degi ke einge ena “Satan, Umo nau ku ta pambu. Eto umu God ta hotembari avo ae rate embo ta hotembari avo erea.” ainge Iesu na ena. <sup>34</sup> Eto Iesu na amita ambotani te embo tapa jage enu puvuo timu hatirari ke einge onde katena. “Embo amuna na ambo ambo asi uje aisuja amo amita ujeje tapa toto amita i atahu bouka avo koho ta tembeto na ambo ambo aisuja. <sup>35</sup> Eto embo amuna daroho iresi amita vasiri te ari te jigesuja amo embo amita vasiri iraesuja rate embo amina tohota ujeje te ari te toto namote nau ke te avo tumota aisuja amo daroho iresuja. <sup>36</sup> Eto embo na ahihi amita datoho irari avo hotembae ue enda ta donda nei te nei te umbasuja eto amburesuja amo amita ahihi matu amburari avoeto irari datoho mane umbasuja. <sup>37</sup> Eto embo amina amita donda neite neite tapa amina ombuto amita ahihi avo umbari haite mane be ra. <sup>38</sup> Embomeni eha mitera amo ari sasapura embopo eto God uje ae embomeni ra te embo amuna Namote nau ke te avo kito me kogue hande ae aisuja amo Embo ta Meni usasa te Anera Otohu ga iji kombu te puvuto embo avo kogue me kesuja.

## 9

<sup>1</sup> Na ungota degi ke be erena. Ungo embomeni eha ei miteva amo embo nei nei amo mane amburesova te mitirovo God na embo amita siriketo umbuto titi jigesuja amita iji avo sovera te puvurou keisova,” ainge Iesu na ena.

*Ambotani na Iesu ta usasa kia  
(Matthew 17:1-13, Luke 9:28-36)*

<sup>2</sup> Eto iji 6 irae enu Iesu na embo tapa toto Peter te John te James te umbuto tiri peni vahai ai ta bitito mitio Iesu ta hamo amo usasa pere unu

<sup>3</sup> eto amita bo na usasa peni vahai amo enda embo na bo parara ainge ari haite mane avo unu <sup>4</sup> Peroveta matu Elijah te Moses te aingeto irerembeto Iesu ga heteto ke ijie mitio <sup>5</sup> Peter na oju ue ke do ano ijie einge ena, “Atepoekari embo, dago ungote mitera emo javotoho avoeto horoma no vahai Elijah vahai eto Moses ta vahai ainge gerikarote?” <sup>6</sup> ainge Peter na ijinu <sup>7</sup> oje na puvuto utumo enu oje jo ta ke einge puvuna, “Nau osari Meni ra. Amita ke ingivujo.” Ainge ijinu <sup>8</sup> enana jireki poeki eto embo nei kiae Iesu eonga mitinu kia. <sup>9</sup> Eto enana tiri ta eto vovue Iesu na ambuto vasiri te erae avoeto ambotani na ari tapa do kia avo hande eora taekena <sup>10</sup> avoeto enana ke hande ae toa te Iesu na ambuto ehako vasiri te erari ta ke ena avo enana hotembu hotembu ea.

<sup>11</sup> Eto ambotani na Iesu ta degi ke einge eto ingia, “Eto ungotenau ke pepeni simba ari embopo na do avoembo peroveta Elijah kiti puvurou ungotenau hondate ari embo ambota puvuresuja ke eore?” ainge eo <sup>12-13</sup> Iesu na ke mine einge ena, “Eto Elijah na puvuto au tapa javotoho asora ke ainge eora te ke nei matu kajari amo, Embo ta Meni na osaga nei te nei te kogurou urumbasora. Rate na ungota degi erena Elijah matu puvuritaja te enana amita ke agi ae ungota ujeje avo uera.” Ainge ijinu ingiho

*Iesu na pipi konene meni enu konдена  
(Matthew 17:14-21, Luke 9:37-43a)*

<sup>14</sup> Iesu te Peter te James te John te aingeto egerembeto ambotani toto pambua amita degi puvua.

Eto Judea ta ke pepeni simba ari embopo na puvuto ambotani ga boru juho <sup>15</sup> eto embomeni isapamane puvuto joeketo kogue mitio Iesu, Peter te John te James te aingeto puvuto kina. Eto embomeni na Iesu kito tutuveto pambuto Iesu pekitie ingeni ta jigito umbuto puvuo, <sup>16</sup> Iesu

na ke einge eto ingina “Ungo ke do ijie miteve?” Ainge enu <sup>17</sup> embo vahai na ke mine einge ena. “Ate poekari embo, nau meni avo ahihi sapura na pe vahaikari ke mane euja avo eto no degi ta umbuto puvena. <sup>18</sup> Amo ahihi sapura na andioi ingeni te utu te tatain eto beto ahue ti kambuto kiroro kiroro ue pe pejigi gavineto beuja avoembo no ambotani ta degi umbuto puvena te ahihi sapura kurumbari inono ae etere kito no degi ta erena,” ainge enu <sup>19</sup> Iesu na osaga kito embo tapata degi ke einge ena, “Ungo tumota ae embomeni ra. Eto ungo kiari umbava ungote iji doinge irono. Eto no meni avo nau degi ta umbuto have,” ainge enu <sup>20</sup> embo na meni avo umbuto Iesu ta degi io, ahihi sapura jo ta amina Iesu kito meni avo andinu enda ta beto ahero ahero ue ahunu pejigi horo gavineto vovunu <sup>21</sup> Iesu na “No meni na iji doinge ari einge emomo eoi?” Ainge enu Mamo na einge ena, “Meni isapa ta itikari avo ere ouva. <sup>22</sup> Eto meni emo amburoja uei iji nei i ta beto evekeuja eto nei amo umo ta beto umo indiuja avoeto umo ari inono kito avo nango jo au ejo kondai.” Ainge enu <sup>23</sup> Iesu na embo amita degi ke einge ena “Umo do eto na inono kito ano kondaja ere? Eto embo amuna God tumota aisuja amo ari tapa amo amita degi inonora aisuja,” ainge Iesu na enu <sup>24</sup> meni ta mamona ke vasiri na eto einge ena, “Na umo tumota ere ona te na hondate ejo umo be tumota ane.” Ainge enu, <sup>25</sup> embomeni na ingihe joekeo ahihi sapura ta degi ke einge ena “Umo jo ta toto beto hae, mane ehako egerembasoa” ke ngahia na ainge enu. <sup>26</sup> Ahihi sapura na gagaha ijinu meni amo beto gatari gatari ue beto ahunu ahihi sapura amo puvuto pambuna. Eto embomeni na meni enda ta sereketo mitina avo amburari ke ijio <sup>27</sup> Iesu na meni amita ingeni ta jiginu erenu <sup>28</sup> toto bande jo ta ambotani ga toreto mitio ambotani na Iesu ta degi ke

einge ea. “Dago do eto ahihi sapura kurumbari inono ae etere” Ainge eo <sup>29</sup> Iesu na einge ena, “Ahihi sapura nei eingekeo amo teho mane kurumbeora te God ta degi pari ue kurumbeora,” ke ainge Iesu na ena.

*Iesu ambuto vasiri te erasuja avo harikena*

*(Matthew 17:22-23, Luke 9:43b-45)*

<sup>30</sup> Eto Iesu na amita ambotani ga enda Galilee jo ta pahue embomeni tapa na Iesu kiora uje ae ena. Amita be amo amita ambotani pere avo ate poekasi uje ena. <sup>31</sup> Eto pahue ambotani ta degi ke einge ena. “Embo ta Meni avo embo ta ingeni ta ikaro taro amburesuja te iji 3 ehako vasiri te hoasuja.” Ke ainge ijie ate poekena <sup>32</sup> avo ambotani na ke be ingae ue eto ingesi uje ea te oju eto toa.

*Embo amuna embo okose aisuja*

*(Matthew 18:1-5, Luke 9:46-48)*

<sup>33</sup> Eto Iesu ambotani ga da Capernaum ta puvuto bande ta toreto mitio Iesu na ambotani ta degi ke einge ena, “Ungote degi ta puvutohore ungo ke do mine ara ijie eteve?” ainge Iesu na enu <sup>34</sup> ambotani ke ambupu ea. Amita ke be amo degi ta puvutuhe enana vahai amuna embo okose asuja amita ke avo tumo te tapa ke mine ara ea. <sup>35</sup> Avoto ke ambupu eo Iesu na ambotani enu puvuto vahaita arumbeo enana ta degi ke einge onde katena, “Eto embo amuna meni isapasira eto embo unduresuja amina embo peni aisuja.” Ainge ijie <sup>36</sup> Iesu na meni isapa kito pambuto ingeni ta jigito umbuto puvuto ohimbeto jo ta ikenu arumbenu <sup>37</sup> ke einge ena. “Eto embo amuna javo nau ta meni isapa eingekeo osa kageni aisuja amo namote tapa osa kageni aisuja eto na pere mane rate God, na ikari embo amite tapa osa aisuja.” ainge enu

*Embo amo ungotenau kitoho mane rate ungotenau tohora*  
*(Luke 9:49-50)*

<sup>38</sup> John na ke einge ena. “Ate poekari embo, embo vahai na ahihi sasapura javo no ta kurumbitaja avo kito ungotena vahai manera ainge eto taekitara” ainge enu <sup>39</sup> Iesu na ke einge ena. “Ari ainge amo mane taekaso. <sup>40</sup> Embo amuna nau javo ta ari javotoho aisuja amina ereto sausau nau javo mane au sapura aisuja. Embo amo ungotenau kitoho mane rate ungotenau tohora <sup>41</sup> te ungota degi erena embo amuna umo Keriso ta toho kito umo jamo timbuto no degi ta ikau indesoa embo amina hotari umbasuja.”

### *Engekari ta ke*

*(Matthew 18:6-9, Luke 17:1-2)*

<sup>42</sup> “Eto embo amuna na tumota ari meni isapa jo nau ta arumbeto mitia aingeko avo engekau sapura aisuja amo nanena embo amita degi mine ikano memenga peni vahai kesuja eto embo na amita tungata esi tigito atara peni vahai handuketo eva ta kiti gosukaetija amo memenga ainge mane kiaetija. <sup>43</sup> Eto no ingeni vahai amina au umo sapura aisoa amo no ingeni avo jirembejo irae ai. <sup>44</sup> Eto umo ingeni jirembari amiga hotari degi ta toraso amo javotoho rate ingeni heriso te memenga kiari degi ta toreto i bevère kesoa amo sapura bera. Eto degi ai ta amo bevère seikari inono aera. <sup>45</sup> Eto no utu vahai na au umo sapura aisoa kito jeto tiuketo popora eto mitima hotari degi ta toraso amo javotohora <sup>46</sup> rate utu heriso te memenga kiari degi ta toraso amo sapurara. <sup>47</sup> Eto no titi na au umo ari sapura asoa amo no titi jigito kurukejo. Eto titi vahai te God ta irari degi ai toraso amo javotoho rate titi heriso te memenga degi ai ta toraso amo sapura bera. Eto degi ai ta amo i bevère seikari inono ae <sup>48</sup> eto embo ta bisi sari uoi kakesa na indie daroho iriuja.

<sup>49</sup> Rate i bevère amo aso ainge embo ta hamo ta kaimbau aso ta gamo ainge kesuja. <sup>50</sup> Eto aso ta gamo irae aisuja amo ehako ikari

inono aera, avoeto aso ta gamo kambari inono ta mitie peka mine ara evujo.”

## 10

### *Embo na ae tora amita ke avo Iesu na ena*

*(Matthew 19:1-12, Luke 16:18)*

<sup>1</sup> Eto Iesu na enda avo toto enda Judea umo Jordan ovitihō ta pambuto mitinu embomeni isapamane puvutuhore onde ere katitiaetija. <sup>2</sup> Eto Pharisee embomeni na Iesu ke sapura au ingesi puvuto engikitie ke einge ea, “Eto embo na amita ae toasuja amo Moses ta ke pepeni poekaute?” Ainge eo <sup>3</sup> Iesu na, “Eto Moses na ke do enu?” Ainge enu <sup>4</sup> pharisee embomeni ke einge ea “Eto embo na amita ae uje ae ue kito amo ke kaeto ikau umbau toasuja amo aravora ke ainge Moses na ena.” ainge eo <sup>5</sup> Iesu na ke mine einge ena. “Moses na ke ainge kajena amo ungota jo ngahia avoeto kajena <sup>6-7</sup> rate God na utu te enda te ari iji te embo te pamone te ena avoeto embo na e mamo toto ae ga kaju asuja <sup>8</sup> amo enana vahai aisora te embo na kateketo eonga eonga mane aisora te vahai eto iresora. <sup>9</sup> Eto God na do kaju aisuja amo embo na mane katekasora.” Ainge Iesu na Pharisee embopo to degi eto <sup>10</sup> toto bande ta torenu ambotani na ae toari ta ke avo Iesu ta degi ke be au ingesi ehako eto ingio <sup>11</sup> Iesu na ke einge ena “Eto embo na ae toto pamone nei jimbasuja embo amo tiha embora <sup>12</sup> eto ae matu toari amo embo nei jimbasuja amo tiha pamone ra.” ainge Iesu na ena.

### *Iesu na meni isasaraho ta siro ta ingeni tembena*

*(Matthew 19:13-15, Luke 18:15-17)*

<sup>13</sup> Eto embomeni na meniundi umbuto Iesu na ingeni hamo ta tembaja umbuto puvuo ambotani na kito taekeo <sup>14</sup> Iesu na tumo eto ambotani isembitie ke einge ena, “Meni isasaraho mane taekasova te evu nau degi ta hurore. Meni isasaraho amo na tumota eora eto embo amuna

ainge nombo na tumota aisuja amo God na embo amo simba aisuja. <sup>15</sup>Na ungota degi erena embo amuna meni isasaraho ainge na tumota eora aingeko ae aisuja amo God na mane titi jigesuja.” ainge Iesu na ijie <sup>16</sup>meni isasaraho ohimbeto umbuto ingeni siro ta tembeto javotoho ari ikena.

*Iesu na donda embo ta degi ke ena  
(Matthew 19:16-30, Luke 18:18-30)*

<sup>17</sup>Eto Iesu enda nei ta pambasi unu embo vahai na kito tutuveto puvuto tumo te pain ue paunge teteri eto ke einge ena, “Atepoekari embo javotoho, na ari do ue irari daroho hoteto umbano avo inena ejo ingone,” ainge enu Iesu na ke einge ena, <sup>18</sup>“Umo do eto na javotoho ke ere? Eto embo tapa amo javotoho manera te God vahai avo javotohora. <sup>19</sup>Eto God ta ke pepeni amo umo kiarira: Embo mane tao amburesora, tiha mane aisoa, pegene mane aisoa, embo nei ta ke be na au ingito jandireketo sokova na mane aisoa, ke sokova ijie embo nei ta donda mane umbasoa, eto aja te mama te otohu aisoa,” ainge Iesu na enu <sup>20</sup>embo amina ke einge ena, “Ate poekari embo, na meni isapa ta itiketo ari tapa avo javotoho pere ue ere puvutuhovona,” ainge enu <sup>21</sup>Iesu na embo avo kogue osa ue ke einge ena “Ari vahai avo ae ereova, avoeto pambuto no donda tapa avo ombuto koro umbuto donda ambu embopo ta iketo na ambo ambo asi hae. Eto God ta irari degi ta no donda isapamane mitia avo hoteto umbasoa.” Ainge enu <sup>22</sup>embo amina ingito amita hajae vajae peni vahai avoeto osaga kogue pahunu, <sup>23</sup>Iesu na overeketo ambotani kogue ke einge ena, “Hajae vajae embo na naingeto God ta degi torau, amo ngahia be ra.” Ainge enu <sup>24</sup>Iesu ta ambotani na ke avo ingito mani mini eo Iesu na ke ehako einge ena, “Nau meniundi, God ta degi ta torari ngahia be ra. <sup>25</sup>Eto o camel na poma to ta toreto pambari ngahia

ra aingeko hajae vajae embo na God ta titi jigari degi ai ta torari ngahia be ngahia ra.” Ainge Iesu na enu <sup>26</sup>ambotani na ke ainge matu ingae avoeto “embo amunure God na ari sapura ta oreketo umbau?” ainge eo <sup>27</sup>Iesu na enana kogue ke einge ena “Embo na ari inono aera te God ta degi ari tapa amo inono ra.” ainge <sup>28</sup>enu Peter na Iesu ta degi ke einge ena. “Kijo, nangota donda tapa toto umo ambo ambo ere ora.” ainge enu <sup>29</sup>Iesu na einge ena “Na ungota degi ke be erena, embo amuna namote nau ke javotoho te avoembo bande te namei kamei te du emone te e mamote meniundi te hajae vajae te amita enda te tapa toasuja <sup>30</sup>amina amburae mitie namei kamei te du emone te emamo te meniundite hajae vajae isapamane enda te tapa umbasuja amo embomeni na Iesu ta ambotani ra ainge eto taro memenga kesuja te mitima ambuto God ta degi toreto vasiri daroho hoteto umbasuja <sup>31</sup>rate embo peni amina kiti asi uje aisuja amo ambota aisuja eto embo ambota amina kiti aisuja.” ainge Iesu na ena.

*Eto Iesu pambuto Jerusalem ta amburesuja avo ehako enu ingia*

*(Matthew 20:17-19, Luke 18:31-34)*

<sup>32</sup>Eto da Jerusalem degi ta Iesu kiti pahunu ambotani 12 amo mana mana ue pahuo ambotani nei uhoho amo joru te tapa ambota puvuo Iesu na ambotani 12 umbuto amita degi do puvuresuja avo harikena. <sup>33</sup>“Kivujo, ungotena da Jerusalem ta pambasora amo embo na Embo ta Meni avo Priests pepeni te Judea embo ta ke pepeni embopo te ta ingeni ta ikau umbuto pehumba eto taro amburoja umbuto Rome embo ta ingeni ta ikasora. <sup>34</sup>Eto Rome embo na urumbitie hamo ta isuva ue esi na ejembeto tasora eto taro ambuto iji 3 ehako vasiri te hoasuja.” ainge ena.

*James te John te embo pepeni asi uje ea*

*(Matthew 20:20-28)*



<sup>35</sup> Eto degi ta pahue Zebedee ta meni heriso James te John te na Iesu da Jerusalem ta do aisuja amo hotembae ue Iesu ta degi ke einge ea, “Ate poekari embo, dago do asi uje ere ora avo inena ao arote,” ainge eo <sup>36</sup> Iesu na ke einge ena “Na ungo ta degi do ana uje ere ove avo evujo ingone.” Ainge enu <sup>37</sup> enana ke einge ea, “Umo heteto titi jigari iji te ao nango nei no ingeni anga ta eto no ingeni be ta aingeto arumbeto embomeni simba arote” ainge eo <sup>38</sup> Iesu na ke mine einge ena. “Ungo ke do asi ereva amo ungo be kiaera. Eto na atungu ta indesona amo ungo indari inono rete? Eto na deina bapataito aisora amo ungo amina bapataito ari inono rete? Amita ke be amo na amburesi ue memenga kesona amo ungo memenga kiari inono rete?” Ainge enu <sup>39</sup> enana na “Dago inonora” ke eo Iesu na ke einge ena. “Ke be ra, na atungu ta indesona amo ungo atungu ta indesova eto na bapataito aisona amo ungo bapataito aisova <sup>40</sup> rate embo amuna nau ingeni anga ta eto be ta arumbasuja amo nanena mane aisona te God na matu kito sirikari ra.” Ainge Iesu na ena <sup>41</sup> te ambotani nei uhoho na John te James te amita ke avo ingito enana ta degi tumo ea. <sup>42</sup> Avoeto Iesu na ambotani jage enu puvuo onde katari ke einge ena, “Ungo kogova amo enda nei embomeni na embo pepeni eto titi jigihore embomeni ta degi osaga memenga ikeora, <sup>43</sup> rate ungo ainge mane aisova te ungo embo vahai na embo peni aisuja amina ungo tapa hondate ue ungota ujeje avo unduresuja. <sup>44</sup> Eto embo amuna ungota titi jigari embo asi uje aisuja amina ungo tapa ta ke agi aisuja. <sup>45</sup> Eto Embo ta Meni na embo peni eto enda embo titi jigesi puvurae rate amita vasiri na embomeni te ari sasapura avoembo ombuto umbasi puvena.” Ainge Iesu na ke eto

*Titi kuru ari embo javo Bartimeus*

*avo Iesu na enu kina*

*(Matthew 20:29-34, Luke 18:35-43)*

<sup>46</sup> Ere pahumite da Jericho jo ta puvuto Iesu te ambotani te aingeto pahunu embomeni na kesi ambota puvua. Eto Timaeus ta meni Bartimeus titi vahaikari amo da sahu ta arumbeto mitie koro penunu ere ijiaetija <sup>47</sup> avo Iesu Nazareth embo puvuto ere hua ainge eo ingito jajage eto ke einge ena, “David ta Meni Iesu na jo au kito hondate e.” Ainge enu <sup>48</sup> embomeni na ke toaja isembea rate embo amina ehako ke hori gagaha eto “David ta Meni na jo au kito na hondate e.” Ainge enu <sup>49</sup> Iesu na ingito heteto “Embo avo evujo huroi” ainge enu embo na titi vahaikari embo avo jage eto “Iesu na umo jage eria avo eto tunga javotoho ue ere.” Ainge eo <sup>50</sup> embo amina soveto ereto heteto amita bo pohukari amo seuketo barae eto Iesu ta degi pambunu, <sup>51</sup> Iesu na “Umo do ana uje ue ere?” ainge enu embo amina “Bada, nau titi ejo javotoho au kione” ainge enu <sup>52</sup> Iesu na amita degi ke einge ena, “Umo na tumota ere oa avo no titi javotoho etija avoeto degi kogue pambujo” ainge enu titi hirikenu Iesu ta ambota pambuna.

## 11

*Iesu Keriso Judea embo ta hondate ari embo avo da Jerusalem ta torena*

*(Matthew 21:1-11, Luke 19:28-40, John 12:12-19)*

<sup>1</sup> Eto Iesu te amita ambotani te aingeto da Jerusalem auveto da Bethphage te da Bethany te ta tiri Olives engitita puvuto ambotani heriso umbuto ikenu pambasi uo <sup>2</sup> ke einge ena “Ungo pambuto da degi ovitihio amita pe ta o donkey meni handuketere mitia amo meni avoeto ai ta isa mane eora avo bujeketo umbuto puvuvujo. <sup>3</sup> Eto embo na ‘Ungo do eto donkey meni umbuto pambasi ere ove’ Ke ainge aro ungo na einge evujo, ‘Bada na jigama eto

ikau egerembasuja, ainge eto umbuto puvuvujo” ainge <sup>4</sup> enu enana ambotani heriso pambuto o donkey meni embo ta da pe ta handukeo mitina avo kito bujeketo umbasi uo <sup>5</sup> embomeni ai heteto mitia amina “ungo do eto o meni umbasi ere ove” ainge eo, <sup>6</sup> Iesu na ke do ara ena avo eo ingito aravora ainge eo <sup>7</sup> umbuto Iesu ta degi pambuto enana ta bo umbuto o hamo ta tirio Iesu bitito arumbena. <sup>8</sup> Eto embo nei uhoho na bo hoheto degi ta besi tiritio nei uhoho na embo ta pure ta i gigi kahumbeto degi ta tiritio <sup>9</sup> ai haito pahunu embo nei kiti eo embo nei uhoho ambota eto pahue jajage eto ke einge ea, “Oro, Oro, Bada ta javota puvuto ere hua avo God na javotoho ari ikai. <sup>10</sup> Ungotenau ohihi king David ta simba ari javotoho aingeko avo ehako puvuto erehua avo God au javotoho ai. God i be ta avo jakeka erera” ainge embo na ijio <sup>11</sup> pambuto da Jerusalem ta toreto Iesu temple jo ta toreto donda tapa poeto kito ture vovunu ambotani 12 ga da Bethany ta pambuna.

*Iesu na i junga enu jaise ena*  
(Matthew 21:18-19)

<sup>12</sup> Eto evito iho bujenu da Bethany toto ambotani ga degi ta puvuto ere humite Iesu na beuje unu <sup>13</sup> i junga avo hoi ta kito be miteija ijie pambuto kina rate amita be ari iji amo jua ta avoeto be irae gigi pere kito <sup>14</sup> Iesu na i amita degi ke einge ena, “Embo na no be ambota mane indesora” ke ainge ena amo ambotani tapa na ingia.

*Iesu temple jo ta torena*  
(Matthew 21:12-17, Luke 19:45-48, John 2:13-22)

<sup>15-16</sup> Eto da Jerusalem ta puvuto temple jo ta toreto embo isapamane na di dipo te eto donda neite neite avo temple jo ta ombuto koro uhue mitio Iesu na kito tumo eto gaga jigito haperekitie <sup>17</sup> ke einge ena “Donda umbuto temple jo ta mane torasova te na ke aisona ingivujo.

God ta ke kajari ta mitia amo Bande nau emo embo tapa eto enda tapa ta pari ari bande ra ainge mitia te ungo na eteve pegene embo ta bande ere ua.” Ainge Iesu na enu <sup>18</sup> enana priests pepeni te Judea ta ke pepeni simba ari embopo te na ingito naingeto Iesu taro amburesuja avo jombure ea. Amita be amo embomeni tapa na Iesu ta ke ingito haha puha ea avoeto Judea ta embo pepeni na Iesu joru ea. <sup>19</sup> Eto ture vovunu da toto ambotani ga pambuto evito

*I junga ta ke*  
(Matthew 21:20-22)

<sup>20</sup> Iho bujenu egerembeto ambotani ga degi ta puvuto i junga avo jaise eto mitinu kia. <sup>21</sup> Eto Peter na Iesu na ke matu enu ingina avo hotembeto Iesu ta degi einge ena “Bada ki, i junga emita degi ke etea amo jaise etija,” ainge enu <sup>22</sup> Iesu na ke einge ena “God tumota evujo. <sup>23</sup> Ungota degi ke be erena, embo amuna tiri emita degi ‘umo sohum-beto pambuto eva ta bejo’ ainge jeneki ae God tumota ue aisuja amo God na aisuja, avoeto erena. <sup>24</sup> Eto ungo God na do ikau umbasi uje eto pari ue ke be ijirovo amo ikau umbasova. <sup>25</sup> Eto embo amuna ereto pari ue embo nei na no degi ta sapura do ari re avo hotemebeto toaso eto ainge nombu no Mama Utu ta iriuja amina no ari sapura hotembeto toasuja rate inena embo nei ta ari sapura hotembeto toae aisoa amo Mamo God Utu ta iriuja amina no ari sapura mane hotembeto toasuja”

*Iesu na embo amuta ke agi ue pure ena*  
(Matthew 21:23-27, Luke 20:1-8)

<sup>26-28</sup> Eto degi ta ke ainge ijie da Jerusalem ta puvuto temple jo ta toreto isa unu priests pepeni te Judea embo ta ke pepeni simba ari embopo te Judea embopo pepeni te aingeto Iesu ta degi puvuto ke einge ea “Embo amuna no degi ta sovera ari iketei umbuto ari emomo ere oe?”

ainge eo <sup>29</sup> Iesu na ke mine einge ena. “Ungona nau degi ta ke be avo ingito avo na amuna sovera ari ikitei umbuto ere ona avo ano ingesova. <sup>30</sup> Na ungota degi eto ingari ke aisona amo erevira. John na sovera ari umbuto embo bapataito ere uatija amomo God ta degi eto umbunute mo embo ta degi umbunu?” ainge eto inginu <sup>31</sup> embo pepeni na ke mine do asora avo ungo eonga jujune ke ijie einge mine ara eto ea, “Eto dago John na sovera ari God ta degi umbari ke aisora amo Iesu na aravorate ungo do eto John ke be ae ereove ke ainge aisuja <sup>32</sup> rate dago sovera ari embo ta degi umbari ke asora amo embomeni ei mitera amina dago ta degi isoro aisora amita be amo John amo God ta peroveta be ke eora avoeto.” Eto ke mine ari inono ae enu <sup>33</sup> enana na Iesu ta degi “dago be kiae avoeto mane aisora” ainge eo Iesu na “Aravora namote tapa amuta degi sovera umbuto ere ona avo mane ano ingesova.” ainge ena.

## 12

*Grape pure Mamo ta timu hatirari ke*

*(Matthew 21:33-46, Luke 20:9-19)*

<sup>1</sup> Eto Iesu na timu hatirari ke avo einge itiketo ena, “Eto embo na grape be urasi andage eto huga tigitto joeketo orohuta grape be ta mu sahasi hoto koveto grape be mu tuna pure mamo ta degi ikasuja eto arumbeto grape simba aisora gaga geriketo tapa embo ta ingeni ta iketo enda nei ta pambuna. <sup>2</sup> Eto ‘grape’ sari ari iji puvunu ‘grape’ be sari umbaja pure mamo na amita pure embo vahai ikenu pahunu <sup>3</sup> ‘grape’ simba ari embo na kito teo ambuto donda umbae teho mamo ta degi pambuna. <sup>4</sup> Eto ‘grape’ ta mamo na amita pure embo nei ikenu pambunu ‘grape’ simba ari embomeni na urumbitie teo ambuto mamo ta degi pambuna. <sup>5</sup> Eto mamo na pure embo nei ikena amo teo ambuto sape enu pure embo nei nei ikena amo hamo ta torue nei

nei avo be teo ambuvujekea. <sup>6</sup> Eto ainge pere ere umite tutumo nombo ta amo amita osari meni avo ikasi ue ke einge ena. ‘Emo osari meni nau avo kito otohu ue mane tasora.’ ainge eto <sup>7</sup> ikenu pahunu grape be simba ari embomeni na kito ke einge sirikea. ‘Eto ‘grape’ mamo na meni iketei puvija avo ungoteteo ‘grape’ pure evi ungotenanena oreto umbasira,’ ke ainge <sup>8</sup> eto meni avo teo ambunu umbuto huga hokaka ta gosukeo beto sari ena. <sup>9</sup> Eto ‘grape’ mamo na puvuto do au? Amina grape simba ari embomeni tau ambuvjekaro ‘grape’ pure amo umbuto embo nei ta ingeni ta ikasuja. <sup>10</sup> Eto God ta ke amo einge kajari mitia, ‘Bande gerikari embopo na tutuvi vahai sapura ke ijie toa avo Bada God na umbuto enu bande ta tutuvi be ena. <sup>11</sup> Eto Bada ta ari avo kito kiari javotoho ke eora.’ ainge mitia amo ungo eteketo kiaerete,” ainge Iesu ke enu irae enu <sup>12</sup> Judea embo pepeni na ungo avoembo Iesu na hihitirina avo ingito Iesu andito tipura ta ikasi uje ea rate embomeni tapa na enana ta degi memenga ika-sora avo hotembeto oju ue toto pambuto,

*Tax koro ikari*

*(Matthew 22:15-22, Luke 20:20-26)*

<sup>13</sup> Pharisee embo te Herod ta ke agi ari embopo te aingeto Iesu ta degi pambuto engeka ururoro Iesu na ke mine sapura do au ingito pambuto <sup>14</sup> ke einge ea. “Ate poekari embo, umo ke be na pere embo ta ke te ari te avo hotembae ue God ta ke avo javotoho na ate poekeroa avo dago kiarira te dago ke vahai erevi no degi ta asi uje ereora, ke amo erevira, ungotena Judea ta ke pepeni oju ue tax koro Rome ta gavana Caesar ta ikarote mane ikaro? Eto ikarote mane ikaro avo ejo ingore.” Ainge eo <sup>15</sup> Iesu na enana ta jo ta hotembari heriso avo kito ke einge ena. “Ungo do eto na kaeto kesi uje ere ove? rate ungota koro vahai umbuto ikevu kione.” Ainge

enu <sup>16</sup> umbuto ikeo Iesu na umbuto koro hamota ove avo kito einge ena, “Koro hamota embo ta tombu emo amutare” ainge enu, “Caesar ta ra” eo <sup>17</sup> Iesu na ke einge ena, “Aravora, Caesar ta donda kito amo Caesar ta ikevu eto God ta donda kito amo God ta ikevu,” ainge Iesu na enu ingito haha puha ea.

*Ambuto vasiri te erari amita ke avo Iesu na ena*

*(Matthew 22:23-33, Luke 20:27-40)*

<sup>18</sup> Eto Sadducees embomeni na vasiri te erari avo ke be ae ue ere ijaetera avo Iesu ta degi puvuto ke einge eto ingia. <sup>19</sup> “Eto Moses na ke amo einge kajena. Embo ta ae meni umbae mitirou ivu amburesuja eto namei na namei hondate eto jimbuto be ikasuja ainge Moses na kajena. <sup>20-22</sup> Eto embo tapa 7 amo jo vahai ta amina meni bugo na jimbuna eto ae meni umbae mitinu ivu ambunu bugo ta kakane amina jimbuna amo meni umbae mitinu ivu ambuna eto ainge pere ue pambuto gasi meni amina jimbuna amo ainge meni umbae ambuna eto ambo be ta amo pamone amina ambuna. <sup>23</sup> Eto enana tapa 7 avo vasiri te hoasora amo pamone amo embo amuta ae au?” ainge eo <sup>24</sup> Iesu na ke mine einge ena. “Eto ungo hotembari nei sokova ereva amo God ta ke te sovera te avo kiae avoeto ereva. <sup>25</sup> Eto ke be amo embo amburari ehako vasiri te hoasora amo anera Utu ta jimbae iri-ora ainge nombo mane jimbasa te teho iresora. <sup>26</sup> Eto ke nei amo vasiri te hoari amita ke be amo Moses na ke kajena ai ta einge mitia te ungo kiae ue erevete? Eto Moses na i basa peri na evikitina amita jo ta ke einge ingina ‘Na Abraham ta God, Isaac ta God, Jacob ta God ra’ ainge ijinu ingina, <sup>27</sup> amo embo amburari ta God mane rate embo vasiri te amita God avo ijinu ingina te ungo ke nei ereva.” Ainge Iesu na enu,

*God ta ke 10 amita jo ta ke nombo amo davore?*

*(Matthew 22:34-40, Luke 10:25-28)*

<sup>28</sup> Judea ta ke pepeni simba ari embo na enana ke avo boru jumbarako uo ingito puvuto Iesu ta ke javotoho enu ingito ke einge ena “Moses na God ta ke 10 ta kajena amita ke peni mo davore?” ainge enu <sup>29</sup> Iesu na ke mine einge ena, “Israel embomeni ke nau ingivujo. Ungotenau Bada God amo vahai <sup>30</sup> avoeto no jo te hotembari te ahihi te sovera te tapa na God osa evujo. Eto ke amo peni be ra <sup>31</sup> eto ke nei amita engiti ta amo eingera, ‘Umo oenga hamo no simba ue osa eoa ainge nombo no namei kamei tapa osa ejo,’ Eto God ta ke 10 ta jo ta ke heriso erevi peni be ra.” ainge enu <sup>32</sup> ke pepeni simba ari embo na ke einge ena, “Ate poekari embo umo ke be erea, God vahai ra eto God nei iraera <sup>33</sup> te embo na jo te hotembari te sovera te tapa na God osa aisuja eto ungotenau hamo osa eora ainge nombo ungotenau namei osa aisora ke amo peni be ra pene gaga ta i ikeore evikitioi o boreora aingeko manera” ainge enu <sup>34</sup> Iesu na embo amita ke javotoho be enu ingito amita degi ke einge ena. “Umo God ta irari degi ai ta torari haite ere kogona” ainge Iesu na enu embo nei nei amo eto ingari ke ae me enu toa.

*Keriso amo meni amutare?*

*(Matthew 22:41-46, Luke 20:41-44)*

<sup>35</sup> Eto Iesu na temple jo ta toreto ke einge ate poekena. “Eto Judea embota ke pepeni simba ari embopo na Judea ta hondate ari embo Keriso amo King David ta ahije ke eora. <sup>36</sup> Rate God ta Ahihi Otohu na ke einge enu David na kajena,

‘God na Na David nau Bada ta degi ke einge ena. ‘Nau ingeni be ei ta arumbeto iriro nane no kitoho teto ikano inena utu na hatiresoa’

ke ainge ijinu David na kajena. <sup>37</sup> Eto David na Judea ta hondate ari embo Keriso amo nau Bada ra ena avoeto Judea ta ke pepeni simba ari embo na do eto David ta ahije ke eore?” Ainge enu embomeni na amita ke ingito tunga javotoho ea.



*Ke pepeni simba ari embopo ta ari avo kogue irivujo*

*(Matthew 23:1-36, Luke 20:45-47)*

<sup>38</sup> Eto Iesu na embomeni onde kati-tie ke einge ena, “Eto ungo Judea ta ke pepeni simba ari embopo ta ari avo kogue irivujo, eto enana amo bo jajavotoho kokoso avo aseto ‘market’ ari degi ta ururoro kito osa ue pekara eora. <sup>39</sup> Eto nei amo ke kasari bande ta toreto embo pepeni ta avo arumba ai ta arumbeora eto pondo iji te embomeni na kito otohu ara titi ta arumbeora. <sup>40</sup> Eto nei amo pamone doru ta donda avo sio umbuora eto embomeni amita pari amo jo na aera te toho hamo na pari kokoso kakoso eto sinenekeora. Avoeto God na enana ta hajire siriketo hana kiari ikau kesora.” Ke ainge Iesu na eto

*Pamone doru na hande javotoho ikena*

*(Luke 21:1-4)*

<sup>41</sup> Pambuto hande ikari gaga en-gitita arumbeto mitinu hajae vajae embomeni na koro pepeni papeni be umbuto puvuto ikitio Iesu kogue mitinu <sup>42</sup> pamone doru amita donda irae avoeto koro toea heriso avo umbuto puvuto jurukitinu <sup>43-44</sup> Iesu na kito amita ambotani jage enu puvuo ke einge ena. “Na ungota degi ke be erena. Pamone doru amina hande ere ikitia amo peni be ra hajae vajae embo na ere ikitera ainge mane ra. Eto enana ta donda isapamane avoeto tuna ikitore tuna mitia rate pamone amita hande amo tapa pe te ere ikitia avora.”

## 13

*Iji tutumota osaga neite neite kesora*

*(Matthew 24:1-2, Luke 21:5-6)*

<sup>1</sup> Eto Iesu na temple jo ta eto tambuta puvutuhunu amita ambotani vahai na ke einge ena, “Ate poekari embo, ki! Temple emo atara pepeni jajavotoho na gerikari ra,” ainge enu, <sup>2</sup> Iesu na ke mine einge ena “Bande erevi ungo na javotoho ere kogova te ungota degi erena, atara nei na atara nei ta hamo

ta mane tembeto iresuja te tapa arara eto beasuja,” ke ainge Iesu na hariketo,

*Memenga osaga kiari iji puvuresuja*

*(Matthew 24:3-14, Luke 21:7-19)*

<sup>3-4</sup> Pambuto tiri Olives ai ta bitito arumbeto Temple kogue mitinu Peter te James te John te Andrew te aingeto pambuto Iesu ta degi ke einge ea “Eto inena ke etea amita be amo iji deina puvouro eto hajire do kioro avo ejo ingore.” Ke ainge eo <sup>5</sup> Iesu na ke itiketo einge ena, “Embomeni ke sokova na hande aisora avo eto be kogue irivujo. <sup>6</sup> Eto embo neite neite na javo nau ta umbuto ke sokova ijie ‘Na ungota orekari embora’ ainge ijiroro embomeni na ke avo ingito ambo ambo aisora. <sup>7</sup> Eto ungo isoro ta duru hoi ta eto asa ta ingesova avo ungo oju avojo eto iji kombu puvurae amikote isoro avo einge aisora. <sup>8</sup> Enda nei na ereto enda nei ga isoro aisora eto ‘king’ nei na ereto ‘king’ nei taisuja. Eto enda nei nei ta titira te beuje te puvouro kesora amo memenga te osaga te kesora amita itikarira te ungo be kogue irivujo. <sup>9</sup> Eto embo na ungo andito umbuto council ta ingeni ta ikaro umbuto Judea ta ke kasari bande ta ungo ikaro hetavo pehumba ue tasora. Eto ungoni gavana ta eto king ta titi ta heteto ke nau hande avo ingesora <sup>10</sup> eto iji kombu puvurae kiti ta ke nau avo enda embo tapa ta hande aro ingesora.

<sup>11</sup> Te enana ungo andito umbuto pehumba aisora iji te amo ke do aisova avo hotembitie osaga mane kesova te Ahihi Otohu na ungota degi ke do ava aisuja avo pere evujo. <sup>12</sup> Eto namei na namei umbuto ikau embo na taro amburesuja eto mamona meni umbuto ikau taro amburesuja eto meni na ereto e mamona umbuto ikau taro amburesuja. <sup>13</sup> Eto ungo na javo nau ta pure ururovo embomeni na ungota degi tumo aisora te embo amuna na avoembo sovera ere uma amita sari

ari iji puvuresuja amo God na oreto umbasuja.

*Donda Sapura be Sapura amita ke (Matthew 24:15-28, Luke 21:20-24)*

<sup>14</sup> Eto peroveta Daniel na Donda Sapura be Sapura amita ke matu kadena avo umbuto puvuto Degi Otohu ta ikaro hetasuja (ke erevi etekari embo be ingijo). kito ungo Judea ei ta miteva embomeni joru tiri ta pambuvu <sup>15</sup> eto embo bande i ta mitia amo beto bande jo ta toreto donda mane siriketo umbasuja te teho pambasuja. <sup>16</sup> Eto embo pure ta mitia amina mane amita bo umbasuja te teho pambasuja. <sup>17</sup> Eto pamone urete te amite meni eha ingeto emi kajeuja amita degi aja to erena, enana ta degi osaga puvuresuja. <sup>18</sup> Eto ari erevi jajemo iji te mane puvuroja pari evujo. <sup>19</sup> Eto iji amikote osaga memenga kesora amo God na utu te enda te ena amikote ere puvutuhatiya puvija erevira amo osaga ainge amo kiae avoeto kesora te ambota aingeke amo mane kesora. <sup>20</sup> Eto Bada God na au iji avo tuho aisuja te ainge ae amo embo tapa na ambuto sasari aisora te God na embo amita toho avoembo au iji tuho aisuja.

<sup>21</sup> Eto iji amikote embo amuna ‘Kivu Keriso puvija erevira’ o nei ‘ungotenau hondate ari embo puvija’ ainge au ungo ke avo ke be ke avojo. <sup>22</sup> Eto keriso sokova na peroveta sokova na ereto ue ari te vasiri neite neite ururoro ke be ke ijie ambo ambo ururoro eto kito aro God ta embomeni te tapa asora. <sup>23</sup> Rate be kivujo ke erevi ae peko ta ungota degi erena.

*Embo ta Meni ta puvurari (Matthew 24:29-31, Luke 21:25-28)*

<sup>24</sup> Ungota memenga osaga kiari iji tutumota amo iji mume au hariga na usasa mane aisuja <sup>25</sup> eto utu ta sovera na jahevau kuro soheto beasora. <sup>26</sup> Eto Embo ta Meni avo Utu i ta eto sovera te usasa te tapa oje jo ta oje ga vahai beto hururou embomeni

na kesora. <sup>27</sup> Eto amina tohota embomeni matu siriketo umbari avo vahaita puvurora amita anera isapamane ikau utu tapa te enda tapa kaina, patina, ihane eto sose ta pambuto siriketo umbaro puvuresora.

*I junga ta ari hotembevu (Matthew 24:32-35, Luke 21:29-33)*

<sup>28</sup> Eto ungo i junga ta ari do euja avo ungo kito be hotembevu. Eto amita hatu ta tivine eto gigi vujekeuja amo amita be ari iji auveuja <sup>29</sup> ainge itoko ari erena amo tapa puvurou kesova amo Embo ta Meni puvurari iji auvetija ke ainge evujo. <sup>30</sup> Eto ungota degi ke be erena. Ungo mane sari aisova te ari emo puvurou kesova. <sup>31</sup> Eto Utu te enda te avo irae aisuja te ke nau avo mane irae aisuja

*Be kogue irivujo (Matthew 24:36-44)*

<sup>32</sup> Rate Embo ta Meni ta puvurari iji amo anera Utu ta iriora amo kiae eto God ta Meni na kiae rate God Mamo na vahai kiarira <sup>33</sup> avoeto ungo be kogue irivujo iji doite puvurou amo ungo kiaera. <sup>34</sup> Eto ari amo eingera, eto embo amina amita pure ari embo ta degi pure amita be iketo eto bande simba ari embo bande simba aja iketo enda nei ta pambasuja. <sup>35-37</sup> Eto pambuto ehako egerembeto puvurari iji amo turete rete tumba te rete ohora javone ijirou rete ihote rete avo eto ungo mane evesova te ungota degi eto embo tapa ta degi erena ‘Be kogue irivujo’.”

## 14

*Iesu umbuto tasora avo ke kasea (Matthew 26:1-5, Luke 22:1-2, John 11:45-53)*

<sup>1</sup> Eto Jarukari ta Pondo te bread sivo ikae pajirae amita pondo te puvurou iji heriso amita kiti ta Judea ta priests pepeni te ke pepeni simba ari embopo te aingeto Iesu naingeto kiae ondikari na umbuto tasora avo ke kasitie <sup>2</sup> einge ea, “Ungote pondo

iji te aisora amo embo na ereto ju-june aisora avoeto pondo irae au isimba ta aisora.” ainge ea.

*Da Bethany ai ta Iesu oil na kutena (Matthew 26:6-13, John 12:1-8)*

<sup>3</sup> Eto Iesu amo da Bethany ai embo Simon amo kini umbuna te matu kondari amita bande ta arumbeto indie mitinu pamone vahai amina oil mune te javo Nard bottle isapa ta avo umbuto puvuto teto pejeto Iesu ta siro ta kutena. <sup>4</sup> Eto oil amita koro amo pajire be avo eto embomeni na kito tumo ue ke einge ea, <sup>5</sup> “Pamone emina oil na ombuto koro tapa 900 kina umbuto donda ambu embo ta ikaetija avo aijaja ere ua” ainge ijie isembeo <sup>6</sup> Iesu na ke einge ena, “Aravora tovu, do eto amita degi tunga osaga ere ikiteve? Amina ari javotoho nau degi ta etija. <sup>7</sup> Eto donda ambu embopo na iji tapa ungo ga mitiroro ari javotoho aisova te na ungoga iji tuho iresona. <sup>8</sup> Eto na kovasora avoeto hamo nau nununga ana amita uje na amita degi nei do irae avoeto oil na ere kutitia. <sup>9</sup> Eto na ungota degi erena, God ta ke javotoho enda nei ta nei ta hande aisora amo pamone erevi hotembitie ari do etija emiga tapa hande aisora.” ainge Iesu na ena.

*Judas na Iesu harikasi sija ena (Matthew 26:14-16, Luke 22:3-6)*

<sup>10</sup> Eto Judas Iscariot amo ambotani 12 rate vahai amina pambuto priest pepeni ta degi Iesu umbara harikasuja ke enu <sup>11</sup> ingito tunga javotoho eto amita degi koro ikasi ke eo, Judas na pambuto Iesu isoro embo ta degi harikasuja avo sija ena.

*Iesu na amita ambotani ga pondo ena*

*(Matthew 26:17-25, Luke 22:7-14,21-23, John 13:21-30)*

<sup>12</sup> Eto bread sivo ikae pajirae amita pondo te Jarukari pondo te iji puvunu o sheep meni teto heveto pene gaga ta ikea iji amikote ambotani na puvuto Iesu ta degi ke einge ea. “Umo Jarukari pondo indesoa amo degi nainge nununga ara uje ere

oe?” ainge eo, <sup>13</sup> Iesu na ambotani umbuto ke einge ena, “Ungo embo heriso pambuto da jo ta embo vahai umo tigi jigito puvutuhourou tambuto embo avo ambo ambo ue pambuto <sup>14-15</sup> bande nainge torasuja ai ta amiga toreto bande mamona ta degi ke einge evujo, ‘Ate poekari embo na ambotani ga bande jo nainge toreto Jarukari pondo indoro?’ ainge avo embo amina bande jo peni vahai i ta gaga te avo arumba te tapa mitera ai Jarukari pondo evujo nununga are.” ainge enu, <sup>16</sup> ambotani heriso na da ta pambuto Iesu na donda do do ena avo inono ta kito Jarukari pondo nununga ea. <sup>17</sup> Eto mume sihukitinu Iesu na amita ambotani 12 ga pambuto <sup>18</sup> gaga ta arumbeto indie mitio Iesu na ke einge ena, “Na ke be erena, ungo namote tapa indie miteva embo vahai na na umbuto kitoho embo ta ingeni ta ikasuja” ainge Iesu na enu <sup>19</sup> ambotani na osaga kito embo vahai vahai na “namo rete?” embo nei na “namo rete?” ainge eo <sup>20</sup> Iesu na “Ungo ambotani 12 rate vahai na namote bread umbuto su heva jo ta kaimbeto ere india amina harikasuja. <sup>21</sup> Rate God ta ke ta kajari amo Embo ta Meni na amburesuja ainge ena avoeto amburesona te aja to erena, harikari embo avo e na ingae toaetija amo osaga memenga mane kiaetija.” Ke ainge Iesu na enu

*Bada ta pondo*

*(Matthew 26:26-30, Luke 22:14-20, 1 Corinthians 11:23-25)*

<sup>22</sup> Embomeni indie mitio Iesu na bread umbuto God ta degi pekitie ingeketo ambotani ta hande ue ke einge ena, “Hamo nau erevi umbuto indavu,” ainge <sup>23</sup> eto atungu umbuto God peketo ikenu indio <sup>24</sup> ke einge ena, “Emo orosa nau embo isapamane avoembo nomai kajari ta orosa overeketena. <sup>25</sup> Eto ungota degi ke be erena. Na esi be ta mu mane indesona te God ta titi jigari degi ta toreto esi mu eha indesona,” Iesu na ke ainge enu irae enu <sup>26</sup> haveni eto tiri Olives ta pambua.

*Peter na Iesu kiae ke aisuja avo Iesu na harikena*  
(Matthew 26:31-35, Luke 22:31-34, John 13:36-38)

<sup>27</sup> Eto tiri Olives ta mitio Iesu na ambotani ta degi ke einge ena, “God ta ke avo kajari einge mitia ‘Na o sheep simba ari embo tano amburou o sheep sio sao pambasora’ amita ke be amo na kogue me ururou sio sao pambasova <sup>28</sup> rate God na au vasiri te ereto Galilee pahurono ungo ambota pambasova,” ainge enu <sup>29</sup> Peter na ke einge ena, “Eto ambotani nei nei avo umo toto pambasora te na vahai avo umo mane toto pambasona,” ainge enu <sup>30</sup> Iesu na Peter ta degi ke einge ena. “Na no degi ta erena iho bujae mitirou mume orohuta inena na kiae ke tapa 3 ainge ijiro ohora javone heriso aisuja” ainge enu <sup>31</sup> Peter na ke vasiri te tapa einge ena, “Na umote tapa amburesona te nanena umo kiae ke ana erea!” Ainge Peter na ijinu ambotani tapa na Iesu mane egikasi ke ea.

*Iesu na degi javo Gethsemane ta pari ena*

(Matthew 26:36-46, Luke 22:39-46)

<sup>32</sup> Ainge eto enana na degi javo-toho dagogotambu javo Gethsemane ta pahue Iesu na ke einge ambotani ta degi ena. “Ungo ei arumbevu, na pari asina” ainge <sup>33</sup> eto Peter te James te John te aingeto umbuto pahue osaga peni vahai kogue <sup>34</sup> enana ta degi ke einge ena, “Jo nau ta osaga peni vahai mitia amina oi ambure arako ere ona avoeto ungo ei ta mitie na simba evujo,” <sup>35</sup> Ainge eto isapa imite enda ta beto sapura amita degi ere puvutuhua avo tiumbeto pambaja <sup>36</sup> Mamo ta degi pari einge ena, “Oio Mama, umo ari tapa amo inono avoeto atungu erevi mane indona ke ao ingito toane, eto uje nau avo irae rate uje no avo aisona.” Ainge Iesu na pari <sup>37</sup> eto ereto imite ambotani ere evia avo kito Peter ta degi ke einge ena. “Simon, umo iji isapa simba ari uje ae ue ere evete? <sup>38</sup> Ungo simba ue pari

evu. Eto ainge ae amo ungo Satan na engekasuja te ungota ahihi jo ta na aisi uje ere ua te hamo avo ivo ambu ere ua.” ainge eto <sup>39</sup> beto imite pari matu ena avo ehako pari <sup>40</sup> eto beto imite ambotani jenekahunketo ere evio ujena te ke mine ari inono ae kito <sup>41</sup> egerembeto pari ehako enu irae enu beto ambotani ta degi ke einge ena. “Ungo jangu indie ere evevete? Aravora inono eteva, te Embo ta Meni embo sasapura ta ingeni ta ikari iji puvija, <sup>42</sup> erevu! Na harika embo puvuto ere hua.” Ainge Iesu na ijinu

*Isoro embopo na Iesu andito jigito umbua*

(Matthew 26:47-56, Luke 22:47-53, John 18:3-12)

<sup>43</sup> Judas amo Iesu ta ambotani 12 rate vahai amite Judea ta priest pepeni te embo pepeni te ke pepeni simba ari embopo te aingeto embomeni ikeo asivo te kepata te umbuto Judas ga Iesu umbasi puvua. <sup>44</sup> Eto harikari embo amina “Na pambuto embo vahai andito mune aisona aravora umbuto pambuvujo” ainge matu ena <sup>45</sup> avoeto puvuto Iesu ta degi titi tambueto pambuto, “Ate poekari embo” ijie andito mune unu <sup>46</sup> isoro embopo na puvuto Iesu andito jigito uhoo <sup>47</sup> embo vahai na amita asivo kororo eto umbuto priest peni ta pure embo vahai amita onde jeto tiukenu <sup>48</sup> Iesu na enana ta degi ke einge ena “Na pegene embo mane rate asivo te kepata te jigito na umbasi ere puvutuhova <sup>49</sup> te na iji tapa temple jo ta embomeni ate poeketena amikote na umbaeteva ta God ta ke matu kajena avoeto ere ova,” ainge ijinu <sup>50</sup> ambotani na oju Iesu toto pahuo <sup>51</sup> meni singa vahai amina bo nei irae vahai amina pohuketo ambota pahunu <sup>52</sup> kito bo ta jigio bo houketo teho hamo na pere tutuveto pambuna.

*Iesu ikeo koto ta hetena*

(Matthew 26:57-68, Luke 22:54-55, 63-71, John 18:13-14, 19-24)



<sup>53</sup> Eto priests pepeni te embo pepeni te ke pepeni simba ari embopo te aingeto vahaita toruketo mitio isoro embopo na Iesu umbuto pambuto ikeo hetena.

<sup>54</sup> Eto Peter na ambota tunga te jateki ue pambuto priest peni ta ke kasari bande huga jo ta toreto bande simba ari embopo ga i eritie mitinu <sup>55</sup> priests pepeni te Judea embomeni ta council te aingeto bande jo ta Iesu ta sapura deire avo eto ingito taro amburoja ganoka eto ingia, <sup>56</sup> eto embo isapamane na ke hotembari nei te nei te sokova na eto Iesu ta sapura tambasi ea rate tambae ea. <sup>57</sup> Eto embo nei nei na ereto ke sokova na einge ea <sup>58</sup> “Embo emina ke einge eoi ingiora, ‘temple ingeni na gerikari avo nanena ano karaun eto beau iji 3 ehako embo ta ingeni na ae avo nane aisona’ ainge eoi ingiora” ainge ea <sup>59</sup> amo tunga hotembari vahai na ae ra. <sup>60</sup> Eto Priest peni na ereto embo ta orohuta heteto Iesu ta degi ke einge ena “Embo isapamane na umo ganoka ere ora emo ke mine aote?” ainge enu <sup>61</sup> Iesu ke mine ae enu ehako Priest peni na ke einge ena, “Umo God jakeka eora amita Meni Kerisorete?” ainge enu <sup>62</sup> Iesu na ke mine einge ena. “En, erea amo namora te ungo na Embo ta Meni God Sovera te amita ingeni be ta arumbeto Utu i ta oje ga puvurou kesova.” ainge enu <sup>63</sup> priest peni na ingito tumo ue amita bo jigito osesekitie <sup>64</sup> ke einge ena, “aravora embo emita pehumba ke irae etija rate ke sapura be eria amo God ta javo ere uhua avoeto ungo council te embomeni te ungota ke deire avo evujo,” ainge enu enana jo vahai eto taro amburoja ke ijie <sup>65</sup> embo nei nei na urumbitie hamo ta isuva ue tombu togeto ke einge ea “Peroveta, amuna umo ere toroi?” ainge ijie torue umbuto isoro embo ta ingeni ta ikeo umbuto ingeni na tea.

*Peter na Iesu kiae ke ena  
(Matthew 26:69-75, Luke 22:56-62,*

*John 18:15-18,25-27)*

<sup>66-67</sup> Eto Peter priest peni ta bande huga jo ta i eritie mitinu Priest peni ta pure ari kakara na Peter kito ke einge ena, “Umo Iesu, Nazareth embo amita toho ra” ainge enu <sup>68-69</sup> Peter na “Umo ke do erea amo na kiae ra,” Ke ainge eto pambuto huga degi pe ta heteto mitinu pure ari kakara amina ehako embomeni areto mitia amita degi, “Embo emo Iesu ta ambotani ra” ainge <sup>70</sup> enu Peter na ingito “ke amo ke be manera” ainge ena. Eto iji isapa mitimite embomeni na “Ke be ra umo Galilee embo avoeto ungo vahaira” ainge eo <sup>71</sup> Peter na ke einge ena “Ungo ke ereva embo amo na kiae te ke erena emo God ta titi ta erena ungo be ingivujo” Ke ainge ijinu <sup>72</sup> di o hora javone heriso enu Iesu na ke matu einge enu, “Umo na kiae ke ijiro di ohora javone iji heriso aisuja” ainge ena avo Peter na hotembeto osaga pajire be kito si ena.

## 15

*Iesu umbuto ikeo Pilate ta titi ta hetena*

*(Matthew 27:1-2,11-14, Luke 23:1-5, John 18:28-38)*

<sup>1</sup> Eto iho bujenu priests pepeni te embo pepeni te ke pepeni simba ari embopo te council embomeni te aingeto ke kaseo irae enu Iesu punduto umbuto pambuto Rome ta gavana Pilate ta ingeni ta ikeo hetenu <sup>2</sup> Pilate na Iesu ta degi ke einge ena, “Umo Judea embo ta king rete?” ainge enu Iesu na “Inena erea aravora” ainge enu <sup>3</sup> Priests pepeni na ke nei te nei te na Iesu ta degi pehumba eo <sup>4</sup> Gavana Pilate na ingito Iesu ta degi ke einge ena. “Eto embo isapamane na no degi ta ke neite neite erera amo ke mine aotemo mane ao?” Ainge enu <sup>5</sup> Iesu na ke mine ae unu Pilate na kito mana mana ena.

*Iesu amburoja ke ea  
(Matthew 27:15-26, Luke 23:13-25, John 18:39-19:16)*

<sup>6</sup> Eto pondo iji te amo tipura embo vahai avo embomeni na tambu ta pambaja uje uo Pilate na ingito ikenu tipura toto tambuta pambuna. <sup>7</sup> (-) <sup>8</sup> Eto pondo iji te amo Pilate na ainge pere ere uatija avoeto embomeni Pilate ta degi pambuto embo vahai tipura toto tambuta pambaja penunu ea.

<sup>9-10</sup> Eto embomeni na Iesu jakeka ere ijiaetera avo Priests pepeni na kito tumo eto Pilate ta ingeni ta ikea avo Pilate na kito embomeni ta degi ke einge ena, "Judea ta King erevi avo tambuta pambaja uje ere ovete?" ainge ena. (v 7) Rate tipura embo vahai javo Barabbas amo gavana ta degi isoro eto embo isapamane tenu ambuvujekea avoeto ikeo tipura eto mitiaetija <sup>11</sup> avo Priests pepeni na jo vahai eto eo embo tapa na tambuta pambaja ke eo, <sup>12</sup> Pilate na embomeni ta degi ke einge ena "Rate embo erevi ungota King ke eova amita degi do ano?" ainge enu <sup>13</sup> embo tapa jo vahai eto ke einge ea "I atahu ta tejo amburoi!" ainge eo <sup>14</sup> Pilate na "Amita sapura deire" ainge enu embo tapa na gagaha eto "I Atahu ta tejo amburoi" ainge eo <sup>15</sup> Pilate na embo ta uje ea avo ara Barnabbas tipura ta mitina avo enu tambuta puvuto pahunu Iesu avo esi na ejembeto torue I atahu ta tara Rome isoro embopo ta ingeni ta ikenu

*Iesu urumbea*  
(Matthew 27:27-31, John 19:2-3)

<sup>16</sup> Umbuto gavana ta bande peni ta toreto isoro embo tapa jage enu vahaita puvuo <sup>17</sup> bo pangari avo Iesu ta hamo ta umbuto asukea eto king ta siro puhu ke ijie esi pepe te avo horoveto uta ta asukea <sup>18</sup> eto tumo te pain ue "Oro, Judea embo ta King" ainge ijie urumbitie <sup>19</sup> patuna uhu na umbuto siro ta torue isuva ue paunge teteri eto tumo te pain ue urumbea. <sup>20</sup> Eto urumbeo irae enu bo pangari asukena avo houketo umbuto bo amita avo ikeo asukenu i atahu ta tasi umbuto pambua.

*Iesu i atahu ta tea*  
(Matthew 27:32-44, Luke 23:26-43, John 19:17-27)

<sup>21</sup> Eto umbuto degi ta pahuo enda Cyrene embo javo Simon amo Rufus te Alexander te ta Mamo avo amita pure ta eto puvutuhunu isoro embopo na kito "umo huma embo emita i atahu umbuto pambu" ainge eo Simon ke agi eto Iesu hondate eto umbuto pambuna.

<sup>22</sup> Eto Rome ta isoro embopo na Iesu umbuto pambuto degi javo Golgotha ta eora amita be amo 'embo ta uta popo' ai ta umbuto pambua.

<sup>23</sup> Eto Iesu ta degi wine te sivo javo myrrh te taveto ikea te Iesu na indari uje ae eto tona. <sup>24-25</sup> Eto iho 9:00 unu Iesu i atahu ta teto amita bo avo embo amuna umbau avo eto ituha koso te tuho te jigito siriketo bo umbua. <sup>26</sup> Eto embo ta sapura deire avo kiora kajari degi ai ta ke einge kajea JUDEA EMBO TA KING ainge kajea. <sup>27</sup> Eto pegene embo heriso amo nei ingeni be ta nei ingeni anga ta aingeto i atahu ta tea <sup>28</sup> eto ari ainge amo God ta ke ta matu ainge ara kajari avo eto ea "Amo ke pepeni poekari embopo amiga inono ra" ke ainge mitia. <sup>29-30</sup> Eto embomeni puvuto Iesu kogue mani mani ue ke einge ijie urumbea. "Umo temple aimbeto iji 3 amita jo ta gerikasi ijea avoeto umu eonga eto kito i atahu toto beto pambu." <sup>31</sup> Eto priests pepeni te ke pepeni simba ari embopo te aingeto Iesu urumbitie ke ehako einge ea "Embo nei avo hondate uija te umu oenga hondate ari inono ae ra. <sup>32</sup> Eto umu Keriso be eto Israel ta King kito avo i atahu toto beao dago umu kito ke be aisora." Ainge ijio pegene embopo heriso Iesu ga i atahu ta tea amite tapa Iesu urumbea.

*Iesu ambuna*  
(Matthew 27:45-56, Luke 23:44-49, John 19:28-30)

<sup>33</sup> Eto iji 12 eto pambuto ture iji 3 ainge amita orohuta enda tapa mume sihukitinu ture 3 ainge <sup>34</sup> Iesu

na gagaha eto einge ena “Eloi, Eloi lama sabachthani” ke emita be amo “God Nau, God nau, do eto na to-toe?” ainge ijinu <sup>35</sup> embomeni mitia amina ingito ke einge ea “Ingavu, Elijah jage eria.” ainge eo <sup>36</sup> embo vahai na tutuveto pambuto soi umbuto patuna uhu tumo ta egeto ‘wine’ ta jauketo umbuto puvuto Iesu na indoja ikitie ke einge ena, “Aravora Elijah jage eria avo puvuto umbuto ikau beaute avo kesira,” ainge enu <sup>37</sup> Iesu na ehako jajage ijie amita hen jamo ena. <sup>38</sup> Eto Iesu ahunu temple jo ta bo peni vahai be i ta eto beto enda ta eto degi peikari amo eonga i ta eto sorereketo beto enda ta ena. <sup>39</sup> Eto Rome ta isoro embo peni amina Iesu kogue mitinu Iesu ta hoenge irae enu kito ke einge ena, “Ke be embo emo God ta Meni be ra” ainge ena. <sup>40</sup> Eto pamone javo Salome te da Magdala pamone javo Mary te eto singa James te Joses ta e Mary te aingeto pamone nei nei ga hoi ta heteto Iesu kogue mitia <sup>41</sup> pamone amo Galilee ta Iesu ambo ambo ue Iesu ta indari ikitiore indi-aetija pamone amite pamone nei nei te aingeto Iesu ga da Jerusalem ta puvua.

*Iesu ta hamo kovea*  
(*Matthew 27:57-61, Luke 23:50-56, John 19:38-42*)

<sup>42</sup> Eto evito amo jangu indari iji avoeto indari nununga uo mume si-hukitinu <sup>43</sup> da Arimathea embo javo Joseph amo council ta embo peni rate God ta iji puvuru God na titi jigesuja avo simba ere uatija amina oju ae sovera eto pambuto Pilate ta degi Iesu ta hamo umbuto kovasi penunu enu, <sup>44</sup> Pilate na Iesu matu amburari ke enu ingito tututu eto be kesi isoro embo peni avo jage enu puvunu “Iesu ambeite” ainge enu <sup>45</sup> “matu ambija” ainge enu ingito Joseph na Iesu ta hamo umbaja ke enu <sup>46</sup> Joseph na bo parara koso avo koro na ombuto umbuto puvuto i atahu ta umbuto ikenu benu hamo bo na togeto umbuto pambuto use

atara to ta kovari ai ikenu serekenu atara nei na aherekenu puvuto use pe peikenu <sup>47</sup> da Magdala pamone javo Mary te pamone Mary nei amo Joses ta e amite na Iesu degi nainge kovea avo kia.

## 16

*Iesu vasiri te erena*  
(*Matthew 28:1-8, Luke 24:1-12, John 20:1-10*)

<sup>1-2</sup> Eto jangu indari iji irae enu da Magdala pamone javo Mary te eto James ta e Mary te pamone Salome te aingeto jeune mune te koro na ombuto umbuto Iesu ta hamo ta kutas Sunday iho vujenu ihote Iesu ta use ta pahue <sup>3</sup> ke mine ara ijie einge ea, “Use pe ta atara peni vahai ra mo amuna hirikaro ungotena jo ta toraro?” ainge ijie <sup>4</sup> puvuto hange ambu eto atara use pe ahurekari avo hirikari mitinu kito <sup>5</sup> use jo ta toreto meni singa bo parara koso asukari ingeni be hena ta arumbeto mitinu kito mana mana uo, <sup>6</sup> singa amina ke einge ena. “Ungo joru avojo, Iesu Nazareth embo i atahu ta torara amo vasiri te ereto pambija. Kivu, amita ikari serekari besi teho erevira! <sup>7</sup> te ke matu Iesu na etei ingera avoeto Galilee ta ere pahua ungo pambuto Peter te amita ambotani te evujo ingito Galilee pambuto Iesu tambare.” <sup>8</sup> Ke ainge enu joru ue tata tita ue tutuveto use toto pambua. Eto joru ue embomeni ta degi ke hande ae teho pambua.

*Pamone Mary Magdalene na Iesu tambuna*  
(*Matthew 28:9-10, John 20:11-18*)

<sup>9</sup> Eto Sunday iho bujenu Iesu vasiri te ereto pahunu da Magdala pamone javo Mary amo ohiji sasapura tapa <sup>7</sup> ainge na jo ta torari avo Iesu na matu enu kondena <sup>10-11</sup> amina Iesu pambunu kito pamone amina pambuto ambotani sisiasa ijie mitio ke einge ena, “Iesu matu vasiri te eretei kena,” ainge enu ambotani na pamone amita ke avo ingito ke be ae ea.

*Ambotani na Iesu kia  
(Luke 24:13-35)*

<sup>12</sup> Eto iji nei ambotani heriso na degi ta isa uo Iesu puvunu amita tombu hajire nei kito <sup>13</sup> pambuto ambotani nei uhoho ta degi eo ingito ke be ae ea.

*Iesu na ambotani 11 ta degi puvuna*

*(Matthew 28:16-20, Luke 24:36-49, John 20:19-23, Acts 1:6-8)*

<sup>14</sup> Eto iji nei ambotani 11 na arumbeto indie mitio Iesu puvuto ambotani isembena amita be amo Iesu vasiri te erena avo embo nei na kito ea te enana na jo ngahia ue Iesu ke be ae ea. <sup>15</sup> Eto Iesu na ke einge ena, “Ungo enda tapa ta pambuto embo tapa ta degi God ta ke hande evujo ingore. <sup>16</sup> Eto embo amuna God ta ke avo ke be eto bapataito aisuja amo God na oreketo umbasuja, rate embo amuna God ke be ae aisuja amo toavo pambuto osaga kesuja. <sup>17</sup> Eto ke be ari embomeni na hajire einge aro kesora, javo nau ta ahihi sasapura kurumbasora, eto ke ehaha nei te aisora <sup>18</sup> eto o koso o javo juhiri ainge amo ingeni na umbasora eto indahu donda indito mane amburesora eto ambure embomeni ta hamo ta ingeni tembaro kondasora”

*Iesu Utu ta bitina  
(Luke 24:50-53, Acts 1:9-11)*

<sup>19</sup> Eto ke ainge tapa enu irae enu God na Bada Iesu umbuto Utu ta pambuto ikenu Mamo ta ingeni be ta arumbena. <sup>20</sup> Eto ambotani na enda tapa ta pambuto ke hande uo Bada na enana hondate unu hajire neite neite uo embomeni na kito ke be ea.



## LUKE OTOHU TA EVANERIA

<sup>1-2</sup> Oio nau embo okose, Theophilus, eto Iesu kiari embopo eto ke agi embopo na tapa do uoi ere koguatera eto ere ingihatera avo hihi tiritiore embo nei nei na ingihe etokito kakajekeaora eto ate poekeaora. <sup>3</sup> Avoeto nanena eha rate itikena ai ta eto puvuto eha oroho ei ta ari do uija eto ke do ijija avo tapa siriketene tambu etei no degi ta ere kaitona. <sup>4</sup> Avoeto matu ate poekitie ari ingari avo ei ta eteketo tumota ari haite kito ke be aisoa.

*John bapataito embo avo e na ehara ta ingena amita ke*

<sup>5</sup> Eto enda Judea ta King Herod ta iji te priest vahai javo Zechariah amo Abijah ta javo ta priest pure ere uatija amite amita ae javo Elizabeth amo priest matu javo Aaron ta ahijera, amina <sup>6</sup> Bada God ta ke pepeni te ari te tapa agi ere uatera avoeto God ta titi ta ae te ivu te jajavotohora <sup>7</sup> te enana meni ingae mitiaetera kerembo ari iji auvena.

<sup>8-9</sup> Eto priest ta ari avo Zechariah ta priest pure ari embopo ta pure iji puvunu amuna priest pure aisuja avo ituha tuho te koso te jigio Zechariah na tuho kororo eto umbuto Bada ta temple ta toreto i pangire mune te avo pene gaga ta iketo undukenu evikitie iposi God ta degi bitina. <sup>10</sup> Eto iposi bitari iji te Zechariah temple jo ta pure ue mitinu embomeni isapamane araha ta toruketo pari ue mitio <sup>11</sup> Bada ta anera na pene gaga ingeni be hena ta irerembeto mitinu <sup>12</sup> Zechariah na kito tututu ue joru unu <sup>13</sup> anera na amita degi ke einge ena. “Zechariah, joru aojo. No pari eoa avo God na ingito au no ae Elizabeth na meni ingau meni amita javo John ikejo. <sup>14</sup> Eto meni ingasuja avoeto ungo te embomeni tapa te tunga javotoho ue osa aisova. <sup>15</sup> Amita be amo amina Bada ta titi

ta embo nombo aisuja eto ‘wine’ te ‘gin’ te umo ainge amo mane indesuja te e ta oti ta eto Ahihi Otohu na jo enetasuja. <sup>16</sup> Eto amina au Israel ta meniundi na jo ahereketo enana ta Bada God ta degi egerembasora. <sup>17</sup> Eto peroveta Elijah avo Ahihi Otohu na sovera ikena ainge nombo amita degi sovera ikau Bada ta titi ta pure ue embo amuna Bada ta toho aisora avo siriketo nununga ururou mamone na ehako meniundi osa aisora eto God ta ke agi ae embomeni na embo jajavotoho ta kiari avo uje aisora.” ainge anera na enu, <sup>18</sup> Zechariah na amita degi ke einge ena, “Namo te nau ae te nango kerembo ere ora avoeto ke erea avo ke be rete amo naingeto kione?” <sup>19</sup> ainge enu, Anera na ke mine einge ena, “Na Gabriel God ta titi ta heteto iriona avo no degi ta duru javotoho erevi ana iketei puvuna. <sup>20</sup> Avoeto ke nau ingijo, umo ke nau ingito ke be ae etea avo eto pe no vahaikano ke ambu eto ere uma ke erena avo puvurou kito ke ehako aisoa.” <sup>21</sup> ainge anera na ijinu ingihe mitinu embomeni araha ta simba mitia amina Zechariah do ue iji koso ena avo hotembea. <sup>22</sup> Eto Zechariah araha ta puvuto ke ari inono ae enu ingeni na ate ate enu embo kito einge hotembea ‘temple jo ta eture ainge kito puvuto ere ua’ ainge hotembea. <sup>23</sup> Eto amita pure unu iji irae enu tohota da ta pambuna.

<sup>24-25</sup> Eto amita ambota ae Elizabeth na urete eto ke einge ena, “Na meni ingae mitie amo embo na koguore me kiona te God na na kito etei nau me irae etija,” ke ainge eto hariga 5 amita jo ta amo bande jo ta pere mitiaetija.

*Anera Gabriel na Mary ta degi ke ikena*

<sup>26</sup> Eto Elizabeth urete ena amo hariga 6 irae enu anera Gabriel avo God na ikenu beto enda Galilee ta da vahai Nazareth ai ta pambuto <sup>27</sup> kakara vahai javo Mary avo King

David ta ahije vahai Joseph na jim-baja e mamō na kerea rate jimbae mitinu anera amita degi <sup>28</sup> puvuto ke einge ena, “Oro, God ta osari kakara, Bada umo te iriuja,” ainge enu <sup>29</sup> Mary na ingito pekari amita be amo deire avo osaga te tapa hotembu hotembu unu <sup>30</sup> Anera na amita degi ke einge ena, “Mary, umo joru aojo. God na umo osa ereua <sup>31</sup> Eto ki, inena urete eto meni ingeto amita javo Iesu ikasoa <sup>32</sup> eto amina pajito embo peni au God i be i ta amita Meni ra ainge aisora. Eto Bada God na au amina amita epe David ta honda eto <sup>33</sup> heteto Jacob ta teka hoka simba aisuja. Eto amita titi jigari amo mane irae aisuja rate dato-ho ta iresuja,” ainge enu <sup>34</sup> Mary na anera ta degi ke einge ena, “Ari ainge amo naingeto ano, na ivu jimbaera,” ainge enu <sup>35</sup> Anera na einge ena, “Ahihi Otohu na no degi ta beau God ta sovera isapamane na umo utumo aisuja, avoeto meni ingasoa amo God ta Meni Otohu ke aisora. <sup>36</sup> Eto kijo, no jao vahai Elizabeth, amo meni ingari inono ae ainge embomeni na eora te eha kerembo ue meni ingetija amo hariga 6 irae ereua <sup>37</sup> amita be amo God ta degi ari tapa amo inonora,” ainge enu <sup>38</sup> Mary na ke einge ena, “Aravora, na Bada ta pure ari kakara avoeto ke do erea avo God na ikau puvurou kesona,” ainge enu anera toto pambuna.

#### *Mary na Elizabeth kesi pambuna*

<sup>39</sup> Eto iji amite Mary na ereto enda Judah ta tiri ta da vahai ai sau be pambuto <sup>40</sup> embo Zechariah ta bande ta toreto amita ae Elizabeth pekenu <sup>41</sup> ingito meni jo ta kundu kandu unu Elizabeth avo Ahihi Otohu na jo enetitinu <sup>42</sup> ke isara na einge ena, “Pamone isapamane rate God na umo vahai avo osa ere ua te no oti ta be amite tapa. <sup>43</sup> Umo nau Bada ta aja aisoa avoeto na kesi puvea avoeto mana mana ue tunga javotoho ere ona. <sup>44</sup> Eto na no pekari avo nau onde ta puvei ingihone meni nau oti ta tunga javotoho

ue kundu kandu etija. <sup>45</sup> Eto Bada na no degi ta ke do etei ingea avo puvuroja tumota ereoa avoeto tunga javotoho ereoa,” ainge Elizabeth na enu,

#### *Mary ta haveni*

<sup>46</sup> Mary na ke einge ena, “Na jo nau tapa na Bada jakeka erena <sup>47</sup> Eto God nau orekari embo avoeto ahihi nau tunga javotoho ereua. <sup>48</sup> Amita be amo amita meni kakara amina meni isapa sira eto pure euja avo kito au embo te pamone tapa be tapa puvuresora amina na hotembeto jakeka aisora. <sup>49</sup> Amo God sovera isapamane te na ari nombo be nau degi ta etija avoeto amita javo otohu aisora. <sup>50</sup> Eto meni matu ingerekari amite eto puvuto eha ingerekitora amite tapa amuna God oju eora avo God na kogue jo uoi hondate euja <sup>51</sup> Eto na embo peni ra ijie jo ta hotembeora embomeni avo God na amita ingeni sovera te amina teoi pojembeto pambuora. <sup>52</sup> Eto titi jigari embo pepeni avo God na eoi enana ta titi jigari avo tore embo teho avo umbuto ikeoi titi jigiora <sup>53</sup> Eto indari irae embopo avo un-duoi indari javotoho na indiore oti pevitiuja te haja baja embomeni avo ikeoi indari indae teho pambuora. <sup>54-55</sup> Eto God na Abraham te amita meniundi te ungotenau mamamane tapa ta degi ke ena avo hotembeto amita jo ari jenambu ae ue amita Israel pure ari meniundi matuainge hondate uija.” <sup>56</sup> Eto ke ainge Mary na enu irae enu Elizabeth ta bande ta hariga 3 amita jo ta mitimite tohota da ta pambuna.

#### *John bapataito ari embo avo e na ingena*

<sup>57</sup> Eto Elizabeth ta meni ingari iji puvunu meni singa ingena. <sup>58</sup> Eto Bada na Elizabeth meni ingae mitioi ere koguaetija avo jo enu meni ikenu ingeto osa unu amita da vahai embomeni te tapa osa ea. <sup>59</sup> Eto Elizabeth meni ingenu iji 8 irae unu Judea embopo ta ari ainge avoeto

meni ta bi hoga tiukasi puvuto ue meni ta javo mamu Zechariah saso asi uje ea te <sup>60</sup> e na, “Meni ta javo John ikasora,” ainge enu <sup>61</sup> Enana ke einge ea, “Rate ungota ohihi ta javo John amo iraera,” <sup>62</sup> ainge eto mamu Zechariah na javo do ikaja ingeni na ate ate eo paper ikara ate ate enu <sup>63</sup> ikeo ke einge kajena, “Meni emita javo John ra,” ainge ijie kajenu <sup>64</sup> embomeni kito mana mana uo Zechariah itiketo pe handeketo ke ijie God jakeka ena. <sup>65</sup> Eto da embomeni tapa na ari avo kito mana mana eto amita ke enda Judea ta da tapa tiri hena ta tirio <sup>66</sup> ingito tunga javotoho ue meni avoeto Bada na amita ingeni na John hondate unu pajina kito, “Pure pajire do aisuja,” avo hotembea.

#### *Zechariah na ari do puvuresuja avo harikena*

<sup>67</sup> Eto be John amita mamu Zechariah avo Ahihi Otohu na jo enetenu ari do puvuresuja avo ke einge harikena.

<sup>68</sup> (v 68a) “Israel ta Bada God amo javotohora. <sup>69</sup> (-) (v 71) Eto amina ungotena uje ae ue kitoho ari embomeni ta ingeni ta eto orekasi <sup>70</sup> ke amita peroveta ototohu mamatu ta degi enu ingito hande ere uatera. (v 68b) Avoeto amita embomeni hondate asi puvuto (v 69) Amita pure ari meni David ta jeka hoka vahai avo amina au ereto sovera te na ungotena orekasuja. <sup>71</sup> (-) <sup>72</sup> Eto ainge amo nomai kaeto ke otohu ena avo jeneambu ae ue ungotenau ohihi hotembitie hondate ere ua.

<sup>73-75</sup> Eto nomai kaitie ungotenau mama Abraham ta degi ke ena amo ungotena God ta degi otohu ta mitie joru ae ue jo javotoho ari na iji tapa matuainge God jakeka ara ungotenau kitoho embo ta ingeni ta eto orekasuja. <sup>76</sup> Eto meni nau, umo God i be i ta amita peroveta ke ijiro Bada ta puvurari degi sirikitie ke ijiro embomeni avo <sup>77</sup> Bada God ta jo ari na naingeto ari sasapura toasi harikaro ingito hotembeto toau

amita embomeni be aisora. <sup>78-79</sup> Eto God ta irari degi ta eto iho bujitiro amburari joru ue mume ta iriora embomeni amita degi usasa au peka ta pambari degi avo kogue pambasora.” ainge Zecharia na ena.

<sup>80</sup> Eto be John avo papajitinu amita ahihi sovera ari puvutuhunu oja-gatambu ta pambuto mitimite enda Israel embomeni ta degi ke itiketo hande ena.

## 2

#### *Iesu avo Mary na ingena (Matthew 1:18-25)*

<sup>1</sup> Eto John meni isapa ta irari iji te embo peni Caesar Augustus na enda embo tapa census ue javo umbasi ke ikenu pambuna. <sup>2</sup> Eto census umbae peko ta enda Syria ta gavana Querinius hetari iji te census aravo itiketo ea. <sup>3</sup> avoeto embo tapa na pambuto tohota ohihi ta da be ai ta javo kajara ke ena.

<sup>4</sup> Eto embo Joseph amo King David matu mitiaetija amita ahije vahai avoeto da Nazareth enda Galilee jo ai ta mitimite toto David ta da Bethlehem Judea enda ai ta pambasi ue <sup>5</sup> Mary amo amita matu kerari avoeto umbuto pambau census ta javo vahaita kajara umbuto pambuna. <sup>6</sup> Eto Mary amo matu urete ari avoeto da Bethlehem ai pahunu meni ingari iji puvunu <sup>7</sup> Amita kiti ta meni singa ingeto bo na togeto o ta indari ikari besi ai ta jurukenu evina, (bande tapa amo embo na enetari avoeto)

#### *Anera na o ‘sheep’ simba ari embopo ta degi puvua*

<sup>8</sup> Eto enda ai ta o ‘sheep’ simba ari embopo na ehe tambuta o ‘sheep’ simba ere uatera amita degi <sup>9</sup> Bada ta anera na sariketo puvunu Bada ta usasa peni vahai na puvuto daha daha ue joekenu enana tututu ue joru uo <sup>10</sup> Bada ta anera na enana ta degi ke einge ena, “Joru mane aisova te kivujo, tunga javotoho ari isapamane embo tapa ta degi puvuto

ere hua amita duru avo umbuto ere putuhona. <sup>11</sup> Amo Bada Keriso ungotā orekari embo avo eha David ta da ai ta ungo avoembo e na eha ingetija. <sup>12</sup> Ungo amita hajire kesova amo meni avo bo na togeto o ta indari ikari besi ai iketere mitia,” <sup>13</sup> Eto ke ainge enu Utu ta anera isapamane amina sasariketo puvuto God jakeka ijie haveni einge ea, <sup>14</sup> “God i ta amita degi osa jakeka erera eto enda ei ta God osari embomeni ta degi peka iroi,” <sup>15</sup> ainge eto irae eto utu i ta pahuo o simba ari embopo na ke mine ara einge ea, “Bada na ke iketei puvuto etere ingera avo ungotē da Bethlehem ta pambuto kesora,” <sup>16</sup> ainge eto ereto sausau pambuto meni o ta indari ikari besi ai ta jurukeo sereketo mitina amite Mary te Joseph te ainge tambuto <sup>17</sup> kito meni amita ke anera na enu ingia tapa avo hande eo <sup>18</sup> embomeni na o simba ari embopo ta ke ingito mana mana ea. <sup>19</sup> Rate o simba ari embopo na ke ea tapa avo Mary na ingito amita jo ta hotembari isapamane ena.

<sup>20</sup> Eto o simba ari embopo na pambuto anera na do ea tapa avo ainge inono ta kia avoeto God osa jakeka ue egerembeto pambua.

### *Iesu ta javo ikea*

<sup>21</sup> Eto meni ingenu iji 8 irae enu Judea ta ke pepeni avoeto bi hoga tiukea. Eto Mary urete ae mitinu anera na javo Iesu ikara ke ena avoeto meni ta javo Iesu ikea.

### *Meni Iesu umbuto Temple jo ta pene ikea*

<sup>22</sup> Eto meni umbuto doru eto mitina amita iji irae aja Moses ta ke pepeni avo agi eto da Jerusalem ta pambuto God ta degi hande pene gaga ta ikitie Iesu Bada God ta toho aja hande ikasi umbuto pambua. <sup>23</sup> (Amita be amo God ta ke pepeni ke kajari ai ta ke einge mitia, ‘Pamone na meni singa bugo ingasuja amo God ta ke agi ue otohu aja <sup>24</sup> di dipo heriso ikarotemo di dirogu

meni heriso ikaro’ avo Bada God ta ke pepeni avo agi eto Iesu umbuto pambua.) <sup>25</sup> Eto embo vahai javo Simeon da Jerusalem ta mitiaetija amo embo javotoho eto God ta ke agi ari embo amina God na Israel embomeni hondate aisuja iji avo simba ere uatija eto Ahihi Otohu na amita jo enetitiaetija <sup>26</sup> Avoeto amo mane amburesuja te kiti Bada God ta hondate ari Meni Keriso avo kito amburesuja avo Ahihi Otohu na harikenu ingina. <sup>27</sup> Eto Simeon na Ahihi Otohu ta ke agi eto temple jo ta torenu Mary te Joseph te na ke pepeni agi ue meni Iesu God ta toho aja umbuto toreo <sup>28</sup> Simeon na kito meni umbuto minduketo God jakeka ijie ke einge ena, <sup>29-32</sup> “Bada God, inena embomeni no siriketo umbasi embo tapa ta titi ta ereoa avo titi nau na ere kogona amo enda nei embomeni na God ta usasa kesora eto embo tapa na Israel jakeka aisora, avoeto no ke etei ingihana avo ejo no pure ari embo peka ta pambai,” ke ainge Simeon <sup>33</sup> na Iesu avoembo ijinu amita e te mamote ingito mana mana eo <sup>34</sup> Simeon na e te mamote javotoho ari iketo e Mary ta degi ke einge ena, “Kijo, God na au meni eremina Israel embo nei bitesuja nei beasuja. Eto meni emo God ta hajire avoeto embo isapamane na kito urumbasora. <sup>35</sup> Eto meni amina au embo ta hotembari jo ta ondikari avo arahata puvurou kesora. Eto jo no ta memenga osaga isapamane kesoa,” ainge Simeon na ena.

<sup>36</sup> Eto pamone peroveta vahai javo Anna amo embo Phanuel ta iae eto amita ohihi javo amo Asher ra amo kakara ta embo jimbutu jua 7 ainge ena rate amita ivu ambunu <sup>37</sup> doru eto mitie amita jua tapa 84 avo uhunu kerembo ena. Eto temple jo toto araha ta pambae asa jo ta mitie indari ajireketo God jakeka ijie ijite mumete pari ue mitiaetija. <sup>38</sup> Eto Meni Iesu umbuto temple jo ta puvua iji amikote pamone Anna na puvuto meni avo kito God jakeka eto da Jerusalem avo God na oreto um-



basuja iji simba ere uatera embopo amita degi Iesu ingari ta duru avo hande ena.

### *Da Nazareth ta egerembeto pambua*

<sup>39</sup> Eto Mary te Joseph te Bada God ta ke pepeni agi ue temple jo ta tapa eo irae enu tohota da Nazareth enda Galilee jo ai pambua. <sup>40</sup> Eto Meni Iesu aravo pajito sovera ari te kiari te umbunu God na kito osa ue javotoho ari ere ikitiaetija.

### *Meni Iesu na temple jo ta ate poekena*

<sup>41</sup> Eto jarukari ta pondo iji puvutuhui Iesu ta e te mamote jua matuainge da Jerusalem ta pahuaetera. <sup>42</sup> Eto Iesu ingea avo jua 12 uhunu enana ta ari ainge avoeto pambae peko ta <sup>43</sup> pambuto pondo eo irae enu egerembeto puvutuhue meni singa Iesu amo asata mitinu e te mamote na hotembae toto ere puvutuhumite <sup>44</sup> embo isapamane ere puvutuhora avoeto embo ga puvurari ke ijie toto pahuo iji irae enu Iesu kiae eto amita toho uho nei amiga irari ke ijie jombure ea rate <sup>45</sup> tambae eto egerembeto Jerusalem ta pambuto jombure ea. <sup>46</sup> Eto jombure uo iji 3 irae enu Iesu temple jo ta ate poekari embo ga arumbeto mitie ke ijio ingihe ke mine ara ijie mitio tambua <sup>47</sup> Eto embomeni na meni amita kiari te ke mine ari te avo kogue ingihe mana mana eto uje peni vahai ea. <sup>48</sup> Eto amita e te mamote na kito mana mana ue e Mary na ke einge ena, "Nau meni, umo do eto nangota degi osaga ikete? Namote no mama te na umo hotembu hotembu ue iji koso umo jombure etera." ainge enu, <sup>49</sup> amina ke mine einge ena, "Ungo do eto na degi nei nei ta jombure eteve? Na degi neita iraerate nau Mama ta bande ta mitena avo ungo kiae ue jombure eteve?" ainge enu <sup>50</sup> ingito amita be avo deire avo hotembae ea.

<sup>51</sup> Eto amina enana ga pambuto da Nazareth ai mitie e ta mamote ke tapa agi ena rate amita e na amita

ari tapa avo jo ta ere hotembitiaetija <sup>52</sup> Eto Iesu pajito kiari javotoho umbunu God te embo te na kito osa ea.

## 3

### *John Bapataito ari embo na onde katena*

(Matthew 3:1-12, Mark 1:1-8, John 1:19-28)

<sup>1-2</sup> Eto Caesar javo Tiberius na heteto jua tapa 15 ainge simba unu God ta ke avo Zachariah ta meni John ta degi ojaga tambu ta puvuna. Eto iji amikote Pontius Pilate amo enda Judea ta gavana ra, Herod amo enda Galilee ta embo peni ra, eto Herod ta namei Philip amo enda Iturea eto enda Trachonitis te amita embo peni ra, eto Lysanias amo enda Abilene ta embo peni ra eto Judea ta priests pepeni amo Annas te Caiaphas te ra ainge eto John ta pure itikari iji te embo einge emina titi ere jigihatera. <sup>3</sup> Eto John na umo Jordan engitita da tapa avo tehue embo na tunga ahereketo ari sasapura toari ta bapataito avo ara onde ere katitiaetija <sup>4</sup> Eto ainge ere uatija amo Peroveta Isaiah na matu kiti ta einge kajena, "Embo na ojagatambu ta jage eto einge eria, 'Bada ta puvurari degi siriketo evu tambu ai. <sup>5</sup> Hotono tapa konerekasuja tiri te heti te tapa beto bisi bisi aisuja. Degi joro joro ari avo tambu aisuja eto hotoko patoko ari degi amo bisi bisi aisuja. Eto God na embo tapa oreketo umbasuja <sup>6</sup> avo embo tapa na kesora.'" ainge Isaiah na kajena. <sup>7</sup> Eto embomeni isapamane John ta degi bapataito aja puvuo, John na kito ke einge ena, "Ungo o koso o ta meniundi ra. Ungo ta degi embo amuna memenga osaga puvuresuja avo tiumbeto pambava etei puvevete? <sup>8</sup> Ungo tunga ahereketo iresi uje ere ova avoeto i be kiari javotoho kiova ainge nombo ungo vasiri javotoho evujo. Eto ke erena avo ingito 'Abraham amo nangota mama ra avoeto nango inonora,' ainge avojo, ungota degi erena be ingivujo. Eto God na au atara erevi

sariketo Abraham ta meniundi asora amo inonora. <sup>9</sup> Eto hogoro i susu ta iketei mitia eto i be javotoho ae kito jeto gosukau evekasuja.” ainge enu, <sup>10</sup> embomeni tapa na ke einge eto ingia, “Eto God na nango ari javotoho do ara uje ere oi?” ainge eo <sup>11</sup> John na ke mine einge ena, “Eto asukari heriso kito embo asukari irae amita degi vahai ikasoa eto indari indie kito indari irae embo ta degi ikasoa.” ke ainge ena. <sup>12</sup> Eto ‘tax’ umbari embopo na puvuto bapataito aja ue einge eto ingia, “Ate poekari embo, nango God na do ara uje ere oi?” eo <sup>13</sup> John na einge ena, “Eto ungo ‘tax’ koro umbava matu teka ari ai ta inono ta avo pere umbasova rate nei hamo ta mane umbasova,” ainge ena. <sup>14</sup> Eto isoro embopo na puvuto einge eto ingia, “Eto nangomo do aro?” ainge eo amina “Embo ta degi jujune ue ke sokova ijie embo ta koro mane pegene aisova te ungota pure ta mine avo inonora ijie irivujo,” ainge ena.

<sup>15</sup> Eto embomeni na John ta ke ingihe iji peni puvurari ke ijie enana ta jo ta einge hotembea, “John emo Judea embo ta hondate ari embo Keriso puvija erevi rete,” ainge eo <sup>16</sup> John na ke mine einge ena, “Eto na ungo umo na bapataito ere ona te embo nau ambota puvuresuja amo nombo be sovera te rate na sovera ambura. Na amita utu goru bujekari haite manera. Embo amina ungo Ahihi Otohu te i bevete te na bapataito aisuja. <sup>17</sup> Eto javotoho davore sapura davore sirikasi nununga ere ua. Javotoho avo siriketo amita harau ta ikasuja eto sapura siriketo i ta ikau evekasuja i amita seikari amo irae ra,” ainge eto <sup>18</sup> ke neite neite amina embomeni onde katitie God ta duru javotoho hande ena.

<sup>19</sup> Eto titijigari embo peni javo Herod amo ari sasapura neite neite ari embo amina namei ta ae pegene eto umbunu John na kito isembena <sup>20</sup> Eto ari sapura nei Herod na eto John umbuto tipura ta ikena.

### *Iesu bapataito ena*

*(Matthew 3:13-17, Mark 1:9-11)*

<sup>21</sup> Eto John na embomeni bapataito eto irae eto Iesu bapataito enu pari ue mitinu Utu pe hirikenu <sup>22</sup> Ahihi Otohu di dipo ainge eto beto Iesu ta hamo ta arumbitinu Utu ta eto ke einge puvuna, “Umo osari Meni naura avoeto na umo kogue osa ere ona,” ke ainge puvuna.

### *Iesu ta ohihi*

*(Matthew 1:1-17)*

<sup>23</sup> Eto Iesu ingari jua tapa 30 uhunu amita ate poekari pure itikena. <sup>24</sup> Eto Iesu amo embo Joseph ta Meni ke ere ijaetera. Eto Joseph ta Mamo amo Heli, eto Heli ta mamo amo Matthat, Matthat ta mamo amo Levi, Levi ta mamo amo Melchi, Melchi ta mamo amo Jannai, Jannai ta mamo amo Joseph, <sup>25</sup> Joseph ta mamo amo Mattathias, Mattathias ta mamo amo Amos, Amos ta mamo amo Nahum, Nahum ta mamo amo Esli, Esli ta mamo amo Naggai, <sup>26</sup> Naggai ta mamo amo Maath, Maath ta mamo amo Mattathias, Mattathias ta mamo amo Semein, Semein ta mamo amo Josech, Josech ta mamo amo Joda <sup>27</sup> Joda ta mamo amo Joanan, Joanan ta mamo amo Rhesa, Rhesa ta mamo amo Zerubbabel, Zerubbabel ta mamo amo Shealtiel, Shealtiel ta mamo amo Neri, <sup>28</sup> Neri ta mamo amo Melchi, Melchi ta mamo amo Addi, Addi ta mamo amo Cosam, Cosam ta mamo amo Elmadam, Elmadam ta mamo amo Er. Er ta mamo amo Joshua, Joshua ta mamo amo Joshua, <sup>29</sup> Joshua ta mamo amo Eliezar, Eliezar ta mamo amo Jorim, Jorim ta mamo amo Matthat, Matthat ta mamo amo Levi <sup>30</sup> Levi ta mamo amo Symeon, Symeon ta mamo amo Judah, Judah ta mamo amo Joseph, Joseph ta mamo amo Jonam, Jonam ta mamo amo Eliakim, <sup>31</sup> Eliakim ta mamo amo Melea, Melea ta mamo amo Menna, Menna ta mamo amo Mattatha, Mattatha ta mamo amo Nathan, Nathan ta mamo amo David <sup>32</sup> David ta mamo amo Jesse, Jesse ta mamo amo Obed,

Obed ta mamu amo Boaz, Boaz ta mamu amo Sala, Sala ta mamu amo Nashon <sup>33</sup> Nashon ta mamu amo Amminadab, Amminadab ta mamu amo Admin, Admin ta mamu amo Arni, Arni ta mamu amo Hezron, Hezron ta mamu amo Perez, Perez ta mamu amo Judah <sup>34</sup> Judah ta mamu amo Jacob, Jacob ta mamu amo Isaac, Isaac ta mamu amo Abraham, Abraham ta mamu amo Terah, Terah ta mamu amo Nahor, <sup>35</sup> Nahor ta mamu amo Serug, Serug ta mamu amo Reu, Reu ta mamu amo Peleg, Peleg ta mamu amo Ebner, Ebner ta mamu amo Shelah <sup>36</sup> Shelah ta mamu amo Cainan, Cainan ta mamu amo Arphaxad, Arphaxad ta mamu amo Shem, Shem ta mamu amo Noah, Noah ta mamu amo Lamech <sup>37</sup> Lamech ta mamu amo Methuselah, Methuselah ta mamu amo Enoch, Enoch ta mamu amo Jared, Jared ta mamu Mahalaleel, Mahalaleel ta mamu amo Cainan <sup>38</sup> Cainan ta mamu amo Enos, Enos ta mamu amo Seth, Seth ta mamu amo Adam, Eto Adam ta mamu amo God ra.

## 4

*Satan na Iesu ojabatambuta engekena*

*(Matthew 4:1-11, Mark 1:12-23)*

<sup>1</sup> Eto Iesu avo Ahihi Otohu na jo eneteto kiti umbuto umu Jordan toto <sup>2</sup> ojabatambu ai pambuto iji 40 amita jo ta mitinu Satan na puvuto engekena. Eto indari indae mitinu iji 40 irae unu beuje puvunu <sup>3</sup> Satan na amita degi ke einge ena, "Umu God ta Meni be kito atara erevi e bread sarikai," ainge enu <sup>4</sup> Iesu na ke mine einge ena, "eto embo na mane bread pere indie iresuja," ainge enu <sup>5</sup> Satan na Iesu umbuto degi i be i ai pambuto heteto enu enda neite neite tapa be kina. <sup>6</sup> Eto kogue mitinu Satan na Iesu ta degi ke einge ena, "Enda tapa ere kogoamo nau ikari avoeto embo ta degi hande ikasona amo tehora <sup>7</sup> Avoeto na tumotepain asoa amo nane umu embo peni ikano enda erevi tapa titijigihe hajae vajae

embo aisoa," ainge enu, <sup>8</sup> Iesu na ke mine einge ena, "God ta ke kajari einge mitia, 'Umu Bada God no vahai avo tumotepain ue agi asoa'," ainge enu, <sup>9</sup> Satan na Iesu umbuto da Jerusalem ta pambuto enu Iesu temple ene i be i ta pambuto hetenu ke einge ena, "Umu God ta Meni be kito kekehuna eto be. <sup>10</sup> God ta ke einge kajari mitia, 'God na amita anera ikau umu simba aisoa <sup>11</sup> eto umu ingeni na umbuto orereto beasora avoeto umu atara ta utu mane tasoa,'" ainge Satan na enu, <sup>12</sup> Iesu na ke mine einge ena, "God ta ke nei einge mitia, 'Umu Bada God no mane engekaso,'" ainge enu, <sup>13</sup> Satan na engekari tapa avo enu irae enu pambuto iji nei ambota aisuja avo simba ena.

*Iesu na enda Galilee ta pure itikena*

*(Matthew 4:12-17, Mark 1:14-15)*

<sup>14</sup> Eto Iesu Ahihi Otohu ta sovera na egerembeto enda Galilee ta pahunu amita duru avo embo tapa na embu eo sigeto peni vahai ena. <sup>15</sup> Eto amina enda Galilee ta ke kasari bande tapa ta toritie ate poekitinu ingihe tunga javotoho ue Iesu jakeka ea.

*Da Nazareth embomeni na Iesu ke be ae ea*

*(Matthew 13:53-58, Mark 6:1-6)*

<sup>16</sup> Eto amo pajirari da Nazareth ai ta puvuto amita ari ainge euja avoeto jangu indari iji te ke kasari bande ta toreto embomeni ta degi ke etekasi ue embo ta tombu ta hetenu <sup>17</sup> Peroveta Isaiah na ke kajari avo ikeo umbuto hiriketo ke kajari einge avo tambuto embo ta degi etekenu ingia, <sup>18</sup> "Eto Bada God ta Ahihi na sovera ikau umbuto osaga embopo ta degi duru javotoho hande aisona, eto isoro ta umbari embomeni ano tambuta pambasora, titi vavahaikari ano titi kundasora, eto hoivo embomeni avo kitoho ta ingeni ta eto umbasona. <sup>19</sup> Bada na embo hondate ari iji puvija ainge hande aisona," Ke erevi etekenu irae enu <sup>20</sup> book ahureketo hondate ari embo ta degi iketo arumbenu, embo tapa jo ta

mitia amina Iesu be kon eto kio<sup>21</sup> Iesu na itiketo ke einge enana degi ena, “Ke matu Isaiah na kajari etene ingeva amita be amo puvija erevira,” ainge ijinu<sup>22</sup> embomeni na ingito kore eto amita ke ikari amo javotohora ainge ijie ke einge ea, “Emo embo peni ta meni manera teho Joseph ta menira,” ainge ijio<sup>23</sup> Iesu na enana ta hotembari avo kito einge harikena, “Ungo nau degi ta ke einge aisi hotembitevete ‘Sivo embo umo eonga hondate e,’ ainge eto nei ‘da Capernaum ta ari ete duru ingera avo ehako da no ei ta e kiore’ ke ainge nau degi ta asi ere hotembitevete?”<sup>24</sup> Ungo ta degi ke be erena. ‘Peroveta na embo amita be amita degi ke hande aisuja rate mane ingesora.’<sup>25</sup> Rate ke be amo peroveta Elijah irari iji te pamone dodoru isapamane Israel enda ta mitiaetera. Rate God na enu jua tapa 3 eto hariga tapa 6 amita jo ta ga beae mitiatei enda tapa avo beuje iji puvunu,<sup>26</sup> God na Elijah avo ikenu Israel enda ta pamone dodoru ta degi pambae rate enda Sidon jo ta da vahai javo Zarepath amita pamone doru vahai amita degi pambuna.<sup>27</sup> Eto peroveta Elisha ta irari iji te Israel enda ta kini umbari embopo isapamane mitiaetera rate enana avo God na ae kondae rate enda Syria embo vahai javo Naaman avo enu amita kini irae ena,” ke ainge enu,<sup>28</sup> Embomeni ke kasari bande jo ta mitia amina ingito tumo pajire be eto<sup>29</sup> enana ta da heti mende ta kogombari avoeto Iesu umbuto da sahu ta pambuto heti ta gosukaro beaja ke ea rate<sup>30</sup> Iesu na embo ta ugorota tiketo pambuna.

*Embo ahihi sapura na torari  
(Mark 1:21-28)*

<sup>31</sup> Eto Iesu na Galilee da Capernaum ta pambuto jangu indari iji te embomeni ate poekitie<sup>32</sup> ke ere ijina avo ingito kiari embo be na eria ainge ijie haha puha ea.<sup>33</sup> Eto ke kasari bande jo ai ta embo vahai ahihi sapura na torari amina gagaha

eto ke einge ena,<sup>34</sup> “O ve. Iesu Nazareth embo umo dagota degi do asi puve? Umo ao nango irae ara puvete? Eto umo amunure na kiarira. Umo God ta Embo Otohu ra.” ainge enu,<sup>35</sup> Iesu na ke ngahia eto einge ena, “Ke ambu eto embo ta jo ta eto puvuto pambu.” ainge enu, ahihi sapura na embo umbuto gosukenu embo ta ugorota beto ahunu ahihi sapura avo tambuta puvuto pahunu embo javotoho ena.<sup>36</sup> Vasiri avo embomeni na kito mani mini eto ke mine ara eto einge ea, “Ari eha emo deire? Amina amita kiari sovera te na ke eoi ahihi sasapura na ke agi eto tambuta puvuto pambuora,” ainge ea.<sup>37</sup> Eto Iesu na do ena amita duru avo sigeto peni enu Galilee embo tapa ingia.

*Iesu na embomeni isapamane enu  
kondea*

*(Matthew 8:14-17, Mark 1:29-34)*

<sup>38</sup> Eto Iesu ereto ke kasari bande toto embo Simon ta bande ta pahunu Simon ta imboti ambure hamo bevere te avo ue mitinu Iesu ta degi eo pambuto<sup>39</sup> engiti ta heteto hamo bevere ere una amita degi ke ngahia enu irae enu ereto embo unduna.

<sup>40</sup> Eto mume sihukitinu embomeni ambure neite neite umbari avo umbuto Iesu ta degi puvuo amita ingeni embo tapa ta hamo ta tetembitie enu kokondekea.<sup>41</sup> Eto ahihi sasapura tapa amina embo ta jo ta eto puvuto pahue, “Umo God ta Meni ra,” ainge gagaha eto ijio Iesu na ke ambupu ara ke ngahia na ena amita be amo Iesu amo Judea ta hondate ari embo Keriso avo enana matu kiari avoeto taekena.

*Iesu na Judea ta ke kasari bande ta  
ke hande ere uaetija*

*(Mark 1:35-39)*

<sup>42</sup> Eto iho bujenu Iesu ereto embomeni toto embo irae degi ta pahunu embomeni na Iesu jombure ue pambuto tambuto da nei ta pambaja uje ae eto taekeo<sup>43</sup> enana ta degi ke einge ena, “Eto God na amita embomeni siriketo umbuto titi jigesuja amita duru javotoho avo da



ari na ue hande ana iketei puvena,” ainge eto, <sup>44</sup> da tapa ta pahue Judea ta ke kasari bande ta ke hande ena.

## 5

*Iesu na ambotani kiti umbuna  
(Matthew 4:18-22, Mark 1:16-20)*

<sup>1</sup> Eto Iesu umu ireremba javo Genesaret hora ai ta heteto mitinu embomeni isapamane na God ta ke ingesi ue asuso pasuso ue puvuto Iesu eneteo <sup>2</sup> o parari embo na e nga heriso umu ahone ta iketo moga egitie mitio Iesu na avo kito <sup>3</sup> Simon ta e nga ta bitito isapa tihin aja ke enu iarako eto hetenu arumbeto embomeni ate poekena. <sup>4</sup> Eto ke enu irae enu Simon ta degi ke einge ena, “Umu ukomo ta pambuto moga gosukejo o ombai,” ainge enu, <sup>5</sup> Simon na ke einge ena, “Bada, nango mumete ere ore iho bujetija amo o timbae rate no uje ere oa avo aisora.” <sup>6</sup> ainge eto umu ugorota pambuto moga ikeo benu umu o isapamane be torenu umbuto bivitio moga perara unu <sup>7</sup> namei kamei e nga nei ta ere ua amina puvuto hondate ara ingeni na uvvari uvvari eo puvuto hondate eo umu o isapamane avoeto e nga heriso pevitito e nga huhurumbeto beasi enu, <sup>8-9</sup> Simon te amita pure vahai embopo Zebedee ta meni heriso James te John te embo nei uhoho te na umu o isapamane kito mani mini uo Simon Peter na Iesu ta utu ta beto gombuto ke einge ena, “Bada, na embo sapura avoeto na toto pambu.” ainge enu <sup>10</sup> Iesu na Simon ta degi ke einge ena, “Umu joru aojo. Umu eha itiketo embo timbasoa.” ainge enu, <sup>11</sup> ombo ta pambuto e nga te tapa toto Iesu ambo ambo ea.

*Embo vahai ambure na hamo sapura ari avo Iesu na enu kondena  
(Matthew 8:1-4, Mark 1:40-45)*

<sup>12</sup> Eto Iesu da vahai ta pambuto mitinu embo vahai kini na hamo ahurekari amina Iesu kito amita utu ta beto gombuto penunu einge ena, “Bada, umu asi eto kito hamo nau

ejo javotoho ai,” ainge enu, <sup>13</sup> ingeni jujuruketo tame ue, “Na aisona, javotoho e,” ainge ijinu kini irae enu javotoho enu. <sup>14</sup> Iesu na ke einge ena, “Eto nau ari erevi mane hande aisoa rate pambuto no hamo avo priest ta degi ejo kioi eto embomeni kito ke be ara Moses ta ke pepeni agi ue no hamo javotoho etija amita hande pene gaga ta tembejo,” ke ainge Iesu na ena, <sup>15</sup> Rate ari amita ke avo embomeni na embu eo peni enu ingito embo isapa mane na amita ke ingito au kokondekasi puvua. <sup>16</sup> Eto Iesu na iji nei nei ainge embomeni toto ojabatambu ta pambuto pari ere uaetija.

*Embo vahai amo utu ingeni meni amburari avo Iesu na enu kondena  
(Matthew 9:1-8, Mark 2:1-12)*

<sup>17</sup> Eto iji vahai Pharisee ari embomeni te Judea ta ke pepeni ate poekari embopo te da Jerusalem te enda Galilee ta da tapa te enda Judea ta da tapa te vahai ta puvuto Iesu ta ke ingihe mitio, Iesu na Bada God ta sovera na ambure embomeni enu kondea. <sup>18</sup> Eto embomeni na popora embo vahai amo ingeni te utu te meni amburari avoeto gaga ta umbuto puvuto bande jo ta toraro Iesu kioja uje ea. <sup>19</sup> Rate embo na bande jo enetea avoeto torari pe jombure eto bande ene i ta bitito otoho pauketo gaga ga tapa ikeo bena. <sup>20</sup> Eto Iesu na enana ta tumota ari kito popora embo ta degi, “Nau meni no ari sasapura avo hotembeto ere toturutona,” ainge ijinu, <sup>21</sup> enana Pharisee ari embomeni ta ke pepeni atepoekari embopo te na ingito ungo eonga ke mine ara ijie eto einge ea, “Embo emo do eto ke ainge emo erei? God vahai amina embo ta ari sasapura hotembeto touja te embo emina God ta javo ere urumbitia,” <sup>22</sup> ainge ijio Iesu na ingito ke einge ena, “Ungo do eto ke ainge amo ereve?” <sup>23</sup> Eto na popora embo ta degi, “‘No ari sasapura hotembeto ere toturutona’ ainge aisona ano ‘ereeto pambu’ ainge asona ke amo

davo ejeha re davo ngaiha re? <sup>24</sup> Eto Embo ta Meni na sovera ari umbuto enda ta mitie embo ta ari sasapura hotembeto toasuja avo ungo ke be ava ari erevi aisona,” ainge eto popora embo ta degi, “Nane erena, umo ereto no evari gaga umbuto no da ta pambujo,” ainge enu <sup>25</sup> Embo ta titi ta ereto amita evari gaga umbuto God jakeka ijie tohota da ta pambuna. <sup>26</sup> Eto embomeni na kito mani mini ue God jakeka ijie ke einge ea, “Ari emo matu einge kiae pekota ere kogora,” ainge ea.

*Iesu na embo Levi jage enu ambo ambo ena*

*(Matthew 9:9-13, Mark 2:13-17)*

<sup>27</sup> Eto amita ambota Iesu na tambuta pambuto ‘tax’ koro umbari embo vahai javo Levi amita pure ari bande jo ai arumbeto mitinu Iesu na kito, “Na ambo ambo e,” enu <sup>28</sup> ke agi eto amita donda tapa toto ereto Iesu ta ambota pambuna. <sup>29</sup> Eto embo Levi na Iesu ta pondo peni vahai amita bande ta unu ‘tax’ umbari embopo isapamane te embo nei uhoho te ainge arumbeto indie mitio <sup>30</sup> enana Pharisee ari embopo te enana ta ke pepeni ate poekari embopo te na tini kambari eto Iesu ta ambotani ta degi ke einge ea, “Ungo do eto ‘tax’ umbari embopo te ari sasapura embomeni te ga vahaita ere indeve?” ainge eo, <sup>31</sup> Iesu na enana ta degi ke mine einge ena, “Embo javotoho amo sivo ikari embo ta degi mane pambuora te ambure embopo na sivo ikari embo ta degi pambuora, <sup>32</sup> avoeto na embo jajavotoho avoembo puvurae rate ari sasapura embopo ta degi ke ijirono tunga haperekara puvena,” ainge enu,

*Donda ajirekari*

*(Matthew 9:14-17, Mark 2:18-22)*

<sup>33</sup> Enana ke einge ea, “Eto John ta ambotani te Pharisee ari embomeni te na donda matuainge ajireketo pari eora te ambotani no amo donda ajirekae sio indiora,” ainge eo <sup>34</sup> Iesu einge ena, “Jimbari ta

pondo avo ajirekari irae <sup>35</sup> rate iji puvuresuja amo jimbari embo jigito goruketo umbuto pambasora iji amikote ajirekasora,” ainge eto <sup>36</sup> timu hatirari ke nei einge ena, “Eto embo na bo matu perarari avo bo eha na tiuketo ihirasuja amo bo eha sapura ururou bo matu ai ta ihirari amo kiari sapura kesora. Avoeto ari ainge amo mane eora. <sup>37</sup> Eto embo na o hoga umo tigi itoko ari matu ai ta ‘wine’ eha overekasora amo ‘wine’ na horo vivitie pajito o hoga amo perarasuja eto ‘wine’ te o hoga te tapa irae aisuja <sup>38</sup> te o hoga eha ta ‘wine’ eha overekasora amo mane perarasuja. <sup>39</sup> Eto embo ‘wine’ matu avo indito gamo kito javotoho ke ijie ‘wine’ eha amo uje ae aisuja.”

## 6

*Jangu indari iji*

*(Matthew 12:1-8, Mark 2:23-28)*

<sup>1</sup> Eto jangu indari iji te Iesu te amita ambotani te na embo ta pure degi ta pahue Iesu ta ambotani na ‘wheat’ be avo indesi umbuto jaeveto indio <sup>2</sup> Pharisee embomeni na kito ke einge ea, “Ungo do eto ke pepeni poekitie jangu indari iji te pure emomo ere ove?” <sup>3</sup> ainge eo Iesu na ke mine einge ena, “Eto David te amita embomeni te na beuje kito ari do ea amita ke amo ungo eteketo kiaerete? <sup>4</sup> Eto amina God ta Bande otohu ta toreto ‘bread’ matu God ta titi ta hande ikari amo priest na pere jigama eora avo David na toreto ‘bread’ avo umbuto indie amita embomeni ta hande enu india <sup>5</sup> Eto ungota degi erena, Embo ta Meni amo jangu indari iji amita simba ari embo nombo ra,” ainge ena.

*Embo ingeni meni amburari avo Iesu na enu kondena*

*(Matthew 12:9-14, Mark 3:1-6)*

<sup>6</sup> Eto jangu indari iji nei amo Iesu na ke kasari bande ta toreto embomeni ate poekena. Eto embo vahai ingeni meni amburari mitina <sup>7</sup> avo Iesu na jangu indari iji te au kondaute avo Pharisee ari embomeni te

ke pepeni ate poekari embopo te na Iesu pehumbasi etetea. <sup>8</sup> Rate Iesu na enana ta hotembari avo kito embo ingeni meni amburari amita degi, “Umo huma ei hete,” ainge enu ereto imite hetenu <sup>9</sup> Iesu na enana ta degi ke einge eto ingina, “Jangu indari iji te embo na ke pepeni agi ue embo ta degi sapura autemo javotoho au? Eto nei amo embo au kondautemo tau amburou?” <sup>10</sup> ainge ijie embo tapa poeto kito embo amita degi, “ingeni jujuruke” ainge enu jujurukitinu javotoho enu <sup>11</sup> embomeni na kito tini kambari peni vahai ue Iesu ta degi do asora avo ke kasea.

*Iesu na ambotani 12 siriketo umbuna*

*(Matthew 10:1-4, Mark 3:13-19)*

<sup>12</sup> Eto iji amite Iesu na hetu i ta pambuto God ta degi pari unu pambuto <sup>13</sup> iho bujitinu amita ambotani jage enu puvuo tapa 12 siriketo umbuto amita javo ‘apostero’ ikena <sup>14</sup> Eto embo siriketo umbuna amita javo amo embo Simon amo ehako Peter ke ena eto Peter ta namei Andrew eto James te John te Philip te Bartholomew te ra. <sup>15</sup> Eto nei amo Matthew te Thomas te Alphaeus ta meni James te Zealot ta embo vahai javo Simon ra (Zealot ari embomeni amina Rome na titi jigora uje ae ea) <sup>16</sup> eto nei amo James ta meni Judas eto nei Judas Iscariot amo Iesu umbuto isoro embo ta ingeni ta ikari embo ra. Eto ainge avo siriketo umbunu irae enu

*Iesu na ate poekena*

*(Matthew 4:23-25)*

<sup>17</sup> Egerembeto beto enda beukari ta heteto mitio amita ambotani tapa te embomeni isapamane te puvua amo enda Judea ta da tapa amita embomeni te da Jerusalem embomeni te eva da Tyre te Sidon te amita embomeni te tapa aingeto puvuto Iesu ta ke ingihe ambure embomeni au kondara umbuto puvua. <sup>18</sup> Eto ahihi sasapura na totorekari embomeni avo enu kondea. <sup>19</sup> Eto Iesu ta sovera avo amita hamo ta eto

puvunu enana kokondekea avoeto embo tapa na Iesu ta hamo tame asi uje ea.

*Tunga javotoho ari te osaga kiari*  
*(Matthew 5:1-12)*

<sup>20</sup> Eto Iesu na amita ambotani tapa jireki poeki eto kogue ke einge ena, “Ungo donda ambu embopo avo God na titi jigihirou tunga javotoho ue iresova. <sup>21</sup> Ungo beuje embopo na indari inono aisova, ungo si ari embopo na tunga javotoho ue osa osa aisova. <sup>22</sup> Eto embo na umu Embo ta Meni ta ambotani kito umu embo sapura ke ijie tumo ue umu uje ae ue urumbasora avo kito tunga javotoho <sup>23</sup> ue hana hana ejo. Ari sapura ainge amo ungota mamamane na peroveta ta degi matu arira eto ungota asora amo ungo na hotari pajire be Utu ta umbasova kivujo. <sup>24</sup> Rate ungo hajae bajae embomeni ta degi aja to erena amo ungo na ungota tunga osa osa ari matu umbeve irae etija. <sup>25</sup> Eto ungo indari umbari embopo ungota degi ta aja to erena ungo beuje kesova avoeto. Eto aja to erena, ungo kege ganini embopo na osaga kogue si aisova <sup>26</sup> Eto enda embomeni na ungo kogue jakeka aisora avo no degi ta aja to erena ainge nombo amo embo mamatu na ke sokova na peroveta ra ijie ke ijioere ungota mamamane na ingihe jakeka ere uaetera

*Kitoho embo osa ari*  
*(Matthew 5:38-48, 7:12a)*

<sup>27</sup> Rate ungo ke ingihova embomeni ta degi erena, ungota kitoho embomeni osa evujo eto ungo uje ae eora embomeni ta degi ari jajavotoho evujo. <sup>28</sup> Eto ungota degi saruka eora embomeni ta degi God na javotoho ari ikaja evujo. Eto ungo urumbeora embomeni avoembo pari evujo <sup>29</sup> Eto embo na no ovo be hena ta tasuja aherekejo ovo anga hena ta tai. Eto embo na no ombari asari umbasuja embo amita degi no pohuketo evari ga tapa ikejo. <sup>30</sup> Eto embo amuna no donda umbasi penunu au ingito

amita ikau umbau egerembeto ikaja mane hotembasoa <sup>31</sup> Eto embomeni na no degi ta ara uje ere oa ainge nombo enana ta degi ejo. <sup>32</sup> Eto embo umo tunga umbua avo pere orereto osa asoa avo embomeni na kito umo jakeka arote? ainge manera, ari sasapura embomeni te tapa na enana osa eora embopo avo osa mine ara ari haitera. <sup>33</sup> Eto nei amo no degi ta ari javotoho eora embomeni amita degi ari javotoho asoa amo embomeni na kito umo jakeka aro? Avo manera. Ari sasapura embomeni te tapa na ari ainge ari haitera. <sup>34</sup> Eto umo mine puvuresuja avo hotembitie donda ikasoa amo embomeni na kito jakeka arote? Ari sasapura embopo na mine puvuresuja hotembitie embo ta degi ikeora. <sup>35</sup> Rate no kitoho embomeni osa ue ari javotoho ue donda ikasoa avo mine ikaja mane hotembasoa eto God i ta amina ungo amita meniundi ke ijie hotari pajire be ikau umbasoa. Amita be amo amite tapa na hande ambu tigaho ari embomeni ta degi javotoho euja. <sup>36</sup> Eto ungota Mama God na embo ta osaga kogue jo euja ainge nombo jo evujo.

*Embo nei ta ari sirikari  
(Matthew 7:1-5)*

<sup>37</sup> Eto embo pehumba aojo eto God na umo mane pehumba aisuja. Embo sapura ke mane aisoa eto God na umo sapura ke mane aisuja rate embo ta ari sapura hotembeto toasoa amo God na no ari sapura hotembeto toasuja. <sup>38</sup> Eto embo ta degi hande aisoa amo God na no degi ta hande mine ikasuja. Eto umo ikasoa ainge inono ta mane ikasuja te pajire be overekau gavineketo bovurou ikau umbasoa. Eto umo hande embo eto ikasoa God amo hande embo eto no degi ta ikasuja,” <sup>39</sup> Eto Iesu na ke ainge ijie timu hatirari ke einge ena, “Eto titi kuru ari embo na titi kuru ari embo nei naingeto kiti umbuto pambau? Enana ere pahuma pe te hoto ta beasora <sup>40</sup> Eto kiari jo jombu ari embo na atepoekari embo mane

nembasuja te atepoekau kiari umbuto amita ate poekari embo amiga inono aisuja. <sup>41</sup> Eto umo do eto no namei ta titi ta i sirivo mitia avo kogoe no titi ta i uhu mitia avo hotembae ere oe? <sup>42</sup> Eto namei ta degi, ‘No titi ta sirivo mitia kondikano?’ ke ainge ijie ungota titi i uhu na peiketija avoeto naingeto avo? Ungo ari sapura ondiketo ke sokova ari embomeni eto ungota ari sapura i uhu ainge titi ta mitia avo kiti umbavo irae au javotoho na kon kon eto kogue namei ta sapura isapa i sirivo ainge titi ta mitia avo kondikevu.

*I tapa amita be hajire eonga eongara  
(Matthew 7:16-20, 12:33-35)*

<sup>43</sup> Ke be amo i javotoho indiora ai ta i be indahu mane ekasuja eto i nei sapura ai ta i be indari mane ekasuja <sup>44</sup> Rate i tapa amita be hajire eonga eonga ra avoeto junga be amo i isuga ta mane umbuora eto grape be amo esi hukaru ta mane ekeoi umbuora. <sup>45</sup> Eto embo javotoho ta jo ta amo ari javotoho mitia avoeto ari javotoho euja rate embo sapura ta jo ta sapura pere mitia avoeto sapura euja. Eto embo ta jo ta do ainge mitia avo ainge inono ta amita pe ta puvuto pambasuja.

*Bande heriso gerikari embopo  
(Matthew 7:24-27)*

<sup>46</sup> Ungo do eto na ke Bada, Bada, ijie ke nau agi ae ere ove? <sup>47</sup> Eto embo amuna nau degi ta puvuto ke nau ingito agi aisuja amo do aingere avo ano ingesova. <sup>48</sup> Eto embo na bande gerikasi enda javotoho ta hoto koveto beto karu hamo ta tutuvi hurukasuja amo umo muenga na puvuto tasuja te mane kohekasuja tutuvi koro hamo ta hurukari avoeto. <sup>49</sup> Rate embo nei nau ke ingito agi ae aisuja amo embo na teho enda hamo ta tutuvi tetembeto bande gerikasuja eto umo muenga na puvuto tau koheketo beau aimbeto umbuto pambasuja.”



## 7

*Rome isoro embo ta pure embo avo Iesu na enu kondena (Matthew 8:5-13)*

<sup>1</sup> Eto Iesu embo ta degi ke enu irae enu da Capernaum ta pambuna. <sup>2</sup> Eto da ai ta Rome ta isoro embo peni ta pure embo vahai amburesi ue mitinu <sup>3</sup> Iesu na pure do ena amita duru avo ingito isoro embo na amita pure embo osa eto Iesu umbau puvuto amita pure embo au kondaja Judea ta okokose ikenu Iesu umbasi <sup>4-5</sup> Pambuto amita degi ke sovera eto penunu einge ea, “Embo amina ungotenau enda osa ue ke kasari bande geriketo ungotenau iketija avoeto amo javotoho na hondate mine aisoa,” <sup>6</sup> Ainge eto Iesu enana ga pambuto bande auvitio isoro embo peni na ke ikenu amita namei kamei na umbuto pambuto Iesu ta degi einge ea, “Bada, umo osaga aojo. Na embo sapura avoeto nau bande ta mane torasoa. <sup>7</sup> Eto na sapura avoeto no degi ta puvurae eona rate teho no ke na ejo nau pure embo kondai <sup>8</sup> Amo eingera, namo te tapa nau embo okose ta sovera jigama ue na nau isoro embo ta degi pambu aisona pambasuja eto nei ta degi hae aisona huresuja eto nau pure embo ta degi einge e aisona aisuja eona ainge nombu no okose ta sovera na ejo kondai.” <sup>9</sup> ainge eo Iesu na ingito mana mana eto egerembeto embomeni amita ambo ambo ue puvua amita degi ke einge ena, “Na ungota degi erena, embo amina na tumota be ere ua. Na Israel enda ta Israel embo aingeke tambaera.” ainge eto <sup>10</sup> embomeni puvua avo ikenu egerembeto bande ta pambuto ambure embo amo matu kondeto mitinu kia.

*Pamone doru ta meni avo Iesu na enu vasiri te erena*

<sup>11</sup> Eto amita ambota Iesu na da javo Nain ta pahunu amita ambotani te embo tapa amiga <sup>12</sup> pambuto da pe auvitio pamone doru ta meni avo vahai avo ambunu kovasi embomeni isapamane gaga ta iketo umbuto

oroviketo pahuo <sup>13</sup> Iesu na pamone doru avo kito jo enu, “Umo si aojo,” ainge ijie <sup>14</sup> pambuto gaga ta jiginu gaga umbuto pahua embo amo heteo Iesu na ke einge ena, “Nau meni, ere,” ainge enu <sup>15</sup> embo matu amburari amo ereto gaga ta arumbeto itiketo ke ijinu Iesu na e ta ingeni ta tona <sup>16</sup> Eto ari avo embo tapa na kito joru ue God jakeka ue ke einge ea, “Peroveta nombu be ungotenau degi puvija,” eto nei “God na amita embomeni ta degi puvija,” <sup>17</sup> Eto Iesu na do ena amita duru avo sigeto pambunu Judea enda tapa amite eto enda nei nei Judea ta engitita amite tapa ingia

*John bapataito ari embo na ambotani heriso ikenu Iesu ta degi pambua*

*(Matthew 11:2-19)*

<sup>18</sup> Eto John bapataito ari embo ta ambotani na duru avo ingito John ta degi tirio ingito <sup>19</sup> Amita ambotani heriso umbuto Bada ta degi, “Embo God na ikau puvuresuja amo umo retemo embo nei re,” ainge eto ingora ikenu pambuto <sup>20</sup> Iesu ta degi puvuto ke einge ea, “John bapataito ari embo na nango heriso ke erevi umo eto ingora etei puvera. Embo God na ikau puvuresuja amo umo retemo embo nei re?” ainge eo <sup>21</sup> iji amikote Iesu na embo ta ambure osaga neite neite enu kokondekenu irae enu ahihi sasapura kurumbena titi kuru ari enu titi kukundukea avoeto <sup>22</sup> John ta ambotani heriso ta degi ke mine einge ena, “Pambuto John ta degi do ere kogova ere ingihova avo John ta degi einge evujo ingoi, ‘titi kuru ari embo titi hiriketei ere kogora popora embo ereto isa ere ora kini umbari embopo ta kini irae etija onde susundukari embopo na onde ahimbetei ke ere ingihora, embo ambuvujekari vasiri te ereto ere ora eto hoivo embomeni ta degi duru javotoho ere ingihora <sup>23</sup> eto embo amuna na ke be ae ke mane euja amina tunga javotoho ere ua’.” ke ainge ara enu John ta degi pahuo

<sup>24</sup> Iesu na embo tapa ta degi John avoembo ke einge ena, “Ungo ari do kesi ojaga tambu ta pahave? Sasaha pisara na kajeoi ujiji euja avo kesi pahavete? <sup>25</sup> Eto ainge mane amo do kesi pahave? Nei kiari bo ove javotoho asuketo euja avo kesi pahavete? Bo aingeko asuketo eora embomeni amo king ta bande ta pambuto kiaeteva <sup>26</sup> Rate evujo ingone, amo peroveta vahai kesi pahavete? Ungota degi erena amo peroveta be avo pambuto kogava <sup>27</sup> Eto God ta ke matu kajari ai ta mitia amo John do aisuja amita ke avo einge mitia, ‘Kijo, na nau ke hande ari embo ikano kiti pahue no degi siriketo au tambu aisuja,’ ainge kajari mitia avoeto <sup>28</sup> ungota degi erena embo nombo be nombo ae pekota amo John na ena rate God na eha oroho itiketo embo siriketo umbuto titi jigesuja avoeto embo amuna God ta titi jigari degi ta toreto embo teho asuja amina John nembeto embo nombo be aisuja,” <sup>29</sup> Ke ainge Iesu na enu ingia (Eto ‘tax’ siriketo umbari embopo te embo nei uhoho te amina John ta ke ingio bapataito ena avoeto Iesu ta ke ingihe God javotoho ke ea <sup>30</sup> rate enana Pharisee ari embopo te ke pepeni kiari embopo te na John ke be mane ke ijie bapataito ae toa avoeto God ta hondate ari avo umbae ra.) <sup>31</sup> Eto Iesu na embomeni ta degi ke einge ena, “Eto embomeni eha mitera amita ari mo do aingekore? <sup>32</sup> Amo meni isisaraho na da tambuta arumbeto boru jumbarako ere ora nei uhoho na ereto dago huin huketera rate ungo ire tivae, nei si ijie sesena asi uje etera te ungo si ae <sup>33</sup> ari aingeko amo ungo na ere ova amo eingera, Eto John puvuto indari te umo te ajirekena avo ungo na kito ‘Ahihi sapura na toritaja avoeto ere ua,’ ainge ijieva. <sup>34</sup> Eto Embo ta Meni na puvuto ‘wine’ te indari te tapa indiuja avo ungo na kogoe, ‘Embo erevi kivu, amo okope undurari embora eto jai indari embora amina ‘tax’ koro umbari em-

bomeni amite embo sasapura neite neite ga namei euja,’ ke ainge eova <sup>35</sup> Rate God ta kiari umbari meniundi na ari javotoho kito ke be aisora.” ainge Iesu na enu irae enu.

### *Iesu na embo Simon ta bande ta umoro ena*

<sup>36</sup> Pharisee ari embo vahai na Iesu amiga indoja oru enu amita bande ta pambuto arumbenu <sup>37</sup> da amita pamone vahai amo pamone sapura be amina Iesu Pharisee embo ta bande ta arumbeto indinu ke avo ingito ‘oil’ mune javotoho te tigi isapa ta avo umbuto Pharisee ari embo ta bande ta toreto <sup>38</sup> Iesu ta ku hena ta heteto itiketo si ijie amita titi sisivu na Iesu ta utu kuteto siro ta tuheto utu mune tavo eto ‘oil’ mune te amina kutena. <sup>39</sup> Eto Pharisee embo Iesu amita bande ta indoja oru ena amina ari avo kito einge hotembena, “Ari sapura pamone eremina Iesu tame ere ua. Eto Iesu peroveta be kito pamone sapura erevi do aingere amo matu kiaetija,” ainge hotembitinu <sup>40</sup> Iesu na kito ke einge ena, “Simon, na no degi ta ke vahai asi ere ona amo aravorete?” ainge enu. “Aravora, Ate poekari Embo, no ke deirami asi uje ere oa avo ejo,” ainge enu. <sup>41</sup> Iesu na ke einge ena, “Hajae bajae embo vahai na embo vahai amita 500 kina iketo embo nei amita 50 kina ikena <sup>42</sup> eto embo heriso amina mine ikari inono ae kito toturitaja aravora te embo amuna hajae bajae embo osa peni vahai au?” ainge enu. <sup>43</sup> Embo Simon na ke mine einge ena, “Koro pajire be umbari embo amina hajae bajae embo osa pajire be aisuja,” ainge enu Iesu na, “Ke be erea,” ainge eto <sup>44</sup> ahereketo pamone kogoe Simon ta degi ke einge ena, “Pamone erevi kogoe? Na no bande ta puvena te umo nau utu egae rate pamone emina amita titi sisivu na nau utu egeto amita siro tu na tuhetija <sup>45</sup> Eto inena na mune tavo ae rate amina na puvena iji te nau utu mune tavo ere ua <sup>46</sup> Eto inena nau siro ‘oil’ kutaera te amina nau utu ‘oil’ mune te amina kutetija

<sup>47</sup> avoeto no degi ta erena amita osari pajire be avoeto amita ari sapura isapamane avo nanena hotembeto ere toturitona, rate embo amuta ari sasapura heriso be hotembeto toari amina osa peni mane aisuja,” ainge <sup>48</sup> eto pamone ta degi, “No ari sasapura hotembeto ere toturitona,” ainge enu, <sup>49</sup> embomeni gaga ta areto mitia amina ke mine ara eto einge ea, “Embo ari sasapura hotembeto ere toturititia emo amunure?” ainge ijio <sup>50</sup> Iesu na pamone ta degi, “No tumota ari na umo oreketija avoeto peka ta pambujo.” ainge ena.

## 8

### *Pamone Iesu ga pambua*

<sup>1</sup> Eto iji isapa amita ambota Iesu na da ari na eto tehue God na embomeni titi jigesu sirikasuja amita duru javotoho avo hande ena. Eto amita apostero 12 amite <sup>2</sup> pamone nei nei ahihi sasapura na jo ta torari kurumbena amite pamone nei nei amo ambure ari avo kondena amiga pambua. Eto pamone amo da Magdala pamone javo Mary amita jo ta amo ahihi sasapura tapa 7 kurumbena <sup>3</sup> eto nei amo Herod ta pure embo vahai javo Chuza amita ae Joanna amite pamone Susanna amite pamone nei nei aingeto Iesu unduresora avoeto enana ga pambua.

### *Be urari embo ta timu hatirari ke (Matthew 13:1-9, Mark 4:1-9)*

<sup>4</sup> Eto da tapa embomeni Iesu ambo ambo puvua amina vahaita torukeo Iesu na timu hatirari ke enana ta degi einge ena, <sup>5</sup> “Ve urari embo vahai na pure ta pambuto ve ihaja enu ve nei amo degi ta benu embomeni na haito jaevekitio di na beto india <sup>6</sup> ve nei amo karu hamo ta bena avoeto ereto jaise ena umo irae avoeto <sup>7</sup> Eto ve nei amo ma ta bena avoeto eritinu esi na andinu sapura ena. <sup>8</sup> Eto ve nei amo enda javotoho ta bena avoeto ereto ve 100 ainge ekena,” eto ke ainge Iesu na ijie isara na eto, “Ungo amuta onde mitirou

kito ke erena erevi ingivujo,” ainge ena.

### *Iesu na do eto timu hatirari ke na ate poekena*

*(Matthew 13:10-17, Mark 4:10-12)*

<sup>9</sup> Eto amita ambotani na timu hatirari amita ke be avo deire avo au ingesi eo <sup>10</sup> Iesu na ke einge ena, “Eto God na embo amita toho siriketo umbuto titi jigesuja amita ke be amo ungota degi ikarira te embo tapa arahata mitera amita degi amo timu hatirari na ikano kito kialesira asora eto ingito ingaesira aisora.

### *Be urari embo ta ke be avo Iesu na harikena*

*(Matthew 13:18-23, Mark 4:13-20)*

<sup>11</sup> Eto timu hatirari na etena amita ke be amo erevira, be urari amita be amo God ta ke ra. <sup>12</sup> Eto ve nei degi tambu ta beuja amo embo na God ta ke avo ingesuja rate ke jo ta urari avo Satan na puvuto egimbau God ta ke avo ke be ae ijirou mane oreketo umbasuja. <sup>13</sup> Eto ve nei karu hamo ta beari amita ke be amo erevira, God ta ke avo ingito tunga javotoho aisuja te ke avo jo ta mane be beto pesisa eto susu kambasuja eto teho mitirou engekari puvurou toasuja. <sup>14</sup> Eto ve nei ma ta beari amita ke be amo erevira, embo na God ta ke uje euja te enda ta ari te ujeje neite neite amite eto amita haja vaja amina God ta ke amo andioi ve mane ekeuja <sup>15</sup> Eto ve nei enda javotoho ta beari amita ke be amo embo na God ta ke avo ingito amita jo ta ke be ari na be jigito simba javotoho uore be eketo pajiua.

### *Horivo ijimbeto ari ta timu hatirari ke*

*(Mark 4:21-25)*

<sup>16</sup> Eto embo na horivo ijimbeto umbuto ovu to ta iketo mane ahuresora eto gaga suvu ta mane ikasora te araha ta tembau embo bande jo ta torasi puvuto kesora. <sup>17</sup> Eto ainge nombo ke tapa ahurekari avo harikaro tapa ingesora eto ondikari avo umbuto araha ta ikaro kesora. <sup>18</sup> avoeto God ta ke eto kogoeto ingivujo eto embo ta degi kiari isapa

irirou kito nei amita hamo ta ikau umbasuja rate amita kiari isapa irari ke asuja embo amita kiari do mitia avo umbau irae aisuja.” Iesu na ke ainge ijinu

*Iesu ta aja te namei kamei te ra  
(Matthew 12:46-50, Mark 3:31-35)*

<sup>19</sup> Amita e te namei kamei te aingeto Iesu ta degi puvua te embomeni isapamane avoeto Iesu ta degi pambari inono ae enu <sup>20</sup> embo na Iesu ta degi ke einge ea, “No aja te namei kamei te umo kesi uje eto puvuto araha ta mitera,” ainge eo <sup>21</sup> Iesu na einge ena, “Embo te pamone te amuna God ta ke ingihe agi aisora amo nau aja eto namei kamei ra,” ainge ena.

*Iesu na enu pisara jamo ena  
(Matthew 8:23-27, Mark 4:35-41)*

<sup>22</sup> Eto iji vahai Iesu na amita ambotaniga e nga ta bitito ungotte umo ovitihō ta pambasira ainge enu pahue <sup>23</sup> Iesu sereketo evo unu pisara peni vahai puvuto umo na teto mimisenu e nga jo ta beto pe vivitinu e nga itiketo huhurumbeto bovunu <sup>24</sup> ambotani na pambuto Iesu ujitie, “Bada, Bada, ungotena sari ari embopora,” ainge iji ere to pisara te umo te ta degi ke ngahia na enu jamo eto bisi bisi enu. <sup>25</sup> Iesu na enana ta degi, “Ungo na tumota ae re,” ainge enu joru eto mana mana ue ke mine ara eto einge ea, “Embo emo do aingere? Ke etei umo te pisara te amita ke agi eto jamo etera,” ainge eto pambuto

*Embo ahihi sasapura na torari avo Iesu na enu kondena  
(Matthew 8:28-34, Mark 5:1-20)*

<sup>26</sup> Enda Galilee umo ovitihō enda javo Gerasenes ai ta puvuto <sup>27</sup> beto da amita embo vahai ahihi sasapura na torari avo hora ai ta tambua. Embo amo iji koso amita bo irae eto bande irae embo ikeore sape eora panga to ai ta mitiaetija. <sup>28-29</sup> Rate embomeni na embo avo ‘chain’ na punduo ahihi sasapura na embo andirari avoeto ivo peni vahai eto

‘chain’ jigito usuketo embo umbuto ojaga tambuto pambuna avo Iesu na kito, “Embo ta jo avo toto puvuto pambu,” ainge enu embo amina Iesu kito gagaha ijie pambuto Iesu ta utu ta beto ahue ke isara na einge ena, “Iesu, God sovera isapamane te ta Meni nau degi ta do ao? Na penunu erena, nau degi ta memenga ikaojo.” <sup>30</sup> ainge enu Iesu na, “No javo deire,” ainge enu embo amina, “Dago isapamane avoeto nau javo ‘Legion’ ra,” ainge eto <sup>31</sup> Iesu na kurumbepoi memenga kiari degi ta pambari uje ae eto <sup>32</sup> o ohu isapamane heti ovitihō ta indie mitio kito amita jo ta au pambasi penunu enu aravora enu <sup>33</sup> Ahihi sasapura na embo ta jo toto pambuto o ohu ta jo ta toreo tutuveto pambuto heti ta eheruva eto beto umo indito ahue <sup>34</sup> o simba ari embopo na joru pambuto da pepeni te memeni te tapa amita embomeni ta degi hihi tirio <sup>35</sup> ingito embomeni kesi Iesu ta degi pambuto embo ahihi sasapura na torari avo uta javotoho enu bo asuketo Iesu ta utu ta arumbeto mitinu kito joru uo <sup>36</sup> embo ahihi sasapura na torari avo konditinu kia embopo amina hihi tirio <sup>37</sup> ingito enda Gerasenes embomeni tapa amina joru pajire be eto Iesu enda avo toto pambaja eo e nga ta bitito egerembeto pambasi uo <sup>38</sup> embo matu ahihi sasapura na torari amina Iesu ga pambasi penunu enu Iesu na <sup>39</sup> “Namoga mane pambasoate God na umo kito jo etei no degi ta tapa do etija avo no da ta pambuto ejo ingore,” ainge enu amina tohota da ta pambuto embo tapa ta degi Iesu na do enu kina avo hihi tirinu ingia.

*Embo Jairus ta iae eto pamone Iesu tame ena ta ke  
(Matthew 9:18-26, Mark 5:21-43)*

<sup>40</sup> Eto Iesu egerembeto pahunu embomeni tapa simba ere ua amina Iesu kito tunga javotoho ue pekea. <sup>41-42</sup> Eto Judea ta ke kasari bande ta titi jigari embo vahai javo Jairus



amita iae avo vahai amita ingari jua tapa 12 avo amburesi unu pambuto Iesu ta utu ta beto paunge teteri eto Iesu amita bande ta pambaja penunu enu ingito Iesu Jairus ga pahunu embo isapamane Iesu ga oroviketo pahuo <sup>43</sup> pamone vahai amo jua tapa 12 amita jo ta sasaga vovuo embo na ari kondari inono ae uore mitiaetija <sup>44</sup> amina Iesu ta ke ta puvuto amita bo petiki tame unu amita sasaga irae enu. <sup>45</sup> Iesu na, “Na amuna tame ere oi,” enu embomeni tapa na nango tame aera ainge eo Peter na ke einge ena, “Embo isapamane avoeto umu vahaike vahaike ere ora,” ainge enu <sup>46</sup> Iesu na ke einge ena, “Nau sovera isapa beto ere pahua avo mine uhe tame ari ke erena,” ainge enu <sup>47</sup> Pamone amo ondikari irae kito gatari gatari ue joru te tapa puvuto Iesu ta utu ta beto gombuto naingeto Iesu tame eto kondena amita be avo embo tapa ta titi ta harikenu <sup>48</sup> Iesu na ke einge ena, “Nau iae, umu na tumota eto kondetea avoeto peka ta pambujo.” <sup>49</sup> ainge ijinu embo na Jairus ta bande ta eto puvuto Jairus ta degi ke einge ena, “No iae matu ambija avoeto ate poekari embo mane jigesoa te tojo pambae,” ainge enu <sup>50</sup> Iesu na ingito ke einge ena, “Umu osaga mane kesoa te na tumota ejo no iae ano kondasuja,” ainge eto <sup>51</sup> Bande ta pambuto embomeni araha ta irora enu mitio Peter te John te James te e te mamote avo enu toreo <sup>52</sup> embomeni sisiasiji mitia amita degi ke einge ena, “Ungo si mane aisova. Kakara amo amburaera te teho evo ere ua,” ainge enu <sup>53</sup> kakara matu amburari avoeto Iesu na evo ari ke ena avo ganini ijio <sup>54</sup> Iesu na kakara isapa amita ingeni ta jigito, “Ka, umu ere,” ainge enu <sup>55</sup> amita ahihi egerembenu erenu Iesu na ka amita degi indari ikaro indoja ena. <sup>56</sup> Eto amita e te mamote mana mana uo ari do ena amita ke avo hande eora ke ngahia ena.

## 9

### *Iesu na ambotani 12 ikenu pambua*

*(Matthew 10:5-15, Mark 6:7-13)*

<sup>1</sup> Eto Iesu na amita ambotani 12 jage enu puvuo ahihi sasapura kurumbitie embomeni aro kondara sovera ari iketo <sup>2</sup> God na embomeni siriketo umbuto titi jigesuja amita ke hande ue embomeni aro kondara ikenu pambasi uo <sup>3</sup> enana ta degi ke einge ena, “Ungo donda nei hetu te eti savo te ‘bread’ te koro te bo heriso te mane umbuto pambasova te <sup>4</sup> da vahai vahai ta pahue bande ari na ue mane evesova te bande vahai ai ta evie pure avo irae au pambuvujo <sup>5</sup> Eto da damina ungo pekae aro kito toto pambasi ue ungota utu oniho avo torovikavo bovourou embomeni tapa koguroro pambuvujo,” ainge enu irae enu <sup>6</sup> enana da ari na ue pahue embomeni ta degi duru javotoho hande ue embomeni eo kokondeka.

### *Herod ta hotembari*

*(Matthew 14:1-12, Mark 6:14-29)*

<sup>7</sup> Eto Iesu na tapa do ena amita duru avo Israel ta gavana okose javo Herod na ingito be hotembae ena amita be amo embo nei na John vasiri te ereto ere ua ainge ijio <sup>8</sup> embo nei na peroveta Elijah na sariketo puvuto ere ua ainge ijio embo nei na peroveta nei matu amina vasiri te ereto ere ua ainge ijio Herod na ingito <sup>9</sup> be hotembae ue ke einge ena, “John matu tunga tiukitana te embo ari neite neite oi duru ere ingihona amo amuna oi ereve?” ainge eto embo avo kesi uje ena.

### *Embo tapa 5,000 avo Iesu na unduna*

*(Matthew 14:13-21, Mark 6:30-44, John 6:1-14)*

<sup>10</sup> Eto apostero tapa egerembeto Iesu ta degi puvuto ari do ea tapa avo tirio irae enu Iesu na embo tapa toto amita apostero perekari umbuto da javo Bethsaida ta pahunu <sup>11</sup> Enana avo nainge ere pahua avo embo na

eo ingito embo tapa ambota pambuo Iesu na kito peketo God na embomeni naingeto titi jigesuja amita ke hande ue ambure embomeni avo enu kokondekitio <sup>12</sup> iji vovunu Iesu ta ambotani 12 na amita degi puvuto ke einge ea, “Ungotena da peni mane da isapa ta mitera avoeto embomeni ikejo da ari na eto pambuto indari indito evore” ainge eo <sup>13</sup> Iesu na, “Ungona indari ikevu indore,” ainge enu enana ke einge ea, “Dagota degi ta amo ‘bread’ tapa 5 eto umo o heriso mitia te nango pambuto indari koro na umbuto embomeni erevi undurora ere?” <sup>14</sup> ainge ea amita be amo embo tapa 5,000 mitera avoeto. Eto Iesu na embo tapa 50, 50 ainge kateke kateke ara ke enu <sup>15</sup> ambotani na kateke kateke eo arumbeo <sup>16</sup> Iesu na ‘bread’ 5 eto umo o heriso amite aingeto umbuto titi i ta eto jigito God peketo ‘bread’ te o te jigito pereto embomeni ta ikaro indora ambotani ta degi ikenu embo ta ikeo indio <sup>17</sup> oti pevitinu ambotani na indari sirivo sirikeo hambija tapa 12 amo pevitina.

*Iesu amunure avo Peter na ke ena (Matthew 16:13-19, Mark 8:27-29)*

<sup>18</sup> Eto iji vahai Iesu embo tapa toto pambuto pari ue mitimite amita ambotani ta degi ke einge eto ingina, “Embomeni na na amunure ke eore?” ainge enu <sup>19</sup> enana ke einge ea, “Embo nei uhoho na amo umo John Bapataito ari embo ke eora eto nei uhoho na umo peroveta Elijah ke eora eto nei amo peroveta matu vahai na vasiri te erari amina ere ua ainge eora,” ainge eo <sup>20</sup> Iesu na, “Rate ungo na na amunure ke eove?” ainge enu Peter na, “Umo Judea ta hondate ari embo Keriso God na ikari puvurarira,” ainge enu

*Iesu memenga kito amburesuja avo ambotani ta degi ke ikena*

*(Matthew 16:20-28, Mark 8:30-9:1)*

<sup>21</sup> Ingito ke avo embo ta degi mane hande ara taekitie <sup>22</sup> ke einge ena, “Embo ta Meni na osaga memenga

kogurou Judea ta embo okokose te priests pepeni te ke pepeni kiari embopo te na uje ae eto taro ambuto iji 3 toto ehako vasiri te erasuja,” ainge eto <sup>23</sup> embo tapa ta degi ke einge ena, “embo amuna na ambo ambo asi uje aisuja amo amita ujeje tapa toto amita i atahu bouka avo koho ta tembeto iji matuainge na ambo ambo aisuja <sup>24</sup> eto embo amuna umo eonga amita vasiri oreketo umbasi uje aisuja amo amita vasiri iraesuja rate embo amuna na avoembo amita uje tapa toasuja embo amina amita vasiri oreketo umbasuja, <sup>25</sup> amita be amo embo na enda ta ari neite neite ue donda tapa ere uhumakara amburesuja amo amita vasiri iraesuja eto javotoho mane tambasuja. <sup>26</sup> Eto embo amuna namote nau ke te avo kito me kogue ke nau hande ae aisuja amo Embo ta Meni na amita usasa ta eto Mamo ta usasa ta anera ototohu ga iji kombu te puvuto embo avo me kesuja. <sup>27</sup> Rate ungota degi ke be erena ungo embomeni eha ei miteva amo embo nei nei amo mane amburesova te mitirovo God na embo amita siriketo umbuto titi jigesuja iji avo puvurou keisova,” ainge Iesu na ena.

*Ambotani na Iesu ta usasa kia (Matthew 17:1-8, Mark 9:2-8)*

<sup>28</sup> Eto ke ainge enu iji 8 ainge irae enu Iesu na pari asi Peter te James te John te ainge umbuto tiri ta bitito <sup>29</sup> pari ue mitinu Iesu ta hamo amo usasa pere unu eto amita bo na usasa peni vahai amo enda embo na bo parara ainge ari haite mane avo unu <sup>30</sup> peroveta heriso mamatu Moses te Elijah te <sup>31</sup> na usasa ta Iesu ga ke asi sariketo puvuto Iesu na Jerusalem ta pambuto amburesuja amita ke avo kasea <sup>32</sup> Eto Peter te amita namei kamei te na evo titivi ena te evae mitie Iesu usasa ena avo kogue embo heriso amiga heteto mitia avo kogue <sup>33</sup> embo heriso avo pambasi uo Peter na ke do ano ijie einge ena, “Bada, dago ungote mitera emo javotoho avoeto horoma no vahai Elijah vahai eto Moses ta vahai ainge gerikasora,”

ainge Peter na ijinu <sup>34</sup> oje na puvuto ahurekitinu joru ue <sup>35</sup> oje jo ta ke einge ingia, “Emo nau tunga umbari meni ra. Amita ke ingivujo,” ainge enu <sup>36</sup> irae enu Iesu eonga mitinu kia. Eto iji amikote amo ari do kia avo embomeni ta degi ke hande ae toa.

*Iesu ambuto vasiri te erasuja avo harikena*

*(Matthew 17:14-18, Mark 9:14-27)*

<sup>37</sup> Eto evito tiri ta eto bovu embomeni isapamane puvuto tambuo <sup>38</sup> embo vahai amina embomeni ta ugoro bagoro ta hoeto jajage eto ke einge ena, “Ate Poekari Embo, na no degi ta penunu erena, nau meni avo vahai amita osaga avo kijo, <sup>39</sup> ahihi sapura na andioi gagaha ijie beto ahue ti kambuto kiroro kiroro ue pe pejigi gavineto bovuoi ahihi sapura na meni ngahia na andito egikae iji koso jigito mitima touja avoeto <sup>40</sup> no ambotani na kurumbara penunu etene kurumbetera rate inono ae etei no degi ta umbuto puvena,” ainge enu <sup>41</sup> Iesu na osaga kito embo tapa ta degi ke einge ena, “Ungo tumota ae embomeni ra. Eto ungo kiari umbava ungote iji doinge irono. Eto no meni avo nau degi ta umbuto hae,” ainge enu, <sup>42</sup> embo na meni avo umbuto Iesu ta degi inu, ahihi sapura jo ta amina meni andinu enda ta beto ahero ahero ue ahunu Iesu na ahihi sapura isembeto kurumbenu toto pahunu meni javotoho enu umbuto mamu ta ikena. <sup>43</sup> Eto embo tapa na God ta sovera kito mana mana ea. Eto mana mana ue mitio Iesu na amita ambotani ta degi ke einge ena.

*Iesu amburesuja avo ke ena*

*(Matthew 17:22-23, Mark 9:30-32)*

<sup>44</sup> “Ungo onde jevito be ingivujo. Embo ta Meni avo umbuto embo sasapura ta ingeni ta ikasora,” ainge ena. <sup>45</sup> te ke amita be amo God na amita ambotani ingora uje ae eto ondikenu ingae eto Iesu ta degi be eto ingesi uje ea rate oju ea.

*Embo amuna embo okose aisuja*  
*(Matthew 18:1-5, Mark 9:33-37)*

<sup>46</sup> Eto ambotani vahai amuna embo okose aisuja amita ke avo tumo te tapa ke mine ara ijio <sup>47</sup> Iesu na enana ta jo ta hotembari avo kito meni isapa umbuto amita engitita ikenu hetenu <sup>48</sup> enana ta degi ke einge ena, “Embo amuna javo nau ta meni isapa eingeke osa kageni aisuja amo namote tapa osa kageni aisuja eto na pere mane rate God Na ikari Embo amite tapa osa aisuja. Amita be amo ungo embo vahai amuna na embo tehora ke aisuja amina ungota embo okose aisuja.”

*Embo amo ungotenau kito mane rate ungotenau tohora*

*(Mark 9:38-40)*

<sup>49</sup> Ainge enu John na ke einge ena, “Bada, embo vahai na ahihi sasapura javo no ta kurumbitaja avo kito embo ungotenau mane embo nei ke ijie taekitara,” ainge enu <sup>50</sup> Iesu na amita degi ke einge ena, “Ari ainge amo mane taekasoa, embo nei amuna no degi ta kitoho ae amo embo no ra,” ainge ena.

*Enda Samaria ta da vahai na Iesu umbae ea*

<sup>51</sup> Eto Iesu Utu ta bitari iji auvitinu da Jerusalem ta pambasi tunga ikena <sup>52</sup> avoeto pambuto hehitie pambasuja degi avo sirikara ke hande ari embopo ikenu pambuto enda Samaria ta da vahai ai ta toreto Iesu puvuresuja degi sirikara ke eo <sup>53</sup> Iesu da Jerusalem ta pambasuja amita duru ingito uje ae eto mane dago ta da ei ta puvuresuja ainge ijie taekoo <sup>54</sup> ingito egerembeto pambuto ambotani ta degi eo ingito James te John te na ingito Iesu ta degi ke einge ea, “Bada, nango i penunu aro Utu ta eto beto da eveketo irae aja uje ere oete?” ainge eo <sup>55</sup> Iesu na, “Ainge mane aisova,” enu

*Embomeni na Iesu ambo ambo asi jo tapa na aera*

*(Matthew 8:19-22)*

56-57 Ainge eto toto da nei ta pahue embo vahai degi ta tambuo ke einge Iesu ta degi ena, “Umo degi nainge nainge pambasoa amo na umo ambo ambo aisona,” ainge enu 58 Iesu na ke einge ena, “O koropu na enda koveto enda jo ta iriuja, di na nga iketo iriuja te Embo ta Meni amita jangu indari degi avo irae ra,” ainge eto 59 embo nei ta degi, “Na ambo ambo e,” enu ke mine einge ena, “Bada, na toao pambuto nau mama amburou avo koveto umo ambo ambo aisona,” ainge enu 60 Iesu na ke mine einge ena, “Embomeni amburari na irarako ere ora amina embo amo kovasora te umo avo pambuto God ta titi jigari ta ke avo hande ejo,” ainge enu 61 embo nei na ke einge ena, “Bada na umo ambo ambo aisona te na toau kiti pambuto nau embomeni peketo puvuto umo ambo ambo aisona,” ainge enu 62 Iesu na ke einge ena, “Embo na i jasi ue overeki tahereki ue jasuja amo God ta titi jigari ai ta torari haite manera,” ainge ena.

## 10

### *Iesu na embo tapa 72 ikenu pambua*

1 Eto amita ambota Bada na embo tapa 72 ainge siriketo umbuto Iesu pambasuja degi ai ta embo heriso heriso ikenu da ari na ue kiti pambara 2 ke enu pambasi uo enana ta degi ke einge ena, “Be na pupusumbeto beto mitie sari ere ua rate ondeto umbari embo isapamane mane avoeto i be mamu ta degi penunu evujo pure embo nei ikau be ondare. 3 Ungo pambuvujo. Na ungo o ‘sheep’ meniundi avo isoro ino ta ikarako ere ona 4 Eto koro jurukari goru te eti savo te utu goru te mane umbuto pambasova, eto degi ta pahue embo ga ke ijie pekitie iji aijaja mane aisova 5 Eto embo ta bande ta toritie, ‘Peka ungota degi iroi’ ainge avo 6 pekari embo ai ta mitima kito no pekari avo amita degi iresuja te peka embo mane kito

pekari avo no degi ta egerembasuja. 7 Eto bande ari na mane aisova rate bande vahai ai ta pere irivujo. Eto pure embo na mine umbasuja amo javotohora avoeto bande ai ta indari do ikasora amo ungota mine ra, indivujo. 8 Eto da nainge toravo ungo pekitie indari do ikasora tapa avo indito 9 embomeni avo konditie, ‘God na tohota embomeni siriketo umbuto titi jigasuja iji avo ungota degi puvuto ere hua,’ ainge evujo, 10 Rate ungo da nainge toravo pekae uroro kito amo da tambuta pambuto embomeni ta degi ke einge evu ingore 11 ‘Ungota da ta oniho nangota utu ta bitari avo torovikaro bovurou ungota degi hajire ikasuja. Rate kivujo God na embomeni titi jigasuja iji avo auvetija,’ ainge evujo. 12 Eto ungota degi erena, iji kombu te ari sirikari iji te embomeni amita degi God na hajire ngahia be ngahia na ikau da Sodom ta embomeni na osaga isapa kesora aingeko mane kesora.

### *Da nei nei Iesu ke be ae ea (Matthew 11:20-24)*

13 Oio da Chorazin te da Bethsaida te ta embomeni ungota degi osaga pajire be puvuresuja. Eto ari sovera nei te nei te ungo keva avo da Tyre te Sidon te ta jo ta ari ainge aetena amo amita embomeni na ari sasapura matu toasi bo baike na kajari avo asuketo amisa na kutaetera rate ungo na ari sasapura toari uje aera 14 Rate God na ari siriketo hajire ikari iji te ungo na hajire ngahia be avo kesova da Tyre te da Sidon te ta embomeni na osaga kesora aingeko mane kesova. 15 Ungo Capernaum embomeni na God ta degi bitesa ere ova te God na au Satan iresuja degi ai beto pambasova. 16 Eto embo amuna ke no ingesuja amo ke nau ingesuja eto ke no toasuja ainge ke nau toasuja eto na toasuja. Ainge eto amina God na ikari embo amite tapa toasuja,” ke ainge enu irae enu

### *Embo 72 egerembeto puvua*

17 Embo tapa 72 amo pambuto pure tapa eo irae enu tunga javotoho



te egerembeto puvutuhue ke einge ea, “Bada, ahihi sasapura amite ambure neite neite te tapa amina no javo ta ke ere agi etera,” ainge eo, <sup>18</sup> Iesu ingito ke einge ena, “Pipiri utu ta sariambu eto enda ta beuja ainge nombo Satan na vovuoi kogovona <sup>19</sup> Eto kivujo, na ungota degi sovera ikitana amo o juhiri hatiresova vuvusi hatiresova te memenga mane kesova eto ungotenau kitoho embo ta sovera amo sovera ungota nanena iketena amina nembarira. <sup>20</sup> Rate ahihi sasapura na ungota ke agi uroro ungo tunga javotoho mane aisova te ungota javo Utu i ta kajari mitia avoeto tunga javotoho evujo,” ke ainge enu

*Iesu tunga javotoho eto osa osa ena*  
(*Matthew 11:25-27, 13:16-17*)

<sup>21</sup> Iji amikote Ahihi Otohu na tunga javotoho ari ikenu God ta degi pari einge eto ena, “Mama God utu te enda te ta Bada, ari erevi tapa amo kiari hotembari embomeni ta degi ikae harikae rate kiari umbae embomeni ta degi iketea, Mama amo no uje na ere oa avoeto osa ere ona. <sup>22</sup> Eto nau Mama na kiari tapa sovera tapa nau ingeni ta iketo toarira eto Mamo na vahai Meni kiarira eto Meni na vahai Mamo kiarira eto Meni na embo siriketo umbuto au Mamo kesora,” ke ainge eto <sup>23</sup> ahereketo ambotani ta pere ke einge ena, “Ungo titi na ere kogova ari avo embo amuna kesuja amina tunga javotoho aisuja <sup>24</sup> ungota degi erena peroveta isapamane eto enda ta ‘king’ isapamane na ungo ari do ere kogova avo kesi uje isapamane ere uaetera te kiae eto ungo ere ingihova avo ingesi uje ere uaetera te ingae,” ainge enu

*Da Samaria embo javotoho ta timu hatirari ke*

<sup>25</sup> Ke pepeni kiari embo vahai na ereto heteto Iesu eto kesi ue ke einge ena, “Ate poekari Embo, na ari do ue irari daroho hoteto umbano avo ejo ingone,” ainge enu <sup>26</sup> Iesu na ke mine

einge ena, “God ta ke do ke pepeni ta kajari mitia avo umo eteketo kogoe?” ainge enu <sup>27</sup> Embo amina ke einge ena, “God ta ke pepeni amo umo no Bada God avo no jo tapa na ahihi tapa na sovera tapa na eto hotembari tapa na osa ue no hamo simba ue osa eoa ainge nombo no namei kamei tapa osa ejo,” ke ainge enu, <sup>28</sup> Iesu na einge ena, “Umo ke be erea. Umo ari ainge avo ue irari daroho ta iresoa,” ainge enu <sup>29</sup> embo amina amita hamo orekitie Iesu ta degi ke einge eto ingina, “Aravora te nau namei kamei amo amunure?” ainge enu, <sup>30</sup> Iesu na ke mine timu hatirari ke na einge ena, “Judea embo vahai amo Jerusalem eto da Jericho degi ta pahunu pegene embopo na puvuto embo avo teo beto degi ta ahunu amita donda tapa oreto umbuto embo amo toto pambua <sup>31</sup> Eto pahuo Judea ta priest vahai na degi ta puvutuhumite embo avo kito degi ovitiho ta embuto seniketo pahunu <sup>32</sup> Judea ta clan javo Levi embo vahai degi ta puvuto embo avo kito tiumbeto pahunu, <sup>33</sup> (Samaria embomeni amo Judea ta kitoho ra.) enda Samaria embo vahai amo puvutuhumite embo tea avo kito jo enu <sup>34</sup> ‘oil’ te ‘wine’ te amina sasaga egeto bo na sorereketo tigitito ohimbeto umbuto amita o ‘donkey’ hamo ta ikenu arumbenu umbuto pambuto isa pambuora embo ta evari bande ta toreto embo simba ue evunu <sup>35</sup> iho bujenu Samaria embo na koro heriso umbuto bande mamo ta ikitie ke einge ena, ‘Embo erevi simba ururo no bande ta mine doinge aisuja amo nane egerembeto puvuto no mine ikasona,’ ainge eto pambuna,” ke ainge Iesu na enu irae enu <sup>36</sup> ke pepeni kiari embo ta degi ke einge eto ingina, “Embo pegene embo na tea amita namei be amo amuna enu,” ainge enu <sup>37</sup> embo na, “Jo ari embo amo amita namei be ra,” ainge enu Iesu na, “Ari ainge nombo eto pambuto ejo,” ainge ena.

*Iesu na Mary te Martha te ga umoro ena*

<sup>38</sup> Eto Iesu te amita ambotani te aingeto degi ta pahumite da vahai ai puvuto toreo pamone javo Martha amina amita bande ta indora oru enu toreo <sup>39</sup> amita jao Mary na Iesu ta utu ta arumbeto amita ate poekari ke ingihe mitinu <sup>40</sup> Martha na embomeni unduresi donda agari jivari eonga ere umite osaga kito Iesu ta degi pambuto ke einge ena, “Bada, na eonga agari jivari ngahia ere ona avoeto umo jo ari embo kito ejo nau jao hoeto hondate ai,” ainge enu <sup>41</sup> Iesu na ke mine einge ena, “Martha, Martha, no osaga na no oti pe ere vivitia rate <sup>42</sup> Mary ere ua vahai ainge aetea amina no osaga irae aetija te Mary na javotoho ere ue avo embo na mane taekasuja.”

## 11

*Iesu na pari ate poekena (Matthew 6:9-13, 7:7-11)*

<sup>1</sup> Eto Iesu na degi vahai ai ta pari enu irae enu amita ambotani vahai na Iesu ta degi ke einge ena, “Bada, John na amita ambotani ta degi pari ate poekena ainge nombo eto nango ta degi pari ate poekejo,” ainge enu <sup>2</sup> Iesu na enana ta degi ke einge ena, “Ungo pari ta ke einge evujo, Mama javo no amo otohuru ra aisora. Umo embo titi jigeso aiji avo ejo huroi <sup>3</sup> Eto iji hekeri ta nangota indari ikejo umbare <sup>4</sup> Eto embomeni na nangota degi ta sasapura eora avo hotembeto tora ainge nombo nangota ari sasapura, Mama God, inena hotembeto tojo, eto engekari ta nango kiti umbaojo,” ainge eto <sup>5</sup> ke nei enana ta degi einge ena, “Eto umo embo vahai amuna mume tumba te namei ta degi pambuto <sup>6</sup> ke einge aisoa, ‘Namei, nau namei nei avo degi koso be puvija te do ikano indesuja avo mana mana eto inena ‘bread’ <sup>3</sup> ainge ikao pambuto ikano indoja puvena,’ ainge ao <sup>7</sup> amina bande jo ta mitie ke einge aisuja, ‘Na mane ujasoa te toto pambujo. Bokiri matu

ahureketena eto na nau meni undi ga ere evena avoeto na mane ereto indari ikasona,’ ke ainge asuja. <sup>8</sup> Eto ungota degi erena amo no namei avoeto mane ereto donda ikasuja te inena kaiketo evo ujuja aisoa avoeto ereto no uje avo ikasuja. <sup>9</sup> Avoeto ainge nombo amo penunu ao God na ikasuja jombure ururo God na au kesoa eto bahihiri ao God na hirikau torasoa <sup>10</sup> eto erena amo penunu embopo na umbasora jombure ari embopo na kesora eto bahihiri ari embopo na torasora. <sup>11</sup> Ungo nei nei meni hatira te ra. Eto no meni na no degi ta umo o penunu aisuja amo inena o koso o mane ikasoa <sup>12</sup> eto di vuju penunu aisuja amo o vuvusi mane ikasoa <sup>13</sup> Eto ungo embo sasapura rate naingeto ungota meniundi ta degi hande jajavotoho ikasova avo ungo kiarira eto Mama Utu ta iriuja amo javotoho avoeto amita degi penunu aisoa amo amina Ahihi Otohu avo no degi ta ikasuja,” Iesu na ainge ijie ate poekena,

*Iesu te Beelzebul te (Matthew 12:22-30, Mark 3:20-27)*

<sup>14</sup> Eto embo vahai avo ahihi sapura na enu ke ae unu Iesu na kito kurumbenu pahunu ke ena avo embomeni na kito mani mini ea. <sup>15</sup> rate embo nei uhoho na ke einge ea, “Ahihi sasapura ta embo okose javo Beelzebul amita sovera na ahihi sasapura kurumbeuja,” ainge eo <sup>16</sup> embo nei uhoho na Iesu eto kesi ue Utu ta hajire au kesi penunu ea. <sup>17-18</sup> Rate Iesu na enana ta hotembari jo ta avo kito enana ta degi ke einge ena, “Eto ungoni Beelzebul ta sovera na ahihi sasapura kurumbari ke ereva te enda vahai embomeni na hoeto ungo eonga isoro ururoro enda sapura aisuja. Eto bande vahai embomeni na ereto isoro aro sapura asuja ainge nombo ahihi sasapura na ereto ahihi sasapura ga isoro asora amo Satan ta irari degi sapura aisuja. <sup>19</sup> Eto na Beelzebul ta sovera na kurumbari ke ereva rate ungo Judea embo nei uhoho na amuta

sovera jigama ue ahihi sasapura kurumbeove? Ungo ke ereva amo ungota ari na au ke be amo kesova.

<sup>20</sup> Rate amo God ta sovera na ahihi sasapura kurumbitione kito God ta titi jigari amo ungota degi matu puvurarira. <sup>21</sup> Eto buvure embo na amita ki emi umbuto amita bande simba ue irirou amita donda javotoho iresuja <sup>22</sup> Rate embo nei buvure embo ainge mane sovera pajire be amina puvuto isoro eto nembeto buvure embo ta ki emi tumota ere ua avo oreto uhue donda tapa umbuto pambuto amita namei kamei ga hande eto umbasuja <sup>23</sup> Eto embo nau mane amo kitoho embora eto umo namote o andirari embo mane amo o ujekari embora.

*Ahihi sasapura egerembeto puvuresora*  
(Matthew 12:43-45)

<sup>24</sup> Eto ahihi sapura na embo toto jangu indari degi jombure ue pahumakara ojaga tambu pere kito nau irari matu ta egerembeto pambasona ke ijie <sup>25</sup> pambuto amita da matu avo matu gajiketo boreketo umbari pambari avo kito tunga javotoho ue <sup>26</sup> egerembeto pambuto amita namei kamei sasapura tapa 7 avo eto umbuto egerembeto puvuto embo ta jo ta toreto iresora. Eto embo amita sapura matu amo isapa rate jo be egae hamo pere egena avoeto ahihi sasapura torari haite kito toreto aro sapura be aisuja.”

*Tunga javotohoari be*

<sup>27</sup> Ke ainge ijinu pamone vahai embo ta ugorota ta amina ke isara na einge ena, “No aja ta oti umo uhaja avo javotohora eto umo aja na emi kaitaja amo javotohora!” ainge enu <sup>28</sup> Iesu na ke mine einge ena, “Umo erea aravorate javotoho be amo embo amuna God ta ke ingito agi aisuja,” ainge ena.

*Pharisee embopo na ari peni be kesi penunu ea*  
(Matthew 12:38-42)

<sup>29</sup> Eto embomeni isapamane be vahaita puvuto torukeo Iesu na

itiketo ke einge ena, “Ungo embo eha miteva amo ari sasapura embomenira. Ungo God ta hajire kesi uje ere ova avo mane au kesova rate Jonah na ena avo au kesova (Eto Jonah amo umo o peni amita oti jo ta iji 3 irae enu hora ta puvuto pere ga tukenu hora ta benu da Ninevah embomeni na kia.) <sup>30</sup> Eto Jonah na da Ninevah embomeni ta degi do enu kia avo Embo ta Meni na ungo eha miteva amita degi au kesova. <sup>31</sup> Eto enda kaina ta titi jigari pamone na enda tutumota eto puvunu King Solomon ta kiari avo enu ingina eto king Solomon amo isapa rate ungota degi puvija amo peni be rate amita ke ingae ere ova avoeto iji kombu ari sirikari iji te enda kainata titi jigari pamone na ereto ungo pehumba aisuja. <sup>32</sup> Eto nei amo da Ninevah embomeni na Jonah ta ke ingihe jo hapereketo ari sasapura toa rate Jonah amo isapa ra eto ungota degi puvija amo peni be avoeto iji kombu ta ari sirikari iji te da Nineveh embomeni na ungota degi ereto pehumba aisora.

*Hamo ta usasa*  
(Matthew 5:15, 6:22-23)

<sup>33</sup> Eto embo na horivo ijimbeto umbuto mane gaga suvu ta ikasuja eto ovu jo ta mane ikasuja te i araha ta tembau embomeni toreto usasa kesora. <sup>34</sup> Eto no titi amo hamo ta usasa ra. Titi javotoho iresuja amo no hamo tapa usasa na enetasuja te titi sapura asuja amo hamo tapa mume aisuja <sup>35</sup> Eto no hamo ta usasa seiketo mume aisuja avoeto simba eto kogoejo. <sup>36</sup> Eto no hamo na usasa ue jo tapa enetasuja amo piri piri au no hamo ta usasa na jo te tapa enetitirou usasa nei na kajau usasa pere aisuja,”

*Iesu na Pharisee embopo pehumba ena*

(Matthew 23:1-36, Mark 12:38-40)

<sup>37</sup> Ke ainge ijie mitinu Pharisee ari embo vahai na amita bande ta indoja oru enu pambuto arumbenu <sup>38</sup> Pharisee embo na Iesu ta ingeni

egae avo kito uje ae unu <sup>39</sup> Iesu na amita degi ke einge ena, “Ungo Pharisee ari embomeni na atungu te heva te hamo pere egitie jo ta amo haja vaja uje isapamane te ari sasapura neite neite amina tongopa arira. <sup>40</sup> Ungo kiae kiae embopo, ungo ove ari embo na ungota hamo te jo te aere? <sup>41</sup> Eto ungota jo ta do mitia avo God ta degi pene ikaeteva amo jo te hamo te tapa avo egaetija. <sup>42</sup> Jove jove, Pharisee embomeni ungo God ta degi hande ikasi ue donda isasaraho pujo jene hambuga ainge kateke kateke eto tapa 10 ainge iketo vahai amo God ta ra eova rate God osa ari te embo ta degi javotoho ari amite tapa avo ae tova. <sup>43</sup> Jove, jove, ungo Pharisee embomeni. Ungo ke kasari bande ta toreto embo pepeni ta avo arumba ai ta arumbeova eto market ari degi ta isa ururovo kogue jakeka ara eova <sup>44</sup> Jove, jove, ungota degi erena. Ungo use aingeko rate hajire atara na jorereto ikae avoeto embomeni na kiae ue hamota haito pambuora rate jo ta amo masa kakesa mitia,” ke ainge enu, <sup>45</sup> ke pepeni kiari embopo na ke einge ea, “Ate Poekari Embo, umo ke ainge ijie nango te tapa isembitea,” ainge eo <sup>46</sup> Iesu na enana ta degi ke einge ena, “Jove, jove ungo ke pepeni kiari embopo. Ungo embomeni ta degi bouka ikeova amo umbuto pambari inono aera te ungo na bouka aravo ingeni singi na tame ae ra. <sup>47</sup> Jove, jove erena peroveta ototohu mamatu amo ungota mamamane na teo ambuvujekeo use amo ungo na gajika boreka ue simba eova. <sup>48</sup> Rate amo ungota mamamane ta ari sasapura avo kogue javotoho ke ijie use gajika boreka eova <sup>49</sup> Eto God na amita kiari na ke einge eria, ‘Na nau peroveta te apostero te ikano enana ta degi pambari te taro amburesora eto nei taro memenga kesora. <sup>50</sup> Eto enda ehara ta ikena iji te eto puvuto eha oroho emikote amo peroveta tapa ta sasaga amo enana ta ingeni ta avoeto

enana ta meniundi na hajire kesora <sup>51</sup> amo Abel ta sasaga ta eto pambuto peroveta Zechariah amo temple jo ta pene gaga ugoro ai teo ambuna amita sasaga tapa ta mine amo ungotona ikitie hajire kesova.’ <sup>52</sup> Jove, jove, ungo ke pepeni kiari embopo embomeni na kiari umbaetera te ungo na kiari umbari ta bokiri tahi oreto umbuto ondikarira. Amo ungota kiari umbari amite embo nei ta kiari umbari te tapa avo ungo na taekova,” ke ainge enu irae enu <sup>53-54</sup> degi avo toto pambuna. Eto ke pepeni kiari embopo te Pharisee ari embopo te aingeto Iesu ke nei nei ijie ke sapura vahai au ingesi kaiketo engekea.

## 12

*Ari tapa ahurekari avo God na hirikau kesora*  
(Matthew 10:26-27)

<sup>1</sup> Eto ari ainge uo embomeni ‘thousand’ doitoko vahaita puvuto utu ta mine hatira ue mitio Iesu na kiti amita ambotani ta degi ke einge ena, “Enana Pharisee ari embomeni na ari javotoho avo ke be na ae ate kitira eora ‘bread’ ta pajirari sivo na pajito eneteuja ainge nombo euja avoeto be kogue irivujo. <sup>2</sup> rate enana ta ari tapa ahurekari avo God na hirikau kesora eto ondikari avo araha ta puvurou kesora <sup>3</sup> Eto ke mumete eora avo iji te ijirou ingesora eto bande jo ta kimasa na eora avo araha ta gagaha eto ijirou ingesora.”

*God joru evujo*  
(Matthew 10:28-31)

<sup>4</sup> “Nau namei kamei, ungota degi erena, tari amburari amina ari nei ari haite manera avoeto tari amburari embo avo joru mane aisova te <sup>5</sup> joru aisova embo amina teto umbuto gosukau memenga kiari degi ta beto osaga kesova. Ungota degi erena, ari einge aisuja embo God avo joru evujo. <sup>6</sup> Eto di siripeta ta mine amo peni mane ra. Di 5 avo 2 toea na ombuto umbaetera rate God na di siripeta vahai avo mane



jenambuaisuja. <sup>7</sup> avoeto joru aojo, di amo nombo manera, rate ungo amo nombo bera. Ungota siro tu tapa doingere amite tapa God na kiarira.”

*Keriso ke be ari*

*(Matthew 10:19-20,32-33, 12:32)*

<sup>8</sup> “Eto ungota degi erena, embo amuna, ‘Na Keriso ke be ijie ambo ambo ere ona avoeto na amita tohoro,’ ke ainge embomeni ta degi aisuja amo embo avo naura ainge Utu ta God ta anera ototohu ta degi aisona. <sup>9</sup> rate embo amuna embomeni ta titi ta na ke be ae aisuja amo Utu ta God ta anera ta degi embo avo naura ke mane aisona. <sup>10</sup> Eto embo amuna Embo ta Meni ta degi ari sapura eto urumbasuja amo hotembeto toari inono ra te embo amuna Ahihi Otohu urumbasuja amo hotembeto toari inono aera.

<sup>11</sup> Eto ungota kitoho na ungo ganoka asi umbuto ikaro ke kasari bande ta hetasova titi jigari embopo eto embo pepeni ta tombu ta heteto ke do aisova eto naingeto aisova avo hotembavojo <sup>12</sup> iji amina ke do aisova amo Ahihi Otohu na au ingihe aisova,” ke ainge avo onde katenu irae enu

*Donda umbari uje isapamane amo sapurara*

<sup>13</sup> Embo vahai amina embo ta ugorota heteto ke einge ena, “Ate Poekari Embo, nau mama ambija amita donda hoteto umbera avo nau namei ta ejo na kateketo tuna ikae,” ainge enu <sup>14</sup> Iesu na ke mine einge ena, “Na amuna etei ungota ari sirikari donda kateketo ikari simba ari embo etene,” ke ainge eto <sup>15</sup> embo tapa ta degi ke einge ena, “Be kivujo, donda umbari uje isapamane amo sapurara. Embo ta vasiri te irari ta hajire amo haja baja umbari ai ta manera.” ke ainge <sup>16</sup> eto timu hatirari na ke einge ena, “Haja vaja embo amita enda na be isapamane ikenu <sup>17</sup> kito ke einge hotembena, ‘Enda ta be isapamane etija harau nainge ikano irou? <sup>18</sup> Na einge aisona, harau mamatu avo aimbeto

eha pepeni pere iketo ai ta nau pure ta be te haja vaja tapa jo ai ta ikano mitirou <sup>19</sup> Nau jo ta einge hotembasona, donda isapamane be mitia avoeto jua koso vahai be indari matu erevi jigama ue nau ahihi ta jangu indari koso kaso be ue tunga javotoho be ue iresona,’ ke ainge jo ta hotembitinu <sup>20</sup> God na kito amita degi ke einge ena, ‘Umo kiae kiae ere oa. No ahihi mume eha oroho umbano irae aisuja avoeto no donda nununga etea avo embo amuna umbau?’ ainge ena <sup>21</sup> avoeto ungota degi erena, embo amuta donda hamota hamota iresuja amo God ta titi ta amo haja vaja embo manera,” ke ainge eto

*God tumota evu*

*(Matthew 6:25-34)*

<sup>22</sup> Amita ambotani ta degi ke einge ena, “Avoeto na ungota degi erena. Ungo do indito iresova eto do asuketo iresova avo hotembu hotembu avojo. <sup>23</sup> Eto no irari amo indari pere mane eto no hamo amo asukari pere manera <sup>24</sup> Di oga kiova amina donda be koveto tureto umbuto harau ta mane ikeuja rate God na amita indari ikeoi indiuja. <sup>25</sup> Rate embo amita hotembari isapamane amina au amita enda ta irari iji koso mane aisuja. <sup>26</sup> Ungo ari vahai avo ari inono ae avoeto ari neite neite avo hotembu hotembu avojo. <sup>27</sup> I buji ove neite neite mitera avo kogue hotembevujjo. Enana pure ae eto bo kembae rate donda embo be King Solomon amita bo asukari amo i buji emita kiari sago javotoho ainge manera. <sup>28</sup> Rate God na i buji ta degi bo asukari javotoho ikeuja eto iji nei amo karaun eto enda ta beoi embo na toreketo umbuto i ta ikeora evekeuja te i buji amo isapa ra te embo avo peni avoeto God na ungota degi asukari mane ikaute? Rate ungo God tumota be ae eova <sup>29</sup> Ungo hotembari isapamane ue indari do indesova avo hotembu hotembu avojo <sup>30</sup> enda tapa ta embomeni na indari pure eora eto ungota hamo ta ujeje vahai amo in-

dari avo ungota Mama God na matu kiarira <sup>31</sup> avoeto indari te asukari te mane hotembasova te God ta titi jigari avo jombure evujo eto amina ungota indari te ombari te avo unduresuja

*Hajae vajae Utu i ta mitia  
(Matthew 6:19-21)*

<sup>32</sup> Embomeni heriso nau ke erevi joru avojo. Ungota Mama na amiga heteto titi jigova uje ere ua. <sup>33</sup> Ungota donda ombuto koro umbuto donda ambu embopo ta degi hande ikavo mine God na ikasuja avo mane irae aisuja avoeto ungota haja vaja avo God iriuja degi aita nununga evujo amo pegene embo na mane umbasuja o soan na mane kahumbasuja rate teho daroho iresuja <sup>34</sup> amita be amo no donda mitia degi ai ta no jo te hotembari te tapa amo mitia

*Ungo pure embopo nununga eto simba evujo*

<sup>35-36</sup> Bande mamona na pondo ta pambija aravo egerembeto puvuto bande ta torasi bahihiri aisuja avoeto ungo bande ta pure embopo na horivo unduketo bo asuketo nununga eto simba evujo <sup>37-38</sup> Eto ungota degi erena bande mamona na tumba te retemo iho unga te rete puvuto pure embo nununga eto mitiroro toreto kogue ke einge aisuja, 'Ungo pure embo jajavotohora,' ainge eto pondo umbuto puvuresuja avo hande au indesora. <sup>39</sup> Erevi be kivujo. Eto bande mamona na pegene embo iji deina pegene aisuja amo duru ingaetija amo simba ururou pegene embo na puvuto bande pejeto toritirou amo matu taekau pambaetija. <sup>40</sup> Avoeto nununga eto irivujo. Embo ta Meni iji deina puvuresuja amo ungo kiaera." ke ainge enu

*Pure embopo jajavotoho te saspura te  
(Matthew 24:45-51)*

<sup>41</sup> Peter na ke einge eto ingina, "Bada, umo timu hatirari ke emonango ta degi eretemo embo tapa

ta degi ere?" ainge enu, <sup>42</sup> Bada na ke mine einge ena, "Bande jota pure embopo ta titi jigari avo bande mamona na amita ari javotoho avo kito tumota ue pure embopo ta indari hande au indie amita ari ainge nombo evujo <sup>43</sup> Eto titi jigari na ainge ururou Bande Mamona na egerembeto puvuto kito tunga javotoho aisuja <sup>44</sup> avoeto erena, Bande Mamona na au amita haja vaja tapa simba aisuja. <sup>45</sup> Rate titi jigari embo na Bande Mamona iji nei na puvuresuja avo hotembitie pure embopo te kakara te torue indari te umo te indito kava ururou <sup>46</sup> Bande Mamona na teun ta puvuto kito tumota ari ujeae eto hajire peni amo jeto hevasuja <sup>47</sup> Eto pure embo na pure mamona ta ke agi ari uje aeue kupi kupi aisuja hajire peni vahai ikau kogurou tasuja <sup>48</sup> Rate pure mamona na pure embo ta degi pure do aisuja amita ke ikae ingae avoeto pure sapura aisuja avoeto hajire isapa ikau kogurou tasuja. Eto embo na embo ta degi pure pajire ikasuja amo irae au kesi uje aisuja. Eto God na embo ta degi kiari pajire ikau umbau pure pajire aja uje aisuja."

*Iesu na enda undukau evekaja pu-  
vuna  
(Matthew 10:34-36)*

<sup>49</sup> "Na puvena amo enda undukano evekaja puvena. Avoeto itiketo undukasi uje ereona <sup>50</sup> te kiti amo embo na umo na bapataito eora ainge itoko na memenga na osaga na bapataito aisuja avo hotembu hotembu ue osaga memenga kogue mitena. <sup>51</sup> Na enda ta peka umbari embo avo puvene ere hotembiteve? ainge manera. Na puvena avoeto embomeni na kateketo isoro mine ara aisora. <sup>52</sup> Amo bande vahai ai ta embo tapa 5 mitima kateketo 3 amina ereto 2 amita degi tumo aisora eto 2 amina ereto 3 amita degi tumo aisora <sup>53</sup> Amo meni na mamona ta degi tumo aisuja eto mamona meni ta degi tumo aisuja, eto e na iae ta degi tumo aisuja eto iae na e ta degi tumo

aisuja, eto tate na meni ae ta degi tumo aisuja eto meni ae na tate ta degi tumo aisuja,”

*Iji eha do aingere*

*(Matthew 16:2-3)*

<sup>54</sup> Ke ainge eto embo tapa ta degi ke einge ena, “Ungo oje sose hena ta puvutohuoi kogue ‘ga puvuto ere hua’ ainge ijiove ga puvuto beuja <sup>55</sup> nei ungo pisara kaina ta puvutohuoi kogue ‘iji bevere puvuto ere hua,’ ainge ijiove puvuja. <sup>56</sup> Ungo hotembari heriso embopora. Ungo utu te enda te ta hajire avo kogue do puvuresuja amo ungo kiarira te iji eha emite ari do puvija avo ungo kito kiarako ere ova.

*Ungo ganoka aisuja Embo ga peka evujo*

*(Matthew 5:25-26)*

<sup>57</sup> Ungo ari javotoho do aisova amo do eto siriketo ari uje ae ere ove? <sup>58</sup> Ungo koto ari degi ta pahue ungo ganoka aisuja Embo ga ke ijie peka evujo. Eto ainge ae amo amina ungo umbuto pambuto koto ta ke sirikari embo amita ingeni ta ikau umbuto tipura simba ari embo ta ingeni ta ikau umbuto tipura ta gosukasuja. <sup>59</sup> Eto ungo ai ta mitie ungota ari sasapura ta mine isapa te peni te umbasova,” ainge Iesu na ena.

## 13

*Jo ahereketo ari sasapura tovu*

<sup>1</sup> Eto iji amite embo nei uhoho na Iesu ta degi puvuto amita degi ke erevi harikea, “Galilee embopo na God ta degi hande ikasi ue o torore governor Pilate na puvuto embo avo tetei ambere enana ta sasaga o ta sasaga ga vahaita beto jijinga etija” ke ainge ijie hihi tirio <sup>2</sup> ingito enana ta degi ke einge ena, “Enana Galilee embo nei uhoho ainge mane ari sasapura embopo avoeto hajire ikari ke erevete? <sup>3</sup> ainge manera avoeto nane erena, Eto ungo tunga haperekae aisova amo ungo te tapa sasari aisova. <sup>4</sup> Eto nei ainge amo Siloam ta bande koso vahai na burereketo

beto Jerusalem embo tapa 18 tetei ambera amo Jerusalem embo nei nei ainge mane embo sasapura avoeto tetei ambera avo ere hotembiteve? <sup>5</sup> Ainge manera. Ungota degi erena, eto ungo tunga haperekae aisova amo ungo te tapa sasari aisova.” ainge eto

*I junga ta be ekae amita timu hatirari ke*

<sup>6</sup> Timu hatirari ke einge ena, “Embo na amita pure ta pambuto i junga urari avo be kesi pambuna rate amita be irae <sup>7</sup> avoeto amita pure simba ari embo ta degi ke einge ena, ‘kijo na ei ta puvuto jua tapa 3 etena amita jo ta i junga amita be jombure ere ovona rate tambae avoeto enda erevi mane aijaja aisona avoeto jejo irae ai’ ke ainge enu <sup>8</sup> pure embo na ke mine einge ena, ‘Jua vahai emita jo ta tojo iroi, na amita susu ta enda koveto jere ikasona. <sup>9</sup> Eto jua nei amita jo ta be ekau kito amo toasoa te be ekae kito jasoa.’” ke ainge Iesu na ena.

*Popora ari pamone avo Iesu na jangu indari iji te enu kondena*

<sup>10</sup> Eto jangu indari iji vahai Iesu na ke kasari bande ta ke ate poekitie mitinu <sup>11</sup> pamone vahai avo ahihi sapura na torenu ku okokombari jua tapa 18 amita jo ta ambure umbuto mitiaetija <sup>12</sup> avo Iesu na kito jage enu ereto inu ke einge ena, “No ambure na pundurari avo ere sijekitona” ainge ijie <sup>13</sup> ingeni hamo ta tembitinu tambu eto heteto God jakeka ena. <sup>14</sup> Rate ke kasari bande ta titi jigari embo na Iesu na jangu indari iji te embo enu kondena avo kito tumo ue embomeni ta degi ke einge ena, “Pure ari iji amo tapa 6 mitia amita jo ta ungo kondaja puvuvujo rate jangu indari iji te mane kondaja puvuresova,” ainge ijinu <sup>15</sup> Bada na ingito ke einge ena, “Ungo jo heriso ari embopo. Ungota o donkey retemo cow re handukari mitia avo jangu indari iji te bujeketo umbuto pambavo umo mane indoro? <sup>16</sup> Rate Abraham ta iae erevi Satan na jua

tapa 18 amita jo ta pundurari avo jangu indari iji te mane sijekano?" Ke ainge ijinu <sup>17</sup> Iesu ta kitofo na me pajire be kia. Eto embomeni na Iesu ta ari nei te nei te ena avo kito tunga javotoho ea.

*I mustard ta be amita timu hatirari ke*

*(Matthew 13:31-32, Mark 4:30-32)*

<sup>18</sup> Eto Iesu na embomeni ta degi ke nei einge ena, "God na embo amita toho siriketo umbuto titi jigesuja amo do aingekore? Eto timu hatirari ke naingeto ke be mo harikaro? <sup>19</sup> Eto i javo 'mustard' amita be isapa vahai avo embo na umbuto amita pure ta urenu pajito hatu kateto peni vahai enu di na puvuto amita hatu ta nga ikea, aingekora." ainge eto

*Bread pajirari sivo ta timu hatirari ke*

*(Matthew 13:33)*

<sup>20</sup> Ke nei einge ena "Eto God na tohota embomeni siriketo umbuto titi jigesuja amo do aingekore? <sup>21</sup> Eto pamone na bread borasi ue pajirari sivo isapa jojeketo 'flour baiki' vahai ainge sivo ga tapa tavenu pajito peni vahai ena, aingekora." ke ainge Iesu na ena.

*Bokiri pe isapa ta timu hatirari ke*

*(Matthew 7:13-14,21-23)*

<sup>22</sup> Eto Jerusalem pambasi degi ta pahue da ari na eto toritie embomeni ate poekena. <sup>23</sup> Eto embo vahai amina Iesu ta degi eto ingina "Bada, eto God na embo heriso oreketo umbautemo isapamane umbau?" ainge enu <sup>24</sup> embo tapa ta degi ke einge ena "Embo isapamane na etokito torasora rate torari haite mane aisuja avoeto ungota degi erena, pe isapa paukari ai ta kihon kahon eto pambuvujo. <sup>25</sup> Amo bande mamona bokiri ahurekau puvuto ahone ta heteto bahihiri ue 'Bada hirikejo torare' ainge ijirovo bande mamona 'Ungo davona embore amo na kiaera' ainge ijirou, <sup>26</sup> ungo na

ke mine einge aisova, 'Inena nangota da tambuta ate poekitioe ungoti indari vahaita indiaetera aravora,' ainge ijirovo <sup>27</sup> amina ke einge aisuja, 'Ungo nainge eto puveva amo na kiae avoeto erena ungo ari sasapura embopo na toto pambuvu' ainge ijirou peroveta mamatu tapa amite Abraham te Isaac te Jacob te aingeto God ta titi jigari degi ta matu torari iriora avo kogue ungo araha ta gosukari avoeto <sup>28</sup> sisi sasi ijie ti kambuto kiroro kiroro aisova. <sup>29</sup> Eto embo na ihane ta sose ta kaina ta patina ta eto puvuto God ta titi jigari ta toreto gaga ta arumbeto pondo indesora. <sup>30</sup> Eto kivu, embomeni na 'na na' ijie kiti ere pahora amo ambota torasora eto ambota ere pahora amo kiti torasora" ainge ena.

*Iesu na da Jerusalem osa ena*

*(Matthew 27:37-39)*

<sup>31</sup> Eto iji amite Pharisee ari embopo nei uhoho na Iesu ta degi puvuto ke einge, ea, "Embo Herod na umu tau amburoa uje ere ua avoeto degi erevi toto pambu" ainge eo <sup>32</sup> ke mine einge ena, "Sevahe ino amita degi pambuto ke einge evu ingoi 'Na iji heriso amina amo ahihi sasapura kurumbasona ambure embopo kokondekasona eto iji nei vahai amina pure nau tapa ano irae aisuja' <sup>33</sup> aravorate da Jerusalem ta pahurono iji 3 irae aisuja. Eto peroveta tapa amo da Jerusalem ta sasari eora te peroveta vahai amo enda nei ta sari aja ereite? <sup>34</sup> Jove jove, da Jerusalem. No embomeni na peroveta tapa no degi ta ikari avo atara na gosuketo toruove ambuvujikitiaetera. Rate na ungoti meniundi avo di ohora ta gati na kakareketo umbarako asi ere ovona te ungo na uje ae ere ova. <sup>35</sup> Ungoti irari da avo God na ungoti ingeni ta ere toturitia avoeto erena, ungoti na mane kesova te 'Bada God ta javo ta puvuto ere hua amo embo javotohona' ijie na kesova."



## 14

### *Iesu na embo enu kondena*

<sup>1</sup> Eto jangu indari iji vahai Iesu na Pharisee ari embo peni amita bande ta pondo indesi pambuto mitinu embomeni areto Iesu kogue mitio <sup>2</sup> embo vahai amo ingeni te utu te buru karu ari avo mitinu kito <sup>3</sup> ke pepeni kiari embopo te Pharisee ari embopo te ta degi ke einge ena, “Eto embo na jangu indari iji te embo kondasuja amo ke pepeni poekaute mo mane poekau?” ainge enu <sup>4</sup> embomeni ke mine ae eo kito embo amita utu ingeni buru karu ari avo enu sisikenu, ikenu beto pahunu <sup>5</sup> embomeni mitia amita degi ke einge eto ingina, “Eto ungo embo amita meni retemo o cow rete avo umo timbari hoto ta beasuja ungo embo amuna jangu indari iji te amo jigito gorukau bitou?” ainge eto inginu <sup>6</sup> enana ke mine ari inono ae ea,

### *Pondo ta embo peni ke ijie arumbeto indiora*

<sup>7</sup> Eto pondo indora oru ea embomeni na bande jo ta toreto embo peni ta arumbari besi avo kito arumbitio Iesu na kito embomeni ta degi timu hatirari ke einge ena, <sup>8</sup> “Ungo pondo ta puvuto na embo peni ra ainge ijie embo peni ta avo arumba ai ta arumbavojo. Eto ainge aisoa amo embo peni be avo puvutuhuru <sup>9</sup> pondo mamona kito no avo arumba avo amita degi ta ikasi ue umo au ereto ku ta pambuto arumbitie me kesoa. <sup>10</sup> Rate umo pondo indoa oru aro pambuto kito pondo bande ta toreto ku hena ta arumbejo eto pondo mamona puvuto umo kito au umo embo ta titi vuju ta arumbitiro embomeni na kito jakeka aisora. <sup>11</sup> Eto amita be amo embo amuna na ahamo embora ainge ijie puvuresuja amo au maevo aisuja rate embo amuna na embo mane maevo ra ijie puvuresuja amina ahamo embo aisuja.” ainge ijie <sup>12</sup> Iesu na pondo mamona ta degi ke einge ena, “No pondo amo peni retemo isaparami no namei kamei te

no da vahai embomeni te javo vahai embomeni te haja vaja embopo te oru mane aisoa, amo no pondo mine ikaro iraesuja avoeto. <sup>13</sup> Rate pondo asi uje eto kito amo popora embo hoivo embo titi kuru ari embo kini umbari embo pondo mine ikari haite mane embo avo oru ao puvuto no pondo indesora <sup>14</sup> Eto ambota embo jajavotoho vasiri te erasora iji no pondo ta mine uhue tunga javotoho aisoa” ainge ijinu

### *Pondo peni vahai ta hihi (Matthew 22:1-10)*

<sup>15</sup> Embo vahai gaga ta arumbeto mitina amina ingito ke einge ena, “Eto embo amuna God ta titi jigari degi ta toreto pondo indesuja amina tunga javotoho be aisuja,” ainge enu <sup>16</sup> Iesu na amita degi hihi einge tirina, “Embo vahai na pondo pajire be umbuto embo isapamane oru ena <sup>17</sup> Eto pondo iji puvunu pondo mamona pure embo vahai ikenu pambuto oru ari embo ta degi ke einge ena, ‘Pondo matu nununga etija indesi have’ ainge enu <sup>18</sup> enana pondo indari uje ae ue degi senikari ke ijie embo vahai amina ke nei einge ena, ‘Ajato erena na enda vahai avo koro na ombuto umbuto pambuto kesi uje ere ona avoeto mane pambasona’ ainge enu <sup>19</sup> embo nei na einge ena, ‘Aja to erena rate na nau pure ta enda kovari o cow tapa <sup>10</sup> ainge koro na ombuto umbuto pambuto kesi uje ere ona avoeto mane pambasona,’ ainge enu <sup>20</sup> embo nei na ke einge ena, ‘Aja to erena rate na kakara eha jimbena avoeto mane pambasona.’ Ke ainge pere eo <sup>21</sup> ingito egerembeto pambuto pondo mamona ta degi enu ingito tumo ue amita pure embo ta degi ke einge ena, ‘Aravora te degi ari na ue hoivo embopo te kini umbari embopo te popora embopo te titi kuru ari embopo te tapa ejo pondo ta hurore,’ ainge enu <sup>22</sup> pambuto egerembeto puvuto pondo Mamona ta degi ke einge ena, ‘Ke etea avo tapa etene irae etija rate pondo pajire be

avoeto pe nei mitia' ainge enu <sup>23</sup> ke einge ena 'Na nau bande avo embo na enetaja uje ere ona avoeto pure degi tapa ta pahue ke sovera na eto ejo puvurore <sup>24</sup> eto erena ingijo, embomeni tapa matu oru uena amina nau pondo ta seha gamo mane indito kesora'." ainge ena.

*Tapa toto Iesu ambo ambo ara ena (Matthew 10:37-38)*

<sup>25</sup> Eto embomeni isapamane Iesu ga degi ta pahuo Iesu na ahereketo embomeni ta degi ke einge ena, <sup>26</sup> "Eto embo amuna na ambo ambo asi uje aisuja rate amita mama te aja te meniundi te namei kamei te du emone te amita vasiri te tapa toari inono ae aisuja amo ambotani nau ari haite manera.

<sup>27</sup> Eto embo amuna amita i atahu bouka koho ta umbuto na ambo ambo ari uje ae aisuja amo nau ambotani mane aisuja. <sup>28</sup> Ari amo eingera, Eto embo na bande pajire be itiketo gerikasi ue amita koro teka eto inonora ijie gerikasuja. <sup>29</sup> Eto kiti koro teka ae sio gerikasuja amo tutuvi hurukasuja te koro irae au toau irirou embo na kogue urumbitie <sup>30</sup> ke einge aisorsa, 'Embo na bande peni ikasi tutuvi huretija rate ari inono ae ra.' <sup>31</sup> Eto ke nei amo king emita isoro embopo tapa 10,000 amina king nei amita isoro embopo tapa 20,000 amiga isoro sio mane aisuja te kiti amita kiari embopo ga hihi tiritito kito inono eto isoro aisuja, <sup>32</sup> rate hihi tiritie nembari inono ae kito peka umbari embopo ikau pambuto king nei ga peka umbari ta hihi tiresora. <sup>33</sup> Avoeto erena amo embo vahai amuna amita donda te vasiri te tapa toari uje ae aisuja amo nau ambotani ari inono manera.

*Aso gamo irae (Matthew 5:13, Mark 9:50)*

<sup>34</sup> Ungo kiarira, aso ta gamo irae sigeto beto pambasuja amo aso ta gamo egerembeto puvurari inono aera. <sup>35</sup> Eto mu beto pambasuja amita soka amo enda ta gamo ikari inono ae ra eto se hoto ta sivo ari

inono ae avoeto gosukeora. Ungo ondete kito ingivujo" ainge ena.

## 15

*O sheep vahai kiae sein eto pambari (Matthew 18:12-14)*

<sup>1</sup> Eto iji amikote tax umbari embopo te ari sasapura embopo te aingeto Iesu ta ke ingesi auveo <sup>2</sup> enana Pharisee ari embopo te ke pepeni simba ari embopo te na kito ujeae ue ke einge ea "Embo emina ari sasapura embopo ga umoro ue indari indiuja" ainge ijio <sup>3</sup> Iesu na ingito timu hatirari ke na einge ena, <sup>4</sup> "O simba ari embo ta o sheep tapa 100 rate vahai kiae sein eto pambasuja amo o mamona o tapa 99 avo au ojaga tambu ta iriroro o vahai avo jombure ere uma <sup>5</sup> tambuto ohimbeto koho ta iketo umbuto tunga javotoho ue <sup>6</sup> amita da ta pambuto amita da embomeni te amita namei kamei te avo au puvurore ke einge aisuja 'Nau o sheep vahai sein eto pambija amo matu umbena avoeto tunga javotoho evujo.' ainge aisuja <sup>7</sup> avoeto erena amo Utu i ta amo ainge nombo euja. Eto ari sapura embo vahai amina amita jo ahereketo God ta degi egerembasuja amo Utu ta irari embomeni amina tunga javotoho be eora rate embo isapamane na 'na javotoho ra' aisorsa amo God na ke be mane hotembasuja.

*Koro vahai beto pambari*

<sup>8</sup> Eto nei amo pamone vahai amita koro to te amo tapa 10 rate vahai avo beto pambasuja amo horivo ijimbeto bande suvu avo gajikitie jombure ere uma <sup>9</sup> koro tambuto amita jao tate au huroro ke einge aisuja, 'Nau koro to te vahai etene beto pambija avo tambena erevira tunga javotoho evujo.' ainge aisuja <sup>10</sup> eto ke erena ainge nombo amo ari sapura embo vahai na God tunga humbuto tunga hapereketo God ta degi huresuja amo God ta anera na kito tunga

javotoho be eora.” ke ainge Iesu na ena.

*Meni heriso rate vahai na amita vasiri aijaja ena*

<sup>11</sup> Eto ke nei einge ena, “Embo vahai mitiaetija amita meni heriso <sup>12</sup> rate meni ambo amina mamu ta degi penunu einge ena, ‘Mama, na no donda hotari umbasona avo matu kateketo ikejo umbane,’ ainge enu Mamu ta kiro avo kateketo ikenu umbuto <sup>13</sup> iji heriso amita ambota meni amina donda tapa avo ombuto koro umbuto enda hoi ta pambuto koro aravo amita uje nei te nei te ai ta sio sao jigama ue <sup>14</sup> koro irae ena. Eto enda ai ta beuje iji pajire be puvunu meni amina itiketo indari jombure ue <sup>15</sup> enda amita embo vahai amita degi ta pure asi penunu enu ikenu pambuto o ohu simba ere uatija <sup>16</sup> rate embo na u soka o ta umbuto puvuto ikeore indioi amite tapa indesi uje eauja rate meni amita ingeni ta ikae. <sup>17</sup> Eto meni amina mitiaetija amo do aingere avo kito ke einge ena ‘Na nau mama ta meni rate mama ta bande pure embopo na indari ere indera te deo deo ta ere ua te na enda nei ta puvuto mitie beuje na ere ahovona <sup>18</sup> avoeto na ereto pambuto nau mama ta degi ke einge aisona, ‘Mama na no degi ta eto God ta degi ta ari sapura be uena <sup>19</sup> avoeto na no meni mane avoeto ejo no pure embo ane’ ” ke ainge aisi hotembeto <sup>20</sup> ereto mamu ta degi pahunu mamu na hoi be ta kito ereto tutuveto puvuto andito mune tavo unu <sup>21</sup> meni amina ke einge ena, ‘Mama, na no degi ta eto God ta degi ta ari sapura be uena avoeto inena mane nau meni ke aisoa,’ ainge ijinu <sup>22</sup> Mamu na amita pure embo ta degi ke einge ena, ‘Pambuto bo javotoho vahai umbuto ingeni pupuri umbuto utu goru umbuto puvuto ikao asukitirou <sup>23</sup> pambuto o cow meni seha te teto hevejo ungote nau meni ta pondo are. <sup>24</sup> Nau meni sein eto pambari avo sape ari ke eona vasiri te puvei tambena erevira

avoeto ungote pondo are.’ ainge eto pondo uo <sup>25</sup> meni bugo pure ta pambuto egerembeto puvuto da auvitie haveni te ino te ingito amita be amo deire kesi uje eto <sup>26</sup> pure embo vahai enu inu ‘ire ere tivitera amita be deire?’ ainge enu <sup>27</sup> ke mine einge ena, ‘No eambo sape ari ke eora avo puvei kito no mama na o cow meni javotoho seha te teto heveto amita pondo ere ua’ ainge enu <sup>28</sup> ingito tumo eto pondo ta pambae mitinu mamu na puvuto pondo ta pambaja titine enu <sup>29</sup> Mamu ta degi ke einge ena, ‘Na jua koso kaso be no pure ue ke tapa agi ereovona te inena o goat meni teto ikae heveto nau namei kamei ga pondo ae mitovona te <sup>30</sup> no meni nei avo no haja vaja umbuto pambuto tiha paiha ue irae ihi mahi eto puvija amita degi cow meni javotoho teto heveto pondo ere oe?’ ainge enu mamu <sup>31</sup> na ke mine einge ena, ‘Nau meni umo namote tapa irioa avoeto donda nau tapa amo nora <sup>32</sup> te no eambo sein eto pambari avo sape ari ke eona avo vasiri te puvei tambena avoeto tunga javotoho ue ere ona te amita pondo mane toasona’.”

## 16

*Haja vaja embo vahai amita timu hatirari ke*

<sup>1</sup> Eto Iesu na amita ambotani ta degi ke einge ena, “Eto haja vaja embo vahai na koro kateketo pure kiari embo ta degi ikenu umbuto pure ena rate pure ta pere koro ikae ue sio aija unu embomeni na kito pambuto koro ikena embo amita degi harikeo ingito <sup>2</sup> enu puvunu ke einge ena, ‘Embomeni na puvuto nau degi ta umo pure sapura oe etera avoeto pure mane aisoa avoeto ere taekitena koro amina pure do do ue ke kakajekeoa tapa avo ike kione,’ ainge enu <sup>3</sup> pure embo amo pambuto umo eonga ke einge hotembena, ‘Koro ikena embo amina pure nau ere taekitia avoeto na do ano? Iji bevire ta heteto pure ari uje ae

ereona eto degi tambuta arumbeto koro penunu aetena te me kiona uje ae ereona, <sup>4</sup> aravora, pure nau irae etija avoeto embomeni na na kito pekitie hondate ara ari erevi aisona'. Ke ainge eto <sup>5</sup> donda mamona amita degi koro ambota ikasi ke ijie donda penunu eto umbari embopo avo jage enu puvuo embo kiti puvuna amita degi ke einge eto ingina, 'Nau titi jigari embo ta degi donda doinge mine ikae teho uhae?' ainge <sup>6</sup> enu 'Nau oil drum tapa 10 ainge uhana' ke ainge enu 'Aravora te no paper avo ikejo jaeveketo gosukitie oil drum 5 ainge umbari ke ijie kaeto ikano umbuto pambuto ao kesuja' ainge ijie kaeto iketo <sup>7</sup> embo nei amita degi ke einge ena, 'Nau titi jigari embo ta degi donda doinge mine ikae teho uhae?' ainge enu 'Nau rice baiki tapa 100 ainge uhana' enu 'aravorate no paper avo ikejo jaeveketo gosukitie rice baiki tapa 80 ainge umbari ke ijie kaeto ikano umbuto pambuto ao kesuja' ari sokova ainge ena <sup>8</sup> avo donda mamona kito embo avo jakeka ena amita hamo simba ue pure sokova ena avoeto. Eto enda embomeni na enda ta javotoho na irari hotembari pure isapamane eora rate God ta usasa ta irari embomeni na hotembae ue pure nei do ae eora <sup>9</sup> avoeto erena amo koro amo enda ta donda sapura ra avoeto donda avo koro irae embopo ta hande ue namei kamei evujo eto koro avo irae aisuja iji te God na umo umbau amita titi jigari ta iresoa. <sup>10</sup> Embo amuna pure isapa ikaro aisuja amo embo pure avo tumota ari haite kito ehako pure pajire ikau pure javotoho aisuja. Eto embo amuna koro isapa umbuto pure sokova aisuja ainge eto ehako koro peni umbuto pure sokova aisuja. <sup>11</sup> Eto umo enda ta donda avo umbuto ari sio sao ururo kito amo umo tumota be ae avoeto haja vaja be avo mane ikasuja. <sup>12</sup> Eto embo nei ta donda umbuto sio aisoa amo God na donda no be avo mane ikasuja.

<sup>13</sup> Eto pure embo vahai amina titi jigari embo heriso ta ke agi ari haite mane ra. Eto titi jigari heriso hetaro pure embo vahai amina embo nei amita ke agi ue nei amita ke peive aisuja. Eto embo vahai osa ue nei uje ae aisuja. Eto ainge nomboni iji vahai amina koro ta ke te God ta ke te agi ari haite mane ra." ke erevi Iesu na ainge ijie ate poekitinu

*Ke nei nei Iesu na ena  
(Matthew 11:12-13, 5:31-32, Mark 10:11-12)*

<sup>14</sup> Enana Pharisee ari embomeni amo koro osa ari embopo avoeto Iesu urumbitio <sup>15</sup> enana ta degi ke einge ena, "Ungo embo ta titi ta na embo javotoho ra ainge ijie ere ova te God na ungota jo kogue eto embo na kogue jakeka erera te God na ere kogua avo sapura bera. <sup>16</sup> Eto ke pepeni ta ke kajari amite peroveta ta ke te avo ere puvutuhumite John ta iji te irae etei God na embomeni amita siriketo umbuto titi jigesuja amita ke avo itiketo hande ere ovora eto God ta titi jigari ai ta embomeni na torasi sunumbo sunumbo ere ora. <sup>17</sup> Utu te enda te irae aisuja rate God ta ke pepeni tapa amita jo ta ke vahai mane irae aisuja. <sup>18</sup> Eto embo amuna amita ae toto nei jimbasuja amo tiha euja eto ae matu toari avo embo amuna jimbasuja amo tiha aisuja."

*Haja vaja embo te embo Lazarus te ta hihi*

<sup>19</sup> "Eto enda ta haja vaja embo vahai amita bo kembari javotoho ove pangari avo asuketo ue eto iji tapa amina indari javotoho neite neite ere indiaetija. <sup>20</sup> Amita bande huga na joekari pe ai ta hoivo embo javo Lazarus amita hamo uhu tapa amo matu na togari amina sereketo embomeni ta degi koro penunu ijie mitiaetija <sup>21</sup> Embo amina donda embo amita indari sirivo gaga suvu ta beauja avo indesi uje ere uaetija rate ikae indae teho mitioi ino na puvuto amita matu avo aniheto ere indiaetera. <sup>22</sup> Eto ahunu God ta anera na



amita ahihi umbuto pambuto Abraham ambuto pambuto mitina degi vahai ai ta ikena. Eto haja vaja embo ambunu koveo <sup>23</sup> amita ahihi amo memenga osaga kiari degi ai ta pambuto mitie arerembeto Abraham avo hoi be ta kogue eto Lazarus amo engitita arumbeto mitina avo kogue jage <sup>24</sup> eto ke einge ena, 'Mama, Abraham, na ere kogoamo jo ere oite? I peri ta beto mitene evikitoi memenga pajire be ere kogona avoeto Lazarus avo ejo amita ingeni singi vahai avo umo ta jauketo puvuto nau ivivi ta kaimbau bevère jamo ai' ainge enu <sup>25</sup> Abraham ingito ke einge ena, 'Nau meni, umo hotembæ ere oete? Umo enda ta vasiri te irari iji te inena no indari umbari jajavotoho avo jigama ere uaetea te Lazarus amina donda sasapura pere jigama ere uatija eto puvuto tunga jamo jamo ari degi ta jangu indie mitei umo avo osaga ere kogoamo <sup>26</sup> eto nei amo umo mitea nango mitera orohu ai ta amo hoto pajire be eto koso vahai kovari mitia ai ta mane mine embara eora ke ari ra'. ainge enu <sup>27-28</sup> haja vaja embo amina ke einge ena, 'Aravorate Mama no degi ta penunu erena, Nau mama ta bande ta nau eambopo tapa 5 mitera avoeto Lazarus ikejo pambuto au ingito memenga kiari degi ei ta mane puvuresora', ainge enu <sup>29</sup> Abraham na ke mine einge ena, 'Moses ta ke kajari amite peroveta mamatu tapa amita ke kajari enana ta degi mitia avo mane kioro?' ainge enu <sup>30</sup> 'Mama, mane kesora avoeto embo amburari na egerembeto pambuto au ingihe avo jo ahereketo ari sasapura toasora' ainge enu <sup>31</sup> amita degi ke einge ena, 'Enana Moses ta ke te peroveta ta ke te avo ingari uje æ eora avoeto embo na vasiri te ereto ke aisuja amite tapa mane ingesora'." ainge ena.

## 17

*Ari sasapura  
(Matthew 18:6-7,21-22, Mark 9:42)*

<sup>1</sup> Eto Iesu na amita ambotani ta degi ke einge ena, "Engekari puvuresuja rate engekasuja embo amita degi avo hajire be ikau kesuja. <sup>2</sup> Eto embo amuna na tumota ari embo erevi avo engekau sapura aisuja amo nanena embo amita degi mine ikano memenga peni vahai kesuja. Eto embo na engekasuja embo ta tunga ta esi tigitto atara peni vahai handuketo eva ta kiti gosukasuja amo memenga God na au kesuja aingeko avo mane kesuja. <sup>3</sup> Be kogue irivujo. Eto no namei na ari sapura au kito onde katari ke na isembejo jo hapereketo aja to ai. Eto aja to ijirou ingito hotembeto tojo. <sup>4</sup> Eto embo vahai na no degi ta ari sapura tapa 7 ainge iji vahai amita jo ta eto ahereketo iji vahai amina aja to tapa 7 ainge ijirou ingihe hotembeto tojo". ainge ijie ate poekena.

### *God tumota ari*

<sup>5</sup> Eto Iesu ta apostero na amita degi ke einge ea, "Ejo nango umo tumota be aisora", ainge eo, <sup>6</sup> Bada na ke einge ena "I 'mustard' ta be isapa be ainge nombo na tumota aeteva amo i peni eremita degi 'Umo eonga uketo pambuto eva ta beto huruke' ainge aeteva amo ke agi eto ainge aetija."

### *Pure embo na ke agi ari be*

<sup>7</sup> "Eto ungo embo vahai amita pure embo na pure andage ere puvuroutemo o simba ere uma puvutuhui ke einge eovete? 'Nau pure embo umo ei huma arumbeto indari indijo', ainge mane eova te <sup>8</sup> ke einge eova, 'Umo kuteto indari nau ageto ikao indono umo ambota indesoa' ke ainge ao <sup>9</sup> agi aisuja amo osari ke mane ikasoa amo teho pure amita avo ere ua <sup>10</sup> avoeto ungo God na pure do ava eria avo ue ke mine ara ijie einge evujo, 'Nango teho pure embopo avoeto nango pure nei do mane, pure nangota avo ere ora,' ainge evujo."

*Kini umbari embopo tapa 10 avo Iesu na enu kini iræ ea*

11 Eto Jerusalem ta pambasi degi ta pahue enda Samaria eto Galilee amita tane ai ta pahue 12 Da isapa vahai ai torenu kini umbari embopo tapa 10 amina Iesu puvutuhunu kito hoi ta heteto 13 jage eto ke einge ea, "Iesu, Bada, nango jo e." ainge eo 14 kogoue ke einge ena, "Ungo pambuto priests ta degi evujo ungota hamo kiore," ainge ijinu enana ta kini tapa irae eo javotoho ea. 15 Eto kini umbari embo vahai amo enda Samaria embo amita hamo avo javotoho enu kito egerembeto gagaha eto God jakeka ijie puvuto 16 Iesu ta utu ta beto gogovo ue osa enu, 17 Iesu na kito ke einge ena "Embo tapa 10 rate embo 9 amo naingere? 18 Da nei embo vahai emina pere God jakeka asi puvei?" 19 Eto embo ta degi einge ena, "Ereto pambujo. No tumota ari na no ahihi te hamo te oreketija," ainge ena.

*God na embomeni amita toho siriketo umbasuja*

*(Matthew 24:23-28,37-41)*

20 Eto iji vahai Pharisee ari embomeni na God ta titi jigari iji avo iji deina puvurou avo Iesu ta degi eo ingito ke mine einge ena, "Eto God na embomeni titi jigari ta hajire avo titi na mane kesora. 21 embo na 'erevira kijo' au mane kesoa eto 'orovira kijo' au mane kesoa rate ingivujo, God na embomeni titi jigesuja amo ungota jo ta ra". ainge eto 22 amita ambotani ta degi ke einge ena, "Iji puvuto ere hua amikote ungo na Embo ta Meni ta titi jigari iji vahai be avo kesi uje be aisova rate mane kesova. 23 Iji amikote embo na ereto 'Iesu puvija orovira kivujo' ijirou embo nei na 'Iesu puvija erevira. Huma, kivu.' ainge ijiro ambo ambo avojo. 24 Eto pipiri sose hena ta sariambu eto bitito pambuto ihane ta euja ainge nombo Embo ta Meni amita puvurari iji na amo ainge aisuja. 25 Rate kiti amo embo eha mitera amina Embo ta Meni uje ae ue aro memenga osaga kesuja.

26 Eto Noah ta iji te embomeni na ari do do ea ainge nombo Embo ta Meni amita puvurari iji te amo ainge aisora. 27 Enana indari indie a dorovu ue bi dorovu ue mitio Noah na e nga jo ta bivitinu ga beto irerembenu tapa sasari ea 28 Eto ainge nombo embo Lot ta iji te embomeni na indari indie donda ombuto uhue be kokovikitie bande gerikitie mitio 29 iji vahai Lot da Sodom toto pahunu koro bevere te i evekari te utu i ta eto beto tapa tenu sasari ea 30 Eto Embo ta Meni irerembeto puvuresuja iji te embomeni na ari ainge kesora 31 Eto iji amikote embo bande i ta mitia amina beto donda mane siriketo umbuto pambasuja eto embo pure ta mitia amina mane egerembasuja. 32 Lot ta ae na do ena avo hotembevujo. 33 Eto embo amuna amita vasiri avo orekasi uje aisuja amita vasiri avo irae beto pambasuja rate embo amuna amita vasiri teho ke ijie toasuja amina vasiri te iresuja. 34 Eto ungota degi erena, mume amikote embo heriso bande vahai ta eviroro anera na beto vahai umbuto pahue nei toau iresuja. 35 Eto pamone heriso u gajitiroro anera na beto vahai umbuto pahue nei toau iresuja. 36 Eto embo heriso pure ta iriroro anera na beto vahai umbuto pahue nei toau iresuja." ainge enu 37 enana na "Vasiri amo degi nainge nainge eto kioro?" ainge eto ingio Iesu na ke einge ena, "O sape ue mitioi di oga na titi peinga beto areto indiora, aingekora". ainge ena.

## 18

*Embo okose te pamone doru te ta timu hatirari ke*

1 Eto enana pari ta pegogo eora kaiketo pari ara Iesu na ambotani ta degi timu hatirari ke na einge ena, 2 "Eto da vahai ai ta koto ta ke ingito sirikari embo okose amo God hotembae euja eto embo tunga humbae euja embo avo mitinu 3 da amita pamone doru vahai amina amita degi kaiketo puvutuhe penunu

einge ere ijiaetija, ‘Na hondate eto embo nau degi ta kitoho ere ouva avo ke siriketo ejo tambu ai,’ penunu ainge pere ijioi <sup>4</sup> ingito ingarako ue mitiaetija umo oenga einge hotembena, ‘Na God hotembae ue embo tunga humbae ue iriona <sup>5</sup> te pamone doru emina kaiketo penunu ijioi ingihovona totone onde memenga etija avoeto amita ngahia deire avo ano tambu aisuja.’ <sup>6</sup> ke ainge ena, amo koto ta ke sirikari embo sapura amina ena avoeto <sup>7</sup> God javotoho amita embomeni na iji te mume te matuainge amita degi penunu ijiro amo iji koso be ingito ingarako ue iroute? <sup>8</sup> Na ungota degi erena amo God na amita embomeni matu sausau hondate aisuja. Rate Embo ta Meni puvuresuja amina God tumota ari embo enda ei ta tambautemo mane tambau?” ainge eto

*Embo heriso temple jota pari ea amita timu hatirari ke*

<sup>9</sup> Iesu na embomeni nei uhoho amina na javotohora ijie embo nei sapurara ke ainge ari embomeni amita degi timu hatirari ke einge ena <sup>10</sup> “Embo heriso pari asi temple ta pambua vahai amo Pharisee ari embo eto vahai amo tax koro umbari embo aingeto toreo <sup>11</sup> Pharisee ari embo amina heteto pari einge ena, ‘Embo nei ke sokova ijie koro pegene eora nei ke pepeni poekeora nei tiha paiha eora nei amo tax umbari embo puvija erevira ainge ari sapura neite neite eora te na ainge mane avoeto God, na umo osa ere ona. <sup>12</sup> Na hura tapa amita jo ta iji heriso heriso donda ajirekeona eto nau donda tapa avo kateke kateke eto tapa <sup>10</sup> ainge iketo vahai umbuto temple ta ikeona,’ pari ainge pere ijinu <sup>13</sup> tax umbari embo amo hoi ta heteto amita ari sapura avo hotembitie tumo kouketo mitie jenge torue pari einge ena, ‘God, na ari sapura embo rate jo e’ pari ainge ijinu <sup>14</sup> God na ingito tunga javotoho ue hotembeto toturitinu ereto amita bande ta pambuna, Pharisee

ari embo aingeko manera. Eto embo amuna umo eonga jakeka aisuja embo amo au isapa aisuja rate meni isapa sira eto aisuja embo avo au embo peni aisuja.”

*Iesu na meni isasaraho ta siro ta ingeni tembena*

*(Matthew 19:13-15, Mark 10:13-16)*

<sup>15</sup> Eto iji amikote embomeni na meni isasaraho avo Iesu na ingeni hamo ta tembaja umbuto puvuo, ambotani na kito taekitie isem-bea <sup>16</sup> rate Iesu na kito meni isasaraho amita degi hurora jage eto ke einge ena, “Meni isasaraho mane taekasova te evu nau degi ta hurore. Meni isasaraho amo na tumota eora eto embo amuna ainge nombo na tumota aisuja amina God ta titi jigari ta torasuja. <sup>17</sup> Na ke be na ungota degi erena embo amuna meni isapasira eto hurae aisuja amina mane God ta titi jigari ta torasuja.” ainge enu

*Iesu na donda embo ta degi ke ena*  
*(Matthew 19:16-30, Mark 10:17-31)*

<sup>18</sup> Embo vahai peni amina Iesu ta degi ke einge eto ingena, “Ate poekari embo javotoho, ari do ue irari daroho hoteto umbano avo inena ejo ingone” ainge enu <sup>19</sup> Iesu na ke mine einge ena “Umo do eto na javotoho ke ere? Eto embo tapa amo jajavotoho manera te God vahai avo javotohora. <sup>20</sup> Eto God ta ke pepeni amo umo kiarira: Tiha mane aisoa, embo mane tao amburesora, pegene mane aisoa, embo nei ta ke be na au ingito jandireketo sokova na mane aisoa, eto aja te mama te otohu aisoa,” ke ainge enu <sup>21</sup> embo amina einge ena, “Na meni isapa ta itiketo ari tapa avo javotoho pere ue ere puvutuhovona,” ainge enu <sup>22</sup> Iesu na ingito ke einge ena, “Ari vahai avo ae ere ova, avoeto pambuto no donda tapa avo ombuto koro umbuto donda ambu embopo ta iketo na ambo ambo asi hae. Eto God ta irari degi ta no donda isapamane mitia avo umbasoa,” ainge

enu <sup>23</sup> ingito amita haja vaja peni vahai avoeto osaga kogunu <sup>24</sup> Iesu na embo avo kogue ke einge ena, “Haja vaja embo na naingeto God ta degi torau, amo ngahia be ra, <sup>25</sup> Eto o camel na poma to ta toreto pambari amo ngahia ra aingeko haja vaja embo na God ta titi jigari degi ai ta torari ngahia be ngahia ra.” ainge enu <sup>26</sup> embomeni na ingito ke einge ea, “Embo amunure God na ari sapura ta oreketo umbau?” ainge eo <sup>27</sup> Iesu na ke mine einge ena, “Embo na ari inono aera te God ta degi ari tapa amo inono ra” ainge enu <sup>28</sup> Peter na Iesu ta degi ke einge ena, “Kijo, nangota donda tapa toto umo ambo ambo ere ora”, ainge enu <sup>29</sup> Iesu na einge ena “Na ungota degi ke be erena, embo amuna God na embomeni titi jigoja amita bande te ae te namei kamei te emamo te meniundi te tapa toasuja <sup>30</sup> embo amina amburae mitie donda totuja vahai ainge nombo avo isapamane be umbasuja eto iji kombu te daroho irari umbasuja” ainge ena.

*Eto Iesu pambuto Jerusalem ta amburesuja avo ehako enu ingia*  
(*Matthew 20:17-19, Mark 10:32-34*)

<sup>31</sup> Eto Iesu na amita apostero 12 avo umbuto eonga iketo ke einge ena, “Kivujo, ungotena da Jerusalem ta pahuma. Embo ta Meni ta degi ari do puvuresuja peroveta na matu kakajekarira avo puvuresuja <sup>32</sup> amo Embo ta Meni avo umbuto enda nei embomeni ta ingeni ta ikaro umbuto urumbitie ari sapura nei te nei te ue hamo ta isuva ue <sup>33</sup> esi na ejembeto taro ambuto iji 3 irae au ehako vasiri te erasuja,” Iesu na ainge ijie harikenu <sup>34</sup> ingito ingarako ea amo enana na ingiora ondikari avoeto ingae ea.

*Titi kuru ari embo enu kondena*  
(*Matthew 20:29-34, Mark 10:46-52*)

<sup>35</sup> Eto da Jericho auvitio titi kuru ari embo vahai degi ahone ta arumbeto koro penunu ijie mitina

<sup>36</sup> amina embomeni isapamane puvuto pahuo asavi ingito asavi amita be amo deire eto inginu <sup>37</sup> “Iesu Nazareth embo amina puvuto ere pahua” ainge eo <sup>38</sup> ingito jage eto einge ena “David ta Meni Iesu, na jo au kito hondate e,” ainge enu <sup>39</sup> embo amita titi vuju ta mitia amina “Embo, umo ke ambu e” ainge ijio isara na jage eto einge ena, “David ta meni Iesu, na kito jo au hondate e” ainge pere ijinu <sup>40</sup> Iesu heteto embo avo umbuto hurora ke enu umbuto imite auvitio <sup>41</sup> Iesu na “Na no degi ta do ana uje ere oe” ainge enu “Bada, ejo titi hirikau kione,” ainge enu <sup>42</sup> Iesu na “Umo na tumota ere oa avoeto no titi na kijo” ainge enu, <sup>43</sup> titi javotoho enu God jakeka ijie Iesu ambo ambo ena. Eto embo tapa na ari avo kito God jakeka ea.

## 19

*Embo Zacchaeus na Iesu kesi uje ena*

<sup>1</sup> Eto Iesu da Jericho jo ta toreto pahunu <sup>2</sup> tax umbari embopo ta okose javo Zacchaeus amo donda embo <sup>3</sup> amina Iesu do aingere avo kesi uje ena rate embo avo tuhoau avoeto embo isapamane na titiha eo jateto kiari inono ae enu <sup>4</sup> Iesu pambasuja degi ai ta kiti tutuveto pambuto i boro i ta bitito mitinu <sup>5</sup> Iesu na puvuto arerembeto kogue ke einge ena “Zacchaeus, umo beto hae. Na mume eha emo no bande ta evesona.” ainge enu <sup>6</sup> Zacchaeus sausau beto tunga javotoho ue Iesu umbuto amita bande ta pahunu <sup>7</sup> embomeni na kito ujeae ue ke einge ea, “Iesu do eto ari sapura embo amita bande ta evesi ere oi?” ainge ea. <sup>8</sup> Eto Zacchaeus na ereto heteto Bada ta degi ke einge ena “Bada kijo, na nau donda tapa avo heriso kateketo vahai avo donda ambu embopo ta degi hande ikasona. Eto embo ta koro ke sokova na ijie pegene uhana amo einge ue ikasona. 1 kina uhana amo 4 kina ikano egerembasuja 2 kina uhana amo 8 kina egerembasuja 10



kina uhana amo 40 kina egeremba-suja” ainge enu <sup>9-10</sup> Iesu na ingito ke einge ena, “Embo ta Meni na God ta embomeni maine pambari avo jombure eto umbasuja avoeto Abraham ta ahije eremite bande vahai eremita embomeni amite avo God na oreketo ere uhua.” ainge ijinu

*King na pure embopo ta koro ikena amita timu hatirari ke (Matthew 25:14-30)*

<sup>11</sup> Ingihe einge hotembea Iesu avo Jerusalem auvetija amo pambau God ta titi jigari avo sausau puvuresuja avo hotembitio <sup>12</sup> Iesu na kito timu hatirari ke na einge ena, “Eto embo vahai peni amina amita enda ta king asi sovera ari umbasi enda nei ta pambasi ue <sup>13</sup> amita pure embopo tapa 10 ainge jage enu puvuo embo vahai vahai amita degi koro tapa 100 ainge ikereketo ke einge ena, ‘Na pahurono ungo koro emina pure eto koro nei tahurovo puvuresona,’ ainge eto pahunu, <sup>14</sup> tohota da vahai embomeni na embo avo enana titi jigoja uje ae ue embomeni nei uhoho na embo aravo taekara ikeo ambota pambua. <sup>15</sup> Rate embo amo king aisuja amita sovera umbuto egerembeto puvuto enda titi jigihia amita pure ara koro ikena embopo jage enu puvuo ‘koro hamo ta doinge umbeve?’ ainge enu <sup>16</sup> pure embo vahai amina embo ta titi ta imite heteto ke einge ena, ‘Bada, no koro 100 amina pure etena amita hamo ta amo 1,000 tambena erevira,’ ainge enu <sup>17</sup> amita degi einge ena, ‘Umo pure embo javotohora. Umo koro isapa amina pure javotoho etea avoeto avo da pepeni tapa 10 simba aisoa.’ ainge ijinu <sup>18</sup> embo nei puvuto ke einge ena, ‘Bada no koro 100 amina pure etena amita hamo ta amo 500 tambena erevira,’ ainge enu <sup>19</sup> ‘javotohora, umo da pepeni tapa 5 ainge avo ano simba aisoa’ ainge <sup>20-21</sup> eto embo nei puvuto ke einge ena, ‘Bada umo embo ngahiara, umo mine ikae teho mine vahai umbuoa,

eto umo be urae rate teho kahumbeoa avoeto umo joru ue no koro 100 ikita amo pure ae teho togeto ondikitane iriuja erevira umbujo’ ainge enu <sup>22-23</sup> ke mine einge ena ‘Umo pure embo sapura avoeto pe no na umo eonga pehumba ere oa. Eto na embo ngahia avoeto mine ikae mine vahai umbuona be urae rate teho kahumbeona ke erea amo matu kiari kito amo nau koro avo umbuto bank ta ikao nau koro nei hamo ta ikaro irirou puvuto umbaetena’ ainge eto <sup>24</sup> embo nei engitita heteto mitina amita degi ke einge ena ‘Embo emita koro tapa 100 ikitane pure ae toari iriuja avo umbuto embo nei pure eto koro 100 uhaja amita degi ikejo.’ ainge enu <sup>25</sup> ‘Bada, embo amita degi koro peni vahai 1,000 ainge mitia’, ainge eo <sup>26</sup> ke mine einge ena, ‘Ungota degi erena, embo amita degi ari javotoho ta mine mitirou kito amo God na mine nei hamota ikasuja rate embo ta degi ari javotoho irae kito God na embo amita degi do mitia avo umbau irae aisuja rate <sup>27</sup> na enana ta king eona uje ae etera embo amo nau kitoho avoeto umbuto huma nau titi ta tevujo amburore’.” ainge ena.

*Iesu Keriso Judea embo ta hondate ari embo avo da Jerusalem ta torena (Matthew 21:1-11, Mark 11:1-11, John 12:12-19)*

<sup>28</sup> Eto ke ainge enu irae enu Jerusalem pambasi degi ta bivitie <sup>29</sup> da heriso Bethphage te Bethany amo tiri javo olives temo ta kogombari avo auvitie amita ambotani heriso avo ikau pambuto o donkey meni umbara ikasi ue <sup>30</sup> ke einge ena, “Ungo pambuto da degi ovitihio amita pe ta o donkey meni handuketere mitia amo meni avoeto ai ta isa mane eora avo bujeketo umbuto puvuvujo. <sup>31</sup> Eto embo na ‘Ungo do eto donkey meni ere bujekiteve?’ ke ainge aro ingito ungo na einge evujo, ‘Bada na jigama asi uje ere ua’,” ke ainge ara enu <sup>32</sup> pambuto Iesu na o donkey meni ke ena avo tambuto <sup>33</sup> bujekasi uo o mamone

na kito “ungo do eto nangota o bujekasi ere ove?” ainge eo <sup>34</sup> “Bada na jigama asi uje ere ua” ainge eto umbuto <sup>35</sup> Iesu ta degi puvuto enana ta bo hamo ta asari avo houketo o hamo ta besi tiritio Iesu ohimbeto umbuto o hamo ta ikeo arumbeto <sup>36</sup> degi ta pahunu embomeni na bo nei nei hamo ta pohukari avo hoheto degi ta besi titirikeo haito pambuna. <sup>37</sup> Eto tiri Olives bitito ovitiho ta beto da auvitio Iesu ta ambotani tapa na itiketo osa osa ue God jakeka ue Iesu na ari do ere uatija avo jajage eto <sup>38</sup> einge ea, “Ungotenau king Bada ta javo ta puvuto ere hua avo God na javotoho ari ikau Utu i ta peka te usasa te iroi!” ainge ijio <sup>39</sup> Pharisee ari embopo embo ta ugoro ta mitia amina “ate poekari embo, ejo no ambotani ke erera avo toare” ainge eo <sup>40</sup> ke mine einge ena, “Eto enana ke toasora amo atara tapa ei mitera amina ke gagaha eto aisora” ainge ena

#### *Iesu da Jerusalem avo embo si ena.*

<sup>41</sup> Eto Jerusalem jota torasi ue Iesu na da kogue si ijie <sup>42</sup> da amita embomeni avoembo ke einge ena. “Peka umbari avo eha kiova uje ere ona te peka umbari avo ungota titi ta ondikarira te <sup>43-44</sup> God na ungo puvuto kesi iji ikari avo puvija te ungo na kito kiarako eteve seniketo ere pahua avoeto iji puvuresuja amikote no kitoho na degi tapa ta eto puvuto umo joeketo umbuto da te da ta meniundi te tapa avo taro iraesuja. Eto atara nei na atara nei amita hamo ta mane tembasuja te tapa jaseto beasuja.” ainge ena.

#### *Iesu na temple jo ta torena (Matthew 21:12-17, Mark 11:15-19, John 2:13-22)*

<sup>45</sup> Eto Iesu na temple jo ta toreto donda na ombuto koro ere uhua embopo avo kurumbenu pahuo <sup>46</sup> ke einge ena, “Ke kajari ta amo nau bande eremo pari ari bande aisuja, ainge mitia rate ungo na eteve pegene embo ta bande ere ua,” ainge eto <sup>47</sup> Iesu na iji vahai vahai ainge

temple jo ta toreto embomeni ate poekena rate priests pepeni te ke pepeni kiari embopo te embo ta okokose te na Iesu naingeto umbuto tasora avo hotembea <sup>48</sup> rate embomeni isapamane be Iesu ta ke ingesi onde popoga ture eto ingihe mitia avoeto Iesu umbari inono ae ena.

## 20

#### *Iesu na embo amuta ke agi ue pure ena (Matthew 21:23-27, Mark 11:27-33)*

<sup>1</sup> Eto iji vahai Iesu na temple jo ta mitie God ta duru javotoho avo embomeni ta degi hande unu ingihe mitio priests pepeni te Judea embo ta ke pepeni simba ari embopo te Judea embo pepeni te aingeto Iesu ta degi puvuto <sup>2</sup> ke einge ea, “Embo amuna no degi ta sovera ari iketei umbuto ari emomo ere oe?” ainge eo <sup>3</sup> Iesu na ke mine einge ena “Na ainge nombo ungota degi eto ingari ke erena evu ingone. <sup>4</sup> John na sovera ari umbuto embo bapataito ere uatija amomo God ta degi eto umbunutemo embo ta degi umbunu?” ainge eto inginu <sup>5</sup> ungo eonga ke mine ara eto einge ea “Eto dago John na sovera ari God ta degi umbari ke aisora amo Iesu na aravorate ungo do eto John ke be ae ueve ke ainge aisuja <sup>6</sup> rate dago sovera ari embo ta degi umbari ke asora amo embomeni ei mitera amina dago koro na taro amburesora amita be amo John amo God ta peroveta be ke eora,” ainge ijie <sup>7</sup> ke mine ari inono ae enu enana Iesu ta degi “dago be kiaera” ainge eo <sup>8</sup> Iesu na “aravora namote tapa amuta degi sovera umbuto ere ona avo mane ano ingesova” ainge eto

#### *Grape pure mamu ta timu hatirari ke (Matthew 21:33-46, Mark 12:1-12)*

<sup>9</sup> Embo tapa ta degi timu hatirari ke einge ena, “Eto embo vahai amina grape be pure ta ureto embo nei na simba ara iketo toto enda nei ta iresi pambuna. <sup>10</sup> Eto grape sari ari iji

puvunu grape be sari tuna umbaja pure mamu na amita pure embo vahai ikenu pahunu, grape simba ari embopo kito teto kurumbeo grape sari umbae toto egerembeto pambuna, <sup>11</sup> Eto amita pure embo nei ikenu pambunu grape simba ari embomeni na urumbitie teto kurumbeo grape be sari umbae toto pambuna. <sup>12</sup> Eto nei ikena amo teo sasaga kutitinu umbuto pure aka ta gosukeo bena. <sup>13</sup> Avoeto pure mamu na ke einge ena. 'Na ari einge aisona, osa ari meni nau avo ikano pambau kito otohu ue mane tasora,' ainge eto ikenu pahunu grape simba ari embomeni na kito <sup>14</sup> ke einge sirikea 'Eto grape pure hoteto umbasuja embo puvija erevira avo ungoteto taro amburou grape pure evi ungotenane na oreto umbasira,' ke ainge <sup>15</sup> eto meni avo andito umbuto pambuto huga hokaka ta barae eo benu teo ambuna. <sup>16</sup> Eto grape mamu na puvuto do au? Amina grape simba ari embomeni tau ambuvujekaro grape pure amo umbuto embo nei ta ingeni ta ikasuja." ainge enu enana ingito "Ajae, ejo toai!" ainge eo, <sup>17</sup> Iesu na enana be kon eto kito ke einge ena "Rate God ta ke amo einge kajari mitia, 'Bande gerikari embopo na tutuvi vahai sapura ke ijie toa avo Bada God na umbuto enu bande ta tutuvi be ena'. ke ainge ena amita be amo ungo do eove? <sup>18</sup> Eto embo amuna tutuvi amita hamo ta beto tasuja amo pejeta memeni aisuja. Eto tutuvi amina embo ta hamo ta beasuja amo embo teto petekasuja" ainge Iesu na enu irae enu

*Tax koro ikari*  
(*Matthew 22:15-22, Mark 12:13-17*)

<sup>19</sup> Judea ta ke pepeni simba ari embopo te priests pepeni te na ungo avoembo Iesu na hihi tirina avo ingito iji amikote Iesu andito umbasi uje ea rate embomeni tapa na enana ta degi memenga ikasora avo hotembeto oju ue <sup>20</sup> iji nei simba ea. Eto Iesu ke sapura do au ingito umbuto

Rome ta gavana okose amita ingeni ta ikasi uje eto kito harika embopo ikeo pambuto Iesu ta hihi avo ingesi keko ijie <sup>21</sup> pambuto Iesu ta degi ke einge ea, "Ate poekari embo, umo ke be na pere embo ta ke te ari te avo hotembae ue God ta ke avo javotoho na ate poekeroa avo dago kiarira <sup>22</sup> avoeto no degi ta eto ere ingihora, Ungotena Judea ta ke pepeni oju ue tax koro Rome ta gavana Caesar ta ikarote mane ikaro?" ainge eo <sup>23</sup> Iesu na enana ta jo ta hotembari heriso avo kito <sup>24</sup> ke einge ena, "Ungota koro vahai umbuto ikevu kione," ainge enu ikeo umbuto einge ena, "koro hamota embo ta tombu kikiva ari emite javo kajari te amo amutare?" ainge enu <sup>25</sup> "Caesar ta ra" eo Iesu na ke einge ena, "Aravora Caesar ta donda kito amo Caesar ta ikevu eto God ta donda kito amo God ta ikevu," ainge enu <sup>26</sup> ingito Iesu na ke sapura nei do ae rate ke javotoho ena avo ingito haha puha eto ke ambupu ea.

*Ambuto vasiri te erari amita ke avo Iesu na ena*  
(*Matthew 22:23-33, Mark 12:18-27*)

<sup>27</sup> Eto Sadducees embomeni na vasiri te erari avo ke be ae ue ere ijiaetera avo Iesu ta degi puvuto <sup>28</sup> ke einge eto ingia, "Ate poekari embo. Eto Moses na ke amo einge kajena. 'Embo ta ae meni umbae mitirou ivu amburesuja, eto namei na namei hondate eto jimbuto be ikasuja' ainge Moses na kajena <sup>29</sup> Eto embo tapa 7 amo jo vahai ta amina meni bugo na jimbuna eto ae meni umbae mitinu ivu ambunu <sup>30</sup> bugo ta kakane amina jimbuna amo meni umbae mitinu ivu ambuna <sup>31</sup> Eto ainge pere ue pambuto gasi meni amina jimbuna amo ainge meni umbae ambuna <sup>32</sup> eto ambo be ta amo pamone amina ambuna. <sup>33</sup> Eto enana tapa 7 avo vasiri te hoasora amo pamone amo embo amuta ae au?" ainge eo <sup>34</sup> Iesu na ke mine einge ena, "Embomeni eha mitera amina jimbuora <sup>35</sup> te vasiri

te erari iji puvurou God na embo siriketo au erasora rate mane jimbasora <sup>36</sup> amita be amo embo na vasiri te erari avo hoteto umbuto ehako mane amburesuja te anera ga inono ue God ta meniundi aisora. Eto vasiri te erari amita ke be amo Moses na ke kajena. <sup>37</sup> Eto Moses na i basa evikitina amita jo ta ke einge ingina 'Na Abraham ta God, Isaac ta God, eto Jacob ta God ra,' ainge ijinu ingina avoeto kajena. <sup>38</sup> Avoeto God amo embo amburari ta God manera te embo vasiri te iriora amita God. Eto embo tapa amo God ta degi vasiri te ra," ainge enu <sup>39</sup> ke pepeni simba ari embopo nei uhoho na "Ate poekari embo no ke javotoho etea" ainge eo <sup>40</sup> embo tapa na eto ingari ke nei ae oju ue toa

*Keriso amo meni amutare?*  
(*Matthew 22:41-46, Mark 12:35-37*)

<sup>41</sup> Rate Iesu na enana ta degi ke einge ena, "Embomeni na do eto Judea ta hondate embo Keriso amo King David ta ahije ke eore? <sup>42</sup> Eto King David amina book javo 'Psalms' ai ta ke einge kajena, 'God na na David nau Bada ta degi ke einge ena, 'Nau ingeni be ei ta arumbeto iriro <sup>43</sup> nane no kitoho teto ikano inena utu na hatiresoa,' ke ainge David na kajena. <sup>44</sup> Eto David na Judea ta hondate ari embo Keriso amo nau Bada ra ena avoeto amo naingeto amita ahije au?" ke ainge eto

*Judea ta ke pepeni simba ari embopo ta ari avo kogue irivujo*  
(*Matthew 23:1-36, Mark 12:38-40*)

<sup>45</sup> Embo tapa ingiho amita ambotani ta degi ke einge ena, <sup>46</sup> "Eto ungo Judea ta ke pepeni simba ari embopo ta ari avo kogue irivujo, eto enana bo jajavotoho kokoso avo aseto market ari degi ta ururoro kito osa ue pekara eora. Eto nei amo ke kasari bande ta toreto embo pepeni ta avo arumba ai ta arumbeora eto pondo iji te embomeni kito otohu ara titi ta arumbeora. <sup>47</sup> Eto nei amo pamone dodoru ta donda avo sio umbuora eto embomeni amita

pari amo jo na ae rate toho hamo na pari kokoso kakoso eto sinenekeora, avoeto God na enana ta hajire siriketo memenga pajire ikau kesora."

## 21

*Pamone doru na hande javotoho ikena*

(*Mark 12:41-44*)

<sup>1</sup> Eto haja baja embopo na temple ta hande koro ikitio Iesu na arerembeto kogue mitinu <sup>2</sup> pamone doru vahai amina amita degi koro peni irae avoeto toea heriso jurukitinu <sup>3</sup> Iesu na kito ke einge ena "Na ke be na ungota degi erena, pamone doru omina hande ere ikitia amo peni be ra haja vaja embo na ere ikitera ainge mane ra. <sup>4</sup> Eto enana ta donda isapamane avoeto ikitie tuna jigera te pamone doru emita donda irae avoeto pe te ere ikitia erevira" ainge ena.

*Temple arara eto beasuja ta ke*  
(*Matthew 24:1-2, Mark 13:1-2*)

<sup>5</sup> Eto Iesu ta ambotani na temple avo atara orina na gerikari amite donda kiari jajavotoho temple ta hande ikari amite avo kiora ke eo <sup>6</sup> Iesu na ingito ke einge ena, "Ungo donda ere kogova rate iji puvutohurou kitoho na puvuto taro atara nei na atara nei ta hamo ta mane tembeto iresuja te tapa arara eto beasuja" ainge enu

*Osaga memenga kiari puvuresuja*  
(*Matthew 24:3-14, Mark 13:3-13*)

<sup>7</sup> Enana ingito ke einge eto ingia, "Ate poekari embo ari erevi iji deina puvurou, eto puvuresuja amita hajire amo do kioro?" ainge eo <sup>8</sup> Iesu na ke einge ena, "Eto embo nei nei na ke sokova ijiro ingihe ambo ambo avojo amo embo nei na 'Na ungota orekari embora' ainge ijiro embo nei na 'Iji puvuto ere hua' ainge ijiro ingihe ambo ambo mane aisova. <sup>9</sup> Eto ungo isoro ta duru hoi ta eto asa ta ingesova avo ungo oju avojo eto iji kombu puvurae iresuja amikote isoro avo einge



aisora. <sup>10</sup> Enda nei na ereto enda nei ga isoro aisora eto king nei na ereto king nei taisuja. <sup>11</sup> Eto titira pajire be te beuje te ambure iji te enda nei ta puvurou utu ta hajire nei kogoue oju pajire be aisora. <sup>12</sup> Rate ari erevi puvurae kiti ta amo embomeni na ungo andito umbuto aro osaga kogurovo umbuto ke kasari bande ta iketo ganoka eto umbuto tipura ta ikasora. Eto namo avoembo ungo umbuto gavana ta eto king ta titi ta ikaro hetasova, <sup>13</sup> Iji amikote ke nau hande evu ingore. <sup>14</sup> Eto ke ae kiti ta ke do aisova avo kiti ungo eonga mane sirikasova <sup>15</sup> te ungo hetari iji te nanena ungota jo ta ke te kiari te ikano ijirovo ungota kitoho na ingito ke mine ari inono ae aisora. <sup>16</sup> Eto ungota emone mamone te namei kamei te du e te da vahai embomeni te na ungo umbuto kitoho embo ta ingeni ta ikaro ungo nei nei amo taro amburesova. <sup>17</sup> Eto ungo javo nau avoeto embomeni tapa na ungo uje ae aisora <sup>18</sup> rate no siro tu vahai amina mane irae aisuja te <sup>19</sup> ungo ngahia eto mitima vasiri be avo umbasova.

*Da Jerusalem taro irae aisuja*  
(Matthew 24:15-21, Mark 13:14-19)

<sup>20</sup> Rate da Jerusalem ta kitoho embomeni na isoro asi joeketo mitima Jerusalem taro irae aisuja amita iji puvuto ere hua avo kesova. <sup>21</sup> Eto ainge kito evujo Judea ei ta mitera embomeni joru tiri ta pahuroro da jo ta mitera avo toto pahuroro eto da engitita mitera avo da jo ta mane torare. <sup>22</sup> Iji amo God na Israel ta degi hajire ikasuja iji avo matu kajari mitia <sup>23</sup> Eto pamone urete te amita degi eto meni eha ingeto emi kajitia amita degi aja to erena. Iji amikote God na Judea embomeni ta degi tumo ue hajire au koguroro Judea enda embomeni tapa na osaga kesora. <sup>24</sup> Enana avo asivo na kakajekaro ahuroro embo nei andito umbuto enda tapa ta pambasora. Eto enda nei na Jerusalem torue God na

enda nei ta degi iji ikari avo irae ururou toasora

*Embo ta Meni ta puvurari*  
(Matthew 24:29-31, Mark 13:24-27)

<sup>25</sup> Eto iji ta hariga ta eto kuro ta kiari hajire nei kogoue eva ta vasiri peni vahai ururou tindu pajire be avo enda tapa na ingihe mana mana ue joru aisora. <sup>26</sup> Eto utu ta donda iriuja amina jahevitirou embo na kito enda ta do ere puvutuhua avo hotembu hotembu ue joru ururoro titivina umbuto bara au beasuja. <sup>27</sup> Eto embomeni na Embo ta Meni avo oje jo ta sovera te usasa isapamane te puvutuhurou kesora <sup>28</sup> Avoeto ari erena avo itiketo puvutuhuroro arerembeto kogoue irivujo, ungota orekari iji puvuto ere hua avoeto.” ke ainge eto

*I junga ta ari hotembevu*  
(Matthew 24:32-35, Mark 13:28-31)

<sup>29</sup> Enana ta degi timu hatirari ke na einge ena, “I junga te i nei uhoho amite tapa kogoue hotembevujo. <sup>30</sup> Eto amita hatu ta tivine eto gigi vujekeuja amo amita be ari iji auveuja <sup>31</sup> ainge iteko ari erena amo tapa puvutuhurou kogoue amo God na enda titi jigesuja iji amo auvetija ke evujo. <sup>32</sup> Na ungota degi ke be na erena embomeni tapa mane sasari aisora te ari emo puvurou kesora. <sup>33</sup> Eto utu te enda te avo irae aisuja te ke nau avo eho mane irae aisuja.

*Be kogoue irivujo*

<sup>34</sup> Rate enda ta gamo osaga neite neite amina oti pe vitou titivi ururou irirovo amo bage ta o teuja aingeko nombo iji kombu puvuto bage ta o tarako aisuja avoeto be kogoue irivujo, <sup>35</sup> amo enda tapa embomeni ta degi puvuresuja <sup>36</sup> ari tapa erevi puvuto ere hua avo tiumbeto pambuto Embo ta Meni ta titi ta hetasova avo ngahia ra avoeto God ta degi sovera ari kaiketo penunu ijie kogoue irivujo,” ainge Iesu na ena. <sup>37</sup> Eto iji tapa amo Iesu na temple jo ta

embomeni ate ere poekitioi iji bou-voi pambuto da vahai tiri javo olives engitita kogombari ai ere eviaetija. <sup>38</sup> Eto iho be te embomeni tapa na Iesu ta ke ingesi temple jo ta ere toritiaetera.

## 22

*Iesu umbuto tasora avo ke kasea*  
(*Matthew 26:1-5, Mark 14:1-2, John 11:45-53*)

<sup>1</sup> Eto jarukari ta pondo te bread sivo ikae pajirae amita pondo te iji auvitinu <sup>2</sup> enana priests pepeni te ke pepeni simba ari embopo te na Iesu umbuto taro amburoja uje ea rate embomeni isapamane na Iesu ta ke ingihe mitia avo joru ue umbari degi jombure ea.

*Judas na Iesu harikasi sija ena*  
(*Matthew 26:14-16, Mark 14:10-11*)

<sup>3</sup> Eto Iesu ta ambotani tapa 12 rate vahai amita javo amo Judas Iscariot amo Satan na jo enetenu <sup>4</sup> pambuto priests pepeni te temple simba ari embopo te amiga Iesu naingeto harikau umbasora avo pambuto hihi avo tirio <sup>5</sup> ingito tunga javotoho ue koro doinge ikaro umbasuja avo siriketo <sup>6</sup> teka uo Judas pambuto embo isapamane irae amikote Iesu umbuto enana ta ingeni ta ikasi simba ena.

*Iesu na Jarukari pondo indesi sija ena*  
(*Matthew 26:17-25, Mark 14:12-21, John 13:21-30*)

<sup>7</sup> Eto bread sivo ikae pajirae amita pondo te jarukari pondo te iji puvunu o meni vahai teto heveto pene gaga ta tembari iji avo puvunu <sup>8</sup> Iesu na Peter te John te umbuto ke einge ena, “Ungo heriso pambuto jarukari pondo avo nununga evu indore,” ainge enu <sup>9</sup> “Dago degi nainge nununga ara uje ere oe?” ainge eo <sup>10</sup> “Ingivujo, ungo pambuto da jo ta embo vahai umo tigi jigito puvutuhurou tambuto embo avo ambo ambo ue pambuto bande nainge torasuja aita ungo toreto <sup>11</sup> bande

mamo ta degi ke einge evujo, ‘Ate Poekari Embo na no degi ta ke erevi aro ingoa etija ‘Na nau ambotani ga umoro embo ta bande jo nainge toreto arumbeto jarukari ta pondo indoro?’’ ainge avo <sup>12</sup> ingito bande jo peni i ta mitia ai ta indari tembari degi te arumbeto indari degi te tapa inono ta mitia avo embo amina au kito pondo ai nununga evujo.” ainge enu <sup>13</sup> pambuto Iesu na ke ena ainge inono ta kito pondo nununga eo irae enu

*Bada ta pondo*  
(*Matthew 26:26-30, Mark 14:22-26, 1 Corinthians 11:23-25*)

<sup>14</sup> Pondo iji puvunu Iesu na amita apostero ga tapa areto indesi mitie <sup>15</sup> Iesu na enana ta degi ke einge ena, “Na pambuto memenga osaga kesona avoeto nau jo tapa na jarukari pondo erevi ungo ga kiti indesi uje ereona, <sup>16</sup> Eto ungota degi erena, God ta titi jigari iji be puvuto ere hua avo ate kitira ue jarukari pondo tutumota ere indena erevira,” <sup>17</sup> ainge eto atungu umbuto God peketo ke einge ena, “Atungu erevi umbuto isapa isapa indavu <sup>18</sup> Eto kivujo, na esi be ta mu ehako mane indesona te God ta titi jigari iji puvurou ehako indesona,” ainge eto <sup>19</sup> Bread umbuto God peketo periketo enana ta degi ikitie ke einge ena, “Hamo nau erevi ungo embo ikarira umbuto indie na hotembu hotembu evujo.” ainge eto <sup>20</sup> indio irae enu Iesu na ke einge ena “Atungu ei ta amo sasaga nau nomai eha ta kajari ta sasaga avo ungo embo overeketena. <sup>21</sup> Rate kivujo, na isoro embo ta ingeni ta ikasuja embo amita ingeni amo ingeni nau ga tapa gaga ta tembeto mitia <sup>22</sup> Eto God na ke matu ari avoeto Embo ta Meni amburesuja te aja to erena, harikari embo avo osaga memenga isapamane kesuja.” ainge enu <sup>23</sup> enana vahai amuna harikau avo mine ara ijie ajire engeka ea.

*Embo peni amo amuna au?*  
(*Matthew 20:24-28, Mark 10:41-45*)

<sup>24</sup> Eto enana embo vahai amuna nembeto peni aisuja avo tini kambari ue ke mine ara eo <sup>25</sup> Iesu na ke einge ena, “Enda embomeni tapa amita kings na titi jigihore osaga kiora te ehako hande embo ke ara eora. <sup>26</sup> Rate ungo na ainge mane aisova te umo embo peni asi uje ue kito embo teho ejo, eto embo titi jigesi uje eto kito embo ta pure embo ke ijie ke agi ejo. <sup>27</sup> Embo peni amo davore? Indari embo retemo undurari embo re? Amo indari embo rate na ungo unduresi puvena. <sup>28</sup> Rate ungo na na egikae na osaga kogue uone namote tapa mitovova. <sup>29</sup> Avoeto nau Mama na au na embomeni titi jigona aisuja ainge nombu <sup>30</sup> nane ano ungo nau titi jigari degi ta toreto gaga nau ta arumbeto indito avo arumba peni ai ta arumbeto Israel ta ohihi javo tapa 12 ainge mitera avo ungonana ganoka ijie pehumba aisova.

*Peter na Iesu kiae ke aisuja avo Iesu na harikena*  
(Matthew 26:31-35, Mark 14:27-31, John 13:36-38)

<sup>31</sup> Ajae Simon! Satan na penunu ngahia na eto ungo tapa umbuto eto kesi ue rice be jahevarako arote? <sup>32</sup> Rate Simon umo God toae tumota matuainge iresoa avo pari ere ona avoeto umo pambuto mitiro jo aherekau no namei kamei hondate ejo sovera umbare.” ainge enu <sup>33</sup> Simon na ke einge ena, “Bada, na umo te pambuto tipura ta torasona eto amburesona avo nununga ereona,” ainge enu <sup>34</sup> ke einge ena, “Peter, na no degi ta erena, iho bujae mitirou mume orohuta inena na kiae ke tapa 3 ainge ijiro ohora javone aisuja” ainge eto

*Utu goru te eti savo te koro te toto pambuvu*

<sup>35</sup> Enana tapa ta degi ke einge ena, “Eto na ungo ikano pambava ue utu goru te eti savo te koro te toto pambava ue etene pahava amikote osaga kogavete?” ainge enu “Osaga kiae tapa inono ta uera” ainge eo <sup>36</sup> Iesu

na ke einge ena, “Rate oroho amo no koro te eti savo te tapa umbuvujo, eto no isoro asivo irae kito no ombari asukari amina ombuto umbujo. <sup>37</sup> Amita be amo ari nau degi ta do puvuresuja avo God ta ke ta matu kajari einge mitia, ‘Embo amo ari sapura embo ra ke aisora’ ainge mitia avoeto na amburari iji puvija” ainge enu <sup>38</sup> enana “Bada kijo, isoro ari asivo heriso mitia erevira,” ainge eo “Aravora, ke inonora tovu”, ainge eto

*Tiri javo Olives*

(Matthew 26:36-46, Mark 14:32-42)

<sup>39</sup> Bande toto beto ari ainge avoeto tiri ‘olives’ ta bitesi amita ambotani ga pambuto <sup>40</sup> tiri ta puvuto enana ta degi ke einge ena “Satan na ungo engeka aisuja avoeto pari evujo,” ainge eto <sup>41</sup> enana toto embo na karu gosukeore pambuto beuja kakane ainge ta pambuto paunge teteri eto <sup>42</sup> pari einge ena, “Mama, ari tapa inena ari avoeto atungu erevi mane indonote avo ke ao ingito toane eto uje nau mane rate uje no avo aisona,” ainge enu <sup>43</sup> Anera vahai na Utu ta eto puvuto sovera ari ikena, <sup>44</sup> Eto osaga pajire be kogue jo tapa iketo pari unu amita ivori na sasaga aingeto sinini eto enda ta bena. <sup>45</sup> Eto pari enu irae enu ereto pambuto amita ambotani osaga kogue evio avo kito ujeto <sup>46</sup> ke einge ena “Ungo do eto evopo ere ove? Ereto ungo engekari ta beasova avoeto pari evujo” ainge ijinu

*Isoro embopo na Iesu andito jigito umbua*

(Matthew 26:47-56, Mark 14:43-50, John 18:3-11)

<sup>47</sup> Amita ambotani 12 rate vahai Judas na embopo kiti umbuto puvuto Iesu ta degi auveto mune tavo aisi unu <sup>48</sup> Iesu na kito ke einge ena, “Judas, umo Embo ta Meni avo mune tavo ari na harikasi ere oete?” ainge enu <sup>49</sup> embomeni Iesu ga puvua amina ari do puvuresuja avo kito ke

einge ea “Bada dago ta asivo na embomeni taro?” ke ainge ijie <sup>50</sup> embo vahai na Priest peni ta pure embo amita onde be hena avo jeto tiukenu bena avo <sup>51</sup> Iesu na taekitie “ainge ere ova avo tovu” ijie isoro embota onde avo umbuto ikenu kambuto arinako ena. <sup>52</sup> Eto Iesu na priests pepeni te temple ta isoro embopo te Judea ta embo pepeni te isoro amita degi puvutuhu ke einge ena, “Na pegene embo mane rate asivo te kepata te jigito na umbasi ere puvutuhovete? <sup>53</sup> Na iji tapa temple jo ta embomeni ate ere poekitovona amikote na umbaeteva amo tova te ungota iji ikari re eremita Satan ta sovera ari na mumete puveva erevira” ainge enu

*Peter na Iesu kiae ke ena*  
(*Matthew 26:57-58,69-75, Mark 14:53-54,66-72, John 18:12-18,24-27*)

<sup>54</sup> Iesu andito umbuto priest peni ta bande ta pahuo Peter na tunga te jatiki ue ambota pambuna. <sup>55</sup> Eto Peter na pambuto priest peni ta bande huga jo orohuta embomeni i ikeo evikitinu mitia ai pambuto arumbenu i peri bivitinu <sup>56</sup> kakara vahai amina Peter ta tombu usasa ta ijuketo kito ke einge ena “Embo Iesu ga mitei koganare erevira” ainge ijinu <sup>57</sup> Peter na ingito “Kakara, embo amo na kiaera” <sup>58</sup> ainge eto isapa mitinu embo nei amina kito “Umo enana emiga eoa” ainge enu Peter na “Embo, ainge manera” enu <sup>59</sup> isapa mitimite embo nei na Galilee embo hajire be kito “amo ke be ra embo emo Galilee embo hajire kogona avoeto enana vahaira,” ainge enu <sup>60</sup> Peter na “Embo umo ke do erea amo na be kiae ere ona” ke ainge ijinu di ohora javone ijinu <sup>61</sup> Iesu egerembeto Peter kogunu Bada na “Peter umo na kiae ke 3 ijiro di ohora ke aisuja” ainge ena avo hotembeto <sup>62</sup> osaga kogue tambuta pambuto si ijie sisivu kutena.

*Iesu urumbeto tea*  
(*Matthew 26:67-68, Mark 14:65*)

<sup>63</sup> Eto embomeni Iesu umbua amina urumbitie teto <sup>64</sup> titi bo na togeto ke einge ea “Peroveta, amuna umo ere toroi” ainge eto <sup>65</sup> ke neite neite ijie Iesu urumbea.

*Iesu ikeo koto ta hetena*  
(*Matthew 26:59-66, Mark 14:55-64, John 18:19-24*)

<sup>66</sup> Eto iho bujenu Iesu pehumba asi Judea embomeni ta embo okokose amo priests pepeni te ke pepeni simba ari embopo te amina torukeo Iesu umbuto pambuto ikeo hetenu ke einge ijie ganoka ea, <sup>67</sup> “Umo Judea embopo ta hondate ari embo Keriso?” ainge eo “Na ungo ta degi aisona te ungo ke be mane hotembasova, <sup>68</sup> Eto na ungota degi eto ingesona te ungo ke be mane harikasova, <sup>69</sup> rate eha itikitora emo Embo ta Meni na God sovera isapamane te ta ingeni be ta arumbeto daroho iresuja”, ainge enu <sup>70</sup> enana tapa na ke einge ea “Avoeto umo God ta meni re?” ainge eo “Ke ereva amo namora” ainge enu <sup>71</sup> enana ingito ke mine ara eto einge ea “Embo nei na harika mane au ingesora te amita pe na God urumbitie eria aravora.”

## 23

*Iesu umbuto ikeo Pilate ta titi ta hetena*  
(*Matthew 27:1-2,11-14, Mark 15:1-5, John 18:28-38*)

<sup>1</sup> Ainge eto Judea ta council tapa ereto Iesu umbuto pambuto Pilate ta tombu ta ikeo hetenu, <sup>2</sup> pehumba einge ea, “Embo eremina nango ta enda ta embomeni ereto isoro ara jo kajeuja eto nango Caesar ta degi tax koro mane ikara ke ijie ‘Na Keriso ungota king ra’ ainge euja embo avo tambera”, ainge eo <sup>3</sup> Pilate na Iesu ta degi einge eto ingina, “Umo Judea embomeni ta king re?” ainge enu “Ke amo no avo erea” ainge enu <sup>4</sup> Pilate na priests pepeni te embomeni tapa te ta degi, “Na embo emita ari sapura tambae be ereona,” ainge enu <sup>5</sup> Embomeni na ereto ke



ngahia na eto einge ea, “Embo aramina amita enda Galilee ta eto puvuto Judea enda erei ta da ari na ue amita ate poekari na embomeni jo kaitie Jerusalem ta puvija” ainge eo

*Iesu umbuto ikeo Herod ta titi ta hetena*

<sup>6</sup> Pilate na ingito “embo emo Galilee embore” ainge enu “Galilee embora” eo <sup>7</sup> ingito Iesu ta enda vahai Galilee ta simba ari embo okose Herod da Jerusalem ta umoro puvuto mitina avoeto ikenu Iesu umbuto pambuto Herod ta degi ikea <sup>8</sup> Eto Herod na Iesu do ere uaetija amita duru amo matu ingari avoeto Iesu ta sovera vahai avo au kesi uje eto simba iji koso ena avo eto Iesu puvunu kito tunga javotoho ena <sup>9</sup> Eto Herod na Iesu iji koso ganoka ena rate ke mine ae unu <sup>10</sup> enana priests pepeni te ke pepeni simba ari embopo te na ke isara na eto Iesu pehumba ea. <sup>11</sup> Eto Herod te amita isoro embopo te na Iesu isembeto urumbitie king ke ijie kiari bo ikenu asukenu Pilate ta degi ikenu egerembena. <sup>12</sup> Eto Pilate te Herod te amo kitoho ue eonga ira eaorate iji amikote amo peka ue itiketo namei ea.

*Iesu amburoja ke ea*

*(Matthew 27:15-26, Mark 15:6-15, John 18:39-19:16)*

<sup>13</sup> Eto Pilate na priests pepeni te embomeni ta embo okokose te jage enu vahaita puvuo <sup>14</sup> ke einge ena, “Ungo embo eremina embomeni na ereto Rome ta degi isoro ara jo kajeuja ke ijie nau degi ta umbuto puveva avoeto ungo ta titi ta ganoka etena te, kivujo, ungo pehumba eteva amo embo emina ari sapura nei do ae avoeto tambae etena, <sup>15</sup> Eto Herod te tapa na amita ari sapura tambae eto iketei egerembetija avoeto, kivujo, Iesu na ari sapura avo tari amburari haite manera, <sup>16</sup> avoeto na esi na ejembeto ikano tambuta pambasuja” ainge ena. <sup>17</sup> Eto Pilate ta ari amo jarukari pondo iji puvutuhoi tipura embo

vahai vahai ikeoi tambuta puvuto avo embomeni na hotembitie <sup>18</sup> jage einge eto ea, “Embo erevi umbuto pahue Barabbas tipura ta iriuja avo ejo tambuta puvuto pambai” ainge ea. <sup>19</sup> Eto Barabbas tipura ta mitina amita be amo embo jo kajenu ereto titi jigari ga jujune ea eto embo tenu ambuna avoeto. <sup>20</sup> Eto Pilate na Iesu tambu ta pambaute avo embomeni ta degi enu <sup>21</sup> ke gagaha eto “I atahu ta tejo amburoi, I atahu ta tejo amburoi,” ainge ijio <sup>22</sup> Pilate na ehako enana ta degi ke einge ena, “Do eto taro amburou? Amina ari sapura do etei? Iesu na ari sapura avo tari amburari haite aera, avoeto na esi na ejembeto teto ano tambuta pambasuja” ainge enu <sup>23</sup> embomeni na jajage eto “i atahu ta te” ainge ke ngahia be eo <sup>24</sup> Pilate na “aravora, ungota uje ere ova avo aisora,” ke ainge eto <sup>25</sup> embo Barabbas amo embo ta jo kajenu isoro ea eto embo tenu ambuna avoeto tipura ta ikari avo embomeni na uje ea avoeto enu tambuta pahunu Iesu avo Judea embopo ta uje avoeto umbuto tara ikenu amita isoro embopo na goruketo umbuto pambua.

*Iesu i atahu ta tea*

*(Matthew 27:32-44, Mark 15:21-32, John 19:17-27)*

<sup>26</sup> Eto umbuto pahuo da Cyrene embo javo Simon avo da isapa ta mitimite puvutuhunu kito taeketo Iesu ta i atahu avo Simon na hondate eto umbaja umbuto koho ta tembeo umbuto Iesu ta ambota pambuna. <sup>27</sup> Eto embomeni isapamane Iesu ta ambota pahuo pamone isapamane na Iesu kito sinena ue jenge torue sisi sasi ea. <sup>28</sup> Rate Iesu na egerembeto enana ta degi ke einge ena, “Da Jerusalem ta iariri, namo avoeto si mane aisova rate ungoti ungota meniundi te avoeto si evujo. <sup>29</sup> Eto kivujo, iji puvuto ere hua amikote ke einge aisora, ‘meni irae pamone te oti ta be irae amo tunga javotoho ere ora,’ ainge eto <sup>30</sup> Memenga jamo aja tiri ta degi, ‘koheketo beto

nango kikira e,' eto hetu ta degi 'beto dago ahureke' ainge aisora <sup>31</sup> Na i eha avoeto nau degi ta do ereora avo kivujo rate ungo i jaise avoeto ungota degi ari sapura be do ainge aro?" ainge Iesu na ena.

<sup>32</sup> Eto ari sasapura embopo heriso avo Iesu ga tapa taro amburoja umbuto pambua. <sup>33</sup> Eto pambuto degi javo Uta Popo ta puvuto Iesu i atahu ta teto ari sasapura embopo amiga tapa teto vahai amita ingeni be hena ta eto vahai amita ingeni anga ta ainge eto hurukeo mitie <sup>34</sup> Iesu na ke einge ena, "Mama ari emo enana be kiae avoeto ere ora avoeto hotembeto tojo," ainge ijinu enana ituha tuho te koso te jigio koso kororoeto umbuna amina nembeto Iesu ta bo umbuna. <sup>35</sup> Eto embomeni areto kogoue mitio enana embo okokose na arureto ke einge ea, "Embo nei nei hondate eoija te amo Judea embomeni ta hondate ari embo Keriso avo God na siriketo ikari puvurari kito umo eonga enda ta beasuja," ainge ijio <sup>36</sup> isoro embopo na Iesu urumbitie 'vinegar' sogaga te umbuto Iesu na indoja imite heteto ikitie <sup>37</sup> ke einge ea, "Umo Judea ta King be kito umo eonga hondate e," ainge ea. <sup>38</sup> Eto 'Judea Embomeni ta King' ijie kaeto amita siro kombu ta tea.

<sup>39</sup> Eto ari sapura embo vahai Iesu ga tapa tea amina ke einge ena, "Umo Keriso be kito umo te nango ta tapa hondate e, i atahu toto beare," ainge ijie urumbitinu <sup>40</sup> ari sapura embo nei tea amina ke avo taekitie ke einge ena, "Umo te namo te amo hajire kiora tetere amburesi ere ora amo umo God joru ae re? <sup>41</sup> Eto umo te namote tetera amo ari sapura ungotenau avoeto tetera te embo emita ari sapura amo iraera te teho sio tetera," ainge eto <sup>42</sup> Iesu ta degi ke einge ena, "Iesu, no King ari degi ai ta toreto sovera ari umbuto na hotembejo," ainge ijinu <sup>43</sup> Iesu na ke mine einge ena, "Na no degi ta ke be erena, umo namo te tapa eha oroho 'paradise' ta torasoa," ainge ena.

*Iesu ambuna*  
(*Matthew 27:45-56, Mark 15:33-41, John 19:28-30*)

<sup>44</sup> Eto iji bitito ugorota hehitinu enda tapa mume sihukarako enu ture beto iji 3 ena. <sup>45</sup> Eto iji ta usasa irae unu temple jo ta degi peikari bo avo i ta sorereketo beto pambuto tu ta oekena. <sup>46</sup> Eto Iesu na ke isara na eto ke einge ena, "Mama, na nau ahihi ingeni no ta iketo toturitona," ainge ijie hen jamo ena. <sup>47</sup> Eto isoro kiti umbari embo vahai amina hajire tapa do ena avo kito God jakeka ijie ke einge ena, "Ke be ra. Embo erevi ari sapura embo manera." <sup>48</sup> Eto embomeni isapamane embopo i atahu ta toruroro kesi puvua amina hajire tapa avo kito sinena ue jenge torue egerembeto da ta pambua. <sup>49</sup> Eto Iesu ta namei kamei te pamone nei uhoho te Galilee ta eto ambo ambo ue puvua amina tihieto heteto Iesu ta degi do ea tapa avo kia.

*Iesu ta hamo kovea*  
(*Matthew 27:57-61, Mark 15:42-47, John 19:38-42*)

<sup>50-51</sup> Eto enda Judea ta da Arimathea embo vahai javo Joseph amo Council ta hetari amina Iesu ta degi do asi ea amo amina taekena. Embo amo javotoho avoeto God ta titi jigari simba ena <sup>52</sup> amina Pilate ta degi pambuto Iesu ta hamo penunu enu aravora enu <sup>53</sup> i atahu ta eto umbuto ikenu benu bo javotoho koso vahai amina togeto umbuto pambuto embo kovari panga matu atara jo ta kovari ai ta embo kiti ikae sape ae aita ikenu serekena. <sup>54</sup> Eto ari tapa erevi eo irae enu jangu indari iji itikena.

<sup>55</sup> Eto pamone nei uhoho enda Galilee ta eto Iesu ambo ambo ue puvua amina Iesu ta hamo naingeto use jo ta ikeo serekena avo kito <sup>56</sup> pambuto jeune te 'oil' mune te amite aingeto Iesu ta hamo ta buresi nununga eto evito God ta ke agi ue jangu india.

## 24

*Iesu vasiri te erena*  
(*Matthew 28:1-10, Mark 16:1-8,*  
*John 20:1-10*)

<sup>1</sup> Eto jangu indari iji irae eto iho bujenu pamone na Iesu ta hamo buresi donda mune te matu nununga ea avo umbuto use ta pambuto <sup>2</sup> use pe karu na ahurekena avo hirikari mitina avo kito <sup>3</sup> toreto Iesu ta hamo avo use jo ai ta irae kito <sup>4</sup> mana mana ue mitio embo heriso bo parara be asukari amina irerembeto puvuto heteo daha daha unu <sup>5</sup> arerembeto kito joru ue tumo kouketo mitio ke einge ea, “Ungo do eto embo vasiri te avo embo amburari kovari use ai jombure ere ove? <sup>6-7</sup> Enda Galilee ta mitie ungota degi ke do ijija avo hotembevu, amo eingera, ‘Embo ta Meni avo umbuto embo sasapura ta ingeni ta ikaro umbuto i atahu ta taro ambuto iji 3 irae au vasiri ta erasuja’ ainge ungota degi ijija,” ainge eo, <sup>8</sup> Enana Iesu ta ke matu ari avo hotembeto <sup>9</sup> use toto egerembeto pambuto ambotani 11 amite eto embo nei uhoho amita degi ke ea. <sup>10</sup> Eto pamone ta javo amo Mary da Magdala pamone amite Joanna amite James ta e Mary te pamone nei uhoho amite tapa ke avo eo <sup>11</sup> ingito teho ke be mane hihi tiritie erera ainge ijie ke be ae ea.

<sup>12</sup> Rate Peter na ereto tutuveto pambuto use jo ta anembeto Iesu togari bo avo pere mitinu kito ari do ena avo hotembu hotembu eto egerembeto bande ta pambuna.

*Da Emmaeus degi ta pambua*  
(*Mark 16:12-13*)

<sup>13</sup> Eto iji amite Iesu ta ambotani heriso amina da Jerusalem ai ereto da Emmaeus pambua amo degi 11 ‘kilometres’ koso ai ta pahue <sup>14</sup> ari tapa do puvuna avo ke mine ara ijie pahuo <sup>15</sup> Iesu na hae eto puvuto tambuto inono ta ere pahuna <sup>16</sup> rate enana Iesu mane kiora titi oje na ahurekarako enu <sup>17</sup> Iesu na enana ta degi ke einge ena, “Ungo puvutuhue ke deirami mine ara ereve?”

ainge enu enana osaga kogue mitio <sup>18</sup> embo vahai Cleopas na ke mine einge ena, “Da Jerusalem ta ari do etera tapa amo umoro embo tapa ingera te umo vahai avo ingaere,” ainge enu <sup>19</sup> “Arimo do etere, ejo ingone,” ainge enu ke einge ea, “Iesu Nazareth embo amo peroveta peni be eto amo God ta sovera te amina ari te ke te neite neite embomeni ta titi ta eauja te <sup>20</sup> Nangota priests pepeni te embo okokose te na embo aravo taro amburoja umbuto Rome ta ingeni ta iketere umbuto i atahu ta tetere ambuto <sup>21</sup> iji 3 irae ere ua erevira. Rate embo aravo Israel embo orekaja God na ikari avo hotembetera. <sup>22</sup> Eto nei amo nangota pamone nei uhoho na iho be te use ta pambua <sup>23</sup> te amita hamo avo use jo ta irae kogue ore anera na keko etereiija amo Iesu vasiri te matu erari ke etere ingito puvuto nangota degi etere ingito <sup>24</sup> ke be kesi nango ta embo nei uhoho na use ta pambuto Iesu tambae pamone na ke etera avo inono ta kito puvera,” ainge eo <sup>25</sup> Iesu na ke einge ena, “Ungo kiae kiae embopo, ungo do eto peroveta mamatu ta ke avo ke be ari pegogo ere ove? <sup>26</sup> Eto Judea ta orekari embo Keriso na amita usasa ta torasuja rate kiti amo memenga osaga kioja ke ari amo ungo kiaere?” ke ainge <sup>27</sup> eto ari tapa amita degi do puvuresuja avo matu Moses ta ke kajari iji te eto pambuto peroveta tapa te amita iji te kajari avo harikenu ingihe <sup>28</sup> puvuto da auvitie embo vahai embo heriso amiga ere puvutuhuna avo da nei ta pambaute avo hotembeto <sup>29</sup> ke einge ena, “Mume ere sihukitia avoeto umo nangote hetaote?” ainge eto enana ga pambuto bande jo ta toreo <sup>30</sup> enana ga arumbeto ‘bread’ umbuto God peketo ingeketo ikitinu <sup>31</sup> enana ta titi hirikenu Iesu be koguo saiveto pahunu <sup>32</sup> ke mine ara ijie einge ea, “Embo amina degi ta puvutuhue God ta ke hiriketei ingihore jenge ingekitei puvera,” ainge

eto <sup>33</sup> mume amikote sau sau ereto Jerusalem ta egerembeto pambuto Iesu ta ambotani 11 amite nei uhoho amite tapa toruketo mitia ai ta toreto <sup>34</sup> “Bada vasiri te ereto Simon ta degi puvei kija,” ainge embo heriso amita degi eo <sup>35</sup> enana degi ta do enu kogue ingihe pahumite bande ta toreto ‘bread’ ingekena ai ta be kia,

*Ambotani na Iesu kia*  
(*Matthew 28:16-20, Mark 16:14-18, John 20:19-23, Acts 1:6-8*)

<sup>36</sup> Avo eo ingihe mitio Iesu enana ta jo ta puvuto heteto, “Peka ungota degi iroi,” ainge ijinu <sup>37</sup> enana kito embahe ke ijie joru uo <sup>38</sup> kogue ke einge ena, “Ungo do eto joru ove ungota jo ta eto ingari ke isapamane mitei? <sup>39</sup> Namora. Nau ingeni te utu te kogue na tame evujo. Eto embo amburari ta ahihi amo bisi irae vetu irae rate namo amo bisi te vetu te ra.” ainge eto <sup>40</sup> amita ingeni te utu te avo enu <sup>41</sup> kito osa pajire be ue mana mana uo, “Ungota degi indari miteite,” ainge enu <sup>42</sup> umo o borari avo ikeo <sup>43</sup> enana ta titi ta indito <sup>44</sup> ke einge ena, “One ere kogova amo ungote iriona iji amikote tapa etene ingeva amore Moses ta ke kajari te peroveta mamatu ta ke kajari te ‘Psalms’ ta ke kajari te ai ta ke kajari mitera amita bere puvija erevira,” ainge eto <sup>45</sup> enana ta uta hirikenu God ta ke kajari tapa avo be kon eto koguo <sup>46</sup> Iesu na ke einge ena, “Avoeto ke matu kajari ta mitia amo Keriso amina memenga kogue ambuto iji 3 amina vasiri te erasuja <sup>47</sup> eto ari sasapura toto jo aherekari amite ari sapura hotembeto toari amite amita ke avo Keriso ta javo ta da Jerusalem ei ta eto enda tapa ta pahue hande evujo. <sup>48</sup> Eto ari erevi tapa amo ungo titi na kiari avoeto ke hande ari embopora <sup>49</sup> avoeto kivujo, ungo da ei ta mitirovo nau Mama na ikasi ke ena avo pambuto ikano Utu ta sovera na ungota jo enetasuja,” ainge enu irae enu

*Iesu Utu ta bitina*  
(*Mark 16:19-20, Acts 1:9-11*)

<sup>50</sup> Enana urumbeto umbuto da Bethany ta pambuto ingeni i ta jigito <sup>51</sup> ambotani ta javotoho ari ikitinu Mamo na umbuto Utu i ta pambuna. <sup>52</sup> Eto enana tunga javotoho ue God jakeka ijie egerembeto da Jerusalem ta pambuto <sup>53</sup> temple jo ta toreto mitie God jakeka ere iijaetera.



## JOHN OTOHU TA EVANERIA

### *Ke na bisi ena.*

<sup>1</sup> Enda irae kiti be kiti ta amo Ke ra eto ke amo God ga mitiaetija. Eto Ke amo God ra. <sup>2</sup> Eto Ke amina God ga daroho mitiaetija. <sup>3</sup> Eto Ke amina God na donda tapa ena. Eto donda tapa amo eonga irerembae rate Ke amina enu irerembena. <sup>4</sup> Eto Ke amita degi vasiri daroho mitiaetija eto vasiri amina enu embo ta degi usasa puvuna <sup>5</sup> Eto usasa amina mume ta pangena te mume amina usasa nembari inono aera.

<sup>6-7</sup> Eto embo vahai javo John amo usasa ta ke avo harikau embomeni ingito ke be ara God na ikenu puvuna. <sup>8</sup> Eto embo John amo usasa mane rate usasa avo embo ta degi harikaja ikenu puvuna. <sup>9</sup> Eto Ke amo usasa be embo usasa ta irora enda ta puvuna. <sup>10</sup> Eto enda ta puvuna amita ingeni na hajire ikari aita puvuna te embo na kito kiaesira ea. <sup>11</sup> Eto tohota da be amina kogombena ai ta puvuna te amita embomeni na kito peketo umbae ea. <sup>12</sup> Rate embo nei nei amuna kito peketo ke be ijio amita degi sovera ari ikenu umbuto God ta meniundi be ea. <sup>13</sup> Amo enda ta meniundi mane bisi ta uje ta meniundi mane eto embo ta be ikari ta meniundi mane rate amo God ta meniundi be amina umo eonga iharira. <sup>14</sup> Eto ke amina puvuto besi umbuto dagote mitiaetei amita usasa avo kia, Mamo ta Meni avoeto amita usasa amo ke be te hondate ari te na enetarira. <sup>15</sup> Eto John na amita ke avo einge hande ena, “Embo nau ambota puvuresuja, ainge eona amo nau aja na na ingae iji te kiti ta mitouva avoeto embo amo peni ra eto na isapara. Eto embo amo puvija erevira,” ainge John na ena. <sup>16</sup> Eto Iesu Keriso amo hondate ari embo avoeto hondate ari hamota hamota eto umbuora <sup>17</sup> Eto ke pepeni Moses ta eto puvurari rate ke be te hondate

ari te amo Iesu Keriso ta degi eto umbuora.

<sup>18</sup> Embo na God mane kiora te God ta Meni avo vahai God ga inono amina eoi God kiora.

### *John na Iesu harikena*

*(Matthew 3:1-12, Mark 1:1-8, Luke 3:1-18)*

<sup>19</sup> Eto Judea ta embo okokose da Jerusalem ta mitia amina priests te ke pepeni kiari embopo te ainge eto ikeo John ta degi pambuto, “Umo embo amunure?” ainge eo <sup>20</sup> John na ke mine ondikae hariketo einge ena, “Ungo Keriso simba ere ovova na avo manera,” ainge enu <sup>21</sup> ehako “Umo Elijah rete?” ainge eo “Na avo manera” ainge enu, “Umo peroveta simba ereovora aravorete?” “Na avo manera.” ainge enu <sup>22</sup> “Eto nango iketere puvera embopo ta degi pambuto ke do aro? Eto umo amunure eto embo umo ke do eoe?” ainge eo. <sup>23</sup> Eto peroveta Isaiah na ke matu kajena avo John na umbuto einge ena, “Embo ojagatambu ta mitie jage eto ke einge aisuja, ‘Bada ta puvurari degi evu tambu ai’ ainge ena embo amo namora,” ainge enu <sup>24</sup> Pharisee embomeni nei nei Jerusalem eto puvua amina John ganoka eto <sup>25</sup> einge ea, “Umo Keriso mane, eto Elijah mane eto Peroveta simba ereovora avo manera te do eto embomeni bapataito ere oe?” ainge eo, <sup>26</sup> John na ke mine einge ena, “Na umo na bapataito ere ona te embo vahai amo ungota orohuta heteto mitia amita duru avo ungo matu ingae ra te <sup>27</sup> nau ambota puvuto ere hua amita utu goru nanena arusetu houkari inono aera.” ainge ena. <sup>28</sup> Eto John na umo Jordan ta ovitiho da Bethany ta embomeni bapataito unu ari erevi ea. <sup>29</sup> Eto iji nei Iesu na John ta degi puvutohunu kito ke einge ena, “Kivu. God ta o ‘sheep’ meni embo ta ari sasapura ombuto umbasi puvuto ere hua. <sup>30</sup> Na embo erevi avoeto ke einge ijiena. ‘Eto embo nau ambota puvuresuja amo na irae iji te mitiaetija avoeto na isapa eto

embo amo penira' ainge ijiena <sup>31</sup> eto namote tapa embo amo matu na kiae rate Israel embomeni ta degi harikasi puvuto umo na bapataito ereona." ainge eto,

<sup>32</sup> Ke nei einge harikena, "Ahihi Otohu di dipo ainge Utu i ta eto amita degi puvei kena, <sup>33</sup> Eto embo amo mane kiaetena te na embo bapataito ana ikari Embo emina nau degi ta kiti ke einge ijija. 'Eto embo amuta degi Ahihi Otohu beto iresuja embo amina embomeni Ahihi Otohu na bapataito aisuja.' ainge etei ingito <sup>34</sup> ari avo kito embo erevi God ta Meni be avoeto ungota degi ere harikitona." ainge John na ena.

### *Iesu na amita ambotani siriketo umbuna.*

<sup>35</sup> Eto evito iji nei John te ambotani heriso te aingeto degi ai ta heteto mitio <sup>36</sup> Iesu puvuto pahunu John na kon eto kito ke einge ena, "Kivu, God ta o 'sheep' Meni ra," ainge enu <sup>37</sup> John ta ambotani heriso amina ingito Iesu ambo ambo ue pahuo, <sup>38</sup> Iesu na overeketo kito ke einge ena, "Ungo amunami uje ere ove," ainge enu enana na, "Ate poekari embo, umo nainge irioe?" ainge eo <sup>39</sup> Iesu na "Huma kivujo." Ke ainge enu enana ture 4:00 o'clock ainge amiga pambuto amita irari degi kito amiga mitio ture bena

<sup>40</sup> Enana heriso John ta ke ingito Iesu ambo ambo ea vahai amo Simon Peter ta eambo Andrew ra. <sup>41</sup> Eto iho bujenu Andrew na amita namei tambuto ke einge ena. "Israel embo ta hondate ari embo Keriso avo tambara." ainge eto <sup>42</sup> Simon umbuto Iesu ta degi pambuo Iesu na Simon kon kon eto kito ke einge ena, "Umo John ta meni Simon rate nanena no javo ere ikitena amo 'Cephas' ra. ('Cephas' ta be amo Atara ra.)" ainge Iesu na ena.

### *Iesu na embo Philip te Nathanael te umbunu ambo ambo ea*

<sup>43</sup> Eto iji nei Iesu na enda Galilee ta pambasi ue embo Philip tambuto, "Na ambo ambo ejo." ainge

ena. <sup>44</sup> Eto Philip amo Andrew te Peter te amita da vahai Bethsaida avo embora. <sup>45</sup> Eto Philip na embo Nathanael tambuto ke einge ena, "Eto Moses te peroveta te aingeto enana ta ke kaitie embo vahai puvuresuja ainge ijie kajea avo tambara amo da Nazareth embo Joseph amita meni Iesu avo tambara," ainge enu, <sup>46</sup> Nathanael na, "Da Nazareth amo sapura rate do eto ari javotoho amo puvurou?" ainge enu Philip na, "Huma, ki." ainge enu Iesu ta degi pahuo. <sup>47</sup> Iesu na Nathanael puvuto ere hua avo kito ke einge ena, "Embo puvuto ere hua amo Israel embo be ra eto amita ke sokova irae." ainge enu, <sup>48</sup> Nathanael na ingito, "Ate poekari embo umo nainge eto na kiarire?" ainge enu Iesu na einge ena, "Eto Philip na umo jage ae kiti ta umo i junga susu utumota mite kena," ainge enu, <sup>49</sup> Nathanael na ke einge ena, "Ate Poekari Embo, umo God ta Meni be Israel embo ta King ra." ainge enu, <sup>50</sup> Iesu na, "Nanena umo i junga susu utumota mite kena avo etene ingea avoeto na ke be ijie amomo erete? Eto avo pere mane rate ari sovera neite neite kesoa," ainge, <sup>51</sup> eto ke nei enana ta degi einge ena, "Na ungota degi ke be na erena, Utu pe hirikau God ta anera na Embo ta Meni ta degi bearako bitarako, ainge ue pahurou kesova." ainge ena.

## 2

### *Da Capernaum ta jimbari pondo ea*

<sup>1</sup> Eto iji three amita ambota da Cana enda Galilee amita jo ta jimbari ta pondo asi uo Iesu ta e na pondo ta pambuna. <sup>2</sup> Eto Iesu te amita ambotani te avo oru eo pambuto mitio, <sup>3</sup> pondo ta 'wine' avo embomeni na indio irae enu Iesu ta e na meni ta degi puvuto, "Wine irae etija." ainge enu, <sup>4</sup> Iesu na, "Pamone, umo do eto nau degi ta ke ere? Nau pure ari iji puvuraera," ainge enu, <sup>5</sup> amita e na pondo simba ari embopo ta degi ke

einge ena, “Ungo amita ke tapa do aisuja avo agi evu,” ainge ena. <sup>6</sup> Eto Judea ta utu te ingeni te egerekari ovu pepeni tapa <sup>7</sup> atara na ari amo teka 100 litres vahai vahai ainge mitinu, <sup>7</sup> Iesu na kito pondo simba ari embopo ta degi ke einge ena, “Ovu pepeni ei ta umo overekevu pevitore,” ainge enu umo timbuto ovu jo ta overekeo pe inono enu, <sup>8</sup> Iesu na, “Umo avo timbuto umbuto pambuto pondo mamu ta ikevu,” ainge enu, <sup>9</sup> umo avo timbuto pambuto pondo mamu ta ikeo umo amo ‘wine’ enu umbuto indina. Eto ‘wine’ amo nainge eto puvuna amo pure embopo na kia te pondo mamu na kiae avoeto pambuto jimbari singa ta degi ke einge ena, <sup>10</sup> “Pondo iji te amo ‘wine’ javotoho avo kiti indiore inono eoi ambota ‘wine’ sapura amo indiora te inena ‘wine’ javotoho ambota ikete ere indera erevira.” ainge ena. <sup>11</sup> Eto ari emo Iesu ta vasiri te sovera te amo itikari ta da Cana enda Galilee jo ta ena. Eto ari aravo Iesu na harikenu amita ambotani na Iesu ta sovera do aingere avo kito ke be ea.

<sup>12</sup> Eto amita ambota Iesu na amita e te namei kamei te ga da Capernaum ta pambuto iji heriso mitia.

*Iesu na Temple jo ta embo kurumbena.*

*(Matthew 21:12-13, Mark 11:15-17, Luke 19:45-46)*

<sup>13</sup> Eto Judea ta jarukari pondo auvitinu Iesu na da Jerusalem ta pambuto <sup>14</sup> temple jo ta toreto embo na o ‘cow’ te o ‘sheep’ te di dipo te aingeto pure ari gaga ta tetembeto koro na mine omba ue mitio puvuto kito, <sup>15</sup> esi era erari amina ena amina umbuto kurumbenu o ‘cow’ te o ‘sheep’ te tapa joru temple toto pahuo koro ombari embopo ta koro avo teto osirikenu enda ta benu gaga jigito haperekenu, <sup>16</sup> di dipo ombari embopo ta degi ke einge ena, “Donda erevi tapa umbavu pambai. Nau Mama ta bande erevi ungo na mine ombuto umbari bande mane

aisova.” Ainge enu, <sup>17</sup> Iesu ta ambotani na ke matu kajari avo hotembea, ke amo erevira, “Na no bande osa asona amina jo nau enetasuja.” <sup>18</sup> Eto Judea embomeni na taekasi ke einge ea, “Umo embo amuta sovera na ke agi ue embo ere kurumbite, avo amita hajire ejo kiore.” Ainge eo, <sup>19</sup> Iesu na ke mine einge ena, “Aravorate erevi aisona, temple erevi aimbavo nanena iji 3 ehako jigono erasuja.” ainge enu, <sup>20</sup> Judea embomeni na ke einge ea, “Temple erevi gerikitiore jua tapa 46 irae ere ova te inena iji 3 amita jo ta gerikaote?” <sup>21</sup> ainge ea te Iesu na amita hamo avo temple ke ena. <sup>22</sup> Eto Iesu na ambuto vasiri te erasuja amita ke te tapa ena avo ambotani na hotembeto God ta ke kajari amite tapa ke be ea.

*Iesu na embo ta jo ta hotembari avo kina*

<sup>23</sup> Eto Iesu na jarukari pondo iji te da Jerusalem ta mitie ari neite neite unu embo isapamane na kito Iesu ta javo ke be ea. <sup>24</sup> rate Iesu na embo ta jo matu kina avoeto tumota be ae. <sup>25</sup> Eto Iesu na embo ta jo ta hotembari do aingere amo embo nei ta degi eto ingaera amita be amo umo matu ere kogua avoeto.

### 3

*Iesu na embo Nicodemus ga ke mine ara ea.*

<sup>1</sup> Eto Pharisee ari embo vahai Judea ta embo okose javo Nicodemus <sup>2</sup> amina mumete puvuto Iesu ta degi ke einge ena, “Ate Poekari Embo, umo ari neite neite ere oa amo embo na eonga mane aetera te God na hondate uei eoa avo eto umo ate poekari embo God na ikenu puvura.” ainge enu, <sup>3</sup> Iesu na ke einge ena, “Na no degi ta ke be erena, embo God na au e na eha ingarako aisuja, te ainge ae amo God ta titi jigari degi amo mane kesuja.” ainge enu, <sup>4</sup> Nicodemus na ke mine einge ena, “Embo peni amo amita e na naingeto ingau? Amo e ta oti ta ehako torau ingaute?” ainge enu, <sup>5</sup> Iesu na einge ena, “Eto embo

na umo te Ahihi te na e ta oti ta eha bearako aisuja te ainge ae amo God ta titi jigari degi ai ta mane torasuja. <sup>6</sup> Eto bisi na ingasora amo bisi aisuja eto ahihi na ingesora amo ahihi aisuja. <sup>7</sup> avoeto ke erena avo umo God na au meni isapa sira ao eha ingarako asora avo umo ingito jeneki honeki mane asoa. Ari amo einge ra. <sup>8</sup> Pisara amo nainge puvuto ere hoi eto nainge ere pahoi amo umo kiae rate asavi avo ere ingihea ainge nombo eto embo ahihi na ingasuja amo ainge aisuja,” ainge enu, <sup>9</sup> Nicodemus na, “Ari emo naingeto ari re?” enu <sup>10</sup> Iesu na ke einge ena, “Umo Israel ta ate poekari embo rate ari emo ereona emo umo kiae rete? <sup>11</sup> Na no degi ta ke be erena, dagota kiari avo ungota degi ere harikitora eto dagota titi na do kiora avo ungota degi ere harikitora te ungo na dagota ke ingari uje ae ra. <sup>12</sup> Eto na enda ta ari ke erena amo ungo ingae avoeto Utu ta ari ijirono ungo mane ingesova. <sup>13</sup> Eto embo nei amuna Utu i ta pambae rate Embo ta Meni Utu i ta iriuja amina enda ta puvija <sup>14</sup> Eto Moses na ojaga tambu ta mitie o koso o i atahu ta teto jiginiu bitinu embomeni na kito ke be ea ainge nombo Embo ta Meni jigoro bitou embomeni na kito <sup>15</sup> ke be eto vasiri daroho umbasuja. <sup>16</sup> Eto God na enda osa peni vahai eto amita Meni avo vahai ikenu enda ta puvuna, avo embo amuna ke be aisuja amo mane amburesuja te vasiri te daroho ire-suja. <sup>17</sup> Eto God na amita Meni enda ta ari sasapura avoeto tau irae aja ikae rate amina enda orekaja ikena. <sup>18</sup> Eto embo amuna God ta Meni ke be aisuja embo amo God na au amita ari sapura ta mine hajire mane ikau kesuja. Eto embo amuna God ta Meni ta javo ke be ae aisuja amo God na amita ari sapura ta hajire matu ikau kesuja. <sup>19</sup> Eto God na hajire ikau kesuja amita ke be amo erevira. God ta usasa matu enda ta puvuto mitia avo embo na uje ae ue enana ta ari sasapura avoeto mume ta iresi

uje ere ora. <sup>20</sup> Eto ke erena emo embo amuna ari sapura ue usasa oju ue tiumbeto pambasuja amita be amo amita ari sapura avo usasa na harikeuja eto <sup>21</sup> Embo amuna ke be ijie iriuja amo God ta hondateari na ari tapa euja avo embo ta titina kiora usasa ta pambuja.”

*Eto iji tutumota John na Iesu harikena.*

<sup>22</sup> Eto amita ambota Iesu na ambotani ga enda Judea jo ta isa ue embomeni bapataito unu <sup>23</sup> John na da Aenon da Salim engiti umo isapamane ai ta embomeni bapataito ena <sup>24</sup> amo John tipura ta ikae kiti ta ena. <sup>25</sup> Eto John ta ambotani te Judea embo vahai te aingeto donda egari eto hamo te ingeni te egeora amita otohu ari ta ke avo kaseo irae enu, <sup>26</sup> pambuto John ta degi ke einge ea, “Ate Poekari Embo, embo vahai umo Jordan ovitihō ta umo te mitei harikete kogora amina embomeni bapataito oi embo isapamane amita degi ere pahora.” ainge eo <sup>27</sup> John na ke einge ena, “Embo ta uje na mane umbuto eora te God na Utu ta ikeoi umbuto eora. <sup>28</sup> Eto ungo ke matu ijione ingiova amo na Judea ta hondate ari embo Keriso manera te na amita embere katari embora. <sup>29</sup> Kakara amo singa amita jimbari be ra eto amita namei na jimbari embo ta ke ingito tunga javotoho euja ainge nombo na ke avo ingito tunga javotoho be ere ona. <sup>30</sup> Eto embo amina peni aisuja eto na isapa aisona

*Utu i ta eto puvurari Embo amo peni be ra*

<sup>31</sup> Eto embo Utu ta eto puvurari amo embo tapa nembari ra. Eto embo enda ta ingari amo enda ta ari eto enda ta ke avo euja. <sup>32</sup> Eto embo Utu ta eto puvurari amita ke te ari te do ingari eto do kiari avo hande euja te embo isapamane na mane ingiora. <sup>33</sup> Rate embo amuna amita ke ingiuja amo God ta ari avo ke be euja <sup>34</sup> Eto God na Embo amita ikari puvurari



amita degi Ahihi Otohu ikeoi jo eneteoi God ta ke be avo hande euja. <sup>35</sup> Eto God Mamo na amita Meni osa euja avoeto ari tapa Meni ta ingeni ta iketo touja. <sup>36</sup> Eto embo amuna Meni ke be aisuja amo vasiri daroho umbuto iresuja te embo amuna Meni ke be ae aisuja amo vasiri daroho mane umbasuja te God ta tumo avo amita hamo ta daroho iresuja.”

#### 4

#### *Iesu na enda Samaria pamone ga ke ena*

<sup>1</sup> Eto embo isapamane Iesu ambo ambo uo bapataito eo John ta ambotani nembena avo Pharisee embomeni na ingia <sup>2</sup> (Rate Iesu na bapataito ae rate ambotani na bapataito ea.) Eto Pharisee embomeni na Iesu ta ambotani isapamane ea amita duru avo ingia avo Iesu na kito <sup>3</sup> enda Judea toto enda Galilee ta pambuna. <sup>4</sup> Eto enda Galilee ta pambasi pambuto enda Samaria orohuta pambuto <sup>5</sup> da Sychar Jacob na meni Joseph ta enda ikena amita engiti <sup>6</sup> Jacob ta umo timbari hoto ai puvuna, eto iji 12 o'clock unu degi koso avoeto jangu indesi umo timbari hoto engitita arumbeto mitinu <sup>7-8</sup> amita ambotani indari umbasi da jo ta pahuo enda Samaria pamone vahai amo umo timbasi puvunu Iesu na kito pamone ta degi, “Na umo timbuto ike indone,” ainge enu, <sup>9</sup> Pamone amina ke mine einge ena, “Ke umo do ere. Judea embomeni na nango Samaria embomeni mane umoro eora te inena nane umo timbuto ikana ke ere?” ainge enu, <sup>10</sup> Iesu na ke einge ena, “Eto inena God ta hande te eto embo amuna no degi ta umo indesi penunu eria avo kiaetea amo inena daroho irari amo avo penunu eto umbaetea,” ainge enu, <sup>11</sup> Pamone amina ke mine einge ena, “Embo, no umo timbari ovu irae eto hoto emo tu be ta avoeto naingeto inena daroho umo timbuto nau ikao? <sup>12</sup> Nangota mama Jacob te amita meniundi te o te aingeto indito umo hoto emo nangota ikarira

te umo dagota mama Jacob nembari rete?” ainge enu <sup>13</sup> Iesu na ke einge ena, “Eto embo amuna umo erevi indesuja amo ehako umo ujeje aisuja, <sup>14</sup> rate umo nanena ikasona amo indou ambota ehako umo ujeje mane aisuja te amita jo ta kuru vivitie vasiri te daroho iresuja.” ainge enu <sup>15</sup> pamone amina, “Embo, umo erea avo ikao indono umo ujeje mane ai, eto na umo ujeje ururou ehako ei umo timbasi mane puvuresona.” ainge enu, <sup>16</sup> Iesu na, “Pambuto no ivu jage ejo puvuroi,” ainge enu <sup>17-18</sup> Pamone amina, “Ivu nau irae,” ainge enu Iesu na, “Ke be erea no ipone matu tapa 5 rate vahai eha umoga mitia amo ivu no manera avoeto ivu no irae ke erea amo ke be ra.” Ainge enu <sup>19</sup> Pamone amina, “Embo, nane umo ere kogona amo perovetara, <sup>20</sup> te dagota mamamane na tiri ei ta God jakeka ere ijiaetera te ungo na da Jerusalem ai ta God jakeka ara ke eova.” Ainge enu, <sup>21</sup> Iesu na ke einge ena, “Pamone, umo ke nau avo ke be ejo. Iji puvuto ere hua emo tiri ei eto da Jerusalem ai ta God Mamo avo mane jakeka aisora te amo eingera. <sup>22</sup> Ungo Samaria embomeni amo God kiae rate teho jakeka eova te nango Judea embomeni na God kogue jakeka eora eto God na Judea enda ta eto embo tapa orekasuja <sup>23</sup> Eto iji matu puvuto mitia emikote embomeni na jo te ahihi te ke be te na Mamo God jakeka aisora amo God na jakeka be aravo ingito osa aisuja. <sup>24</sup> Eto God amo Ahihi avoeto embo na ke be te ahihi te na jakeka ara uje ere ua.” Ainge enu, <sup>25</sup> Pamone amina ke einge ena, “Na kogona amo Keriso, ungotenau hondate ari embo amo puvuto ke tapa au ingesora,” ainge enu, <sup>26</sup> Iesu na, “Embo puvurosua ke erea embo amo umo te ke eria, embo amo namora,” ainge ena.

<sup>27</sup> Eto ke ainge ijinu Iesu ta ambotani na egerembeto puvuto Iesu pamone amiga ke ijie mitinu kito ti kakambukea te do uje eto pa

amiga ke ere ijina avo eto ingae toa. <sup>28</sup> Eto pamone amina amita umo timbari ovu tonu benu da ta tutuveto pambuto amita embomeni ta degi ke einge ena, <sup>29</sup> “Embo vahai puvuto mitia emina ari nau tapa do eona avo hariketei ingena avo Keriso rete pambuto kivu.” Ainge enu, <sup>30</sup> embomeni na da ta eto kesi pahuo, <sup>31</sup> ambotani na Iesu indoja uje eto ke einge ea, “Ate Poekari Embo, umo indari erevi umbuto inda,” ainge eo <sup>32</sup> Iesu na einge ena, “Indari nau degi ta mitia amo ungo kiaera,” ainge enu, <sup>33</sup> ambotani na ke ungo eonga mine ara eto einge ea, “Embo amuna indari iketere indei?” Ainge eo, <sup>34</sup> Iesu na ke einge ena, “Indari nau amo na ikari embo amita pure ana uje eto ikena avo ano irae aisuja. <sup>35</sup> Eto ungo ke eova amo ‘hariga 4 irae au donda be gasa aisuja avo kahumbeto be umbasora’ ainge eova te ungota degi erena, ungo pure poeto kivu, matu gasa eto giroro eto kahumbari inono etija. <sup>36</sup> Eto be umbari embo na amita mine matu uhue harau ta ikitie vasiri te daroho iresuja. Avoeto be urari embo te eto umbari embo te ainge eto tunga javotoho ere ora. <sup>37</sup> Eto timu hatirari ke erena amo ke be ra, embo nei be ureuja eto embo nei amo be kahumbēju, <sup>38</sup> Eto na ungo embo nei ta pure ta iketene be ere kahumbitova. Amo embo nei na pure ngahia ena te ungo na pure ta mine avo ere uhova.” <sup>39</sup> Eto enda Samaria da ai ta mitiaetera amina pamone amita ari tapa avo Iesu na harikenu pa amina ingina avo enu embomeni na ingito Iesu ke be <sup>40</sup> eto puvuto Iesu avo embomeni amiga iroja uje eto penunu eo iji heriso Iesu na da ai mitie ke ijinu <sup>41</sup> embomeni isapamane na Iesu ke be ea. <sup>42</sup> Eto embomeni na pamone amita degi ke einge ea, “Nango ke no ete ingera avo pere mane rate amita pe ta ke ei ingito amo enda ta orekari embo be ra ainge ijie ke be erera.”

*Eto Iesu na embo okose ta meni*

*enu kondena*

<sup>43</sup> Eto Iesu na iji heriso irae enu enda Galilee ta pambuna. <sup>44</sup> Eto Iesu na ke erevi matu ena, “Da vahai embo na God ta peroveta asuja amo da vahai embomeni amita na mane osa aisora.” ainge ena, <sup>45</sup> rate Galilee ta puvunu Jerusalem pondo ta ari neite neite enu avo embomeni na kito puvuto mitio Iesu puvunu kito pekea.

<sup>46</sup> Eto Iesu na da Cana enda Galilee ai ta umo enu ‘wine’ ena da ai ta ehako puvuto mitinu <sup>47</sup> koto umbari embo okose na amita meni avo da Capernaum ta mitie ambure sapura be umbuto amburari ahumpa be unu puvuto (Iesu da ta puvurari ke ingito puvuto) Iesu ta degi meni kondaja penunu enu <sup>48</sup> Iesu na ke einge ena, “Umo teho na ke be mane asoa te vasiri te ari neite neite avo kiti kesi uje ere oete?” ainge enu, <sup>49</sup> embo okose amina, “Embo, nau meni amburesi ere ua avoeto sausau ungote pambasira,” ainge enu, <sup>50</sup> Iesu na, “Umo oenga pambu, no meni matu eretija,” ainge enu, <sup>51</sup> embo amina Iesu ta ke avo tumota ue degi ta pahunu amita bande ta pure embo vahai na puvuto degi ta tambuto, “No meni matu eretija,” ainge enu <sup>52</sup> ingito ke einge ena, “Iji deina eretei.” ainge enu, “Iji matu amita ture 1 o’clock amina hamo bevere jamo etija,” ainge enu <sup>53</sup> embo amina Iesu na amita meni eraja ke ena amo iji 1 o’clock unu ke ena avo hotembeto embo amite eto amita bande vahai embomeni te aingeto Iesu ke be ea. <sup>54</sup> Eto Iesu na enda Judea ta eto pambuto Galilee eto orohuta hajire nei ena eto nei erevi ena.

## 5

*Iesu na Umo ireremba javo Bethzatha ai ta embo vahai enu kondena.*

<sup>1</sup> Eto amita ambota Judea ta pondo iji nei Iesu na da Jerusalem ta aumite pambuna. <sup>2</sup> Eto da Jerusalem ai ta o ‘sheep’ ta torari huga pe amita engiti ta embo ta umo ireremba amo Judea

ta ke na Bethzatha ke eora amo arara tapa 5 amina umo amo joekari <sup>3</sup> eto popora embo titi vahaikari eto utu ihirari eto ingeni meni amburari amina arara ai ta mitie umo simba ere uatera. <sup>4</sup> Avo God ta anera na beto umo enu vasiri unu popora embo vahai amina kiti umo ai ta sorueto beto kuteto kondena <sup>5</sup> Eto embo vahai ai sereketo mitina amita ambure umbuna amita jua tapa 38 <sup>6</sup> Avo Iesu na amita ambure iji koso miti-aetija avo kito, “Umo kondasi uje ere oete?” Ainge enu, embo amina ke mine einge ena, <sup>7</sup> “Embo, na umbuto umo ta ikari embo irae avoeto umo ta pahuore embo nei na na seniketo umo ta beuja,” ainge enu, <sup>8</sup> Iesu na einge ena, “Umo ereto no evari besi umbuto pambu.” ainge enu <sup>9</sup> embo amina kondeto amita evari besi umbuto pambuna. Rate jangu indari iji te ari erevi ena, <sup>10</sup> avoeto Judea embomeni na embo kondena amita degi ke einge ea, “Umo jangu indari iji te no evari besi umbuto ere pahoa amo ke pepeni ere poikitoa,” ainge eo, <sup>11</sup> embo amina ke mine einge ena, “Ke be rate na etei kondetena embo amina etei evari besi umbuto ere pahona,” ainge enu, <sup>12</sup> enana na, “Embo amuna etei umbuto ere pahoe?” ainge ijio, <sup>13</sup> Iesu na embo isapamane ta orohuta pahunu popora embo kondena amo kiae ena. <sup>14</sup> Eto ambota Iesu na popora embo kondena avo temple jo ta kito ke einge ena, “Umo kondetea te no ari sapura tapa avo tojo. Eto no ari sasapura tapa toae amo hajire ngahia be no degi ta puvuresuja,” ainge enu, <sup>15</sup> embo amina egerembeto pambuto Judea embomeni ta degi, “Na Iesu na etei kondetena,” ainge ena.

<sup>16</sup> Eto Iesu na jangu indari iji te ari neite neite ena avo eto Judea embomeni na Iesu ta degi pambuto ke ngahia eo, <sup>17</sup> Iesu na ke mine einge ena, “Nau Mama na iji tapa pure euja avoeto na ainge ereona.” ainge enu, <sup>18</sup> Judea embomeni na jangu indari iji te ke pepeni poekena avo pere mane rate Iesu na God amo

amita Mamo eto Mamo ga inono ke ena avoeto naingeto taro amburesuja avo degi jombure ea.

### *Iesu amo God ta Meni be ra*

<sup>19</sup> Eto Iesu na enana ta pehumba ta ke mine avo einge ena, “Na ungota degi ke be erena, Meni na eonga mane euja te Mamo na do euja avo Meni na kito euja avoeto Mamo na do euja amo Meni te tapa euja. <sup>20</sup> Eto Mamo na Meni osa ue amita ari tapa amo eoi kiuja. Eto au Meni na vasiri sovera te aisuja amo ari eha ere ona eingeke mane avo ungo na kito haha puha aisova. <sup>21</sup> Amita be amo embo ambuvujekari Mama na au vasiri te erasora ainge nombo Meni na amita uje na siriketo au vasiri te erasora <sup>22</sup> Eto Mamo na embo ta ari sasapura siriketo hajire mane ikeuja te embomeni na God Mamo amo Otohu ke eora ainge nombo God ta Meni Otohu ke ara God na eoi Meni na ari sasapura ta hajire siriketo ikeuja. <sup>23</sup> Rate embo amina Meni otohu ae eora ainge nombo Meni ikari Mamo avo otohu ae eora.

<sup>24</sup> Eto na ungota degi ke be erena. Embo amuna nau ke ingito na ikari embo avo ke be ijie tumota ere ua amo irari daroho matu umbuto یرهسuja amo amburari ta eto ereto amita ari sasapura ta hajire mane kesuja te tiumbetei vasiri te daroho mitia.

<sup>25</sup> Eto ungota degi ke be erena, iji puvija amo matu puvija amo embo ambuvujekari na God Meni ta ke avo ingito be ingesora amo vasiri te erasora <sup>26</sup> Amita be amo Mamo amo vasiri ta susu avoeto Meni amo etei vasiri ta susu ere ua. <sup>27</sup> Eto amo Embo ta Meni avoeto etei ari sirikari ta embo peni etija. <sup>28</sup> Eto ungo ke erevi ingihe jopapa mane aisova te embo amburari na Embo amita ke ingihe use toto ereto <sup>29</sup> Ari jajavotoho embomeni na vasiri te daroho یرهسora te ari sasapura embo avo hajire ikau kesora.

### *Iesu ta ari harika ari Embora*

<sup>30</sup> Rate na eonga ari inono aera te ari erevi naingeto sirikasona avo eoi ingito eona te nau uje na mane eona

te na ikari embo ta uje avo pere eona avoeto embo ta ari sirikasona amo ke be na pere aisona.

<sup>31</sup> Eto ari nau deire avo na eonga harikasona amo ke be mane ra. <sup>32</sup> Te ari nau harika ari Embo nei mitia amina harikasuja eto na kogona amo Embo amita harikari amo ke be ra. <sup>33</sup> Eto ungo na John ta ke ingora iketeve pambuto amita ke avo be pere ingihara. <sup>34</sup> Rate embo na na orekari ta ke avo ae rate ungo God na orekasuja amita ke avo erena. <sup>35</sup> Eto John amo ungota horivo ijimbeto usasa ikari embo avoeto ungo usasa iji isapa kito tunga javotoho eova <sup>36</sup> te ke nau amo peni John ta ke amo isapa ra. Nau Mama na nane pure ana ikena avo ururono embomeni na kesora avoeto na ikari Embo amo nau Mama avo embo na be kesora. <sup>37</sup> Eto nei amo nau Mama, na ikari Embo, amina na amunure avo ungota degi eoi mane ingiova eto amita ke avo ungo ingiova te amita hamo avo do aingere amo ungo kiaera. <sup>38</sup> Eto God na amita Meni iketei puvija avo ungo ke be ae avoeto amita ke avo ungota jo ta irari uje aera.

<sup>39</sup> Eto ungo God ta ke kajari avo iji tapa eteketo kogue vasiri daroho ai ta umbasi eova te God ta ke kajari amina na amunure avo harikeuja, <sup>40</sup> rate ungo vasiri daroho umbasi nau degi ta puvurae eova. <sup>41</sup> Na embo peni ke ijie ungo na na osa ana ke aera <sup>42</sup> Eto na ungota jo amo na kogona ungo God osa ae embopora. <sup>43</sup> Eto na nau Mama ta javota puvena te ungo na na pekaera eto embo nei na tohota javo ta puvuraetija amo ungo na pekaeteva.

<sup>44</sup> Eto God vahai amina ungo javotoho retemo sapura re avo ere kogua te amo ungo be hotembae ue embo nei na ungo jakeka ara uje isapamane eova avoeto ungo naingeto God ke be avo. <sup>45</sup> Ungo nane God Mamo ta tombu ta pehumba eona mane hotembasova te ungota embo vahai Moses avo ungo tumota eova embo amina ungo Mamo ta titi ta

pehumba aisuja. <sup>46</sup> Eto Moses na ke kajena amo namo avoembo kajena te ungo Moses tumota ue namo te tapa tumota aeteva <sup>47</sup> rate ungo Moses ta ke kajari avo ke be ae eova avoeto ke nau ungo naingeto ke be avo?" ke ainge Iesu na onde katena.

## 6

*Iesu na embo 5,000 unduna  
(Matthew 14:13-21, Mark 6:30-44,  
Luke 9:10-17)*

<sup>1</sup> Eto emita ambota Iesu na umo javo Galilee (amita javo nei Tiberias) avo embuto ovitihō ta pambuto mitie ari neite neite ue embo kokondekena <sup>2</sup> avo kesi embomeni isapamane na ambo ambo ue puvuo <sup>3</sup> Iesu na heti i ta amita ambotani ga bitito arumbena. <sup>4</sup> Eto Iesu na ari erevi ena amo Judea ta jarukari pondo ari iji puvuto auvitinu ena. <sup>5</sup> Eto Iesu na arerembeto embo isapamane puvutuhuo kito Philip ta degi ke einge ena, "Ungote indari nainge koro na ombuto umbuto embo isapamane emo unduroro?" ke ainge ena <sup>6</sup> amo Iesu na do aisuja amo matu kina te teho Philip ta degi au Philip na ke do au ingesi avo eto ingina <sup>7</sup> Eto Philip na ke mine einge ena, "Ungote koro peni vahai na bread umbaetera amo embo vahai vahai na pereto indoro inono mane aisuja." Ainge enu. <sup>8</sup> ambotani nei Simon Peter ta namei Andrew na einge ena, <sup>9</sup> "Meni isapa emina bread 5 umo o heriso, ainge umbuto puvuto mitia te inono manera," ainge enu <sup>10</sup> Iesu na einge ena, "Aravora te evu embomeni tapa arumbare." ainge enu embo tapa 5,000 te pamone te meni isasaraho te tapa enena ta arumbeo <sup>11</sup> Iesu na bread tapa 5 umbuto God ta degi peketo embo arumbea amita degi ikena. Eto umo o heriso amite tapa ikenu embomeni tapa indio inono enu <sup>12</sup> Amita ambotani ta degi einge ena, "Indari indera amita ihehe avo aija mane asova te tapa siriketo umbuvujo." ainge enu, <sup>13</sup> ihehe siriketo umbua bread amo



tapa 5 rate hambija tapa 12 amo ihehe na pevitina. <sup>14</sup> Eto Iesu na ari erevi enu embomeni na kito ke einge ea, “Peroveta enda ta puvuresuja ainge ijioire simba ere ovora amore erevira,” ainge ea. <sup>15</sup> Eto embomeni na Iesu ta degi ke vasiri na eto aro enana ta king aja ke asora avo Iesu na kito umo eonga beto tiri ta pambuna.

*Iesu na umo hamo ta isa ena.*  
(*Matthew 14:22-33, Mark 6:45-52*)

<sup>16</sup> Eto ture vovunu ambotani na da Capernaum umo ovitiho ai ta pambasi umo hora ta beto <sup>17</sup> e nga ta bitia eto Iesu tiri ta pambuna amo puvurae enu mume sihukitunu <sup>18</sup> e nga ta pahuo pisara peni vahai be puvuto umo piri unu <sup>19</sup> e nga tavitie 6 o 7 kilometre ainge pahuo Iesu na umo hamo ta haito puvutuhunu kito oju uo <sup>20</sup> Iesu na kito ke einge ena, “Namora, ungo oju avojo.” ainge enu <sup>21</sup> Iesu e nga ta bitoja uje ea te degi pambasi uje ea avo matu puvua

*Da Capernaum ta ke kasari bande ai ta Iesu ga ke mine ara ea.*

<sup>22</sup> Eto embomeni asa umo ovitiho ta toa amina iho bujenu e nga vahai be avo mitina ai ta ambotani na pere bitito pahuo Iesu avo e nga ta bitae <sup>23</sup> kito bread india degi amita engiti ta da javo Tiberias ai ta e nga nenei puvua avo Iesu te ambotani te puvete avo kesi pambua <sup>24</sup> rate kiae eto e nga nei ai bitito Iesu jombure asi da Capernaum ta pambua.

*Iesu amo Utu i ta indarira*

<sup>25</sup> Eto pambuto Iesu tambuto ke einge ea, “Ate poekari embo, umo nainge eto puve?” ainge eo <sup>26</sup> Iesu na ke mine einge ena, “Na ungota degi ke be erena, ungo God ta ari neite neite keva avo ae rate indari peni vahai be indeva avo eto na jombure ere ova. <sup>27</sup> Te indari amo sari aisuja avo eto ungo indari ta pure avojo, indari nei vasiri te daroho iriuja amita pure avo evujo. Eto indari avo Embo ta Meni na hande ikasi ere ua, Eto God Mamo na Embo ta

Meni javotoho ke eria,” ainge Iesu na enu <sup>28</sup> Embomeni na ke einge ea, “Eto God na dago pure do ara uje ere oi?” ainge eo <sup>29</sup> Iesu na ke mine einge ena, “God ta pure amo erevira: God na Embo iketei puvija avo ke be ijie tumota evujo,” ainge enu, <sup>30-31</sup> mine einge ea, “God ta ke matu kajari ai ta ke einge mitia. ‘Amina bread Utu i ta ikenu embomeni na india,’ ke ainge kajari mitia amo dagota mamamane na oجاتambu ta mitie Utu i ta bread avo india te inena pure do ao no hajire avo kito ke be aro?” ainge eo, <sup>32</sup> Iesu na ke einge ena, “Na ungota degi ke be erena, Utu i ta bread avo Moses na ikae rate nau Mama na Utu i ta bread be avo ikeuja <sup>33</sup> Eto God ta bread be avo Utu ta eto beto embo tapa ta degi vasiri ikeuja,” ainge enu <sup>34</sup> “Embo, bread avo dagota degi matuainge ikejo indore,” ainge eo, <sup>35</sup> Iesu na ke einge ena, “Vasiri te irari bread amo namora. Eto embo amuna nau degi ta huresuja amo beuja mane kesuja. Eto na tumota aisuja embo na mane umo ujeje kesuja <sup>36</sup> Eto na ungota degi matu ijiena te ungonana titi na ere kogova te na tumota ae ere ova. <sup>37</sup> Te God na embo nau degi ta ikasuja amo nau degi ta hururoro na mane toasona te umbasona <sup>38</sup> Eto na Utu ta eto puvena amo uje nau avo aisi puvuraera te na iketei puvena Embo amita uje avo pere aisona. <sup>39</sup> Eto embo na iketei puvena amita uje amo embo tapa nau iketija amo nei vahai mane beto pambasuja te iji kombu te ano tapa erasora. <sup>40</sup> Erena amo nau Mama ta uje amo embo amuna God ta Meni kito tumota eto vasiri daroho umbasuja amo iji kombu te ano vasiri te erasuja,” ke ainge Iesu na ijinu <sup>41</sup> Judea embomeni na ‘Na bread Utu ta beari ra’ ke ainge Iesu na ena avo ingito isoro ke ungo eonga ijie <sup>42</sup> einge ea, “Embo emita Mamo Joseph ra eto amita e mamo amo ungotena kiarira te doeto Utu ta eto beari ke erei?” ainge eo <sup>43</sup> Iesu na ingito, “Ungo isoro ke ungo eonga ereva avo tovu.

<sup>44</sup> Eto embo na eonga nau degi ta mane huresuja te God na jigito gorukau huresuja embo amo na iji kombu te ano erasuja. <sup>45</sup> Eto peroveta na ke einge kajea, 'Embo tapa avo God na ate poekasuja' ke ainge kajari mitia avoeto embo amuna God ta ke ingito kiari uhue nau degi ta puvuja. <sup>46</sup> Rate embo na God ta tombu kiaera te Embo God ta degi eto puvurari amina God kiarira <sup>47</sup> te na ke be erena embo amuna ke be ijie tumota aisuja amo vasiri daroho umbasuja. <sup>48</sup> Eto na vasiri daroho ta bread ra, <sup>49</sup> te ungota mamamane na ojabatambu ta mitie bread Utu ta eto beari avo india te irae ambuvujekea <sup>50</sup> te bread Utu ta eto beari erena emo indito mane amburesora, <sup>51</sup> te bread vasiri te Utu ta eto puvija ke erena amo namora eto embo amuna indesuja amo vasiri te daroho iresuja. Eto bread ikasona amo nau bisi avo enda ta embomeni vasiri te irora ikasona," ke ainge Iesu na enu, <sup>52</sup> Judea embomeni na tumo ue ke ungo eonga eto einge ea, "Do eto embo emita bisi ikau ungotenane indoro?" ainge eo, <sup>53</sup> Iesu na ke mine einge ena, "Eto ungo ta degi ke be erena. Embo ta Meni ta bisi te sasaga te indae aisova amo ungota degi vasiri mane iresuja, <sup>54</sup> te embo amuna nau bisi te sasaga te indesuja amo embo amita degi vasiri te daroho iresuja avoeto iji kombu ta jigono erasuja. <sup>55</sup> Amo nau bisi te nau sasaga te amo indari be avoeto, <sup>56</sup> embo amuna nau bisi te sasaga te indesuja amo na embo amita jo ta iresona eto embo amo jo nau ta iresuja <sup>57</sup> Ke amo erevira, nau Mama vasiri te na na iketei puvuto amita degi vasiri ere uhona ainge nombo embo amuna na indito nau degi ta vasiri umbasuja. <sup>58</sup> Eto bread Utu ta eto beari erena amo ungotenau mamamane na indito ambuvujekea ainge mane rate bread erevi indesuja amo vasiri te daroho iresuja." <sup>59</sup> Ke ainge da Capernaum kasari bande ta enu

*Daroho irari ta ke amo Iesu ta degi*

*mitia*

<sup>60</sup> Ingito amita ambotani nei uhoho na einge ea, "Ke emo sapura be avo ere ingihera avoeto embo na naingeto ke erevi ambo ambo aro?" ainge <sup>61</sup> tumo te tapa ea avo Iesu na kito ke einge ena, "Eto ungo ke erena avo ingito tini kambari ere ovete? <sup>62</sup> Embo ta Meni na beari degi ta bivitirou ungo kito do hotembavo? <sup>63</sup> Eto bisi na nei do mane ikeuja te Ahihi na vasiri ikeuja avoeto na ke erena amo ahihi te vasiri te amita ke avo erena. <sup>64</sup> Rate ungo nei uhoho na ke be ae eova." Ainge Iesu na ena amita be amo Iesu ke be ae embopo eto embo nei Iesu ta jenge indesuja embo amo Iesu na matu itikari ta kina. <sup>65</sup> Eto ke nei einge ena. "Avoeto ungota degi ke matu ijiena amo embo na mane nau degi ta huresuja te God na au huresuja ainge ijiena." <sup>66</sup> Eto ke ainge ena amikote ambotani nei uhoho na Iesu ambo ambo ae toto ungota uje ta pambua. <sup>67</sup> Eto Iesu na ambotani 12 ta degi ke einge eto ingina, "Eto ungoteta tapa pambasi uje ere ovete?" ainge enu <sup>68</sup> Simon Peter na einge ena, "Bada dago umo toto amuta degi pambaro? Vasiri daroho irari ta ke avo inena hande oe <sup>69</sup> ke be erera eto umo God ta Embo Otohu be avo dago ere kogora," ainge enu <sup>70</sup> Iesu na ke einge ena, "Nanena ungo 12 avo siriketo uhana te ungo vahai avo Satan ta tohora." Ainge ena <sup>71</sup> amo embo Simon Iscariot ta meni Judas amo ambotani 12 ra te Judas amina isoro embo ta harikasuja avo eto ena.

## 7

*Iesu na da Jerusalem pondo ta pambuto embo ate poekena*

<sup>1</sup> Eto iji amita ambota enda Judea embomeni na Iesu taro amburoja ke eo Iesu na kito enda Galilee ta isa ena. <sup>2</sup> Eto Judea ta pondo javo Horoma Pondo auvitinu <sup>3</sup> Iesu ta ambo jimbi na Iesu ta degi ke einge ea, "Inena degi erevi toto Judea enda ta pambuto no ari neite neite avo

ao no ambotani na kiorote? <sup>4</sup> Eto embo amuna nombo aisi uje aisuja amo mane ondikari na aetija avoeto embo tapa ta titi ta ari no avo ao sigeto peni vahai ururou titi na koguroro embo peni aisoa,” ainge ea <sup>5</sup> amo Iesu ta ambo jimbi na Iesu tumota ae avoeto ke emo eo, <sup>6</sup> Iesu na ke mine einge ena, “Iji nau amo puvuraera te ungota iji amo inono be ra. <sup>7</sup> Eto enda embomeni na ungota degi tumo ae rate nanena enana ta ari sasapura harikeona avoeto nau degi ta tumo eora. <sup>8</sup> Avoeto ungo pondo ta pambuvujo, eto nau iji puvurae avoeto na eha pondo ta mane pambasona.” ainge enu

### *Iesu na pondo ta pambuna*

<sup>9-10</sup> Namei kamei pahuo enda Galilee ta mitimite embo na kiora ondiketo titiha ta kiae pondo ta pambuna. <sup>11</sup> Eto pondo ue Judea embomeni na Iesu puveite puvuraere avo kesi jombure ea. <sup>12</sup> Eto embomeni na eonga eonga toruketo embo nei na kumumu ke na, “embo amo javotohora,” ke ijio embo nei na, “embo amina embo sio umbei ere pahora” ainge ea <sup>13</sup> amo Judea ta embo okokose oju ue ke araha ta ae ondikari na ea.

<sup>14</sup> Eto Iesu na pondo orohuta puvuto temple jo ta toreto embomeni onde katitinu <sup>15</sup> Judea embomeni na kito haha puha ijie ke einge ea, “Embo emo school kiae rate naingeto book ere etekitei,” ainge eo <sup>16</sup> Iesu na kito ke mine einge ena, “Ate Poekari nau emo na ikenu puvua Embo amita ate poekari ra te nau hotembari na aera, <sup>17</sup> te embo amuna God ta uje avo aisuja embo amina ate poekari nau amo God ta degi eto puvurari rete nau degi ta eto puvurari re avo be kesuja. <sup>18</sup> Eto embo amuna amita hotembari na embomeni ate poekasuja amo embomeni na kito embo peni ke ijie jakeka ara aisuja rate embo amuna ikari embo avo embomeni na jakeka ara ke hande aisuja amo ke sokova na mane hande aisuja te ke be na

pere aisuja. <sup>19</sup> Eto Moses na ke pepeni ikenute ikae re? Eto ikena te ungo tapa na poekeova te do eto na tavo amburona uje ere ove?” ainge enu <sup>20</sup> embomeni na, “Umo ahihi sapura na jo ta torari ra. Embo amuna umo taisi erere?” ainge eo <sup>21</sup> Iesu na ke einge ena, “Na ari vahai jangu indari iji te etena avo ungoni kito ke isapamane ereva te erevi hotembuvujo <sup>22</sup> Eto Moses na ando kakamba ava ena (ari amo amina itikae rate ungota ohihi mamatu na itikari ra) Eto ari amo ungo na jangu indari iji te eova. <sup>23</sup> Eto na ke erena amo ungoni Moses ta ke pepeni agi ue jangu indari iji te embo ta ando kakamba eova ainge nombo na jangu indari iji te embo ta ando javotoho uena avoeto ungo do eto nau degi ta tumo ere ove? <sup>24</sup> Eto ungo embo ta ari javotoho rete sapura re avo titi na kogue pe petiki emina ke re eova te jo na aera,” ainge Iesu na ena.

### *Embo emo Keriso be rete avo ke kasea*

<sup>25</sup> Eto iji amikote da Jerusalem embomeni na ke mine ara eto einge ea. “Eto embo tasi uje ere ora emo erevi rete o erevi manere? <sup>26</sup> Eto embo emina ke eria te taekae eto nei do ae rate embo okokose na embo erevi Keriso be ere hotembiterete? <sup>27</sup> Eto embo emita puvurari degi amo ungotena kiarira te Keriso be simba ere ovora avo puvuraetija amo ungotena amita puvurari degi avo mane kiaetera.” Ke ainge embomeni na ea.

<sup>28</sup> Eto Iesu na temple jo ta embomeni ta degi ate poekitie ke vasiri na eto einge ena, “Eto ungo na kiarira eto na naingeto puvena amo ungo kiarira eto na uje nau eonga na puvurae rate Embo vahai na iketei puvena amo ke be rate Embo amo ungo kiaera te <sup>29</sup> Embo amina na iketei puvena avoeto Embo amo na kiarira,” ainge enu, <sup>30</sup> embomeni na ingito andito umbasi ea te amita iji puvurae avoeto God na taekenu toa. <sup>31</sup> Te embomeni nei uhoho ai ta mitia amina Iesu ke be ijie ke einge ea,

“Eto Keriso na puvuto ari neite neite aisuja ke eora amo Keriso erevira.” Ainge ijio

### *Temple ta police na Iesu umbasi pambua*

<sup>32</sup> Ke peni vahai be enu Pharisee embomeni na ingito temple ta police na Iesu umbuto tipura ta ikara eo pambua.

<sup>33</sup> Eto Iesu na ke einge ena, “Na ungote iji isapa mitima na ikena Embo ta degi ehako egerembeto pambasona <sup>34</sup> Eto ungo na jombure eto tambae asova amo na pambasona degi amo ungo mane pambasova.” Ainge enu, <sup>35</sup> Judea embomeni na ingito ke mine ara ijie einge ea, “Embo emina pambuto mitirou mane tambara ke eria degi mo davorami erei? Eto Judea embomeni Greek enda nei nei ta pambuto iriora ai pambuto ate poekasi ereite? <sup>36</sup> Eto ‘na pambasona amo ungo na jombure eto mane tambasova eto na pambasona degi amo ungo mane pambasova’ ainge eria amita ke be mo deirami erei?” ainge ea.

### *Eto Iesu na daroho umo ikasi ke ena.*

<sup>37</sup> Eto pondo iji tutumota pondo iji peni puvunu Iesu na ereto heteto ke vasiri na eto einge ena, “Eto embo amuna umo ujeje ururou kito evujo nau degi ta huroi. <sup>38</sup> Eto embo amuna na tumota ere oi avo evujo hurou umo ikano indoi. Eto God ta ke kajari ta einge mitia. ‘Amita jo ta umo kuru na bitarako eto vasiri te daroho iresuja.’” ke ainge ena <sup>39</sup> amita ke be amo Iesu na pambuto Mamo ta usasa ta toreto Ahihi Otohu ikau puvuto Iesu ke be ea embomeni amita jo ta torasuja amita ke avo ena.

### *Eto Embomeni na Keriso amunure avo ke taimbea*

<sup>40</sup> Eto embomeni nei uhoho na ke avo ingito einge ea, “Eto embo emo peroveta simba ere ovora vahai avora.” ainge ijio <sup>41</sup> embo nei na, “Embo emo Kerisora.” ainge ijio embo nei na, “Keriso simba ere ovora amo Galilee embo na mane

aisuja <sup>42</sup> te David ta ahije vahai David ta da Bethlehem embo na Keriso aisuja ainge God ta ke kajari ta mitia” ainge ea <sup>43</sup> amo embomeni tapa amita hotembari vahai na ae rate hotembari tunga eonga eonga na ea <sup>44</sup> Eto embo nei uhoho na Iesu umbuto tipura ta ikasi uje ea te enana ta ingeni amo Iesu ta hamo ta ingeni jujurukae.

### *Judea ta embo okokose na Iesu ke be ae ea*

<sup>45</sup> Eto temple ta police na egerembeto priests pepeni te Pharisee embopo ta degi pambua ke einge eto ingia, “Ungo do eto Iesu umbuto puvurae eteve?” ainge eo <sup>46</sup> Police na ke mine einge ea, “Eto embo amina ke ainge ae ingae pekota ke javotoho eria.” ainge eo, <sup>47</sup> Pharisee embo na ingito ke einge ea, “Eto ungote tapa embo amita ke ingihe ere pahove? <sup>48</sup> Eto ungo kogova amo kiari embo pepeni te Pharisee embo te na embo avo ke be aera. <sup>49</sup> Eto tumo sosou embopo amina embo amita ke ingihe mitera amina Moses ta ke pepeni avo kiae ue ere pahora amo God na hana kiari ikasuja.” ainge eo, <sup>50</sup> embo vahai Nicodemus Iesu ta degi kiti pambuna amina ke einge ena. <sup>51</sup> “Eto embo ta sapura deire avo ganoka eto ingae teho umbasora amo ungotenau ke pepeni Moses na kajena amo ainge rete?” ainge enu, <sup>52</sup> Pharisee embomeni na ke mine einge ea, “Umo te tapa Galilee embo rete? Umo eonga eteketo ki. God ta peroveta tapa amo da Galilee ta eto mane puvuora,” ke ainge <sup>53</sup> eto embomeni sisiketo pambua.

## 8

### *Viro pamone jigito puvua*

<sup>1</sup> Eto Iesu na tiri javo Olives ta pambuto evunu <sup>2</sup> iho bujenu egerembeto temple ta pambunu embomeni amita degi puvuo arumbeto ate poekitinu <sup>3</sup> Enana ke pepeni kiari embopo te Pharisee embomeni te aingeto pamone vahai avo tiha unu kito umbuto embo tapa ta titi ta



embo tapa kiora ikeo hetenu <sup>4</sup> Iesu ta degi ke einge ea, “Ate Poekari Embo, pamone erevi tiha oi kito taeketera <sup>5</sup> eto Moses ta ke pepeni ta amo atara na tiha pamone taro amburoja ena te hotembari no avo ejo ingore.” Ainge ea <sup>6</sup> amita be amo Iesu ta degi popoja ke asi umbuto puvua. Rate Iesu na aruse eto beto ingeni na enda ta ahari ue mitinu <sup>7</sup> Embomeni na eto ingari ke kaiketo ijio Iesu na hange ambu eto ke einge ena, “Ungo embo puveva amo embo vahai amuna ari sapura irae embo amina karu umbuto kiti taisuja.” <sup>8</sup> Ke ainge eto titi tu ta eto enda ta ahari unu. <sup>9</sup> Embomeni na ingito sisiketo embo kerembo amina eonga pahunu eto embo nei nei amo vahai pamba uo pamone eonga Iesu ga heteto mitinu <sup>10</sup> Iesu na hange ambu eto pamone amita degi ke einge ena, “Pamone, embo naingere, eto embo vahai amuna umo pehumba aerete? <sup>11</sup> Aravora, te nane umo mane pehumba asona te umo pambuto no ari sapura toto irari javotoho na irijo,” ainge Iesu na ena.

#### *Iesu amo enda ta usasa ra*

<sup>12</sup> Eto Iesu na embomeni ta degi itiketo ke einge ena, “Na enda ta usasara. Eto embo amuna na ambo ambo aisuja embo amo mume ta isa mane aisuja te vasiri daroho ta usasa amo amita degi iresuja.” ainge enu <sup>13</sup> Pharisee embomeni na ingito ke mine einge ea, “No harika ari embo irae umo eonga erea amo ke be mane asora.” Ainge eo <sup>14</sup> Iesu na ke einge ena, “Ari nau avo na oenga harikitiona amo ke be ra. Na puvurari degi eto na pambari degi amo na kiarira te na puvurari degi eto pambari degi amo ungo kiaera. <sup>15</sup> Eto ari javotoho davore sapura davore amo ungota enda ta ari avo ungo embo na eova nanena embo kogue embo emo sapurara eto embo emo javotohora ainge mane eona <sup>16</sup> te ke aisona amo ke be na pere aisona amita be amo na ikari embo amo

namote mitia amina ijioi eona. <sup>17</sup> Eto ungota ke pepeni ta kajari mitia amo eto embo heriso na jo vahai eto ke vahai aisora amo ke be ra. <sup>18</sup> Avoeto ke nau erena amo na ikari Embo Mama nau amiga ke emo erena avoeto dago heriso na ke emo harikitoro.” Iesu na ainge enu, <sup>19</sup> Pharisee embomeni na, “Mamo no davore?” ainge ena, “Ungona na kiae ere ova ainge Mama nau ungo kiae ere ova te ungonana na kiaeteva ainge Mama nau amo ungo kiaeteva.” Ke ainge ena amo <sup>20</sup> temple jo ta God ta hande ikari degi ai ta ke emo ena. Amo Iesu ta iji puvurae avoeto andito umbae toa.

#### *Judea embomeni na Iesu ke be ae ea embopo amita degi Iesu na ke ena.*

<sup>21</sup> Eto Iesu na ke nei einge ena, “Eto na pambasona amo ungonana na jombure ue ungota ari sasapura avoeto ungo amburesova. Eto na pambasona ai ta ungo pambari inono ae aisova.” Ainge enu <sup>22</sup> Judea embomeni na ke mine ara eto einge ea, “Na pambasona ai ta ungo mane pambasova ainge eria amo umo eonga teto amburesi ereite?” Ainge eo, <sup>23</sup> Iesu na einge ena, “Ungo enda embopora eto na Utu embo ra. Eto ungo enda erevi tohora te na enda emita toho manera. <sup>24</sup> Eto na ungota degi ke matu etene ingeva amo ungota ari sasapura avoeto amburesova. Eto kivu, na amunure avo ke erena amo ungo ingito ke be ae ere ova amo ungota ari sasapura avoeto amburesova,” ainge Iesu na enu, <sup>25</sup> “Umo amunure?” ke ainge eo Iesu na “ke matu kiti ungota degi ijiena amo namora. <sup>26</sup> Eto na ungo embo ke isapamane aetena eto ungota ari sasapura isapamane harikaetena te na ikari Embo amita ke amo ke be perera avoeto amita ke avo nau degi ta enu ingia avo enda embo ta degi hande ere ona.” Ainge ena amo <sup>27</sup> Iesu na amita Mamo God avo ke ena te embomeni na ingae uo, <sup>28</sup> Iesu na ke einge ena, “Eto kiari amo nau mane rate nau Mama ta kiari nau

degi ta ikena avo ungota degi hande eona avo eto Embo ta Meni i ta tavo mitirou ungonana na amunure ke eona avo kito ke be aisova. <sup>29</sup> Eto na iji tapa na ikari Embo ta uje tapa avo eona avoeto na egikae namote tapa mitia.” Ke ainge <sup>30</sup> ijinu embo isapamane na Iesu ta ke avo ingito ke be ea.

### *Judea embomeni ta Ohihi Abraham*

<sup>31</sup> Eto Judea embomeni Iesu ke be ea amita degi Iesu na ke einge ena, “Eto ungo ke nau avo be jigesova amo ambotani nau be ururovo <sup>32</sup> Nau ke be avo ano ingihirovo ke be amina ungo ari sasapura na andirari avo vujekasuja” Ainge enu <sup>33</sup> ingito ke mine einge ea, “Dago ta Ohihi Abraham ta degi eto puvurari eto embo nei na dago pundurae mitovora erevira te umo do eto dago vujekasi ke ere?” ainge eo, <sup>34</sup> Iesu na ke einge ena, “Na ungota degi ke be erena, Embo amuna ari sapura aisuja amo ari sapura na pundurari avoeto ari sapura ta pure ari embora. <sup>35</sup> Eto pure ari embo na bande ta daroho mane iresuja te meni be amina bande ta iresuja. <sup>36</sup> Eto ungo ari sasapura na pundurari avoeto God ta Meni na ungo bujekaetija amo ungo na jeneambueto daroho iraeteva. <sup>37</sup> Eto ungo Abraham ta meniundi amo na kiari rate ungota ohihi Abraham hotembae ue ke tapa do erena avo ungota jo ta torae avoeto na taisi ere ova. <sup>38</sup> Rate namo avo nau Mama ta degi do kiona avo ke hande ere ona te ungo avo kogue ambo ambo ere ova.” ainge Iesu na enu, <sup>39</sup> Embomeni na, “Dago ta Mama Abraham ra.” ainge eo, Iesu na, “Ungo Abraham ta meniundi kito amo Abraham na ena ainge nombo aeteva. <sup>40</sup> Amo na God ta ke be avo ingihe ungota degi erena te ungonana taisi ere ova te Abraham na ari ainge amo ae ra. <sup>41</sup> Rate ungo eova amo ungota mama na euja vahai avo eova.” ainge Iesu na enu embomeni na ingito ke mine einge ea, “Dago

suhita ari na ingae rate dagota mama amo God eto dago amita meniundi ra.” ainge eo. <sup>42</sup> Iesu na ke einge ena, “Eto God amo ungota Mamo kito amo na osa aeteva amo na God ta degi puvuto mitena amo uje nau na puvurae rate na amina ikenu puvua, <sup>43</sup> te ke erena emo ungo ingito mana mana ue ingari inono ae avoeto ere ova. <sup>44</sup> Te ungota mamo amo Satan avoeto amita pure avo asi uje ere ova amo iji kiti ta amo embo tari embo eto embo amita ke be irae ke sokova avo pere iriuja. Avoto embo amo ke sokova ta mamora eto embo amo ke ijie amo amita jo ta hotembari ke sokova avo puvuja. <sup>45</sup> Rate nanena ke be eona avoeto ungonana na ke be ae eova. <sup>46</sup> Te ungo embo vahai na nau ari sapura vahai do eone kiove avo harikevu ingone. Eto na iji tapa ke be pere eona te ungo do eto na ke be ae eove? <sup>47</sup> Eto God ta Meni na God ta ke ingiuja te ungo God ta ke ingae eova amo ungo God ta meniundi mane avoeto.” Ainge Iesu na enu,

### *Iesu te Abraham te amita ke*

<sup>48</sup> Judea embomeni na ke mine einge ea, “Dago kogora amo umo enda Samaria embo ahihi sapura na jo ta torari avoeto erea.” ainge eo <sup>49</sup> Iesu na ke einge ena, “Na Ahihi sapura na torae rate na nau Mama Otohu eona te ungonana na otohu ae ere ova. <sup>50</sup> Amo nanena ae rate embo ta ari siriketo hajire ikari Embo amina javo nau otohu ara uje ere ua avoeto hajire amina ikasuja. <sup>51</sup> Eto ungota degi ke be erena, embo amuna ke nau ingito agi aisuja embo amuna mane amburesuja.” ainge enu, <sup>52</sup> Judea embomeni na ingito ke einge ea, “Eto umo ahihi sapura na torari ke erera amo ke be perera. <sup>53</sup> Eto Abraham ambuna eto peroveta tapa ambuvujekea te inena ‘embo amuna ke nau agi aisuja amo mane amburesuja’, ke ainge erea amo nangota mama Abraham te peroveta tapa ambuvujekea amo inena nembari rete? Eto umo

embo amunurami ke ere?” ainge eo <sup>54</sup> Iesu na ke mine einge ena, “Eto na oenga peni asi aetena amo ke be mane aetija te Mama nau ungo na ‘dagota God ra’ ainge eova amina au embo peni aisona. <sup>55</sup> Te, ungo amo God kiae ere ova te nanena God kiona. Eto nanena God kiae ke aetena amo ungo ainge ke sokova embo aetena te na God kogue ke amita tapa avo ingihe agi eona. <sup>56</sup> Eto ungota mamō Abraham na na puvuresona avo hotembu hotembu ue tunga javotoho ena.” ainge Iesu na enu, <sup>57</sup> Judea embomeni na ke einge ea, “Eto no umbari jua amo 50 mane rate Abraham inena kiari ke erea,” ainge eo <sup>58</sup> Iesu na, “Na ungota degi ke be erena, eto Abraham e na ingae pekota amo nanena mitiaetena,” ainge ena. <sup>59</sup> Eto Judea embomeni na ingito Iesu tasi atara siriketo uhuo Iesu na kito kiae ondikari na temple toto pambuna.

## 9

### *Embo e na titi tahimbari ingena avo Iesu na enu kondena*

<sup>1</sup> Eto Iesu isa pahue embo e na titi tahimbari ingena avo kogunu <sup>2</sup> Amita ambotani na ke einge ea, “Ate Poekari Embo, embo emo e ta mamō ta ari sapura na enutemo amita ari sapura na e ta oti ta eto titi tahimbenu avo dago be kesi uje ere ora.” ainge eo, <sup>3</sup> Iesu na einge ena, “Amo e ta mamō ta ari sapura mane eto amita sapura mane rate God ta sovera avo embo tapa na kiora enu e ta oti ta eto titi tahimbena. <sup>4</sup> Eto iji beae mitirou na ikari Embo ta pure aisona te mume sihukari ahumpa ere ua emo embo na pure ari inono aera. <sup>5</sup> Eto na enda ta iriona amo na enda ta usasa avo eona eto aisona.” ainge eto, <sup>6</sup> enda ta isuva eto tavenu pegara enu umbuto titi tahimbari embo emita titi ta kuteto, <sup>7</sup> ke einge ena, “Umo pambuto umō ireremba javo Siloam (Javo amita be amo ‘ikari pambari’) ai ta no titi egejo.” ainge

enu titi tahimbari embo amo pambuto umō ai ta titi egenu javotoho enu pambuna.

<sup>8</sup> Eto amita da vahai embomeni te eto embo nenei te aingeto koro penunu ijioi ere koguaetera amina embo avo kito ke einge ea, “Eto embo arumbeto mitie koro penunu euja embo amo erevirete?” ainge ijio, <sup>9</sup> embo nei na, “En, embo aravora,” ainge ijio embo nei na, “Embo nei, rate tombu hajire vahaira,” ainge ijio, embo kondena amina, “Na embo aravora,” ainge enu, <sup>10</sup> embomeni na, “Aravorate no titi naingeto javotoho etei?” ainge eo, <sup>11</sup> embo amina, “Embo javo Iesu na enda ta isuva eto tavetei pegara etei umbuto titi ta kuteto ke einge etija, ‘Umo pambuto umō Siloam ta kute’ ainge etei pambuto umō kutetene titi javotoho etija.” ainge enu, <sup>12</sup> “Embo amo naingere,” ainge eo. “Embo amo na kiaera,” ainge enu,

### *Titi tahimbari embo naingeto kondena avo Pharisee embopo na jombure ea*

<sup>13</sup> Embomeni na titi tahimbari embo kondena avo umbuto Pharisee embomeni ta degi pambuo <sup>14-15</sup> Pharisee embomeni na embo amita titi naingeto javotoho enu ere koguna avo eto ingio titi tahimbari embo kondena amina ke einge ena, “Embo Iesu na pegara umbuto nau titi ta iketei kutetene javotoho etei ere kogona,” ainge enu Iesu na jangu indari iji te pegara umbuto embo ta titi ta kutenu javotoho ena, <sup>16</sup> avoeto Pharisee embomeni nei uhoho na ke einge ea, “Embo emo jangu indari iji ta ke pepeni ambo ambo ae ere ua embo emo God ta degi puvuraera,” ainge eo Pharisee embo nei nei amina, “Embo ari sasapura embo na ari javotoho einge amo mane aetija,” ainge ijio, <sup>17</sup> Pharisee embo nei uhoho na ereto isoro ke eto kuru embo kondena amita degi ke ehako einge eto ingia, “Aravorate embo amina no titi etei javotoho etija te no hotembari avo deire ejo ingore.”

Ainge eo embo amina, “Embo amo Peroveta ra,” ainge ena. <sup>18</sup> Eto Judea embomeni na embo titi tahimbari javotoho ena avo ke be ae ue ke be eto ingesi amita e te mamote avo eo puvuo. <sup>19</sup> Ke einge ea, “Embo emono no meni rete avo oti ta eto titi vahaikari puvunute avo naingeto titi javotoho etei ere kogoi?” ainge eo, <sup>20</sup> amita e te mamote na ke mine einge ea, “Ke be, amo dagota meni oti ta eto titi tahimbari puvuna te <sup>21</sup> embo amuna etei titi javotoho etei ere kogua amo dago kiaerate dago ta meni amo embo peni ra amita degi eto ingavu,” ke ainge ea. <sup>22</sup> amita be amo Judea embomeni na embo amina Iesu amo Keriso be ra ainge aisuja amo kateketo eonga iresora ke ainge matu ari ingari avo hotembeto oju eto <sup>23</sup> ungo eonga meni ta degi eto ingora ke ea. <sup>24</sup> Avoeto Judea embomeni na embo avo eo puvunu ke einge ea, “God vahai avo jakeka ejo, eto dago na Iesu avo sapura embo ke eora.” ainge eo, <sup>25</sup> embo amina ke mine einge ena, “Embo amo sapura embo rete avo na kiaera te nau titi samuna ari avo etei ere kogona,” ainge enu. <sup>26</sup> Judea embomeni na ke einge ea, “Eto embo amina no degi ta do etei eto no titi javotoho etei?” ainge eo, <sup>27</sup> Ke mine einge ena, “Na ke matu etena amo ungo ingae eto ehako ano ingito amita ambotani aisi uje ere ovete?” ainge enu, <sup>28</sup> Judea embomeni na tumo eto embo avo ke einge ijie isembea, “Eto umo avo amita ambotani ejo. Dago avo Moses ta ambotani ra. <sup>29</sup> Eto God na Moses ta degi ke ena avo dago kiari rate embo avo naingeto puvuna avo dago kiaera.” Ainge eo, <sup>30</sup> embo amina ke mine einge ena, “Eto ke ungo na ereva amo na manamana ere ona te embo amina nau titi hiriketija avo unгона naingeto puvurari ke ereva, <sup>31</sup> te ungotena ere kogora amo God na sapura embo ta ke amo mane ingiuja te embo javotoho God ta pure ari embo amita ke avo ingiuja. <sup>32</sup> Eto iji matu ta eto puvuto eha

emite amo embo na e na ingari iji te titi tahimbari amo embo nei na ae javotoho aera. <sup>33</sup> Eto embo erevi God ta degi puvurae amo ari emo mane aetija,” ainge enu, <sup>34</sup> enana tumo ue ke einge ea, “Umo ari sapura ue ingari amina dago ate poekasi erete?” ainge ijie kurumbeo ke kasari bande toto pambuna.

### *Pharisee embopo na ke kiae ea*

<sup>35</sup> Avo Iesu na ingito jombure pambuto embo avo tambuto ke einge ena, “Umo Embo ta Meni avo ke be ijie ere oete?” ainge enu. <sup>36</sup> Embo amina ke mine einge ena. “Embo, Embo ta Meni mo amunure avo ejo na kito ke be ane.” ainge enu, <sup>37</sup> Iesu na ke mine einge ena, “Inena embo avo kogoe embo amina umote ke eria, embo re aravora,” ainge enu, <sup>38</sup> embo amina, “Bada, na umo ke be erena,” ainge eto Iesu jakeka ena.

<sup>39</sup> Eto Iesu na ke einge ena, “Na embo ta ari sirikitie embo titi tahimbari embomeni avo ano titi javotoho ururou eto embo nenei titi na kito kiaesira eora avo ano titi tahimbasuja avoeto enda ta puvuna.” ke ainge enu, <sup>40</sup> Pharisee embomeni ai ta mitia amina ingito ke einge ea, “Eto dago mo titi tahimbari ke ere?” ainge eo, <sup>41</sup> Iesu na ke mine einge ena, “Ungo titi tahimbari embopo amo na mane pehumba aetena te ungo na ‘dago kiarira’ ainge ereva avoeto unгона ari sapura ta hajire kesova.” ainge Iesu na ena.

## 10

### *O ‘sheep’ simba ari embo javotoho amita ke.*

<sup>1</sup> Eto Iesu na ke einge ena, “Na ungotaga degi ke be erena, pegene embo na amo o ‘sheep’ ta huga peta mane toreuja te huga jaruketo jo ta beuja <sup>2</sup> te o ‘sheep’ simba ari mamona amo huga pe ta torasi uei <sup>3</sup> huga pe simba ari embo na o ta mamokito pe hirikeoi toreto amita o ‘sheep’ vahai vahai javo ijie jage ijioi o amita pere na mamota ke hajire ingihe mamambo ambo ambo ue tambuta pambuora.



<sup>4</sup> Eto tambuta puvuto o mamu kiti pahuoi ambota oroviketo ke hajire ingihe pambuora. <sup>5</sup> Te embo nei ta ke hajire ingihe amo mane ambo ambo eora te oju toto pambuora.” <sup>6</sup> Eto ke ainge Iesu na timu hatirari ke na ena te embomeni na ke be hotembae eo,

*O ‘sheep’ simba ari embo be amo Iesu ra*

<sup>7</sup> Iesu na ke ehako einge ena, “Na ungota degi ke be erena, na o ‘sheep’ ta huga pe ra. <sup>8</sup> Eto embo nei nei matu kiti puvua amo pegene embopora avoeto o ‘sheep’ na ke hajire ingae ue toa. <sup>9</sup> te huga pe amo namo avoeto embo na nau degi ta toreto osaga mane kesuja te puvuto pambuto ue samara eto enena javotoho kito indesuja. <sup>10</sup> Eto pegene embo amo pegene eto tau amburora puvuja te na puvena amo embo ta vasiri ikano umbuto be isapamane eto irora puvena. <sup>11</sup> Na o ‘sheep’ simba ari embo javotoho ra te o ‘sheep’ simba ari embo amo o ‘sheep’ orekasi amita hamo na ombuto taro sari aisuja. <sup>12</sup> Rate ‘sheep’ simba ari embo eto ‘sheep’ ta mamu mane avoeto isoro o ‘wolf’ na o ‘sheep’ kambasi puvutuhourou kito embo amo o ‘sheep’ toto oju pahourou o ‘sheep’ amo oju sepuriri eto pambasora. <sup>13</sup> Amita be amo koro pure ari embo na o ‘sheep’ hotembae euja te <sup>14</sup> Namu avo o ‘sheep’ simba ari embo javotohora te nanena nau jekahoka kiona eto ungonana na kiora. <sup>15</sup> Ainge nombo nau Mamu na na kiuja eto nanena nau Mamu kiona. Eto nau o ‘sheep’ irora namu avo vasiri te amburesona. <sup>16</sup> Eto nau o ‘sheep’ nenei mitera amo huga jo ei ta irae rate amite tapa nanena tatapeketo umbuto vahai ta ikasona. Eto enana te tapa nau ke hajire ingihe tatapeketo iriroro na enana ta simba ari embo ainge aisona. <sup>17</sup> Eto nau vasiri toasona eto ehako umbasona avo nau Mamu na na osa ere ua. <sup>18</sup> Eto uje nau na nau vasiri toasona amo embo nei na mane egimbeto umbasuja. Eto na sovera umbuto

amburesona eto sovera amina au nau vasiri ehako umbasona ari avo ainge ana nau Mamu na nau degi ta ke ena,” ke ainge Iesu na enu, <sup>19</sup> Judea embomeni na tumo ue ke sio sao ijie ke einge ea, <sup>20</sup> embo nei nei na, “Embo emu ahihi sasapura na jo ta torari amita uta sapura oi eria avoeto ungotena amita ke mane ingesora,” ainge ijio <sup>21</sup> embo nei uhoho na ke einge ea, “Embo ahihi sapura na jo ta torari amo embo titi tahimbari mane kondaetija te embo emu ke be ra,” ainge ea.

*Iesu amunure avo ena*

<sup>22</sup> Eto huvira iji te da Jerusalem ta otohu ari pondo ta <sup>23</sup> Iesu na temple jo ta degi javo Solomon ta arara ai ta toreto heto unu <sup>24</sup> Judea embomeni na kito puvuto Iesu joeketo ke einge ea, “Umu Keriso rete mo amunure? Avo ke be na pere ejo. Dago iji koso mana mana ue mitera.” ainge eo. <sup>25</sup> “Na ke amo matu eone ingiova te ungonana na ke be ae eova. Eto nanena nau Mamu ta javo ta ari neite neite eone amina harikeuja aravora te <sup>26</sup> ungonana na ke be ae eova. Amita be amo ungo o ‘sheep’ nau manera. <sup>27</sup> Eto o ‘sheep’ nau be amina ke nau ingihe na ambo ambo uore nanena enana kiona. <sup>28</sup> Eto nau o ‘sheep’ amo maine mane pambuora eto embo nei na mane puvuto ingeni nauta egimbeto umbuora te nanena enana ta degi vasiri daroho ikeona. <sup>29</sup> Eto o ‘sheep’ amo nau Mamu na nau ikarira eto nau Mamu amo embo tapa nembari avoeto embo nei na nau Mamu ta ingeni ta egimbeto umbari inono aera. <sup>30</sup> Nau Mamu te namo te amo vahaira.” Ainge enu. <sup>31</sup> Judea embomeni na ingito Iesu tasi atara siriketo uhoo <sup>32</sup> Iesu na ke einge ena, “Nau Mamu na ari neite neite jajavotoho amo nau degi ta eoi eone kiova te ari emita vahai mo deire etene kito na taisi ere ove?” Ainge enu, <sup>33</sup> Judea embomeni na ke mine einge ea, “Nango no ari neite neite jajavotoho ere oa avoeto umu taisi ae rate inena umu embo rate God ke erea amo sapura be avo erea

amita hamota umo taisi ere ora.” ainge eo, <sup>34</sup> Iesu na ke einge ena, “Eto ungota ke pepeni ta ke kajari amo einge mitia, ‘Ungo amo ke kaiha ari embomeni nombo be ra’ ke ainge amo God na ke umbari embomeni ta degi ena avo ungo eteketo kiaere? <sup>35</sup> Eto God ta ke amo eho mane irae aisuja eto aita amo enana embo ke kaiha ari embomeni nombo be avoeto <sup>36</sup> namo avo God Mamo na enda ta ikenu puvua avoeto nanena, ‘Na God ta Meni ra,’ ainge ene ingito ungonana nanena God urumbari ke ereva. <sup>37</sup> Eto nanena nau Mama ta pure avo aetena amo ungonana ke be mane aeteva te <sup>38</sup> nanena pure avo ururono ungo na kogue na ke be mane aisova te pure avo kogue ke be ijie na Mama ta jo ta mitena eto Mama jo nau ta mitia avo kogue hotembevujō.” ainge enu. <sup>39</sup> Judea embomeni na andito umbasi eo Iesu na tiumbeto pambuto <sup>40</sup> Umo Jordan ovitihō John na embomeni baptaito ena degi ai pambuto mitinu <sup>41</sup> embomeni na kito puvuto ke einge ea, “John na ari neite neite einge ae rate embo eremita ke avo ere ijiaetija tapa amo ke be ra.” <sup>42</sup> Ke ainge ijie embo isapamane na Iesu ke be ea.

## 11

*Embo Lazarus avo Iesu na enu vasiri te erena*

<sup>1</sup> Eto embo javo Lazarus amo da Bethany ai ta amita du kakara heriso Mary te Martha te amiga mitiaetija avo ambure umbuna <sup>2</sup> (Eto kakara vahai oil mune te amina Iesu ta utu ta kuteto amita siro tu na tuheneija amo Lazarus ta du ta javo Mary ra.) <sup>3</sup> Eto Lazarus ta du emone heriso amina Iesu ta degi ke einge ikeo pambuna, “Bada, no tunga humbari namei avo ambure ue mitia,” ainge ijie ke ikeo pambunu <sup>4</sup> Iesu na ingito ke einge ena. “Eto ambure umbuto mane sari aisuja te embomeni na Mama God ta usasa kito eto Meni ta usasa kiora ere ua.” ainge Iesu na ena. <sup>5</sup> Eto Iesu na Martha te amita jao Mary te du Lazarus te avo

osa ena <sup>6</sup> te Lazarus ambure ari ke ingina te sausau pambae iji heriso mitimite <sup>7</sup> amita ambotani ta degi, “Ungote enda Judea ta pambasora,” ainge enu, <sup>8</sup> Ambotani na ke einge ea, “Ate Poekari Embo, umo Judea embomeni na atara na tasi etere puvua te porere ae ehako egerembao?” ainge eo, <sup>9</sup> Iesu na ke mine einge ena, “Eto iji bitiuja amo amita jo ta amo 12 hours amina usasa euja amo embo na teto kokain eto mane beora amita be amo iji usasa mitia avoeto, <sup>10</sup> Rate mume te amo teto kokain eto beora amita be amo usasa irae”, avoeto ke ainge, <sup>11</sup> eto ke nei einge ena, “Aravorate ungote pambuto ungotenau namei Lazarus erevia avo ujaro eraja na.” ainge enu, <sup>12</sup> ingito einge ea, “Bada, amo jangu indie erevia avoeto kondasuja,” ainge ijie <sup>13</sup> teho evo ari ke hotembea te Iesu na matu ambuna aravo evo ari ke ena <sup>14-15</sup> avo Iesu na kito ke hariketo einge ena, “Lazarus ambija te ungonana na ke be ava mitena avoeto na tunga javotoho ere ona te ungote Lazarus kesi pambasira,” ainge enu, <sup>16</sup> Ambotani vahai Thomas eto amita javo nei Didymus na ambotani nei uhoho ta degi ke einge ena, “Aravora te ungote Iesu ga tapa pambuto sari aisora,” ainge ena.

*Vasiri te erari eto daroho irari amo Iesu ta degi mitia*

<sup>17</sup> Eto pambuto Lazarus ambunu use ta ikea amo iji tapa 4 irae enu Iesu puvuna. <sup>18</sup> Eto Lazarus ta da Bethany amo da Jerusalem engiti ta 3 kilometres ainge pambuora <sup>19</sup> Avoeto Judea embomeni na Lazarus ta du kakara Martha te Mary te aingeto Lazarus ambuna avo sipuri asi pambuto mitio <sup>20</sup> Iesu puvurari duru ingito Mary da ta mitinu Martha na Iesu tambasi degi ta pambuto Iesu tambuto <sup>21</sup> Iesu ta degi ke einge ena, “Bada, umo ei ta iraetea amo nau du mane amburaetija <sup>22</sup> te umo do uje eto penunu aisoa amo God na ikasuja avo na ere kogona.” Ke ainge Martha na enu, <sup>23</sup> Iesu na einge ena, “No du

amo vasiri te erasuja,” ainge enu <sup>24</sup> Martha na Iesu ta degi einge ena, “Na kogona amo iji kombu te erasuja,” ainge enu, <sup>25</sup> Iesu na einge ena, “Eto vasiri te erari amo namora. Eto embo amuna na ke be aisuja embo amina amburou irae mane aisuja te ehako vasiri te erasuja. <sup>26</sup> Eto embo amuna vasiri te mitie na ke be ijie mane amburesuja te vasiri te daroho iresuja. Ke ainge erena amo umo kogoete?” Ainge enu, <sup>27</sup> Martha na, “Bada, umo God ta Meni Keriso avo simba ere ovora avo enda ta puvea erevira,” ke ainge

### *Iesu na si ena*

<sup>28</sup> Eto pambuto amita jao Mary jage eto, “Ate Poekari Embo puvuto umo kesi eria,” ainge enu <sup>29-30</sup> Mary na ingito sau ereto pambuto Iesu da jo ta torae da sahu ta Martha tambuna degi ai mitinu Mary pahunu <sup>31</sup> Judea embomeni Mary ga bande jo ta sipuri ijie mitia amina Mary sau ereto Lazarus ta use ta si asi pambari ke hotembeto embomeni na Mary ta ambota pahuo, <sup>32</sup> Mary na Iesu ta degi puvuto Iesu kito utu ta beto gombuto ke einge ena, “Bada, umo matu puvuraetea amo nau du mane amburaetija,” ke ainge si te tapa ijinu <sup>33</sup> Iesu na Mary ta titi sisivu te eto Judea embomeni ta si te avo kito Iesu osaga peni vahai be enu <sup>34</sup> ke einge ena, “Koveteva use naingetare?” ainge enu embomeni na, “Bada, orovira, pambuto ki,” ainge eto pahuo <sup>35</sup> Iesu si ijinu <sup>36</sup> Judea embomeni na kito, “Kivu, osa peni vahai euja avoeto ambei si eria,” ainge ijio <sup>37</sup> embo nei uhoho na ke einge ea, “Embo emina titi tahimbari etei javotoho etija te embo emita amburari emo taekari inono ae avoeto ambei?” ainge embomeni na ijio,

### *Iesu na enu embo Lazarus vasiri te erena*

<sup>38</sup> Iesu osaga peni vahai kogue use ta puvuto atara peni amina use pe ahurekea avo kito <sup>39</sup> “Atara evi

umbavu pambai,” ainge enu embo ambuna amita du Martha na ke einge ena, “Bada, ambei kovetere iji 4 irae etei sari ue kimu masa ere ua.” Ainge enu, <sup>40</sup> Iesu na ke einge ena, “Na no degi ta umo God ke be ijie God ta usasa no degi ta ikau kesoa, ke ainge etenete?” ke ainge enu, <sup>41</sup> atara umbuo pahunu Iesu na titi i ta eto “Mama umo ke nau ingioa eto ere ingihea avoeto umo osa ere ona. <sup>42</sup> Eto namo avoembo ae rate embomeni ei mitera avo inena na ikae puvua avo ano kito ke be ara erena,” ainge eto <sup>43</sup> hori gagaha eto einge ena, “Lazarus umo tambuto puvura,” ainge enu, <sup>44</sup> amburari embo bo oseseto utu te ingeni te pupundukea eto tombu togea amite tapa tambuto puvuto hetenu Iesu na embomeni ta degi ke einge ena, “Bo togari avo bujeketo tovu pambai,” ainge ena.

### *Judea ta embo okokose na Iesu tasi ke kasea* (Matthew 26:1-5, Mark 14:1-2, Luke 22:1-2)

<sup>45</sup> Eto Judea embomeni nenei Mary ga puvua amina Iesu na Lazarus ambunu kovea avo enu vasiri te erena avo kito Iesu ke be ijie tumota ea. <sup>46</sup> Eto Judea embomeni nenei na pambuto Pharisee embomeni ta degi Iesu na ari do ena avo eo, <sup>47</sup> ingito priests pepeni te Pharisee embomeni te aingeto vahaita toruketo ke kaseto einge ea, “Embo emina ari sovera neite neite ere ua emo ungote embo emo do aro? <sup>48</sup> Eto toasora amo embomeni tapa embo avo ke be ijiroro Rome embo na puvuto isoro ue embo torue temple otoh taro irae aisuja.” Ainge ijio <sup>49</sup> jua amita priest peni javo Caiaphas amina ke einge ena, “Ari emo puvija te ungo be kiae ere ova. <sup>50</sup> Rate ungo embo tapa amburesova amo sapurara te ungo embo tapa amita javota embo vahai amburesuja avo javotohora,” Ke ainge Caiaphas na ena. <sup>51</sup> Amo amita hotembari na ae rate Judea ta priest peni ue Iesu na Judea embomeni tapa avoeto

amburesuja avo harikena <sup>52</sup> te amo Judea embo avo pere mane rate God ta meniundi enda tapa ta mitera avo namei kamei vahai ara amburesuja.

<sup>53</sup> Eto ke ainge ea iji amikote Iesu naingeto umbuto taro amburesuja avo degi jombure ea. <sup>54</sup> Avoeto Iesu na Judea embomeni ga umoro ae toto amita ambotani ga degi o jagatambu amita engitita da javo Ephraim ai pambuto mitiaetera.

<sup>55-56</sup> Eto Judea ta Jarukari Pondo ari iji auvitinu Judea da isisaraho embomeni na Jerusalem ta pambuto enana ta ari ainge avoeto hamo egaro o tohu au pondo asi toruketo temple jo ta isa ue ke einge ea, “Ungo do ere hotembeteve? Iesu eha pondo ta puvuroute mane puvurou?” ainge ea. <sup>57</sup> Eto priests pepeni te Pharisee embomeni te aingeto ke matuainge ea, “Embo amuna Iesu kito avo puvuto dago ta evujo dago na embo avo andito umbare,” ainge ea.

## 12

*Iesu ta hamo ta Mary na oil mune te amina kutena*

*(Matthew 26:6-13, Mark 14:3-9)*

<sup>1</sup> Eto Jarukari pondo ari ta iji 6 irae ae mitinu Iesu na da Bethany ta puvuto embo Lazarus ambunu enu vasiri te erena <sup>2</sup> Amita bande ta indari indesi pambuo Martha na indari ikenu Iesu te Lazarus te eto umoro embo nenei te aingeto gaga ta arumbeto indie mitio <sup>3</sup> Mary na oil javo ‘Nard’ tigi isapa amita mine amo pajire bera te amina umbuto Iesu ta utu ta overeketo kuteto amita siro tu na tuhenu bande jo amo mune na ohugara unu <sup>4</sup> Ambotani tapa 12 rate ambotani vahai javo Judas Iscariot Iesu jenge indesuja embo amina ke einge ena, <sup>5</sup> “Oil mune te emo koro pajire be ombuto koro umbuto donda ambu embopo ta ikaetera avo teho aijaja ere ua,” <sup>6</sup> ke ainge ena amo donda ambu embopo amo be hotembae rate ambotani ta koro tapa avo amina simba aja ke eo koro goru simba ue iji

hekeri ta pegene umbuja avoeto ena. <sup>7</sup> Iesu na embo amita degi ke einge ena, “Aravorate to, na amburono kovasora amo oil mune te emina hamo nau jigesuja avoeto simba ere ua, <sup>8</sup> te donda ambu embopo amo iji koso ungote iresora te na ungote iji koso mane iresona,” ke ainge Iesu na ena.

*Priests pepeni na Lazarus tasi sirikea*

<sup>9</sup> Eto Judea embomeni isapamane Iesu ta duru ingito kesi pambua amo Iesu pere mane rate embo Lazarus ambunu Iesu na enu vasiri te erena amite tapa kesi pambuto <sup>10-11</sup> Lazarus kito Judea ta ari avo toto Iesu ke be ijio priests pepeni na ke avo ingito Lazarus te tapa taro amburoja ke ea.

*Eto Keriso na da Jerusalem ta pambuna*

*(Matthew 21:1-11, Mark 11:1-11, Luke 19:28-40)*

<sup>12</sup> Eto iho nei embomeni pondo ta puvua amina Iesu Jerusalem ta puvutuhunu duru ingito <sup>13</sup> Koropa gigi kahumbeto umbuto Iesu tambasi degi ta pahue ke jajage eto einge ea, “Hosanna, Israel embo ta ‘king’ Bada ta javota puvuto ere hua. Javotoho ari amita degi iroi.” ainge ijie puvutuhuo <sup>14</sup> Iesu na o ‘donkey’ meni tambuto umbuto o hamo ta arumbeto pambuna amita ke avo God ta ke matu kajari ai ta einge mitia, <sup>15</sup> “Israel embomeni ungo oju avojo ungo ta ‘king’ o ‘donkey’ meni ta hamo ta arumbeto puvuto ere hua.” Ke ainge mitia <sup>16</sup> amo iji amikote Iesu ta ambotani na hotembae rate Iesu vasiri te ereto Utu usasa ta pahunu amita ambotani na God ta ke matu kajari amite Israel embomeni na pekea amite avo hotembeto ke be ea. <sup>17</sup> Ainge eto degi ta pahue Lazarus Iesu na jage enu use ta eto erenu kia embomeni amina embo tapa ta degi ke hande eo ingihe degi ta pambua. <sup>18</sup> Eto hajire avo Iesu na enu embo isapamane na duru ingito Iesu kesi degi ta puvua <sup>19</sup> Eto Pharisee embomeni na kogue



ke einge ea, “Kivu, ari emo taekari inono aera te enda embomeni tapa na embo emita ambota ere orovikitera.”

### *Enda Greek embopo na Iesu jombure ea*

<sup>20</sup> Eto God jakeka ari embo nenei pondo ta pambua amo enda Greek embopo <sup>21</sup> amina pambuto embo Philip amo enda Galilee amita da Bethsaida embo amita degi ke einge ea, “Dago Iesu kesi uje ere ora,” ainge eo <sup>22</sup> Philip na pambuto Andrew eto amiga pambuto Iesu ta degi eo ingito <sup>23</sup> Iesu na ke mine einge ena, “Embo ta Meni na amita Usasa ta torasuja iji puvija erevira, <sup>24</sup> Na ungota degi ke be erena. Eto ‘wheat’ be vahai enda ta beto mane amburesuja amo be vahai aisuja te enda ta beto amburesuja amo be isapamane aisuja. <sup>25</sup> Eto embo amuna enda ta ari amita uje ue iresuja amita vasiri amo beto pambau irae aisuja eto embo nei amuna enda ta ari avo uje ae aisuja amo amita vasiri amo daroho iresuja. <sup>26</sup> Eto embo amuna ke nau agi ue amo na ambo ambo aisuja. Eto na nainge iriona ai ta nau agi ari embo te tapa iresuja. Eto embo amuna ke nau agi aisuja embo amo nau Mama na otohu aisuja.

### *Iesu amburesuja avo ke ena*

<sup>27</sup> Rate eha oroho nau jo ta osaga ere kogona te na ke do ano? ‘Mama, nau iji puvija erevi peiketo na hondate e’ ainge anote, ke ainge mane aisona te ari erevi asi puvua avoeto ari emita iji puvija erevira avoeto <sup>28</sup> Mama, javo no avo ejo peni ai.” ainge ijinu Utu i ta ke einge puvuna, “Javo nau avo ijione peni ereouva avo ehako ano peni aisuja.” ke ainge puvutuhunu, <sup>29</sup> embomeni areto mitia amina ingito ke einge ea, “Utu ta tururu eria” ainge ijio embo nei na, “Utu ta anera na ke eria,” ainge eo <sup>30</sup> Iesu na ke einge ena, “Ke puvuto ere hua amo namo avoembo ae rate ungo avoembo eria. <sup>31</sup> Eto enda ta ari tapa do aingere amo

God na matu siriketo hajire ikasi ere ua eto enda ta titi jigari embo amo God na kurumbau pambasuja. <sup>32</sup> Eto namo avo jigoro vivitie embo tapa amo nau degi ta puvuresora,” <sup>33</sup> ke ainge Iesu na ena amo ate ivo do eto taisora avo harikena. Eto ke ainge Iesu na enu <sup>34</sup> embomeni ai ta mitia amina ingito ke einge ea, “Dago Moses na ke kajena avo eteketo kiora amo Keriso puvuresuja amo nangote daroho iresuja ke avo eteketo kiora te inena Embo ta Meni jigoro bitito amburesuja ainge erea amo Embo ta Meni mo davore?” ainge eo, <sup>35</sup> Iesu na ke mine einge ena, “Usasa amo ungote iji isapa mitima irae aisuja <sup>36</sup> te usasa mitia emikote ungo isa evujo eto isa ari embo na mume sihukasuja amo sio pambasuja avoeto usasa ungota degi irirou usasa ke be ijie usasa ta meniundi evujo,” ke ainge Iesu na eto embomeni kiae toto pambuto ondikena.

### *Embomeni na Iesu ke be ae ea*

<sup>37</sup> Eto Iesu na ari neite neite ena amo Judea embomeni na kia te ke be ae ea <sup>38</sup> amita ke avo Peroveta Isaiah na matu einge kajena, “Bada, dagota ke mo embo amuna ingito ke be erei? Eto God ta sovera neite neite mo embo amuna kito ke be erei?” Ke ainge amo matu kajari mitia. <sup>39</sup> Eto embomeni na ke avo ingito ke be ari haite mane avo God na enu Isaiah na ke einge kajena, <sup>40</sup> “Eto embomeni nau degi ta puvuore eone kondeora avo titi ano tahimbau mane kesora eto embo ta jo ano ngahia au mane hotembasora,” ke ainge kajena <sup>41</sup> amo Isaiah na Iesu ta usasa kogue Iesu avoembo kajena. <sup>42</sup> Eto Judea ta embo pepeni nenei amo Iesu ke be ea amo Pharisee embomeni na katekeore eonga iriona oju ue ondikari na Iesu ke be ea. <sup>43</sup> Amo God na embomeni avo osa aisuja amo hotembae ue embomeni na kito osa ara uje ea.

### *Iesu ta ke na iji kombute embo pehumba aisuja*

<sup>44</sup> Eto Iesu na embomeni tapa ingora ke peni vahai be eto einge ena, “Eto embo amuna na ke be euja amo na pere mane rate na ikari Embo amite tapa ke be euja, <sup>45</sup> Eto embo amuna na kiuja amo na ikari Embo amite tapa kiuja <sup>46</sup> Eto na usasa avo puvuto enda ta mitirono embo amuna na ke be ijie mume ta mane iresuja <sup>47</sup> Eto na enda ta pehumba asi puvurae rate enda oreketo umbasi puvena avoeto embo amuna ke nau agi ae aisuja amo nanena mane pehumba aisona te <sup>48</sup> Na uje ae ue ke nau agi ae ere ora embopo amita pehumba ari embo mitia amo ke nau tapa erevona amina iji kombu te pehumba aisuja <sup>49</sup> Eto ke amita be amo erevira. Ke nau amo nau degi ta puvurae rate nau Mama na ikari Embo amina ana ijioi eona <sup>50</sup> Eto na kogona amo amita ke ikari ai ta amo vasiri daroho mitia avoeto nau Mama na ke do nau degi ta euja avo pere eona,” ainge Iesu na ena.

### 13

#### *Iesu na amita ambotani ta utu egena*

<sup>1</sup> Eto Iesu na enda toto mamona ta degi pambasuja amita iji puvuna amo jarukari pondo asora amita mume amina Iesu na kina. Eto Iesu na enda ta mitie amita embomeni osa ena amo doaingere avo au kiora ari einge ena. <sup>2</sup> Eto Iesu na amita ambotani ga indari indie mitinu Satan na Simon ta meni Judas Iscariot ta degi Iesu harikau umbara enu ingina. <sup>3</sup> Eto God na amita pure tapa Iesu ta ingeni ta iketo tona amite eto Iesu God ta degi eto puvuna avoeto ehako egerembeto pambasuja amite tapa Iesu na kina. <sup>4</sup> Eto indio irae enu Iesu na ereto heteto amita bo hamo ta avo houketo hamo tuhari soi umbuto uhu ta tigitu <sup>5</sup> umo heva ta timbuto overeketo ambotani vahai vahai ta utu egeto soi uhu ta tigena amina tuhitie <sup>6</sup> puvuto Simon Peter ta degi puvunu Iesu ta degi ke einge ena, “Bada, umo utu nau

egasi ere oe?” ainge enu, <sup>7</sup> Iesu na ke mine einge ena, “Na do ere ona ungo eha emo kiae ereova te ambota kesova,” ainge enu, <sup>8</sup> Peter na, “Utu nau avo mane egasoa,” ainge enu Iesu na ke mine einge ena, “Eto na utu na egae amo namo te vahaita mane aisoa,” ainge enu, <sup>9</sup> Peter na, “Bada aravora, te nau utu pere mane egasoa te ingeni te siro te tapa egasoa,” ainge enu, <sup>10</sup> Iesu na einge ena, “Eto embo na umo kutasuja amo tongopa irae avoeto ehako ando mane egasuja. Eto umo tongopa ambu rate embo nei ei ta amo ainge manera,” <sup>11</sup> ke ainge ena amita be amo jenge indesuja embo amita jo avo Iesu na kogue ke “Embo nei ei ta amo ainge manera,” ainge ena. <sup>12</sup> Eto Iesu na ambotani ta utu egenu irae enu amita bo asuketo pambuto gaga ta arumbeto <sup>13</sup> ke einge ena, “Eto na ungota degi ate kitira etena emo ungo ere kogovete? Amita be amo erevira, ungonana na ungota bada ke eova eto ungota atepoekari embo ke eova amo ke be ra te <sup>14</sup> Na ungota bada eto atepoekari embo na ungota utu egetena ainge nombo ungo eonga utu mine ega evujo. <sup>15</sup> Eto ungonana kito ainge ava ate kitira etena. <sup>16</sup> Na ungota degi ke be erena, pure ikari embo amo embo penira eto pure ari embo amo isapara eto nei amo ke ari embo amo embo peni ra eto ke hande ari embo amo embo isapa ra <sup>17</sup> Eto ari erena avo hotembeto agi ue tunga javotoho te iresova. <sup>18</sup> Eto na ungo siriketo umbena amita jo amo na ere kogona avoeto ke erena emo ungo tapa ta degi aera. Te God ta ke matu kajari einge mitia, ‘Embo vahai namo te arumbeto ere india amo nau degi ta kitoho ereua,’ kajari ainge mitia avo au inono aisuja, <sup>19</sup> Eto ari emo puvurae peko ta ene ere ingiheva amita be amo puvuru kito ungonana ke be aisova. <sup>20</sup> Na ungota degi ke be erena, eto embo amuna na ne ikano pambasuja embo avo pekasuja amo namote tapa pekasuja. Eto na pekasuja amo na ikari Embo te tapa

pekasuja.”

*Eto Judas na Iesu harikasuja avo ke ena*

*(Matthew 26:20-25, Mark 14:17-21, Luke 22:21-23)*

<sup>21</sup> Eto Iesu na ke ainge eto jo ta osaga peni vahai be kito ke einge ena, “Na ungota degi ke be erena, ungo vahai na kitoho embo ta degi harikavo na umbasora,” ainge enu, <sup>22</sup> ambotani na mine kia ue ke eria amita be mo deire ainge ijio <sup>23</sup> Ambotani vahai Iesu na osa ena embo amo Iesu ta engiti ta sereketo mitina amita degi <sup>24</sup> Simon Peter na ingeni na ate ate ue amunurami erei eto inga ainge ijinu <sup>25</sup> Iesu ta jenge ta siro na tembeto, “Bada, amunure,” ainge enu <sup>26</sup> Iesu na ke einge ena, “Na bread umbuto su heva jo ta kaimbeto ikano indesuja embo re aravora,” ainge eto bread umbuto kaimbeto Simon Iscariot ta meni Judas ta ikenu <sup>27</sup> umbunu Satan na amita jo ta torenu Iesu na Judas ta degi ke einge ena, “Umo do uje ere oe avo sausau pambuto ejo.” ainge enu <sup>28</sup> ambotani nei uhoho na ke be ingae <sup>29</sup> avoeto einge hotembea, Judas amo ambotani ta koro simba ari embo avoeto pambuto pondo asora amita indari umbaja ereite mo donda ambu embopo ta hande ikaja ereite avo hotembitio, <sup>30</sup> Judas na bread umbuto ereto araha mume ta pambuna.

*Osa mine ara ari ta ke*

<sup>31</sup> Eto pahunu Iesu na ke einge ena, “Eto iji nau puvija eto God ta usasa na Embo ta Meni joekau embo na God ta usasa kesora <sup>32</sup> eto God na nau usasa ikau usasa ta torasona amita iji ahumpa etija <sup>33</sup> te oio nau meniundi, na ungote iji koso mane iresona te ke matu Judea embomeni ta etene ingera avo ungota degi erena ungo na jombure eto amo na pambasona degi ai ungo mane pambasova. <sup>34</sup> Eto na ungota degi ke peni be avo eha ere ikitona amo osa mine ara evujo. Eto na ungo osa eona ainge nombo ungo osa mine ara evujo. <sup>35</sup> Eto ungo na

osa mine ara ururovo embo tapa na kito amo Iesu ta ambotanira asora,” ainge enu,

*Peter na Iesu kiae ke aisuja avo Iesu na harikena*

*(Matthew 26:21-35, Mark 14:27-31, Luke 22:31-34)*

<sup>36</sup> Simon Peter na ke einge ena, “Bada, umo nainge pambao?” ainge enu Iesu na einge ena, “Umo na eha pahurono mane pambasoa te ambotata pambasoa,” ainge enu <sup>37</sup> Peter na ke einge ena, “Na do eto umo pambasoa degi ai ta mane pambana ere? Na umo embo sari asi hotembitena.” ainge enu, <sup>38</sup> Iesu na ke mine einge ena, “Umo na embo sari asi ke ere? Na no degi ta ke be erena, umo iji 3 na kiae ke ijiro ohora javone aisuja,” ainge Iesu na ena.

## 14

*Iesu na ambotani ta degi onde katari ke ena*

<sup>1</sup> Eto Iesu na ambotani ta degi ke einge eto ena, “Ungo osaga kiovojo, eto ungo God tumota evujo, eto na tumota evujo <sup>2</sup> Eto nau Mama ta bande ta jo kaneke kaneke ari isapamane be mitia te bande jo neite neite ainge irae amo ungota degi ke matu ano ingaeteva. Avoeto na pambuto ungota irari besi siriketo, <sup>3</sup> nununga eto ehako egerembeto puvuto ungo umbuto ungote tapa na iriona degi ai pambuto iresora. <sup>4</sup> Eto na pambuona degi amo ungo kiarira.” ainge Iesu na enu, <sup>5</sup> Thomas na ke mine einge ena, “Bada umo pambasoa degi amo dago kiaera te no pambari degi amo dago na kiari ke erea,” ainge enu, <sup>6</sup> Iesu na ke einge ena, “Eto na amo pambari degi te ke be te vasiri te avoeto embo na na tiumbeto Mama ta degi mane pambuora, <sup>7</sup> Eto ungo na na ere kogova amo nau Mama te tapa ere kogova. Eto ungo na iji tapa kiova eto eha oroho emo ere kogova,” ke ainge enu, <sup>8</sup> Philip na ke einge ena, “Bada, ejo dago Mama kito inono are,” ainge enu, <sup>9</sup> Iesu na ke mine einge ena, “Philip, na ungote

iji koso mitovona te inena na kiae ke erea. Eto ungo na ere kogova amo Mama ainge nombo ere kogova rate inena Mama ano be kesi ke ere? <sup>10</sup> Eto na Mama ta jo ta mitena eto Mama jo nau ta mitia te umo ke be ae ue erete? Eto na ke tapa erena amo na eonga aera te nau Mama jo nau ta mitia amina pure amita avo euja. <sup>11</sup> Eto na Mama ta jo ta Mamo jo nau ta avo kogoue ke be evujo. Eto avo ke be ae ue kito sinderi neite neite uore kiova aita na ke be evujo. <sup>12</sup> Eto na ungota degi ke be erena, eto embo amuna na ke be aisuja amo nanena eona ainge nombo ari neite neite aisuja. Eto na Mama ta degi pahurono embo amuna na ke be euja embo amina ari na eona amo nembeto aisuja. <sup>13</sup> Eto nanena ano Mama ta javo peni aja ungo na javo nau ta penunu aisova amo ikasona. <sup>14</sup> Eto ungo javo nau ta do uje eto penunu aisova amo ikasona. <sup>15</sup> Eto ungonana na osa ue kito amo ke nau tapa avo agi evujo.

#### *Iesu na Ahihi Otohu ikasi onde ena*

<sup>16</sup> Eto na Mama ta degi ano ungota hondate ari embo ikau puvuto ungotete daroho iresuja <sup>17</sup> Amo ke be ari ta Ahihi avo enda embomeni teho kiae na mane umbasora te ungo ta degi puvuto jo ungota ta iresuja avoeto ungo na kesova.

<sup>18</sup> Eto ungo hojo meni toarako mane aisona te na ehako puvuresona. <sup>19</sup> Amo iji isapa eto enda embomeni na na mane kesora te ungo na na kesova. Eto na vasiri te mitena ainge nombo ungonana vasiri te iresova, <sup>20</sup> Eto na Mama ta jo ta eto ungo jo nau ta eto na ungota jo ta avoeto iji puvuresuja amo ungonana ari avo kito ke be aisova. <sup>21</sup> Eto embo amuna ke nau ingito agi aisuja embo amina na osa aisuja. Eto na osa aisuja embo amo nau Mama na osa ururou nanena embo avo kito osa ue ano na be kesuja,” ainge Iesu na enu, <sup>22</sup> Embo Judas Iscariot mane rate Judas nei amina ke einge ena, “Bada, ke erea amita be mo deire? Eto enda

embo tapa mane kiora nango pere ao kiora erete?” Eto ke ainge enu <sup>23</sup> Iesu na ke mine einge ena, “Eto embo amuna na osa ue ke nau agi aisuja amo nau Mama na embo avo osa ururou dago na puvuto amita jo ta iresora. <sup>24</sup> Eto embo amuna na osa ae euja amina ke nau agi mane euja. Eto ke amo nau mane rate na ikari Embo ta ke ra.

<sup>25</sup> Eto na ungotete mitie ke erevi ungota degi erena <sup>26</sup> te ungota hondate ari embo Ahihi Otohu avo nau Mama na nau javo ta ikau puvuto ke tapa do erena amo harikau ungo na ehako hotembasova. <sup>27</sup> Eto ungota degi hande ere ikitona amo nau peka avo ungota degi iketo pambasona. Eto peka amo enda embo na mane ikaetera te nanena ungota degi hande ere ikitona avoeto ungo oju ue osaga neite neite avojo.

<sup>28</sup> Eto na pambuto egerembasi ke etene ingeva amo Mama nau amo na aingeko mane embo peni be amita degi ere pahona, avoeto ungo na na osa ue amo tunga javotoho evujo <sup>29</sup> Eto ari erevi puvurae kiti ta puvurou kito ungo na ke be avo erena. <sup>30</sup> Rate na ungota degi ke koso mane aisona te enda ta titi jigari embo sapura puvuto ere hua amita ivo na na nembari inono aera, <sup>31</sup> te na Mama osa ere ona amo enda embo tapa kiora Mama ta uje tapa avo pere inono ta ere ona, te have ungotete pambare,” ainge Iesu na ena.

## 15

### *Iesu amo esi uhu be ra*

<sup>1</sup> Eto Iesu na ke einge ena, “Namo esi uhu be ra eto nau Mama amo pure Mamora <sup>2</sup> Eto esi hatu vahai be ae aisuja amo sapura avoeto gisiketo gosukau iraesuja eto hatu nei be euja avo kito kombu poekau be isapamane aisuja <sup>3</sup> Eto ungo nau ke eone ingiova avoeto hatu ta kombu poekari avoeto nau jo ta iresova eto na ungota jo ta iresona. <sup>4</sup> Eto hatu na be eonga mane euja te uhu mitia avoeto hatu ta be euja, ainge nombo ungo namote irae amo ungota be



mane aisuja <sup>5</sup> Eto namo esi uhu ra eto ungo esi hatu ra eto ungo namote iresova eto na ungote iresona amo be isapamane aisuja rate tiukasora amo be mane aisuja <sup>6</sup> Eto embo amuna na toto pambasuja amo hatu tiukeore jaise euja ainge au umbuto i ta ikaro evekasuja. <sup>7</sup> Eto umo namote mitiro nau ke avo no jo ta irirou umo do uje eto penunu aisova amo ikano umbasova. <sup>8</sup> Eto ungo na be isapamane ururovo amo embomeni na nau Mama ta usasa javotoho koguroro ungo nau ambotani be aisova. <sup>9</sup> Eto nau Mama na na osa euja ainge nombo nanena ungo osa ere ona avoeto ungo nau osa ari ta irivujo <sup>10</sup> Eto nau Mama ta ke agi ue nau Mama ta osa ari ta iriona ainge nombo ungo ke nau tapa agi aisi uje eto kito osa ari nau ta irivujo. <sup>11</sup> Eto osa ari nau na ungota jo enetau tunga javotoho be ava etene ere ingiheva. <sup>12</sup> Avo ari vahai erevi ava erena, eto na ungo osa ere ona ainge nombo ungo na osa mine ara evujo. <sup>13</sup> Eto embo na amita namei kamei osa ue oreketo amburesuja amo osa eora amo nembasuja. <sup>14</sup> Eto ungo ke nau tapa avo agi ue amo namei kamei nau be aisova <sup>15</sup> Eto na ungo pure embopo ke ijiena te avo toto ungo nau namei kamei ke aisona amita be amo pure embo na pure mamona ta ari tapa avo mane kiuja rate na Mama ta ari tapa amo kiona avoeto ungota degi eone ingiova avoeto ungo nau namei kamei ra. <sup>16</sup> Eto ungonana na uje ae rate nanena ungo uje eto siriketo uhana amo ungo be ava iketene pahava eto be amo mane sari aisuja te daroho iresuja. Eto ungo na nau javo ta do uje eto penunu aisova amo nau Mama na ikau umbasova. <sup>17</sup> Eto na ungota degi ke peni be amo ari vahai erevi ava erena. Ungona osa mine ara evujo.

*Enda embomeni ta tumo ari*

<sup>18</sup> Eto enda embo na ungo uje ae ururoro kito amo ke erevi hotembevujō, ari amita kiti ta amo na uje ae

ere uaetera <sup>19</sup> Eto ungo enda embo na toho aeteva amo enda embo na ungo osa aetera te ungo nanena enda ta eto umbua avoeto ungo enda embo mane avoeto enda embo na ungo osa ae eora. <sup>20</sup> Eto ke matu nanena ea avo hotembevujō, eto pure embo amo isapa eto pure mamona amo peni ra. Avoeto nau degi ta memenga ikasora ainge nombo ungota degi ta memenga ikaro keisova. Eto ke nau agi aisora amo ungota ke te tapa agi aisora. <sup>21</sup> Amo na ikari embo avo kiae na vahai kiora avoeto aisora. <sup>22</sup> Eto na puvuto enana ta degi ke avo ae toaetena amo na enana ta degi pehumba mane aetena te na puvuto ke matu ijiena avoeto enana ta ari tapa amo teto haito ari inona aera. <sup>23</sup> Eto embo amuna na tumo euja amo nau Mama te tapa tumo euja <sup>24</sup> Eto embo nei na puvuto ari neite neite ae kiae rate nanena puvuto ari neite neite etene kera. Eto ainge ae kiae amo enana ta degi pehumba mane aetena te enana ari tapa etene kera te namote nau mama te avo uje ae ere ora. <sup>25</sup> Amita ke avo God ta ke kajari ta einge kajari mitia, ‘Enana ke amita susu irae rate teho sio tumo sosou nau degi ta ere uaetera.’ ke ainge kajari mitia avo eto etera. <sup>26</sup> Eto na Mama ta degi pambuto ungota hondate ari embo ikano puvuresuja amo ke be ari ta Ahihi Mama ta degi puvuja avo puvuto nau harika embo aisuja. <sup>27</sup> Eto ungo te tapa itikari ta namo te tapa mitovova avoeto ungote tapa harika ari embopo nau aisova.”

## 16

<sup>1</sup> “Eto ungo na tumota ae eova avoeto taekitie erena <sup>2</sup> Eto Judea embomeni na ungo katekaro eonga iresova, avo pere mane rate iji puvuto ere hua amo embo na God ta pure otohū asi ke ijie ungo taro amburesova <sup>3</sup> Amo enana na Mama te namo te avo be kiae avoeto ari ainge aisora <sup>4</sup> Amo na ungote mitovona avoeto ke erevi matu ungota degi

ae ingae rate iji puvurou hotembava eha erena.”

*Ahihi Otohu ta pure ari ta ke.*

<sup>5</sup> “Eto na ikari puvurari embo ta degi pambasi ere ona te ungo embo vahai na, ‘Umo degi nainge pambasi ere,’ ke ainge amo nau degi ta eto ingae ra <sup>6</sup> te ke erena avo ungo ingihe tunga osaga ere kogova <sup>7</sup> te ungota degi ke be pere aisona amo ungota irari javotoho avoembo na ere pahona. Eto na pambae amo ungota hondate ari embo Ahihi Otohu na mane puvuresuja te nanena pambuto ikano ungota degi puvuresuja <sup>8</sup> Eto puvuto enda embomeni ta ari sasapura do aingere avo harikau be kesora. Eto ke be ari embo javotoho te eto embo ta ari siriketo hajire ikari be amo do aingere avo Ahihi Otohu na ke pejau be kesora. <sup>9</sup> Eto embomeni amo na kito ke be ae avoeto embomeni amo ari sasapura embopora. <sup>10</sup> Eto na ungo toto Mama ta degi pambuto ungo kiae iresona amo Ahihi Otohu na au kito embo emo ke be embora ainge embomeni na aisona. <sup>11</sup> Eto enda ta titi jigari embo sapura amita pehumba matu ingito taekasona avo eto Ahihi Otohu na au kito embo emo ari sirikari embo be ra ainge aisona.

<sup>12</sup> Eto na ke neite neite eha aisona te ke ngahia be ungo ingari haiteko mane <sup>13</sup> Avoeto toano ke be ari ta Ahihi na puvuto ke te ari tapa te avo au ungo na kesova eto amita hotembari ke avo mane au ingesova te God na amita degi ke do enu ingina avo au ingesova amo iji ambota do puvuresuja amita ke te tapa au ingesova <sup>14</sup> Eto ke au ingesova amo kiari nau avo au ingihirovo javo nau avo peni aisuja. <sup>15</sup> Eto kiari nau au ingesova erena amo nau Mama ta kiari te donda tapa te amo nau iketo tona avoeto erena.”

*Tunga osaga ari te tunga javotoho ari te amita ke*

<sup>16</sup> “Eto iji isapa na ungonana mane kesova eto iji nei isapa ungo na na kesova” ke ainge Iesu na enu

<sup>17</sup> ambotani nei uhoho na ke mine ara eto einge ea, “Eto iji isapa na mane kesova eto iji nei isapa na kesova eto na Mama ta degi pambasona ainge eria amita be mo deire? <sup>18</sup> Eto ke nei iji tuhaupa ke ena amita be amo deire?” ainge ijio <sup>19</sup> Iesu na eto ingari ke ere ijia avo Iesu na kito ke einge ena, “Eto ‘ungo iji isapa na mane kesova eto iji nei isapa na kesova’, ke ainge etena avoeto ungo ke ungo eonga mine ara ijie ereve? <sup>20</sup> Na ungota degi ke be erena. Enda embomeni na tunga javotoho te ururoro ungonana sisivu kutitie sisiasi te ururovo ungota jo aherekau tunga javotoho aisova <sup>21</sup> Eto pamone na meni umbari iji puvuoi memenga koguoi eto meni singa enda ta puvuoi kito tunga javotoho ue memenga jenambueuja <sup>22</sup> ainge nombo ungo osaga ere kogova te na ungo ehako kogurono ungo tunga javotoho be ururou embo nei na ungota tunga javotoho avo mane peikasuja. <sup>23</sup> Eto iji amite ungo na nau degi ta do mane eto ingesova te na ungota degi ke be erena, ungo na do uje eto nau javota penunu aisova amo Mama na ikau umbasova <sup>24</sup> rate ungonana itikari ta eto puvuto eha emikote amo nau javo ta ungonana penunu ae avoeto penunu eto umbuvujo ungo tunga javotoho be ai.

*Iesu amo ari sasapura nembari embora*

<sup>25</sup> Eto ke erena amo timu hatirari ke na erena te iji puvuresuja amikote amo timu hatirari ke na mane aisona te ke be na pere Mama ta ari mo do aingere avo ano ingesova. <sup>26</sup> Eto iji amikote amo ungo na nau javota penunu aisova te nanena ungo embo Mama ta degi ta penunu aisi ke mane aisona <sup>27</sup> Amita be amo ungonana Mama ta degi puvurari ke ijie na osa ere ovova avoeto Mama na ungo osa ere ua. <sup>28</sup> Na Mama ta degi eto enda ta puvena avoeto ehako enda toto Mama ta degi egerembasi ere ona,” ainge Iesu na enu, <sup>29</sup> amita ambotani na ke einge ea, “Jove, na

sesena, eto ke umu erea amo timu hatirari ke na ae rate ke be na pere erea. <sup>30</sup> Eto ari tapa umu kioa avoeto embo ta jo ta hotembari deire amo umu ere kogoavaoeto ke tapa erea te dago oroho be ere kogora amo umu God ta degi puvurari avoeto dago ke be erera,” ainge eo. <sup>31</sup> Iesu na ke mine einge ena, “Ungo eha iji tutumota na ke be ereva amo ke ungotara. <sup>32</sup> Te kivu, iji puvija amo matu puvija te ungonana egiketo pusi hanana eto vahai pamba ururovo na eonga mane iresona te nau Mama ga iresona <sup>33</sup> te ungo nau degi ta peka umbava ke erevi ungota degi erena. Nanena enda ta ari avo isoro eto nembetena avoeto ungo enda ta osaga neite neite kogue joru avojo,” ke ainge Iesu na ena.

## 17

### *Iesu na pari ena*

<sup>1</sup> Eto Iesu na titi i ta eto pari einge ena, “Mama, nau iji puvija avoeto sovera no avo nau degi ta ikejo usasa ururou embomeni na kiore. Eto, Mama, nanena ano usasa no avo peni ururou embomeni kito javo no avo aro peni ai. <sup>2</sup> Eto Mama, inena embomeni tapa avo no Meni ta ingeni ta ika avoeto inena embomeni nau toho ikari amita degi ejo vasiri daroho irari ikane <sup>3</sup> Eto embo na umu eonga God ra ainge ijie inena Iesu Keriso enda ta ikae puvuna ainge ijie vasiri te daroho iresuja. <sup>4</sup> Eto inena pure nane ana ika avo etene irae etei no javo enda ta peni etija. <sup>5</sup> Eto Mama, na no usasa ta torari iji puvija amo enda ae kiti ta no usasa ta ungotemitiatena avo eto inena javo nau ejo peni ai. <sup>6</sup> Eto enda embo inena siriketo umbuto nau ikae nanena etene umu ere kogora. Eto embomeni no nau ika amina ke no agi ere ovora <sup>7</sup> Eto eha oroho emite amo nau ke te ari te amo no degi ta eto puvurari avo be ere kogora <sup>8</sup> eto amita be amo inena ate poekari no nau degi ta ikari avo enana ta degi hande one ingihe

inena na ikae puvua avo enana na ke be erera. <sup>9</sup> Eto na embo tapa avoeto pari ae rate embo no nau ika amo embo no avoeto pari ereona. <sup>10</sup> Eto tapa nau amo toho nora eto tapa no amo toho naura. Eto enana na ore javo nau peni ere ua, <sup>11</sup> Eto na enda ta mane iresona te na no degi ta pahurono enana na enda ta iresora avoeto, Mama Otohu, no javo sinderi te amina enana simba ejo. Eto dago vahai ainge nombo enana vahai are. <sup>12</sup> Eto na enana ga mitie sovera no nau degi ta ikari amina enana simba one javotoho mitera te no ke matu kajari ta mitia avoeto jenge indari embo na umu toto pambija avoeto hana kesuja. <sup>13</sup> Eto na no degi ta pambasona avoeto enda erei mitie enana nau tunga javotoho ari avo umbara no degi ta ke erevi erena <sup>14</sup> Eto enana amo enda ta toho mane, na iteko, avoeto ke no avo ene ingihera avoeto enda embomeni na tumo ere ora. <sup>15</sup> Amo na enana enda ta eto umbae penunu aerate engekari embo avo peikitie enana simba ae erena <sup>16</sup> te na enda ta toho mane ainge nombo enana amo enda ta toho manera, <sup>17</sup> te no ke amo ke be avoeto no ke be ari na enana ejo otohu are. <sup>18</sup> Eto na inena enda ta ika ainge nombo nanena enana enda ta ere ikitona <sup>19</sup> Eto enana ke be ijie otohu ara nanena enana avoembo otohu aisona. <sup>20</sup> Eto na enana avoembo pari ae rate enda embomeni na enana ta ke ingihe na ke be aisora avoeto pari ere ona. <sup>21</sup> Eto enana ejo tunga vahai eto jo vahai are. Eto Mama, na jo no ta mitena eto umu jo nau ta mitea ainge nombo enana ejo ungotenau jo ta irore. Eto ari avo enda embomeni na kito na inena ikari avo hotembitie ke be aisora. <sup>22</sup> Eto ungotena vahai ainge nombo enana vahai ara inena no usasa nau degi ta ika avo nanena enana ta degi iketena. <sup>23</sup> Amo na enana ta jo ta eto umu jo nau ta ra. Eto inena ejo enana ta jo vahai ari inono au enda embomeni na kogue na inena ikari avo ke be aisora eto

inena na osa eoa ainge nombo enana osa eoa avo hotembasora. <sup>24</sup> Mama, embomeni inena nau ikari avo na pambuto iresona degi ai ta pambuto irora uje ere ona. Eto mitie enda irae kiti ta inena na osa ue usasa nau degi ta ika avo kiora uje ere ona. <sup>25</sup> Mama, umo ari javotoho ari embo, avo enda embomeni na umo kiae rate nanena umo kiona eto embomeni nau emina na inena ikae puvua avo ere kogora. <sup>26</sup> Nanena javo no avo enana ta degi hariketene ingera eto ehako kaiketo ano ingihiroro inena na osa ere oa eto osari avo enana ta jo enetitirou na enana ta jo ta iresona,” ainge Iesu na pari ena.

## 18

*Iesu andito umbua*  
(*Matthew 26:47-56, Mark 14:43-50, Luke 22:47-53*)

<sup>1</sup> Eto Iesu na pari enu irae enu ambotani umbuto umo Kidron embuto pambuto degi dagogotambu ai ta torea. <sup>2</sup> Eto degi amo Iesu na ambotani ga iji nei nei ainge arora uoi Judas, Iesu jenge indari embo, amina ere koguaetija <sup>3</sup> Avoeto pambuto priests pepeni te Pharisee embomeni te amita isoro ari embopo te eto embo okokose nenei te avo kiti umbuto horivo ijimbeto ki emi jigito degi ai ta pahuo <sup>4</sup> Iesu ta degi do ere puvutuhuna amo matu kito Iesu na pambuto isoro embo ta titi ta heteto ke einge ena, “Ungo embo amunurami jombure ere ove?” ainge enu, <sup>5</sup> ke mine einge ea, “Dago Iesu, Nazareth embo avo jombure ere ora,” ainge eo, “Namora,” ainge ena. (Eto embo Judas amo Iesu harikasi embo ta orohuta heteto mitina.) <sup>6</sup> Eto Iesu na, “Namora,” ainge ijinu, Isoro embomeni na ingito ku na atuna pambuto enda ta bea. <sup>7</sup> Eto Iesu na ke ehako, “Ungo amunurami jombure ere ove?” ainge enu enana na ehako, “Nango Iesu Nazareth embo avo jombure ere ora,” ainge eo, <sup>8</sup> Iesu na ke einge ena, “Ke matu etene ingeva amo namora te embomeni

namoga mitera erevi evu tapa pambare,” <sup>9</sup> Ke ainge ena amo Iesu na pari ta ke matu einge ena, “Inena embo nau ika avo vahai beto mane pambasuja,” ainge pari ta ena avoeto embo tapa pambara ena. <sup>10</sup> Eto Simon Peter amo amita asivo mitina avo kororoeto umbuto priest peni amita pure embo javo Malchus ta onde jeto havekenu <sup>11</sup> Iesu na Peter ta degi ke einge ena, “No asivo goru ta juruke. Na Mama na atungu erevi indona siriketo ikena amo mane indonote?” ke ainge Iesu na ena.

*Iesu Annas ta jo ta hetena*

<sup>12</sup> Eto isoro embopo te eto titi jigari embopo te embo okokose te na Iesu jigito ingeni punduto <sup>13</sup> umbuto pambuto embo javo Annas ta jo ta ikeo hetena. Eto iji amikote embo Caiaphas amo priest okose ena eto embo Annas amo Caiaphas ta imi avoeto Annas ta degi kiti pambuto ikeo hetena <sup>14</sup> Eto Caiaphas na Judea embomeni ta degi ke matu einge ena, “Embo tapa mane amburesora te embo tapa avoeto embo vahai amburesuja,” ke ainge Caiaphas na ena.

*Peter na Iesu kiae ke ena*  
(*Matthew 26:69-70, Mark 14:66-68, Luke 22:55-57*)

<sup>15</sup> Eto Simon Peter te ambotani nei vahai amite aingeto Iesu umbuto pahuo ambota pambuto ambotani vahai amo priest peni na matu kiari avoeto Iesu ga priest peni amita bande jo ta torenu Peter avo bande bokiri pe araha ta heteto mitinu <sup>16</sup> Ambotani nei vahai priest peni matu kiari avoeto jo ta torena amina bokiri simba ari pamone amita degi enu puvuto Peter enu jo ta torenu <sup>17</sup> bokiri simba ari kakara nei amina einge ena, “Embo emita ambotani nei amo umorete?” ainge enu Peter na, “Na avo manera,” ainge ena. <sup>18</sup> Eto jajemo unu bande pure embopo te bande simba ari embopo te aingeto i buju evikitina ai ta heteto eritie mitio Peter pambuto enana ga heteto i eriritinu



*Priest Peni na Iesu ganoka ena*  
(*Matthew 26:59-66, Mark 14:55-64, Luke 22:66-71*)

<sup>19</sup> Eto priest peni na Iesu na ke do ate poekitinu ingihe ambo ambo ea avo enu <sup>20</sup> Iesu na ke mine einge ena, “Eto ate poekari nau amo ondikari na ae rate araha tambuta eone embo tapa na ingiora amo ke kasari bande ta eto temple jo ta eto Judea embomeni torukeora amita degi eone ingiora amo ke nei do ondikae <sup>21</sup> Avoeto umo nau degi ta eto mane ingesoa te na ke do tapa eone ingiora amita degi eto ingijo,” ke ainge Iesu na enu, <sup>22</sup> isoro embo vahai Iesu ta engiti ta heteto mitina amina, “Umo do eto priest okose ta degi ke sapura ere?” ainge ijie Iesu ta tombu ta tenu <sup>23</sup> Iesu na ke mine einge ena, “Na ke sapura do etene ingea avo ejo ingone. Eto na ke sapura ae rate na sio tetea,” ainge enu, <sup>24</sup> Annas na Iesu ta ingeni pundua amite tapa ikenu priest okose javo Caiaphas amita degi pambuna.

*Peter na Iesu kiae ke ehako ena*  
(*Matthew 26:71-75, Mark 14:69-72, Luke 22:58-62*)

<sup>25</sup> Eto Simon Peter i eritie mitinu embomeni na, “Umo te tapa amita ambotani rete?” ainge eo, Peter na, “Na avo manera,” ainge enu, <sup>26</sup> Priest peni ta pure embo vahai amo Peter na embo onde jeto havekena amita javo vahai amina Peter ta degi ke einge ena, “Na umo te tapa embo amiga dagogo tambu ta kenete?” ainge enu. <sup>27</sup> Peter pero ue, “Na avo manera,” ainge ijinu ohora javone ena.

*Iesu na Pilate ta titi ta hetena*  
(*Matthew 27:1-2,11-14, Mark 15:1-5, Luke 23:1-5*)

<sup>28</sup> Eto ihote Caiaphas ta bande toto Iesu umbuto Rome embo ta koto ari oro ta pambua. Eto jarukari pondo indari iji puvuna avoeto ungo hahara ue ungo Rome ta oro ta torae pambae toa <sup>29</sup> Eto Pilate na araha ta puvuto heteto ke einge ena, “Embo emita sapura deire, avo evujo ingone,” ainge enu, <sup>30</sup> embomeni na,

“Embo emina ari sapura ae amo mane no ingeni ta ikaetera,” ainge eo <sup>31</sup> Pilate na ke mine einge ena, “Ungota ke pepeni na embo evi ganoka eto ingivu,” ainge enu, Judea embomeni na ke einge ea, “Embo tari amburari amo dagota degi ta taekarira,” ainge ea. <sup>32</sup> (Eto Iesu naingeto taro amburesuja amita ke Iesu na matu harikena. Eto embere einge emina enu Iesu ta ke ga inono ena.) <sup>33</sup> Eto Pilate na koto oro ta toreto Iesu jage enu puvunu, “Umo Judea embo ta king rete?” ainge enu. <sup>34</sup> Iesu na ke mine einge ena, “Ke umo erea amomo embo nei na etere ingito erete mo no hotembari na erete?” ainge enu, <sup>35</sup> Pilate na ke mine einge ena, “Na Judea embo manera te priests pepeni no eto embomeni no amina umo umbuto nau ingeni ta iketera, amo ari sapura no mo deire?” ainge enu, <sup>36</sup> Iesu na ke mine einge ena, “Na embo titi jigessonona te enda ta ari avo mane aisona. Eto na enda ta ‘king’ aetena amo embomeni nau na ereto isoro eto Judea embomeni ta ari emo taekaetera te na ‘king’ ainge manera,” ainge enu, <sup>37</sup> Pilate na, “Aravorate umo king rete,” ainge enu, Iesu na ke einge ena, “En, ke umo erea amo ke be. Na king ra te na avo ana nau aja na ingena. Eto na enda ta puvena amo ke be ano embomeni ingora puvena amo embo ke be ingari haite amina ke nau ingesuja,” ainge enu. <sup>38</sup> Pilate na, “Ke be mo deire,” ainge ijie araha tambuta pambuto Judea embomeni ta degi ke einge ena, “Eto na embo emita sapura tambae etena

*Iesu taro amburoja ke ea*  
(*Matthew 27:15-31, Mark 15:6-20, Luke 23:13-25*)

<sup>39</sup> Avoeto ungo Judea embo ta jarukari pondo iji te amo tipura embo eone tambuta pambuora avoeto ungo Judea embo ta king erevi ano tambuta pambaute?” ainge enu, <sup>40</sup> embo tapa na gagaha eto ke einge ea, “Embo avo mane

tambuta pambasuja te embo Barabbas avo ejo tambuta pambai,” ainge ea te Barabbas amo pegene embora.

## 19

<sup>1</sup> Eto Pilate na enu Iesu umbuto pambuto esi gamba na ejembeto teo irae enu <sup>2</sup> Rome ta isoro embopo na esi pepe te avo umbuto horoveto siro ta asuketo bo pangari ikeo uhu ta evunu <sup>3</sup> puvuto amita degi ke einge ijie urumbea, “Oro, Judea embo ta king,” ainge ijie tombu ta tea. <sup>4</sup> Eto Pilate na tambuta puvuto Judea embomeni ta degi ke einge ena, “Kivu, na embo erevi pehumba etena te amita sapura do tambae avoeto ungo na kiova umbuto tambuto puvena,” ainge enu <sup>5</sup> Iesu na bo pangari te siro pohu pepete asukena amite tapa araha ta puvuto hetenu Pilate na ke einge ena, “Embore erevira, kivu,” ainge ijinu <sup>6</sup> Judea ta priests pepeni te embo pepeni te na kito, “Cross ta te, Cross ta te,” ainge gagaha eto eo Pilate na, “Na pehumba etena te amita sapura tambae etena avoeto ungo eonga umbuto cross ta tevu,” ainge enu, <sup>7</sup> Judea embomeni na, “Dagota ke pepeni mitia amo eingera, ‘Na God ta Meni ra,’ ainge eora amo dago na teore ambuora avoeto taro amburesuja,” ainge eo, <sup>8</sup> Pilate na ingito joru peni vahai be ue, <sup>9</sup> koto ari oro ta toreto Iesu ta degi ke einge ena, “Umo nainge eto puvurari re?” ainge enu Iesu na ke mine ae enu <sup>10</sup> Pilate na ke ehako einge ena, “Umo nau degi ta ke mine mane aote? Eto ari nau amo eingera, umo ano cross ta tasora eto ano tambuta pambasoa amo na inonora te umo kiaerate?” ainge enu, <sup>11</sup> Iesu na ke mine einge ena, “Eto God na no degi ta sovera ikae amo nau degi ta ari neite neite mane aetea, te embo na umbuto ingeni no ta iketija embo amita ari sapura amo no ainge mane rate pajire be ra,” ainge Iesu na ena.

<sup>12</sup> Eto Pilate na Iesu ta ke avo ingito au tambuto pambaja uje ena te Judea embomeni na hori gagaha ijie ke

einge ea, “Embo emina king ke ijie Caesar ere urumbitia avoeto inena embo erevi ao tambuto pambasuja amo umo Caesar ta toho manera,” ainge eo, <sup>13</sup> Pilate na ingito Iesu umbuto embo okose arumbeto pehumba ari degi amita javo, ‘Atara beukari’ ai Iesu enu arumbena (Judea embomeni ta ke na ‘Gabbatha’ eora) <sup>14</sup> Eto jarukari pondo evito asora avoeto nununga ari iji 12 o’clock unu ari ainge amo ea. Eto Pilate na Judea embomeni ta degi, “Ungota king re erevira,” ainge enu, <sup>15</sup> mine einge ea, “Umbuto pambu! Umbuto pambu! Cross ta te amburoi!” ainge eo Pilate na, “Na ungota king avo cross ta tana erevete?” ainge enu priests pepeni na einge ea, “Dago ta king nei irae Caesar vahaira,” ainge ijie ngahia uo <sup>16</sup> Pilate na cross ta tara enana ta ingeni ta iketo tona.

*Iesu umbuto cross ta tea  
(Matthew 27:32-44, Mark 15:21-32, Luke 23:26-43)*

<sup>17</sup> Eto isoro embopo na Iesu umbuto cross ikeo umbuto da ta eto pambuto degi javo, ‘Siro Popo’ amo Judea embo ta ke na ‘Golgotha’ ke eora ai pambuto <sup>18</sup> Iesu orohuta teto embo nei ingeni anga ta teto embo nei ingeni be ta aingeto cross eonga eonga ta tea <sup>19</sup> Eto Pilate na ke einge kaeto cross ta tena amo, “Judea embo ta king emo da Nazareth embo Iesu ra.” <sup>20</sup> Eto Pilate na ke kajena amo Judea ke na eto Rome ta ke na eto Greek ke na kajena amo da hoita mane avoeto Judea embomeni isapamane na eteketo kito <sup>21</sup> Judea embo ta priests pepeni na Pilate ta degi pambuto ke einge ea, “Inena ‘Judea embo ta king’ kaetea avo toto ‘amina na Judea embo ta king ra ainge ena’ avo kajae etea,” ainge eo, <sup>22</sup> Pilate na ke einge ena, “Nanena kaetena avo iresuja,” ainge ena.

<sup>23</sup> Eto Iesu cross ta teo irae enu isoro embo tapa 4 amina Iesu ta bo asukari avo kateketo vahai vahai umbua eto bo nei vahai jo ta asukari tunga ta eto beto utu ta ari

amo ihirae rate jorereto kajari avo ungo eonga ke mine ara eto einge ea. <sup>24</sup> “Ungote mane osesekasora te ituha koso te tuho te jigoro embo amuna ituha koso avo umbasuja amo embo amina bo avo umbasuja,” ke ainge amo matu kajari mitia amo einge ra, “Embo amuna bo nau amo kateketo ituha koso te tuho te jigoro goruketo umbasuja embo amina umbasuja,” ainge matu kajari mitia, avoeto inono ta isoro embo na ea. <sup>25</sup> Eto Iesu cross ta teo cross engiti ta amita e te amita e ta jao javo Mary amo embo Clopas ta ae amite da Magdala pamone Mary te aingeto heteto mitio <sup>26</sup> Iesu na amita e kito amita tunga humbari ambotani vahai amiga mitinu kito e ta degi ke einge ena, “Pamone, no meni erevira, <sup>27</sup> eto embo no aja erevira,” ainge enu ambotani vahai amina ingito Iesu ta e avo umbuto amita bande ta pambuto simba ere uatija.

*Iesu ambuna*  
(Matthew 27:45-56, Mark 15:33-41, Luke 23:44-49)

<sup>28</sup> Eto ari tapa do puvuresuja amo irae ere ua erevira ainge Iesu na kito God ta ke matu kajari ta mitia avo au inono aja ke einge ena, “Na umu ujeje ere ua,” ainge enu, <sup>29</sup> enana na ingito wine tigami te ovu jo ta pevitari mitina avo hukaru koru ainge javo ‘hyssop’ amina wine ta jauketo Iesu ta pe ta jigio <sup>30</sup> indito ke einge ena, “Aravora, irae etija,” ainge ijie amita siro joreinge unu hoenge irae enu ambuna.

*Iesu ta patita ta ki na kajena*

<sup>31</sup> Eto evito amo Judea embomeni ta jarukari pondo indesora iji amo jangu indari iji nombo avoeto embo 3 amita hamo cross ta toaro iresora avo aravora ae eto Judea embomeni na Pilate ta degi, “Embo utu teto popojeketo umbuto pambarote,” ainge eo, <sup>32</sup> Pilate na amita isoro embomeni ikenu pambuto embo heriso Iesu ga cross ta tea avo teto utu poeketo pambuto embo nei teto utu poeketo pambuto <sup>33</sup> Iesu kia amo

matu ambunu kito utu poekae rate <sup>34</sup> isoro embo vahai na patita ta ki na kajenu sasaga te umu te bona. <sup>35</sup> Eto na titi nau na kia embo amina erena avoeto ke nau amo ke be perera eto ungo tapa na kito ke be avo erena <sup>36</sup> Ari emo God ta ke matu kajari ta mitia avoeto inono ta etija. “Eto amita popo tapa amo nei mane taro poekasuja” ainge kajari mitia <sup>37</sup> eto nei amo “Embo patita ta kajea avo embomeni na kogue iresora.” ke ainge matu kajari mitia.

<sup>38</sup> Eto embo Joseph da Arimathaea embo amo Iesu ta ambotani rate Judea embo oju ue ondikari na Iesu ambo ambo ena, embo amina pambuto Pilate ta degi Iesu ta hamo umbasi penunu enu Pilate na aravora ainge enu umbuto pambuna

*Iesu kovea*  
(Matthew 27:57-61, Mark 15:42-47, Luke 23:50-56)

<sup>39</sup> Eto embo Nicodemus amo matu mumete Iesu ta degi puvuna amite tapa jeune mune te (javo ‘myrrh’ te ‘Aloes’ te) avo umbuto Iesu ta hamo jigesu puvuna amita bouka ta teka amo 50 kilos ainge avo umbuto puvuna. <sup>40</sup> Eto Iesu ta hamo umbuto jeune mune te amiga tapa bo koso vahai ai ta iketo togea amo Judea embomeni ta ari ainge eora avoeto ea <sup>41</sup> Eto Iesu cross ta teo ambuna amita degi engiti amo i vuji jajavotoho irari degi amita jo ta panga to eha kovea amo embo kovae kiti ta Iesu ikeo serekena <sup>42</sup> eto evito amo Judea embomeni ta pondo indesora sirika burika ari iji te Iesu umbuto hoi ta pambari inono ae avoeto asa ta kovea.

## 20

*Iesu ta hamo use jo ta iraera*  
(Matthew 28:1-8, Mark 16:1-8, Luke 24:1-12)

<sup>1</sup> Eto jangu indari iji irae enu iho ungate da Magdala pamone javo Mary na Iesu ta panga use ta pambuto atara na pe ahurekea avo hiriketo pambari kito <sup>2</sup> tutuveto

pambuto Simon Peter te eto ambotani nei Iesu na osa ena amita degi ke einge ena, “Bada ta hamo amo use ta iraera te umbuto pambuto nainge iketere avo nango kiaera,” ke ainge enu, <sup>3</sup> Peter te ambotani nei amite aingeto use kesi <sup>4</sup> tutuveto pahue ambotani nei amina Peter seniketo tutuveto use ta kiti pambuto <sup>5</sup> panga jo ta anembeto bo ‘linen’ na ari amina hamo togea avo enda ta beto mitinu kina te jo ta toraera, <sup>6</sup> te Simon Peter na ambota puvuto use panga jo ta toreto bo enda ta beto mitina avo kina <sup>7</sup> eto bo nei Iesu ta siro togea amo eonga egoveketo degi nei ta ikeo mitina avo kina. <sup>8</sup> Eto ambotani nei kiti use ta pambuna amite tapa toreto kito ke be ena. <sup>9</sup> (Rate Iesu vasiri te erasuja amita ke God ta ke ta kajari avo amikote amo hotembae ea.) <sup>10</sup> Eto ambotani heriso amo egerembeto bande ta pambua.

*Iesu na da Magdala pamone Mary ta degi puvunu kina*

*(Matthew 28:9-10, Mark 16:9-11)*

<sup>11</sup> Eto Mary na use pe araha ta heteto si ijie mitimite use ta anembeto <sup>12</sup> Anera heriso bo parara asukari amo Iesu ikeo serekena ai ta embo nei siro hena ta arumbena eto embo nei utu hena ta arumbena aingeto mitio kogunu <sup>13</sup> anera heriso amina pa amita degi ke einge ea, “Pamone umo do eto si ere?” ainge eo pa amina, “Nau Bada umbuto nainge iketere avo na kiae ra,” ke ainge ijie <sup>14</sup> ahereketo Iesu heteto mitinu kina amo Iesu rate be ijuketo kiae unu <sup>15</sup> Iesu na amita degi ke einge ena, “Pa, umo si ijie amunurami jombure ere oe?” ke ainge enu Mary na embo avo i buji simba ari embo ke ijie ke einge ena, “Embo, inena Iesu ta hamo amo umbuto pambuto nainge iketo kito avo ejo umbane,” ainge enu, <sup>16</sup> Iesu na, “Mary,” ke ainge enu Mary na ahereketo kon eto kito, “Rabboni,” amo Hebrew ta ke na, “Ate Poekari embo,” avo eto enu, <sup>17</sup> Iesu na, “Na Mama ta degi pambae avoeto na mane jigeso, te pambuto nau namei kamei ta degi Mama nau

eto enana ta Mama eto God nau eto enana ta God amita degi egerembeto pambasi ere ona avo ejo ingore,” ainge enu, <sup>18</sup> Mary na egerembeto pambuto Bada kina eto amina ke tapa do enu ingina avo ambotani ta degi enu ingia.

*Iesu na amita ambotani ta degi puvunu kia*

*(Matthew 28:16-20, Mark 16:14-18, Luke 24:36-49)*

<sup>19</sup> Eto Sunday ture mume unu Iesu ta ambotani na Judea embo okokose oju ue bande bokiri iketo jo ta mitio Iesu na enana ta orohuta irerembeto puvuto, “Peka ungota degi iresuja,” ke ainge eto <sup>20</sup> amita ingeni te patita te avo enu kito enana ta Bada avo kito tunga javotoho ue osa pajire be ea. <sup>21</sup> Eto Iesu na, “Peka ungota degi iresuja, eto na Mama na iketei puvena ainge nombo nanena ungo ikano enda tapa ta pambasova,” ainge ijie <sup>22</sup> enana ta hamo ta pe honenge hukitie ke einge ena, “Ungota jo ta Ahihi Otohu umbuvujo <sup>23</sup> Eto ungo embo ta ari sasapura hotembeto toasova amo God na ainge hotembeto toasuja, te ungo na embo ta sasapura hotembeto toae asova amo ainge God na mane hotembeto toasuja.”

*Thomas na Iesu kito ke be ena*

<sup>24</sup> Eto Iesu ta ambotani <sup>12</sup> rate vahai javo Thomas amita javo nei Didimus amo Iesu puvuna amikote amo enana ga irae avo eto <sup>25</sup> ambotani na, “Nango Bada kera,” ainge eo Thomas na, “Na amita ingeni ta ikoko na tetera amita pupuho avo titi na kogue ingeni nau na tame eto patita ta amo tame aisona, te ainge ae amo na ke be mane aisona,” ainge enu <sup>26</sup> hura vahai irae enu Thomas ambotani nei uhoho ga bande jo ta bokiri iketo mitio Iesu enana ta jo ta irerembeto heteto, “Peka ungota degi iresuja,” ainge eto, <sup>27</sup> Thomas ta degi ke einge ena, “Nau ingeni pupuho kogue tame eto no ingeni jujuruketo nau patita tame eto umo ke be ae ere oa



avo toto na ke be ejo,” ainge enu, <sup>28</sup> Thomas na, “Umo nau Bada eto nau God ra,” ainge enu, <sup>29</sup> Iesu na ke einge ena, “Umo na kogue ke be erea te embo na na titi na kiae rate na ke be aisuja embo amina tunga javotoho aisuja.”

### *John na do eto ke kajena amita ke*

<sup>30</sup> Eto Iesu na God ta sovera avo umbuto ari neite neite enu ambotani na kia amo book emita jo ta amo kajaera, <sup>31</sup> te ke erevi ere kaitora amo ungotenau orekari embo God ta Meni be Keriso amo embo nei mane rate Iesu avo ungo kito ke be ava ere kaitora amo ungo Iesu kito ke be ijie vasiri be umbasova.

## 21

### *Umo ireremba javo Tiberias amita hora ta Iesu na ambotani ta degi puvunu kia*

<sup>1</sup> Eto amita ambota Iesu na umu ireremba javo Tiberias amita hora ta Iesu puvuna ambotani na kia amo eingera, <sup>2</sup> Eto Simon Peter te Thomas amita javo nei Didimus amite Galilee enda ta da Cana embo javo Nathanael te Zebedee ta meni heriso amite eto ambotani nei heriso amite aingeto vahaita mitio <sup>3</sup> Simon Peter na, “Na umu o timbasi pambasona,” ainge enu ambotani amiga mitia amina, “Dago umote pambasora,” ainge eto mumete pambua te o umbae uo <sup>4</sup> iho bujitinu Iesu na puvutu umu hora ta hetena te embo nei ke ijie uo, <sup>5</sup> Iesu na jage eto, “Nau namei kamei ungo o umbevete?” ainge enu, “Dago o umbae ra,” <sup>6</sup> ainge eo Iesu na, “Ungota hovororo avo e nga be hena ta ikevujou beau o umbuvujo,” ainge enu ikeo benu o isapamane ombunu jigea te bitari inono ae enu, <sup>7</sup> ambotani vahai Iesu na osa ena amina, “Embo emu Bada ra,” ainge Simon Peter ta degi enu, Peter bo ujuketo mitina avo bo umbuto asuketo umu ta eheruva eto bovunu, <sup>8</sup> ambotani nei uhoho amo e nga tavitie hovororo o na pevitina avoeto jigito goruketo umbuto hora

ta pambua amo degi koso mane ‘100 meters’ ainge ai ta pambua.

<sup>9</sup> Eto enana hora ta bitito bread te o borari amo i ingotu evikitina amita hamo ta mitinu koguo <sup>10</sup> Iesu na ke einge ena, “Ungo umu o umbeva avo heriso umbuto have,” ainge enu, <sup>11</sup> Simon Peter na e nga ta bitito hovororo gorukenu hora ta bitinu o pepeni papeni tapa 153 umbua avo kina eto o isapamane rate hovororo perarae ena. <sup>12</sup> Eto Iesu na, “Ungo huma iho donda indavu,” ainge ena. Eto ambotani na Iesu amo matu kia te ehako umu amunure ainge eto ingesi uje ea te me enu toa. <sup>13</sup> Eto Iesu na i amisa ai ta imite o borari te bread te umbuto ambotani ta ikenu india. <sup>14</sup> Eto Iesu na ambuto vasiri te ereto ambotani ta degi puvunu kia eto ehako puvunu kia eto ehako puvuna emina nei heriso nei vahai ena.

### *Iesu na Peter ta degi ke ena*

<sup>15</sup> Eto enana indio irae enu Iesu na Peter ta degi ke einge eto ingina, “Enanana na osa isapa ere ora te inena na osa peni vahai ere oete,” ainge enu, Peter na, “Bada, na umu osa ere ona amo umu kiarira,” ainge enu Iesu na, “Aravora te umu nau o ‘sheep’ meni avo simba ejo,” ke ainge eto ehako eto ingina <sup>16</sup> “John ta meni Simon, umu na osa ere oe?” ainge enu, Peter na, “Bada na umu osa ere ona amo umu kiari ra,” ainge enu Iesu na, “Umu nau o ‘sheep’ simba ejo,” ainge eto <sup>17</sup> ehako, “John ta meni Simon umu na osa ere oe?” ainge enu ke vahai avo nei heriso nei vahai ainge ena avo Peter na ingito tumo ue ke einge ena, “Bada, ari te ke te tapa amo umu kiari avoeto na umu osa ere ona amo umu kiarira,” ainge enu Iesu na amita degi ke einge ena, “Aravora, umu nau o ‘sheep’ undujo. <sup>18</sup> Eto na no degi ta ke be erena. Umu meni isapa ta amo uhu ta pupuri umu eonga tigitu uje no ue ere pahuaetea te kerembo ue no ingeni jujurukitiro amo embo nei na no pupuri uhu ta tigitu umu pambari uje ae asoa degi ai ta umu jigito

umbuto pambasora,”<sup>19</sup> (ke amita be amo Peter na naingeto ahurou God ta degi usasa pambasuja avo Iesu na harikena.) ke ainge eto Iesu na, “Umo na ambo ambo e,” ainge ena.

*Ambotani nei amita degi ari do puvuresuja*

<sup>20</sup> Eto Iesu te Peter te pahumite Peter na overeketo ambotani vahai ambota puvutuhunu kina amo Iesu na osa ena embo amina pondo tutumota indie mitio Iesu ta mindi ta siro tembeto, “Bada umo embo amuna harikau isoro embo na umbaro.”<sup>21</sup> Ainge ena embo avo Peter na kito, “Bada embo emita degi do puvurou?” ainge enu,<sup>22</sup> Iesu na ke mine einge ena, “Embo amo teho mitirou na pambuto ehako egeremba-sona te amo osaga no manera te umo na ambo ambo ejo,” ke ainge ena<sup>23</sup> amo sigeto pambunu ambotani tapa ingito, “Ambotani vahai amo mane sari aisuja,” ainge hotembea te Iesu na Peter ta degi, “Ambotani amo mane sari aisuja,” ke ainge ae ra te, “Teho mitirou puvuresona,” ke ainge ena.<sup>24</sup> Ambotani embo amina ke tapa erevi hande ere umite book eremita jo ta kajena. Eto dago kogora ke amo ke be pere ra.

*Ke tutumo*

<sup>25</sup> Eto Iesu na ari neite neite tapa ere uaetija avo siriketo tapa ka-jaetera amo books amina enda tapa enete aeteite aetija.

## APOSTERO TA ARI

<sup>1</sup> Oio Theophilus, ahari kiti kaitana amo Bada Iesu ta vasiri te ate poekari te kaitana. <sup>2</sup> Eto Iesu na amita ambotani siriketo umbuto God ta Ahihi Otohu ta sovera na ate poekari ke nei nei iketo God ta degi ta bitito pahaja amita ke kiti kaitana. <sup>3</sup> Eto Bada Iesu i atahu ta teo ambuna ehako vasiri te hoena iji tapa 40 amita jo ta iji nei nei Iesu na amita apostel ga arumbeto hihi tirina. Eto enana Iesu kito amita ke ingito ke einge ea, “Ke be, God ta Meni Bada Iesu vasiri te hoetija” ainge ea. Eto Iesu na enana ta degi God na embomeni naingeto amita toho umbuto enana ta King asuja amita ke avo ate poekena.

<sup>4</sup> Eto iji vahai, amina ke einge ena, “Ungo Jerusalem jo ta eto mane pambasova rate nau Mama ta hande noma kajena avo simba evujo. <sup>5</sup> Na matu ke ijiena amita be amo John na umo na bapataito uija rate iji isapa eto God na amita hande ikau ungo Ahihi Otohu na bapataito aisuja.” ke ainge Iesu na ena.

### *Iesu na Utu i ta bitina*

<sup>6</sup> Eto iji nei enana vahaita pahue enana Iesu ta degi ke einge eto ingia, “Bada, inena oroho Roman embopo ta simba ari taeketo nango eonga independance ikaote?” ainge eo <sup>7</sup> Iesu na ke mine einge ena, “Nau Mama na iji ikarira te ungo mane kiova, <sup>8</sup> rate Ahihi Otohu ungo ta hamo ta puvurou ungo sovera peni vahai umbuto nau amburari te ehako vasiri te erari amita ke sovera eto Jerusalem jo ta eto Judea ta, eto Samaria ta, eto enda tapa ta eto ke hande asova.” <sup>9</sup> Eto ke ainge enu irae unu Bada Iesu na bitito Utu ta pahunu amita ambotani arerembeto koguo oje na ahurekena. <sup>10</sup> Eto enana kogue Bada Iesu ehako kesi ue mitio embo heriso asukari parara te enana ta jo ta irerembeto puvuto <sup>11</sup> ke einge ea “Galilee embopo ungo

do ue arerembeto utu kogue miteve? Iesu na Mamo ta degi pambija ehako ainge nombo ambota puvuresuja.”

### *Judas ta hondate naingeto umbua*

<sup>12</sup> Eto tiri Olives amo Jerusalem engitita erevi ea. Eto enana tiri ta eto <sup>13-14</sup> Jerusalem utu na puvuto irari bande jo i ta bitito vahaita pari ea, embo ta javo amo Peter, te John te James te Andrew te Philip te Thomas te Bartholemew te Matthew te James, amo embo Alphaeus ta meni te, Simon amo Roman embopo titi jigari uje ae ena, eto embo nei Judas amo embo James ta meni te Iesu ta namei kamei te pamone nei nei, eto pamone vahai amo Iesu ta e ra. <sup>15</sup> Eto iji tapa pari ere uaetera amita jo ta iji vahai embomeni tapa 120 pari ue mitio <sup>16</sup> (v 16,20) Peter na ereto ke einge ena, “Nau namei kamei iji matu be matu Ahihi Otohu na King David ta degi ke enu kajena amo Judas na Bada Iesu umbuto kitoho embopo ta ingeni ta iketo amita pure toasuja avo eto tona, amita ke amo King David na Psalms ta kajari einge mitia amo ‘Irari da amita embo na mane torasora rate amo teho iresuja,’ eto ke nei amo, ‘Amita pure embo nei na asa umbuto pure asuja’ ainge King David na kajena. <sup>17</sup> Eto Judas amo Iesu na siriketo umbuna avoembo dago apostel vahaira. <sup>18</sup> Eto isoro embopo na Judas ta koro ikeo umbuto pambuto enda umbuna eto amita jo ta pambuto tiambueto beto oti kaeto perara enu se arahata ijejembeto puvuna, <sup>19</sup> avo eto amita duru embo tapa na sau sau ingito enda javo sasaga enda ikitara. <sup>20</sup> (-) <sup>21</sup> Avoembo oroho ungotena Judas ta asa ta embo nei siriketo umbasora eto amina Iesu ta irari amita ke be avo ungotenamote vahaita eto hande asuja. <sup>22</sup> Embo amo Bada Iesu ta bapataito ari iji te eto pambuto amita Utu ta bitari iji te dago ga vahaita uija avo orereto umbasora.” Ainge enu <sup>23</sup> embo tapa na embo heriso ate kitira ea, embo heriso amita javo Joseph Justus te Matthias

te ra. Joseph Justus ta javo nei amo Barsabbas ra. <sup>24</sup> Eto ate kitira eo, enana embo javotoho sirikasi uje eto God na hondate aja pari einge ea, “Bada, embo Judas na amita ari sapura ta hajire umbuto toho ta da ta pambija, <sup>25</sup> eto inena embo tapa ta jo kiarira avoeto no uje ejo ingore, no pure embo be siriketo umbare” ainge pari eo <sup>26</sup> ituha tuho te koso te jigio Mathias inono ena avo eto amina itiketo ambotani 11 ga pure ena.

## 2

### *Ahihi Otohu ta puvurari*

<sup>1</sup> Eto Iesu ta amburari vasiri te hoena hura tapa 7 amita ambota Judea embopo ta pondo iji javo Pentecost puvuna. Amita iji te Iesu ta ambotani vahaita mitio <sup>2</sup> asavi peni vahai be pisara ainge puvuto bande ta toreto bande jo enetena. <sup>3</sup> Eto i peri ta kiari ainge perimbeto puvuto embo vahai vahai ta siro ta hetena. <sup>4</sup> Avoeto embo vahai vahai embo da nei nei ta ke jigama ea amita be amo Ahihi Otohu na embo vahai vahai ta jo ta toreto siro hirikenu enda nei nei ta ke avo jigama ere uatera. <sup>5</sup> Eto Judea embopo God osa ere uatera Pentecost pondo asi enda tapa ke nei te nei te jigama ue puvuto Jerusalem mitiaetera. <sup>6</sup> Eto mitie asavi ingito Iesu ta ambotani ta bande ta asavi ta be kesi pambua. <sup>7</sup> Eto enana ta ke eonga eonga Iesu ta ambotani ta pe ta ijio ingito ti kakambuketo mani mini eto einge ea, “Amita be amo deire? <sup>8</sup> Enana Galilee embopora rate enana dago enda nei nei ta ke na erera. <sup>9</sup> Dago Parthia embopo te Mede te Elamites te Mesopotamia enda ta embopo ra te Judea embopo te Capadocia te Pontus te Asia te <sup>10</sup> Phrygia te Pamphylia te Egypt te Cyrene ke nei nei enda Libya jo ta ra te <sup>11</sup> Rome enda ta eto amo Judea embopo be ra te ke nei embopo amo Judea ekalesia embopo ambo ambo ere ora te Crete embopo te Arabia embopo te tapa aingeto mitia rate

dago God ta ari nei te nei te amita ke dago ta ke eonga eonga embo vahai vahai na ere ingihera.” ainge eo <sup>12</sup> ti kakambuketo mani mini ue “amita be amo deire” avo mine ara eto ea. <sup>13</sup> Rate embomeni nei nei na ganini ari ke ijie eto einge ea “Enana wine indera avoembo titivi oi ere ora,” ainge ea.

### *Peter na Judea embomeni ta degi ke ena*

<sup>14</sup> Eto Peter bande jo ta ambotani 11 ga ereto heteto embo tapa bande ahone ta mitia amita degi ke einge ena, “Nau Judea embomeni da nei nei ta pambuto mitovova egerembeto puveva amite Jerusalem embopo te onde katasona ingivujo. <sup>15</sup> Ungo embo nei nei na embo pamone erevi titivi ari ke ereva. Amo ke sokova ra. Emo ihotera eto embomeni ihote mane titivi euja. <sup>16</sup> Ainge mane ra. Ungo iho emo ere kogova amo God na ke eremita amita peroveta Joel ta ikenu einge kajena, <sup>17</sup> ‘God na einge ena, iji ambota na nau Ahihi Otohu embo tapa ta hamo ta overekasona eto ungota meniundi na iji ambota ke asora eto ungo ta singapura na God ta ke be eture ta kesora eto ungo ta kerembo embopo na eture asora. <sup>18</sup> Eto Ahihi Otohu nau hondate ari embo pamone ta degi ambo ta ke ikau asora. <sup>19</sup> Eto na ari sovera Utu te enda te aisona amo sasaga te i iposi te ainge aisona. <sup>20</sup> Eto iji seikano mume aisuja. Eto hariga na gaieto sasaga ainge asuja. Eto amita ambota iji nombo be javo Bada ta Iji puvuresuja <sup>21</sup> rate iji aramite embo amuna God ta degi jage au God na hondate eto umbasuja.’ Ainge God na enu peroveta Joel na kajena.

<sup>22</sup> Israel embomeni ungo ke ingivujo, God na Iesu Nazareth Embo ta degi sovera ari ikenu umbuto ungota orohuta heteto vasiri neite neite ena amo God na embomeni ta degi amo amita pure ari embo be kiora ena aravo ungo matu kiarira. <sup>23</sup> Be amo God na amita uje ari ke



matu ena avo eto uija amo ungo na Iesu umbuto Roman embopo ta ingeni ta iketeve umbuto i atahu ta tetere ahaja, amo ungo ta ingeni na eteva. <sup>24</sup> Rate God na enu vasiri te hoitaja amita be amo embo amita sovera isapamane avo eto God na use aherekenu vasiri te hoitaja. <sup>25</sup> Emita ke amo David na einge ena, 'Ke be avo Bada Mamo te iriuja eto hondate euja eto God ta sovera na jigei mitena <sup>26</sup> avoeto na tunga javotoho ere ona. Nau ivivi na osa ari ke God ta degi erena. <sup>27</sup> Eto na ambuto pahue osaga mane kesona. Umo nau ahihi embo ambuvujekari degi ta mane toaso avo eto no pure ari embo ta hamo mane sari aisuja <sup>28</sup> rate nau hoenge inena umbuto nau degi ta ikao egerembasuja. Eto na no degi ta pambuto tunga javotoho asona.' ainge King David na ena.

<sup>29</sup> Nau namei kamei ungo be hotembevujō, eto na King David na embo ta ke do kaitana avo ano ingesova amo ke be eto David na ambunu panga to ta ikeo mitie sari ena, eto panga amo da ei ungotenamote mitia. <sup>30</sup> Rate David amo perovetara eto God ta noma kajena amo amina ingina. God ta noma kajena amo David ta ambo be ta amita ahije vahai na embo hondate eto David ta noma jigesuja. <sup>31</sup> Avoembo David ta ke be kajena amo David na amita ahije amo embo ta hondate embo hoita kito amita ke kajena. Ke kajena amo embo ta hondate embo ta ahihi na amburari embo ga mane iresuja eto amita hamo mane sari asuja. <sup>32</sup> Embo ta hondate embo amo Bada Iesu ambuto ehako vasiri te hoena avo ungotena kiarira. <sup>33</sup> Eto amina God ta degi pambuto God ta engitita arumbeto pure ere ua. Eto ke matu ikena avoembo Iesu na Ahihi Otohu iketei beto puvija. Eto amita vasiri amo ungo ere ingiheva eto ere kogova. <sup>34</sup> Be amo King David Utu ta bitae rate ke nei einge kajena, 'God na nau hondate embo ta degi ke einge ena, <sup>35</sup> 'Umo degi nombo be nau ingeni be ta arumbeto mitima

eto na no isoro embopo andirono jamopo asora.' ainge enu David na kajena. <sup>36</sup> Avoeto na ungo Israel embomeni tapa ta degi ke tambueto ano ingivujo. Embo Iesu ungo na i atahu ta teteva amo ungotenau hondate embo aravo God ta Meni Bada Iesu." Peter na ke ainge enu <sup>37</sup> embomeni tapa na jo peni vahai be eto Peter te ambotani tapa ta degi ke einge ea, "Namei kamei, dago do aro?" ainge enu <sup>38</sup> Peter na enana ta degi ke einge ena, "Ungo embo vahai vahai na ungota ari sasapura toto God ta degi egerembeto Iesu ta javo ta bapataito aisova eto God na ungota ari sasapura jenambu asuja eto God na amita Ahihi Otohu ungota degi hande aisuja. <sup>39</sup> God na ungote ungo ta meniundi te enda embomeni tapa avoembo ke ena. Tapa amuna God na jage aisuja amo ke amita ra."

<sup>40</sup> Ainge eto Peter na ke neite neite ena, "Ungo ari sasapura embomeni avo toto ungo oenga orekevu," avo ena. <sup>41</sup> Eto embomeni tapa 3,000 ainge Peter ta ke agi eto vahaita eto bapataito ea. <sup>42</sup> Eto enana na God ta ambotani ta ate poekari ke avo ingito agi eto vahaita God hotembitie indie pari ere uatera. <sup>43</sup> Eto ari javotoho neite neite avo God ta ambotani na uo embomeni na joru ue ke mine ari irae ea.

### *Iesu ta ambotani ta irari*

<sup>44</sup> Eto God ta ambotani tapa na enana ta hajae vajae umbuto vahaita iketo inono inono umbuto mitiaetera <sup>45</sup> eto donda nei ombuto koro umbuto donda ambu embopo ta ikea. <sup>46</sup> Eto enana jo vahai eto iji tapa Temple ta torukitiaetera rate bande jo eonga eonga ai indito osa osa te hande te indari mine inda ere uatera. <sup>47</sup> Eto God jakeka ijioire embo tapa na enana ta ari kogue tunga javotoho ea. Eto iji vahai vahai God na embo oreketo enana vahaita ikerekena.

## **3**

*Peter na popora embo kondena*

<sup>1</sup> Eto ture nei 3 o'clock pari ari iji amikote Peter te John te Temple ta pahuo <sup>2</sup> popora embo avo da pe ai ikeora amo e na ingari ta eto popora ena avo embo na umbuto da pe javo 'kiari javotoho' ai koro penunu aja ikeo mitinu <sup>3</sup> Peter te John te temple jo ta torasi pahuo kito koro penunu ena. <sup>4</sup> Eto Peter te John te titi iketo kito Peter na ke einge ena, "Tambueto dago ki," ainge enu <sup>5</sup> koro umbaja ari ke hotembeto arerembeto kogunu <sup>6</sup> Peter na einge ena, "Nau degi ta gold te silver te irae rate nau degi ta do mitia avo ikasona, Iesu Keriso Nazareth embo amita javo ta ereto hete," <sup>7</sup> Ainge eto Peter na amita ingeni be ta jigito gorukenu hetenu amita utu te utu ahuma te arinako eto ivo ena. <sup>8</sup> Matu popora embo amo osa osa eto jaruki jaruki eto enana ga temple jo ta pambuto God jakeka ena. <sup>9-10</sup> Popora embo amo matu amina da 'kiari javotoho' ai penunu ere ijiaetija eha kondeto God jakeka ena avo embomeni na kito mani mini eto popora embo kondena amita be avo enana mine umbae ea.

#### *Peter na Temple jo ta ke ena*

<sup>11</sup> Eto embomeni tapa tutuveto kege ganini te aruketo Solomon ta arara ta puvuo embo eha kondari amina Peter te John te osa osa ue jigito mitinu <sup>12</sup> Peter na embomeni ta degi ke einge ena, "Ungo do eto arukitie puvuto dago kon kon ere ove? Ungo hotembiteva amo nangota ivo o nangota kiari na embo kondetija avo hotembitevete? <sup>13</sup> Ungo Israel embomeni ra, eto amo Abraham ta Isaac ta Jacob ta God amo ungo ta mamamane matu sasari ari amita God na amita pure ari Meni Iesu ta degi sovera ari te otohu te ikitaja. Embo nei mane Iesu avo ungo na Pilate ta ingeni ta iketo totova amo Pilate na tambuta pambaja ke ijija <sup>14</sup> rate ungo na uje ae ueva amo embo javotoho embo otohu avo ungo tambuta pambaja uje ae eto ungo embo tenu ambuna embo

avo tambuta pambaja penunu ijieva. <sup>15</sup> Amo vasiri ikari embo avo ungo na teteve ambija rate God na etei amina vasiri te hoetija avo nangota titi na kera. <sup>16</sup> Amo nei mane Iesu ta javo hotembeto embo popora avo ungo matu kiari eha etei be kondetija. <sup>17</sup> Nau namei kamei ungo te ungo ta titijigari embopo te matu do ueva avo ungo be kiae ueva. <sup>18</sup> God na ke matu ena amita peroveta na Iesu osaga umbasuja avo harikena eto osaga kogua. <sup>19</sup> Avoeto unгона ajato ari ke eto God ta degi egerembavo ungo ta ari sasapura God na tuhau irae <sup>20</sup> au iji jamo jamo na Bada ta degi ta eto puvuresuja. Eto amita ambota God na Iesu Keriso ungota hondate ari embo matu ikari avo ikau puvuresuja. <sup>21</sup> Rate eha amo Iesu na Utu i ta God ta ingeni ta mitima God na enda eha asuja iji peroveta na ke matu harikena avo iji puvuresuja. <sup>22</sup> Eto Moses na Iesu ta puvurari ke avo einge kadena, 'God na peroveta vahai namo ainge ungo ta namei kamei ta eto ikau ke asuja amita ke avo ungo be ingivujo. <sup>23</sup> Embo amuna amita ke mane ingiuja amo God na katekau eonga iresuja,' ainge ena, <sup>24</sup> eto ke be amo peroveta tapa Moses eto pambuto iji eha ere ora Iesu ta puvurari avo harikitiaetera. <sup>25</sup> Peroveta ke ere ijiaetera amo ungoembo ere ijiaetera eto God na ke do ena amo ungota ra. Ke avo Abraham ta degi einge ena, 'Amo ungota meniundi ta eto enda tapa embomeni na javotoho iresora.' <sup>26</sup> Eto God na amita Pure Ari Meni ungotena Judea embomeni avoembo kiti ikitaja eto amina au ungota ari sapura toto egerembasova, eto javotoho amina ere ua."

## 4

#### *Peter te John te Council ta degi ke ea*

<sup>1</sup> Eto Peter te John te embomeni ta degi ke ijio Temple ta simba ari embo

okose te priests pepeni te enana Saducees\* embomeni te na enana ta degi puvua. <sup>2</sup> Enana jo memenga te tapa puvua amita be amo Peter te John te na Bada Iesu na vasiri te hoena ke avo ijie embo na vasiri te erari ke avo ate poekitio enana ke ar-avo ingari uje ae eto taekea. <sup>3</sup> Eto iji bovunu umbuto tipura ta evora ikea. <sup>4</sup> Rate embomeni isapamane Peter te John te ta ke ingito jo haperekenu ambotani matu amiga vahaita kaju eo ambotani tapa 5,000 ena.

<sup>5</sup> Eto evito enana Judea embomeni ta titi jigari embopo te embo nei pepeni te Judea ta ke pepeni harikari embomeni pepeni te na ke kasasi Jerusalem ta puvuto torukea. <sup>6</sup> Eto Priest okose javo Annas te Caiaphas te John te Alexander te enana ta javo vahai embomeni te na enana ga torukea. <sup>7</sup> Eto Peter te John te jage eo orohuta puvuto heteo ke einge eto ingia, “Ungo sovera amuta na eto javo amuta na ari emo eteve?” ainge eto ingio <sup>8</sup> eto Ahihi Otohu na sovera Peter ta ikenu umbuto ke mine ngahia eto einge ena, “Embomeni ta titi jigari te embo pepeni te, <sup>9</sup> nango popora embo ta osaga umbuto etere kondetija avoeto ungo nangota degi eto ere ingihevete? <sup>10</sup> Ke be avo ungota degi tambueto ano ingesova. Amo Iesu Nazareth embo avo ungo na i atahu ta torava eto God na etei vasiri te hoetija amita javo eto javo nei mane amina etei kondeto ungo ta titita eha heteto mitia. <sup>11</sup> Iesu amo bande gerikari atara avo embo na toari avo ehako bande ta kuteha peni etija. <sup>12</sup> Amo embo javo neite neite mitera rate embo na javo nei mane hotembasora, Iesu vahai amita javota hondate ari mitia.” <sup>13</sup> Eto embo okokose na Peter te John te ta sovera kito mani mini ea amita be amo Peter te John te school ta pambuto kiari umbae rate Iesu ga umoro ue sovera ari umbua avo embo okokose na kia.

<sup>14</sup> Eto popora embo eo kondena avo amo ari be manera ainge eto embo okokose na ke asi uje ea rate popora embo kondena avo enana ga heteto mitinu kito ke toa. <sup>15</sup> Avoeto enana Peter te John te ke kasari bande ta eto ikeo tambuta pahuo ke ungo eonga kasea. <sup>16</sup> Eto kaseto ke mine ara eto einge ea, “Embo emiga do aro, ari javotoho be etera avo Jerusalem embomeni tapa na kera avo eto enana na ari sapura ari ke avo mane aro embo tapa ingesora. <sup>17</sup> Rate Peter te John te ta ke hande ere ora avo eto kito taekasora avo eto enana Iesu ta ke hande ehako asora amo ngahia be aro kesora.” Ke ainge avo enana ta degi asora amo kasari ta ainge <sup>18</sup> eto jage eo puvuo enana ta ke te ate poekari te Bada Iesu ta javo jigama ari te tapa toara ke eo <sup>19</sup> Peter te John te ke mine einge ea, “Nango God ta ke agi arote, o ungota ke agi aro avo ungo eonga sirikevu. <sup>20</sup> Dago do kera eto do ingera avo ke hande asora rate toari ke avo mane asora,” ainge eo <sup>21</sup> enana okokose na ke ehako ngahia na eto eo tambuta pambua. Eto enana okokose na enana ta degi do asora avo mana mana ea amita be amo embomeni tapa na ari avo kito be hotembeto God jakeka ea. <sup>22</sup> Eto popora embo kondena amita jua 40 matu nembarira.

#### *God na sovera ikaja penunu ea*

<sup>23</sup> Eto Peter te John te tambuta pambuto embomeni totoho ga embo okokose na ke do ea avo eo <sup>24</sup> ingito embo tapa hotembari vahai eto God ta degi pari einge ea, “Mamo God sovera isapamane te utu te enda te eva te donda tapa avo inena a, <sup>25</sup> eto inena no Ahihi Otohu na nangota mama David no pure ari embo ta degi no ke avo ae einge kajena, ‘Eto enda embomeni tapa do eto God ta degi jujune asi ke kaseo, <sup>26</sup> enda ta kings te titi jigari embomeni te aingeto God te amita Meni avo vahai

\* **4:1:** embomeni avo embo tapa ambuvujekari amo vasiri te mane hoasora avo hotembeto ke ere iijaetera

amita degi isoro eora,' ainge David na kajena. <sup>27-28</sup> Eto eha amo ke be eto Herod te Pontius Pilate te Israel embomeni te enda nei embomeni te aingeto enana ta Hondate Ari Embo no Meni Iesu avo sapura rate enana tapa do uera avo inena hoi ta kito ke a, <sup>29</sup> avo eto, Bada, enana ke do etera avo hotembeto no pure ari embomeni ta degi sovera ari ikejo ando ngahia au no ke hande are. <sup>30</sup> Eto no ingeni jujurukejo no pure ari Meni Iesu ta javo Otohu ta aro embo kokonjikitie ari javotoho te sovera te ururoro embomeni no ke avo be hotembare" <sup>31</sup> pari ainge ijio enana ta ke kasari bande avo vasiri ena. Eto Ahihi Otohu na embo tapa ta jo enetenu God ta ke sovera eto ea.

### *Donda tapa vahaita ea*

<sup>32</sup> Eto jo vahai eto hotembari vahai eto donda eonga ira ae rate vahaita iketo umbuto hande mine ikara ea. <sup>33</sup> Eto enana apostel 12 na Bada Iesu ta vasiri te erari ke avo sovera eto ere ijiaetera eto enana ta degi God ta hondate ari datoho mitiaetija. <sup>34</sup> Eto enana ta degi donda ambu embo irae amita be amo iji nei nei ainge donda embo na bande retemo enda retemo avo ombuto koro umbuto <sup>35</sup> apostel 12 ta ikeo umbuto hande donda ambu embo ta degi ikitiaetera. <sup>36</sup> Eto iji vahai Cyprus ituka ta embo vahai javo Joseph Levi avo ambotani 12 na javo Barnabas ikea (javo amita be amo 'ke hande ari meni') <sup>37</sup> amina enda amita avo ombuto koro umbuto ambotani 12 ta ikena.

## 5

### *Ananias te Saphira te na ke sokova ea*

<sup>1</sup> Rate embo Ananias te amita ae Saphira te aingeto enana ta enda ombuto koro umbuto <sup>2</sup> tuna jigito tuna ikasora avo ke sokova asora avo ke kasea eto ivu na umbuto pambuto apostel ta ikitie koro nei irae ke ijie ate ate unu <sup>3</sup> Peter na amita ke sokova tapa kito ke einge ena, "Ananias, Satan na no jo enetetei koro

tapa ikari ke sokova Ahihi Otohu ta degi erea. <sup>4</sup> Ke be amo enda nora ombuto koro umbasoa eto toasoa amo umo tohora, rate enda ombuto koro umbuto tapa ikasoa eto tuna ikasoa amo umo tohora, rate umo do eto God ta degi ke sokova na koro tapa ikari ke ere? Umo etea amo embo ta degi ae rate God ta degi ke sokova erea." <sup>5</sup> Ainge enu Ananias na ke avo ingito burereketo beto ahunu embo tapa kito ojuju ea.

<sup>6</sup> Eto singapora na bo umbuto toreto Ananias ta ando togeto umbuto pambuto kovea.

<sup>7</sup> Eto three hours amita ambota ivu do ena amo ae na kiae puvunu <sup>8</sup> Peter na pamone amita degi einge eto ingina, "Ungo na enda ombuto koro umbeva emo tapa erevirete? Avo ejo ingone." ainge enu "En, tapa aravora" ke mine enu <sup>9</sup> Peter na einge ena, "Ungo do eto God ta Ahihi Otohu eto kesi uje eteve? Umo singapora ta utu uruhu ta asavi bande apupu ta ere ingihete? Amita be amo ivu umbuto pambuto kovetera, ehako umo umbuto pambuto kovasora" ainge ijinu <sup>10</sup> pamone avo burereketo beto ambunu singa bande jo ta toreto pamone ambunu kito umbuto pambuto ivu kovea engiti ai ta kovea. <sup>11</sup> Eto ekalesia te embomeni tapa te ke avo ingito oju peni vahai be ea.

### *Iesu ta ambotani na ari sovera neite neite ea*

<sup>12</sup> Eto enana apostel 12 na embomeni ta titi ta vasiri javotoho neite neite ere uatera. Eto ekalesia embomeni na jo vahai eto vahaita 'Solomon ta Porch' ta torukitiaetera, <sup>13</sup> eto osa ari embomeni avo embo nei nei ere koguatera rate enana ga vahaita torukari uje ae ue oju ere uatera, <sup>14</sup> rate embo nei nei na Iesu ke be ijie kaju uore ambotani peni vahai be ere uatija. <sup>15</sup> Ainge eto embo tapa na ambure embo umbuto degi ta besi tiritio ikitiaetera amo Peter ta aririvo na ahurekau kondara ere ikititiaetera. <sup>16</sup> Embo isapamane da neite neite Jerusalem da engitita



ambure embopo te ahihi sasapura na torari embo te tapa avo umbuto uore kokondikitiaetera.

*Iesu ta apostels na osaga kia*

<sup>17</sup> Eto Priest Peni te amita pure vahai embomeni tapa Sadducees ta javo ta pure ere uatera na Iesu ta ambotani ta pure ere uatera avo ari haiteko mane avo eto osaga kito <sup>18</sup> Iesu ta ambotani umbuto tipura ta ikea. <sup>19</sup> Eto mumete tipura ta mitio God ta anera na puvuto tipura ta bande bokiri hiriketo embo umbuto tambuta iketo <sup>20</sup> ke einge ena, “Ungo temple pe ta pambuto heteto Vasiri Eha Iesu ta degi putuhua amita ke tapa embomeni ta degi hande evujo,” ainge ena. <sup>21</sup> Eto anera ta ke agi eto iho bujenu temple jo ta toreto embomeni ate poekea.

Eto Priest Peni te amita pure vahai embomeni te tapa Judea embomeni ta torukari javo Sanhedrin ta pure ere uatera eto jage eo Israel embo pepeni tapa vahai ta puvuo tipura embo umbara ikeo police na pambuto embo tipura ta ikari <sup>22</sup> avo pambuto kiae eto egerembeto puvuto ke einge ea, <sup>23</sup> “Nango pambuto tipura ta bande bokiri vahaikari mitia eto tipura ta bokiri simba ari embo mitia rate pe hiriketo jo ta toreto tipura embo irae matu pambari kito puvua” ainge eo <sup>24</sup> ingito temple ta simba ari embo te Priest Peni te na duru avo ingito amita be avo deire avo eto mine umbae uo <sup>25</sup> embo nei na puvuto duru nei avo einge enu ingia, “Ungo embo tipura ta iketeva amo eha temple jo ta heteto embomeni ta degi ke ijie mitera,” <sup>26</sup> Ainge enu ingito temple ta simba ari embo na amita pure embomeni ga pambuto Iesu ta ambotani umbuto puvua. Eto umbua amo andito pundurae teho umbuto puvua amita be amo embomeni na atara na teora joru eto teho umbuto puvua.

<sup>27</sup> Eto umbuto puvuto Sanhedrin torukari embomeni ta titi ta ikeo heteo Priest Peni na ke ngahia eto einge ena, <sup>28</sup> “Eto ungo na embo

amita javo ta mane ate poekasova aingeto ke ngahia na eto ijiera rate ungota ate poekari na Jerusalem be enetetija eto ungo na embomeni ta degi embo avo nango na matu tari ke ijie nango mine tasi ke ereva.” Ainge eo <sup>29</sup> Peter te ambotani nei na ke mine einge ea, “Nango embo ta ke avo mane agi asora te God ta ke avo agi asora. <sup>30</sup> Eto embo amo ungonona i atahu ta teteve ahaja amo ungotenau mamamane ta God na Iesu ambuna avo enu vasiri te hoena. <sup>31</sup> Eto God na umbuto amita ingeni be ta iketei arumbetei ungotena titi jigihere orekaja iketija eto iji eha emikote ungotena Israel embomeni na ari sapura avo Iesu ta degi aja to ijiroro Iesu na umbuto au irae asuja. <sup>32</sup> Ke emo, Ahihi Otohu avo God na amita agiari embomeni ta degi hande ikeuja amite nangote tapa ke erevi ere kogora.” <sup>33</sup> Ke ainge eo ingito tumo peni vahai be eto embo taro amburoja ke ea <sup>34</sup> rate Pharisee embo vahai javo Gamaliel amo God ta ke pepeni ate poekari embo eto embo tapa ta tunga humbari embo amina Sanhedrin torukari ta ereto Iesu ta ambotani tambuta pambara ke enu pahuo <sup>35</sup> ke einge ena, “Israel embomeni ungo enana ta degi do asi uje ere ove avo be hotembevu, amo eingingera. <sup>36</sup> Embo Theudas na ereto heteto na embo penira ainge eto amita ambotani tapa 400 umbuna rate teo ambunu amita ambotani amo sio sao nei do ae pambuo irae ena, <sup>37</sup> eto nei Judas Galilee embo amo embomeni ta teka umbari iji te amina ereto heteto amita ambotani umbuna rate teo ambunu amita ambotani sio sao pambua. <sup>38</sup> Avo eto ke erena embo evi tovujo pambare, eto enana ta ke ijiroro avo ungo taekateva <sup>39</sup> rate God ta ke avo ijiroro ungo na taekari inono ae ra amita be amo God ta degi isoro asova.” Ainge enu ingito ke be hotembeto <sup>40</sup> ambotani jage eo puvuo ituha na torue ehako Iesu ta javo mane ate poekasova ainge eto

ikeo pambua. <sup>41</sup> Eto Iesu ta ambotani na Sanhedrin toto tunga javotoho ue God jakeka ijie pambua, amita be amo enana Iesu ta javo sovera eto jigama uo God na enana ta sovera inono kito memenga ikena. <sup>42</sup> Eto iji tapa enana temple jo ta eto bande pe vahai vahai ta pahue Iesu amo God ta Meni amita duru hande ere uatera.

## 6

### *Ekalesia eha na embo seven siriketo umbua*

<sup>1</sup> Eto iji amikote ambotani isapamane ue ambotani nei nei na tumo ea amo Judea embomeni nei Greek ta ke umbari amita pamone dodoru na iji nei nei indari umbae ari ke ijie Judea embo nei ta degi tumo ea. <sup>2</sup> Avo eto apostel 12 na ekalesia embo tapa jage eo puvuo einge ea, “Dago God ta ke hande ari avo toto beuje avo eto indari hande asora amo sapurara <sup>3</sup> rate ungo hande ari embo eto Ahihi Otohu na enetari embo tapa 7 avo umbuvujo eto indari hande ari ta pure emo enana na ara ikasora. <sup>4</sup> Eto pari ari te ate poekari te God ta ke hande ari te avo nango na kaiketo asora,” ke ainge eo <sup>5</sup> ke javotoho ingito embo tapa 7 umbua amita javo Steven amo God tunga umbari embo Ahihi Otohu na jo enetari nei Philip nei Prochorus nei Nicanor nei Timon nei Pormenas nei Nicolaus Antioch embo amo enda nei embo rate Judea embo ta ke agi ere uatija ehako Iesu ta ambotani ena. <sup>6</sup> Eto enana tapa 7 avo embomeni na apostel 12 ta titi ta ikeo apostel na ingeni ohoru ta tembeto pari ea. <sup>7</sup> Eto God ta ke da hoi ta pambuto hande ue ambotani nei ehaha Jerusalem jo ta ere uhuaetera. Eto Judea embo ta Priests nei nei amo jo aherekenu ambotani ga puvua.

### *Embomeni na Steven taeketo umbua*

<sup>8</sup> Eto embo Steven avo God na amita kiari javotoho hande ikitiatija avo eto amina Ahihi Otohu ta ivo na

ari neite neite Iesu ta ari ena ainge nombo ena.

<sup>9</sup> Rate Judea embomeni nei javo ‘free man’ avo vahaita torukitiaetera eto da javo Cyrene eto Egypt ta da peni Alexandria te Turkey ta Province Cilicia te Asia te tapa Judea embomeni aingeto toruketo Steven ta ke ingito tumo eto Steven ga ke ngahia mine ara ea. <sup>10</sup> Rate Steven ta kiari te sovera te God na ikena avo eto ke mine ari inono ae <sup>11</sup> eto embopo nei amo Steven ta ke sokova avo embo tapa ta degi ke ara koro na ombuto umbuo ke einge ea, “Embo Steven na God ta ke te Moses ta ke te amo sokova ke avo etei ingihara” eto ainge eo <sup>12</sup> ingito enana embo pepeni te ke pepeni ate poekari embomeni te embomeni tapa na tini kambari eto Steven andito umbuto Sanhedrin ta ikeo hetenu <sup>13</sup> ke sokova ari embomeni ehako umbuo ke einge ea, “Eto embo emina God ta ke pepeni Moses ta ikena amo sokova eto God ta Bande Otohu amo sapura ke kaikari euja. <sup>14</sup> Eto ke nei ijioi ingiora amo Iesu Nazareth embo na God ta Bande Otohu aimbasuja. Eto nei amo ungotenau ari matu Moses ta eto puvuna avo Iesu na au irae au ari nei umbasora.” Ainge eo <sup>15</sup> Sanhedrin torukari embomeni na Steven ta tombu kon kon eto kia amo anera ta tombu inono avo kia.

## 7

### *Steven na Judea embomeni ta ohihi ta hihi avo tirina*

<sup>1</sup> Eto Priest Peni na Steven ta degi einge eto ingina, “Ke erera amo ke be rete?” ainge enu <sup>2</sup> ke mine einge ena, “Mamamane te apamane te ke nau ingivujo. Ungotenau ohihi Abraham enda Haran ta pambae enda Mesopotamia ta mitinu God usasa te puvuto <sup>3</sup> Abraham ta degi ke einge ena, ‘No embomeni te enda te avo toto enda nei avo ano kito ai pambujo’ ainge God na enu <sup>4</sup> ingito enda Chaldea toto Haran ta pambuto mitinu Abraham mamamo ambunu ‘ungota enda ei ta egerembeto puvujo’ ainge God na enu puvuna. <sup>5</sup> Rate God

na enda amita ei ta peni te isapa te ikae avo eto Abraham ta meni irae rate emita meniundi na enda erevi umbara ke ena. <sup>6</sup> Eto God na amita degi ke ehako einge ena, 'No meniundi na enda nei ta pambuto iresora eto jua 400 amita jo ta no meniundi na enda nei embo ta degi pure eto hoga memenga kesora, <sup>7</sup> rate amita ambota na no pure ta memenga ikari embomeni ta degi osaga ikasona. Eto no meniundi na enda avo toto enda ei ta puvuto na jakeka asora,' ainge eto <sup>8</sup> God na Abraham ta degi asivo na kakamba ari ikena amo amita ke matu ari ingari amita hajire avo ikena. Eto Abraham ta ae na meni Isaac ingenu iji eight irae enu asivo na ando kakamba ena eto Isaac pajito amita meni Jacob ta ando kakamba ena eto Jacob na amita meniundi 12 avo kakamba ena, amo ungotenau ohihi ra. <sup>9</sup> Rate Jacob ta meniundi 11 na enana ta namei Joseph amo embo javotoho avo eto tumo eto irae aja uje eto ombuto koro umbuto ikeo Egypt ta pambuna. Eto God na Joseph ga mitie <sup>10</sup> Joseph ta osaga kito hotembari te kiari te ikenu Egypt ta King Pharoah na Joseph amo siro meni kiari meni avo kito osa eto amita bande peni te enda te avo titi jigoja ikena.

<sup>11</sup> Eto ga beae enu beuje iji peni vahai be Egypt enda ta Canaan enda ta puvunu mamamane indae tumbae eo embo tapa osaga peni vahai be kia. <sup>12</sup> Eto Jacob na Egypt enda ta indari mitinu duru ingito amita meniundi ungotenau mamamane avo ikenu Egypt enda ta pambuto indari umbuto puvuto indio irae enu <sup>13</sup> ehako pambuo Joseph na, 'Na ungota namei Joseph ra' aingeto harikena, eto Joseph na amita namei kamei avo Pharoah ta degi enu kina.

<sup>14</sup> Eto amita ambota Joseph na ke enu amita mamote namei kamei te eto amita embomeni tapa 75 ainge Egypt enda ta puvua. <sup>15</sup> Eto puvuto Jacob te ungotenau ohihi te Egypt enda ta ambuvujekeo <sup>16</sup> ando umb-

uto pambasi nununga ea amo enda Shechem amita panga to avo Abraham na embo Hamor ta meniundi ta degi koro na ombuto umbari ai ikaro sari ara nununga ea. <sup>17</sup> Eto Egypt ta iji koso be mitiaetera God na Abraham ta meniundi ta enda ikasuja avo iji puvutuhunu ungotenau Judea embomeni Egypt enda ta peni vahai ea. <sup>18</sup> Eto Egypt enda ta King nei amo Joseph kiae puvuto Egypt titi jigina. <sup>19</sup> Eto amina embomeni ta degi ari sapura be ue meni eha ingitiore ke ijioi umbuto ere gosukitiaetera.

<sup>20</sup> Eto amita iji te Moses meni be avo e na ingeto mamote ta bande ta simba unu hariga 3 irae enu Pharoah na eoi gosukeona tambuta pambuto ondikenu <sup>21</sup> Pharoah ta iae na tambuto kito umbuto 'meni nau asuja' ainge eto simba enu <sup>22</sup> pajito Egypt enda ta school ta pambuto kiari peni umbuto pure embo eto ke embo ena.

<sup>23</sup> Eto Moses ta pajirari jua tapa 40 irae enu amita Israel embomeni Egypt embomeni ta pure ere uaetera avo Moses na kogue umoro unu <sup>24</sup> Egypt embo na Israel embo torunu kito Moses ta jo memenga enu mine Egypt embo vahai tenu ambuna. <sup>25</sup> Moses avo God ta hondate ari meni avo amita Israel embomeni hondate aja ikena avo enana matu kiari ke ena rate enana kiae. <sup>26</sup> Eto evito Israel embo heriso mine tara uo Moses na onde katari ke einge ena, 'Embomeni ungo namei kamei ra do eto mine tara ere ove?' Ainge enu <sup>27</sup> jujune embo vahai amina Moses mimiketo ke mine einge ena, 'Embo amuna umo nangota embo okose eto titi jigoa ke etei, <sup>28</sup> iji nei umo Egypt embo vahai tete ambija eto na tao amburonote?' ainge enu <sup>29</sup> Moses na ingito oju enda nei Midian ta pambuto mitimite akate eto be heriso ikena.

<sup>30</sup> Eto jua nei tapa 40 irae enu Moses na tiri javo Sinai amita engiti ojagatambu ta pahunu i perimbeto bitina <sup>31</sup> avo kesi auveto amita jo ta anera kito mana mana enu Bada na amita degi ke einge ena

32 'Na no mamamane ta God eto Abraham ta Isaac ta eto Jacob ta God ra' ainge enu Moses na joru ue tatatata ue kiari uje ae eto tombu togena 33 eto Bada na amita degi ke ehako einge ena, 'Umo enda otohu ta heteto mitea, no utu goru houke. 34 Eto nau embomeni Egypt enda ta osaga ere uhora avo ere kogona eto enana memenga kogue jajavone ere ingihena avo eto ano tambuta pambasora. Aravora Egypt ta ikano pambaena hae.' ainge God na ena. 35 Eto embo nei mane Moses avo amita embomeni na kito uje ae eto ke einge ea, 'Umo amuna nango titi jigoa iketei?' ainge ea. Rate God na Moses na embomeni titi jigoja ikena ke avo anera na i peri jo ta puvuto God na embomeni umbuto tambuta pambaja ke ena avo ena. 36 Eto amina Egypt ta eto kiti umbuto pambuna eto Egypt jo ta eva javo pangari eto ojagatambu jua tapa 40 amita jo ta ari neite neite uoi embomeni kito mani mini ere uaetera. 37 Embo nei mane Moses avo amita Israel embomeni ta einge ena, 'Rate ungota meniundi ta eto embo 38 vahai, avo peroveta na ainge nombo God na ikau puvuresuja,' ainge ena. Eto ojagatambu ta Israel embomeni ungotenau mamamane ga mitio God ta ke otohu vasiri te daroho irari avo anera na Moses ta degi puvuto ikenu avo eha jigama ere ora. 39 Rate ungotenau mamamane na Moses ta ke agi ae eto enda Egypt jo enu egerembeto pambasi uje ea, 40 avoeto Moses ta namei Aaron ta degi penunu einge ea. 'Moses nainge pambei, avo nango kiaera avo eto nangota gods nei ejo nango kiti umbuto pambare', 41 eto enana o cow meni ingeni na ove eto amita degi pondo ue pene ikea. 42 Eto God na kito uje ae eto tonu hariga te kuro te avo jakeka ere ijiaetera. Ke amo peroveta na matu book ta einge kajari ra. 'Israel embomeni, ungo jua tapa 40 ojagatambuta o teto nau degi ta pene avete? 43 Ainge ae ungo na ungota god Moloch ta

jakeka ari horoma geriketo umbuto ere pahuaeteve eto ungota god Rephan ta kuro ove eto jakeka ere ijiaeteve avo eto ungo enda Babylon ovitiho ta ikano pambuto iresova,' ke emo God na enu peroveta na kajena. 44 God na Moses ta degi amita irari temple naingeto aro avo enu ingito bo na gerikea 45 avo ungotenau mamamane na umbuto ojagatambuta ere pahuaetera eto ambota Joshua na temple avo umbuto ungotenau mamamane te kiti umbuto enda ta ere uaetija enda asa embomeni avo God na enana ta titi ta kurumbena. Eto temple amo enda ai ta David ta iji te mitiaetija. 46 Eto David amo God ta tunga humbari meni eto amita mamu Jacob ta God amita Temple be koro na ari ikasi uje eto God ta degi penunu ena, 47 rate amita meni Solomon na God ta Temple gerikena, 48 rate God Sovera te amina bande embo ta ingeni na ari ai mane iriuja te God ta ke amo peroveta na einge kajena, 49 'Eto Utu i amo nau arumbari eto enda amo nau utu tembari avo eto nau irari bande naingeto avo, eto nau jangu indari arara nainge avo 50 utu ta enda ta donda tapa amo nau ingeni na ari rete o ae re?' Ke avo God na enu peroveta na kajena. 51 Eto ungo eha miteva sarika embomeni, ungo ta jo tongopa te onde susudukari te ra eto ungota mamamane na Ahihi Otohu agi ae ere uatera eto ainge nombo ungo na ere ova. 52 Ungota mamamane na peroveta tapa ta degi ngahia uore osaga ere koguaetera eto peroveta nei nei na javotoho ari embo puvuresuja ainge ijioire ungota mamamane na peroveta toruore ambuvujikiti-aetera avo eto ungo na javotoho ari embo hariketo teteve ambija. 53 Eto God ta ke pepeni otohu amo anera na ungota degi ikena rate ungo na agi ae ra."

*Judea embomeni na Steven atara na teo ambuna*

54 Steven na ke ainge enu Sanhedrin torukari embomeni na ingito



ti kambuo kiroro kiroro ena, <sup>55</sup> rate Steven Ahihi Otohu na enetenu titi i ta eto God usasa te Iesu God ta ingeni be ta heteto mitinu kito ke einge ena, <sup>56</sup> “Kivujo Utu pe hiriketei Embo ta Meni, God ta ingeni be ta heteto mitia.” ainge enu <sup>57</sup> embomeni na ke avo ingari uje ae eto onde susunduketo jajavone peni vahai eto pambuto <sup>58</sup> Steven jigito goruketo da tambuta umbuto puvuto koro na tea. Eto torue enana ta bo houketo embo Saul ta utu ta tembea. <sup>59</sup> Eto enana avo ere torua avo Steven na God ta degi pari einge ena, “Bada Iesu nau ahihi umbujo” ainge ijie <sup>60</sup> paunge na beto teteri eto javone einge ena, “Bada, enana ta ari sapura evi hotembeto tojo” ainge ijie beto ambuna.

## 8

<sup>1</sup> Rate Saul na embomeni na Steven tea avo kito tunga javotoho be ena.

Eto Steven ta sari ari iji te Jerusalem embo na ari sapura uo ekalesia embomeni osaga peni vahai be kito Jerusalem da toto enda Judea jo ta da nei nei aita pambua eto nei Samaria enda ta pambua rate Iesu ta apostel 12 amina pambae Jerusalem da ta mitiaetera.

*Embo Saul na enu ekalesia osaga peni vahai kia*

<sup>2</sup> Eto God ta tunga humbari embo na Steven ambunu si ijie kovea. <sup>3</sup> Rate Saul na ekalesia irae aja bande vahai vahai ta toreto embo te pamone te umbuto goruketo puvuto tipura ta ere ikitiaetija.

*Duru javotoho enda Samaria ta hande ea*

<sup>4</sup> Eto ekalesia embomeni da neita neita pahue God ta ke hande ere uaetera. <sup>5</sup> Eto Philip na pambuto da vahai Samaria amita jo ta Iesu Keriso ta puvurari ta duru hande enu <sup>6</sup> embomeni isapamane na Philip ta ari neite neite ena avo kogue onde jevito amita ke ingia. <sup>7</sup> Eto Philip na embo ta jo ta ahihi sasapura avo enu

jajavone te tambuta puvuto pambua eto popora embo tapa avo kokonjekena <sup>8</sup> avoeto da amita embomeni tapa tunga javotoho be ea.

<sup>9</sup> Eto embo vahai javo Simon amo Samaria da ta mitie saruka ere uatija amita saruka neite neite ue “Na ivo embora” ainge ijinu <sup>10</sup> embomeni tapa na amita ari kito mani mini ue ke agi eto einge ere ijaetera, “Embo emita sovera amo God ta sovera inono avoeto amita javo ‘sovera embora’ <sup>11</sup> ainge ijie amita saruka kito ke be ijie ambo ambo ere uatera. <sup>12</sup> Rate Philip na ke einge ena, “Iesu Keriso amo ungotenau hondate ari embo matu puvija eto God na amita embomeni ere uhua eto Iesu Keriso na enana ta King asuja.” ainge ijinu ingito embo te pamone te tapa ke be hotembeto bapataito ere uatera <sup>13</sup> eto Simon na ke avo be hotembeto bapataito ena eto Philip ta ambo ambo eto pambuto amita ari jajavotoho avo kito mani mani ena.

<sup>14</sup> Eto Samaria embo na God ta ke ingito uje ea avo apostel nei Jerusalem jo ta enana ingito Peter te John te Samaria enda ta ikeo pambua. <sup>15</sup> Eto pambuto embomeni nei Bada Iesu ta javo ta bapataito ea <sup>16</sup> rate Ahihi Otohu umbae avo kito Ahihi Otohu na enana ta jo ta beaja <sup>17</sup> Peter te John te na pari ue enana ta hamo ta ingeni tembeo Ahihi Otohu umbua. <sup>18</sup> Avo Apostel na ingeni hamo ta tembeo Ahihi Otohu umbua avo Simon na kito koro na umbasi <sup>19</sup> ke einge ena, “Eto ari avo nau degi ta ikevu eto na nau ingeni na embo ta hamo ta tembano Ahihi Otohu umbare” ainge enu <sup>20</sup> Peter na ke mine einge ena, “Umo God ta hande koro na umbasi hotembitea avo no koro ga sari ejo <sup>21</sup> eto God ta titi ta no jo amo javotoho mane ra avo eto ari emo no mane asuja. <sup>22</sup> No ari sapura avo aja to ijie pari uroro eto no jo ta hotembari sapura avo God na hotembeto toasuja <sup>23</sup> eto no jo ngahia amo ari sapura na andirari avo ere kogona” ainge enu <sup>24</sup> Simon na einge ena, “Ungo nau degi ta

ngahia eteva avo mane puvurosua avo God ta degi pari evujo,” ainge ena.

<sup>25</sup> Eto Iesu ta ari te ke te tapa do ena avo Peter te John te ate poeketo egerembeto Jerusalem degi ta pahue Samaria da vahai vahai ta heteto Iesu ta duru javotoho hande ue pambua.

*Philip na enda Ethiopia embo okose ta degi ke ena*

<sup>26</sup> God ta anera vahai na puvuto Philip ta degi ke einge ena, “Degi Jerusalem eto enda Gaza oja-gatambu kaina hena ai pambujo,” ainge enu <sup>27</sup> ingito degi ta itiketo pahumite Ethiopia embo okose vahai tambuna amo Ethiopia ta Queen Candace ta koro simba ari embo okose avo Jerusalem ta God jakeka asi pambuto puvutuhunu tambuna.

<sup>28</sup> Eto Ethiopia embo amo amita pambari nga javo ‘chariot’ ai ta arumbeto amita da ta pahumite peroveta Isaiah ta ke kajari avo etekena.

<sup>29</sup> Eto God ta Ahihi na <sup>30</sup> Philip ta degi einge ena, “Chariot ai ta auvejo,” ainge enu Philip na tutuveto pambuto nga ta auvenu peroveta Isaiah ta ke kajari avo etekitinu ingito ke einge ena, “Umo ke etekitea amo be ere ingihete,” ainge Philip na enu <sup>31</sup> ke mine einge ena, “Na naingeto ingono, ke be harikari embo irae,” ainge eto Philip bitito amiga arumbaja ena. <sup>32</sup> Eto ke etekena amo erevira: ‘O sheep amo umbuto pambuto heveora amo mane ke euja. Eto o sheep ta meni embo na umbuto pambuto ando tu tiukeora mane ke euja eto embo amina ainge nombo ke ae. <sup>33</sup> Eto amina me kiuja rate embo na hondate ae. Eto enana na tetere embo ta vasiri enda ta irae etija. Avo eto amita meniundi irae.’ Ainge Isaiah na kajena <sup>34</sup> avo Ethiopia embo na eteketo Philip ta degi einge eto ingina, “Ke emo peroveta ta ari avo kajenute mo embo nei ta ari avo kajenu avo e ingone,” ainge enu <sup>35</sup> Philip na Isaiah ta ke kajena amo Bada Iesu puvuresuja

eto puvuto tapa do etija avo Philip na Ethiopia embo ta harikenu ingina.

<sup>36</sup> Eto degi ta pahumite umo kito Ethiopia embo na einge ena, “Aravora, na bapataito ejo.” <sup>37</sup> (-) <sup>38</sup> ainge eto Chariot hetenu enana umo ta beto heteto Philip na bapataito <sup>39</sup> eto bitio God ta Ahihi Otohu na Philip umbuto da Azotus ta pambuna. Eto Ethiopia embo na Philip ehako kiae eto degi ta pahue tunga javotoho ena. <sup>40</sup> Eto Philip na da javo Azotus ai God ta ke ate poekena eto degi ta pahue da vahai vahai ta Iesu ta ke avo hande ue pahuatija da javo Caesarea ta puvuna.

## 9

*Iesu na enu Saul ta jo haperekena (Acts 22:6-16, 26:12-18)*

<sup>1</sup> Eto Saul na Iesu ta ambotani tau amburora ke ngahia kaikari ijie Priest ta embo okose amita degi ahari penunu eto umbuto pambuna.

<sup>2</sup> Eto amina embo te pamone te Iesu ambo ambo ere uatera avo umbuto Jerusalem tipura ta ikasi Damascus Judea embomeni ta God jakeka ari bande tapa amita embomeni ta degi ahari avo ikasi degi ta pambuto

<sup>3</sup> da auvitinu usasa peni vahai be utu ta eto tanini eto puvuto Saul ta ando ta kajenu <sup>4</sup> Saul na burereketo enda ta beto ke einge ingina,

“Saul, Saul, umo do eto nau degi ta memenga kaikari ere ikite?” ainge enu <sup>5</sup> ingito ke mine einge ena, “Bada umo amunure” ainge enu, “Na Iesu ra umo nau degi ta memenga kaikari ere ikitoa. <sup>6</sup> Ereto heteto da ta pambuto na ke do asona avo ingesi simba ejo.” <sup>7</sup> Eto embo Paul ga pambua amo ke avo ingia te embo ta tombu avo kiae avoeto ke ae teho mitio

<sup>8</sup> Paul ereto hetenu titi hirikena te be kiae unu embona ingenita jigito umbuto pambuto da Damascus ta puvua. <sup>9</sup> Eto Paul titi sapura enu be kiae ue indari te umote indae mitinu iji 3 irae ena.

<sup>10</sup> Eto da Damascus embo amo Bada ta ambotani ta degi God na

eture ta ke einge ena, “Ananias” ainge enu, “Bada do ere?” ainge enu <sup>11</sup> Bada na, “Degi javo ‘Tambu’ Judas ta bande ai pambuto embo vahai amina nau degi ta penunu eria <sup>12</sup> amita javo Saul da Tarsus embo na eture ta embo javo Ananias na ingeni hamo ta tembitoi titi mume avo javotoho oi kija avo eto ai pambuto embo avo jombure eto kijo,” ainge enu <sup>13</sup> Ananias na ke mine einge ena, “Bada embo amina Jerusalem Ekalesia embomeni ta degi ari sapura peni vahai euja avo duru ingena. <sup>14</sup> Eto amina priest okose ta degi ke umbuto embomeni tapa na Iesu ta javo ta penunu eora avo umbuto tipura ta ikasi etija,” ainge enu <sup>15</sup> Bada na ke mine jandireketo einge ena, “Umo pambu, embo amo nau hondate ari embora eto nau javo umbuto enda ta embomeni tapa kings te Israel embomeni te ta degi ke hande asuja <sup>16</sup> eto embo amo nau javo umbuto hande ururou embo na taro memenga kesuja eto do ainge amo ano kesuja,” ainge ena. <sup>17</sup> Eto Ananias na Judas ta bande ta pambuto toreto Saul ta hamo ta ingeni tembeto ke einge ena. “Nau namei Saul umo ei ta puvutuhoe Bada Iesu na degi nau ta puvija eto amina na iketei puvuto no titi ano javotoho ururou Ahihi Otohu na no jo enetasuja.” eto ainge enu <sup>18</sup> umo o ta ando ain ainge titi ta benu usasa kogue ereto hetenu bapataito <sup>19</sup> eto indari indie sovera ari umbuna.

#### *Saul na da Damascus ta ke hande ena*

Eto Saul na iji tuho Damascus jo ta Iesu ta ambotani ga mitiaetija <sup>20</sup> eto amina sau sau itiketo Judea embomeni ta God jakeka ari bande tapa amita embomeni ta degi Iesu amo God ta Meni be ra ainge ijie ke hande ere uatija. <sup>21</sup> Eto embo tapa amita ke ingito ke mine ara einge eto ingia, “Embo amo matu Jerusalem jo ta Iesu ta javo jigama ari embo ta degi sapura uija aravo rete? Eto amina embo andito priest okokose ta

degi ikasi puveija amo ke be rete?” ainge <sup>22</sup> eo Saul na ke ngahia na Iesu Keriso puvija amo ke be ra ainge Damascus ta Judea embomeni ta enu ke mine ari inono ae ea.

<sup>23</sup> Eto amita ambota Judea embo na Saul taro amburoja uje ea <sup>24</sup> ke avo Saul na ingina eto enana da amita degi pe tapa ai ta Saul tasi iji te mume te simba ere uatera <sup>25</sup> rate Iesu ta ambotani na Saul hambija ta juruketo mumete huga otoho ta ikeo ovitihō ta beto pambuna.

#### *Saul na da Jerusalem ta pambuna*

<sup>26</sup> Eto Saul na Jerusalem jo ta pambuto Iesu ta ambotani mamatu amiga vahaita asi uje ena rate Saul amo ambotani mane ke eto oju eto uje ae ea. <sup>27</sup> Rate Barnabas na Saul umbuto apostel ta degi pambuto Bada Iesu na Damascus degi ta puvuto Saul ta degi ke enu ingito Damascus jo ta Iesu ta ke sovera eto hande ena avo ambotani ta degi enu ingia <sup>28</sup> eto Saul na ambotani ga mitie Jerusalem jo ta itiketo pambuto joru ae ke sovera eto Iesu ta javo ta enu ingia <sup>29</sup> eto amina enda Greece ta Judea embomeni ga ke mine ara ijinu Saul taro amburoja uje ea, <sup>30</sup> avo amita namei kamei na ingito Saul umbuto Caesarea ta pambuto ikeo Tarsus ta pambuna.

<sup>31</sup> Eto amita ambota enda Judea te Samaria te Galilee te amita ekalesia na iji jamo jamo te kogue mitiaetera. Eto Ahihi Otohu na enana ta degi ikerekenu sovera ari te tunga javotoho te mitie God joru ue ekalesia peni vahai ea.

#### *Peter na da Lydda te Joppa te ai pambuna*

<sup>32</sup> Eto Peter na enda tapa isa ue pambuto da Lydda ta ekalesia embomeni kesi pambuto <sup>33</sup> popora embo javo Aeneas amo jua tapa 8 serekari ovotina mitiaetija avo kito, <sup>34</sup> “Aeneas umo Iesu Keriso na ere konditia ereto no donda sirikejo” ainge enu Aeneas erena. <sup>35</sup> Eto da Lydda te da Sharon te ta embomeni

tapa avo kito Iesu Keriso ta ambota ambota ea.

<sup>36</sup> Eto ambotani pamone vahai javo Tabitha eto javo nei Dorcas amina da javo Joppa ta mitie donda ambu embo ta degi ari javotoho ue hondate ere uaetija, <sup>37</sup> eto pamone amo ambure umbuto ambunu amita ando egeto bande jo i ta ikeo serekena. <sup>38</sup> Eto Peter amo da Lydda Joppa ta engitita puvuto mitinu Joppa ta ambotani na duru ingito embo heriso ikeo puvuto Peter jage eto, “Umo sau sau hae.” ainge eo <sup>39</sup> Peter na enana ga pambuto bande i ta bitito jo ta torenu pamone dodoru na joeketo si ijie mitimite donda ambu embo ta degi hande ikasi Dorcas na bo kembari avo ikeo kito <sup>40</sup> Peter na enu tambuta pahuo paunge teteri eto pari eto jandireketo pamone amburari amita degi einge ena, “Tabitha umo ere,” ainge enu titi hiriketo Peter kito ereto arumbenu <sup>41</sup> Peter na ingeni ta jiginu ereto utu na hetenu ambotani te pamone dodoru te avo jage enu jo ta puvuto pamone amburari vasiri te hoena avo kia. <sup>42</sup> Eto da Joppa embomeni tapa na duru avo ingito God ke be hotembea. <sup>43</sup> Eto Peter na da Joppa embo o hoga pure ari embo javo Simon amiga iji koso mitiaetija.

## 10

*Peter na embo Cornelius ga umoro ena*

<sup>1</sup> Roman embo ta army Captain vahai javo Cornelius amina Caesarea ta amita ae te meniundi te amita bande ta irari embomeni aingeto mitie <sup>2</sup> God jakeka ijie Judea embo donda ambupu avo hondate ue pari ere uaetera. <sup>3</sup> Eto iji vahai ture 3 o'clock God ta anera na Cornelius ta degi puvuto eture ta, “Cornelius” ainge enu, <sup>4</sup> Cornelius na kogoue oju ue, “Bada umo do ere?” ainge enu Anera na, “No pari te no donda ambu embo ta degi hande ikari te avo God na jene ae ere kogua <sup>5</sup> avo eto no embo ikejo pambuto embo javo Simon Peter umbare. <sup>6</sup> Embo

amina Simon o hoga pure ari embo eva titi ta amiga mitia.” ainge eto <sup>7</sup> Anera pahunu Cornelius na amita pure embo heriso eto amita army pure embo vahai aingeto jage enu puvuo <sup>8</sup> eture ta do kina avo hihi tirinu ingio ikenu Simon Peter umbasi da Joppa ta pambua.

<sup>9</sup> Eto iji nei enana puvutuhumite da Joppa auvitio iji orohuta Peter na bande ita bitito pari ere umite <sup>10</sup> beuje enu indari agitio eture ta kina <sup>11</sup> amo utu pe hirikenu bo peni vahai avo petiki ta jigito umbuto bea. <sup>12</sup> Eto bo amita jo ta o neite neite o koso o te di te tapa kogunu <sup>13</sup> God na, “Peter ereto o teto heveto indijo.” ainge enu <sup>14</sup> Peter na “Bada, na o sasapura, indahu o avo mane indiona,” ainge ena. <sup>15</sup> Eto God na ehako einge ena, “Eto nanena do ano javotoho asuja avo inena sapura ke mane asoa,” ainge <sup>16</sup> eto ke vahai avo iji nei heriso nei vahai enu bo peni amo ehako Utu ta bitito pambuna. <sup>17</sup> Eto Peter na eture ta do kina avo hotembitie mitinu Cornelius ta embo ikena amo puvuto Simon o hoga pure ari embo amita bande naingere avo eto ingito pambuto bande pe ta heteto, <sup>18</sup> “Simon Peter ei miteite?” ainge eto ingia. <sup>19</sup> Eto Peter hotembitie mitinu God ta Ahihi na puvuto ke einge ena, “Simon, embo 3 na umo kesi puvera, <sup>20</sup> beto kito mane nei do asoa te enana ga pambujo amo nanena iketene puvera,” ainge enu, <sup>21</sup> Peter na beto embo ta degi, “Ungo do uje eto puvuto na jombure ere ove?” ainge enu <sup>22</sup> embo na, “Nango Captain Cornelius na iketei puvera. Embo amo embo javotoho eto God oju euja avo Judea embomeni na embo avo osa eora eto Anera Otohu na amita degi puvuto umo amita bande ta pambuto ke ao ingesi etei puvera,” ainge eo <sup>23</sup> Peter na ingito enu bande ta bitito arumbeo umoro umite <sup>24</sup> evito iho bujenu Peter te Joppa ekalesia embomeni te enana ga egerembeto puvuto <sup>25</sup> degi ta evito ereto puvutuhuo Cornelius



na amita javo vahai embomeni te namei kamei te embo simba ara enu vahaita puvuto simba mitio enana puvua. Eto Peter na bande jo ta torenu Cornelius na Peter ta utu ta tumo te pain ue benu <sup>26</sup> Peter na, “Umo ereto hete, na embo tehora,” ainge enu ereto hetena, <sup>27</sup> eto Peter ga ke mine ara ijie jo ta toreto embo isapamane vahaita arumbeto mitia avo kito <sup>28</sup> enana ta degi ke einge ena, “Ungo kiova amo nango Judea embomeni ta ke pepeni amo enda nei embo ga mane umoro eora avo ungo kiarira rate God na embo tongopa te sapura ke mane aisora rate embo tapa inono inono ara etei ingena <sup>29</sup> avoeto na jage eteve ke nei do ae teho tambueto puvena rate ungo do eto na jage eteve puvena amita ke be avo ingesi uje ere ona.” ainge enu, <sup>30</sup> Cornelius na ke mine einge ena, “Iji 4 amita kiti ta iji 3 o'clock turete nau bande ta pari ue mitene embo bo usasa te amina nau titi ta heteto <sup>31</sup> ke einge etija, ‘Cornelius, God na no pari ere ingihia eto donda ambu embopo ta degi hondate ere oa avo ere kogua <sup>32</sup> eto embo Simon Peter da Joppa embo Simon o hoga pure ari embo eva engitita iriuja amiga mitia avo jage ejo puvuroi.’ ainge anera na etei <sup>33</sup> ingito embo iketene pambuto umo etere ingito sau sau nau degi ta puvea amo javotohora. Avo eto nango jo vahai eto God ta titita puvuto mitera rate God na no degi ta ke do au ingito ejo ingore.”

#### *Peter na Cornelius ta bande ta ke ena*

<sup>34</sup> Ainge enu Peter na itiketo amita ke ena, “Na ere kogona amo Judea embomeni vahai avo pere mane God na osa euja <sup>35</sup> rate enda tapa ta embomeni vahai vahai na God oju eto tumotepain ururoro God na kito osa asuja. <sup>36</sup> Eto Iesu Keriso, embo tapa ta Bada ta degi pekari te tunga humbari mitia amita ke avo God na Judea embomeni ta degi ikitaja. <sup>37</sup> Eto ke amita ikari iji te John na

Galilee enda ta itiketo embo bapataito ari ke hande uija eto amita ambota Israel enda ta ari tapa do uija avo ungo kiarira. <sup>38</sup> Eto God na Iesu Nazareth embo amita degi Ahihi Otohu te sovera te ikitei popora embo konditie Satan ta sovera na jo andirari avo hondate uija amita be amo God amiga mitia avo eto. <sup>39</sup> Eto amina Judea embomeni ta enda ta eto Jerusalem jo ta do uija tapa amo nango kiarira. Eto enanana i atahu ta tetere ahaja <sup>40</sup> rate iji 3 irae etei God na etei vasiri te hoitaja <sup>41</sup> eto embomeni tapa na Iesu kiae rate God na embo ke hande ara sirikitaja amina kogara. Eto amiga indie mitere <sup>42</sup> nango do asora amina ke tapa etei ingihara amo embomeni tapa ta degi ke hande asora amo God na Iesu ta degi embo amburari te vasiri te amita ari siriketo hajire ikau kesora <sup>43</sup> rate peroveta na ke kajena amo embo amuna Iesu be hotembeto amita jo aherekasuja amita ari saspura Iesu na hotembeto toasuja.”

#### *Ahihi Otohu enda nei embomeni ta puvuna*

<sup>44</sup> Ke ainge Peter na ijinu ingito embo tapa ta degi Ahihi Otohu na puvuna. <sup>45-46</sup> Eto God na amita Ahihi Otohu enda nei embomeni ta ikenu ke neite neite ijie God jakeka ijio Judea embomeni Peter ga puvua amina mani mini ea. Eto Peter na einge ena, <sup>47</sup> “Embo emo umo na bapataito asora amo amuna taekau? Enana nango ainge nombo Ahihi Otohu umbera.” <sup>48</sup> Ainge eto amina Iesu Keriso ta javo ta bapataito ea, eto Peter na enana ga iji isapa umoro ena.

## 11

#### *Peter na Jerusalem ekalesia ta degi ke ena*

<sup>1</sup> Eto enda nei embomeni na God ta ke avo ingito ke be hotembea avo Apostles te ambotani te Judea enda ta mitie duru ingia. <sup>2</sup> Eto iji nei Peter na Jerusalem da ta pambunu enana na Peter ta degi ke ngahia na eto ingia, <sup>3</sup> “Umo do eto Judea embomeni

ta ke pepeni poeketo enda nei embo ta bande ta pambuto enana ga inde?" ainge eo <sup>4</sup> Peter na tapa do ena avo harikena. <sup>5</sup> "Na da Joppa ta mitie pari ue eture ta einge kogona. Utu pe hiriketei bo peni vahai avo petiki ta jigito umbuto nau degi ta bovuoi kogona, <sup>6</sup> Bo amita jo ta o nei te nei te o koso o te di te tapa kogona <sup>7</sup> amo God na nau degi ta ke einge etei ingihana, 'Peter, ereto o teto heveto indijo' ainge etei <sup>8</sup> mine einge ijiena, 'Bada, na o sapura indahu o amo te mane indiona amo nango ta ke pepeni mitia avo eto mane indiora.' ainge etene <sup>9</sup> ke Utu ta eto ehako einge ijija. 'Eto God na do au javotoho asuja avo inena sapura ke mane asoa' ainge ijija <sup>10</sup> eto ke vahai avo iji nei heriso nei vahai eto bo peni amo ehako Utu ta bitito pahunu <sup>11</sup> embo 3 ainge Caesarea ta eto puvuto nau evari bande pe ta heteto na jombure uo <sup>12</sup> Ahihi Otohu na 'do mane hotembasoa te tehora enana ga pambasoa' ainge ijija. Eto namei kamei 6 ainge namote pambuto Captain Cornelius ta bande jo ta toritare <sup>13</sup> anera vahai na Cornelius ta degi ke do ijija avo hihi tirei ingihara amo einge ijija, 'Da Joppa ta ke ikejo pambau Simon Peter puvuto <sup>14</sup> umote no embomeni te ke au ingito amita ke agi ururovo ungo orekasuja.' ainge anera na ijija avo tirei ingihana. <sup>15</sup> Eto na itiketo ke ijio Ahihi Otohu na nango Judea embomeni Iesu ambo ambo ere uatera ta degi puvuna ainge nombo enana ta degi Ahihi Otohu itiketo puvuritaja. <sup>16</sup> Eto avo kito Bada Iesu ta ke avo hotembitana eto John na embo umo na bapataito ena rate nango na Ahihi Otohu na bapataito asora avo hotembitana <sup>17</sup> eto dago Iesu Keriso ke be hotembeto amita Ahihi Otohu hande eto uhora eto enda nei embomeni na eha ere uhora avo eto na God ta ari avo taekari inonore te?" ainge enu <sup>18</sup> embomeni na ke avo ingito ke nei ae God jakeka ijie ke mine ara einge ea, "Aravora amo ke be eto God na eha enda nei

embomeni ta degi hande ere ua amo enana ta ari sasapura avo eto ajato ijiroro God na enana ta irari datohe ikasuja."

### *Da Antioch ekalesia itiketo ea*

<sup>19</sup> Eto Steven teo ambuna eto Judea embomeni na Iesu ta ambotani ta degi ari sasapura neite neite eo osaga kito enda nei nei Phonecia ta Cyprus ta Antioch ta pambuto Judea embomeni ta perekari Iesu ta ke hande ere uatera. <sup>20</sup> Rate ambotani nei da Cyprus embo te Cyrene embo te aingeto da Antioch ta pambuto Bada Iesu ta duru javotoho avo Greek embomeni ta degi hande ere uatera. <sup>21</sup> Eto enana Bada ta sovera na ke hande eo enda nei embomeni isapamane jo haperekenu Iesu ambo ambo ea.

<sup>22</sup> Eto Jerusalem ta ekalesia embomeni na duru avo ingito embo Barnabas be kioja ikeo Antioch ta pambuna. <sup>23</sup> Eto pambuto God na enda nei embomeni ta degi ari javotoho ena avo kina. <sup>24</sup> Eto Barnabas amo embo javotoho Ahihi Otohu na enetari eto God ta sovera umbari embo avoeto amina kito tunga javotoho eto embomeni na jo tapa na God ke be eto hotembeto iresora avo onde katena. Eto embo isapamane na puvuto ambotani ga vahaita ea. <sup>25</sup> Eto Barnabas na Saul jombure ue Saul tohota da Tarsus ai ta mitinu <sup>26</sup> pambuto Saul tambuto umbuto ehako Antioch ta puvuna. Eto enana heriso iji koso be jua vahai amita jo ta embomeni isapamane Antioch ta ekalesia atepoekea. Eto Antioch ta embomeni na Iesu ta ambotani ta javo 'Christian' ike.

<sup>27</sup> Eto amita ijite peroveta na Jerusalem ta eto Antioch ta puvua. <sup>28</sup> Eto peroveta vahai javo Agabus ta degi Ahihi Otohu na ke ikenu ereto enda tapa ta beuje iji peni vahai be puvurosuja avo ereto harikena. Eto Rome ta King Claudius ta iji te beuje avo puvuna <sup>29</sup> eto Antioch ta ekalesia embomeni na Judea ta Christian embomeni hondate eto hande ikasi uje eo embo vahai vahai na donda

teka umbuto nei peni ikena nei isapa ikena. <sup>30</sup> Eto tapa umbuto ikeo Paul te Barnabas te aingeto hande avo umbuto pambuto Jerusalem ekalesia ta okokose ta ikea.

## 12

### *Ambotani na osaga peni vahai kia*

<sup>1</sup> Eto iji amite King Herod nei na ekalesia embo nei ta degi sapura asi umbuto tipura ta ikena. <sup>2</sup> Eto apostel vahai John ta namei James avo asivo na tunga tiukenu <sup>3</sup> Judea embomeni kito tunga javotoho uo Herod na kito Peter andito umbuto tipura ta ikena <sup>4</sup> amita iji te Judea embomeni na bread tevokoari na pondo ea pondo amita be amo sivo ikae avo eto bread pajirae amina pondo ere uatera eto Peter tipura ta iketo tipura simba ari embo tapa <sup>16</sup> ainge ikenu iji vahai vahai embo four simba ere uatera amita be amo Peter tambuta pambuja eto pondo javo 'Pass-over' avo indito Peter umbuto embo tapa ta titi ta pehumbasi ena. <sup>5</sup> Eto ekalesia embo tapa na Peter tipura ta mitina avo eto pari peni vahai God ta degi ikea.

### *Peter; Anera na tipura ta eto umbuna*

<sup>6</sup> Eto Peter iho bujau court asuja amita mume amina tipura simba ari embo heriso amiga arumbeto ingeni nei amo embo amita ingeni ta punduna eto ingeni nei amo embo nei ta ingeni ta punduna aingeto Peter orohuta evinu eto simba ari embo nei heriso amo pe araha ta heteto mitio <sup>7</sup> mume orohuta God ta anera usasa te tapa orohuta irerembeto puvuto Peter ta koho ta jigito jahevenu erenu, <sup>8</sup> "Umo sau sau ereto hete," ainge enu amita ingeni ta pundurari amo eonga houketo benu anera na, "No pupuri tigito utu goru asuketo no bo na pohuketo nau ambota hae," ainge enu <sup>9</sup> Peter na anera ta ke agi eto ambo ambo ena, rate ke avo be mane eture ari ke avo hotembena. <sup>10</sup> Eto simba ari embo nei senikea pambuto nei

senikea pahuo huga bokiri peni amo eonga hirikenu tambuta pambua. Eto pambuto degi tutumota anera saivenu <sup>11</sup> Peter na ke be kito, "Na eture mane God na amita anera iketei puvuto Herod ta ingeni ta na umbija amo Judea embomeni ta uje avo God na taeketija," <sup>12</sup> Ainge eto pambuto John Mark amita e Mary ta bande ta ekalesia embomeni peni vahai be Peter avoembo pari ue mitio <sup>13</sup> ambuto kito huga pe ta bahihiri unu bande ta pure ari kakara javo Rhoda amina puvuto <sup>14</sup> Peter ta ke hajire ingito tunga javotoho eto huga pe hirikae toto egerembeto tutuveto pambuto embomeni ta degi einge ena, "Peter huga pe ta heteto mitia," ainge enu <sup>15</sup> embomeni na, "Umo kava kakarara" ainge eo kakara na, "Na ke be erena" ainge enu embomeni na, "Amo anera Peter ta tombu vahai avo puvuto miteite?" ainge ijio <sup>16</sup> Peter na bahihiri kaiketo unu pambuto pe hiriketo Peter kito mani mini eto ke taimbea. <sup>17</sup> Eto Peter na embo tapa ke ambu ara ingeni na ate ate eto Bada na Peter tipura ta naingeto umbuna amita hihhi avo tirinu irae enu ke einge ena, "Iesu ta namei James te ungotenau namei kamei ta degi ke evi evu ingore," ainge eto degi nei ta pambuna. <sup>18</sup> Eto iho bujenu tipura simba ari embo na kiae eto ke peni vahai be ea. Eto Herod na amita pure embomeni ikenu degi tapa jombure ea rate tambae ea, <sup>19</sup> eto tipura simba ari embopo ganoka ena rate ke mine ae eo Herod na enu tunga tiukea.

### *Herod ambuna*

Ainge eto Herod na da Judea toto Caesarea ta pambuto mitie <sup>20</sup> da Tyre te Sidon te ta embomeni ta degi tumo ere uatija. Eto Tyre te Sidon ta embomeni na vahaita puvuto Herod ta bande simba ari embo javo Blastus amita degi ke eo ingito osaga kito tapa Herod ta degi pambuto peka umbari ta ke avo Blastus na Herod ta degi ena amita be amo Tyre te Sidon

embomeni na enana ta indari Herod ta enda ta eto ere uhuaetera.

<sup>21</sup> Eto Herod na ke ari iji ikenu puvunu amita bo asukari javotoho umbuto asuketo amita avo arumba peni ai ta arumbeto embo ta degi ke ijinu <sup>22</sup> embomeni na jajage eto, “Amo embo na ae rate God na eria,” ainge ea. Eto Herod na, “Na God ke avojo,” ainge ae avoeto God ke eo ingito osa enu <sup>23</sup> God ta anera na enu hamo ta kakesa na pagenu ambuna.

<sup>24</sup> Eto God ta ke na enda neita neita ikeo pambuna. <sup>25</sup> Eto Barnabas te Saul te Jerusalem ta pambuto Antioch ekalesia ta hande iketo John Mark umbuto egerembeto puvua.

### 13

#### *Antioch ekalesia na Barnabas te Saul te ikeo pambua*

<sup>1</sup> Eto da Antioch ta ekalesia ta peroveta te ate poekari embo te pure ere uatera enana ta javo amo erevira. Barnabas te Simeon amo mume embo te Lucius amo da Cyrene embo te Saul te Manaen amo Herod ta e mamona unduo Herod ga pajina. <sup>2</sup> Eto enana God ta pure ue indari iji isapa ajirekeo God ta Ahihi Otohu na da Antioch ta ekalesia ta peroveta te ate poekari embo te ta degi einge ena, “Barnabas te Saul te nau pure asora eonga ikevu,” ainge enu <sup>3</sup> ingito indari indae ingeni Barnabas te Saul te ta siro ta tetembeto pari eto ikeo pambua.

#### *Barnabas te Saul ta ituka Cyprus ta pambua*

<sup>4</sup> Eto Barnabas te Saul te avo Ahihi Otohu na ikenu pambuto da Seleucia ai e nga umbuto ituka javo Cyprus ta pambua. <sup>5</sup> Eto Cyprus ta da peni javo Salamis ta puvuto Judea embomeni ta God jakeka ari bande tapa ta God ta ke hande ea. Eto pure amo John Mark na enana hondate asi pambuna. <sup>6</sup> Eto ituka Cyprus amita da tapa ta ke ijie pambuto da Paphos ta puvua ai embo javo Bar-Iesu amo Judea embomeni ta peroveta ke ijie ke gamo sokova ari ere uatija avo

tambua. <sup>7</sup> Eto Bar-Iesu amina ituka ta governor javo Sergius Paulus amo siro embo amiga mitiaetija. Eto iji vahai Sergius Paulus na God te ke ingesi uje eto Barnabas te Saul te aingeto jage enu <sup>8</sup> puvuto ke ijio ke gamo embo amita javo Greek ke na eora amo Elymas amina enana ta degi ngahia eto Governor ta degi Iesu ta ke avo ke be manera ainge ena <sup>9</sup> rate Saul amita javo nei Paul na ke gamo embo titi na jaseto kito Ahihi Otohu ta sovera ari umbuto ke gamo embo ta degi ke ngahia eto einge ena, <sup>10</sup> “Umo Satan ta meni, ari sasapura na enetari eto iji tapa God ta ke be avo umbuto ondiketo ke sokova na eoa. <sup>11</sup> Avo God ta ingeni na no hamo ta iketei erevovua eto no titi vahaikau iji isapa eto usasa mane kesoa.” ainge enu oje jo ta embo kiarako enu pambuto amita titi ta mume sihukitinu ato ato ue embo amuna amita ingeni ta umbuto gorukasuja avo jombure ena. <sup>12</sup> Eto Governor Sergius Paulus na ari tapa kito ate poekea avo ingito ke javotoho ra ijinu jo haperekenu God ke be ena.

#### *Pisidia Province da Antioch ta pambua*

<sup>13</sup> Eto Paul te amita namei kamei te Paphos toto e nga umbuto eva ovitihio ai da Perga enda Pamphylia ta puvua. Rate John Mark na enana toto Jerusalem ta pambuna. <sup>14</sup> Eto enana Pisidia Province ta da Antioch ta pambuto mitio Giu ari iji puvunu Judea embomeni ta God jakeka ari bande ai toreto arumbeo <sup>15</sup> Judea embo ta ate poekari embo na God ta ke pepeni te peroveta ta ke te etekenu ingio Judea embo peni na ke einge enana puvua amita degi ikena, “Namei kamei, ungota ke embo ta sovera umbari avo ungota degi miteite avo evujo ingore.” ainge enu <sup>16</sup> Paul na ereto embomeni ke jamo ara ingeni na ate ate eto ke einge ena, “Israel embomeni te enda nei embomeni ungo God jakeka eova avo onde nau degi ta iketo na ke asona avo ingivujo. <sup>17</sup> Ungotena



Israel embomeni ta God na ungotenau Ohihi siriketo ikenu Egypt enda ta mitie meni ikerekeo sirerembeto peni vahai ena. Eto God na amita sovera na Egypt enda ta eto umbuto <sup>18</sup> degi ojagatambuta jua tapa 40 amita jo ta enana ta ari sapura kina rate embomeni toae simba ere uatija. <sup>19</sup> Eto God na enda Canaan ai ta isoro eto enda tapa 7 amita embomeni avo irae tetō enana ta enda umbuto amita embomeni ta ikenu hotea <sup>20</sup> avo jua tapa 450 amita jo ta ere uatija. Eto iji amikote eto pambuto peroveta Samuel ta iji te God na embomeni ta isoro kiti umbari embopo ikena <sup>21</sup> rate embomeni na King umbasi uje eto God ta degi eo Benjamin ta teka hoka embo Kish ta meni Saul avo ikena. Eto amina King eto jua tapa 40 amita jo ta embo titi ere jigihatija, <sup>22</sup> rate God na Saul avo toto David avo King iketo ke einge ena, 'Eto embo Jesse ta meni David amo nau tunga humbari meni avo tambena avo eto na uje do asona avo asuja,' ainge God na David kito ena. <sup>23</sup> Eto God na amita ke matu ikena avoeto amina David ta teka hoka ta eto Israel ta orekari embo umbuto ikitaja. Embo amo Iesu ra. <sup>24</sup> Rate Iesu puvurae amita kiti ta John na puvuto Israel embomeni ari sapura avo toto jo haperekau bapataito ara puvuna. <sup>25</sup> Eto John pure irae ari iji auvitinu ke einge ena, 'Ungo hotembiteva na amunure, na embo ungo na simba ere ova avo manera rate embo amo ambota ere puvutuhua amo na javotohorami aruse eto amita utu goru houkano.' ainge ena. <sup>26</sup> Avo eto nau namei kamei ungotena Abraham ta meniundi eto enda nei embopo God oju eova avo ungotenau degi ta orekari ke puvija <sup>27</sup> amo Jerusalem embomeni te enana ta titi jigari embo te aingeto Iesu avo enana ta orekari embo mane embo nei ke eto umbuto pehumba eto teo ambunu peroveta na ke matu kajari avo giu ari iji puvuoi kaiketo etekeora avo enana kiae uera. Eto Iesu ta sapura deire avo

tambae eto sio Pilate na tau amburoja penunu ea. <sup>28</sup> Eto Iesu ta degi tapa do asora avo peroveta na kajea avoeto uera. <sup>29</sup> Eto Iesu ta ambotani na amita hamo i atahu ta umbuto panga to ta ikea. <sup>30</sup> Rate God na enu vasiri te hoeto <sup>31</sup> iji nei nei embopo amiga Galilee ta eto Jerusalem ta pambua enana ta degi pambunu kia. Eto enana na ungotenau ke hande ere ora.

<sup>32</sup> Eto ungota degi ke javotoho avo umbuto ere hora. Ungotenau Ohihi ta degi God na ke kiti ikena <sup>33</sup> rate ungotena enana ta meniundi susu be ta iji te God na Iesu embo ta King ikena avo eto ungotena God ta ke be eha ere kogora amo David na God ta ke avo haveni na einge ena, 'Umo nau meni eto na no mama eha etena,' ainge ena. <sup>34</sup> Eto God na enu vasiri te hoeto ehako mane sari aisuja avo einge kajena, 'Na ari Otohu te javotoho te David ta ikana ena avo eha no ikasona,' ainge eto <sup>35</sup> David na ke nei kajena amo, 'No Otohu ari embo ao mane sari aisuja.' <sup>36</sup> Amita be amo David na amita iji te God ta pure tapa avo enu irae enu ambunu amita ohihi kovari degi vahai ai ta koveo sari ena. <sup>37</sup> Rate God na embo enu vasiri te hoena embo amita hamo sari ae <sup>38</sup> avo eto nau namei kamei ke erena erevi be ingivujo. Ungota ari sasapura hotembeto toari amo Bada Iesu ta eto puvuja. Ungo kiari amo embo na ungotena Judea embomeni ta ke pepeni Moses ta eto puvurari avo jigama aisuja amo God na embo amita ari sasapura mane hotembeto toasuja amo embo na tapa agi ari inono ae <sup>39</sup> avo eto, rate embo amuna Iesu amo ke be hotembasuja amita ari sasapura ta hajire mane kesuja rate God na embo javotoho ke asuja. <sup>40</sup> Avo eto be kon kon eto kogoue eto peroveta na do kajea avo ungota degi ta mane puvuresuja. <sup>41</sup> Eto peroveta na einge ea 'Na ungo ta iji te do asona avo embo na au ingito ke be mane asora. avoeto ungo ke be ingito uje ae eova embomeni jireki poeki eto kito mani mani eto sari evujo.' ainge

peroveta na kajea.”

<sup>42</sup> Eto Paul ta ke irae enu Barnabas te Paul te tambuta pahuo embomeni na enana ta degi puvuto giu ari iji nei na ke avo ehako aro ingesi ke ea. <sup>43</sup> Eto embomeni sisiketo irae pahuo Judea embomeni nei uhoho te enda nei embo uhoho Judea ga kaju ari amina Paul te Barnabas te ambo ambo uo Paul te Barnabas te na, “God na amita Meni ta ke embo ta degi hande ikasi ere ua avo mane toasova te umbuvujo,” ke ainge ea.

<sup>44</sup> Eto Giu ari iji puvunu God ta ke ingesi da embomeni tapa vahaita torukea. <sup>45</sup> Eto torukari avo Judea embomeni na kito jo ngahia enu uje ae eto Paul ta degi tini kambari ke ijie Paul ta ke ena avo ke be mane sokova ke eo <sup>46</sup> Paul te Barnabas te na ke sovera eto einge ea, “Ke javotoho erevi God na ungo Judea embomeni ta degi kiti aro ingova uje ere ua rate ungo na ke sokova ke ereva avoeto ungota ujekari na ungo datoho irari umbari haiteko mane avo eto nango enda nei embomeni ta pambuto ke hande asora <sup>47</sup> amo nango Bada na einge ara ijija. ‘Na ungo enda nei embomeni ta usasa iketena eto orekari avo ungo na enda tapa ta ikasova.’” ainge enu <sup>48</sup> enda nei embomeni na Paul ta ke ingito tunga javotoho eto tapa amuna God na matu sirikena amina God ta ke be hotembeto datoho irari umbuna. <sup>49</sup> Eto ainge nombo God ta ke na enda amo enete ena. <sup>50</sup> Rate Judea embo na enda nei pamone okokose avo Judea ga kaju ea te da ta embo okokose tapa jo kajeo haperekenu Paul te Barnabas te kurumbeo <sup>51</sup> utu endasa torovikeo bovunu da nei javo Iconium ta pambua. <sup>52</sup> Eto Iesu ta ambotani tapa da Antioch ta miti-aetera amo Ahihi Otohu te tunga javotoho ari te na jo enetena.

## 14

### *Da Iconium ta ke hande ea*

<sup>1</sup> Eto matu ea ainge nombo Paul te Barnabas te na da Iconium ta Judea embomeni ta giu ari bande ta

toreto ke hande eo Judea embomeni te enda nei embomeni te aingeto ke avo ingito ke be hotembeto ambo ambo ea. <sup>2</sup> Rate Judea embo nei nei na ke avo uje ae eto da nei embo ta jo kajeo ereto ambotani ta degi tumo ea. <sup>3</sup> Eto ambotani ai iji koso mitie Bada ta ke ngahia na hande ea eto God na amita Meni na embo orekasuja amita ke amo God ta degi ta eto puvurari avo kiora ambotani ta degi God na sovera ikenu ari neite neite eo kia. <sup>4</sup> Eto da embomeni amo kateketo Judea embomeni tunga umbua eto nei kateketo ambotani tunga umbua <sup>5</sup> avo eto enda nei embomeni te Judea embomeni te enana ta titi jigari embo te na ambotani ta degi tumo eto koro na taro amburoja ari ke eo <sup>6</sup> ingito Paul te Barnabas te na da javo Lystra te Derbe te amita enda Lycaonia ta pambuto <sup>7</sup> God ta ke hande ea.

### *Paul te Barnabas te na da Lystra te Derbe te ai ta pambua*

<sup>8</sup> Eto da Lystra ta embo amo e ta oti ta eto popora ari bena avo eto isa ari kiae serekari pere <sup>9</sup> ovotina mitie Paul na embomeni ta degi ke ijinu ingina. Eto Paul na embo avo God ke be ari embo avoeto kondari inono kito embo avo kon eto kito <sup>10</sup> gagaha eto ke einge ena, “Umo ereto utu na hete,” ainge enu ereto joro ue isa ena. <sup>11</sup> Eto embomeni na Paul na do ena avo da Lycaonia ta ke na einge ea, “Ahihi na embo ta hamo asuketo Utu ta eto irerembeto puvera,” ke ainge <sup>12</sup> eto Barnabas amo javo Zeus ikea eto Paul amo ke ari embo avo eto javo Hermes ikea. (Eto Lycaonia embomeni ta God ingeni na ari amo javo Zeus te Hermes te avo ikea. Eto Hermes amo ke ari embo avo ea.) <sup>13</sup> Eto ahihi javo Zeus ta priest okose na Zeus ta pene ikari bande da engiti ai ta o cow sianda heriso te i buji te aingeto umbuto da pe ta puvuto hetena, amita be amo amite amita embomeni tapa na ambotani heriso jakeka ue pene ikasi o teto puvua. <sup>14</sup> Eto Paul te Barnabas te duru avo ingito enana ta bo jigito oseseketo

embo ta ugoro ta gagaha ijie pambuto ke einge ea, <sup>15</sup> “Embo tapa ungo do ere ove, nango ungo ainge nombora, eto dago puvera amita be amo God ta ke javotoho ungota degi ta aro donda ari sasapura erevi toto vasiri te God ta degi puvuresova eto Utu te eva te enda ta donda tapa emo God na ari ra. <sup>16</sup> Eto iji matu embomeni na enana ta uje na degi eonga eonga ere pahuatera avo God na taekae <sup>17</sup> rate God ke be te mitia eto embomeni na kiora hande jajavotoho ikerekeuja amo erevira, Utu ta ga iji inono ta beuja eto donda be hoeuja eto embomeni na umbuto indito tunga javotoho eora.” <sup>18</sup> Ke ainge eo embomeni na pene ikasi ea amo toari uje ae rate toa. <sup>19</sup> Eto Judea embomeni da Antioch ta eto da Iconium ta eto puvuto embomeni ta degi ke eo jo haperekenu koro na umbuto Paul teo ambuna avo be amburari ke eto jigito goruketo umbuto pambuto da sahu ta ikea. <sup>20</sup> Rate ambotani nei nei na joeketo mitio ereto da asa ai evito Barnabas ga da Derbe ta pambuna.

*Paul te Barnabas te na egerembeto Antioch, Syria jo ta pambua*

<sup>21</sup> Eto Paul te Barnabas te na God ta ke javotoho da Derbe ta hande eo ingito embomeni isapamane ke be ingito ambotani ea. Eto egerembeto da Lystra eto da Iconium eto da Antioch, Pisidia ta pahue <sup>22</sup> ambotani ehaha ta sovera ari iketo enana Iesu ta ke be tumota ara ke einge ea, “Ungotena osaga neite neite kogue mitima God ta degi hotari umbuto amita tombu ta iresora eto amina ungotenau King asuja.” ainge ijie ate ere poekitiaetera. <sup>23</sup> Eto Paul te Barnabas te na ekalesia vahai vahai ta titi jigari embo umbuto ikerekea. Eto God ta degi pari ue indari ajireketo Iesu ta ke be ari embomeni umbuto Bada na simba aja amita ingeni ta iketo toa. <sup>24</sup> Eto enda Pisidia toto enda Pamphilia ta pambuto <sup>25</sup> da Perga ai God ta ke hande eto <sup>26</sup> da Attalia ta pambuto

e nga umbuto da Antioch enda Syria ai ta pambua. <sup>27</sup> Amo ai da Antioch ekalesia embomeni na Paul te Barnabas te God ta pure javotoho ara pari eto God ta ingeni ta iketo toto enda nei ta pambua avoeto enana Antioch ta ehako puvuto ekalesia embomeni jage eo vahai ta puvuo God na tapa do ena eto enda nei embomeni na God ta ke javotoho ingito ke be ijio God na embomeni avo amita toho be umbuna avo hihi tirio ingia. <sup>28</sup> Eto ai ambotani nei ga iji koso be mitiaetera.

## 15

*Jerusalem jo ta torukea*

<sup>1</sup> Eto embo nei Judea ta eto Antioch ta puvuto namei kamei ate poekitie ke einge ea, “Eto enda nei embomeni na Moses ta ke pepeni matu kajari mitia avo ambo ambo eto hamo kakamba asora. Eto kakamba ae amo God na enana mane orekasuja,” ainge eo <sup>2</sup> Paul te Barnabas te tumo eto enana ga jujune ke peni vahai mine ara ea. Avoeto Antioch ta ekalesia na Paul te Barnabas te embo nei uhoho te aingeto da Jerusalem ta ekalesia ta embo okokose te apostle te na ke do aro avo kesi ikeo pambua. <sup>3</sup> Eto ekalesia na Jerusalem degi ta pekasi umbuto pambuto peketo toto Barnabas te Paul te pahumite da Phoenicia te Samaria te amita ekalesia ta degi ke asi hetea. Eto heteto enda nei embomeni God ta ke ingito jo haperekenu God ta ke ambo ambo ea avo eo ingito tunga javotoho ea. <sup>4</sup> Eto toto Jerusalem ta pahuo apostels te ekalesia ta okokose te na kito tunga javotoho uo Paul te Barnabas te na God na enda nei ta do ena avo hihi tirio ingia. <sup>5</sup> Eto ambotani nei uhoho javo Pharisees na ke avo ingito ereto ke mine einge ea, “Enana enda nei embomeni na ando kakamba eto Moses ta ke pepeni be avo agi ara aro ingesora.” Ainge eo <sup>6</sup> apostles te embo okokose te na ke peni avo vahaita torukitio <sup>7</sup> iji koso be ke kaseo Peter na ereto ke einge ena, “Nau namei kamei ungo

kiarira God na na kiti enda nei embomeni ta degi amita ke javotoho hande ana ungota degi ta eto umbuto ikena avo eto ene ingihe itiketo ambo ambo ea. <sup>8</sup> Eto God embo ta jo kiari embo na enda nei embo amo javotoho kito amita degi hande eto Ahihi Otohu ikena nango ainge. Eto nango Judea embomeni na kiora ainge ena. Avoeto God na enda nei embo ere uhua avo nango ere kogora eto God na enana nei nango nei ke ae <sup>9</sup> rate enana God ta ke amo ke be hotembitera avo eto enana ta jo egetei javotoho etera God na enda nei embo hamo kakamba ara ke aera <sup>10</sup> avo eto ungo do eto God ta degi eto kiari ikitie ambotani ehaha ta degi ando bouka ere ikiteve? Eto bouka amo nangota Ohihi umbari inono ae eto nango umbari inono ae. <sup>11</sup> Be kivujo, nango enana ainge God ta ke avo be hotembitie Bada Iesu ta hande na orekasuja,” <sup>12</sup> Ainge enu embomeni na ingito ke jamo eto onde jevito Barnabas te Paul te ta ke ingia. Eto God na ari sovera neite neite enda nei embomeni na kito ke be ara Paul te Barnabas te ta ingeni na ena avo ke eo ingia. <sup>13</sup> Eto ke irae enu James na ereto ke einge ena, “Nau namei kamei nau ke ingivu, <sup>14</sup> eto embo Simon Peter na ke etei ingera amo God na enda nei embomeni amita toho aja unduresi itiketo umbuna avo etei ingera <sup>15</sup> ari aingeko amo peroveta na God ta ke kajari avo einge mitia. <sup>16</sup> ‘Bada God na einge erea, Na amita ambota ehako egerembeto puvuto David ta bande aimbeto beto sio sao ari avo puvuto siriketo ehako gerikasona. <sup>17</sup> Eto embo nei na na jombure aisora amo enda nei embo avo jage ano puvuto toho nau asora.’ <sup>18</sup> ainge Bada God na eria amo matu be ingito kajea.” <sup>19</sup> Eto James na ke nei einge ena, “Hotembari nau amo enda nei embo God ta degi ere hora avo ungotte bouka mane ikasora <sup>20</sup> te enana ta degi ahari kajaro kesora amo indari enda ta God ingeni na eto pene ikari amo sapura avo eto mane indesora. Eto nei amo embo na

mane tiha asora. Nei amo o sasaga te mane indesora. Eto nei amo sasaga be avo mane indesora. <sup>21</sup> Eto amita be amo iji koso be Moses ta ke pepeni avo giu ari iji te enda tapa ta Judea embomeni ta God jakeka ari bande ta etekeore ingiora eto Moses ta ke amo da tapa ta eore ingiora.” ainge James na ena.

### *Ahari enda nei ambotani ta kajea*

<sup>22</sup> Eto apostles te embo okokose te ekalesia embomeni tapa na jo vahai eto embo siriketo Paul te Barnabas te ga da Antioch ta pambara ikea. Eto enana ta javo amo Judas Barsabbas te Silas te amo ambotani ta embo okokose heriso avo siriketo umbua. <sup>23</sup> Eto ekalesia ta ahari kaeto ikeo umbuto pambua amo erevira,

“Ungo enda nei embomeni da Antioch te Syria te Cilicia te amita jo ta miteva avo nango Apostle te embo okokose te eto ungota namei kamei na ere pekitora. <sup>24</sup> Eto nango duru ingera amo dagota embomeni na ungota degi pambuto bouka peni vahai iketere osaga ere kogova amo nango na ae rate enana ta uje na etera, <sup>25</sup> avoeto nango vahaita toruketo embo ungota degi ikaro pambara siriketo umbera. <sup>26</sup> Eto umbera amo ungotenau tunga humbari embo Paul te Barnabas te amo ungotenau Bada Iesu Keriso ta ke agi ue sari ari oju ae eora amiga pambasora <sup>27</sup> avo eto embo Judas te Silas te ikaro pambuto ungota degi ahari ta ke ere kaitera amita ke inono avo ungota degi aro ingesova. <sup>28</sup> Eto ke emo Ahihi Otohu te nango te jo vahai eto ungota degi ke pepeni bouka mane ikasora te ke erevi aro ingito agi ava erera. <sup>29</sup> Indari enda ta God ingeni na eto pene ikari mane indesova, nei sasaga mane indesova nei o sasaga te mane indesova eto nei tiha mane asova. Eto ungo ke erevi agi ue irivujo, orere re.”

<sup>30</sup> Eto Jerusalem ta ekalesia na duru ikari embo ikeo da Antioch ta pambuto ambotani eo vahaita puvuo ahari ikeo <sup>31</sup> umbuto eteketo



ke javotoho kito tunga javotoho ea. <sup>32</sup> Eto Judas te Silas te amo peroveta avoeto namei kamei ta degi iji koso ate poekeo ando ngahia te sovera ari umbua. <sup>33</sup> Eto uhe mitiaetera namei kamei na Judas te Silas te peketo ikeo da tohota ta egerembeto pambua. <sup>34</sup> (-) <sup>35</sup> Eto Paul te Barnabas te da Antioch ta iji koso mitie embo isapamane ga God ta ke ate ere poekitiaetera.

*Paul te Barnabas te degi eonga ara pambua*

<sup>36</sup> Eto iji nei Paul na Barnabas ta degi ke einge ena, “Ungote da matu pambuto God ta ke hande uera avo namei kamei naingeto mitere avo ungotte pambuto kesora,” ainge enu <sup>37</sup> Barnabas na John Mark umbuto pambasi uje ena, <sup>38</sup> rate Paul na John Mark umbuto pambari uje ae ena amita be amo enana ga matu pambuna amo da tapa ta pambari uje ae eto da Pamphilia ta eto toto egerembena avo eto uje ae enu <sup>39</sup> Barnabas te Paul te jujune eto degi eonga pambua. Eto Barnabas na Mark ga e nga ta ituka Cyprus ta pambua. <sup>40</sup> Eto Paul na Silas umbuto pambasi unu amita namei kamei na Bada na simba ururou pambara pari eo pambua. <sup>41</sup> Eto amina Syria te Celicia degi ta pambuto ekalesia ta sovera ari ikerekenu umbua.

## 16

*Timothy na Paul te Silas te ga pambuna*

<sup>1</sup> Eto ainge nombo Paul na da Derbe ta eto da Lystra ta pambuna eto ambotani vahai javo Timothy ai mitiaetija. Eto Timothy ta e amo Judea pamone rate Iesu ta ke ambo ambo ere uatija eto Timothy ta mamona amo enda Greek embo. <sup>2</sup> Eto da Lystra te da Iconium te amita namei kamei na Timothy osa ue embo javotoho ke ere ijaetera <sup>3</sup> avo eto Paul na Timothy umbuto pambasi uje eto amita hamo kakamba ena amita be amo

Judea embo na Timothy ga umoro ari uje ae asora eto amita mamona amo Greek embo matu kiari avoeto hamo kakamba <sup>4</sup> eto pahumite da vahai vahai ta ekalesia ta ke pepeni Jerusalem embo okokose te Iesu ta ambotani te aingeto matu ikari avo eo ingio agi ara ke ea. <sup>5</sup> Eto ekalesia na sovera ari umbuto Iesu tumota be ea eto embo nei nei na kaju eo embo peni vahai ena.

*Paul na da Troas ta eture kina*

<sup>6</sup> Eto enana enda javo Galatia amita tutumo javo Phrygia amita orohuta pambuto Asia Province ta puvua te Ahihi Otohu na ke hande ari avo taekena <sup>7</sup> avoeto teho pambuto enda Mysia ta tane ta puvuto Bithynia Province ta pambasi uje ea rate Bada Iesu ta Ahihi na taekena <sup>8</sup> avoeto toto Mysia enda orohuta pambuto da Troas eva hora ta puvua. <sup>9</sup> Eto ai evie Paul na eture ta enda Macedonia embo na puvuto heteto mitie penunu einge ena avo kina, “Puvuto nango Macedonia embo hondate e,” ainge enu <sup>10</sup> ingito ereto God ta ke javotoho enda Macedonia embomeni ta degi nango na ke hande ara avo God na uje ena avo hotembeto Macedonia ta pambasi nununga ea.

*Da Philippi pamone javo Lydia na God ta ke ingito ambo ambo ena*

<sup>11</sup> Eto nango nununga eto e nga umbuto da Troas toto tambueto puvuto ituka nei Samothrace ta evito pambuto da Neapolis ta pambuto <sup>12</sup> e nga toto enda ta pambuto Macedonia ta Province vahai da okose javo Philippi ai ta Roman embomeni na puvuto kogombeto mitiaetera ai ta puvua. <sup>13</sup> Eto iji isapa mitimite giu ari iji puvunu da ahone umoti ta Judea embo ta pari ari degi irari ke hotembeto jombure ue pahumite pamone ai toruketo mitio puvuto tambuto pamone ga arumbeto ke eo <sup>14</sup> da Thyatira pamone vahai javo Lydia amo enda nei pamone amina ke avo ingina. Eto pamone

amo bo pangari ove javotoho ombari pamone amo God jakeka ere ijaetija amina Bada na amita hotembari ikenu Paul ta ke be ingina. <sup>15</sup> Eto amite amita da pe vahai embomeni te vahaita bapataito eo amina nangota degi ke einge ena, “Ungo, na Bada ta ambotani be hotembiteva avo nau bande ta have ungotte irore,” ainge ke sovera eto enu nangota jo haperekenu amiga pambua.

*Paul te Silas te Philippi embomeni na tipura ta ikea*

<sup>16</sup> Eto iji vahai nango pari ari degi ta pahuo embo ta pure ari kakara ahihi sapura na jo ta toreto sovera ikenu ambota do puvuresuja avo harikena. Eto embo na ambota do puvuroja ke ena avo ingesi uje eto kakara simba ari embopo ta degi koro ikeo kakara na ke avo harikenu simba ari embopo na koro peni vahai be ere uhuaetera. <sup>17</sup> Eto kakara amina Paul te nangote kiti pahuo amina ambota putuhunu amita ahihi sapura na enu ingito jage einge ena, “God Sinderi te i be ta amita ke hande ari embo God na ungo nainge eto orekasuja avo ke ijie ere ora.” <sup>18</sup> Eto iji isapamane ainge jage kaiketo ijinu Paul na tumo eto overeketo kakara amita ahihi ta degi ke einge ena, “Iesu Keriso ta javo ta erena umo tambuta pura.” ainge enu ahihi na tambuta puvuto pambunu <sup>19</sup> kakara amita simba ari embo na koro umbari degi irae enu hotembeto <sup>20</sup> Paul te Silas te umbuto goruketo embo okokose da orohuta mitia ai umbuto pambuto Roman titi jigari embo ta degi iketo ke einge ea, <sup>21</sup> “Judea embo emina ungotenau da embomeni isoro ara jo kaitere ingito umbuto ere putuhora amita be amo enana nango Roman embo na nangota ke pepeni avo poeketo enda nei ta ari avo umbara ke erera.” ainge eo <sup>22</sup> embomeni tapa na jo vahai eto toruo Roman ta titi jigari embo okose na Paul te Silas te ta bo houketo <sup>23</sup> esi ngahia na tara ikeo sapura be na tea. Eto embo okose na

tipura simba ari embo ta degi iketo be vahaikaja ke ena. <sup>24</sup> Eto tipura ta simba ari embo na ke aro ingito umbuto tipura ta bande jo be ta gosuketo i tevo pepeni pere heriso na utu ta kikira ena. <sup>25</sup> Ainge eto mume orohuta Paul te Silas te God jakeka ue haveni ijio tipura embo nei uhoho na ingihe mitio <sup>26</sup> enda titira peni vahai enu tipura ta bande tiroki tiroki enu bande bokiri tapa hirikenu embomeni ta chain na embomeni ta ingeni ta utu ta tigia amo karaun eto bona. <sup>27</sup> Eto tipura simba ari embo na evimite ereto bokiri tapa hirikari kito embo jo ta tapa matu pambari ke hotembeto asivo kororo eto umbuto umo oenga kaeto amburesi unu <sup>28</sup> Paul na kito jage peni vahai eto, “Umo ainge to. Nango tapa mitera,” ainge enu <sup>29</sup> tipura simba ari embo na usasa jage enu umbuto puvunu sau sau jo ta toreto tatatata ue Paul te Silas te heteto mitio utu ta sinena ue beto ereto <sup>30</sup> embo umbuto tambuta pahue ke einge eto ingina, “Na do ano embo na na orekaro?” ainge enu <sup>31</sup> Paul na ke einge ena, “Umo Bada Iesu be tumota asoa umo te no da pe vahai embomeni avo orekasuja,” <sup>32</sup> ainge eto amite amita bande vahai embomeni ta degi Bada ta ke hande uo <sup>33</sup> enana ta ando ta matu momono avo egitio tipura simba ari embo te amita da pe vahai embomeni te bapataito ena. <sup>34</sup> Eto mume vahai Paul te Silas te umbuto bande ta bitio donda ikeo india. Eto amite amita javo vahai embomeni te God ke be ijie tunga javotoho ere uaetera.

<sup>35</sup> Eto iho bujenu Roman embo okokose na police embopo ikeo pambuto ke einge ea, “Embo evi ikejo tambuta pambare,” ainge eo <sup>36</sup> tipura simba ari embo na Paul ta degi ke einge ena, “Enana okokose na umo te Silas te tambuta pambava ke iketere puvija avoeto tunga jamo jamo te tambuta pambuvujo,” ainge enu <sup>37</sup> Paul na police embopo ta degi ke einge ena, “Rome embomeni ta ke pepeni amo embo na Rome ta citizen avo mane tasora eto nei

amo court eto ari sapura tambae amo Rome ta citizen avo tipura ta mane gosukasora, rate nango Rome ta citizen eto nangota ari sapura tambae sio tipura ta gosuketera te enana na nango kiae ondiketo pambara ererete? Nango mane pambasora te enana Roman embo okokose na puvuto bokiri hirikaro pambasora,” ainge enu <sup>38</sup> police embopo na Paul ta ke avo Roman embo okokose ta ke eo ingito joru eto <sup>39</sup> pambuto me kogue aja to eto ingeni umbuto tambuta puvuto, “Ungo nangota da toto pambuvujo,” ainge jokeka ke na ea. <sup>40</sup> Eto Paul te Silas te tipura toto pamone Lydia ta bande ta pambuto namei kamei ta degi onde katari ke ikeo sovera ari umbuo toto pambua.

## 17

### *Paul te amita namei kamei te na da Thessalonica ta osaga kia*

<sup>1</sup> Eto pambuto da Amphipolis toto pambuto da Apollonia toto pambuto da Thessalonica ta puvuto Judea embo ta giu ari bande ai mitie <sup>2</sup> Paul na ari amita matu ainge ere uatija avo giu ari iji tapa <sup>3</sup> ainge God ta ke embo ta degi ate poekitioi <sup>3</sup> amita be amo deire avo mine ara eto sirikitiaetera. Eto Paul na ke einge ena, “Ke matu peroveta na kajari avo ungota orekari embo na puvuto ando ta memenga kito amburesuja eto ehako vasiri te erasuja eto embo amo matu puvija amo embo nei mane Iesu avo ungota orekari embo avo ungota degi erena,” ainge enu. <sup>4</sup> Judea embo nei uhoho na Paul ta ke avo be hotembeto Paul te Silas te ga kaju ea. Eto Greek embomeni isapamane God jakeka ere ijiaetera amite da ta embo okokose ta airi te aingeto kaju ea. <sup>5</sup> Rate Judea embomeni nei da Thessalonica ta mitiaetera na tumo eto embo sasapura degi ta kito umbuo puvuto da embo tapa ta jo kajeo ereto Jason ta bande ta toreto Paul te Silas te umbuto court asi jombure ea, <sup>6</sup> rate tambae

eto Jason te amita namei kamei te avo umbuto goruketo pambuto da ta embo okokose ta degi iketo ke ngahia na eto einge ea, “Embomeni emo enda tapa ta ari sapura eora avo da ungotenau ta puvere <sup>7</sup> Jason na umbuto amita bande ta ondiketei mitere umbuto puvera. Eto enana na Rome ta king amita ke pepeni avo ke be ae ue Iesu avo king nei ke erera,” ainge eo <sup>8</sup> da ta embo okokose te embomeni tapa na ingito jo memenga enu ke peni vahai eto o a ea. Eto enana okokose na “ainge mane asova” ainge eo <sup>9</sup> Jason te amita namei kamei te na koro na ombuto pambua.

### *Da Berea embomeni na Paul ta ke be ea*

<sup>10</sup> Eto mume sihukitinu amita namei kamei na Paul te Silas te ikeo da Berea ta pambuto Judea embomeni ta giu ari bande ta toreto ke ijio <sup>11</sup> da Thessalonica ta embomeni ainge mane rate onde hiriketo ke ingesi uje be eo iji vahai vahai Paul na onde katitinu embomeni na Paul ta ke amo be rete sokova re avo God ta ke kajari avo kesi jombure ere uaetera. <sup>12</sup> Avo eto da Berea ta Judea embomeni isapamane te Greek embomeni te Greek hajae vajae pamone isapamane te aingeto Iesu ke be ere ijiaetera. <sup>13</sup> Eto da Thessalonica ta Judea embomeni na Paul da Berea ta pambuto God ta ke hande ari ke ingito puvuto embomeni ta jo kajeo ereto tumo uo <sup>14</sup> amita namei kamei na Paul ikeo eva ta e nga umbasi pambuna. Rate Timothy te Silas te da Berea toto pambae ai mitiaetera. <sup>15</sup> Eto embo nei e nga ta Paul umbuto da Athens ta pambua enana ta degi Paul na Timothy te Silas te sau sau Paul ta degi Athens ta pambara ke enu Athens toto egerembeto da Berea ta puvuto ke ea.

### *Paul na da Athens ta ke ena*

<sup>16</sup> Eto Paul na da Athens ai Timothy te Silas te puvurora simba mitie da ai ta enda ta god ingeni na ari isapamane kito Paul ta jo memenga

enu <sup>17</sup> Judea embomeni ta giu ari bande ai pambuto Judea embomeni te Greek embomeni te aingeto ke ngahia mine ara ere ijiaetera. Eto Paul na iji vahai vahai da orohuta heteto mitinu embomeni na isa uore ke hande ere uatija. <sup>18</sup> Eto enda Greek ta atepoekari embo nei javo Epicurean te nei javo Stoic te na Paul ta degi puvuto ke kaseto embo nei uhoho na Paul ta ke ingito ke einge ere ijiaetera. “Embo amina amita siro isapa kiari irae na eria,” ainge eto embo nei na Paul ta ke Bada Iesu ambuto ehako vasiri te erena avo enu ingito “enda nei ta God avo eria” ainge eto <sup>19</sup> Paul umbuto pambuto Council javo Areopagus ta ikeo hetenu amita degi einge ea, <sup>20</sup> “Umo ke erea amo ingari nei avo eto no ke amita susu be avo ejo nango be ingore” ainge ea <sup>21</sup> (eto ke amita be amo da Athens embomeni te enda nei embomeni te enana ga mitiaetera amina pambuto pure peni ae umoro ue mitie ke eha gamo avo ingesi uje ea.) <sup>22</sup> Eto Paul na ai heteto Areopagus council ta degi ke einge ena, “Athens embomeni ungota ke asona ingivujo. Na ungota da ta puvuto isa ue tumotepain ari bande isapamane kena. <sup>23</sup> Eto pene ikari gaga vahai ai ta kena amo ke einge kajarira, ‘God kiae amita degi ra,’ ainge kena amo ungo God kiae jakeka ereva amita ke amo eha ano ingesova. <sup>24</sup> Amo God na enda te enda ta donda tapa emo amita ingeni na ena avoeto amo enda te Utu te amita embo dombo avoeto embo ta ingeni na bande ari ai mane iriuja <sup>25</sup> rate God na embo ta degi hondate ari ta penunu mane euja te God na mine vahai embo ta degi vasiri te honenge te donda tapa ikerekeuja. <sup>26</sup> Eto God na embo vahai ove ena amita be na enda tapa enetetija amo enda nainge nainge iresora <sup>27</sup> amo God na matu kiti siriketo embo na pambuto mitie jireki poeki eto God jombure eto kiora ena, amita be amo God hoita irae eto ma ta irae araha tambuto mitia. <sup>28</sup> Eto ungota ke ari embo

vahai na ke einge matu kajena, ‘Eto ungotena God ta jo ta vasiri ue mitera,’ ainge ena eto ungota embo nei na einge ena ‘nango amita meniundi ra,’ ainge ena. <sup>29</sup> Eto ungotena amita meniundi avo eto embo ta ingeni na gold na silver na atara na ove ari avo ke be mane hotembasora. <sup>30</sup> Eto embo matu God kiae amo God na hotembeto toasuja <sup>31</sup> rate iji puvuresuja avo embo siriketija amina embo tapa ta vasiri avo eto amita ke be na hajire ikasuja avoeto embomeni amina ungota ari sasapura toara God na eria. Eto embo siriketija avo God na embomeni kito ke be ara enu vasiri te ehako erena.” <sup>32</sup> Eto Paul na ke ainge enu embo nei nei na ehako vasiri te erari ke avo ingito ganini ke ea eto embo nei nei na, “No ke avo iji nei ainge ejo ingore,” ainge eo <sup>33</sup> Paul na torukari toto pambuna. <sup>34</sup> Eto Areopagus Council ta member vahai javo Dionysius te pamone vahai javo Damaris te embo nei nei te aingeto Paul ta ke avo ke be ijie Iesu ambo ambo ea.

## 18

### *Paul na da Corinth ta pambuto ke do ena*

<sup>1</sup> Eto amita ambota iji isapa Athens ta mitimite da Corinth ta pambuto <sup>2</sup> Judea embo vahai javo Aquila tambuna, embo amo enda Pontus embo rate Rome ta pambuto mitiaetija avo Roman ta King Claudius na Judea embo tapa uje ae eto kurumbenu pahuo Aquila te amita ae Priscilla te aingeto da Corinth ta pambuto <sup>3</sup> Paul amita pure vahai avo tambuto horoma ari bo avo ere kakajikitie Paul enana ga pure ue mitiaetera. <sup>4</sup> Eto Paul na giu ari iji vahai vahai Judea embomeni ta God jakeka ari bande ta toreto Judea embomeni te Greek embomeni te na Iesu avo ke be hotembara ere ijiaetija. <sup>5</sup> Eto Silas te Timothy te Macedonia ta eto puvuo Paul na pure nei do ae iji tapa Judea embomeni ta orekari embo simba ereuatera amo embo nei mane Iesu avo Judea embomeni



ta degi ke hande ereuatija <sup>6</sup> rate embo nei uhoho na ke be mane ke eto Paul ta degi ke sapura eo Paul na bo ta oniho teterenu benu ke einge ena. “Eto ungo God uje ae eto maine pahurovo amo hajire ikau kesova amo ujekari nau mane avoeto na ungo da Corinth ta Judea embomeni toto enda nei embomeni da Corinth ei ta mitera amita degi ke asona.” <sup>7</sup> Ainge eto toto da nei embo javo Titius Justus God jakeka ere ijaetija amita bande Judea embomeni ta God jakeka ari bande amita engiti ai ta mitiaetera. <sup>8</sup> Eto Judea ta jakeka bande ta titi jigari embo javo Crispus te amita jo vahai ta beari embomeni te ainge eto Bada ke be ere ijaetera. Eto da Corinth embo isapamane na God ta ke ingito be hotembeto bapataito ere uatera. <sup>9</sup> Eto mume vahai Bada na puvuto eture ta Paul ta degi ke einge ena, “Na umote iresona avo eto umo mane oju asoa eto mane pure toasoa te embomeni ta degi ke ejo ingore. <sup>10</sup> Eto da Corinth ei ta nau embomeni isapamane mitera avoeto embo nei na no hamo ta memenga mane ikasora.” ainge enu <sup>11</sup> Paul na jua vahai eto tuna ainge da ai ta God ta ke embomeni ta degi ate ere poekitiaetija. <sup>12</sup> Eto Rome gavana na embo Gallio enda Greek titi jigoja ikeo hetenu Judea embomeni na vahaita eto Paul umbuto pambuto court ta ikeo Gallio ta titi ta hetenu <sup>13</sup> ke einge ea, “Embo emina nangota ke pepeni agi ae God nei avo jakeka ara ate ere poekitia.” ainge eo <sup>14</sup> Paul na ke itiketo asi unu Gallio na Judea embomeni ta degi ke einge ena, “Embo amina Roman embo ta ke pepeni poekaetija avo na ungo ta ke uje eto onde jevito ingaetena, <sup>15</sup> rate amo ungo Judea embo ta ke pepeni avo eto ungo ta ke sio sao ereva avo na mane ingesona te ungo oenga sirikevu,” <sup>16</sup> ke ainge eto court toto kurumbenu tambuta puvuto <sup>17</sup> embo Sosthenes amo Judea ta God jakeka ari bande ta titi jigari embo avo Greek embomeni na umbuto tea rate Gallio ta jo ta nei do ae

tona.

### *Paul na egerembeto Antioch ta pambuna*

<sup>18</sup> Eto Paul na amita namei kamei ga da Corinth ai iji koso pure ue mitiaetija God ta degi ke sovera eto ajireketo siro tona. Eto amite embo Aquila te amita ae Priscilla te aingeto e nga umbuto Syria ta pambasi ue da Cenchreae hora ta Paul na amita ajirekari iji irae enu siro tiukena, <sup>19</sup> eto da Ephesus ta puvuto Aquila te Priscilla te toto Judea embomeni ta giu ari bande ta pambuto enana ga ke mine ara ena. <sup>20</sup> Eto Judea embomeni na Paul iroja ke eo Paul na iresuja avo avora ae <sup>21</sup> eto ke einge ena, “God na uje au kito avo egerembeto puvuresona,” ainge eto da Ephesus toto e nga umbuto <sup>22</sup> da Caesarea ta pambuna eto Caesarea toto da Jerusalem pambuto ekalesia peketo da Antioch ta pambuto <sup>23</sup> iji isapa mitimite enda Galatia te Phrygia te ai pambuto Iesu ta ambotani ehaha ta degi ke enu sovera ari umbua.

### *Embo Apollos na da Ephesus te Corinth amita jo ta do ena*

<sup>24</sup> Eto da Alexandria ta Judea embo vahai javo Apollos amo ke embo eto God ta ke kajari avo kiari embo be avoeto pambuto da Ephesus ta ke hande ena. <sup>25</sup> Eto God na embomeni ta irari do aingeko iresora amite eto God ta ke tapa te eto Iesu ta ke te amo tapa Apollos na kiari avoeto ke tapa do kiari avo tambueto embomeni ta degi sovera eto ke ena. Rate Apollos na embo John na umo na bapataito ena avo kina rate Ahihi Otohu na bapataito ari avo kiae <sup>26</sup> avo eto Judea embomeni ta giu ari bande ta ke avo enu ingito Aquila te amita ae Priscilla te na Apollos umbuto bande ta pambuto God ta ke nei Apollos ingae avo eo ingina. <sup>27</sup> Eto Apollos na enda Greece ta pambasi unu da Ephesus ta ambotani na enda Greece ta namei kamei na hondate ari pekari ara ahari enana ta degi kajea. Eto ahari umbuto Greece

enda ta puvuna eto ai God na embo ta degi hande te hotembari te ikenu ambotani ea amita degi Apollos na hondate ari javotoho ena. <sup>28</sup> Eto Apollos na God ta ke kajari avo kito Judea embomeni ta degi Iesu amo ungota omena ari embo avo simba ere ova ainge embo tapa ta titi ta enu Judea embomeni ta ke mine ari irae ena.

## 19

### *Paul da Ephesus ta pure ena*

<sup>1</sup> Eto Apollos da Corinth ta mitinu Paul na enda orohuta pambuto da Ephesus ta puvuto ambotani tambuto <sup>2</sup> enana ta degi ke einge eto ingina, “Ungo God ke be eteve Ahihi Otohu na ungo ta degi puveite?” ainge enu enana na, “Nango Ahihi Otohu kiaera,” ainge eo <sup>3</sup> Paul na, “Ungo bapataito eteva amita be amo deire?” ainge enu ke mine einge ea, “John ta bapataito ta ate poekari avo agi ue bapataito uera,” ainge eo <sup>4</sup> Paul na einge ena, “John na bapataito ena amita be amo Israel embomeni na ari sasapura toto embo ambota puvuresuja avo ke be hotembara bapataito ena. Eto embo amo Bada Iesu ra.” Eto ainge enu <sup>5</sup> ingito embomeni tapa Bada Iesu ta toho asi bapataito ea, <sup>6</sup> eto Paul na enana ta hamo ta ingeni tembenu Ahihi Otohu na enana ta degi puvunu ke ingari nei te nei te na God ta ke hande ea, <sup>7</sup> embo amo 12 aingera. <sup>8</sup> Eto Paul na Judea embomeni ta giu ari bande ta hariga tapa 3 ainge toreto ke ngahia na embomeni ta degi ke einge ena, “God na amita embomeni toho be ere uhua avoeto Iesu enana ta king iketija.” ainge enu ke avo mine ara ea <sup>9</sup> rate embo nei nei na ke ingae tumo eto bateto mitie Iesu ta irari degi avo embo tapa ta titi ta ke sapura na ea. Eto ainge eo Paul na toto ambotani umbuto embo javo Tyrannus ta ke kasari bande ta pambuto iji vahai vahai ke hande eo ke avo embomeni na kasea. <sup>10</sup> Eto jua heriso amita jo ta ke hande uo Judea

embomeni te enda nei embomeni te aingeto enda Asia ta mitie God ta ke ingia.

### *Embo Sceva ta meniundi 7 amita ke*

<sup>11</sup> Eto God na sovera ikitioi Paul na ari nei te nei te uoi embo kokonjekeaora. <sup>12</sup> Eto God na ainge pere unu embo na Paul ta asukari be rete tuhari bo avo umbuto amburari embo ta ikeore embo konditiaetera eto embo ta jo ta ahihi sasapura toto pahuatera. <sup>13</sup> Eto Judea embo ta ahihi sasapura kurumbari embo nei nei na degi tapa ta pahue eto kito Bada Iesu ta javo umbuto ahihi sasapura kurumbari eto ahihi sasapura ta degi ke einge ea, “Paul na Bada Iesu ke euja amita javo ta toto pambuvu,” ainge pere ere ijaetera. <sup>14</sup> Eto Judea Priest okose javo Sceva ta meniundi tapa seven amina ari ainge ere uatera. Eto iji vahai ke ainge eo <sup>15</sup> ahihi sapura na ke mine einge ena, “Iesu amo na kiarira eto Paul amo na kiarira te ungo God ta sovera umbae embopora ungo amunure?” ainge eto <sup>16</sup> embo ahihi sapura na torari embo amina isoro peni vahai be eto Sceva ta meniundi ta bo jigito perara enu hamo teho memenga tahue amita bande toto pambua. <sup>17</sup> Eto Judea embomeni te enda nei embomeni te aingeto da Ephesus ta mitie duru avo ingito oju peni vahai eto Bada Iesu ta javo amo nombo be ainge ijie jakeka ea. <sup>18</sup> Eto ke be ari embo isapamane na embo tapa ta degi enana ta saruka ari harikea. <sup>19</sup> Eto embo nei nei ta saruka ari books avo embo tapa ta titi ta undukeo evekena. Eto books amita mine amo koro silver na ari tapa 50,000 ainge avo evekena. <sup>20</sup> Eto ari ainge pere uo Bada ta ke na pajito enda enetena.

### *Da Ephesus embomeni na jujune peni vahai ea*

<sup>21</sup> Eto jua heriso enda ai ta mitiaetija Paul na Ahihi Otohu na uje enu enda Macedonia te Greece te amita orohuta pambuto Jerusalem pambasi uje ena, “Eto ai mitima

egerembeto pambuto da Rome kesona,” Paul na ke ainge <sup>22</sup> eto amita hondate ari embo heriso Timothy te Erastus te aingeto ikenu da Macedonia ta pahuo iji isapa Paul na Asia Province ta da Ephesus ai pure ena. <sup>23</sup> Eto iji aramite Bada Iesu ta ke ate poekari avoeto da Ephesus embomeni na ereto jujune peni vahai ea <sup>24</sup> amita be amo embo Demetrius na ingeni na temple isasarahi amo enda ta god pamone javo Artemis ta jakeka ari bande ainge avo silver na ove ena. Eto bande isasarahi avo embo Demetrius te amita pure ari embomeni te na ombuto koro isapa mane be ere uhuatera, <sup>25</sup> Eto embo amina amita pure vahai embomeni jage enu puvuo einge ena, “Nau namei kamei ungo kogo va ungotena pure eremina koro ere uhora <sup>26</sup> te embo Paul na god ingeni na ove ari amo god be mane ke avo da Ephesus te Asia Province ta embomeni tapa jo kaetei ahereketo embo isapamane na Paul ta ke avo ke be erera. <sup>27</sup> Avoeto ungotenau pure avo au sapura asuja eto pure pere mane ungotenau god pamone Artemis amo Asia embomeni te enda tapa embomeni na jakeka eora amo amita temple teho asuja eto ungotenau god ta javo irae aisuja.” ainge enu <sup>28</sup> ke avo ingito embomeni na gagaha te puvuto ke einge ea, “Da Ephesus ta god Artemis amo peni be ra.” ainge eo <sup>29</sup> da tapa embomeni na ingito jajage te puvuto da Macedonia embo heriso Paul ga pahue ke hande ari embo javo Gaius te Aristarchus te kito andito goruketo umbuto enana ta ke kasari degi ai pambua. <sup>30</sup> Eto Paul na ke kasari degi ta pambuto embomeni ta degi ke asi uje ena rate ambotani nei uhoho na taekea. <sup>31</sup> Eto Province ta embo okokose na Paul tunga humbuto ke kasari ta mane torasuja ainge eto ke ikeo puvuna. <sup>32</sup> Eto embo tapa jajage hohori te o a te puvua rate ke ingari embo irae amo jajage ea amite ke be amo deire amo kiae teho

puvua. <sup>33</sup> Eto Judea embomeni na embo Alexander mimikeo tambuta puvuna embomeni na Alexander na ari sapura ari ke eo Alexander na ke jamo ara ingeni na ate ate eto amina ari sapura do ae avo eto embo ta degi ke asi unu <sup>34</sup> embomeni na Alexander Judea embo kito gagaha peni vahai be 2 hours amita jo ta ke einge ea, “Da Ephesus ta God Artemis amo peni be ra,” ainge ea.

<sup>35</sup> Eto da ta ke hande ari embo okose na puvuto embo ke ere ijea avo enu jamo eo ke einge ena, “Ephesus embomeni nau ke ingivujo. God Artemis amo peni be eto amita temple ta atara otohu Utu ta beari amo Artemis ove ari avo da Ephesus na simba euja amo embo tapa na kiarira <sup>36</sup> eto embo nei na ke do mane asuja avoeto ungo jamo eto nei do mane asova eto ari sio sajo avojo. <sup>37</sup> Eto ungo na embo erevi umbuto puvua amo nangota temple ta donda pegene ae eto nangota god pamone amo sapura ke ae. <sup>38</sup> Rate embo Demetrius te amita pure ari embopo te na embo ta pehumba asi uje asora amo court umbari embo mitia avoeto court ari iji te puvuto pehumba mine ara aisora. <sup>39</sup> Eto ungo do uje asova amita ke amo iji matu ikari mitia ai torukasova. <sup>40</sup> Eto ungo eha isoro asi ere ova amita be amo irae avo eto ungotenau embo okokose na ke aro ke mine do avo, ke mine ari irae,” <sup>41</sup> ainge enu sisiketo pambua.

## 20

### *Paul na Macedonia ta eto Greece ta pambua*

<sup>1</sup> Eto da Ephesus embomeni jamopo eo iji isapa mitimite Paul na ambotani enu vahaita puvuo ando ngahia umbari ta ke eto irae enu peketo da Macedonia ta pambua. <sup>2</sup> Eto Macedonia Province ta puvuto degi ta pahue da nei nei ta heteto ekalesia embomeni ta degi ke neite neite ikenu sovera ari umbua. <sup>3</sup> Eto Greece ta puvuto hariga nei heriso

nei vahai ai mitaetija eto e nga umbuto Syria ta pambasi nununga unu Judea embo na avo tasi ari ke ingito enda ta tiumbeto Macedonia ta pambuna. <sup>4</sup> Eto embo Paul ga da Philippi ta pambua amita javo amo erevira, da Berea ta Pyrhus ta meni Sopater te da Thessolonica ta embo heriso Aristarchus te Secundus te da Derbe ta embo Gaius, te Asia ta embo heriso Tychicus te Trophimus te embo Timothy te <sup>5</sup> aingeto kiti Troas ta pambua. <sup>6</sup> Eto nango te Paul te pondo iji puvuna avo bread, yeast ikae pajirae amita pondo iji irae enu da Philippi toto e nga ta pambuto pahuo iji 5 irae unu da Troas ta puvuto hura vahai ea.

#### *Paul na da Troas ta isa ai kakane ena*

<sup>7</sup> Eto Paul na evito da nei ta pambasuja avo hotembeto Saturday mume sihukitinu nango vahaita 3 story bande ta umoro ue indie Paul na ke hihi koso be tiritinu <sup>8</sup> mume tumba orohuta usasa isapamane unduketo bande jo i be ta tetekea amo ai umoro asora avoeto ikea. <sup>9</sup> Eto Paul na hihi koso be tiritinu singa javo Eutychus amo bande otohoto ta arumbeto mitie evoja evoja unu titi vahaiketo jene kahunketo evimite burereketo otohoto i be ta eto beto teto ambunu embo na enda ta beto ohimbeto umbuto kia amo ambunu kia. <sup>10</sup> Eto Paul na enda ta beto singa ta hamo ta beto andito ke einge ena, "Ungo mane osaga asova, singa emo amita vasiri ehako puvija," <sup>11</sup> ainge eto Paul na bande ta bitito bread pereto ikenu indio hihi koso be ijinu iho bujenu toto pahunu <sup>12</sup> embomeni na singa ambuna amo ehako vasiri te amiga amita bande ta pambuto tunga javotoho ea.

#### *Paul na da Troas ta eto da Miletus ta pambuna*

<sup>13</sup> Eto Paul na nango kiti e nga umbuto tiumbeto da Assos ta pambuto avo tambara ke enu pahuo Paul ambota utu na pambuna. <sup>14</sup> Eto da Assos ai Paul tambuto e nga ta umbuto puvuto da Mitylene ta puvuto ai hetea. <sup>15</sup> Eto toto eva jo

ta evito puvuto ituka Chios seniketo puvuto iji nei ituka Samos ta puvua eto iji nei Miletus ta puvuto <sup>16</sup> Paul na da Ephesus ta pambasuja amo embomeni na taeketo iji koso iroja ke asora avo eto Paul na iji koso irari uje ae avoeto da Ephesus toto kito tambueto Jerusalem ta pambuto Judea embomeni ta pondo javo 'Pentecost' ta iji auvena avo Jerusalem ta asi uje eto sau sau pambuna.

#### *Paul na da Ephesus ta embo okokose ta degi ke ena*

<sup>17</sup> Eto Paul na da Jerusalem ta pahue da Miletus ta heteto mitie da Ephesus ta ekalesia embo okokose kesi uje eto ke ikenu pambunu <sup>18</sup> ingito puvuo Paul na ke einge ena, "Nau embo pepeni, na kiti Asia Province ta puvuto nane tapa do ere uatena amo ungo kiarira, <sup>19</sup> eto nanena na na ae sisire ae Bada ta pure avo uena. Eto Judea embo ta jo ngahia avo eto osaga peni vahai kogoue sisivu kutitie pure ere uatena, <sup>20</sup> rate ungo kogova na ke nei do tapa ondikae rate ungo hondate ari ta ke tapa avo da araha ta eto bande jo ta etene ingihava. <sup>21</sup> Na Judea embomeni te enda nei embomeni te ari sasapura avoeto God ta degi aja to ijie Bada Iesu be tumo ta ara ke sovera na ijiena. <sup>22</sup> Eto eha amo na uje nei mane asona rate Ahihi Otohu ta uje avo eto Jerusalem ta pahona. Eto ai ta do puvuresuja amo na kiaera <sup>23</sup> te na ere kogona amo da vahai vahai ta Ahihi Otohu ke hande oi kogona amo tipura te osaga te amo na simba mitera <sup>24</sup> te na amburonote teho vasiri te irono amo tehora te Bada Iesu na pure nau ikena avo God na embo ta irari javotoho avo hande ikasi uje ere ua avo ke hande ano pure irae aisuja. <sup>25</sup> Na ungota degi pahue ke hande uena amo God na titi jigihirou irari javotoho na iresova amita ke avo hande uena. Eto na ere kogona emo ungonana ehako mane kesova <sup>26</sup> avoeto iji eha eremite ungota degi ke be na erena ungo nei nei na ke be ae eto sio sao



ue maine ue ahihi datohe irari avo aijaja asova amo ujekari nau mane ujekari ungota <sup>27</sup> amita be amo God ta ke tapa ungota degi arahata ijiena <sup>28</sup> Eto ungote ungota embomeni te avo simba ava Ahihi Otohu na ikena avo eto simba evujo. Eto God na amita Meni ambuna avoeto ekalesia amita toho umbuna avo unduvujo. <sup>29</sup> Eto nei kogona amo na pahurono isoro o na puvuto undurari o kambasuja, <sup>30</sup> eto iji nei ungota toho uho na ke gamo ijiroro ambotani nei nei na ambo ambo asora. <sup>31</sup> Avoeto be kogue irivujo. Eto na mumete iji te sisivu kutitie jua nei heriso nei vahai amita jo ta ungo vahai vahai ate poekitana. Avoeto nau pure ngahia ari avo kogue hotembu hotembu evujo. <sup>32</sup> Na ungo God na simba aja totona eto amita hondate ari ta ke na ungo simba aisuja rate amina ungo au sovera aisova eto ungote amita toho uho tapa te ta hotari avo nununga ere ua. <sup>33</sup> Na ungote mitie embo nei ta koro te bo te avo uje eto umbae <sup>34</sup> rate ungo kogova uje nau te nau pure vahai embomeni te ainge eto nau ingeni na pure ue unditana <sup>35</sup> avo eto na ungo ate poekitana te donda ambu embomeni avo pure ngahia na hondate evu. Eto Bada Iesu ta ke avo hotembujo amo, 'Hande umbari amo aravora rate God na hande ikari embo kito osa euja avoeto hande embo na tunga javotoho asuja.' <sup>36</sup> Eto Paul ta ke irae enu enana tapa paunge tetere eto pari eo irae enu <sup>37</sup> sisi sasi ijie andito mune mine ara eto peketo orerere ea. <sup>38</sup> Eto Paul ta ke avo ehako puvuru enana ehako mane kesora avo hotembitie osaga peni vahai kogue e nga umbasi enana tapa amiga hora ta bea.

## 21

### *Paul na Jerusalem ta pambuna*

<sup>1</sup> Eto dago peketo toto e nga ta titi tambueto da Cos ta puvuto ai heta eto pambuto iji nei da Rhodes ta puvuto heteto toto da Patara ai

<sup>2</sup> e nga nei enda Phonecia ta pambasi unu kito ai pambua. <sup>3</sup> Eto pahumite enda ituka javo Cyprus ta kaina hena ta jorembeto puvuto enda javo Syria ta da vahai Tyre ta heteo donda umbaro beaja uo <sup>4</sup> nango ai beto ambotani tambuto enana ga hura vahai ai mitio enana ambotani ta jo ta Ahihi Otohu na ke enu enana joru eto Paul ta degi, "Umo mane Jerusalem pambaso." ainge ea. <sup>5</sup> Eto iji irae unu nango pambasi uo enana airi te meniundi te tapa da ahone ta pambuto eva hora ta paunge tetere eto nango tapa pari ea. <sup>6</sup> Eto nango pari eo irae enu mine peka eto enana egerembeto da ta pahuo nango e nga ta bitia. <sup>7</sup> Eto da Tyre toto e nga ta pambuto da Ptolemais ta puvuto namei kamei ga umoro <sup>8</sup> eto evito da Caesarea ta pambuto evangelist javo Philip tambuto amita bande ta pambuto evia. Eto Jerusalem ekalesia na embo tapa seven umbuo deacon eto Philip ga tapa pure ea. <sup>9</sup> Eto Philip ta iariri tapa nei heriso nei heriso amina jimbae teho mitie God ta proveta eto God ta ke avo hande ere uatera. <sup>10</sup> Eto nango ai iji isapa mitio proveta vahai javo Agabus na Judea enda ta eto puvuto <sup>11</sup> Paul ta pupuri bujeketo umbuto amita utu te ingeni te aingeto vahaiketo punduto ke einge ena, "Ahihi Otohu na einge eria, 'Judea embomeni Jerusalem jo ta pupuri emita mamu einge eto tigito enda nei embo ta ingeni ta ikasora,'" ainge enu <sup>12</sup> nango ingito Paul mane Jerusalem pambaja enana te nango te tapa vahaita eto taekeo <sup>13</sup> Paul na ke mine einge ena, "Ungo do eto sisi sasi ijie nau jo ere kaiteve? Na nau ando matu ngahia etija avo eto Jerusalem ta pambuto Bada Iesu avoembo punduto tipura ta ikaro torasona amo tehora o taro amburesona amo nau degi ta tehora." ainge enu <sup>14</sup> nango amita jo ari haperekari inono ae enu ke einge ea, "Bada na amita uje do aisuja avo Bada na aisuja."

<sup>15</sup> Eto iji amita ambota amo Jerusalem ta pambasi nununga eto <sup>16</sup> pahue da Caesarea ta ekalesia embo nei uhoho amina dago umbuto embo Mnason amo ambotani matu enda Cyprus embo avoeto amita bandeta evesi pambua.

*Paul na James ga umoro ena*

<sup>17</sup> Eto nango na Jerusalem ta puvo namei kamei na nango osa osa ue pekea. <sup>18</sup> Eto evito Paul na nango ga James kesi pahunu ekalesia ta okokose tapa vahaita uo kito <sup>19</sup> Paul na peketo enana ta degi God na sovera Paul ta ikenu enda nei embomeni ta degi ari nei te nei te tapa do ena avo enu <sup>20</sup> ingito God jakeka eto Paul ta degi einge ea, "Namei kijo, Judea embomeni tapa thousands ainge amina Bada Iesu ta ke avo ke be ijie ambo ambo ere ora eto Judea embomeni ta ke pepeni mamatu matu avo sapura ae javotoho na agi eora, <sup>21</sup> rate enana duru ingera amo inena Judea embomeni enda nei nei ta iriora amita degi pambuto Moses ta ke pepeni avo Judea embo ta meni isasaraho ta ando kakamba mane ara etea eto Judea embo ta ari tapa avo mane ara etea <sup>22</sup> amita duru avo ingito mitere umo puvea, avo enana ke ingito umo tasora <sup>23</sup> avo eto umo nainge eto hondate asora avo nangota ke asora avo agi ejo. Eto embo tapa nei heriso nei heriso amina God ta degi hae kaeto mitera <sup>24</sup> amiga pambuto hande ikejo tongopa irae ai. Eto o heveto hande ikasova amita mine amo koro no amina umote embo heriso nei heriso avoeto ombujo. Eto ainge ao enana na Moses ta ke agi ue siro tiukasora ari amo embomeni na kito duru matu ingera avo sokova ke asora eto inena Moses ta ke pepeni avo jigama ari ke asora. <sup>25</sup> Eto enda nei embomeni na Iesu ke be ijie ambo ambo ue ke pepeni do agi asora avo nango na ke kaseto ahari ta kaitara amo indari enda ta God ingeni na eto pene ikari amo sapura avoeto mane indesora, eto nei amo sasaga be avo mane indesora. Nei

amo o sasaga te mane indesora eto nei amo embo na mane tiha asora." Eto ke avo eo irae enu <sup>26</sup> iji nei Paul na embo nei heriso nei heriso ainge umbuto pambuto Judea embomeni ta ari avo tongopa irae eto temple jo ta toreto enana ta ajirekari iji teka ena amo ajirekari iji tutumota o boraro evekasuja avo Priest ta degi ke ena.

*Embo na Paul temple jo ta egimbeto umbua*

<sup>27</sup> Eto ajirekari iji 7 tutumo asusumbitinu Judea embomeni enda Asia ta eto puvurari amina Paul temple jo ta kito peiketo umbuto embo tapa ta jo ta ke gagaha eto einge ea, <sup>28</sup> "Eto Israel embomeni, ungo hondate evu. Embo emina enda nei ta pahue Moses ta ke pepeni te ungotena Israel embomeni te ungotenau temple avo sokova ke euja, eto amina enda nei embo umbuto temple otohu ei ta toreto etei sapura etija," <sup>29</sup> ke ainge ea amita be amo Paul na embo Trophimus da Ephesus embo amiga Jerusalem jo ta isa unu kia avo umbuto temple jo ta torari ke ainge eo <sup>30</sup> da embomeni tapa na tumo eto temple jo ta tutuveto pambuto Paul jigito goruketo tambuto puvuto temple bokiri pe ahurekea. <sup>31</sup> Eto embomeni na Paul taro amburoja uo Roman isoro embo ta titi jigari embo na Jerusalem embomeni na sio sao ari ke avo ingito <sup>32</sup> amita isoro embo te isoro kiti umbari embo te beto umbuto tutuveto puvua. Eto embo na Paul toruo isoro embo puvutuhuo kito toa. <sup>33</sup> Eto isoro ta titi jigari embo na Paul andito chain heriso na pundurora ke embomeni ta degi ke eto einge eto ingina, "Embo amo amunure eto amita ari sapura deire?" ainge ijinu <sup>34</sup> embo na ke peni vahai ijie o a ijio embo okose amina Paul ta sapura avo eto ingari inono ae enu amita isoro embo ta enu Paul umbuto amita bande peni ai ta bitesu uo <sup>35</sup> embomeni na sio sao tasi uo Roman isoro embomeni

na Paul ohimbeto umbuto indiri ta bitio <sup>36</sup> embo isapamane na, “Paul tevujō amburoi.” ainge ea.

*Eto Paul na Judea embomeni ta degi ke ena*

<sup>37</sup> Eto enana Roman isoro embomeni na Paul umbuto enana ta irari bande peni ta torasi uo Paul na isoro titi jigari embo ta degi ke einge ena, “Na no degi ta ke asona amo aravorete?” ainge enu embo peni amina ke mine einge ena. “Ajae, umo Greek ke ingari ra <sup>38</sup> te Egypt embo vahai na amita tunga tiukari embo tapa 4,000 ainge umbuto gavana ta degi isoro asi degi o jagatambu ta pambuna umo embo aravo hotembetena rate umo Greek embomeni ta ke ingari rate umo embo avo manera.” ainge enu <sup>39</sup> Paul na ke einge ena. “Na Judea embora. Na nau aja na enda Celicia ta da Tarsus ai ingena avo eto na da okose amita embora. Avoeto na embomeni ta degi ke asona amo aravorete?” ainge enu <sup>40</sup> isoro embo peni na aravora enu Paul na indiri ta heteto ingeni na ate ate enu embomeni jamopo eo Paul na Judea embomeni ta ke na enana ta degi einge ena.

## 22

<sup>1</sup> “Nau mamamane te nau namei kamei te nau embomeni tapa nau ke ingivujo, eto na amunure avo ungota degi ke asona,” ke ainge itiketo enu <sup>2</sup> embomeni na amita ke hajire ingito amo Judea embo ke hotembeto ke jamo jamo eo <sup>3</sup> Paul na ke einge ena, “Na Judea embora eto enda Celicia ta da Tarsus ai ta nau aja na na umbuna rate na da Jerusalem ei ta pajio embo Gamaliel na na ate poekitaja eto ungotenau ohihi ta ke pepeni tapa Moses na kajena avo ate poekena eto na ungo eova ainge inono God osa ue ke agi uena. <sup>4</sup> Eto nanena embomeni Iesu ambo ambo ari degi ta pahuo osaga ikitie teo ambuvujekea. Eto nanena embo te pamone te umbuto tipura ta ere gosukitiaetena. <sup>5</sup> Eto na ke erena emo

Priest okose te council embomeni na aro ungo ingari haitekora amo enana ta ahari da Damascus ta Judea embomeni ta degi Iesu ta ambotani chain na punduto umbuto pambuto Jerusalem ta ikano tara nanena ahari umbuto pambua.

*Paul ta jo haperekenu Iesu ambo ambo ena avo hihi tirinu ingia (Acts 9:1-19, 26:12-18)*

<sup>6</sup> Eto na degi ta pahumite da Damascus auvitio iji orohuta usasa pipiri ainge sariambu enu <sup>7</sup> enda ta beto gombuto ke einge ingia, ‘Saul, Saul, umo do eto nau degi ta osaga ikaroe?’ <sup>8</sup> ‘Bada umo amunure?’ ainge ene, ‘Na Iesu Nazareth embo nau degi ta osaga ikitoe ere kogona,’ ainge enu <sup>9-10</sup> na ke einge eto ingia, ‘Bada na do ano?’ ainge ene Bada na, ‘Umo ereto da Damascus ta pambuto umo tapa do asoa avo God na matu siriketija avo au ingesoa.’ ke ainge ingia amo embo namote degi ta puvua amina ke do ena avo ingae rate usasa avo kia. <sup>11</sup> Eto na pambasi ereo usasa na titi ta kajenu sapura enu nau namei kamei na ingeni ta jigito umbuto da ta pambua. <sup>12</sup> Eto embo vahai javo Ananias amo da Damascus ai ta mitie God jakeka ijie ungotenau ke pepeni avo agi uoi Judea embomeni na embo avo jakeka ere ijiaetera. <sup>13</sup> Eto embo amo puvuto engiti ta heteto, ‘Namei, Saul ehako ki,’ ainge enu nau titi hirikenu embo avo kon eto kia. <sup>14</sup> Eto embo amina nau degi ta ke einge ena, ‘Ungotenau ohihi ta God na amita uje tapa avo kioa umo umbija eto amina etei inena amita pure ari embo javotoho Iesu kia eto ke hajire ingia. <sup>15</sup> Eto tapa do etei kia eto ingea avo embomeni tapa ta degi ke hande asoa. <sup>16</sup> Avoeto umo mane simba asoa te ereto bapataito eto Bada ta javo ta jage ao amina no ari sasapura au irae aisuja.’ Ainge embo Ananias na enu ingito tapa agi ea.

*Paul na enda nei embomeni ta pambuto hande ena*

17 Eto ai iji isapa mitimite na Jerusalem ta egerembeto pambuto temple ta toreto pari ue mitie 18 Bada eture ta kiarako uo amina, 'Umo sausau Jerusalem toto pambu. Inena nau ke eha ingea amina jo hapereketei ke hande ere oa amo embomeni na ingito tumo eto ke be mane asora avo eto umo pambu,' ainge enu, 19 'Bada, ainge mane, na Judea embomeni ta God jakeka ari bande tapa ta toreto no ambotani andito umbuto torana amo enana na kito osa eora. 20 Eto no ke hande ari embo Steven tari iji te nanena Steven tari embomeni ta bo avo simba ue teo ambuna amo javotoho ke ere ijiaetena,' ke ainge eo 21 Bada na, 'Umo enda hoi embomeni ta degi ikasona avoeto ikitena pambu,' ainge ena. 22 Eto Paul enda nei embomeni ta pambari ke avo enu ingito embomeni na tumo peni vahai ue gagaha ijie, "Embo evi umbuto pambuto be tevu amburoi," 23 ainge gagaha ijie bo houketo jhitie oniho timbuto i ta gosukeo ihaja enu embomeni na gagaha peni vahai be ijio 24 Roman ta isoro titi jigari embo na ke enu Paul umbuto amita bande peni ta ikeo titi jigari embo na Paul na amita ari sapura harikae ari ke hotembeto amita isoro embo na Paul esi na tara ke ena. 25 Eto puvuto ikeo mitie Paul na isoro embo vahai ta degi ke einge ena, "Ungo Roman embo esi na tasi ere ova amo court ta pehumba eto sapura tambae peiketo esi na tasi ere ova amo Roman embo ta ke pepeni rete?" ainge enu 26 isoro embo amo ingito oju eto amita titi jigari embo ta degi pambuto ke einge ena, "Umo do asi hotembite, embo amo Roman embora," ainge enu 27 titi jigari embo na joru eto pambuto Paul ta degi einge eto ingina, "Umo Rome ta citizen rete avo ke be na ejo ingone," ainge enu Paul na, "E, na Roman embora," ainge enu, 28 "Eto namote tapa enda nei embo rate koro peni vahai na ombuto Roman ta citizen etena," ainge enu Paul na, "Na aja na ingari ta

eto Roman embo etena." ainge enu 29 isoro embomeni na ke avo ingito nei eto ingae toa. Eto titi jigari embo na Paul amo Roman ta citizen avo chain na pundua avo eto oju ea.

### *Paul Council ta ikeo hetena*

30 Eto iji nei Roman ta isoro titi jigari embo na Paul ta degi Judea embomeni na pehumba ea amita be avo kesi ke enu Priest okokose te Council te vahaita arumbeo Paul chain na pundua avo bujeketo umbuto pambuto ikenu hetena.

## 23

1 Eto Paul na council kon kon ue ke einge ena, "Nau namei kamei na do eona eto ari tapa do eona amo God ta tombu ta pere eona avo eto nau jo ta memenga irae," ainge enu 2 Priest okose javo Ananias na embo nei Paul ta engitita heteto mitia amita degi Paul pe ta tara ke enu 3 Paul na ke mine einge ena, "Umo te tapa jo no kakesa te avoembo God na umo tasuja. Umo ai arumbeto mitie ungotenau ke pepeni ere poekitea." ainge enu 4 embo Paul ta engitita mitia amina ke einge ea, "Umo God ta Priest okose isembitete?" ainge eo 5 Paul na ke mine einge ena, "Nau namei kamei Priest okose avo na kiae avo eto ke etena te God ta ke na matu kajari amo,' 'Embo na mane amita titi jigari embo avo sapura ke mane asora'."

6 Eto Paul na Council embomeni amo Sadducees te Pharisees embomeni te aingeto arumbeto mitio kito ke einge ena, "Nau namei kamei na Pharisee embora eto nau epe mane amo Pharisee embopora eto nau sapura amo embomeni amburari ehako vasiri te hoari ke ijie simba eona avo eto na umbuto ganoka ere ova," ainge enu 7 ingito Pharisee embomeni te Sadducee embomeni te aingeto kateke kateke eto jujune ke ea. 8 Amita be amo Sadducees embo na embo amburari ehako vasiri te hoari te anera te ahihi te avo sokova ke eora rate enana Pharisees embo na ke tapa amo ke be eora avoeto jujune ea. 9 Eto ke peni



be eo asavi peni vahai enu Pharisee ta ke pepeni ate poekari embomeni na ereto embo tapa ta degi ke ngahia na eto einge ea, “Embo emita sapura irae rate anera rete ahihi re amina ke amita degi ikena,” ainge eo <sup>10</sup> embomeni na jujune be itiketo uo isoro ta titi jigari embo na Paul jigito saukeora oju eto amita isoro embo enu embo orohuta beto Paul umbuto bande peni amita jo ta bitito ikea. <sup>11</sup> Eto mume sihukitinu Bada na puvuto Paul ta engitita heteto, “Umo ando ngahia ejo. Eto nau ke Jerusalem da ta etea ainge nombo da Rome ta pambuto nau ke avo ehako aisoa.” ainge ena.

*Judea embomeni na Paul taro amburoja ke ea*

<sup>12</sup> Eto iho bujenu Judea embomeni na vahaita toruketo ke ngahia na, “Eto ungote indari mane indesora te kiti Paul taro amburou indari indesora,” <sup>13</sup> ainge eto embo tapa 40 eto nei uhoho <sup>14</sup> amina pambuto Priest te embo pepeni ta degi ke einge ea, “Dago indari mane indesora te kiti Paul teto indari ambota indesora <sup>15</sup> avoeto ungote Council embomeni te aingeto ke ikavo isoro titi jigari embo ta degi pambau ingito ungo Paul ehako eto ingesova ke amina hotembeto ikau puvutuhurou degi ta ondiketo mitima taro amburesuja,” ainge ea. <sup>16</sup> Eto Paul ta du ta meni na ke avo ingito puvuto isoro embo ta bande peni ta toreto Paul ta degi harikenu <sup>17</sup> ingito isoro embo vahai jage enu puvunu embo amita degi, “Singa erevi umbuto titi jigari embo ta degi pambujo amina ke do asi uje ere ua avo ai,” ainge enu <sup>18</sup> umbuto pambuto titi jigari embo ta degi puvuto isoro embo vahai amina einge ena, “Tipura embo Paul na na jage etei pambene singa erevi iketei umbuto puvena avo amina ke no degi ta au ingesoa,” ainge enu <sup>19</sup> titi jigari embo na singa amo ingeni ta jigito pambuto oenga arumbenu, “Umo nau degi ta ke do asi uje ere oe avo ejo ingone,” ainge enu <sup>20</sup> singa

amina, “Judea ta titi jigari embopo na vahaita eto ke kasetera amo inena evito Paul umbuto pambao amita ke nei avo au ingesi eto ke ikaro puvuresuja <sup>21</sup> amo umo mane ingesoa. Embo tapa 40 ainge degi ta ondiketo mitiroro Paul pahurou taro amburou indari ambota indesi ke etere ingito puvena. Eto enana tapa nununga eto umo Paul ikaote o mane ikao avo simba mitera.” ainge enu <sup>22</sup> isoro ta titi jigari embo na singa ta degi ke einge ena, “Ke emo embo nei ta mane ao ingesora,” ainge eto embo amina singa ikenu pambuna.

*Isoro titi jigari embo na Paul ikenu Governor Felix ta degi pambuna*

<sup>23</sup> Eto isoro ta titi jigari embo na isoro embo heriso jage enu puvuo ke einge ena, “Ungo da Caesarea ikano pambasova avo eto isoro embo tapa 200 umbuto horse ta pambari embo tapa 70 umbuto ki gosukari embo tapa 200 umbuto <sup>24</sup> Paul ta horse heriso umbuto aingeto sau sau nununga evujo ungo mume eha 9 o'clock pambasova, amo Judea isoro embo na Paul mane tasora teho Governor Felix ta pambasova,” ainge eto <sup>25</sup> isoro titi jigari embo na Governor Felix ta degi ahari einge kajena. <sup>26</sup> “Oio nau Governor okose Felix na Claudias Lysias nau jo tapa na umo ere pekitona. <sup>27</sup> Eto embo erevi Judea embomeni na tasi ore Roman embo avo eto nanena nau isoro embo iketene pambuto peiketo umbera. <sup>28</sup> Eto enana embo emita pehumba erera avo be kesi enana ta Council ta degi umbuto pambena. <sup>29</sup> Eto embo amita sapura eto tari amburari eto tipura ari amo irae kena te Judea embo ta ke pepeni avo poekari ke eto pehumba etera. <sup>30</sup> Eto Judea embomeni na teho sio taro amburoja ke etere ingito no degi ta iketene ere pahua aravora. Judea embomeni ta degi ke asona amo pambuto no titi ta embo avo pehumba asora,” ainge isoro titi jigari embona ahari ta kajena.

<sup>31</sup> Eto isoro ta titi jigari embo na ke do ena avo amita isoro embopo na ea. Eto isoro embomeni na Paul umbuto pambuto da Antipatris ta evito <sup>32</sup> isoro embomeni utu na pambua avo egerembeto enana ta da Jerusalem ta puvutuhuo <sup>33</sup> o hamo ta pambari embo na Paul umbuto da Caesarea ta pambuto Paul te ahari kajea amite Governor ta ingeni ta iketo egerembeto puvua. <sup>34</sup> Eto Governor Felix na ahari eteketo kito Paul ta enda deire avo eto inginu Paul na, "Da nau Celicia." ainge enu ingito <sup>35</sup> ke einge ena, "Aravora, no pehumba ari embo puvuroro ano pehumba aro ingesona," ainge eto ke ikenu embo amo puvuto Paul umbuto pambuto bande peni Herod na matu toari ai ta iketo simba ea.

## 24

### *Judea embomeni na Paul ehako pehumba ea*

<sup>1</sup> Eto Paul na Caesarea ta mitinu iji 5 irae enu Priest okose Ananias na embo okose te eto amita ke pepeni kiari embo javo Tertullus te aingeto umbuto da Caesarea ta Governor Felix ta degi Paul pehumba asi pambuo Governor Felix na enu Paul ereto hetenu <sup>2</sup> ke pepeni kiari embo Tertullus na Paul ta sapura deire avo einge ena, "Nau embo okose, no omena ari javotoho na tunga jamo jamo te iji koso be mitera eto no ari eha eto ke eha na ungotenau enda javotoho mitia <sup>3</sup> avo eto ungotenau enda tapa eto iji tapa avo kogoue umo osa ere ora <sup>4</sup> rate na no iji koso mane jigesona te nangota ke isapa asora avo inena ingijo jo ai. <sup>5</sup> Eto embo sapura amo Nazarene ta embo okose amina enda tapa ta pambuto Judea embomeni ta jo kajeoi ereto isoro eora. <sup>6</sup> Eto embo amina nangota temple au sapura aja oi peiketo umbuto nangona nangota ke pepeni na pehumba asi ore <sup>7</sup> isoro ta titi jigari embo Lysias na ivuha te tapa puvuto umbuto <sup>8</sup> no degi ta pehumba ara ke etija. Avoeto inena embo emita pehumba ta ke tapa do erera avo inena embo amita ke avo

ingito nangona ke tapa erera avo au ingito ke be asoa." <sup>9</sup> Eto ke ainge enu Judea embomeni na jo vahai eto ke be ra ea.

### *Paul na Governor Felix ta degi ke ena*

<sup>10</sup> Eto Governor na Paul ke aja ingeni na ate ate enu ereto ke ena, "Eto umo iji koso enda emita ari tapa avo ke kasetea avo eto na tunga javotoho ere ona avo eto nau ari tapa avo no degi ta ke asona. <sup>11</sup> Umo ke be asoa amo na iji 12 Jerusalem ta God jakeka asi pahana avo embomeni na ke be ra ainge no degi ta asora. <sup>12</sup> Eto na Judea embomeni ta God jakeka ari bande ta eto temple ta eto da jo ta isoro ke ijirae embo na na tambae. <sup>13</sup> Eto enana na eha pehumba erera amo harikari embo irae avo eto ke be manera <sup>14</sup> te na no degi ta ke vahai erevi asona eto na embomeni Iesu ta degi ta vasiri eha ere uhora amiga kaju eto nangota mamamane ta God avo jakeka eona te Judea embomeni na Iesu ta ke avo ke be mane ke eora te na ke amite Moses ta ke pepeni amite peroveta na ke matu kajari amite aingeto ke be eona. <sup>15</sup> Eto namote enana Judea embomeni te aingeto hotembari vahai eto God na embo sapura te javotoho te au vasiri te iresora avo nango ke be ijie simba mitera. <sup>16</sup> Eto na iji tapa ari tapa eona avo embo ta eto God ta tombu ta eona avoeto jo nau ta memenga irae. <sup>17</sup> Eto na Jerusalem ta pambena amo jua koso enda nei ta mitana nau embomeni ta osaga avoeto koro ikitie God pekasi Jerusalem ta pambuto <sup>18</sup> mitimite temple ta toreto jo ta tongopa irae aja pene iketene irae etei mitene puvuto na tambera. Eto embomeni na temple jo ta isapamane irae eto jujune aera <sup>19</sup> eto Judea embomeni Asia enda ta eto puvurari amina na temple jo ta tambera, enana ta ke irirou no degi ta puvuto ke aetera <sup>20</sup> rate embo mitera emo na council ta heteto ke vahai ijiena avo no degi ta harikari uje ae <sup>21</sup> ore, na ke vahai erevi jage eto council ta degi

einge ijiena, ‘Embo amburari ehako vasiri te erasuja avo ke be eona avo eto na pehumba ere ova.’” ainge enu <sup>22</sup> Felix na Iesu ta ke tapa matu ingari avoeto ke mine ari irae enu toto embomeni ta degi ke einge ena, “Isoro ta titi jigari embo Lysias puvurou amiga ke sirikasona,” <sup>23</sup> ainge eto isoro embo vahai enu puvunu ke einge ena, “Embo erevi umbuto pambuto mane punduresoa rate indari ikaro indie isa ururou namei kamei na simba aisora.”

*Paul te Felix te Drusilla te aingeto ke mine ara ea*

<sup>24</sup> Eto iji nei ainge Felix te amita ae Drusilla amo Judea pamone te aingeto puvuto Paul jage eo puvuto Iesu Keriso tumota aisora avo ke enu ingiho <sup>25</sup> embo ta degi javotoho ari ta ke te ke gamo ingito ai ta mane pambari ta ke te iji kombu puvurou embo sirikari ta ke avo enu ingito oju eto, “Aravora umo pambu. Ambota umo ano puvuto ke ehako asoa,” ainge ena. <sup>26</sup> Rate Felix ta hotembari be amo Paul na iji nei puvuto Felix ta koro ondikari na ombuto tambuta pambaja uje ena avo hotembeto iji nei nei ainge Paul jage enu puvuto ke ena rate koro ikae. <sup>27</sup> Eto jua heriso irae enu embo Porcius Festus na Governor eto Felix ta asa ta arumbena rate Felix na Judea embomeni tunga uhe Paul asa tipura ta tona.

## 25

*Paul na Rome ta titi jigari embo ta degi pambasi uje ena*

<sup>1</sup> Eto embo Festus na Caesarea ta puvuto mitinu iji 3 irae enu da Jerusalem ta pambunu <sup>2</sup> priests okokose te Judea ta titi jigari embopo te na Paul pehumba eto Festus <sup>3</sup> na Paul ikau Jerusalem ta pambaja penunu ea amita be amo enana degi ta ondiketo mitiroro Paul degi ta puvutuhurou tasi uje eto eo <sup>4</sup> Festus na ke mine einge ena, “Paul Caesarea tipura ta mitia eto na ei iji isapa eto pambasi ere ona. <sup>5</sup> Avo eto ungoti titi jigari embo ikevu namote

pambuto Paul ta degi pehumba eto amita sapura mitei o irae avo ai ta kesora.” ainge ena. <sup>6</sup> Eto Festus na iji 8 eto 10 ainge ai mitimite pambuto da Caesarea aita mume vahai evito amita court umbari bande ta arumbeto enu <sup>7</sup> Paul umbuto puvuto amita titi ta ikeo hetenu Judea embomeni Jerusalem ta eto puvua amina jorereto heheteketo ke ngahia be eto Paul ta degi pehumba ea amita ke be amo harikari embo irae ke sokova ea. <sup>8</sup> Eto Paul ta do ari tapa avo harikena, “Na Judea embomeni ta ke pepeni sapura ae eto temple sapura ae eto Rome ta ke pepeni avo poekae,” ainge enu <sup>9</sup> Festus na Judea embomeni na Festus osa ara, Paul ta degi ke einge ena. “Umo pehumba etera amo ehako namote pambuto Jerusalem ta pehumba asora amo aravorete?” ainge enu <sup>10</sup> Paul na ke einge ena, “Umo na kogoia amo Judea embo ta degi sapura nei do ae rate Rome ta court bande ta heteto mitena amo inonora. <sup>11</sup> Na ke peni poekaetena amo mane oju pambaetena tao amburaetena. Eto enana eha pehumba erera amo ke be mane avoeto na enana ta ingeni ta ikasoa avo iraera. Avo eto na ike Rome ta okose ta degi pambane.” ke einge enu <sup>12</sup> Festus na ingito amita ke pepeni kiari embopo ga ke kaseto ke einge ena. “Umo Rome ta embo okose ta degi ta pambuto court ai asi etea avoeto pambasoa,” ainge enu ke irae ena.

*Festus na Paul ta ke avo King Agrippa ta ena*

<sup>13</sup> Eto iji nei King Agrippa te amita du Bernice te aingeto Festus pekasi da Caesarea ta puvuto iji isapa mitio <sup>14</sup> Festus na Paul ta ke avo einge enu ingina, “Embo vahai mitia amo Governor Felix na amita iji te tipura ta tona avo mitia. <sup>15</sup> Eto na Jerusalem ta pambene Judea ta priests okokose te embo okokose te na pehumba eto nanana embo avo tano amburoja ke etera <sup>16</sup> avoeto enana ta degi ke ijiena amo nango Roman embomeni

na court ue embo ta titi ta eore amita ke mine avo eoi ingiora te teho sio mane embo amita pehumba ari embomeni ta ingeni ta ikeora ke ainge eto na puvuto mitene <sup>17</sup> enana puvuto evere na nei do ae pehumba asi puvuto arumbeto etene embo umbuto puvuto iketere heheitaja. Eto na embo amita sapura peni vahai ari ke hotembitana <sup>18</sup> rate enana ta pehumba amo erena erevi mane <sup>19</sup> enana God naingeto jakeka eora te embo Iesu ambuna rate Paul na Iesu ehako vasiri te erari ke ijija ke avo ingito jujune mine ara uera. <sup>20</sup> Eto na ke avo be kiae eto mana mana eto Jerusalem ta ikano pambuto court umbaja etena <sup>21</sup> rate Paul na uje ae eto Rome ta embo okose ta pambuto court umbasi etija avo eto tipura ta iketene embo na simba ere ora ambota ikano Rome ta pambasuja,” ainge Festus na enu <sup>22</sup> Agrippa na, “Aravora na embo amita ke ingesi uje ere ona,” ainge enu Festus na, “Umo evito embo amita ke ingesoa,” ainge ena.

<sup>23</sup> Eto evito embomeni tapa na haveni te osa osa te ire davura ue King Agrippa te Bernice te eto enana ta isoro kiti umbari embopo te eto da ta titi jigari embo okokose te aingeto ke kasari bande ta torea eto <sup>24</sup> Festus na ke enu Paul umbuto bande ta ikeo hetenu Festus na ke einge ena, “Oio King Agrippa te embomeni tapa nau ke asona ingivujo, embo emo Judea embo ei ta eto Jerusalem da ta embomeni te aingeto hotembari vahai eto nau degi ta ke vasiri na eto embo emo teho iroja uje ae ue taro amburoja ke eora <sup>25</sup> rate tari amburari ta ari sapura amo na amita degi ta tambae rate amina Rome ta embo okose ta pambuto court asi uje uija avo eto ikano pambasuja <sup>26</sup> rate amita ari sapura ahari ta do kajano avo na kiae avo eto ungo ta degi ta ere ikitena ungoni amita ari sapura avo eto ingesova eto King Agrippa umo kioa ere ikitena amita be amo inena amita ke ingito na ke do ahari ta kajano avo ao ingesona. <sup>27</sup> Eto na

tipura embo ta ari sapura deire avo kajae teho ikano pambasuja na ari avo uje ae avo eto erena.”

## 26

*Paul na King Agrippa ta degi ke ena*

<sup>1</sup> Eto ke ainge Festus na enu Agrippa na Paul ta degi ke einge ena, “Umo no ke tapa avo ejo ingone,” ainge enu Paul na ingeni na ate ate eto ke einge ena, <sup>2</sup> “Oio nau King Agrippa na Judea embomeni na nau degi ta pehumba ere ora amita ke be avo no degi ta aisona <sup>3</sup> avoeto na tunga javotoho be ere ona amita be amo inena Judea embomeni ta ari te ke te amo matu kiari avoeto na ke asona avo onde jevito ingijo.

<sup>4</sup> Eto na singa ta eto puvuto iji eha vasiri nau tapa avo Judea embomeni tapa na kiarira. Eto na enda nau ta eto Jerusalem ta naingeto mitiaetena avo enana kiarira <sup>5</sup> eto na Judea embo nei uhoho javo Pharisees ga kaju ue God jakeka kaikari eaona ke avo enana kiarira te ke avo ke be asi uje ue amo matu aetera. <sup>6</sup> Eto na eha ei heteto court ere ona amita be amo God na nangota ohihi ta degi ke ena avo simba mitena <sup>7</sup> ke avo ungotena Judea ta ohihi javo tapa 12 ta meni-undi tapa na iji te mume te God ta ke ena avo simba ue God jakeka eora. Eto nau king, ke be erena, eto ke avo namote tapa simba mitena avo embo Judea embomeni na na pehumba ere ora. <sup>8</sup> Ungo Judea embopo ta degi erena, ke God na ungotenau ohihi ta degi ikena amo amburari embo ta degi vasiri ikeuja avo do eto ungo ke be ae eove? <sup>9</sup> Eto nanena Nazareth embo Iesu ta degi sapura be uena <sup>10</sup> eto Jerusalem ta pambuto sapura be uena. Na priests okokose ta degi ke umbuto Iesu ta embomeni andito tipura ta gosukitana eto teo ambuvujekea amo nanena aravora ijiena. <sup>11</sup> Eto iji isapamane God ta jakeka ari bande ta toreto Iesu ta ambotani torana amo enana na Iesu amo ke be mane ara torana. Na enana ta degi tumo peni vahai be ue enda nei nei ta



pambuto Iesu ta ambotani jombure eto uhue ere toruatena.

*Paul ta tunga haperikena avo enu ingia*

*(Acts 9:1-19, 22:6-16)*

<sup>12</sup> Oio nau okose, na pure avo pere asi priests okokose ta degi ta ahari umbuto da Damascus ta pahone <sup>13</sup> degi orohuta iji 12 oi usasa iji ta usasa ainge mane amina joeketo kajenu <sup>14</sup> nango tapa enda ta beto gombuto nanena Israel embo ta ke hajire avo einge ingia, ‘Saul, Saul umo do eto nau degi ta osaga ere ikite, Umo o cow ainge no mama ta ituha kondiketo memenga ere kogo,’ ainge enu ingito, <sup>15</sup> ‘Bada, umo amunure?’ ainge eo, ‘Na Iesu ra, umo nau degi ta osaga ere ikitea <sup>16</sup> te ereto hete. Eto na puvuto nau hondate ari embo ere uhona eto inena eha ere kogo eto ambota do ano kesoa amite tapa ke hande asoa <sup>17</sup> eto umo Israel embomeni ta eto enda nei embomeni ta degi ikano pambasoa amo enana ta ingeni ta eto oreto umbasona. <sup>18</sup> Eto inena enana ta titi hirikao mume ere kogora avo ahereketo usasa kesora eto Satan ta sovera toto God ta sovera jigama ue eto enana na be hotembitoro enana ta ari sasapura hotembeto toto ano God ta toho aisora.’ ainge Iesu na nau degi ta enu ingia.

*Paul na amita pure avo ke enu ingia*

<sup>19</sup> Avoeto nau King Agrippa utu ta do puvunu kia avo ke agi ue <sup>20</sup> Damascus ta eto Jerusalem ta eto Judea ta enda tapa eto enda nei embo ta enda ta ke hande ere uatena amo enana ta ari sasapura ajato eto God ta degi egerembeto jo haperekau enanata irari nei ururoro embo nei na kito ke be eto tunga haperekari ke asora. <sup>21</sup> Eto na temple jo ta mitie ke avo hande uena eto Judea embo na ke avo ingari uje ae ue na umbuto taro amburona uje ea <sup>22</sup> rate God na iji tapa na hondate euja avoeto iji eha emite ungo embo te eto embo pepeni ungota degi ta ke

erena. Eto na ke hande eona amo peroveta te Moses te na matu ere ijiaetera <sup>23</sup> avo Judea embomeni ta Hondate Ari Embo na memenga kito ambuto ehako vasiri te kiti erasuja eto ainge nombo Judea embomeni te enda nei embomeni ta degi amita oreketo umbari ke au usasa kesora,” <sup>24</sup> ke ainge Paul na enu embo Festus na gagaha eto, “Paul, umo dipipi embo avo eto no kiari peni vahai be na etei umo dipipi ere oa.” ainge enu <sup>25</sup> Paul na ke mine einge ena, “Nau embo okose, na dipipi ae rate ke peni be avo etena <sup>26</sup> eto King Agrippa, na ke etena amo umo kiarira avo eto na oju ae no degi ta ke erena eto ke emo ondikari ke mane avo etene onde hiriketo ingea avo erena. <sup>27</sup> King Agrippa inena peroveta ke be eoete? Avo na kogona.” ainge enu <sup>28</sup> King Agrippa na ke mine einge ena, “Paul, inena na iji isapa Christian aote?” ainge enu <sup>29</sup> Paul na, “Iji tuho retemo koso re amo na God ta degi pari eona amo umo te ungo tapa ke nau ere ingiheva amo na iteko Iesu ta tumota ari embopo asova rate chains na pundurari aingeko manera.” Ainge enu <sup>30</sup> King Agrippa te Governor Festus te pamone Bernice te embomeni tapa na ereto pahue <sup>31</sup> ke einge mine ara ea, “Eto embo emita sapura nei do irae avoeto tipura ta ikari eto tari amburari avo irae ra,” ainge eo <sup>32</sup> King Agrippa na Festus ta degi ke einge ena, “Embo emo Rome ta embo okose ta degi pambasi ke aetija amo matu ikaro tambuta pambaetija.” ainge ena.

## 27

*Paul Rome ta pambaja e nga ta ikea*

<sup>1</sup> Eto Paul te tipura embomeni nei uhoho te aingeto Rome ta ikara ke eo na Luke enana ga pambasi uo tipura embo tapa avo Rome ta isoro embo javo Julius amo Rome ta embo okose ta isoro kiti umbari embo vahai amita ingeni ta ikea. <sup>2</sup> Eto e nga da Andramyttium ta eto puvuto

Asia Province da nei nei ai ta pambasi unu kito bitito pambua. Eto enda Macedonia ta da Thessolonica ta embo vahai javo Aristarchus na nango ga pambuna. <sup>3</sup> Eto eva ta pahuo iho bujenu da Sidon ta puvuo embo Julius na Paul kito osaga eto enu tambuta pambuto amita namei kamei kogue amita uje tapa avo ena. <sup>4</sup> Eto da Sidon toto e nga ta pahumite pisara peni vahai be kito ituka Cyprus tiumbeto jamo ta pambuto <sup>5</sup> province Cilicia seniketo pambuto province Pamphyllia seniketo pambuto da Myrna province Lycia eva titi ta hetea. <sup>6</sup> Eto ai e nga vahai da Alexandria ta eto puvuto da Rome ta enda Italy ta pambasi unu dago simba ari embo na kito enu dago ai bea. <sup>7</sup> Dago iji heriso pahue pisara peni vahai avoeto osaga kogue pambuto da Cnidus avo auvitio pisara titi hena ta puvutuhunu e nga mende janderiketo pambuto ituka javo Crete amita tutumo Salmone jamo ai kito tiumbeto <sup>8</sup> kaina hena ituka hora ta pahue pisara avo eto pambari ngahia ue umo joremba jamo jamo ari javo 'Safe Harbor' da Lasea engiti ai torea. <sup>9</sup> Eto iji koso be mitie iji javo Atonement matu irae eto ga iji itikenu pisara te eva vasiri peni vahai unu pambari ngahia be enu <sup>10</sup> Paul na hotembeto ke einge ena, "Na ere kogona mo ungotena pambasora amo embo sasari ururoro e nga te donda tapa amo sapura asuja avo na ere kogona," ainge ena <sup>11</sup> rate isoro embo nango titi jigina amina Paul ta ke agi ae eto e nga ta mamote tari jigari embo te ta ke agi ena <sup>12</sup> amo eva vasiri ari iji te ai irari sapura avo eto embo isapamane na joremba javo Phoenix ituka Crete ta pambasi uje ea. Eto joremba Phoenix amo ihane hena ai eva vasiri ari iji te irari javotoho mitiaetera.

*Eva ivo peni vahai ena*

<sup>13</sup> Eto pisara isapa kaina hena ta puvunu embomeni na kito tunga

javotoho eto pambasi ke eto e nga jigari avo jigio bitinu Crete ahone hora ta itiketo pahuo <sup>14</sup> pisara ivo peni vahai javo humburu ombo ta eto puvuto eva ta beto puvunu <sup>15</sup> embo na e nga jigito mende na pambari inono ae enu sio degi nei ta pambuna. <sup>16</sup> Eto pambuto ituka isapa javo Cauda kaina hena ai eva ivo isapa unu kito e nga isapa avota handukari avo pure ngahia be ue umbuto gaga ta iketo tigia. <sup>17</sup> Eto e nga esi peni na punduto pahumite enda Libya ta hora ai e nga teto pejeuja oju eto bo jigio benu e nga sio degi nei ta pambuna. <sup>18</sup> Eto pambuto evito pisara te eva te vasiri jamo ae enu e nga jo ta donda umbuto eva ta gosukea <sup>19</sup> eto iji nei e nga jigari donda tuna avo umbuto eva ta gosukea. <sup>20</sup> Eto pisara peni vahai jamo ae enu iji isapamane amita jo ta kuro te hunjara te iji te kiae avoeto eteteto pambari inono ae enu nango sari asora avo hotembea.

<sup>21</sup> Eto embomeni na iji koso donda indae uo Paul na ereto ke einge ena, "Ungo ke nau agi eto Crete toto pambaeteva amo ungo sari aeteva te ungo ke nau be ingito ando ngahia evujo ungo mane sari asova <sup>22</sup> te e nga avo pejasuja amita be amo na God ta toho eto na God jakeka eona <sup>23</sup> amita anera na mumete nau degi ta ke einge etei ingena. <sup>24</sup> 'Paul, umo joru aojo umo Rome ta embo okose ta titi ta hetasoa. Eto embomeni umote mitera avo God javotoho na au mane sari asora.' ainge anera na etei ingena <sup>25</sup> avoeto embomeni ando ngahia evu God ta ari amo na kiarira avo eto ke etija ainge nombo asuja <sup>26</sup> avoeto ungotenau e nga ituka nei amita hora ta pambuto tasuja," ainge Paul na ena.

<sup>27</sup> Eto dago mume tapa <sup>14</sup> ainge eva Mediterranean ta hamo ta bitito beto tiroki koheki ue siosao pahumite mume orohuta e nga tari jigari embo ombo ta puvurari ke hotembeto <sup>28</sup> esi na donda bouka avo handuketo eva ta gosukeo bena amita

teka tapa 40 meters avo kito amita ambota teka nei amo 30 meters avo kia. <sup>29</sup> Eto enana e nga koro ta teuja hotembeto e nga jigioi heteuja “anchor” tapa 4 ainge avo e nga ta handuketo ikeo benu iho sausau bujaja titine ijio <sup>30</sup> e nga tari jigari embo na eonga pambasi e nga isapa avo bujeketo ikeo benu e nga ta jigari mende ta avo handukasi ke eto ate kitira uo <sup>31</sup> Paul na kito isoro embopo te enana ta titi jigari embo ta degi ke einge ena. “E nga tari simba ari embo pahuroro ungo tapa sasari asova,” ainge enu <sup>32</sup> isoro embo na e nga isapa amita esi avo tiukeo beto eonga pambuna.

<sup>33</sup> Eto iho unga bitito hunu Paul na enana indari indora ke einge ena, “Ungo mume tapa 14 indari indae miteva <sup>34</sup> avo indivujo eto ungo mane sari aisova eto ungo mane memenga kogue osaga umbasova,” <sup>35</sup> ainge eto Paul na bread umbuto God ta degi peketo bread periketo indinu <sup>36</sup> embo tapa kito hamo ngahia enu bread umbuto india. <sup>37</sup> Eto dago embo tapa 276 e nga jo ta mitia amina indari indio inono enu <sup>38</sup> e nga ejeha aja indari tuna eva ta gosukea.

### *E nga hora ta teto pejena*

<sup>39</sup> Eto iho bujenu e nga tari jigari embo na ombo amo matu kiae avo eto ombo avo kito mana mana ea. Eto eva joremba hora javotoho kito ai eto kito aro e nga hora ta bitito hetaja hotembeto <sup>40</sup> e nga jigari amo tiuketo eva ta kororo eto benu tari ta esi amo tiukeo gogora enu bo e nga mende ta jigio bitinu pisara na puvuto titi hena ta kajenu pahumite <sup>41</sup> eva orohuta hora bitari ai ta e nga mende na hora ta vahaikenu eva piri peni vahai puvuto e nga avo tenu pepejikitinu <sup>42</sup> isoro embopo na tipura embo beto daveto pambari ke hotembeto tipura embo taro ambuvujikara <sup>43</sup> ke eo isoro ta titi jigari embo na Paul tunga humbuto teora hotembeto taekena. Eto titi jigari <sup>44</sup> embo na ke enu umo davari embo amo umo daveto pahuo embo nei

umo davari kiae amo i tutuho e nga pejena avo umbuto i ta jigito hora ta pambua. Eto nango tapa memenga osaga kiae teho hora ta pambua.

## 28

### *Ituka javo Malta ta puvua*

<sup>1</sup> Eto nango embo tapa hora ta puvuo ituka amita javo Malta avo eo ingia. <sup>2</sup> Eto Malta embomeni na dago peketo hondate uo ga itiketo benu dago jajemo unu i undukeo evikitinu <sup>3</sup> Paul na ituha jirembeto sundurari vahai ai o koso o juhiri ainge na jo ta toreto mitina avo umbuto i ta ikenu evikitie bevere enu serimbeto puvuto Paul ta ingeni ta kambuto vahaikenu <sup>4</sup> da asa embomeni na kito ke mine ara eto ke einge ea, “Embo emo embo tari embo rate eva piri na tae amburae puvei koso o na kambei amburesi ere ua.” ainge eo <sup>5</sup> Paul na ingeni jihovekenu o koso o na i ta beto evekenu memenga kiae eto nei do ae unu <sup>6</sup> embo na Paul ingeni pajirou beto amburesuja avo hotembea eto iji koso simba ea Paul amburae enu kito ke einge ea, “Embo emo ahihi ra,” ainge ea.

<sup>7</sup> Eto ituka amita embo titi jigari amita javo Publius amita da amo hoi ta mane avoeto ai pambuo dago kito pekari osa ari undurari javotoho unu amiga ai iji 3 mitie <sup>8</sup> Publius ta mamu amita ambure sapura hoga bevere te se sapura te unu Paul na amita evari bande jo ta toreto pari ue ingeni hamo ta tembenu kondena. <sup>9</sup> Eto embomeni na ari avo kito ambure embomeni umbuto puvutuhore Paul na pari uoi kokonjikitiaetera. <sup>10</sup> Eto embomeni dago jakeka ue hande ikitiaetera eto dago pambasi uo dagota indari te o te umo te ikeo umbuto e nga jo ta ikeka.

### *Dago Malta toto Rome ta pambua*

<sup>11</sup> Eto dago hariga tapa 3 ituka Malta ta mitiaetera da Alexandria ta e nga vahai javo Ahihi Heriso amo pisara te jajemo iji avo eto mitiaetija amina pambasi unu kito e nga ai

pambua. <sup>12</sup> Eto pambuto da Syracuse ta iji 3 irae enu <sup>13</sup> pambuto da Rhegium ta evio pisara kaina hena ta itiketo puvutuhunu pahuo iji heriso irae unu da Puteoli Rome enda ta puvuto e nga toa. <sup>14</sup> Eto ai dagota namei kamei Iesu ta ambotani tambuo amiga irora ke eo ai hura vahai mitimite ereto pahuo <sup>15</sup> dago ta namei kamei Rome ta iriora amina dago puvurari ke ingito puvuto market besi javo Appius ai namei kamei nei tuna na puvuto tambuo amiga pahumite namei kamei nei tuna amo degi javo 'Three Inns' ai tambuto Paul na namei kamei kito tunga javotoho ue God jakeka ijie sovera ari umbuto Rome ta puvua.

### *Paul na Rome ta mitiaetija*

<sup>16</sup> Eto da Rome ta puvuo isoro ta titi jigari embo na isoro embo vahai ikenu Paul bande nei ta umbuto simba ue mitiaetija. <sup>17</sup> Eto iji 3 irae enu da Rome ta Judea embomeni okokose jage enu puvuto vahai ta torukeo Paul na ke einge ena, "Nau namei kamei na ungotenau ari matu ungotenau ohihi ta eto puvurari eto ungotenau embomeni ta degi sapura ae rate Jerusalem da ta na umbuto Roman embo ta ingeni ta iketere tipura ta iketera. <sup>18</sup> Eto Roman embo na na taro amburona eto nau sapura jombure eto tambae eto tambuta pambana uje etera te Judea embo na jo ngahia etere kito <sup>19</sup> Rome embo okose ta degi pambasona ainge eto puvena rate na nau embomeni Rome embo okose ta titi ta pehumba asi puvurae, <sup>20</sup> rate ungotena Judea embomeni na oreka embo vahai simba eora avoeto na chain na ingeni ta pundurari avoeto ungota degi ke asi uje etena." ainge enu <sup>21</sup> enana na amita degi ke einge ea, "Eto nango ahari Israel ta eto umbae eto nei Israel enda ta namei kamei na duru umbuto puvuto ae ingae eto nei no degi ta sapura ari ke ae ingae <sup>22</sup> rate embomeni tapa na no pure embomeni vahai ta degi sapura ari ke

eora avo eto dago no ke be avo ao ingesi uje ere ora." <sup>23</sup> ainge eto iji ikena avo puvunu embo isapamane puvuto Paul ta bande ta toruketo Paul ta ke ingia eto ihote eto mumete God na embomeni amita toho siriketo umbuto enana ta King asuja amita ke avo harikena. <sup>24</sup> Ainge Paul na ijinu embo nei uhoho na Paul ta ke avo ke be ijio embo nei uhoho na ke sokova ke ea. <sup>25</sup> Eto Paul na Moses ta ke pepeni te peroveta ta ke avo etekitie Iesu amo embo ta orekari embo be avo puvuna <sup>26</sup> eto Paul na ke nei einge ena, "Eto peroveta Isaiah na ungota Ohihi ta jo ngahia avoeto enana ta degi Ahihi Otohu ta ke be avo einge ena, 'Nau embomeni ta degi pambuto ke einge ejo. Eto ungo ingito ingito mane ingesova. Eto ungo kito kito mane kesova <sup>27</sup> amita be amo ungo onde sundurari eto titi vahaikari eto uta sapura ari ra. Eto ainge ae amo titi na kito onde na ingito uta na hotembeto nau degi ta puvutuhurovo na ungo hondate aetena.' ainge ungota ohihi avoembo God na enu peroveta Isaiah na kajena <sup>28</sup> eto ungo ainge iteko kogona," ainge Paul na eto ke tutumota amo einge ena, "Ungo kogova amo God na embo oreketo umbasuja ke amo enda nei embomeni ta degi hande ore ere ingihera." ainge enu <sup>29</sup> tapa sisiketo pahue jujune ke peni vahai be mine ara ijie pambua. <sup>30</sup> Eto jua heriso amita jo ta Paul na bande koro na ombuto umbuto mitinu embo na umoro puvutuhuo Paul na pekari javotoho ue <sup>31</sup> God na embomeni amita toho umbuto enana ta King asuja amita ke te Bada Iesu Keriso ta ke avo oju ae ke tapa araha ta ate poekitiaetija. (Eto Iesu ta ambotani ta ke ereita irae ua.)



## ROMANS

### *Paul na ahari erevi Rome ekalesia ta degi kajena*

<sup>1</sup> Na Paul na Iesu Keriso ta pure ari embo apostel eto God ta duru javotoho embo ta degi hande ana jage eto umbuna avoeto nanena ungo Rome ekalesia ta degi ahari erevi ere kaitena. <sup>2</sup> Eto duru javotoho puvuresuja avo God na embo ta degi onde ena avo peroveta na ke ototohu avo matu kakajekea <sup>3</sup> amo God ta Meni ungotenau Bada Iesu Keriso amina enda ta beto bisi asuja amita ke avo kakajekea amo erevira: Iesu Keriso amo King David ta degi eto puvurarira <sup>4</sup> eto amina ambuto Ahihi Otohu ta sovera peni be amina vasiri te erena avo kogue God ta Meni be ra ainge erera. <sup>5</sup> avoeto amita javo avo enda embomeni tapa na ke be ijie avo ambo ambo ara God na na apostel ikena avoeto God ta hondate ari na enda tapa ta pahue ke hande ere ona <sup>6</sup> avoeto ungoteta Iesu Keriso ta toho ava God na umbuna. <sup>7</sup> Avoeto ungo tapa God na osa ue amita toho ava siriketo umbunu Rome enda ta miteva amita degi ahari erevi ere kaitena amo ungota hondate ari te peka te avo God Mamota degi eto Bada Iesu Keriso ta degi ta eto puvuroi.

### *Paul na Rome ta pambuto ke asi uje ere ua*

<sup>8</sup> Eto ke kiti ta amo na Iesu Keriso ta javo ta God ta degi osa ari ere ikitena amo ungo God tumota ere ova amita ke amo enda tapa ta sigeto ere pahua. <sup>9-10</sup> Eto na God ta ke agi ue amita Meni ta duru javotoho hande eona avoeto na ungo hotembitie iji tapa pari eona amo God na kiarira eto God na uje eto kito pambari degi hirikau pambuto ungo kesi pari ere ovona. <sup>11</sup> Amo Ahihi Otohu ta hondate ari avo hande eto umbuto sovera ava pambuto ungo kesi uje ere ona <sup>12</sup> eto erena amo

na God tumota eona ainge ungo God tumota eova avo eto ungoteta mine kia ue sovera ari mine umba asora. <sup>13</sup> Eto na enda nei nei embo ta degi pambuto pure ue pure ta be avo umbuona ainge nombo ungota degi pambuto umbasi uje ere ona te nau namei kamei ungo be kivujo, ari neite neite na peikitoi mitena. <sup>14</sup> Eto pure nau amo God na enda nei embomeni “school” kiari te “school” kiae embomeni te amita degi pambana ikena <sup>15</sup> avoeto ungo Rome ta miteva embomeni ta degi pambuto duru javotoho hande asi tunga ere ikitena.

### *God ta duru javotoho amita sovera*

<sup>16</sup> Avoeto Keriso ta duru javotoho hande ururono ingito ke be aisuja embo amo God ta sovera na amburari sapura amita avo oreketo uhurouna ke hande ue me mane kesona. Eto duru emo nau Judea embomeni ta matu hande ea avo enda nei embomeni ta degi hande ere ona <sup>17</sup> eto duru amita ke susu amo God na embo ta degi ari javotoho erevi asi ere harikitia, amo embo na God tumota ururou kito God na embo javotoho ke aisuja, amita ke amo God ta ke ta matu kajari mitia amo erevira, “Tumota ari embo amina vasiri tambasuja”.

### *God na embo tapa ta degi tumo ere ua*

<sup>18</sup> Eto embomeni na enana ta ari sasapura neite neite amina God ta ke be avo teto hahaitie eora avoeto God ta tumo na Utu i ta eto beto embo tapa ta hamo ta beuja avo God na harikeoi kiora <sup>19-20</sup> Amo God na Utu te enda te ena iji te eto puvuto eha emite amo God ta daroho irari ta sovera te eto amita ari tapa amo embo ta titi na mane kiora te amita ari avo ingeni hajire araha tambuta kiora avoeto God ta tumo avo tumbeto pambari degi avo irae bera. <sup>21</sup> Eto enana God kia te God amo enana ta God mane ke ijie tumota ae, osa kageni ae, hotembari sasapura ta pahuo jo mume enu <sup>22</sup> enana ungo

eonga kiari embopo ke ijie hotembari jajavotoho toto <sup>23</sup> God usasa te daroho iriujua avo kuho sindeto ungota ingeni na embo ta tombu ta di ta o ta o koso o ta tombu avo ove eto God ke ere ijaetera. <sup>24</sup> Avoeto God na enana tonu hamo ta ujeje sasapura aita pahue me kiari, hamota tongopa mine ara ere ora. <sup>25</sup> Eto ari amina God ta ke be avo toto ke sokova ta pahue donda ingeni na ari avo tumota ue donda tapa ari God avo ere toturutora. Eto God jakeka ari avo daroho iroi, amen. <sup>26</sup> Eto ari ainge avoeto God na enana tonu me kiari ta vasiri avo ujeje neite neite ue ere pahora amo enana ta airi te tapa na ivu jimbari toho avo toto pambuto pamone nei ga oine eora <sup>27</sup> eto ainge nombo embo na amita ae jimbari toho avo toto pambuto embo nei ga oine asi uje isapamane eora avoeto ari sasapura ta hajire amo matu ue ere kogora. <sup>28</sup> Eto God ta kiari avo enana hotembae uo God na tonu enana ta uta sapura enu ari sasapura mane ara ena aita ere pahora. <sup>29</sup> Amo ujeje sasapura te ari sasapura neite neite eora amo erevira, embo nei ta donda kito uje ari, embo nei tari amburari, boru jumbari, ke sokova ari, biso ari, embo nei hihi tirari, <sup>30</sup> embo nei ta javo sapura ari, eto God uje ae ari, na na ijie umo eonga jakeka ari, namei ta degi hoviari, eto ainge ue sapura nei avo asi jombure ue emamo ta degi agi ae ke peive eora <sup>31</sup> eto hotembari irae, tumota ae, jo ari irae osa ari irae embomeni <sup>32</sup> amina God na enana ta ari sasapura ta hajire ikau kogue amburesora amo enana matu kiari rate toae ue embo nei nei kiti umbuto ue jakeka eora.

## 2

### *God na embo tapa sirikasuja*

<sup>1</sup> Eto umo embo peni retemo isapare amo inena God ta ari sirikari amo mane tiumbeto pambasoa te embo nei ta ari siriketo pehumba ere oa amo ari no te tapa umo eonga pehumba ereoa. <sup>2</sup> Eto ungotena kiari

amo God na embo ta ari sasapura siriketo ke be na hajire ikasuja <sup>3</sup> te umo embo teho na embo ta ari avo sirikaroa te umo te tapa ari sapura vahai avo ereoa avoeto God na ari sapura ta hajire ikasuja amo naingeto tiumbeto pambao? <sup>4</sup> Eto God na no ari sapura ta hajire matu ikau kiaetea te inena jo haperekau aja to aote mane ao avo God na iji koso be jo oi umo simba ere ua te God ta hondate ari avo uje ae ereoete? <sup>5</sup> Amo no jo ngahia amina jo haperekae mitiro God na ke be ta ari sirikari iji te amo God na no degi ta tumo pajire be aisi simba ere ua, <sup>6</sup> iji amite God na embo ta ari siriketo mine inono ta ikau kesora <sup>7</sup> amo embo amuna God ta usasa ta iresi jombure ue God ta uje avo pere ue sovera te iresuja embo amita degi God na vasiri ikau daroho iresuja <sup>8-9</sup> te embomeni tapa amuna ungota uje ta pahue God ta ke ga jujune ue ari sasapura ta pambasora amo God ta tumo na ikau memenga osaga keisora amo Judea embomeni na kiti kesora eto enda nei embomeni amo ambota kesora <sup>10</sup> eto ari jajavotoho embopo amo God na au usasa te peka te na otohu ta iresora amo Judea embomeni na kiti peka umbasora te enda nei embomeni ambota peka umbuto iresora <sup>11</sup> amo God ta titi ta embomeni tapa inono be ra. <sup>12-15</sup> Eto God na degi nei ta ari sasapura rete javotoho tambasuja amo hajire inonota ikau kesora amo God ta ke pepeni Moses ta degi enu kadena amo enda nei embomeni na eteketo kiae rate enana ta jo ta God ta ke mitia amina ari sasapura davore javotoho davore avo harikeoi kiora avoeto ari sapura aisora amo God na hajire ikau keisora. Rate God ta ke pepeni kajari amo Judea embomeni na eteketo kiora te ke avo ambo ambo ae eora avoeto God na hajire ikau kesora. Avo embo God na ke ingari embo avo javotoho ke mane euja te ke agi ari embo avo javotoho ke euja. <sup>16</sup> Eto ari einge ere ona amo God ta iji ke katari puvuresuja amikote Bada Iesu Keriso na embo

ta hotembari jo ta ondikari tapa amo siriketo hajire ikau kesora amita ke amo God ta ke hande eona aita mitia.

*Judea embomeni te God ta ke pepeni te amita ke*

<sup>17-19</sup> Eto ungo Judea embomeni ta degi avo ikenu God na amita ke peni umbuto tumota ue iriova eto God ta tunga umbari embomeni ke ijie na na ereva amite eto ungo meni isapa ta eto God ta ke ingito umbari irae ari avoeto sapura davore javotoho davore amo ungo atepoekari kiari te God ta uje amite avo ungo kiari embopo avoeto titi kuru ari embopo kiti umbuto pambari embopo eto mume ta irari embopo ta usasa ikari embopo eto <sup>20</sup> kiari umbae embomeni atepoekari embopo eto meni isasaraho ta ate poekari embopo amo ungo na eova te do eto ungo eonga ainge ae eove? <sup>21</sup> Eto pegene eora ate poekeova amo ungo mane pegene eove? <sup>22</sup> Eto tiha pahia eora ate poekeova amo ungo mane tiha pahia eove? Eto ungo God ingeni na ari uje ae embopo ungonana enana ta jakeka ari bande ta pegene mane eovete? <sup>23-24</sup> Eto ungo God ta ke peni umbari embo avoeto ungo embo peni ke ereva te God ta ke peni avo poekitie God ta javo eove sapura euja eto God ta ke kajari mitia amina harikitia amo erevira “Ungo Judea embomeni ta ari avo enda nei embomeni na kogue God ta javo ere urumbitera.” <sup>25</sup> Eto ungo Judea embomeni na dago God ta toho ke ijie hamo kakamba eova te God ta ke peni avo poekasova amo hamo kakamba eova amita ke avo irae asuja <sup>26</sup> Rate enda nei embomeni na God ta ke pepeni avo agi ue hamo kakamba ae rate God na kito embo nau be ra aisuja avoeto ungo Judea embomeni amo hamo kakamba ue God ta ke pepeni poekeova <sup>27</sup> te enda nei embomeni hamo kakamba ae amina God ta ke agi eora amina ungota degi puhumba aisora. <sup>28-29</sup> Ke erena amita be amo erevira Umo Judea embo tombu kiari amina

mane eoa te no jo te hotembari te tapa amina eoa ainge nombo God ta ke kajari avo kogue hamo kakamba ari amina God ta toho mane asoa te no jo te ahihi te tapa na asoa amo God ta toho aisoa amo embo na ungota hamo kogue puhumba euja te no jo avo God na kito osa euja.

### 3

*Ungote God vahai avo tumota aetera*

<sup>1</sup> Eto ungo Judea embo avoeto hamo kakamba ari avoeto tunga javotoho avo? <sup>2</sup> Ungu tunga javotoho evujo. Eto God ta ke amo embo nei ta ikae rate ungota degi ikena <sup>3</sup> Ke be amo ungonana God ta ke ambo ambo asi onde ava te ungo nei uhoho na toturitava te God na ungota degi onde ena amo toaute? <sup>4</sup> Mane toasuja te embo tapa na ke sokova eora te God amo ke sokova embo mane ra te amita ke amo God ta ke ta einge kajari mitia “Eto embo na God ta degi eto kesi ke asora te God na ke be pere aisuja”. <sup>5</sup> Rate enda embo ta hotembari sokova na ke einge eora amo ungotena enda embo ta ari sasapura neite neite amina God ombuto umbuore God amo embo peni euja <sup>6</sup> amo ungotena ari sasapura amina eoi God ta degi usasa puvuja do avoembo God na ungotenau ari sasapura ta hajire ikau memengakioro? <sup>7</sup> Amita ke be avo kito enda embomeni ta ari sasapura ta hajire mane ikaetija amo amita degi usasa ere puvutuhua avoeto embo ta ari sasapura kito tunga javotoho aetija, <sup>8</sup> ke ere kogova eremo ke be mane rate sokova einge amo nanena atepoekari ke ijie embo nei na ke sokova na eora amo erevira “ungo ari sapura neite neite evujo God ta javo peni ai” ke ainge amo nanena ari ke eora te ke ainge hande ari embo amo God na osaga memengaikau kesora amo ungo tohora.

*Embo tapa amo ari sasapura embopora.*

<sup>9</sup> Avoeto ungotena ke do aro? Ungotena Judea embo javotoho eto enda nei embo amo sapura ke arote? Ainge manerate, na ke matu etene ingeva amo Judea embomeni te enda nei embomeni te tapa ari sasapura embopo avoeto inono inonora te <sup>10</sup> God ta ke ta matu einge kajari mitia erevira, “ari jajavotoho ari embo irae be iraera. <sup>11</sup> Eto ke ingari embo irae eto God jombure ari embo irae. <sup>12</sup> Embo tapa na God kuho sindeto degi sapura ta ere pahora avoeto ari javotoho embo irae be iraera. <sup>13</sup> Embo tapa ta pe ta amo embo ta kovari use ahikeore masa puvuja aingeko eto ivivi na ke sokova eora amo o juhiri ta saruka pe petiki ta iriuja aingekora. <sup>14</sup> Eto enana ta pe amo hoviho kaviro na enetarira. <sup>15</sup> Eto embo ta sasaga beaja tiukasi tutuveora <sup>16-17</sup> eto enana peka umbae avoeto enana ta pambari degi amo osaga te sosou purisa te mitia <sup>18</sup> eto enana amo God jakeka ari hotembae be ra,” ke ainge kajari mitia. <sup>19</sup> Eto God ta ke pepeni amo Judea embomeni ta degi ikena amo enanana be ingora ikenu umbua te enda embomeni tapa na na ari sapura embo manera ke ainge avo mane asora te God na enana ta ari sapura ta hajire ikasuja avo kito ke mine mane arana. <sup>20</sup> Avoeto embo amuna God ta ke pepeni avo ambo ambo ururou God na kito embo erevi javotohoro ainge mane aisuja te embo ta ari sapura amo God ta ke pepeni matu kajari mitia amina umbuto ikau araha ta puvurou embo amina amita ari sapura do aingere amo be kesuja.

*God na embo au javotoho asuja degi amo erevira*

<sup>21-22</sup> Rate embomeni na naingeto God ta titi ta javotoho asora degi amo God na peroveta mamatu ta degi enu kakajekea avo ungotena eha ere kogora amo God ta ke pepeni agi ari amina ae rate Bada Iesu ke be ijie tumota ururo God na kito embo javotoho ke aisuja amo Judea

embo retemo enda nei embo re <sup>23</sup> eto embo tapa amo ari sasapura inono inono avoeto God ta usasa ta torari haite mane <sup>24</sup> rate ungotena embo jajavotoho ara God na ungotenau hande erevi ikena amo Iesu Keriso ta sasaga na ungotena ombuna avoeto embo amuna sasaga avo tumota ururou God na kito embo javotoho ke aisuja. <sup>25-26</sup> Eto Iesu Keriso ungotenau hondate ari embo avo puvurae pekota God na ikenu puvuna amo embomeni na ari sasapura ere uaetera amo God na kito tumo pajire be ere uaetija amo tau amburaetera te Iesu ikau enda ta beto ari sasapura avoeto amburesuja avo hotembitie ari sasapura ta hajire avo sausau ikae tona, te mane jene ambu aisuja avo embo tapa kiora ungotenau irari iji te Iesu Keriso ikenu puvuto enana ta eto ungotenau ari sasapura avoembo ambuna avoeto embo amuna Iesu tumota ururou amita ari sasapura ta hajire mane ikau kesuja te God ta tumo avo peiketo embo avo umbasuja. <sup>27</sup> Avoeto embo ta ari jajavotoho na God ta tumo ombuto uhurou kogue embo javotoho ke aute? Ainge manera. Ungotena ari jajavotoho ari embopo ke ijie iresora amo God na kito be mane hotembasuja te Iesu tumota ururoro God na kito embo jajavotoho ke aisuja. <sup>28</sup> Avoeto embo na God ta ke pepeni etokito agi aisora te God na mane orekasuja te Iesu tumota ururoro amina ungotena orekasuja avo ere kogora. <sup>29</sup> Eto God mo Judea embomeni ta God rete? ainge mane rate enda embomeni tapa ta God ra, <sup>30</sup> Rate God nei irae vahai amina dago Judea avoeto hamo kakamba ari embomeni Keriso tumota ururoro kito embo jajavotoho ra ainge aisuja ainge nombo enda nei embomeni hamo kakamba ae amina Keriso tumota ururoro embo jajavotoho ke aisuja. <sup>31</sup> Amo tumota ari amina orikitirou God ta ke pepeni amo toarote? Ainge mane rate ungotena God tumota ari amina amita ke pepeni amo agi eora.



## 4

*Abraham na God tumota unu embo javotoho ke ena.*

<sup>1</sup> Eto dagota Ohihi Abraham avo ungote keisira, amita ari jajavotoho amina God ta tombu ta embo javotoho enute mo amita tumota ari na embo javotoho enu? <sup>2</sup> Eto Abraham na amita ari jajavotoho na God ta tombuta embo javotoho aetija amo embo na kito jakeka aetera te God na Abraham ta ari jajavotoho kito embo javotoho ke mane aetija <sup>3</sup> te God ta ke ta einge kajari mitia amo “Abraham na God ke be ena avo God na kito embo javotoho ke ena”, ke ainge kajari mitia <sup>4</sup> avoeto erena amo embona pure eto mine umbuja amo teho hande umbae rate amita pure ta mine avo umbuja <sup>5</sup> rate embo na amita ari jajavotoho God ombae rate ari sasapura embomeni na Keriso tumota ururoro God na hande mine vahai oreketo <sup>6</sup> umbau God ta tombuta embo amo ari sapura embo mane avoeto tunga javotoho be aisuja amita ke amo King David na einge kajena. <sup>7-8</sup> “Eto embo amuta ari sasapura amo God na hotembeto toto ahurekau irae au embo amo tunga javotoho ururou God na ehako mane hotembasuja”. <sup>9</sup> Eto tunga javotoho ari emo Judea embomeni avoeto hamo kakamba ari embomeni na pere kiorotemo hamo kakamba ae embomeni te tapa kioro? Eto ke matu etena amo Abraham na God ke be ijie tumota unu God na embo javotoho ke ena <sup>10</sup> amo tumota ari amita kiti ta hamo kakamba enute ambota enu? Eto amita ke be amo ungotena kiari amo Abraham na kiti God tumota ue tumota ari amita hajire avo God na enu hamo kakamba ena <sup>11</sup> avoeto hamo kakamba ae mitiaetija amikote amo God na kito embo javotoho ke ena avoeto Abraham amo ungo hamo kakamba ue tumota eova embomeni amita mamu pere mane <sup>12</sup> rate hamo kakamba ae embomeni God tumota eora amita mamora.

*God na onde ena avo God tumota ue umbuora*

<sup>13</sup> Eto God na Abraham ta eto meniundi ta degi enda tapa avo ikasi onde ena amo Abraham na God ta ke pepeni agi ere uaetija avoeto ikasi onde ae rate Abraham na God ke be ena avoeto Abraham embo javotoho ra ijie onde ena. <sup>14</sup> Te ungo ereva amo God ta ke pepeni agi ari embopo na God ta hotari umbasora ainge ke be kito embo tapa na hotari mane umbasora eto God na onde ena amo be ambu aetija. <sup>15</sup> Eto ungotena ere kogora amo God ta ke pepeni irae amo mane poekaetera te God ta ke amo mitia avoeto ungotena God ta hotari umbasi uje ue amo etokito ke pepeni avo agi eora te ke pepeni avo kaikari poekeora avoeto God ta tumo vahai avo tambasora. <sup>16</sup> Avoeto hotari onde ena avo God tumota ururoro Abraham ta meniundi tapa ta degi hande ikau umbasora amo ke pepeni umbae embopo te umbari embopo te tapa amuna Abraham na God tumota ena ainge nombo ue Abraham ta meniundi eto umbasora. <sup>17</sup> Eto ungotena Abraham ta meniundi tapa amita ke amo einge kajari mitia, “Abraham, umo nanena enda tapa ta mamu ere ikitena” ke ainge God na ena avoeto Abraham na embo amburari ta vasiri ikari God avo ke be ena amo ungotenau mamara te ari matu puvurari te puvurae te amo God ta tohora. <sup>18</sup> Eto Abraham kerembo ena te amita hamo bisi amo hotembae ue God tumota unu God na onde ena amo amita meni puvuto amita poru ta enda pajire be puvuroja onde ena <sup>19</sup> te Abraham ta pajirari jua 100 enu eto amita ae kerembo enu oti vavekena te hotembu hotembu ae <sup>20</sup> rate sovera umbuto God tumota ue jakeka ena. <sup>21</sup> Amo onde ena avo mane toasuja te sovera inono avoeto aisuja avo hotembeto ke be ena <sup>22</sup> eto Abraham ta hotembari avo God na kito embo javotoho ke ena <sup>23</sup> eto God na kito embo javotoho ke ena amo Abraham vahai mane rate <sup>24-25</sup> embo ta ari sasapura ombuto umbasi God na ungotenau Bada Iesu tonu ambunu ehako jiginu vasiri te erena avoeto embo amuna God ke be

ijie tumota aisuja embo amite tapa avo God na kito embo javotoho ke aisuja.

## 5

### *Keriso avoembo God ta titi ta embo jajavotohora*

<sup>1-2</sup> Rate Iesu Keriso na ungotena avoembo ena avoeto God tumota ururoro God na kito Keriso ta hondate ari avoeto embomeni ta ari sasapura irae embomeni jajavotoho ke ijioi amita degi peka umbuora avoeto God ta usasa ta torasi tunga javotoho ue simba mitera. <sup>3</sup> Eto avo pere mane rate embomeni na uore osaga memenga kiora amina ando ta sovera ari umbuto ivo ue iresora avoeto tunga javotoho ereora. <sup>4</sup> Eto ando ta sovera ari na Ahihi ta sovera ururou ari sapura ta sausau mane beasora te ungotenau vasiri avo Otohu ururou God tumota ue iresora. Eto mitie God na ari javotoho avo ungotenau ikasuja avo simba ue sovera eto iresora. <sup>5</sup> Eto God na amita osa ari ungotenau jo ta overekena amo God na amita Ahihi Otohu avo ikenu beto puvuto ungotenau jo ta toreto mitie ke ijioi ingihe God ta ke avo ke be eora. <sup>6</sup> Eto ungo kogova amo ungotena sovera umbari degi irae iji te Iesu na ari sasapura embomeni avoembo ambuna. <sup>7</sup> Eto ke be amo enda embo na embo javotoho avoembo sari asi mane hotembaetija te iji nei nei ainge embo na embo nei javotoho be javotoho avoembo sari asi hotembeora <sup>8</sup> te God ta osa ari do aingere avo embo na kiora ungotena ari sasapura te irari iji te ungotena avoembo Keriso ikenu puvuto ambuna. <sup>9</sup> Avoeto ungotena ari sasapura embomeni avoembo Keriso na amita sasaga overekenu bena amina embo jajavotoho ere ora avoeto God ta tumo avo Keriso na peikena. <sup>10</sup> Eto ke erena amo ungotena God ta degi kitoho ue mitiaetera amita Meni ikenu puvuto ambunu ungotena God ta degi peka umbuto Iesu ta vasiri

na orekitirou irari javotoho tambasora <sup>11</sup> amo ungotenau Bada Iesu Keriso na ungotena avoembo ambuna avoeto ungotena God ga namei ereora, avoeto osa ari na tunga javotoho ue mitera.

### *Adam te Keriso te ta ke*

<sup>12</sup> Eto ungo ke erevi hotembevujō, eto enda ta amburari amo irae rate embo Adam na ari sapura ena amina amburari tambuna. Eto ari sasapura amo enda tapa embomeni na eora avoeto amburari amo enda tapa embomeni ta degi puvuna. <sup>13</sup> Eto God na amita ke pepeni Moses ta ikae puvurae kiti ta amo embomeni na ari sasapura ere uaetera te God ta ke pepeni amo ikae puvurae avoeto God na ungo nau ke poekari embopo ke ainge ae <sup>14</sup> rate Adam na vahai God ta ke poekena avoeto Adam ta iji te eto pambuto Moses ta irari iji te embomeni na ari Adam na ena ainge mane rate ari sasapura neite neite ue ere ambuvujikitovora. Eto Keriso ambota puvuresuja amita ate kitira avo Adam na ena. <sup>15</sup> Te Adam ta ari avo embo tapa ta degi ta amo amburari puvuna te ambota God ta hande javotoho be Iesu ta degi ta eto puvuna amo Adam na ena ainge mane, pajire be ra <sup>16</sup> amo eingera, eto embo vahai na ari sapura ena amo God na kito embo ta degi hajire ikau kogue amburesora te God ta hande amina ari sasapura isapamane ombunu irae ena avoeto hajire kiari irae. <sup>17</sup> Eto embo vahai ta ari sapura amina amburari irerembeto sigeto pahunu embo tapa ambuvujekeora te embo tapa amuna God ta hande javotoho avo uhue embo nei vahai Iesu Keriso amita degi vasiri eha umbuto God ta degi tunga uhue javotoho ari na Iesu Keriso ga heteto enda tapa titi jigihe iresora. <sup>18</sup> Eto ke erena amo embo vahai na ari sapura ena avoeto embo tapa ambuvujeketo ari sasapura ta hajire kiaetera te embo nei Iesu na ari javotoho ena amina ari sasapura ta hajire kiari avo peikena avoeto embo tapa na

vasiri eha umbuto irari haite ra. <sup>19</sup> Amo Adam na God ta ke peive eto embo tapa amita ari sapura ari embo ena te Keriso na God ta ke agi ena amina embo isapamane na embo javotoho aisora. <sup>20</sup> Eto God na amita ke pepeni avo Moses ta ikena amo ari sasapura pajirou embo tapa be kiora ikena te ari sasapura papajitinu God ta hondate ari te tapa pajire be ena, <sup>21</sup> avoeto ari sasapura heteto pajire be eto embo ta degi amburari hande ena, te eha oroho amo God ta jo ari te hondate ari te avo titi jigihemitia avoeto ungotena God ta tombu ta embomeni jajavotoho eto Bada Iesu Keriso ta degi vasiri eha umbuto vasiri te daroho iresora.

## 6

### *Bapataito ari ta ke.*

<sup>1</sup> Avoeto ungotena God ta hondate ari mo naingeto simba aro? Eto ungotena God ta hondate ari peni vahai be aja ari sasapura kaikari arote? <sup>2</sup> Ainge mane aisora te ungotena Iesu Keriso ga kajueto ari sasapura avoembo ambuvujekea avoeto ereto ari sasapura mane ue iresora. <sup>3</sup> Amita ke be amo erevira, ungotena Iesu Keriso ga amburari avoeto ungotena bapataito eora amita ate kitira avo eora. <sup>4</sup> Amo God Mamo na amita usasa sovera te na Iesu Keriso ambuna avo jiginu vasiri te erena avoeto amiga vasiri eha umbuto irora ambunu kovea aita bapataito eora. <sup>5</sup> Amo Iesu ambuna amiga kaju eora avoeto Iesu na vasiri te erena ainge nombo ungotenanena vasiri te erasora. <sup>6-7</sup> Eto ungotena ere kogora amo ari sapura embo amburesuja amo ari sapura ehako mane aisuja te irae aisuja avoeto ungotenau hamo ta ari sapura amita sovera avo irae aja Iesu ga cross ta teo ambua amo ari sapura ta ke agi mane aisi ue ambua. <sup>8</sup> Eto ungotena Keriso ga ambua avoeto Keriso ga iresora avo ke be hotembeora. <sup>9</sup> Eto ke nei be hotembeora amo Keriso ambuto vasiri te erena amo ehako mane amburesuja te amburari amo Iesu na

nembarira. <sup>10</sup> Eto Iesu na iji vahai enda ta ari sapura avoembo ambuto vasiri te erena amo God ga iriuja <sup>11</sup> ainge nombo ungo Iesu Keriso avoembo ambuto vasiri te ereto God te Iesu Keriso te ga kajueto vahaita miteva. <sup>12</sup> Eto ungo hamo te bisi te miteva amikote amo ari sasapura na titi jigihirou ungo amita ke agi avojo. <sup>13</sup> Eto umu ambuto vasiri te erari avoeto no utu rate ingeni rete titi rete hamo rete amo ari sapura ara mane ikasoa te ari jajavotoho ara pe te God ta degi hande ikejo. <sup>14</sup> Eto umu God ta ke pepeni na andirari embo mane rate God ta hande umbari embo avoeto ari sasapura na umu mane titi jigesuja.

### *Ungotena ari sasapura ta embo manera.*

<sup>15</sup> Eto ungotena God ta ke pepeni na andirae rate God ta degi vasiri hande etei umbera amo ari sasapura aisora amo tehorete? Ainge manera te <sup>16</sup> umu embo amita pure tunga ikasoa amo embo amita ke avo pere agi asoa amo ari sasapura agi ue ere uma amburote God ta ke agi ue ere uma amita titi ta embo javotoho ao? <sup>17</sup> Eto ungo matu amo ari sasapura ta ke agi ari embora te God ta ke hande ore ingihava avo be jigito miteva avoeto God osa ere ora. <sup>18</sup> Avoeto ungo ari sasapura na andirari avo bujeketo araha ta puvuto ke jajavotoho ta agi ari embopo ere ova. <sup>19</sup> Eto ke erena avo ungo be ingova timu hatirari ke na umbuto ere hona amo ari jajavotoho na titi jigoute mo ari sasapura na titi jigou? Eto iji matu amo ungota hamo na ari sasapura isapamane be ere uaeteva avoeto jandireketo ari jajavotoho avo otohū ue amita ke agi ari embopo evujo. <sup>20</sup> Eto iji matu amo ungo ari jajavotoho na titi jigae rate ari sasapura na ungo titi ere jigihaitija, iji amikote amo ungota degi ari javotoho puvunute? <sup>21</sup> Na ere kogona amo ungota degi me kiari te amburari te avo puvuna. <sup>22</sup> Rate ungo ari sapura na andirari avo God

na bujeketei amita pure embopo ere ova, amo amita pure ere uma Otohu ue vasiri te daroho iresova. <sup>23</sup> Eto ari sasapura ta mine amo amburesora te God ta hande amo Bada Iesu Keriso ta degi vasiri daroho umbuto iresora.

## 7

*Embo pamone jimbari ta timu hatirari ke*

<sup>1</sup> Eto nau namei kamei ungo God ta ke pepeni amo Moses ta iji te ikena avo ungo kiari embopora, eto ke pepeni amina ungo vasiri te iri-ova amo peikarirate amburesova amo ungo mane peikasuja avo ungo kiarira. <sup>2</sup> Eto ke erena amo eingera. Eto pamone na amita ivu vasiri te irirou amo mane toasuja te ivu amburou toasuja amo God ta ke pepeni amina mane peikasuja. <sup>3</sup> Rate ivu amburae mitirou pamone amina amita hamo embo nei ta ikasuja amo tiha pamone rate ivu amburou embo eha jimbasuja amo ke pepeni amina mane peikasuja. <sup>4</sup> Avoeto nau namei kamei ungotena God ta ke pepeni mamatu avo toasi Keriso ga kajueto ambua te God ta tohu be eto pure amita be avo umbara God na jiginu Keriso ga vasiri te erea. <sup>5</sup> Amita be amo ungotena hamo ta ujeje sasapura agi ari iji te God ta ke pepeni na taekasi unu ari sasapura uje isapamane ere umite ambuvujekeo. <sup>6</sup> Rate ungotena God ta ke pepeni na andirari amita degi ambuvujekeo bujekenu tambuta pahue God ta Ahihi Otohu ta ke agi ue iriora amo ke pepeni kajari amina ae rate vasiri ehaha na eora.

*God ta ke pepeni te ari sasapura te amita ke*

<sup>7</sup> Avoeto ungotena ke do aro? God ta ke pepeni amo sapura ke aro? Ke ainge mane aisora te ari sasapura do aingere avo God ta ke pepeni na eoi kiora amo erevira, embo nei ta donda umbasi jo ta sirikeora amo sapura rate teho amo mane kiaetera te God ta ke pepeni amina taekoei

kiora. <sup>8</sup> Rate na God ta ke peni avo hotembitie nau jo ta kajeoi embo ta donda umbasi uje isapamane eona avoeto God ta ke pepeni irae amo ari sasapura ta hajire mane kiaetena. <sup>9-10</sup> Eto matu kiti ta amo na God ta ke pepeni avo kiae avoeto vasiri te mitiaetena te itiketo kogue ari sasapura jo nau ta irerembenu nau Ahihi amburari avo kia, amo na God ta ke pepeni agi eto vasiri umbana God na ikena te ai ta amo amburari pere tahana. <sup>11</sup> Amo erevira, na naingeto iresona amita degi amo God ta ke pepeni amina degi ena te ari sapura degi ai ta pahue amina ke sokova ijinu ingiho God ta ke pepeni amina nau Ahihi amo teo ambuna. <sup>12</sup> Rate ungotena ere kogora amo God ta ke pepeni amo sapura mane rate ke Otohu jajavotohu embo ta irari naingeto iresora avo God na ikena. <sup>13</sup> Rate donda jajavotohu amina ahihi nau avo tenu ambunute? Ainge mane rate nau ari sasapura amina tenu ambuna, amo ungotenau ari sasapura amo sapura be sapura avo be kiora God no amita ke pepeni avo ikena amita jo ta ari sasapura irerembeto amita sovera na ahihi nau tenu ambuna.

*Ungotenau jo ta hotembari heriso amina isoro mine ara ereora.*

<sup>14</sup> Eto ungotena ere kogora amo God ta ke pepeni Utu ita puvurari rate namo enda embora te ari sasapura ta ke agi ue amita pure eona <sup>15</sup> amo na uje eona donda avo toto uje ae donda avo uje ue kaiketo ue na eonga embo nei ta ari ko ere one ainge ijie eona. <sup>16</sup> Eto ari uje ae eona avo ue God ta ke pepeni avo ke be eona avo poeketo me kiona, <sup>17</sup> avoeto ari sasapura amo hotembari na hotembeto ae rate jo ta irerembeto jo ta kajeoi eona. <sup>18</sup> Amo ari jajavotoho asi uje eto tunga ere ikitona te ari avo inono ae avoeto nau jo ta amo ari jajavotoho irae rate ari sasapura avo pere mitia. <sup>19</sup> Eto na ari jajavotoho asi amo pe na eona te ehako ari sasapura eona <sup>20</sup> amo



na ari sapura toasi eona te toae eona amo na embo nanena ae rate nau jo ta ari sapura amina eoi eona. <sup>21</sup> Avoeto jo nau ta ari einge emo mitia, na ari jajavotoho asi uje eona te ari sapura emo hoi ta irae rate namote mitia <sup>22</sup> eto nau jo ta amo God ta ke pepeni mitia avo osa eona <sup>23</sup> te ari sasapura pepeni te tapa nau jo ta mitia avo eto enana heriso na isoro ue na ari sapura ta tipura embo arako ereona. <sup>24</sup> Oio! na sapura embo eto nau hamo na nau Ahihi kiti umbuto amburari degi ta ere pahua amo amuna oreketo umbau? <sup>25</sup> God na ke ijirou Bada Iesu Keriso na nau ahihi oreketo umbasuja avoeto na God osa matuainge eona, te ke erena amo erevira, na jo nau na God ta ke pepeni agi eona te hamo nau amo ari sasapura ta ke agi euja.

## 8

### *Ungotenau ahihi ta irari*

<sup>1</sup> Eto ungotena Iesu Keriso ga kaju eto iresora amo ungotenau ari sasapura ta hajire mane ikau kesora, <sup>2</sup> Amita be amo ungotena Iesu Keriso ambuna amita Ahihi Otohu ta sovera na ungotena ari sasapura te amburari te na pundurari avo bujekena avoeto tambuta ere pahora. <sup>3</sup> Amo ungotenau hamo ta uje sasapura isapamane avoeto God ta ke peni agi ue ungotena eonga sapura bujekari inono ae rate God na amita Meni ikenu puvuto embo sasapura ta hamo umbuna avo ungotena ari sasapura ta pene ikitie ari sasapura avoeto ungotena ombuto umbuto ambuna. <sup>4</sup> Amo God ta ke pepeni avo agi eto amita hamo na ombuto ambuna avoeto ungotena hamo ta uje amo ambo ambo ae Ahihi Otohu ta hondate ari amina God ta ke pepeni simba eora embopo avo God na kogue Iesu ta pure avoembo embo jajavotoho ke eria. <sup>5</sup> Ari sasapura matu neite neite ta pambari embomeni na hamo ta uje amita tunga ere ikitera te nei uhoho Ahihi ta pambari embomeni na Utu i ta ari amita tunga

ere ikitera <sup>6</sup> Irari matu avo tunga ikasuja embo amo amburesuja te ahihi ta irari avo tunga ikasuja amo tunga jamo ari te peka te tambasuja. <sup>7</sup> Amita be amo vasiri matu ta tunga humbari embo amo God ta kitoho amina God ta ke pepeni amo agi ue ambo ambo ari inono ae ra <sup>8</sup> eto ari mamatu agi ari embopo amita ari amo God na kito osa mane aisuja. <sup>9</sup> Rate ungo amo God ta Ahihi Otohu na ungota jo ta mitia avoeto ungo ari sasapura mamatu ta ke agi mane eova te Ahihi ta ke agi eova te embo amuna Keriso ta Ahihi jo amita ta umbae amo Keriso ta toho manera. <sup>10</sup> Eto no hamo avo sari aisuja te Keriso no jo ta iresuja avoeto no Ahihi amo God na javotoho ari avoeto vasiri te iresuja. <sup>11</sup> Eto no Ahihi na Iesu ambuna amo jiginu vasiri te erena ainge nombo Ahihi no jo ta iresuja amo ainge hamo no jigou vasiri te erasuja amo amita Ahihi no jo ta mitia avoeto ainge aisuja. <sup>12-13</sup> Eto nau namei kamei ungotena hamo ta ujeje sasapura avo agi ue amo amburesora avoeto ari ainge avo mane aisora te Ahihi Otohu ta sovera na hamo ta ujeje tapa tau amburou vasiri te iresora. <sup>14</sup> Eto God ta Ahihi ambo ambo ari embopo amo God ta meniundira. <sup>15</sup> Eto ungo God na amita Ahihi iketei umbua amo God oju ue pure avo ikae rate ungo God ta meniundi be avo Ahihi amita amo iketei umbeva amo amita Ahihi ta sovera na “God nau Mama” ainge amo eova <sup>16</sup> amo God ta Ahihi na ungotenau jo be ta “ungo God ta meniundi ra” ainge ijioi ingihe eora. <sup>17</sup> Eto ungotena amita meniundi avoeto Keriso na hotari umbija vahai avo ungotenane umbasora. Eto Keriso na osaga te memenga te kito God ta usasa ta torena ainge nombo ungotena Keriso na osaga te memenga te kina avo kogue amita usasa ta torasora.

### *Ungotena God ta usasa ta torasora*

<sup>18</sup> Eto Utu ita usasa puvurou kogue tunga javotoho aisora eto na ere

kogona amo ungotena enda ta osaga memenga tapa amo isapa rate God ta usasa kesora amina pajire be aisuja. <sup>19</sup> Eto iji ke katari iji te Utu te enda te na God ta meni undi mo do aingere avo God na au puvuroro kesi simba ue mitera. <sup>20-21</sup> Eto donda tapa God ta ingeni na enu ari sapura ai ta puvutuhunu kito amita hamo ta saruka ena avo donda iji kombu te bujekasuja avo simba ere ua amo iji kombu te bujekau embo amburari te donda sasape ari te au irae au God ta meniundi ga usasa ta toreto tunga jamo jamo te iresora. <sup>22</sup> Eto ungotena ere kogora amo God ta donda tapa amina amo pamone na meni umbasi ue memenga kiora ainge donda tapa amo memenga kogoue mitovora. <sup>23</sup> Eto donda avo pere mane rate ungotena God ta Ahihi Otohu umbari embopo amina ungotenau jo ta sisitasi ijie daroho irari ta hamo eha ikau umbuto amita meniundi be asora avo simba mitovora. <sup>24</sup> Amo ungotena God tumota ue amina donda javotoho avo ikasi onde ena avo simba ara ungotena oreketo umbuna. Eto donda avo matu umbaetera amo God tumota mane aetera. <sup>25</sup> Te God na umbara onde ena amo eha umbae rate ambota umbasora avoeto God tumota ue simba ue mitovora. <sup>26</sup> Eto ungotena ivo ambu embopo avoeto God ta Ahihi Otohu na hondate eto einge euja amo ungotena pari ari ta degi jombure eora amo Ahihi Otohu na ungotenau jo ta pari amo ijioire ingihe si javotoho be na God ta degi eoi ingioi <sup>27</sup> God ta Ahihi Otohu na God ta uje tapa deire amo kogoue embomeni ta pari avo God ta degi si na ijioi God embo ta jo kiari embo avoeto Ahihi Otohu ta hotembari tapa avo kiuja. <sup>28</sup> Eto ungotena ere kogora amo tunga javotoho ari te tunga osaga ari te tapa ungotenau degi ta puvuja amo God na amita tunga umbari embomeni amina sovera eto ari javotoho avo kiora ikeoi puvuja amo God ta ujena embomeni amita toho ara umbuna amita degi ikeoi puvuja. <sup>29-30</sup> Eto

God na enana matu umbasi sirikena amo amita Meni Bugo ta hajire vahai avo umbuto amita ambo jimbi ara sirikena avoeto God na enana jage eto umbuto umo eonga enu embomeni jajavotoho ere ora avoeto God na au usasa amita ta toreto iresora.

*Amita Meni Iesu Keriso ta pure avoeto God na ungotena osa euja.*

<sup>31</sup> Rate ungotete ke mine amo do aro? Eto ungotena God na simba ere ua te embo amuna mane sovera eto nembasuja. <sup>32</sup> Eto God na amita Meni amo oreto umbae rate ungotenamo avoembo ikenu puvuto sari ena avoeto ungotena ere kogora amo donda nei pepeni te isasaraho te tapa amo mane orasuja te ungotenamo avoembo ikasuja. <sup>33</sup> Eto God na ungotena amita toho ara siriketo umbuna amo embo amuna pehumba au? Eto God na pehumba aute? Ainge manera te God na ungotenau ari sasapura egenu irae enu ungotena embo jajavotoho be ena <sup>34</sup> rate embo amuna ungotena pehumba au?, Iesu na pehumba aute? Ainge mane rate amina ambuto vasiri te ereto God ta ingeni be ta arumbeto mitie ungotenamo avoembo God ta degi ke ijie mitia avoeto ungotena amina mane pehumba aisuja. <sup>35</sup> Eto Keriso na ungotena osa ere ua amo ari deina peikau? Osaga na memenga na beuje na iri bo irae amina boru jujune eto tari amburari na peikaute? Amina mane peikasuja <sup>36-37</sup> te ungotena osaga memenga ere kogora amo God ta ke ta einge kajari mitia, "Eto ungotena God ke be eora avoeto iji tapa ungotenau amburari avo simba uore embopo na o sheep teto hevarako uore mitovora" ke ainge mitia amo ungotenau osaga memenga tapa amo Iesu Keriso ungotenau osa ari embo ta sovera na ari tapa erevi ungotenanena nembora. <sup>38-39</sup> Eto ke amita be nanena ere kogona amo amburari rete vasiri rete anera rete embo titi jigari rete

donda matu irari rete ambota puvuroute sovera ari i ta rete enda ta rete tapa be tapa God na ari amina God ta osa ari ungotenau degi ta ikari amo Bada Iesu Keriso ta degi ere kogora avoeto peikari inono ae be ra.

## 9

*Paul na amita namei kamei Judea Embomeni avo hotembeto osaga ena amita ke*

<sup>1</sup> Eto na ke sokova ae rate Keriso ta javota ke be erena amo Ahihi Otohu na nau jo ta ei ingihe erena <sup>2</sup> amo nau namei kamei Judea embomeni ta degi do puvuresuja avoembo osaga ere kogona. <sup>3</sup> Eto nau namei kamei Israel embomeni na Keriso ke be ara ari erevi aetena amo nanena ungo hondate ari embo ke eto God na ungo uhue namo avo tau amburaetena <sup>4</sup> te God na Israel embomeni amo amita meniundi avoeto umbuto amita sago kiari te usasa te eto ke kajari peni te isapa te eto naingeto God jakeka asora amite tapa iketo enana ta degi hotari ikasi onde ena. <sup>5</sup> Eto Israel embomeni ta mamone mamatu na God ta ke kiti umbua eto Keriso enana ta hondate ari embo puvuna amo enana ta jeka hoka ta orohuta puvuna amita javo amo i be ita, God ta peka ta daroho ire-suja. Amen. <sup>6</sup> Eto God ta ke Israel embomeni ta degi ikitie onde ena amo God na toae rate enana ta ujena toa te amita be amo hamo na Israel embo rate ungota jo avo Israel embo mane. <sup>7</sup> Eto Abraham ta meniundi tapa amo Abraham ta meniundi be mane avoeto amita ke kajari erevi be hotembevujō “Eto no ahihije ta mamō be amo no meni Isaac na aisuja”. <sup>8</sup> Eto ke amita be amo God ta meniundi be amo hamo te bisi te na ae rate God ta ke matu ikari avo ingihe ke be ari embomeni amo God ta meniundi eto Abraham ta meni-undi bera. <sup>9</sup> Eto God na Abraham ta ae na meni umbaja onde ue ke einge ena, “Eto na iji iketena inonota puvuto mitirono no ae Sarah na meni umbasuja” ainge enu <sup>10</sup> meni Isaac umbunu pajito embo eto Rebecca

jimbuto ve ikena. <sup>11-12</sup> Rebecca urete eto oti ta meni heriso irari iji te God na ke einge ena, “Meni ambo Jacob amina embo peni au meni bugo amo ambo meni amita pure embo aisuja”, eto ke ainge ena amo meni javotoho davore sapura davore avo kito ae rate God ta uje na ena <sup>13</sup> amita ke avo einge kajena “Na embo Jacob avo osa ere ona te embo Esau avo na uje ae ra”. <sup>14</sup> Ke ainge God na ena amo embo sirikari sapura ue enute? ainge aera te <sup>15</sup> Moses ta degi ke einge ena avo kivujo “Na uje nau na embo kogurono jo aisuja amo embo kito hondate aisona”, ke ainge God na ena <sup>16</sup> amo embo kito hondate ari amo embo na eonga pure ngahia eto God ta hondate umbae rate God ta jo ari na hondate ari ikeoi embo ta degi puvuja. <sup>17</sup> Amita be amo God na Pharoah ta degi ke einge ena, “Umo nanena umbuto iketene embo peni etea amo nanena no degi ta isoro ururono enda embomeni tapa na kogue nau javo te nau sovera te avo kogue ke be ara umo nanena iketene hetetea”. Ke ainge ena <sup>18</sup> amita be amo God ta uje na embo nei kito jo eoi hondate euja eto embo nei amo kito toi jo ngahia eora.

*God ta tumo te jo ari te*

<sup>19</sup> Te ungonā nau degi ta ke einge ereva amo “Eto God na umo eonga embo ta jo eoi ngahia eora amo God na naingeto embo amo pehumba au? Eto God na uje amita avo ururou embo na amita uje avo ari haite rete?” Ungo ke ainge ereva <sup>20</sup> te na ungota degi ke erevi erena amo ungo embo teho rate ke ainge ijie God ta degi pehumba ereova, amo erevira, ovu enda na ari amina ovu ari pamone ta degi ke einge aisuja “Umo do eto nau degi ta ari einge mo ete?” Ainge aisuja ainge nombo ungo na ke amo ereva <sup>21</sup> amo ovu ari pamone na enda umbuto ovu heriso eto ovu nei kiari ovu eto ovu nei sio jigama aisora ovu amo teho uje amita na euja. <sup>22</sup> Eto ari ainge nombo amo God na embo ta degi

ere ua amo God na embo ta ari sasapura avoembo amita tumo do aingere amite eto amita sovera te avo embo na kiora ue embomeni sasapura tau ambuvujekitie hajire kiaetera te <sup>23</sup> avo toto simba ue mitie embo amita toho matu siriketo umbuna avo amita usasa javotoho kiora ue toto mitouva. <sup>24</sup> Eto embomeni amo ungotena Judea rete enda nei embomeni rete amo God na matu siriketo umbuna amo ungotenamora. <sup>25</sup> Eto God na enda nei embomeni te tapa amita toho ara umbasuja avo peroveta Hosea na einge kajena, “Eto embomeni amo nau mane rate nane embomeni nau ke aisona eto enda amita embomeni amo na osa ae rate nanena nau tunga umbari embomeni ke aisona, <sup>26</sup> eto ungo enda aita mitiaeteva amo nanena ungo embomeni nau mane ke ijiena te embo nei na ungo enda ai ta miteva avo kogue God vasiri te amita meniundi ke aisora”. Ke ainge peroveta Hosea na kajena. <sup>27</sup> Eto Peroveta Isaiah na Israel embomeni kogue ke einge ena, “eto Israel embomeni na eva hora aingeko embo isapamane arote aisora amo God na embo heriso kateketo umbasuja. <sup>28-29</sup> Amo porere mane aisuja te sausau enda embomeni ta degi hajire ikau kesora,” Ke ainge Isaiah na eto ke nei einge ena, “Eto Utu te enda te ta Bada God sovera isapamane te na jo enu Israel embomeni heriso be amo tae tona te toaetija amo da Sodom te Gomorrah te na ea aingeko tapa tau amburaetera.”

### *Paul na Israel avoembo pari ena*

<sup>30</sup> Eto ke erena emita tutumota ke peni mo do ano? Rate ke peni re erevira, enda nei embomeni na embo javotoho asi jombure ae rate God na oenga kito etei embo jajavotoho ere ora amo embo amuna God tumota ururou God na kito embo javotoho ke aisuja. <sup>31</sup> Eto Judea embomeni na God ta ke pepeni tapa avo agi asi tunga ikea te God na kito embo jajavotohora ainge aera <sup>32</sup> te do eto ke ainge aere? Amita be amo ungo

ke be na God tumota ae rate ari neite neite amina embo jajavotoho asi ere uaetera, te enana na God ta Atara amo amita Meni Iesu Keriso amita hamota teto tiambu eto bea <sup>33</sup> amita ke amo einge kajari mitia, “Ungo kivujo, da Jerusalem ta tiri Zion ai ta nau Atara ikano mitirou amo ungo teto tiambueto beasova te ungo na Atara avo kito ke be ijie amo me mane kesova”.

## **10**

<sup>1</sup> Eto nau namei kamei, nau jo tapa na Judea embomeni nau be avoeto God na oreketo umbaja jo tapa na pari eona. <sup>2</sup> Eto enana ta jo tapa na God uje ue amita pure asi uje eora amo na kiarira te God ta ke be amo enana be kiaera. <sup>3</sup> Te God na eoi embo jajavotoho eora te enana na ari avo kito kiaesira ue God na ari javotoho ari avo toto ungo eonga eto javotoho asi eora te <sup>4</sup> Keriso na vahai God ta ke pepeni tapa amo inono ta etei irae etija avoeto embo amuna tumota ururou amo God na kito embo javotoho ke aisuja.

### *God na embo tapa oreketo umbasi uje ere ua*

<sup>5</sup> Eto Moses na ke einge kajena, “Embo amuna God ta ke pepeni avo tapa inono ta agi aisuja amo God na kito embo javotoho ke ijiro daroho irari ta vasiri tambasuja”. <sup>6-7</sup> Te God tumota ururoro kito embo jajavotoho ke aisuja amita ke amo Moses na einge kajena, “Embo amuna Utu ita bitari inono re? Eto embo amuna embo amburari ta degi be ari inonore? ke ainge jo no ta mane hotembasoa” ke ainge Moses na kajena te ke be amo ungotenau orekari embo Keriso matu Utu ita eto puvuna eto matu vasiri te erena. <sup>8</sup> Eto ke ainge mane aisova te God tumota ari ta ke dago na hande eora amo einge kajari mitia “Eto God ta ke amo hoi ta mane rate no ivivita mitia eto no jo ta mitia.” <sup>9</sup> Ke amita be amo erevira, Iesu ambunu God na enu vasiri te erena avo embo amina jo te tapa ke be ijie ivivi na Iesu



amo nau Bada ra ainge aisuja embo amo God na kito oreketo umbasuja <sup>10</sup> Amo ungo na jo te tapa na ke be ereva avoeto God na kogue embo jajavotoho ke aisuja, eto ungota ivivi na ereva avoeto oreketo umbasuja. <sup>11</sup> Eto God ta ke kajari ta amo einge mitia “Embo amuna tumota aisuja amo me mane kesuja” ke ainge mitia <sup>12</sup> te Judea rete enda nei rete amita javo ai ta irae rate enda tapa embo amuna Bada ta hondate ari umbasi penunu aro ikau umbaro inono aisuja, amo enda tapa amita Bada aisuja. <sup>13</sup> Avoeto enda tapa ta embomeni amuna Bada ta javo ta jage aisora amo Bada na oreketo umbasuja.

<sup>14</sup> Eto enanana Bada ke be ae aisora amo naingeto Bada jage aro? Eto enana amita ke embo na ae ingae aisora amo naingeto ke be aro? Eto embo na pambuto ke hande ae ingae amo naingeto ingoro? <sup>15</sup> Eto embo na ke hande ari embo ikae pambae amo naingeto ke hande au? Avoeto ke einge kajari mitia “Ke javotoho hande ari embo ta utu uruhu amo ingari javotoho.” <sup>16</sup> Ke ainge mitia te Israel embo nei nei na ke avo ere ingihera te ambo ambo ae avoeto amita ke amo Isaiah na einge kajena, “Bada, ungotenau ke hande ere ora te embo amuna ke be erei? Enana ingito ingarako ereora”. <sup>17</sup> Avoeto Keriso ta ke avo hande uore embo na ingihe ke be eora <sup>18</sup> te embo na Keriso ta ke avo enana Israel embomeni ta degi hande uerete aere? Amita ke amo einge kajari mitia, “God ta ke amo enda susu ta itiketo pambuto tutumo be ta irae arira” ainge mitia te <sup>19</sup> Israel embomeni na God ta ke ere ingihera te be ingae rete? ainge manera te amita ke amo God na ijinu Moses na kajena amo eingera, “Eto nanena enda nei embomeni uhurono amo ungo Judea embo na kito nango umbae ereoi ainge ijie osaga kesova amo enana enda nei kiari irae ke eova embomeni avo uhurono ungo tumo aisova” ke ainge kajena <sup>20</sup> avo Isaiah

na ke erevi kajena amo ke be pere na kajena, “Enana enda nei embomeni na na jombure ae rate tahara, eto enana na jage ae rate teho nanena etene na be ere kogora”, <sup>21</sup> te Israel ta ke amo einge kajena. “Eto iho vujari ta eto pambuto hi sihukarita amo nau Judea embomeni umbasi no degi ingeni ere jujurukitena te enana ta jo ngahia oi ke ingito puvurae ereora”. Ke ainge God na ijinu Isaiah na kajena.

## 11

### *God na Israel embo tuna umbasuja.*

<sup>1-3</sup> Eto ke nei aisona amo God na amita embomeni egikenute? Ainge aera te namote tapa na Israel embo eto Ahihi nau amo Abraham eto embomeni nau amo Benjamin ra eto God na amita embomeni matu kina amo God na egikaera. Te peroveta Elijah na Israel embomeni ta jo ngahia avo pehumba eto God ta degi hariketo ke ainge ena avo ungo be hotembevujo, “Bada God, Israel embomeni na no peroveta tapa tetere ambuvujeketera eto no pene gaga jigito aimbetera na eonga mitena te namote tapa taro amburona ere ora”, ainge enu <sup>4</sup> God na ke mine einge ena, “ke ainge amo erea te embo tapa 7,000 ainge avo embo nau ara simba ereona amina God ingeni na ari javo Baal avo paunge teteri eto tumote pain ae mitera” ke ainge ena <sup>5</sup> avoeto eha oroho emo God na embo amita toho avo uje amita na umbuto simba ere ua. <sup>6</sup> Amo embo ta ari jajavotoho amina God ombae rate God ta uje na embo umbuja te embo ta ombari avo God na mane umbasuja te embo ta degi hande ere ikitia avoeto uje amita na embo umbuja. <sup>7</sup> Te ke do aro? Eto Israel embomeni na God kesi jombure ere uaetera te tambae ea te God na eonga kito siriketo umbija embomeni amina God ere tahora. Eto God na siriketo umbae tona embomeni avo ke be mane kiora God na titi ere peikitia <sup>8-9</sup> amita ke amo einge kajari

mitia, “Eto God na enana ta siro etei bouka etei titi na kiae eto onde na ingae amo God na ainge ena amikote puvuto eha emite ainge pere mitera”. Amita ke amo David na einge kajena, “Eto enana ta hajae vajae amo ihive aingeko kaiketo mitirou ai ta toraro timbau hajire kesora. <sup>10</sup> Eto titi ta taro kuru au ari sasapura ta bouka umbuto ku okokombeto daroho iresora.” Ke ainge David na Judea embopo God kiae avoembo kajena. <sup>11</sup> Eto eto ingari ke nei asona amo erevira, Israel embomeni na teto tiambueto beto mitera amo mane ereto pambarote? Ereto pambarote te enana ari sasapura eto beto mitera enda nei embomeni God na oreketo uhua avo kogue enana naingeto umbaetija avoeto tunga osaga kogue mitera. <sup>12</sup> Eto ke erevi be hotembevujō, Israel embomeni na God egiketo ari sasapura ta bea avoeto God na enda nei nei embomeni avo ere uhua avoeto enana ta degi ari javotoho puvija, eto Judea embomeni te tapa umbasuja amo ari javotoho be enda tapa ta ainge puvuresuja.

*Enda nei embomeni na javotoho ari ere uhora*

<sup>13</sup> Eto ungo enda nei embomeni ta degi ke erena, amo ungota degi ke hande ana God na iketija pure amo nau degi ta nombo be rate <sup>14</sup> pure erevi ereona amo ungo God ta degi javotoho ari ere uhova avo embomeni nau na kito umbasi uje ururoro God na kito oreketo umbaja pure erevi ereona. <sup>15</sup> Te God na Israel embo tona avoembo enda nei embomeni na God ga namei ere ora te Israel embomeni ehako umbasuja amo amburari ta eto eha erarako aisora. <sup>16</sup> Eto embo na pure ta indari be isapa umbuto God ta degi ikasuja eto pure ta indari tapa amo God ta tohu ue otohu aisuja eto nei i susu amo otohu ururou eto i amita hatu gigi tapa amo otohu aisuja. <sup>17</sup> Eto Israel embomeni ta ke amo i ‘olive’ da tambuta iriuja amita ke ta umbuto puvuresona. Eto

God na i ‘olive’ ta hatu sasapura amo jeto kahumbena eto i ‘olive’ sevahe ta amita hatu avo umbuto puvuto da ta i ‘olive’ amita ikenu kakambuketo i susu ai ta indari javotoho te umo javotoho te ungo na indie ere papajikitova. <sup>18</sup> Te ungo i hatu matu kahumbari avo kogue sapura ke ijie ungo eonga na na avojo, eto ungo na i susu amita degi indari ikae rate i susu amo ke matu God na Abraham ta degi ikari avoeto ungota degi indari ere ikitia. <sup>19</sup> Te ungo ke ereva amo i hatu sasapura avo kahumbeto gosuketo dago avo iketei kakambuketo mitera avoeto ungo na dago javotoho ke ereva <sup>20</sup> te kivujo enana amo God ke be ae avoeto kahumbena te ungo amo God ke be ijie tumota eova avoeto miteva te ungo ‘na na’ avo, teho kogue irivujo, <sup>21</sup> eto hatu be amo tona avoeto ungo sevahe ‘olive’ ta hatu na God toasova amo ungo te tapa toasuja. <sup>22</sup> Eto God amo osa ari embo eto memenga ikari embo avoeto ungo be hotembevujō, eto enana egikea amita degi memenga ikari embo rate ungo tumota ururovo amo ungo simba aisuja te ungonā toasova amo ungo tiukau irae aisova. <sup>23</sup> Eto Judea embomeni na jo haperekau God ke be ijie tunga uhuroro amo God na umbuto i hatu matu kahumbena aita ikau kakambukasora, ari ainge amo God na ari inono be ra <sup>24</sup> amita be amo erevira, ungo enda nei embomeni amo sevahe ‘olive’ avo umbuto da ‘olive’ ta iketei kahava amo uho ungota be mane ra te Judea embomeni amo da ‘olive’ ta hatu be avoeto ehako umbuto ikau tohota uhu be aita kambasora.

*Israel embomeni amo God na oreketo umbasuja.*

<sup>25</sup> Eto nau namei kamei, ke be vahai araha ta mane, ma ta ondikari avo nanena ano ingova uje ere ona amo ungo God na umbari ke ijie na na eova avo eto ke erevi ano ingova erena, Israel embomeni tuna amina God ta degi jo ngahia ue mitera avoeto enda nei embomeni God na umbau inono au <sup>26</sup> Israel

embo nei tuna God na oreketo umbasuja, amita ke amo einge kajari mitia, “Eto enana ta orekari embo amo tiri Zion ta eto puvuto Jacob ta embomeni na God ta degi tumo eora avo au irae au <sup>27</sup> enana ta degi noma kaeto enana ta ari sasapura avo umbano irae aisuja” ke ainge God na ena. <sup>28</sup> Eto Judea embomeni na God ta duru javotoho avo ingari uje ae ue God ta degi kitoho ereora amo ungo enda nei embomeni avoembo ereora. Rate Judea embomeni ta ohihi mamatu amo God na kihi umbuna avoeto Judea embomeni amo embomeni amita ke ijie osa ere ua <sup>29</sup> amo matu kiti hondate asi ke ijie umbuto noma kajena avoeto enana mane toasuja. <sup>30</sup> Eto ungo enda nei embomeni na God ta degi ari sasapura ere uaeteva ainge nombo Judea embomeni na eha oroho God ta degi ari sasapura ore unгона God ta jo ari avo kogue ere uhova. <sup>31</sup> Eto God na ungota degi jo ere ua avoembo iji ambota amo enana Judea embomeni God ta degi ari sasapura ereora avo God na jo au umbasuja. <sup>32</sup> Eto Judea embomeni te enda nei embomeni te tapa avo God na jo ururou hondate au kesora avoeto embomeni tapa na God ta degi ari sasapura ara tona.

### *God jakeka aisora.*

<sup>33</sup> Oio, God ta javotoho ari te hotembari te kiari te, eva ta ukomo ainge peni vahai be eto God na embota ari sirikari amo embo na kiae ra eto God ta ari neite neite tapa amo embona kiari inono ae ra. <sup>34</sup> Eto embo amuna Bada ta hotembari kogue onde katau? embo na kogue ari inono ae ra. <sup>35</sup> Eto embo amuna God ta degi hande ikitirou hande mine ikau? hande mine ikari inono ae ra. <sup>36</sup> Eto Utu ta donda te enda ta donda te tapa amo amita sovera te kiari te na umo eonga avoembo ena avoeto amita degi usasa daroho iresuja, amen.

## **12**

### *Ekalesia ta irari.*

<sup>1</sup> Eto nau namei kamei ungo God jakeka ari be erevi ava erena. God na ungo jo ere ua avoeto ungota ari avo otohu ue vasiri ungota avo God ta degi pene ikitirovo God na kito tunga javotoho aisuja. <sup>2</sup> Eto ungo enda ta hajire avo mane aisova te ungota hotembari avo jandireketo hotembari eha umbuto God ta uje pere avo kogue ari javotoho davore God na kito osa aisuja ari avo pere ue irivujo. <sup>3</sup> Eto God na na osa eto amita pure nau degi ta ikena avoeto ungota degi onde ere katitena amo ungo embo vahai vahai na ungo eonga embo peni ke mane aisova te ungo vahai vahai amita degi God na ungota tumota ari do ikena avo pere kogue inono ta evujo. <sup>4</sup> Eto ungotenau hamo ta donda amo neite neite ra, mende rete titi rete pe rete amita pure amo eonga eonga ra. <sup>5</sup> Eto ainge nombo ungotena tapa amo Keriso ta hamo avoeto ungotena hamo vahaira <sup>6</sup> te God na amita hondate ari na amita pure ara amita sovera ari amo eonga eonga ikeuja avoeto embo amina God ta ke harika aja sovera ari ikena avoeto amita tumota ari na pure avo aisuja, <sup>7</sup> Eto embo unduresi sovera ari umbuna embo amina pure avo ue embo unduresuja, eto ate poekari ta sovera ari umbasuja embo amina ate poekasuja, <sup>8</sup> Eto onde katari embo na God ta ke hande aisuja, eto hande ikari embo na hande aisuja, eto titi jigari embo na embo simba ue iresuja, eto hondate ari embo amina osaga kiari embo avo osa osa ari na tunga javotoho ari na unduresuja. <sup>9</sup> Eto embo osa asova amo hamo na mane osa asova te ari sasapura uje ae ue ari jajavotoho avo ue jo tapa na osa evujo. <sup>10</sup> Eto namei kamei ari na embo nei amo otohu embo ke ijie osa mine ara evujo. <sup>11</sup> Eto Bada ta pure ue pegogo mane aisova te jo tapa na tunga vahai ta iketo pure evujo. <sup>12</sup> Eto ungo God ta degi hotari umbasova avo hotembitie tunga javotoho evujo. Eto osaga memenga

puvuresuja amo mane toasova, java-  
java te pari ue irivujo. <sup>13</sup> Eto un-  
gota namei kamei ekalesia ta ujeje  
deire avo mitirou kito amo hondate  
evujo, eto ekalesia embo damina pu-  
vuresora unduresova avo peni bera  
ainge ijie jireki poeki eto kito poeto  
kogue eto unduvujo. <sup>14</sup> Eto embo na  
ungota degi ta memenga ikau kito  
amo mane hoviho javiro asova te  
God na javotoho ari enana ta degi  
ikaja pari evujo. <sup>15</sup> Eto embomeni  
tunga javotoho ue mitera amiga tapa  
tunga javotoho evujo, eto embomeni  
osaga kogue si ijie mitera amiga tapa  
si evujo. <sup>16</sup> Eto embomeni ga peka  
ta irivujo, eto ungo embo pepeni  
ke ijie na na ijie umo eonga kiari  
embo mane asova te embomeni ga  
tapa umoro evujo. <sup>17</sup> Eto embo na  
ungota degi ta ari sapura au kito  
amo mine ari sapura mane aisova  
te embo tapa ta titi ta ari javotoho  
davoere avo eto kogoeto evujo. <sup>18</sup> Eto  
ari ungota avo jigito kogoeto embo  
tapa ga peka ta irivujo. <sup>19</sup> Eto nau  
namei kamei ungo na ari sasapura ta  
mine mane ikasova te God ta tumo  
avo hotembeto tovujo amita ke amo  
einge kajari mitia, “Eto ari sapura ta  
mine amo nanena ikasona”, ke ainge  
Bada God na eria <sup>20</sup> avoeto ari nei  
amo einge evujo. Eto ungota kitoho  
beuje ururou kito amo indari te umo  
te avo ikevujo indore. Eto ainge  
ururovo amo me kito havo havo ue  
pambasora. <sup>21</sup> Eto ari sasapura na  
ungo nembasuja avoeto simba ue ari  
javotoho na ari sasapura ta degi  
isoro eto senikevujo.

## 13

### *Gavana ta ke agi asora.*

<sup>1</sup> Eto ungo gavana ta ke agi evujo.  
Eto gavana ta sovera amo embo nei  
na ikae rate God na vahai ikeuja  
avoeto gavana ta pure ari embopo  
ta sovera ari God na ikeoi umbuto  
pure eora. <sup>2</sup> Avoeto embo amuna  
gavana ta ke ingae aisuja amo God  
na gavana ta sovera ikari avoeto  
gavana na embo amita hajire ikau

kesuja. <sup>3</sup> Eto ke agi ari embo na joru  
mane aisuja te gavana ta ke agi ae  
embo amina gavana joru ue iriuja  
avoeto embo amuna joru ae teho  
iresi uje eto kito amo gavana ta ke  
agi ururovo kito embo javotoho ke  
aisuja. <sup>4</sup> Eto gavana amo God ta pure  
ari embomeni avo ungo hondate ara  
God na ikena avoeto ungo na ga-  
vana ta ke ikari poekasova amo hana  
kesova avoeto joru ue irivujo, eto  
God na no degi ta tumo ere ua avoeto  
gavana na no degi ta memenga ikau  
kesova. <sup>5</sup> Eto ungo gavana ta ke  
agi ae asova amo ungota ari sasa-  
pura avoeto ungota jo ta hotembu  
hotembu ue iresova eto nei amo  
memenga ikaro kesova avo joru ue  
irivujo. <sup>6</sup> Eto gavana amo God ta  
pure ari embo eto ungo simba eora  
avoeto enana ta mine avo tax koro  
ikevujo. <sup>7</sup> Eto tax koro rete haja baja  
rete Otohu ari rete tumote pain rete  
amo enana ta mine ikasora ainge ijie  
ikevujo.

### *Osa mine ara ari ta ke.*

<sup>8</sup> Eto embo ta hondate ari mine  
avo mane ikasi ke asova te ikevujo  
umbau irae ai. Eto hondate ari vahai  
emore mane irae aisuja avoeto osa  
ari mine ara ue matu ainge iresuja,  
eto ari ainge avo ue amo God ta ke  
pepeni avo inono ta aisova. <sup>9</sup> Eto ke  
erena amita be amo erevira, God ta  
ke pepeni amo umo tiha mane aisoa,  
embo mane tao amburesora, pegene  
mane aisoa embo nei ta donda kito  
umbasi jo ta mane sirikasoa eto ke  
nei nei amite tapa mitera ke amita  
susu be amo erevira, “Umo oenga  
osa ere oa ainge nombo no namei  
osa ejo”. <sup>10</sup> Eto namei osa ue amita  
degi sapura mane aisoa te osa ari  
amo God ta ke pepeni tapa amita  
susura. <sup>11</sup> Eto ungo ari ainge ue  
amo iji eha avo hotembitie ereto het-  
eto irivujo, ungotena matu amo God  
ke be ijio oreketo umbuna avoeto  
ungotena pambasora iji amo au-  
vetija <sup>12</sup> amo Keriso puvuto ere hua  
amo mume irae ururou iho bujasuja  
avoeto mume ta ari avo toto usasa



ta ki emi avo jigito heteto irivujo. <sup>13</sup> Eto mumete ari sasapura ue umo indie ke siosao ijie tiha paiha ue boru jujune ke ijie embo nei ta donda kito si ijie isoro eora avo toto iji ta ari avo jigama evujo. <sup>14</sup> Eto hamo ta ujeje sasapura amita gamo ta mane tutuvasova te Bada Iesu Keriso ta ari avo umbuto turereketo irivujo.

## 14

*Namei ta ari deire kito pehumba avojo.*

<sup>1</sup> Eto embo nei na God tumota ue amita osa ari avo ombasi ue ke pepeni neite neite jigama euja embo amiga mane boru jumbasova te pekitie umbuvujo. <sup>2</sup> Eto ungo ere kogova amo embo vahai amina nei do hotembae ue indari neite neite tapa avo indie iriuja eto embo nei amo God tumota be ae avoeto o tapa God ta titi ta indahu ke ijie ina pere indiuja. <sup>3</sup> Rate o indari embo amina o ajirekari embo ta degi ganini ijie embo sapura ke mane aisuja eto o ajirekari embo amina o indari embo avo pehumba mane aisuja eto o indiora amite eto mane indiora amite amo God na amo pure ari embo amita avoeto pekitie umbuja <sup>4</sup> Eto embo ainge eora amo God ta ke avo ambo ambo asi uje ue eora avoeto inena God ta pure ari embo ta degi mane pehumba asoa. Eto embo amina ari ainge ue amo hetautemo beau amo Bada na simba ere ua avoeto Bada ta sovera na jigou hetasuja. <sup>5</sup> Eto embo nei amo iji vahai vahai amo otohu iji ra euja rate embo nei amo iji tapa amo otohu ijira euja te ke peni be amo embo na amita jo ta do aisuja avo siriketo aisuja <sup>6</sup> Eto embo nei na iji nei nei otohu iji ra euja amo Bada jakeka ijie otohu euja eto embo nei o indiuja amo God osa ue indiuja avoeto God jakeka euja, eto embo nei o ajirekeuja amo Bada otohu ue ajirekeuja avoeto amite tapa God jakeka ere ua. <sup>7-9</sup> Eto embo amo teho iroute mo amburou amo umo eonga ae rate teho iresuja amo

Bada na eonga au iresuja eto amburesuja amo Bada na eonga au amburesuja amo embo amburari te vasiri te amita Bada aisi Keriso na ambuto vasiri te erena avoeto ungotena teho iresora eto amburesora amo ungotena Bada ta meniundi ra. <sup>10</sup> Eto ungotena tapa amo Bada ta meniundi rate ungo nei uhoho amina namei ta ari nei avo kogue sapura ke ijiove nei uhoho na mine pehumba ereova amo sapura be avo ere ova te ke be amo ungotena tapa God ta tombu ta hetaro God na ungotenau ari sirikitirou ungotenanena God ta degi ke mine asora <sup>11</sup> amita ke amo einge kajari mitia, “Na vasiri te Bada nanena ke erevi erena, embo tapa na tombu nau ta heteto tumotepain ue umo God ra ke aisora”. Ke ainge mitia. <sup>12</sup> Avoeto ungotenau ari tapa amita ke susu amo God ta degi harikaro ingesuja.

*Namei tiambueto beuja simba evujo*

<sup>13</sup> Eto ungotena pehumba mine ara mane aisora te ungotenau irari avo ungotena eonga kogue namei ta pambari degi avo mane peikaro teto tiambueto veaja simba aisora. <sup>14</sup> Eto Bada Iesu na ke ena amo na ere kogona amo indari nei sapura nei javotoho ra aera te embo nei na indari nei avo sapura ke ijie indesuja embo amo ari sapura aisuja aravora. <sup>15</sup> Eto indari emo no namei indahu avo namei hotembae ue inde kito amite tapa indie osaga ere kogua amo inena namei osa ae ue ereoa. Eto Keriso amo namei avoembo ambuna te inena ari no amina namei ta degi ao ari sapura ta beasuja. <sup>16</sup> Eto ungota degi ari jajavotoho avo pambuto embo nei ta degi ta avo kito urumbaro simba evujo. <sup>17</sup> Eto God na embomeni amita toho siriketo umbuto titi jigesuja amo indari amo ke peni mane rate embo ari javotoho ari te peka te tunga javotoho ari te avo Ahihi Otohu na hande euja avo ke peni bera. <sup>18</sup> Eto embo amuna ke avo be hotembitie Keriso ta pure ururou God na kito osa ururou embo

na kogue ke be aisora <sup>19</sup> avoeto ari deina ue hondate mine ara ari amo aro ejeha au peka ta iroro avo ue hamo asora <sup>20</sup> Eto God ta pure avo indari ta ke na mane avo sapura aisuja. Eto indari tapa amo javotoho rate namei na indari indirou namei na kito tiambueto beasuja amo sapura <sup>21</sup> avoeto namei na kito ari sapura aute avo hotembitie o rete mo wine rete mo donda deire avo be tovujo irae ai. <sup>22</sup> Eto umo indari ajirekari rete ari nei deire amo God te umo te aingeto ungo tohora te ke amo mane toasova ainge nei mane hande asova te umo eonga ke avo jigama ue amo no jo ta umo eonga pehumba mane asoa avoeto tunga javotoho ue iresoa. <sup>23</sup> Eto embo amita hotembari heriso avoeto indonote mane indono ainge eto na indesona ainge eto indesuja amo embo amita jo ta pehumba ere ua avoeto embo amo God ta titi ta ari sapura ere ua.

## 15

### *Sovera ambu embopo avo hondate evujo*

<sup>1</sup> Eto ungotena Keriso tumota ue sovera umbari embopo na ungotenau ujeje ta mane pambasora te embo nei sovera peni umbae embopo avo hondate ue iresora, <sup>2</sup> Eto ungotena embo vahai na ungotenau namei na Keriso ta degi sovera ari umbaja ungotete degi jombure ue iresora. <sup>3</sup> Ke ainge avo Keriso te tapa amita hamo avo hotembae rate amita ke avo einge kajari mitia amo “Bada God, enana na Umo urumbeora te bouka amo koho nau ta ere vivitia” ainge kajari mitia. <sup>4</sup> Eto God ta ke ijioi kakajikitovora amo ungotenanena God ta ke susu be avo kiora kakajekea, eto ke ai ta sovera ari umbuto osaga memenga puvuresuja te mane oju asora te God na umbara onde ena avo simba ue iresora. <sup>5</sup> Eto na pari ere ona amo ungo na Iesu Keriso ambo ambo ururovo ungotenau onde katitie sovera ikari embo God amina ungotena jo vahai ari avo

ikau <sup>6</sup> uhue jo vahai eto pe vahai amina ungotenau Bada Iesu Keriso ta Mamo God avo jakeka ijiroro amita degi usasa puvuresuja.

### *Enda nei embomeni ta degi duru javotoho puvija*

<sup>7</sup> Eto Keriso ta peka na ungo uhaja ainge nombu ungota peka mine ikara ururovo embo nei na kogue God jakeka aisora. <sup>8</sup> Eto erevi hotembevu, Iesu puvuna amo God na Judea ta ohihi hondate asi onde ena avoeto Iesu amo Judea embo hondate asi puvuna <sup>9</sup> eto enda nei embomeni na God ta jo ari avo enana na kito God jakeka ara puvuna amita ke amo einge kajari mitia “Eto ari no avoeto enda nei embomeni ta da ta enana ga umo jakeka ijie no javota haveni aisora” ke ainge eto <sup>10</sup> nei amo “Ungo Judea embomeni te enda nei embomeni te aingeto vahaita eto tunga javotoho evujo” eto ke nei amo <sup>11</sup> “Ungo enda nei embomeni Bada jakeka evujo eto ungo embo tapa Bada ta degi haveni evujo”. <sup>12</sup> Eto Isaiah na ke einge kajena “Eto embo Jesse ta meni King David amita ahije vahai amina ereto enda nei embomeni amita titi jigari embo ururou kogue ke be ijiroro enana ta Bada aisuja”, ke ainge kajena. <sup>13</sup> Eto pari erena emo ungo God ke be ijirovo tumota ari God amina ungota degi peka te tunga jamo ari te ikitirou uhue Ahihi Otohu ta sovera ari umbuto God na ambota ikau umbava onde ena avo simba ue tunga javotoho ue irivujo.

### *Paul ta pure ta ke.*

<sup>14</sup> Eto nau namei kamei na ungo tumota ae ue teho kajae rate ungo eonga ate poekari mine ara eto onde katari mine ara ue tunga iketo ere ova amo na ere kogona te <sup>15</sup> God na pure nau ikena avoeto ari neite neite tapa erevi be hotembava ke ngahia na ere kaitena. <sup>16</sup> Amo na Iesu Keriso ta pure ari embo enda nei embo avoembo ikari avoeto pure avo ue ungota degi God ta duru javotoho

hande ere ona amo enda nei embomeni Ahihi Otohu na egau God na enana ta degi pene javotoho umbaja ere ona. <sup>17</sup> Avoeto na God ta pure avo Iesu Keriso ga vahaita ere ona avoeto tunga javotoho ereona <sup>18</sup> te na ke erena emo embo nei nei na Keriso ta pure ereora avo ae rate nana Keriso ta hondate ari na pure one enda nei embomeni na ingihe God ta ke itiketo agi ere ora <sup>19</sup> amo Ahihi Otohu ta sovera na ari neite neite one kogora amo da Jerusalem eto pambuto da Illyricum kakane ainge eto Keriso ta duru javotoho avo hande one ere ingihera. <sup>20</sup> Eto uje nau amo na embo nei ta tutuvi hurukari aita mane bande gerikeona te na eonga tutuvi huruketo bande gerikasona ke ainge eto God ta ke ingae embomeni enda nei ta pambuto Keriso ta duru javotoho hande eona. <sup>21</sup> Amo God ta ke einge kajari mitia avo kogue eona, "Eto kiae embomeni na kesora eto matu ingae embomeni na ingito ke be aisora" <sup>22</sup> eto na pure ainge ere ovona amina ungota degi sausau pambae amore ere ovona.

### *Paul na Rome embomeni kesi pambasuja.*

<sup>23</sup> Eto na jua koso be ungo kiae enda nei nei eita pahue pure ere ovona avo pure etene irae etei <sup>24</sup> enda Spain ta pambasi pambuto degi ta heteto ungo te umoro isapa ue ungota pekari avo kito pambasona. <sup>25-26</sup> Rate na kiti amo ekalesia da Jerusalem ta mitera amita pure ta pambuto da Macedonia te da Achaia te ta ekalesia na koro siriketo enana da Jerusalem embo nei nei donda ambupu eto koro irae embomeni ta koro siriketo nanena ikana ijie hande iketera avo ikasi pambasona. <sup>27</sup> Eto koro amo enana ta jo tapa na ikasi uje eto iketera amo teho hande ae rate Bada ta ke avo Judea embo na enda nei embo ta degi hande ore ere ingihera avoeto hande mine haja baja avo iketera. <sup>28</sup> Avoeto na enana ta hande iketera avo umbuto pambuto ungota ingeni

ta iketo enda Spain ta pambasi pambuto ungotte arumbeto umoro asona <sup>29</sup> Eto na kogona amo ungotte umoro ue Keriso ta osa ari avo mine kiara aisora. <sup>30</sup> Eto nau namei kamei Bada Iesu Keriso ta javota eto Ahihi Otohu ta osa ari na namo avoembo pari ururovo na degi ta pahue kitoho embo tambasona avo eto nau javota pari evujo. <sup>31</sup> Eto enda Judea jo ta Keriso kiae embomeni amina na tasora avoeto tiumbeto pambana eto Judea ekalesia na koro eremite tapa umbara amite tapa pari evujo. <sup>32</sup> Eto God na uje au kito amo na pambuto ungotte jangu indie tunga javotoho asona <sup>33</sup> te God ta peka ungota degi iroi, amen.

## 16

### *Pekari ta ke*

<sup>1-2</sup> Eto ungotenau du Phoebe amo da Cenchreae ekalesia pamone ta pure ari pamone avo ungota degi puvuresuja amo ungo Keriso ta embomeni be kito avo pekevujo. Eto pamone amina embo isapamane te eto namote tapa hondate euja avoeto puvuto amina donda do uje au kito hondate evujo. <sup>3</sup> Eto pamone Prisca te amita ivu Aquila te amo namote Iesu Keriso ta javota pure ere uaetera avo ere pekitena, <sup>4</sup> eto enana ta vasiri na na orekitie enana sari ari haite ea amo nanena vahai osa ae rate enda nei ekalesia tapa na enana osa ereora. <sup>5</sup> Eto ekalesia tapa enana ta bande ta torukeora amite tapa ere pekitona. Eto nau namei Epaenetus amina enda Asia ai ta kiti jo haperekenu Keriso ambo ambo ena avo ere pekitena. <sup>6</sup> Eto nei amo Mary na ungo embo pure ngahia ena avo ere pekitona. <sup>7</sup> Eto apostel embo pepeni Andronicus te Junias te amo nau ke vahai embopo namote tapa tipura uera amina na Keriso ambo ambo ae kiti amo enana embo heriso amina Keriso ambo ambo uera avo ere pekitona. <sup>8</sup> Eto nau namei Ampliatu avo Bada ta javota osa ere ona avo ere pekitona. <sup>9</sup> Eto ungotena

Keriso ta pure vahai embo Urbanus te nau namei be Stachys te avo ere pekitona. <sup>10</sup> Eto embo Apelles amo memenga kina te toae Keriso tumota ere ouva amite eto embo Aristobulus te amita bande vahai embomeni avo ere pekitona. <sup>11</sup> Eto nau da Judea embo vahai Herodion amite eto embo Narcissus ta bande vahai embomeni Bada ta javota mitera avo ere pekitona. <sup>12</sup> Eto pamone heriso Tryphæna te Tryphosa te avo Bada ta pure ngahia be na ere ora avo ere pekitona. Eto nau du Persis amite tapa Bada ta pure ngahia na ere ua avo ere pekitona. <sup>13</sup> Eto Bada ta meni Rufus amite amita e te na aja nau na arako uija avo ere pekitona. <sup>14</sup> Eto embo javo Asyncritus Phlegon te Hermes te Patrobas te Hermas te enana amita namei kamei tapa enana amiga torukeora avo ere pekitona. <sup>15</sup> Eto embo Philologus te amita ae Julia te embo Nereus te amita du te Olympas te Keriso ta embomeni enana ga tapa mitera avo ere pekitona. <sup>16</sup> Eto Bada ta ke ta mune tavo mine ara ari amina osa mine ara evujo. Eto Keriso ta ekalesia tapa eita mitera amina ungo ere pekitora.

### *Ke tutumo*

<sup>17</sup> Eto nau namei kamei ke erena amo embo ta hotembari sokova na Iesu ta ke ate poekitiroro amo ungo teto tiambueto beasova avoeto ari avo toto be kogue irivujo. <sup>18</sup> Eto embomeni amo Iesu Keriso ta pure ari embomeni mane rate ujeje sasapura ta pure ari embo amina ke gamo na poekitie ijioere ke kiae embomeni na ambo ambo eora. <sup>19</sup> Eto unгона God ta ke avo ambo ambo ere ova amo embo tapa na kiari avoeto na nau jo tapa na osa ere ona. Eto ungo ari jajavotoho kiari embopo ue ari sasapura avo mane kesova te toava uje ereona. <sup>20</sup> Eto ari ainge ururovo jo jamo jamo ari ta God Mamo amina Satan umbuto ungota tombuta tau karaun eto beasuja avoeto ungotenau Bada Iesu ta hondate ari avo ungota degi iresuja. <sup>21</sup> Eto nau pure vahai embo Timothy te nau da vahai

embo Lucius te Jason te Sosipater te na ungo ere pekitora. <sup>22</sup> Eto na Tertius nanena Paul ta pe ta ke erevi ingito ungota degi ere kaitena amo Bada ta javo ta ungo ere pekitona. <sup>23</sup> Eto na Paul embo Gaius amina na undurari javotoho ere ua amite ekalesia amita bande ta torukitorā amite tapa ungo ere pekitora. Eto da ta koro simba ari embo javo Erastus te ungotenau namei Quartus te na ungo ere pekitera. <sup>24</sup> (-) <sup>25</sup> Eto duru javotoho amo Iesu Keriso ta ke avo hande eona avo ungo na ingihirovo God na ungo jigou hetasova. Eto ke emo matu be rate ondikari iriuja <sup>26</sup> avo enda tapa ta embomeni na daroho irari God avo embomeni na ke be ijie ambo ambo ara God na ijinu peroveta na kakajekea ke avo araha tambu ta harikeore ingiova. <sup>27</sup> Eto Iesu Keriso avoembo God kiari embo vahai amita degi usasa puvuresuja, Amen.



## 1 CORINTHIANS

*Paul na da Corinth embomeni ta degi ahari kiti kajena*

<sup>1</sup> Na Paul God ta apostel ana God na engerekena amo namote ungotenau namei Sosthenes te <sup>2</sup> aingeto Iesu Keriso ta embo ototohu God ta ekalesia da Corinth ta miteva amita degi ungo pekitie ahari erevi ere kaitera. Eto ungotenau namote eto enda tapa embomeni te amuna Bada Iesu Keriso ta javota pari eora avo ingeni jageni kogumbeto otohara ara God na jage eria. <sup>3</sup> Eto ungotenau Mamo God te Bada Iesu Keriso te na ungota degi peka te hondate ari te ikasora.

*Ahihi Otohu ta sovera ari*

<sup>4</sup> Eto ungonana Iesu Keriso ta degi hondate ari isapamane be umbeva avoeto na God ta degi osa matuainge eona, <sup>5</sup> Amo ungota degi God ta ke kiari te onde katari javotoho te tapa inono eova avoeto osa ere ona <sup>6</sup> Eto Keriso ta ke hande ore tapa uhava <sup>7</sup> Avoeto ungo Bada Iesu Keriso puvuresuja avo simba ue nei do toae Ahihi Otohu ta sovera ari tapa inono ta hande eto ere uhova. <sup>8</sup> Eto amina jigou sovera eto mitirovo Bada Iesu Keriso ta iji puvuresuja amo ungota degi mane pehumba aisora <sup>9</sup> te God na ungo amita Meni Iesu Keriso ungotenau Bada amiga vahaita ava umbuna avoeto amina ungo mane toasuja te simba ue iresuja.

*Ekalesia na kateketo boru mine jumba ea*

<sup>10</sup> Eto nau namei kamei, nanena Bada Iesu Keriso ta javota erena, ungo kateke kateke eto boru mane jumbasova te jo vahai hotembari vahai eto irivuho. <sup>11</sup> Eto embo Chloe ta bande ta iriora embomeni na puvuto nau namei kamei ungo na boru juhe irari ke etere ingena <sup>12</sup> amo 'Na Paul ta ke ambo ambo eona,' eto embo nei na, 'Na Apollos ta ke ambo ambo eona,' eto embo nei na, 'Na Cephas ta ke ambo ambo eona,' eto

embo nei na, 'Na Keriso ta ke ambo ambo eona,' ke ainge ijie miteve puvuto etere ingena <sup>13</sup> te Keriso kateke kateke eto hande arote? Eto na Paul ungo embo na tetere sari uenete? Eto na Paul javo nau ta bapataito uevete? Ari aingeko avo irae bera <sup>14</sup> Eto na ungo bapataito ae rate embo Crispus te Gaius te avo ingeni nau na bapataito uena avoeto na tunga javotoho ere ona <sup>15</sup> te ungonana javo nau ta bapataito ari ke avo mane aisova <sup>16</sup> te embo Stephanas ta hatira ga tapa bapataito uena te nei uenete aere amo na kiaera. <sup>17</sup> Eto Keriso na na pambuto embo bapataito ana ke ae rate amita duru javotoho avo embo ta degi hande ana ikena. Eto enda embo ta kiari na ke avo hande aetena amo Keriso ta i oreka amo sovera irae aetija.

*God ta kiari te sovera te amo Keriso ta degi kiora*

<sup>18</sup> Eto Keriso na i oreka ta ambuna amita ke avo ambuvujukari degi ta ere pahora amo sokova ke ijie urumbeora te ungotena God na umbuna embomeni amita degi amo God ta sovera ari ai ta umbuora. <sup>19</sup> Amita ke amo einge kajari mitia, "Eto na God nanena enda embo ta kiari amo taeketo umbuto gosukano irae aisuja," ke ainge ena. <sup>20</sup> Amo enda ta kiari embo davore? Eto enda ta ke embo davore? <sup>21</sup> Eto enana ta ke tapa amo God na etei ke be ambu ere ua. Amita be amo embomeni na God kesi ere uaetera te God kiari inono ae eo God na amita kiari na Iesu i oreka ta ambuna amita ke avo hande eo embomeni nei uhoho na sokova ke ere nei uhoho na ingito God ke be ere, oreketo ere uhua. <sup>22</sup> Eto Judea embomeni sovera neite neite avo kiti kito ke be asi uje ere ora te enda nei embomeni na embo pepeni ta ke avo kiti ingito ke ta gamo avo kesi uje eora <sup>23</sup> te ke hande ere ora amo Keriso i oreka ta teo ambuna amita ke avo ijiore Judea embomeni na ingihe sokova ke eora eto enda nei embomeni na ingihe haha puha, eto urumbeora <sup>24</sup> Rate God na siriketo ere uhua embomeni

Judea embomeni te enda nei embomeni na God ta sovera te kiari te amo Keriso ta degi kiora <sup>25</sup> amo Keriso na embo oreketo i oreka ta ambuna amo embo na sokova ke eora te God ta kiari te sovera te amo embo ta kiari te sovera te aingeko mane rate pajire be ra.

<sup>26</sup> Eto nau namei kamei, ungo God na siriketo umbuna iji te amo ungota irari mo do aingere avo be hotembvujō. Eto ungo embo heriso amo kiari embopo eto donda embopo eto embo pepeni ta meniundi eto ungo isapamane manera. <sup>27</sup> te God na enda ta kiari embopo te sovera embopo te avo me kiora kiae embopo ivo ambu embopo te avo siriketo ere uhua. <sup>28</sup> Amo enda ta donda, enda embomeni na kogoue sapura ke eora avo God na umbuto jigama asi uje ere ua, amo enda ta embo pepeni na be ambu ara ari ainge amo ere ua. <sup>29</sup> Avoeto enda embo tapa na God ta titi ta heteto, “Na, na” ijie dago embo pepenira ke ainge avo ari irae be ra. <sup>30</sup> te God na ungo umbuto Iesu Keriso ta jo ta iketei miteve ungota kiari te javotoho ari te otohū ari te ari sapura ombari te amo amina ere ua. <sup>31</sup> Avoeto ke einge kajari mitia, “Eto ungo jakeka asi eto kito amo Bada vahai avo jakeka evujo.”

## 2

### *Iesu Keriso i oreka ta teo ambuna amita ke*

<sup>1</sup> Eto nau namei kamei, eto na pambuto God ta ke ungota degi hande uena amo embo ta hotembari ke avo ae eto embo emo ke embo na eria ainge ara na ke ae <sup>2</sup> Rate na ungotē mitie amo Iesu Keriso i oreka ta teo ambuna amita ke avo pere etene ingihava. <sup>3</sup> Amo na ivo embo ke ijie ke amo ae rate na embo teho avoeto oju te tapa ke amo etene ingihava <sup>4</sup> Eto ke hande ue onde katitana amo ungo na ingihe embo ta hotembari javotohora ainge ijie sago kiova ae rate Ahihi Otohū ta sovera na ke amo ene kogava. <sup>5</sup> Amo embo ta hotembari avo tumota avo ae rate

God ta sovera avo ano kito tumota avo ijiena.

### *God ta Ahihi Otohū ta kiari*

<sup>6</sup> Eto na God ta pure ari embo ototohū pepeni amita degi ke hande eona amo kiari ke peni be avo eona amo enda ta embo pepeni ta kiari amo enda ta irae aisuja avoeto amina <sup>7</sup> ae rate God ta ke peni ondikari avo enana ta degi hande eona eto God na enda ae kiti ta amo ungotē nanena ke avo ingiho God ta usasa ta torara God na sirikena. <sup>8</sup> Eto ke avo enda ta titi jigirikari embopo na ingito ingaesira ea te ke avo ingaetera amo Bada usasa te amo mane i oreka ta taetera <sup>9</sup> Ke ainge amo einge kajari mitia, “Eto God na God osari embomeni ta degi ari do asi sirikena amo titi na kiae eto onde na ingae eto embo ta siro na hotembeto tambae,” <sup>10</sup> Ke ainge avo mitia te eha oroho emo God ta Ahihi Otohū na eha oroho harikitoi ere kogora. Eto Ahihi Otohū amina jombure ue amo God ta ke hotembari peni ondikari amo ere kogua <sup>11</sup> Eto ari amo erevira, embo ta hotembari jo ta amo embo nei na kiae rate ahihi amita eonga na tohota hotembari jo ta amo ere kogua ainge nombo embo na kiae rate God ta Ahihi na God ta hotembari jo ta amo ere kogua <sup>12</sup> Eto embo ta ahihi avo ikae rate God ta Ahihi avo ungotē nau jo ta iketei toreto mitie God na ungotē nau hande ikena amo amina harikeoi kiora. <sup>13</sup> Avoeto ke hande eora amo enda embo ta kiari manera te God ta Ahihi Otohū na Utu ta ke avo embo ta jo ta ijioi ingihe embo ta degi ke hande eora. <sup>14</sup> Eto God ta Ahihi embo ta jo ta irae embo amina God ta ke avo ingito sokova ke ijie ganini euja amo Utu i ta ari avoeto embo amo ingari inono ae ra. <sup>15</sup> Eto embo Ahihi Otohū umbari embo amina ari tapa amo ingihe inono ta sirikeuja te embo Ahihi Otohū umbae embo amina embo nei ta ke ingeuja amo ari haiteko mane avoeto tuha eto iriuja <sup>16</sup> amita ke amo einge kajari mitia, “Eto embo amuna Bada ta siro ta hotembari avo kiae avoeto

Bada mane ate poekaetija,” ke ainge kajari mitia rate ungotenamo amo Keriso ta hotembari amo ungotenau jo ta mitia.

### 3

#### *God ta pure ari embomeni*

<sup>1</sup> Eto nau namei kamei, na ungota degi pahana amo ungo God ta Ahihi umbari embopo ta degi God ta ke ngangahia avo aetena te ungo God ta kiari na pajirae rate Keriso ta degi meni isasaraho na arako ove kito toa. <sup>2</sup> Eto ungo indari be avo indari inono ae kito emi mu pere ikeo indava te eha oroho emo ainge nombo indari be avo indari inono ae <sup>3</sup> enda ta ujeje ta ere pahova amo ungota degi boru jumbari isapamane be mitia avoeto erena. <sup>4</sup> Eto ungo na ‘Na Paul ta ambotani,’ eto ‘Na Apollos ta ambotani,’ ke ainge ereva amo enda embo ta ari avo ere ova. <sup>5</sup> Eto Apollos amunure? Eto Paul Amunure? Embo amo teho Bada ta pure embo amita ke avo kaiha ururoro ungo na ingova siriketo ikena <sup>6</sup> Eto na Paul na i be urari embo eto Apollos amo i urea aita umo overekena te God na eoi i amo pajiua <sup>7</sup> Eto i be urari embo amo tehora eto umo overekari embo amo tehora te God na vahai au i amo pajiresuja. <sup>8</sup> Eto be urari embo te umo overekari embo te amo hotembari vahai na pure ere uma pure ta mine amo God na ikau umbasora <sup>9</sup> Eto dago God ga tapa hevuketo pure amita avo ere ora avoeto ungo amo dagota pure mane rate God ta pure ra. Eto ungo amo God ta bande avoeto God na ere gerikitia. <sup>10</sup> Eto God na nau degi ta kiari javotoho ikena avoeto bande ta tutuvi hurukeo embo nei nei na tutuvi aita bande gerikitera avo be kogue gerikara uje ereona. <sup>11</sup> Amita be amo God na tutuvi ikena amo tutuvi nei irae rate Iesu Keriso vahai na heteto mitia. <sup>12</sup> Avoeto embo amuna tutuvi ai ta bande gerikasi uje aisuja amo ‘gold’ retemo ‘silver’ rete atara rete, i rete, sasaha rete, ‘rice’ popo rete donda deina gerikasuja

<sup>13</sup> amo Bada ta iji puvuresuja amo sapura rete javotoho re amo iji amikote kesuja amo sapura retemo javotohore amo i bevère na au kesuja, <sup>14</sup> amo evekae iresuja embo amina amita pure ta mine amo umbasuja <sup>15</sup> te embo bande sapura gerikasuja amo evekau irae au teho iresuja, eto embo amo i peri na joeketo evikitirou God na orekasuja te embo amo ando pupuhu te iresuja.

<sup>16</sup> Eto God ta bande Otohu amo ungora te God ta Ahihi Otohu amo ungota degi ta iriua te ungo kiaerete? <sup>17</sup> Eto embo na God ta bande Otohu avo teto aimbasuja embo amo God na tau irae aisuja. Eto God ta bande amo Otohu ra eto ungo amo bande Otohu ra. <sup>18</sup> Eto umo eonga jandireketo no degi ta ke sokova aojo. Eto umo kiari embo ke erea te kiae embo sira eto God ta degi kiari umbaetea. <sup>19</sup> Amita be amo God na enda embo tapa amita kiari avo kogue enana ta ke avo huti ke eria amita ke amo einge kajari mitia, “God na eoi enda ta kiari embopo ta ke amo bage ta tarako euja.” ainge <sup>20</sup> eto ke nei amo, “God na enda embopo ta kiari avo kogue kiari be mane ke euja,” <sup>21</sup> avoeto ungo embo ambo ambo ari embopo na kogue na na avojo <sup>22</sup> Eto amita be amo Paul rete Apollos rete Cephas rete enda donda rete vasiri te amburari te ari matu rete eha puvuroute tapa amo ungota pure ari donda ra <sup>23</sup> Eto ungo amo Keriso ta toho eto Keriso amo God ta tohora.

### 4

#### *Iesu Keriso ta Apostero*

<sup>1</sup> Eto embona dago apostel ke asora amo Keriso ta pure ari embopo ke asora te God ta ke matu ondikari avo simba ue hande are ikena. <sup>2</sup> Eto peni be amo dago ke simba ari embopo na Bada ta ke agi ue pure asora te <sup>3</sup> Ungo rete eto pehumba embopo rete amite aingeto ari nau avo kogue na ganoka aisova amo na ke be mane asona eto ari amite namote tapa ari nau avo kogue ganoka mane eona. <sup>4</sup> Rate nau jo na na eonga pehumba mane eona

te na pehumba embo rete pehumba embo mane re amo Bada na eonga pehumba euja. <sup>5</sup> Avoeto pure embo javotoho rete sapura re avo ungo na mane evivi javivi aisova te Bada na puvuto aisuja avo simba evujo. Eto Bada na ke tapa mume ta ondikari avo harikitie embo ta hotembari jo ta avo au araha ta kesora amo iji amikote embo ta ari avo God na kito jakeka aisuja.

<sup>6</sup> Eto nau namei kamei, namote Apollos te ta javota ke ereva avoembo ere kaitena te ungo na “na na” ijie Bada ta ke ta hamota ungota hotembari ke ga kajue ere ova amo sapura be avoeto ungo na be kiova ke erevi ere kaitena, amo ungo na embo nei peni embo nei isapa ke ereva avoeto taekitie ere kaitena <sup>7</sup> te ungo amuna embo pepeni avo ke etei? Eto ungota degi ta do mitia amo ungo eonga etevete? ainge ae rate God ta ari avo eto ungota degi iketija avoeto ungo eonga, “Na, na” ijie avojo. <sup>8</sup> Eto ungo na kiari umbeve inono etei dago toto Utu ta toreto ‘kings’ ere ovete? Eto ungo ke be aeteva amo nangote tapa ‘kings’ aetera avo nau jo tapa na uje ere ona, <sup>9</sup> te na ere kogona amo God na etei embomeni kiti pahore dago apostel avo embomeni sasari asora embopo amiga ambota ere pahora. Eto dago pahore Utu te enda te ta iriora embomeni te tapa amina dago kogue mitera. <sup>10</sup> Eto ungo na Keriso ta kiari tapa amo umbeve irae etei dago avo kiae embopo ke erevete? Eto ungo embo pepeni sovera umbari embopo ke ijie dago sovera umbae embopo ke erevete? <sup>11</sup> Eto ungo be kivujo, dago apostels na umo beuje te indari beuje te bo perarari asuketo embo ta degi memenga te osaga te umbuto hari tumbuto mitovora <sup>12</sup> Eto dago ingeni dagota na pure ngahia ere ora te embo na urumbitore mine avo javotoho ari embo ta degi ere ikitera amo memenga osaga ikitore jamo eto kogue mitera. <sup>13</sup> Eto embo na dagota javo uore sapura uoi amo osa

ari ta ke avo mine eora, eto ari ainge amo eora te itikarita eto puvuto eha emo embota sirivo kandue sasapura amo dagora. <sup>14</sup> Eto nau osa ari meniundi, na ke erevi ere kaitena amo ungo na me kiova kajae rate kivujo <sup>15</sup> Keriso ta ke ate poekari embopo amo 1,000 ainge ungota degi mitera te Keriso ta duru ungota degi hande uena te ungota mamamane nei irae na vahai amo ungota mama ra. <sup>16</sup> Avoeto nau ate kitira avo ungo ambo ambo evujo <sup>17</sup> Eto ungo be kiova na osa ari meni Timothy amo Bada tumota ari meni avo ikano ungota degi pambuto na Iesu Keriso ta jo ta mitie irari nau do ainge ere ona avo pambuto au ingivujo, eto ke vahai aravo enda tapa ekalesia ta degi hande eona. <sup>18</sup> Eto na ungota degi pambae iji koso mitene ungo embo nei nei na embo pepeni ke ijie, “Na, na” ereva <sup>19</sup> te Bada na uje au kito ungota degi sausau pambuto ungo siro embopo ta ke sokova avo ingito avo ungota degi sovera miteite iraere avo be kesona <sup>20</sup> Eto God ta titi jigari aita amo ke pere mane rate sovera te tapa mitia, <sup>21</sup> Avoeto ungo eonga ungota jo sirikevujo, na ituha jigito pambuto ungota degi hana kiari ikanote mo teho osa ari te tunga jamo ari te na pambano?

## 5

*Eto Da Corinth ekalesia ta degi ari sapura vahai mitiaetija*

<sup>1</sup> Eto embo na ijioere ingiona amo ungota degi ta ari sapura vahai mitia amo God kiae embomeni na ari sapura ainge amo mane aetera te ungo na ere ova amo embo vahai na mamoma ta ae jimbuto mitia. <sup>2</sup> Eto ungo ari ainge avo kito osaga ki-aeteva te ungo na dago javotohora ke ainge ijie miteva te ungo do eto embo amo kurumbavo pambaja ae totove mitei? <sup>3</sup> Eto hamo nau amo hoi ta mitia te ahihi nau avo ungoti mitia avoeto pehumba eto embo amo kurumbetene matu pambija. <sup>4</sup> Avoeto ungo Bada ta javota torukitirovo



ahihi nau amo ungota degi iresuja avoeto Bada Iesu ta sovera na embo avo kurumbavo <sup>5</sup> Satan ta ingeni ta pambau amita hamo ta ujeje tapa avo tau irae au amita ahihi avo irirou God na Bada ta iji te oreketo umbasuja.

<sup>6</sup> Eto ari sapura erevi ungota degi mitia te unгона dago javotohora ijie taekae miteva amo sapura bera eto 'bread' pajirari sivo isapa ikeore pajito peni vahai euja aingeko ari sapura emina pajito peni vahai be aisuja <sup>7</sup> Avoeto Judea embona jarukari pondo ta 'bread' ta pajirari sivo ikae teho indiora ainge nombo unгона ari sapura erevi be tovujo irae ai. Eto ungotenau jarukari ta pondo indesora amita o 'lamb' amo Keriso avo matu tetere ambija. <sup>8</sup> Avoeto ungotena pondo indesora te 'bread' matu pajirari sivo ikeora avo ari sasapura te tumote toto 'bread' sivo ikae avo tunga javotoho na jo jamo jamo ari te ke be te na indie iresora

<sup>9</sup> Eto na ahari matu kajea aita, amo unгона tiha paiha embomeni ga umoro kamoro eova avo kajea. <sup>10</sup> Rate God kiae embomeni na tiha paiha ue hamo ta ujeje sasapura ue pegene ue god ingeni na ove eto tumotepain ari embopo avo ungo na toava ke ae ra te ungotenana enda vahaita miteva avoeto unгона enana toto pambari inono ae ra <sup>11</sup> te ke kajea amo embo amuna, "Na Keriso ta toho," ke ainge aisuja te embo amina tiha paiha rete uje sasapura rete god ingeni na ari avo tumotepain eoite embo ta javo ari sapura rete umo indito titivi ari rete pegene ari rete embo aingeko avo be tovujo irae ai, eto embo aingeko amiga mane arumbeto indari indesova. <sup>12-13</sup> Eto ekalesia ae embomeni araha ta mitera amita ari amo na mane sirikeona te God na vahai sirikeuja te ungotena ekalesia embomeni tapa vahaita mitera amo ungotena oenga ari ungotenau avo sirikara einge kajari mitia, amo, "Ungota torukari ta embo sapura mi-

tirou kito avo kurumbavu joru pam-bai," ke ainge mitia avoeto evujo.

## 6

### *Ganoka mine ara ari*

<sup>1</sup> Eto ungo tapa amo Keriso ta embomeni rate ungota namei vahai amita degi pehumba ere ova te ungo na God kiae embomeni na koto ta sirikara ere harikiteva te do avoembo ungota ekalesia embomeni na ganoka ara enana ta degi pambuto ae re? <sup>2</sup> Eto ungo enda embomeni tapa ta ari avo sirikari ijite amo ungotena Keriso ta toho amina God kiae embomeni ta ari avo siriketo pehumba aisora amo ungo kiae ue ere ovete? Eto enda tapa ta ari amo unгона sirikasova te ungota jota ari, hotembari, puvuja amo ungo eonga mane sirikavote? <sup>3</sup> Eto anera te tapa amo ungotenanena sirikasora avoeto enda ta ari amo ungotena oenga sirikasora amo tehora <sup>4</sup> Eto ke erena emo ungota degi ari do puvurou kito amo pambuto embo teho ungotenana mitia amita degi avo, amina sirikaetija amo tehora. <sup>5</sup> Eto ke erena amo unгона me kiova erena, eto ungo Iesu ta embomeni amita degi osaga puvurou kito amo ungota kiari embo vahai amina sirikau tunga javotoho aisova, embo amo iraerete? <sup>6</sup> Eto ungo embo vahai na namei ta degi pehumba ere ova amo God kiae embomeni ta titi ta ere ova. <sup>7</sup> te ungota namei na ke sokova ijie ungota degi sapura ururou amo kito hotembeto toaeteva te unгона namei ta degi pehumba ue koto ta umbuto ere pahova <sup>8</sup> Avo pere mane rate ungotenana tapa sapura ue namei ta degi ke sokova na ereva. <sup>9</sup> Eto ungo ke emo matu ingari eto kiarira amo ari sasapura embomeni na God ta usasa ta toreto hotari mane umbasora amo embo ga oine sasapura ari te tiha pahia neite neite ari embomeni te god ingeni na ove eto tumotepain ari embomeni te <sup>10</sup> pegene embomeni te donda umbasi ujeje peni vahai be embomeni te jai indito dipipi embomeni te embo

nei ta javo ari sapura ari embomeni te ke sokova ijie donda umbari embomeni te eto ari aingeko embomeni amina God ta usasa ta mane be mane toreto hotari umbasora. <sup>11</sup> Eto ari aingeko amo unгона ere uaeteva te Bada Iesu Keriso ta javo ta God ta Ahihi Otohu na egenu embo jajavotoho eto Otohu ere ova.

### *Ungota hamo te bisi te na God otohu evujo*

<sup>12</sup> Eto unгона, “Dago ari tapa neite neite aisora amo God na taekaera,” ke ainge ereveija amo ke be rate ari neite neite aisova te nei nei amita he ta nei do javotoho mane puvuresuja. Eto ke be amo na ari tapa avo aisona te nau hamo na na titi jigesuja avo na uje aera. <sup>13</sup> Eto indari amo oti avoembo ikarira te iji puvuresuja iji te amo donda heriso amo God na au iraesuja. Eto ungotenau hamo amo tiha paiha ara ikae rate Bada ta toho aja ikena amo ungotenau jo aita iresi uje ere ua. <sup>14</sup> Eto God na Bada Iesu jiginu vasiri te erena ainge nombo ungotena amita sovera na jigou vasiri te erasora. <sup>15</sup> Eto hamo ungotenau amo Iesu ta hamo vahaira te ungo kiae ue ere ovete? Eto Iesu ta hamo avo embo na tiha pamone ga kaju aisuja amo tehorete? Teho manera, <sup>16</sup> te embo amuna tiha pamone ga kaju aisuja amo amite tapa vahai aisuja amita ke amo einge kajari mitia, “Eto enana heriso rate bisi vahai aisora,” <sup>17</sup> te embo amuna Bada ga kaju aisuja amo amiga ahihi vahai aisuja. <sup>18</sup> Avoeto oine sasapura te tiha te avo kito oju toto pambuvujo. Eto ari sasapura neite neite amo embo ta hamo araha ta rate nei oine sasapura te tiha te amo hamo te bisi te na eoi sapura eora. <sup>19</sup> Eto God na no degi ta Ahihi Otohu hande ikena amo no hamo jota iriuja amo amita bande otohura te ungo kiae rete? Eto ungota hamo amo ungota toho mane <sup>20</sup> rate God na ombuto umbuna avoeto God ta toho avoeto ungota hamona God otohu evujo.

## 7

### *Jimbari ta ke*

<sup>1</sup> Eto unгона ahari ta kaeto eto ingari ke eteva amita ke be amo erevira, eto embo na pamone jimbae iresuja amo javotoho <sup>2</sup> rate enda ta tiha paiha isapamane be mitia avoeto embo vahai na pamone jimbasuja eto pamone na embo jimbasuja amo javotoho be ra. <sup>3</sup> Eto ivuna amita hamo ae ta degi ikasuja eto ae na amita hamo ivu ta degi ikasuja <sup>4</sup> Eto ae na amita hamo avo amita toho ke ijie mane orasuja eto ivu na hamo amita avo amita ke ijie mane orasuja te ae ta degi ikasuja <sup>5</sup> Eto pari asi uje eto amo ungo heriso jo vahai eto iji isapa ajirekasora amo javotohora te Satan na ungota jo suruha kito engekasuja avoeto ungo egerembeto jo vahai evujo. <sup>6</sup> Eto ke emo unгона ava ae rate ainge aetevete avoeto erena. <sup>7</sup> Eto embo tapa na ari nanena eona ainge ara uje ereona te embo nei nei na amo God ta degi hande oenga ara umbuora. <sup>8</sup> Eto singa te kakara te jijimbukae amite pamone dodoru amita degi ke erevi erena eto na aingeko jimbae iresora amo tehora <sup>9</sup> Eto jimbari ta uje peni vahai eto kito jimbasora amo tehora eto ke amita be amo jimbari ta hotembari amo jo ta kuru kuru eto avuei avo eto mane toasora te jimbasora. <sup>10</sup> Eto jimbuto mitera amita ke asona amo ke nau mane rate Bada ta ke avo asona ingivujo. Eto pamone na ivu mane toasuja <sup>11</sup> te toasuja amo embo eha mane jimbasuja te javotoho be amo ehako egerembeto ivu ga jo vahai eto peka umbuto iresuja. Eto nei amo ivu na ae mane toau pambasuja.

<sup>12</sup> Eto ke nei amo Bada ta ke mane rate ke nau avo asona ingivujo. Eto ungota namei ekalesia embo vahai amita ae amo God tumota ae rate ivuga iresi uje aisuja amo ivuna mane toau pambasuja. <sup>13</sup> Eto ainge nombo ekalesia pamone vahai amita ivu amo God tumota ae rate aega iresi uje aisuja amo aena mane toau

pambasuja <sup>14</sup> te ae na God tumota ere ua avoeto God na ae te ivu te tapa otohu ke aisuja eto ivuna God tumota ere ua avoeto ae amo God tumota ae rate God na ivu pere mane rate ivu te ae te tapa otohu ere ua. Eto ari ainge ae amo ungota meniundi amo tongopa te mane irae aetera, te enana te tapa otohu ra. <sup>15</sup> Eto embo pamone God kiae amina ivu rete ae na God tumota eora avoeto toto pambasi uje aisuja amo God ta ke pepeni amina enana pundurae avoeto toto pambasora amita be amo embomeni na jo ta osa ue peka ta irora God na jage eto umbuna. <sup>16</sup> Eto ivuna ae orekaute, ae na ivu orekaute avo sausau mane toasova te God ta uje avo be kivujo.

#### *Ungota irari ta hajire*

<sup>17</sup> Eto Bada na ungota irari ta hajire avo hande eto umbuto irova ikenana avo umbuto ambo ambo ue irivujo, eto ke erena emo ekalesia tapa ta degi hande eona <sup>18</sup> Eto God na jage eto umbuna iji te embomeni hamo kakamba ari embomeni amina mane ondikasora te teho iresora eto embo hamo kakamba ae hamo amo mane hamo kakamba aisora <sup>19</sup> amita be amo hamo kakamba ari amo tehorate God ta ke pepeni agi aisora avo peni bera <sup>20</sup> Eto ungo God na jage eto umbuna iji te amo ungota ari aita irivujo.

<sup>21</sup> Eto umbo nei ta pure embo kito mane osaga umbasoa te no titi jigari na aravora au ingito araha ta pambujo <sup>22</sup> Eto embo ta pure ari embo amo Bada na jage au puvurosuja amo Bada ta titi ta pundurari embo mane aisuja, eto embo nei ta titi jigari embo amo embo ta titi ta embo dombo rate Bada na jage au puvuto Bada ta pure ari embo aisuja <sup>23</sup> Eto ungo tapa amo Bada na ombuto umbuna avoeto ungo embo nei ta toho ke avojo. <sup>24</sup> Eto nau namei kamei, ungotena God na jage eto umbari iji te amo ari amo do aingere aita iresora.

#### *Singa te kakara te ta ke*

<sup>25</sup> Eto kakara na do asora amo Bada na na ae ingae rate Bada ta jo ari na na hondate euja avo nau hotembari avo ano ingesova. <sup>26</sup> Eto iji ungotenau te emo iji ngahia be puvija avoeto ungo jimbae iresova amo tehora <sup>27</sup> te umbo matu jimbari kito amo mane toasoa eto jimbae amo mane jimbasi jombure asoa. <sup>28</sup> Rate ungo kivujo, ungo singa rete kakara rete ungo jimbasaova amita sapura do irae rate jimbuto mitie osaga neite neite kesova avoeto erena.

<sup>29</sup> Eto nau namei kamei, na ke erena amo osaga kiari iji ngahia be puvuto ere hua avoeto ungo akate rate sove sove eto irivujo. <sup>30</sup> Eto ungo si ereva avo toto osaga ambu sira eto irivujo. Eto ungo tunga javotoho te miteva avo tunga osaga iji avo hotembitie irivujo. Eto ungo donda ombuto umbari embopo avo donda ambu embo jindeto irivujo. <sup>31</sup> Eto ungo enda embomeni ga pure ereova avo enana ta ari avo kito ando avojo. Eto ke erena amo enda ta ari irae ere ua avoeto erena. <sup>32</sup> Eto ungo hotembari neite neite hotembeova uje ae ere ona. Eto embo akate ae amo Bada ta uje avo pere ere ua <sup>33</sup> te embo ae te amo enda ta ari ae ta uje te Bada ta uje te avo ere ua. <sup>34</sup> Amo hotembari heriso avo pere ere ua. Eto kakara amo hamo te ahihi te tapa na Bada ta pure avo pere ere ua te pamone ivu te amo enda ta ari naingeto au ivu tunga javotoho aisuja avo pere euja. <sup>35</sup> Eto ke erena emo ungota degi bouka ikasi ue ke ae rate ari javotoho puvuroja erena, amo ari neite neite na ungo mane peika tika euja Bada ta uje pere avo ue ihari kambari irova erena.

<sup>36</sup> Eto ke nei amo singa ta kerari kakara iji koso mitima hamo te bisi te amita uje amo jimbari uje aisuja amo jimbasaova amo ari sapura iraera <sup>37</sup> te singa amita hamo ta ujeje toari inono kito amo hotembeto toto mane jimbasaova te teho iresuja ari ainge amo javotoho be ere ua. <sup>38</sup> Avoeto ke erena emo jimbasaova amo javotoho

eto jimbae teho iresuja amo javotoho bera.

<sup>39</sup> Eto ivu vasirite irirou amita ae amo ke peni na pundurari avoeto ivu mane toasuja te ivu amburou embo eha jimbasi uje aisuja amo tehorate embo God kiae embo amiga mane jimbasa te embo God tumota ari embo amiga jimbasa <sup>40</sup> te hotembari nau amo God ta Ahihi Otohu na eoi ingiona amo pamone amina jimbae teho doru eto iresuja amo tunga javotoho te iresuja.

## 8

*God sokova ingeni na ari amita degi pene ikeora amita ke*

<sup>1</sup> Eto god sokova amita degi indari ikeora amo ungotenanena indorote mane indoro amita ke amo aisona te ungo ke erevi kivujo, eto embo ta degi kiari te osa arite iresuja amo javotoho rate osa ari irae kiari pere amo 'Na, na,' aisuja. <sup>2</sup> Eto embo amina, "Na kiari embo ra," ainge aisuja te ari tapa amo kiaera, <sup>3</sup> eto God osa aisuja embo amo God na ere kogua. <sup>4</sup> Ke avo hotembitie indari god sokova amita degi ikeora amo indorote mane indoro avo ano ingivujo, eto embo na god ingeni na ove eto god ke eora amo be ambura te God vahai avo mitia <sup>5</sup> Eto enda tapa embomeni enda ta god sokova javo neite neite avo 'Bada' ke ijie jakeka eora, rate god aingeko Ututa eto enda ta iraetera <sup>6</sup> Amo God vahai donda tapa amita Mamo avo ungotena ne ke be aetera, eto donda tapa amita degi puvuna amo amita degi iriora. Eto ungotenau Bada Iesu Keriso vahai avo mitia eto donda tapa amo amita degi puvuna avoeto ungotena amita degi vasiri umbuora. <sup>7</sup> Eto ke erena emo embo neite neite na kiaera te enana na God sokova avo matu hamo ari avoeto ekalesia ta torari mitera amina indari god sokova amita hande ikari avo indie enana ta jo ta jopapa ue oju eora. <sup>8</sup> Eto indari amina au mane God ta degi huresora, avoeto indari avo indesora eto toasora amo sapura

rete javotoho amo mane puvuresuja.

<sup>9</sup> Eto ungo God ta ke erevi umbuto sovera ari embopo indari sio indie mitirovo ungo ke be ingito kogo ae avoeto sovera irae embopo amina kito jopapa te tapa indie sapura ta beasora avo ungo be kivujo. <sup>10</sup> Eto ke erena emo ungo Keriso ta ke ingari embopo avoeto indari sio indiova avoeto ungota embo vahai na god sokova ta bande ta toreto namei kamei ga indari indirou embo eha jo suruha embo amo ari no avo kito "namote tapa indesona," ainge eto indesuja amo sapura ta beasuja amo ari no amina au beasuja avoeto be kivujo. <sup>11</sup> Eto Keriso na umote no namei te tapa umbau amita toho aja ambuna <sup>12</sup> rate no kiari amina ete no namei sapura ere ua amo no namei pere mane rate Keriso ta degi ari sapura ere oa. <sup>13</sup> Avoeto nau namei na kito sapura ta beuja amina do ajirekari avo mane indesona te ajireketo mitima sari aisona.

## 9

*Paul na amita pure ta ke ena*

<sup>1</sup> Na embo amuna peikaera. Na Keriso ta apostel ra eto na titi nau na ungotenau Bada Iesu kia, eto na Bada ta pure eona amita be amo ungoni ere ova. <sup>2</sup> Eto embo nei na na kiora amo apostel mane ke eora te ungo miteva amo nau pure ta hajire ere kogova avoeto ungoni na ere kogova amo apostel be ra. <sup>3</sup> Avoeto na pehumba ere ora embopo ta degi ke mine erena amo ungo avo kiora erena. <sup>4</sup> Eto na Bada ta pure ue indari mane indesona ke ainge erere? <sup>5</sup> Eto Bada ta eambopo te Peter te enana ta airi umbuto pahue pure ere ora amo nango na ari ainge amo mane ara ke erere? <sup>6</sup> Eto Barnabas te namote tapa apostel be eto pure eora te dagota ingeni vasiri eto pure ta mine umbarote? <sup>7</sup> Eto ke erena amo erevira, enda ta isoro embo ta koro pure nei irae rate gavana na ikeoi umbuora. Eto pure



kovari embo na amita pure ta be avo umbuja eto o 'cow' simba ari embona 'cow' ta emi mu avo indija. <sup>8</sup> Eto ke erena amo embo ta ke mane rate God ta ke pepeni kajari aita mitia amita ke avo erena <sup>9</sup> amo Moses na einge kajari mitia, "Eto o 'cow' na 'wheat' be haito jasitirou amo 'cow' ta pe mane tigosova te tovujo indie pure ai." Eto ke be amo God na o 'cow' rete embo re avo hotembitie enu? <sup>10</sup> Ke amo ungotena pure embopo avoembo ena, amo pure enda kovari embo te be jukari embo te na enana ta pure amo indari pure amo eora. <sup>11</sup> Eto ainge nombo dagona ahihi ta pure ue ungota degi donda be urarako eora te dagota pure ta mine ombari asari amo mane umbarote? <sup>12</sup> Eto embo nei nei na ungota degi pure ue mine ere uhora amo ungo ke nei do ae rate dago pure matu itikari embopo amo mine umbarote mane umbaro? Rate Keriso ta duru javotoho avo deina mane taekasuja avoeto mine umbari ta ke avo hotembeto ae toto beuje te tapa mitiaetera. <sup>13</sup> Eto temple ta pure ari embopo na temple jo ai ta pure ue indari umbuto indiora eto indari umbuto pene gaga ta iketo kateketo umbuto indiora amo ungo kiovete? <sup>14</sup> Eto God ta ke hande ari embopo na pure aita ue donda umbara Bada na ke ena.

<sup>15</sup> Eto namote tapa nau pure ta mine umbaetena avo toto mitovona amo ungota jo haperekau avo mane erena te embona nau degi ta donda nei do ikae asora amo na tunga javotoho te mitima ambuto mine God ta degi umbasona. <sup>16</sup> Eto na God ta pure eona amo uje nau na ae rate God ta uje avo enu pure ereovona avoeto, "Na, na," mane aisona. Eto Bada na nau degi ta hajire ikeuja avoeto na pure mane toasona. <sup>17</sup> Eto na uje nau na pure erevi aetena amo mine umbaetena te nanena pure erevi ana ena <sup>18</sup> Avoeto nau pure ta mine amo deire avo ano ingesova, amo erevira. Eto na Keriso ta duru javotoho ungota degi hande eona

amo na mine mane umbuona te ungonahande mine vahai umbava eona avoeto tunga javotoho ari nau degi ta puvuja.

*Paul amo embo tapa ta pure embora*

<sup>19</sup> Eto na embo amuta pure ari embo mane rate ke hande ururono ingihe ambo ambo ara embo tapa ta pure embo eona. <sup>20</sup> Eto Judea embomeni na ke ingihe ambo ambo ara namote tapa Judea embo eto mitena te na enana ta ke pepeni na pundurae rate enana pundurari embomeni na ke be ingora namote tapa pundurari iriona. <sup>21</sup> Eto enda nei embomeni Moses ta ke pepeni kiae embopo amina Keriso ta duru javotoho ingihe ambo ambo ara namote tapa Moses ta ke pepeni ingae na enana ga irarako eona, eto God ta ke pepeni amo na ingae na irarako mane eona eto Keriso ta ke agi ue iriona. <sup>22</sup> Eto God tumota ue sovera umbae embomeni amiga na mitie sovera umbae uena amo embo nei uhoho na sovera umbara uena, eto embo ta ari tapa neite neite ngangahia tapa avo umbuto nei do hotembae enana ga mitie God ta ke hande uena. <sup>23</sup> Eto ari ainge eona amita be amo embomeni na kito Keriso ta duru javotoho avo uhuroro nanena ari jajavotoho neite neite umbasi eona.

<sup>24</sup> Eto embo isapamane tutuvasora te embo vahai amina nembeto siro kope umbasuja ainge nombo ungote tapa siro kope umbasi hotembeto inono ta tutuvevujo <sup>25</sup> Eto embo na oine asi ue teho mane pambuora te kiti tutuveto sovera umbuto ngahia eoi ando eto oine be ta pambuora. Eto enda ta siro kope sapura aisuja avo umbasi ue tutuveora te ungotena daroho irari ta siro kope avo umbasi ue pure eora <sup>26</sup> Eto nanena teho ate kitira ue ae rate siro kope umbasi ue pure ngahia be na eona. <sup>27</sup> Eto na embo nei ta ke hande ari embo rate tutuvari ta simba ari embo ungotenau Bada na na kito sovera inono ae avoeto toaute mane

toau avoeto andota sovera ari umbasi tutuvari ngahia be na eona.

## 10

*Israel ta ohihi na sapura ea aingeko avojo*

<sup>1</sup> Eto Israel embomeni ta ohihi na Moses ambo ambo ue degi oja-gatambuta pahuo oje na ahurekenu pambuto eva ta puvuo eva eveketo kahetika eto degi enu pambua. <sup>2</sup> Eto enana ainge ea amo Moses ta ambotani ara oje te eva te na bapataito ena. <sup>3</sup> Eto enana amo utu i ta indari te umo te avo indie ere pahuaetera. <sup>4</sup> Eto enana pahuo utu ita atara peni amina ambo ambo ue pahunu atara aita umo puvuto bovunu kito india, eto atara peni amo Keriso ra. <sup>5</sup> Eto enana ari avo kito kiaesira uo God na kito tumo eto enana ta hamo avo teto enda oja-gatambuta ihajara ena. <sup>6</sup> Eto enana ari sasapura ta ere pahuaetera avoeto ari ainge amo ena avoeto ungotena ne na ari avo kito mane ara ena. <sup>7</sup> Eto god sokova ingeni na eto jakeka ere ijaetera ainge nombo ungoni avojo, ke amo einge kajari mitia, "Enana arumbeto indari indito ereto god sokova avo jakeka ijie ire ere tivitiaetera," <sup>8</sup> Eto tiha paiha ue oine sasapura avojo. Eto enana ainge uo God na embo tapa 23,000 ainge tenu ambuvujekea. <sup>9</sup> Eto ungoni Bada God mane undupa aisova te enanana God ta degi undupa eo God na o koso o ikenu beto embo kakambukenu ambuvujekea. <sup>10</sup> Eto nei amo ungo evivi javivi avojo enana na evivi javivi uo God na embo tari anera ikenu beto embo tenu ambuvujekea. <sup>11</sup> Eto ari ainge enana ta degi puvuna amo ungotena iji tutumota irari embomeni na kito ari aingeko mane ara kakajekea. <sup>12</sup> Embo amuna, "Na mane beasona te heteto iresona," ainge aisuja te embo amina beona umo eonga simba aisuja. Avoeto ungo kogue irivujo. <sup>13</sup> Eto ari sapura ta engekari do puvuresuja amo nei mane rate embo tapa na kiora vahai

aravora te God na umo mane jeneambuaisuja te no sovera kito teka eto mane au sapura ta gamo na no sovera nembasuja rate God na sapura toto pambari degi siriketo au kesoa.

*God sokova ta pondo eora amita ke*

<sup>14</sup> Aravorate nau namei kamei, god sokova tapa avo be pe te tovujo. <sup>15</sup> Eto ungo kiari embopo hotembari embopo amo na ere kogona te ke erevi erena ungo eonga be hotembeto kivujo. <sup>16</sup> Eto javotoho ari ta atungu umbuto God ta degi peketo indiora amo ungotena Iesu Keriso ta sasaga amina vahai eora, eto 'bread' umbuto periketo indiora amo Keriso ta hamo avo indie vahai eora. <sup>17</sup> Eto ungotena embo isapamane rate 'bread' vahai avo indie ungotena hamo vahai eora. <sup>18</sup> Eto enana Israel embomeni ta ari avo be kivujo. Eto enana na pene gaga ta indari iketo ehako umbuto indie pene gaga ta God amiga vahai ere ora. <sup>19</sup> Eto ke erena amo ingeni na ove eto god ke eora amite eto indari god sokova amita degi ikeora amite tapa amo ke be manera <sup>20</sup> te God kiae embomeni na indari amita degi ikeora amo God be amita degi hande ikae rate ahihi sasapura amita degi ikeora avoeto na ungo ahihi sasapura amiga vahaita eova ere taekitona. <sup>21</sup> Amo ungoni Bada ta atungu ta indie ehako ahihi sasapura ta atungu ta mane indesova eto Bada ta pene gaga ta indie ehako ahihi sasapura ta gaga ta mane indesova. <sup>22</sup> Eto ungo na Bada ta sovera avo nembari ke ijie Bada undupa ereova ke ijie amo Bada ta atungu ta indiuie Satan ta atungu ta indiuie ainge ere ova amo undupa ta ari ra.

*Eto embo na amita uje pere mane hotembasuja*

<sup>23</sup> Eto embo na ke einge eora amo, "na ke pepeni na pundurae avoeto ari tapa asona amo tehora" eto ke ainge amo ke be rate ari nei nei amita degi amo ari javotoho mane

puvuresuja. <sup>24</sup> Eto embo amina amita ari avo pere mane hotembasuja te namei ta ari amite tapa hotembasuja. <sup>25</sup> Eto ari nei amo einge evujo, ungo 'market' ta o umbasi pambuto kito amo mane eto ingari ke asova te teho umbuvujo amita be amo god sokova ta hande matu ikari re te ungo segigi aisova. <sup>26</sup> Eto enda te enda ta donda tapa amo ungotenanena jigama ara Bada na ikena. <sup>27</sup> Eto embo nei God kiae na amita bande ta indova oru au pambuto amo ke nei do mane hotembasova te teho indivujo <sup>28</sup> Eto embo nei na kito segigi ue, "o amo matu god sokova ta hande ikari ra," ainge au ingito amo harikasuja embo amita jo avo orekitie mane indesova. <sup>29</sup> Eto unгона indesova amo ungota jo ta osaga mane kesova te embo amita jo avo orekitie mane indesova <sup>30</sup> Rate unгона ke einge hotembitevete ova "na ke pepeni na pundurae embo rate doeto na embo nei ta jo kito orekitie mane indono? Eto na indari heva nau ta umbuto God peketo indionate do avoembo embo na na pehumba aro?" ke ainge avo toto <sup>31</sup> indie gagihe embo nei na ungo kogue God osa ue jakeka ara evujo <sup>32</sup> Eto Judea embo rete Greek emborete God ta ekalesia embo vahai amina ari no avo kito sapura ta beasuja avoeto unгона simba evujo. <sup>33</sup> Eto na ari nau amo meni isapa sira eto ururono embo nei na ari nau avo kito God ke be ijiroro God na kito oreketo umbaja eona.

## 11

<sup>1</sup> Eto Keriso amo nau ate kitira avoeto ambo ambo eona ainge nombo na ungota ate kitira avoeto na ambo ambo evujo.

*Eto ekalesia pamone na siro pohuketo Bada ta bande ta torasora*

<sup>2</sup> Eto na ungo ate poekitone kogava avo inono ta ambo ambo eova avoeto na ungo osa ere ona te <sup>3</sup> na ke erevi amo ungo be ingova uje ere ona amo Keriso amo embo ta siro

avoeto amita kiti umbari embo ra. Eto pamone ta siro amo embo, eto Keriso ta siro amo God. <sup>4</sup> Eto embo na God ta degi pari asi rete God ta ke hande asi ue amo siro pohuketo aisuja amo amita siro embo Keriso avo Otohu ae ue aisuja. <sup>5</sup> Eto pamone na pari asi rete God ta ke hande asi ue amo siro pohukae teho aisuja amo amita siro embo avo otohu ae ue aisuja amo siro otiketo pomaki eoi arako ereua <sup>6</sup> Eto pamone na siro pohukari uje ae au kito amo evujo siro otikau pomaki ai. Eto pamone amo ari ainge eto me kiari uje ae au kito amo ejo amita siro avo pohukai. <sup>7</sup> Eto embo amo God ta kiari vahai eto God ta sago kiari vahai aravora avoeto embo ta siro amo mane pohukasuja te pamone amo embota tombu vahai eto sago kiari vahai aravora. <sup>8</sup> Eto ke be amo God na embo pamone ta tembure na ae rate pamone avo embo ta tembure na ena. <sup>9</sup> Eto God na embo amo pamone avoembo ae rate pamone amo embo avoembo ena. <sup>10</sup> Avoeto ke erena amo embo amo pamone ta titi jigari embo avoeto God ta anera na ari avo kiora pamone na siro pohukasuja. <sup>11</sup> Eto Bada ta titi ta embo eonga pamone eonga ara God na ikae rate embote pamone te hondate mine ara, ara God na ikena, <sup>12</sup> Eto pamone amo embota jota puvuna te pamone ta jota embo puvuora. Eto embote pamone te amo God ta degi ta eto puvuora. <sup>13</sup> Eto ungo eonga siriketo kivujo, pamone na siro pohukari irae God ta degi pari aisuja amo tehorete? <sup>14-15</sup> Eto ungotena ere kogora amo God na pamone ta siro tu koso ikena amo pamone ta siro pohukaja ikena avoeto ungotenanena pamone ta siro koso vahai avo kogue osa eora te embo ta siro tu koso vahai kiora amo me euja, avoeto ungo be hotembevujo. <sup>16</sup> Eto ungo embomeni nei nei na ke erevi eteketo kito uje ae asova te dago te eto God ta ekalesia te na dagota ari erevi amo uje eora.

*Bada ta pondo*  
(*Matthew 26:26-29, Mark 14:22-25, Luke 22:14-20*)

<sup>17</sup> Eto ke nei ano ingivujo, ungota ari nei vahai avo na kogue osa mane asona. <sup>18</sup> Eto ungo ekalesia ta torukari ta amo ari javotoho mane puvuja eto na ijioire ingiona amo ungo ekalesia ta torukari ta amo kateketo eonga ira ue boru jumbuova ke avo etere ingena amo na ere hotembitena amo ke be ra. <sup>19</sup> Eto ungota embo nei uhoho amo degi javotoho ta pahora amo God na kito osa ere ua amo ungo embo ere katik-itova amina kiova ere ora. <sup>20-21</sup> Eto ke erena amo Bada ta Pondo torukari ta amo embo nei na indari egimbeto umbuto indiuja eto embo nei amo indari indae beuje na ambuja eto embo nei amo umo indito titivi euja ari ainge amo Bada ta Pondo manera <sup>22</sup> Eto ungo beuje ururou indari te umo te indesova ungota bande amo iraerete? Eto unгона God ta ekalesia amo otohu manera ainge ijie donda ambu embopo na kiora ari amo ere ovete? Eto ungota ari avo nanena kito jakeka ana ere ovete? Na ainge mane aisona te <sup>23</sup> na Bada ta degi umbuto ungota degi ate poekitana ke amo erevira. Embo Judas na Bada Iesu isoro embo na umbara harikena amita mume amina <sup>24</sup> Bada Iesu na 'bread' umbuto God peketo ingeketo ambotani ta ikitie ke einge ena, "Hamo nau erevi umbuto indavu, amo ungoembo ere ikitena, ungo erevi ue na hotembu hotembu evujo," ainge enu indio irae enu <sup>25</sup> Iesu na atungu umbuto enana ta degi ikitie ke einge ena, "Atungu emo ke ikari eha ta orosa erevi umbuto indie na hotembu hotembu evujo," ke ainge amo Bada na ena <sup>26</sup> Avoeto eha oroho eto pambuto Bada ehako puvuresuja iji amita jota amo 'bread' te atungu te avo indie unгона Bada ta amburari avo hotembu hotembu ue ke be ereva. <sup>27</sup> Eto embo amuna amita jo sirikae rate Bada ta 'bread' te atungu te sio indesuja amo Bada ta hamo te orosa te amita degi urum-

barako ere ua. <sup>28</sup> Eto embo amuna 'bread' te atungu te avo indesi ue amo amita jo avo siriketo indesuja te <sup>29</sup> Embo amuna Bada ta hamo te orosa te avo hotembae ue sio umbuto indesuja amo God ta pehumba embo amita hamo ta puvuresuja. <sup>30</sup> Avoeto ungota degi embo ta ambure neite neite eto sovera ambu embopo eto embo nei ambuvujekeora. <sup>31</sup> Eto ungotenau ari sirikaetera amo God ta hana kiari ungotenana mane kiaetera. <sup>32</sup> Eto Bada na ungotenau ari sapura ta hajire osaga iji isapa ikeoi kiora amo enda embomeni na hana kiari peni vahai kesora avoeto tiumbeto pambara hana kiari isapa ikeoi kiora.

<sup>33</sup> Avoeto nau namei kamei ungo Bada ta pondo indesi vahaita eto ungo eonga ohare mamare evujo. <sup>34</sup> Eto God na pehumba aisuja avo hotembeto embo amuna beuje ururou kito amo amita bande ta indesuja. Eto ke nei nei amo na ungota degi pambuto ano ingesova.

## 12

*Ahihi Otohu na sovera ari hande ikeuja*

<sup>1</sup> Eto nau namei kamei, eto hande neite neite Ahihi Otohu na ikeuja amita ke be avo ungo na be kiova uje ere ona. <sup>2</sup> Eto ungo God kiae irari iji te amo unгона god sokova ingeni na ove ari avo ke be ijie amita ambota ere pahuaeteva <sup>3</sup> Avoeto ungo kogova amo embo amuna Iesu ta javo urumbasuja amo God ta Ahihi ta ke ingae embora eto embo na, "Iesu amo Bada God," ke teho mane aisuja te God ta Ahihi Otohu na ijirou ingihe aisuja. <sup>4</sup> Eto God ta Ahihi Otohu amo vahai amina sovera ari neite neite hande ikerekeuja <sup>5</sup> Eto Bada ta ke agi ue pure neite neite eora te Bada amo vahai <sup>6</sup> rate God vahai amina embomeni ta jo ta pure uoi hajire eonga eonga kiora. <sup>7</sup> Eto Ahihi Otohu na embo vahai vahai amita jota pure euja amo embo vahai vahai avoembo ae rate embo tapa



avoembo euja <sup>8</sup> Amita ari amo erevira, Ahihi Otohu na embo vahai ta sovera ari ikeoi umbuto God ta ke harikeoi kiora eto embo nei amita degi sovera ari ikeoi embomeni ate poekeuja <sup>9</sup> eto embo nei amita sovera ari ikeoi God tumota euja eto embo nei ta sovera ari ikeoi umbuto embo kondeuja <sup>10</sup> eto embo nei ta sovera ari ikeoi umbuto ari tikambari neite neite uoi embomeni na kogue kore eora eto nei amo onde kateuja eto nei amina sovera ari ikeoi umbuto ahihi berete sokova re amo harikeoi embomeni na kiora eto embo nei amo enda nei embomeni ta ke na ke hande eoi ingiora eto embo nei na enda nei embomeni ta ke ingito jandireketo hande eoi ingiora. <sup>11</sup> Eto sovera ari tapa erena erevi amo Ahihi Otohu vahai amina siriketo embo vahai vahai amita degi amita uje na hande ikeuja.

#### *Ando ta timu hatirari ke*

<sup>12</sup> Eto ungotena embo ta ando amo hatu singi neite neite amina ari rate ando amo vahaira. Eto ainge nombo ungotena embo isapamane amo Keriso ta ando vahai amo erevira. <sup>13</sup> Ungotena Judea rete enda nei rete ke agi ari embo rete ke ikari embo rete tapa amo Ahihi vahai amina bapataito etei Keriso ta jo ta toreto Ahihi Otohu vahai umbuto ando vahai ere ora. <sup>14</sup> Eto ando ta hatu singi vahai avo peni ke mane aisora amo erevira <sup>15</sup> Eto utu na ke einge mane euja, “Na ingeni mane avoeto na ando ta hatu singi manera,” eto ke ainge ijie ando toto eonga mane pambasuja <sup>16</sup> eto onde na, “Na titi mane avoeto na ando ta hatu singi manera,” ainge aisuja te eonga irari inono aera. <sup>17</sup> Eto no ando amo titi vahai iresuja amina naingeto asavi ingo? Eto no ando amo onde vahai iresuja avoeto naingeto donda ta mune, mune hembao? <sup>18</sup> Eto ando ta hatu singi amo God na enana ta degi ta ikerekena avoeto pure ungota avo euja. <sup>19</sup> Eto ingeni isapamane na ando aetija amo embo ta ando be mane aetija <sup>20</sup> te ando vahai amo hatu singi hajire neite neite amina

ando vahai ari <sup>21</sup> Avoeto titi na ingeni ta degi, “Na inono avoeto umo toto pambu,” ke ainge mane aisuja eto siro na utu ta degi, “Na inono avoeto umo toto pambu,” ke ainge mane aisuja <sup>22</sup> Eto nei amo ando ta donda ivo ambupu amina ando ta pure peni be euja <sup>23-24</sup> Eto ando ta me kiari donda amo otohu ke ijie bo na ahurekeora eto ari ainge amina donda nei aingeko mane avoeto simba javotoho eora. Eto God na ando ta hatu singi vahaita siriketo iketo hatu singi nei nei pepeni mane avo simba javotoho ara ena. <sup>25</sup> Eto ando ta hatu singi na jujune ke mane aisora te tapa inono inono ke ijie hondate mine ara ue iresora. <sup>26</sup> Eto donda vahai amina memenga kesuja amo hatu singi tapa amiga memenga kesora eto donda vahai avo osa ue peni ke ijiro amo donda nei nei amina kito osa aisora. <sup>27</sup> Eto ungo amo Keriso ta ando eto ungo embo vahai vahai amo ando ta hatu singi neite neite aingeko <sup>28</sup> amina ekalesia ta pure neite neite ere ovova. Kiti amo God na apostero siriketo umbuna eto amita engitita amo peroveta ikena eto amita engitita amo ate poekari embopo umbuna eto nei amo ari tikambari ta ari neite neite aisora amita pure ikena eto nei amo embo kondara pure ikena eto nei amo embo hondate ari ta pure ikena eto nei amo embo titi jigora pure ikena eto nei amita degi ke neite neite amita kiari ikena. <sup>29</sup> Avoeto embo tapa amo apostero mane, peroveta mane, eto ate poekari embopo manera. Eto enana tapa na ari tikambari rete o kore ari ta ari neite neite mane eora <sup>30</sup> Ambure embo mane kondeora enda nei ta ke na ke mane eora eto ke mane jandirekeora.

#### *Osa ari ta ke*

<sup>31</sup> Rate Ahihi Otohu ta sovera ari dombo be avo umbasi uje jo tapa na ikitie evujo. Eto ari vahai nombo be erevi ano ingivujo.

## 13

<sup>1</sup> Eto na ke ake embo be eto enda ta ke neite neite amite anera ta ke te na ke hande ue embomeni osa ae etena amo punu teora eto i kevi ta teora eto asavi pere euja aingeko aetena. <sup>2</sup> Eto na onde katari ta sovera Ahihi Otohu ta degi umbaetena amo ke araha tambuta eto ma ta ondikari te tapa embota degi onde kataetena eto God tumota peni vahai ue tiri ta degi ke amo degi nei ta kikiseti pambaetija te nau degita embo osa ari irae amo ari tapa ainge amo be ambu huti pere aetena. <sup>3</sup> Eto nau donda tapa umbuto vahai vahai donda ambu embo ta degi hande ikitie nau hamo te tapa i ta ikano evekaja ikaetena te nau degita osa ari embota degi ae amo nau degita ari javotoho nei do mane puvuraetija. <sup>4</sup> Eto osa ari embo be amita ari amo eingera, iji koso embo simba euja, embo kito jo euja, embo nei ta donda kogue tumo mane euja, “Na, na,” ijie sarika mane euja, biso oronga mane euja. <sup>5</sup> Namei otohu ae ke samuna mane euja, umo eonga mane hotembeuja, tumo sisire sausau mane euja, embo nei ta ari sasapura mane hotembeuja, <sup>6</sup> Embo nei ta ari sapura kito tunga javotoho mane euja te ari javotoho be mo davoire kito osa euja. <sup>7</sup> Eto osa ari embo na embo orikitie tumota ue ari javotoho ambota puvuresuja ke ainge ijie mane touja te ngahia eto iriuja. <sup>8</sup> Eto osa ari amo eho mane irae aisuja te daroho iresuja. Eto embo ta onde katari ke amo mitia rate irae aisi ere ua, eto ke neite neite kiari amo irae aisi ere ua, eto embo ta kiari isapamane amite tapa irae aisi ere ua. <sup>9</sup> Amita be amo ungotenau kiari te onde katari te Ahihi Otohu ta degi umbuora te amo aemana umbae rate ambota <sup>10</sup> iji be avo inono ta puvuresuja kito amo ungotenane ke avo aemana kesora amo eingera. <sup>11</sup> Eto na meni isapa irari ijite nau ke te tunga te hotembari te amo meni isapa ta ari avo uena te na pajito embo etena amo meni isapa ta ari amo matu egikarira <sup>12</sup> Eto

ambota do puvuresuja amo umo jo ta aririvo kiarako ere ora te ambota iji be puvuresuja amo ungoti tombu mine kia aisora. Eto na eha emo ke aemana kiae ra te ambota iji be puvuresuja amo God na nau jo ta do tapa ere kogua ainge nombo kiari nau amo inono au tapa aemana kiae ra te ambota iji be puvuresuja amo God na nau jo ta do tapa ere kogua ainge nombo kiari nau amo inono au tapa aemana kesona.

<sup>13</sup> Eto ari tapa nei heriso nei vahai amo eho mane irae aisora te iredora, amo tumota ari te ambota ari javotoho do puvuroja simba ari te osa ari te amo eho mane irae aisora. Eto donda nei heriso nei vahai rate nombo be amo osa arira.

## 14

*Ahihi Otohu na hande ikeuja amita ke*

<sup>1</sup> Eto donda tapa amita hamo ta amo embo osa ari avo aisi uje ue Ahihi Otohu ta sovera ari neite neite hande ikeuja avo umbasi uje evujo. Eto nombo be amo sovera ari umbuto God ta ke na embomeni onde katasi uje evujo. <sup>2</sup> Eto ivivi ta ke hajire Ahihi Otohu na embo ta degi hande ikeuja avo embo na umbuto ke aisuja te ke ainge amo embo ta degi ae rate God ta degi aisuja, amita be amo embo amuna ingae rate God na vahai ingiuja. Eto ke ainge amo Ahihi Otohu ta sovera na ahihi ta ke ondikari avo eora. <sup>3</sup> Rate embo na God ta ke na embo onde katasuja amo embo na arahata ingito sovera ari umbuto tunga javotoho ue iresuja. <sup>4</sup> Eto embo na Ahihi Otohu ta hondate ari na ivivi nei na ke euja amo umo eonga sovera ari umbuja, eto onde katasuja embo amina ekalesia tapa ta degi sovera ari ikeuja. <sup>5</sup> Eto ungo tapa ivivi ta ke hajire nei Ahihi Otohu ta degi umbava uje ere ona te nombo be amo embo onde katevujo. Eto ivivi nei na asoa amo isapa rate onde katari ke asoa amo peni be avoeto ke ai ta amo ekalesia na sovera umbari haitera. Eto ivivi nei na ke

aisuja embo amina ke avo jandireketo au embomeni ingito sovera ari umbasora. <sup>6</sup> Eto nau namei kamei ungo ke erevi be hotembuvujo. Eto na Ahihi Otohu ta degi ivivi ta ke nei umbari embo avoeto ungota degi pambuto kiari eha ae ingae eto ate poekae eto onde katae avoeto ivivi ta ke nei na asona amo ungo ke be mane ingosova avoeto ungota degi ari javotoho mane puvuresuja. <sup>7</sup> Amo erevira, eto embo na isaumpuri kahue tunga neite neite eora te tunga vahai kambasora amo ingari sapurara. <sup>8</sup> Eto embona hui javotoho hukae aisuja amo embona ingito isoro arote toaro avoeto mana mana aisora. <sup>9</sup> Eto ainge nombo ungota ke embo tapa na ingari haiteko mane avo aisova amo pisara ainge embo ta ku ta pambasuja. <sup>10</sup> Eto enda embomeni ta ke neite neite mitia amo enana tapa amita ke amo be ambu iraera <sup>11</sup> Eto na enda nei amita ke ingae aisona amita be amo na enda nei amo enda nei avoeto <sup>12</sup> Eto aingeko amo ungo na ere ovova avoeto ungo Ahihi Otohu ta degi sovera ari hande eto umbasi eto kito ari deina ekalesia embomeni tapa hondate aisuja avo uje eto umbuvujo.

<sup>13</sup> Eto ari erena avoembo ivivi nei na ke aisuja embo amina ke avo jandireketo au ingora kiari umbasi pari aisuja. <sup>14</sup> Eto na pari ijie ivivi ta ke hajire nei na eona amo nau ahihi na pari euja te hotembari nau amo be ambu eto iriuja. <sup>15</sup> Avoeto na do ano? Javotoho amo na ahihi na pari ue hotembari te tapa na pari aisona. Eto haveni aisona amo Ahihi na pere ae rate hotembari te tapa na aisona. <sup>16</sup> Eto nei amo ungo Ahihi na God jakeka ijirovo embo nei ungota ari kiae embo amina puvuto ungota osa ari avo ingito ari avo matu kiae avoeto ke be mane aisuja. <sup>17</sup> Eto ke be amo ungo na God osa ue ereva te embo nei na ingito javotoho mane kesuja. <sup>18</sup> Eto Ahihi Otohu na nau degi ta ivivi ta ke hande ikena amo ungo na aeteva aingeko mane,

kaiketo jigama eona avoeto God osa ere ona te <sup>19</sup> na ekalesia embomeni ta degi ke ivivi nei na ke isapamane aisona amo enana na mane ingito kogo aisora te ke heriso avo ke be na pere aisona amo ingari javotoho puvuresuja.

<sup>20</sup> Eto nau namei kamei, ungo meni isasaraho ta hotembari avo avojo te ari javotoho na embo ta ari evujo. Rate meni isasaraho ta ari nei javotoho eora ainge avo umbaeteva amo enana na ari sasapura isapamane kiora. <sup>21</sup> Eto God ta ke matu kajari aita amo einge mitia, “‘Eto na enda nei embomeni ta ke avo ivivi hajire nei na nau enda embomeni emita degi ke hande aisona amo ingito ingarako aisora,’ ke ainge Bada God na eria,” ke ainge kajari mitia. <sup>22</sup> Avoeto ungo kogova amo ivivi hajire ingari nei amo God na God ke be ari embopo avoembo ikae rate God ke be ae embopo avo be kiora ikena te onde katari ke be amo God ke be ari embopo na sovera ari umbara ikena <sup>23</sup> Avoeto ari avo kiae embopo eto God ke be ae embopo amina ungo vahaita torukeova degi ai ta toreto ungo tapa ivivi hajire neite neite na ke ijirovo ingito ungo kava ue ereva ke ainge aisuja <sup>24</sup> Te ungoni ke be na onde katitie mitirovo amo embo amina ungota ke ingihe ari amita amo do aingekore avo eto God ta embomeni ta ke ingito <sup>25</sup> amita hotembari jo ta ondikari avo be ingito me kogue beto gombuto God jakeka ijie God amo ungota degi mitia ke ainge aisuja.

*Ekalesia toruketo simba ari amita ke*

<sup>26</sup> Avoeto nau namei kamei, ungo te tutumota mo do aro? Eto ungo vahaita toruketo amo ke deina embo tapa hondate eto avo ingoro avo ungo ke siriketo nununga evujo eto haveni rete ate poekari ke rete onde katari ke God na ikari umbari rete ivivi nei na ke hande eto ehako jandireketo ari ingari amite avo tapa nununga evujo. <sup>27</sup> Eto embo isapamane na ivivi ta ke amo





12 Eto dagona Keriso avo pehari ta eto eretija amita ke avo hande ere ora te do eto ungo nei uhoho na embo pehari amo mane vasiri te ehako ereora ke ereve? 13 Eto embo pehari vasiri te mane ereora avo ke be kito Keriso te tapa vasiri te mane eraetija 14 Eto Keriso na vasiri te erae toaetija kito ke tapa hande ere ora erevi amo ke be mane eto ari do tumota eora amo tapa be ambu aetija. 15 Eto God na embo pehari mane jigou eraetija amo dagona Keriso vasiri te erari ke hande ue God ta ke avo sokova na aetera. 16 Eto erena emongo kordova amo embo pehari vasiri te erae aetera kito Keriso ta tapa vasiri te mane eraetija. 17 Eto Keriso vasiri te mane eraetija amo ungota tumota tapa eova aita hondate mane umbaeteva eto ainge nombo ungota sasapura ga tapa iraeeteva. 18 Eto ainge dombo embo mamatu Keriso ta javota pepehekea amo pepeheketo pambuo irae ena. 19 Eto ungotenanena Keriso pere tumota ere umakara peheto irae asora kito enda embomeni tapa ta titita ungotena amo mu indoro aemo ta beasuja embomeni ra. 20 Aravorate ke be amo Keriso jigina vasiri te erena amo ungotena vasiri te erasora avo amina kiti ate kitira ena. 21 Eto embo vahai amita degi ta eto amburari avo embo tapa ta degi puvuna eto embo nei amita degi puvuna eto embo nei amita degi ta eto vasiri te erari avo embo tapa ta degi puvuto iriua. 22 Amo Adam avo amburari ta puvuna te Keriso na ena avoembo embomeni vasiri te erasora. 23 Amo iji hekeri ta erasora, kiti amo Keriso na erena amita ambota amo Keriso puvuresuja eto ungotena Keriso ta teka hoka amina iji amikote erasora. 24 Eto amita ambota iji ke katari puvurou Keriso na enda ta titi jigirikari embo pepeni te sovera neite neite tapa avo tau vovurou jeka hoka tapa amita avo umbuto God Mamo ta ingeni ta ikau umbuto amina tapa titi jigjesuja 25 Rate Keriso

amo embo dombo ue amita kitoho tapa tau karaun eto beto amita utu singi ta iresora 26 Eto amita tutumo be ta amo pehari te tapa tau irae aisora. 27 Amita ke kajari amo, "Amina donda tapa amita utu tu ta ikau iriroro titi jigjesuja," ke ainge avo kajari mitia te God vahai avo mane utu tuta iresuja te 28 God na donda tapa umbuto Keriso ta tu ta ikau iriroro Keriso na uje amita na God ta tuta irirou God vahai amina tapa be tapa amita hamota heteto irirou donda tapa amo amita jota iresuja. 29 Eto nei amo eto embomeni matu ambuvujekari na vasiri te mane erasora kito do embo enana na hondate eto enana ta javota bapataito amo eore?

30 Eto dago vasiri te erae asora kito do embo Keriso ambo ambo ue hamo ta memesi kamesi kaiketo kiore? 31 Eto ungo nau ekalesia vahai embomeni na na kiova amo ungotenau Bada Iesu Keriso ta pure eona amo amburari nau amo tombukari be iriua. 32 Eto na embo nei nei ainge da Ephesus eita mitie isoro o ga isoro ere uaetena te na peheto vasiri te erae asona kito amita he ta ari javotoho nei do mane huresuja te na evito peheto vasiri te ehako erae aetena kito eha emongo pondo kando ue indie gagihe ere uma pehaetena. 33 Rate ungo ke aravo be hotembavojo. Eto ungo umoro kamoro sasapura ta aisova kito amina ungo titi teto umbau sasapura ta beasova. 34 Avoeto ungota siro avo embo ta siro ainge jigama ue ari sasapura tovujo. Eto emore ungo me kiova erena ungo nei uhoho amo God be kiae eova.

#### *Ungotenau hamo eha amita ke*

35 Eto embo nei na einge aisora, "Naingeto embo pehari na vasiri te eraro? Eto hamo do ite na egerembeto puvuroro?" 36 Eto ungo kiae kiae ue ke emongo eovete? Eto ve kovaso amo iji vahai amina mane erau kesoa te kiti peheto ambota erasuja. 37 Eto ve koveora vahai avo mane kahumbeora te 'rice' retemo

ve nei amina eketo pajioi kahumbe-ora. <sup>38</sup> Eto ve amita hamo ta hajire do aingere amo God na uje amita na hajire ikeuja eto ve eonga eonga amita hamo eonga eonga ra. <sup>39</sup> Eto o bisi amo hajire eonga eongara embo ta bisi eonga o ta bisi eonga eto di bisi umo o bisi te tapa amo hajire eonga eongara. <sup>40</sup> Eto nei amo ando nei Utu ita mitera eto ando nei enda ta mitera, eto ando Utu ita iriuja amita sago kiari nei, eto enda ta ando amo sago kiari nei ra. <sup>41</sup> Eto iji ta sago kiari nei hariga ta sago kiari nei eto tarama amo nei ra. Eto kuro tarama nei nei amita sago kiari amo eonga eonga ra. <sup>42</sup> Eto ke erena amo ungotena peheto vasiri te erasora amo aingeko nombo aisuja amo ungotenau hamo amo kovaro sari au hamo eha sari ari haite mane amina vasirite erasuja. <sup>43</sup> Eto hamo koveora amo kimu masa aisuja te eha erasuja amo sago kiari donda ra. Eto koveora amo ivo irae rate hamo sovera te amo erasuja. Eto koveora amo enda donda rate vasiri te erasuja amo Utu i ta donda aisuja. <sup>44</sup> Eto enda ta hamo mitia avoeto amita aririvo amo Utu ta hamo amite tapa mitia <sup>45</sup> Eto amita ke amo einge kajari mitia, “Eto embo kiti javo Adam amo vasiri te mitiatija,” ke ainge mitia te Adam nei puvuna amo Keriso ra eto amo Utu ta vasiri eha umbuto puvuto ahihi ta vasiri ikari embora <sup>46</sup> Rate Utu ta irari ahihi amo kiti mane rate enda ta irari amo kiti eto Utu ta irari amo ambotara. <sup>47</sup> Eto embo kiti puvuna amo enda embo rate ambota puvuna amo Utu i ta eto puvuna. <sup>48</sup> Eto enda ta iriora embomeni amo embo kiti Adam ta hajire vahai rate Utu i ta iresora embomeni amo Utu embo Keriso amita kiari hajire vahai aravora. <sup>49</sup> Eto ungote embo enda na ari amita tombu hajire vahai ue mitovora te ungote Utu i ta eto puvuna Embo amita kiari vahai ainge eto iresora.

<sup>50</sup> Eto nau namei kamei, na ke erena amo ungotenau hamo bisi te sasaga te amina God ta titi jigari degi Utu ita torari haite mane ra

amo sari ari donda avoeto daroho irari degi ta mane iresuja. <sup>51</sup> Avoeto na ke vahai oroho te mane ondikari avo ano ingivujo amo ungotena tapa mane pehasora te ungotena tapa saiveto sariketo hamo eha umbasora. <sup>52</sup> Amo iji ke katari puvurou huin savari hukitirou ungotenau sari ari hamo amo sariketo hamo nei daroho irari ta hamo aisuja, eto embomeni peheto mitera tapa amina vasiri te ereto daroho iresora. <sup>53</sup> Eto erena amo ungotenau hamo ta sari ari donda avo hoharo irae au daroho irari donda avo asukasora amo ehako mane pehasuja. <sup>54</sup> Eto ungotenau ambuto sari ari hamo amo irae au daroho irari hamo avo irirou God ta ke einge kajari amita be puvurou kesora amo, “Embo ta pehari amita degi isoro eto nembetei irae etija. <sup>55</sup> Avoeto pehari ta ivo ari amo davore? Amo embo ehako tari inono aera,” ke ainge kajari mitia. <sup>56</sup> Eto ari sasapura amina eoi embomeni ta ahihi ambuora amo God ta ke pepeni Moses ta degi ikena aita ivo ari umbuto embo ta ahihi teoi ambuvujekeora. <sup>57</sup> Eto ungotenau Bada Iesu Keriso ambuto vasiri te eritie amburari ta degi isoro eto nembena avoeto God na Iesu ta ari amina ungotena amburari toto nembari embomeni ere ora avoeto ungote God osa ue jakeka are.

<sup>58</sup> Avoeto nau namei kamei, Bada ta pure erevi mane toasova te tuneketo heteto turieto pure erevi ue irivujo. Eto ungo kogova amo Bada ta pure aisova amo be ambu mane aisuja te ari javotoho ungota degi puvuresuja.

## 16

*Ekalesia ta hande ikasora amita ke*

<sup>1</sup> Eto ungota koro siriketo umbuto God ta embomeni ta degi hande ikasova amita ke aisona. Eto enda Galatia ta ekalesia na do ara ijiena ainge nombo unгона evujo, amo <sup>2</sup> ungo ekalesia vahai vahai na ungo koro doinge hande ikari haite avo giu ari iji hekeri ta kateketo eonga

ikavo irirou na pambuto avo umbasona te iji amikote avo ungonana mane sirikitirovo iresona. <sup>3</sup> Eto na ungota degi pambuto ungota embopo nei uhoho amo ungonana siriketo umbasova amita embo amunure avo ahari ta harikasi kaeto ikitie koro ikano umbuto da Jerusalem ta pambuto ekalesia ai ta mitera amita degi hande ikasora. <sup>4</sup> Eto amo javotoho eto na pambasona kito namoga da Jerusalem ta pambasora.

*Paul na do asi sirikena*

<sup>5</sup> Eto na enda Macedonia ta pure mane aisona te pesina ungota degi pambuto <sup>6</sup> ungota degi iji isapa porere mitie umoro aisora amo aita jajemo iji anote aisona amo na ungototo degi dainge pambasona amo ungonana embere avo pambasi uje ere ona. <sup>7</sup> Eto ungo kogova amo Bada na uje aisuja kito na ungota degi iji tuhaupa mane rate iji isapa porereko mitie umoro aisi uje ere ona, <sup>8</sup> te na da Ephesus ta mitimakara Pentecost iji puvuresuja. <sup>9</sup> Amo God na pe hiriketei ai ta pure aisona te aita amo kitoho embopo isapamane mitera te aravora, sove sove eto pure aisona.

<sup>10</sup> Eto embo Timothy na ungota degi puvurou kito amina mane oju neite neite aisuja avo kito kogo evujo, amina na ere ona ainge dombo Bada ta pure ere ua. <sup>11</sup> Avoeto embomeni na amita degi tini kambari eora simba evujo. Eto amita pure au irae au ikevu tunga javotoho te tapa nau degi ta egerembai. Eto namote namei kamei nei uhoho te tapa na Timothy ei puvuroja simba ue mitera. <sup>12</sup> Eto ungotenau namei Apollos ungota degi namei kamei nei uhoho ga pambaja penunu ijiena te amina eha mane pambasi ke ngahia na ijija te iji nei javotoho puvurou pambasuja.

*Ke tutumo*

<sup>13</sup> Eto ungo God tumota ue ate ivote heteto turieto sinderite irivujo. <sup>14</sup> Eto ari tapa osa ari na evujo.

<sup>15</sup> Eto ungo ari nei ava uje ere ona amo embo Stephanas te amita teka

hoka kivujo, amina enda Achaia aita kiti Iesu ambo ambo ea eto amina God ta embomeni ototohu kaiketo hondate ere ovora <sup>16</sup> Avoeto ungonana enana te embomeni nei aingeko amite avo hondate ava uje ere ona amo enana te enana ta pure hondate ari embomeni te tapa amita ke ambo ambo ava erena. <sup>17</sup> Eto embo Stephanas te Fortunatas te Achaicus na aingeto ei ta puvera avoeto tunga javotoho be ere ona amo ungota hondate amo enana na ereora avoeto tunga javotoho ereona. <sup>18</sup> Eto na osaga kogana te enanana osaga nau etere irae etei osaga ungota te tapa irae etija avoeto embo aingeko amo osa vesa aeteva.

<sup>19</sup> Eto ekalesia tapa enda Asia ta mitera amina ungo ere pekitora, eto embo Aquila te amita ae Prisca te ekalesia amita bande ta torukeora amite tapa na jo tapa na Bada ta javota ungo ere pekitora. <sup>20</sup> Eto namei kamei ei mitera amina ungo ere pekitora. Eto ungo ari otohu na mune tavo mine ara ue pekari mine ara evujo.

<sup>21</sup> Eto na Paul nanena ungo pekitie ingeni nau na javo nau ere kaitena - PAUL. <sup>22</sup> Eto embo vahai na Bada osa ae aisuja kito kurumbevu pe te pambai. MARANATHA Bada puvujo! <sup>23</sup> Eto Bada Iesu Keriso ta hondate ari ungota degi iroi. <sup>24</sup> Eto ungotena Iesu Keriso ta toho avoeto na ungo osa ere ona, Amen.

## 2 CORINTHIANS

### *Paul Na Ahari Erevi Da Corinth Embomeni Ta Degi Kajena*

<sup>1</sup> Na Paul Iesu Keriso ta apostel ana God na siriketo umbuna, amite ungotenau namei Timothy na ungo God ta ekalesia da Corinth embomeni te eto ungo enda Achaia embomeni ototohu tapa amita degi ahari erevi ere kaitera. <sup>2</sup> Eto ungotenau Mama God te eto Bada Iesu Keriso te amita hondate ari te peka te ungota degi iresuja.

### *Paul na God osa ue jakeka ena*

<sup>3</sup> Eto ungotenau jo ari ta Mamo God amita degi ta eto hondate ari tapa puvuja avoeto ungotenau Bada Iesu Keriso ta Mamo God avo osa be ue jakeka erera. <sup>4</sup> Eto amina ungotenau osaga tapa avo kogue hondate uoi mine ungotenane hondate ari God ta degi umbuora avo jigama ue embo nei ta osaga neite neite avo kito hondate eora <sup>5</sup> Eto amita ke be amo Keriso na osaga peni vahai kina ainge nombo ungotenanana koguore Keriso na ungotenau tunga jamo ari mine avo ikeoi umbuora <sup>6</sup> Eto dagona osagate memengate embota ingeni ta kogue mitera amo God na ungota ari sasapura avo oreketo umbuto tunga jamo ari ta ikeuja amita ke ungota degi hande ere ora avoeto kogue mitera. Eto dagona tunga osaga kiari ijite tunga jamo ari ere uhora avo ungonana tunga jamo ari ere uhova avoeto ungotena tapa na tunga osaga umbari haite aisora. <sup>7</sup> Eto ungonana osaga te memenga te kogue miteva avoeto nangote tapa God ta degi kekota ari ere uhova avo nango na ere kogora avoeto ungotena tapa do tumota ue mitera avo umbasora. <sup>8</sup> Eto nangota namei kamei, ungo be kiova uje ere ora amo eto dago enda Asia ta mitie bouka peni vahai umbua amo nango eonga umbari haite mane rate embo na tea amo amburari ahumpa ea

<sup>9</sup> amo dagota sari ari ta duru avo umbuto arako ere ua etera avoeto aita kera amo sovera nangota avo tumota mane aisora te God ambure embo jigeoi vasiri te ereuja embo vahai avo tumota ere uaetera. <sup>10</sup> Eto ari sapura be avo kia te God na ari avo kito dago oreketo umbuna avoeto nango ke be erera amo amina matuainge orekasuja <sup>11</sup> ari ainge avoembo jo vahai eto nango embo pari evujo. Eto ungonana pari ijirovo God na nango orekitirou ungo embo isapamane na dago kito osa aisova.

### *Ke be ari ta ke.*

<sup>12</sup> Eto ke erevi ke be pere avoeto tunga javotoho ue ungota degi erera amo enda embo tapa ta degi ari tapa do eora amo ke sokova na ae rate ke be ari te ke otohuru ari te God ta degi puvuja amina eora, amo enda embo ta kiari sokova na ae rate God na hondate uoi eora. <sup>13</sup> Eto dagota ahari kajari aita amo ke ondikari irae rate ke araha ta pere ungonana eteketo kiari haite avo pere kajeora. Avoeto na uje ere ona amo <sup>14</sup> ungonana nango be kogue hamo ere uma Iesu ta puvurari iji puvurou ungotenane javo mine kata ue amita titi ta hetasora. <sup>15</sup> Eto ungonana nango hamo ueva avo ke be hotembitie hae heriso ungota degi pambasi uje uena amo <sup>16</sup> enda Macedonia ta pambasi pambuto ungota da aita heteto umoro eto pambuto egerembeto Judea ta pambasi ue ungota umoro ehako asi aita hetasi uje uena. <sup>17</sup> Eto na ainge aisi hotembitana te totona avo ungonana na jo heriso ue ari ke eovete? Eto enda embona aisona ke aisuja te ambota amo mane aisuja ke ainge avo nango na ari ke erevete? <sup>18</sup> Eto nango God ta ke be na ungota degi erera amo nangona hotembari heriso, jo heriso na ungota degi ke ae rate <sup>19</sup> God ta Meni Iesu Keriso amita ke avo namote Silas te Timothy te na ungota degi hande uera aita ke nei mane tambasova te ke vahai amina heteto matuainge iresuja. <sup>20</sup> Eto God na ke isapamane embo ta degi onde ereua amita ke be tapa amo Iesu ta degi



tambasora avoeto amita ke avo ke be ijie embota degi hande uore jakeka ari te pekari te God ta degi puvuja. <sup>21</sup> Eto eha emo God na oi ungotena tapa Iesu Keriso ta jo ta heteto mitera. Eto amina amita Ahihi Otohu ungotenau jo ta overekena <sup>22</sup> amo ungotena Iesu Keriso ta toho amita hajire embo na kiora overekena avo ungotena kogue ambota do puvurou kesora avo ke be erera.

<sup>23</sup> Eto na ungota da Corinth ta pambae totona amita be avo ano ingivujo, amo ungonu nau ke ngahia avo eone ingito ungonu osaga kiova avo hotembeto pambae totona avo God ta titi ta erena. <sup>24</sup> Eto ungota God tumota ari avo nangona titi jigesi ae rate ungo God tumota ue heteto miteva avoeto ungo naingeto tunga javotoho ue iresova avo ungotote namote tapa na jombure ereora.

## 2

<sup>1</sup> Avoeto ke erena amo ungo osaga kiora na ungota degi pambae <sup>2</sup> amita be amo nanena ano ungo osaga kogurovo amo embo nei amuna au na tunga javotoho ano? Na tunga javotoho ari embo nei irae. <sup>3</sup> Eto na ungota degi ke ngahia na kaitana amita be amo na ungota degi pambae kiti ta ungonu ke avo tambu au teho mitirovo pambuto ungota tunga javotoho ari avo kiaetena. Eto na kogona amo na tunga javotoho ururono ungotote tapa tunga javotoho aisova. <sup>4</sup> Eto na ungota degi ke ngahia kaitana amo tunga osaga te titi sisivu te tapa kaitana te amo ungo osaga kiova na kajae rate ungo osa peni vahai eona avo ungonu be kiova kaitana.

*Embo na enu osaga kia avo hotembeto toari ta ke*

<sup>5</sup> Eto embo vahai na enu osaga kogava amo nau degi ta ae kiae rate amita ke na enu ungo osaga isapa kogue mitovova. <sup>6</sup> Eto amita ari sapura ta hajire amo ungo embomeni isapamane na eteve ere kogua amo inonora <sup>7-8</sup> avoeto amita ari avo

hotembeto toto embo ehako umbuto osa ururoro amo osaga isapamane kogue mane beto pambasuja. <sup>9</sup> Eto na ungota degi ke kaitana amo ungonu na ke tapa inono ta agi avote avo be kesi kaitana. <sup>10</sup> Eto ungonu embo ta ari sapura hotembeto toasova amo namote tapa hotembeto toasona. Eto ari sapura mitirou hotembeto toasona amo ungo avoembo Keriso ta titi ta hotembeto toasona. <sup>11</sup> Amo Satan ta sovera na mane nembasuja avoeto eona, eto amita uje deire amo ungotena tapa kiarira.

*Paul na da Troas ta mitie osaga kina.*

<sup>12</sup> Eto na da Troas ta pambuto mitio Bada na degi enu kito Keriso ta duru javotoho avo embomeni ta degi hande ue <sup>13</sup> nau namei Titus da aita tambae ue nau jota osa ari puvurae enu embomeni peketo toto Macedonia ta pahana.

*Ungotena Keriso avoembo ari sasapura nembari embopora*

<sup>14</sup> Rate degi nainge nainge pambasora amo God na eoi Keriso ta ari sasapura nembari embopo ue amiga kajuetu pahue amita ke javotoho embo tapa ta hande eora, amo i buji javotoho na mune javotoho hande euja aingeko eora. <sup>15</sup> Eto ungotena Keriso ta embomeni amo God ta degi jeune mune te aingeko eto God na oreketo umbasuja eto oreketo umbae toasuja embomeni enana amo matu munehembeora. <sup>16</sup> Eto Keriso ta ke oreketo umbae embomeni ta degi amo bisi sari kimu masa te aingekora te oreketo umbasuja embomeni ta degi amo jeune mune te aingeko aita amo vasiri be tambuto iresora. Eto Keriso ta pure nombo be emo embo amuna ari haitere? <sup>17</sup> Eto ke be amo embo nei nei na God ta ke embota degi koro na ombuto umbuora te nangona amo ainge aera te nangona Keriso ta ke hande ue God ta ke hande ari embopo ke ijie God ta titi ta ke be na pere erera.

### 3

#### *God ta ke eha ta agi ari embopora*

<sup>1</sup> Eto ke ere kaetera emo unгона dago ke be ava kajari ke ijie ere hotembitevete? Eto enana ke sokova ijie ate poekari embomeni na eora ainge nangona popoja na kajeora ainge mane kajasora <sup>2</sup> amita be amo embomeni na ahari mane etekasora te ungota vasiri kogue dago Keriso ta pure ari embo be avo ke be aisora. <sup>3</sup> Eto ahari be amo Keriso na ungota hotembari jo ta kajena amo unгона dagota ke avo be ijie uhava te ke amo ongo na kajae rate God ta Ahihi vasiri te na kajarira. Eto ke amo God ta ke 10 atara hamota kajena aingeko mane rate ungota hotembari jo vasiri te aita kajarira.

<sup>4</sup> Eto dago ke erevi erera amo jo ta segigi ae rate Keriso avoembo God ta titi ta ke be na erera <sup>5</sup> eto pure emo nango eonga ari ke mane eora te God ta degi ke te pure ta sovera ari te puvuja <sup>6</sup> avoeto God na enu nango God ta noma eha ta kajari amita ke hande ari embopo ereora eto God ta noma eha kajari amo ingeni na ahari ae rate Ahihi Otohu na ke ikarira. Eto ke matu kajena aita amo embota Ahihi amburari puvuna te ke eha ikari ai ta amo Ahihi Otohu na ahihi ta vasiri ikeuja.

<sup>7</sup> Eto ungo be hotembevujo. God ta ke pepeni atara hamota kaeto ikitinu Moses ta tombu usasa pajire be unu Israel embomeni na avo kiari inono ae ea te ke ikari aita embomeni na ke avo hatikea avoeto ahihi amburari tambua avoeto ke amita usasa irae ena. <sup>8</sup> Rate Ahihi Otohu ta ke eha ikari aita usasa pajire be kogora amo ke kiti ikari ainge manera. <sup>9</sup> Eto ke erena amo ahihi tari amburari amita ke ikari aita amo usasa isapa kogora te ahihi ta degi vasiri eha ikari amita ke eha puvija aita amo usasa pajire be ere kogora. <sup>10</sup> Eto usasa eha puvija amo pajire be pajire amina ke matu Moses ta degi ikari amita usasa amo matu peiketei irae etija. <sup>11</sup> Eto ke kiti puvuna amo usasa ga tapa puvuna te amita usasa irae ere

ua te usasa eha puvija amo daroho iresuja.

<sup>12</sup> Avoeto ungotena vasiri te daroho irari embomeni na nei do joru mane aisora <sup>13</sup> te Moses tiri i ta eto vovue amo Israel embomeni na amita tombu ta usasa irae ere ua avo kiora uje ae ue tombu ahurekena. <sup>14-15</sup> Eto nei amo enana ta siro ngahia unu ke etekenu ingito ingae sira ere uaetera avo embo eha oroho amo enana God ta ke Moses ta degi matu ikari avo etekitiore ingae ere ovora te Keriso na enana ta siro hirikari inonora <sup>16</sup> amita be amo enana ta siro ngahia mane irae aisuja te jo ahereketo Bada ke be aisora iji amite amo siro ngahia ari amo irae aisuja. <sup>17</sup> Eto Bada amo Ahihi avo eto Bada ta Ahihi iresuja degi ai ta amo embo ta Ahihi ari sapura na andirari avo iraera. <sup>18</sup> Eto ungotenau tombu amo nei deina togae eto andirae avoeto siro ngahia ungotenau degi ta irae rate ungotenau tombu ta amo Bada ta usasa mitia, avoeto Bada ta Ahihi ungotenau jo ta mitie pure ururou ungotenau degi ta usasa papajitirou Bada ta tombu vahai aisora.

### 4

#### *God ta usasa amo ungotenau sari ari hamo ta mitia*

<sup>1</sup> Eto God na amita jo ari na Keriso ta ke hande ara pure ikena avoeto jo segigi ae pure sovera eto eora. <sup>2</sup> Eto enana ke sokova ate poekari embomeni ainge mane nango God ta ke ondikari na hande mane eora te God ta ke popoja na ae rate araha ta God ta titi ta hande uore hotembari embopo na ingito ke be eora. <sup>3</sup> Eto God ta ke amo embo tapa ta degi ondikae rate enana Ahihi amburari degi ta ere pahora amita degi amo ondikarira <sup>4</sup> amita be amo God ke be ae embomeni na Keriso amo God ta ari eto hajire vahai amita ke javotoho usasa te avo mane kiora enda emita titi jigari embo sapura na enana ta titi ta kaetei kuru etija. <sup>5</sup> Eto ke hande ere ora amo ke nangota mane rate Iesu Keriso amo ungotenau Bada eto titi jigari embo

eto nango amo Iesu avoembo ungota undurari embopo ra amita ke avo hande ere ora. <sup>6</sup> Eto iji itikarita God na mume ta degi “Usasa e” ijinu usasa ena eto God na vahai nangota uta avo usasa amita na hirikenu kia amo God ta usasa Keriso ta tombu ta gain ena avo kia.

<sup>7</sup> Eto ari javotoho be usasa te God na ikena amo ungotenau sari ari hamo ta mitia avoeto ungotena ere kogora amo usasa javotoho emo nango na ae puvurae rate God na hande iketija. <sup>8</sup> Eto degi tapa ta kitoho mitia amina nango nembari inono ae eto osaga isapamane ere kogora te toae. <sup>9</sup> Eto embomeni na teore memenga kiora te God na nango toto pambae eto teore enda ta beora te nango amburae. <sup>10</sup> Eto degi nainge pambuora amo nango ta sari ari hamo na Iesu ta osaga te memenga te amina ate kitira ere ora, amo nangota hamo avo embomeni na kogue Iesu ta vasiri avo hotembeora. <sup>11</sup> Eto ke be amo nango amburae mitie Iesu ta pure ere ora avoeto nangota amburari amo iji matuainge puvutuhoi hotembeora, eto nangota vasiri aita amo embomeni na Iesu ta vasiri kiora. <sup>12</sup> Eto ke erena amo nango amburesi era pahora te ungonaga dagota pure avoembo vasiri te daroho iresova.

<sup>13</sup> Eto God ta ke ta amo ke einge kajari mitia “Na ke be erena avoeto ke hande ere ona” ke ainge mitia avoeto amita ari vahai amo nango na eora avoeto ke be ijie God ta ke amo embo ta degi hande ere ora. <sup>14</sup> Eto nango kogora amo Iesu jiginu vasiri te erena embo God na iji inono ta nango Iesu ga tapa jigou vasiri te eritiroro ungoteta tapa umbuto Iesu ta engitita ikau hetasora. <sup>15</sup> Eto ungo kogova amo osaga memenga ere kogora amo ungo avoembo ere kogora amo aita God ta hondate ari isapamane na embo ta degi pahourou embo isapamane na God osa ue jakeka ijiiroro usasa God ta degi pambasuja.

*Enda ta Utu ta irari amita ke*

<sup>16</sup> Eto ari ainge avo nango joru ue pure mane toasora. Eto dagota hamo amo sari asi ere pahua te jo ta amo iji vahai vahai ainge God ta degi sovera mine ere uhora. <sup>17</sup> Eto dago enda eita mitie osaga isapa ere kogora amo usasa pajire be daroho ta kesora ainge mane isapa be ra <sup>18</sup> avoeto dago na enda ta sari ari donda titi na kiari haite amo kon eto kiae rate titi na kiae donda daroho iriujua avo kon eto kogue eteteto ere pahora.

## 5

<sup>1</sup> Eto ungotena ere kogora amo ungotenau hamo te bisi te amo iji tuho irari donda pure horoma aingeko avo irae au God na ungotenau irari bande nei embo ta ingeni na ae teho irerembari Utu i ta iriujua avo ikau umbuto daroho iresora. <sup>2</sup> Eto ungotena enda ei ta mitie amo Utu ta irari donda avo umbuto asukasi uje ue bija puri ue simba ue mitera. <sup>3</sup> Eto ungotenau hamo te bisi te irae ahihi pere na mitiroro amo Keriso na tambaute avo ungotena joru ere ora <sup>4</sup> avoeto ungotena enda ta iji tuho irari hamo ga mitie avo houkari uje ae ue bija puri eora te naingeto daroho irari donda umbuto hamo ta asukaetera avo hotembeora, amo hamo bisi te amiga tapa Utu ta pambuto iresi uje ere ora. <sup>5</sup> Rate ari ainge ara God na ungotena ove ena amo daroho irari hamo ikau umbasi simba ue mitera amo God na ikasi onde ena amita hajire amo ungotenau jo ta Ahihi Otohu ikena iriujua. <sup>6</sup> Avoeto ungotena Bada ta irari degi ta irae enda ta hamo te bisi te ga irari iji te Ahihi Otohu avoembo sovera ari umbuto mitie <sup>7</sup> teho titi na kiari avo ae rate God tumota ari na iriora. <sup>8</sup> Eto enda eita mitie ungotenau ando te bisi te avo toto pambuto ungotenau da be Bada ta degi pambuto iresi uje eora te ando ta sovera ari umbuto mitera <sup>9-10</sup> Eto ungotena tapa na iji tutumota pambuto Bada ta titi ta heteto mitiroro amina ungotenau ari tapa penite isapate enda ta mitie ere

uaetera avo siriketo hajire javotoho te sapura te ikau kesora avo eto ari avo hotembitie, ungotenau ando iroutemo irae au amo ke peni be mane rate nombo be amo ari deina ururoro Bada na kito osa aisuja ari avo perekari eora.

*God ga peka umbuora amita ke.*

<sup>11</sup> Eto Bada joru eora avoeto embomeni na ke ingito jo haperekarote avoeto enana ta degi Keriso ta ke hande eora. Eto dagota jo amo God na ere kogua te ungote tapa nangota jo kiova uje ereona. <sup>12</sup> Eto ke erevi erera amo unгона nango ke be ava ke ae rate enana ungo eonga embo peni ke ijie embota jo avo hotembae ue ate poekari sokova embomeni amita degi ke mine ava erera, amo nangota ari be avo unгона kito tunga javotoho ue ke mine enana ta degi aisova. <sup>13</sup> Eto nangota ke erevi eteketo kogue dago uta sapura ari ke ijie ere hotembiteva te God avoembo ere ora te nangota ke amo ke be ere hotembiteva amo ungoembo ere ora. <sup>14</sup> Eto Keriso ta osa ari peni vahai avo hotembitie haha puha eora. Eto osa ari aita ere kogora amo embo vahai na embo tapa avoembo ambuna te amburae toaetija amo embo tapa na ambuvu-jekaetera. <sup>15</sup> Eto amina embo tapa avoembo ambuna avoeto embo na enda ta vasiri te irari iji te enana ta hamo ta ujeje neite neite avoembo mane iresora te embo enana embo ambuto vasiri te erena amita uje avo asi iresora.

<sup>16</sup> Avoeto iji eha eto ambota amo nango na enda ta hotembari na embo ari javotoho te sapura te avo mane sirikasora. Eto dagona Keriso enda ta mitinu amiga isa ue enda ta hotembari avo ere uaetera te eha emikote ari ainge avo iraera <sup>17</sup> te embo amuna Keriso ta jo ta mitia amo ove eha ari ra te embo kiti enda ta vasiri na ari amo irae etei ove eha ari avo pere mitia. <sup>18</sup> Eto ari amo God na euja amo matu kitita ungotena amita kitoho rate Iesu Keriso ta amburari na peka umbuto peka umbari

ta ke amo nangona hande ara ikena. <sup>19</sup> Eto ke erena amita be amo God na Iesu Keriso ta pure amina enda embomeni tapa ta degi peka umbuto enana ta ari sasapura avoeto kitoho ari ehako mane hotembasuja, eto duru javotoho erevi nangona hande ara ikena. <sup>20</sup> Avoeto nango Keriso ta ke hande ari embopora, amo God na pe nangota na embomeni ta degi ke eria avoeto Keriso ta javota erera amo ungo God ga peka umbuvujo. <sup>21</sup> Eto God na ari sapura irae embo Keriso ta degi embomeni ta ari sasapura tapa overekena avoeto ungotena amita jo ta mitera avoeto God na Keriso ta ari jajavotoho perekari avo ere kogua.

## 6

<sup>1</sup> Eto dago God ta pure vahai embopo na ungo ari erevi ava erera amo ungo God ta hondate ari uhava avo be ambu ainge aja avojo <sup>2</sup> amo God na amita ke einge enu kajena “Eto na ungo kene jo etija iji te amo na ungota pari ingena eto ungo oreketena ijite amo na ungo hondate etena”, ke ainge kajari mitia avoeto erena amo God na ungo jo ururou oreketo umbasuja iji amo eha oroho erevira.

<sup>3</sup> Eto embo na dagota pure kito eoi sapura euja avo hotembitie dagota ari nei eore embo tini kambari eora ari avo mane eora, <sup>4</sup> te ari tapa avo nango God ta ke agi ari embopo na ari avo embo na kiora eora avoeto osaga kiari iji te amo ando ta sovera ari umbuto ngahia eto bouka umbari te, <sup>5</sup> ando ta tari te, tipura ta gosukari te, embomeni na ereto ejembeto tari te, pure ngahia ari te, evo ae ari te, beuje te tapa amo sovera ue kiora. <sup>6</sup> Eto embomeni na nango God ta pure ari embopo be kiora nangota ari amo tongopa irae, hotembari javotoho ue, sausau ereto mane tumo eora te embomeni tunga humbuto Ahihi Otohu ta ke be ari na embomeni osa eora. <sup>7</sup> Eto God ta sovera umbuto amita ke be na ijie God ta isoro ari donda ingeni



be ta eto anga ta jigito nununga ue mitera amo javotoho ari avo jigito mitera. <sup>8</sup> Eto dago nununga ue embona dagota javo otohu arote sapura aro, jakeka arote pehumba aro, nango ke be arote ke sokova aro avo tapa kesi nununga ue mitera. <sup>9</sup> Eto embomeni na nango kiari rate kiae ke ko eora. Eto nangota hamo matu amburari rate vasiri te mitera, eto embo na matu tari amburari ke eora te vasiri te mitera. <sup>10</sup> Eto dago tunga osaga ere kogorate tunga osa osa ue mitera eto dago ta degi donda irae rate embomeni isapamane na dagota degi ta donda ere uhora eto dagota hajae bajae irae rate dagota degi hajae bajae isapamane be mitia. <sup>11</sup> Eto da Corinth embomeni ungo ke erevi be ingova hariketo ke araha ta erera. <sup>12</sup> Eto dagona ungo jo tapa na osa ere ora te unгона jo tapa na dago osa mine ae <sup>13</sup> avoeto nau meniundi ungota hande mine inono ta ue jo tapa na osa evujo.

*God kiae embomeni ta ari avo toara Paul na ena.*

<sup>14</sup> Eto ari jajavotoho te ari sasapura te vahaita iresuja amo sapura, eto ainge nombo usasa te mume te na vahai ta mane iresora avoeto God kiae embomeni ga kaju avojo. <sup>15</sup> Eto ungo kivujo Keriso te Satan te na tunga vahai ari inono rete? Ainge mane avoeto God ke be ari embo te God ke be ae embo te na tunga vahai ari inono aera. <sup>16</sup> Eto God ta bande Otohu aita amo God sokova ingeni na ari mane tambasora eto ungotena amo God ta bande otohura. Amita ke amo God na einge kajena “Eto embomeni nau amina nau irari bande ururoro na aita iresona, eto na enana ta God ururono enana embomeni nau aisora”. <sup>17</sup> Ke ainge ena eto Bada na ke nei einge ena “Ungo eonga iresi ue sasapura embomeni toto pambuvujo. Eto donda tapa tongopa te avo toto teho irirovo na ungo umbuto <sup>18</sup> ungota Mama ano ungo nau meniundi aisova, ke amo na Bada sovera isapamane te nanena erena”.

## 7

<sup>1</sup> Avoeto nau namei kamei, God na ari erevi ungotenau degi ta asi onde ena avoeto ari tapa deina ungotenau hamo te ahihi te tongopa euja avo toto God Otohu ke ijie joru ue embomeni jajavotoho jo tapa na asi tunga iketo pure aisora.

*Paul na osa ari ta ke ena.*

<sup>2</sup> Eto dago tunga hmbuvujo. Dagona ungota embo vahai amita degi ari sapura ae, embo ta javo sapura ae, ke gamo na poeketo nei do umbae eto sapura ta kiti umbae. <sup>3</sup> Eto ke erena amo ujekari ungota avo ke ae rate ke matu ijiena amo eto nango amburorote teho iroro avoeto ungo osa matuainge aisora. <sup>4</sup> Eto na ungo tumota ue javo ungota avo jakeka ijie ere ovona. Eto dago memenga kogue mitera te na ungo hotembitie sovera ari umbuto tunga javotoho ereona.

<sup>5</sup> Eto dago enda Macedonia ta pambuto aita jangu indari avo tambae be rate hamota memenga te tini kambari te joru te tapa avo kogara. <sup>6</sup> Rate God amo ungotenau tunga javotoho ikari embo amina Titus ikenu puvunu kito osa ue tunga javotoho uera. <sup>7</sup> Eto tunga javotoho uera amo Titus puvei kera avo pere mane rate ungota pekari te undurarite avo puvuto etei ingito osa uera. Eto ungona tunga osaga te si te tapa ijie na hotembeto ehako kesi uje ere ova avo etei ingito tunga javotoho be uena.

<sup>8</sup> Eto ke erena amo na ahari matu kiti ungota degi kaeto ikitane uhava avo umbuto eteketo osaga kogava avoeto namote tapa osaga koguenta te oroho amo osaga mane kesona te tunga javotoho ereona, <sup>9</sup> amita be amo nane one osaga kogava avoembo tunga javotoho ae rate ungo osaga kito jo hapereketei ajato ijieva avoembo tunga javotoho ereona, Eto amo God ta uje avoeto osaga kogava, avoeto nangota degi sapura nei do tambae ueva. <sup>10</sup> Eto erena amo God na au embona osaga kito jo haperekau oreketo umbasuja te

enda ta ari sapura na au osaga kogue ere uma amita ahihi amo amburesuja. <sup>11</sup> Eto unгона osaga keva amo God na ikena avoeto keva te ungo be kivujo, amita tutumota amo unгона jo tapa na embo jajavotoho asi ue ungota ari avoembo ajato eto namote namei eto ehako osa ue ke avo tambu aja uje isapamane ereova avo kogue ungo pehumba ari haite ae kogona. <sup>12</sup> Avoeto ungo na ingova uje ereona amo ahari kaitana, amo ari sapura embo avoembo kajae, eto ungota degi ari sapura uija avoembo kajae rate unгона nango osa eova avo do aingere avo unгона God ta titi ta be kiova kaitara. <sup>13</sup> Eto unгона nango tumota ue osa isapamane ereovova avo nangona kito sovera ari umbera, amite eto ungo na ove Titus na kito tunga javotoho be eto puvuto etei ingito nangote tapa tunga javotoho be etera. <sup>14</sup> Eto na ungo osa kageni ue Titus ta degi ke ijiena avoeto amina ungota degi pambuto nangota ke ungo avoembo ijiera amo ke be pere avo koguija eto ainge dombo dago ke do ungota degi ta eora amo ke be pere eora. <sup>15</sup> Eto Titus na ungota degi pambuto ke ijinu ingito joru te tapa agi asi ueva avo koguija, avo eto amita osa ari ungota degi avo pajito peni vahai be ere ua. <sup>16</sup> Avoeto na kogona amo ungo iji tapa amo ungota hamota ra avo eto osa pajire be ere ona.

## 8

### *Hande ikari ta ke*

<sup>1</sup> Eto nau namei kamei, God na enda Macedonia ta ekalesia ta hondate ari isapamane iketija avo ungo ano ingova uje ereona. <sup>2</sup> Amo enana ta degi memesi peni vahai be puvuna amita mine amo osa ari peni vahai be pajina avoeto enana amo haja baja embo mane rate hande embopo ere ora. <sup>3</sup> Avoeto God ta titi ta erena amo enana hande ikari haite donda avo pere ikae rate nei amita hamota avo jo tapa na hande ikitara <sup>4</sup> Amo enana ta uje na God ta

embomeni hondate aisi nangota degi penunu kaiketo ijiera <sup>5</sup> Eto amita tutumota amo enana ta ando te tapa God ta degi ikitie amita pure asi nangota degi ikitara avo nango kito kore uera.

<sup>6</sup> Eto enana ta ari avo kito ungotetapa na hondate ari ikavote avo kesi Titus ikaro pambuto ungota degi pure jua matu itikitaja avo au irae aisuja. <sup>7</sup> Eto na kogona amo ungota degi ari tapa inono mitia, amo God tumota ari, ke hande ari, ke kiari, jo tapa na hondate ari, dagota degi osa ari te tapa amo ungota degi inono bera avoeto unгона hande erevi jo te tapa na ikava uje ere ora. <sup>8</sup> Eto ari erevi unгона ava ke ngahia na ae rate enana enda Macedonia ta hande embomeni ta ari vahai aingeko amo unгона osa arina avote avo be kesi uje ere ona. <sup>9</sup> Eto Bada Iesu ta ari avo be hotembevujo, amina Utu i ta mitie hajae bajae embo be ena te ari avo toto enda ta beto ungoembo hoivo ena, amo unгона aita donda embo ava ena. <sup>10</sup> Eto ari ainge avo unгона ava onde katitie erena eto jua matu ta unгона kiti hande ikasi ijieva avo ikitava <sup>11</sup> Avoeto ari avo evujo inono ai, eto ungota jota teka eto hande inono ta evujo irae ai.

<sup>12</sup> Eto ungota uje doinge ikasi hotembiteva amo aravorate ungota degi doinge mitirou kito avo kateketo hande ikitirovo God na kito aravora aisuja. <sup>13</sup> Eto unгона donda ambu embopo ta degi hande pete iketo ungo be ambu ava ke ae rate ungo mine omba eto inono inono eto irova erena. <sup>14</sup> Amita be amo erevira, eha oroho emo ungota degi donda mitia eto enana ta degi amo donda irae avoeto osaga erekogora te ambota amo unгона osaga kogurovo enanana ungo hondate aisora, eto ari ainge aisora amina ungota irari inono inono aisuja. <sup>15</sup> Ke ainge amo God ta ke ta einge kajari mitia, “Eto donda be peni vahai kahumbeto umbuna embo amina donda mamu ururae eto donda be isapa kahumbena

embo amina donda ambu embo ae rate inonota donda embopo ea.”

### *Titus da Corinth ta ikeo pambuna*

<sup>16</sup> Eto nau hotembari peni vahai amo ungota degita mitia ainge dombo Titus ta hotembari amo ungota degi ta avo kogue God ta degi osa be ere ona. <sup>17</sup> Eto dagona Titus na da Corinth ta pambaja ke ijiera te amita jo tapa avo degi ungota ta avoeto jo tapa na pambasi uje ere ua. <sup>18</sup> Eto ungota namei vahai ikaro Titus ga pambaja iketera amo Keriso ta duru javotoho hande ari embo avoeto ekalesia tapa na kogue jakeka eora. <sup>19</sup> Eto God ta degi usasa te jakeka te pambaja donda ambu embomeni avo jo oi koro na hondate asi uje isapamane ereora, pure avo hondate ue nangoga vahaita aja ekalesia embomeni na siriketo ikea amo embo nei mane rate namei ke etera vahai avora. <sup>20</sup> Eto koro peni vahai be hande ere ovora avo umbuto pambuto embota hande ikasora avo embo na simba ari sapura ke eora. <sup>21</sup> Avoeto dago naingeto Bada ta titi ta eto embota titita ari javotoho pere aisora avoeto ke ijie nununga ere ora.

<sup>22</sup> Eto ungo tumota euja ungotenau namei nei amita pure amo jo tapa na tunga iketo pure uoi dago ere kogovora amite tapa ikaro pambasuja. <sup>23</sup> Eto ungo kogova amo Titus amo nau pure vahai embo amina ungo avoembo ungota degi pure ere ua eto ungota namei heriso ekalesia ta javo ta pure javotoho eora amina Keriso otohu eora. <sup>24</sup> Avoeto dagota tumota ari te ke be ari te amo ungota degi ta avo ekalesia tapa na kito ungo ke be ara embo einge erevi ungoni kito osa ue pekitie umbuvujo.

## 9

### *Namei kamei hondate ari ta ke*

<sup>1-2</sup> Eto ungo God ta embomeni hondate asi tunga ikitie miteva amo na matu kogona te teho ere kaitena. Eto ungota hande asi tunga ikava amita ke amo da Achaia embomeni

ta degi nanena ke einge eo ingia, “Da Corinth ekalesia na jua matu amina donda ambu embopo ta hande ikasi sirikea,” ke ainge amo nanena ungo jakeka ue ijio da Achaia embomeni na ingito hondate asi uje ea. <sup>3</sup> Avoeto ungota namei kamei ikaro ungota degi pambasora amo dagona ungota ari avo jakeka eora avo dagota ke avo huti mane aisuja avoeto ikaro pambasora be ikevujo kiore. <sup>4</sup> Avoeto nanena ungo tumota ue ke eona avo enda Macedonia embomeni na namote pambuto ungoni hande ikasova avo nununga ae amo koguroro ungote namote tapa me kesora. <sup>5</sup> Avoeto ungoni hande ikasi onde ueva avo dago pambae mitiroro ungota namei kamei na pambuto ungo hondate ururoro nununga avote avo hotembitie erena. Eto hande javotoho aisova amo engekari ta hande mane rate ungota ujeta hande avoeto nununga aisova.

<sup>6</sup> Eto ke erevi ungo jeneambu avojo, eto embona ve heriso urasuja amo be isapa umbasuja eto embona ve isapamane urasuja amo be isapamane umbasuja. <sup>7</sup> Eto embo vahai vahai amita jota ngahia mitirou penunu au jo te tapa ikae aisuja amo sapura ra te embota jo ta doinge ikasuja avo siriketo osa osa te tapa ikasuja amo God na kito osa aisuja. <sup>8</sup> Eto God na ungota degi javotoho ari iketo kakane ari avo iraera te God na ungota degi donda rete ari tapa deire avo inono iroja simba ururou ungoni pure jajavotoho nei do aisi uje aisova amo God na umbuto nei amita hamota ikasuja. <sup>9</sup> Eto God ta ke ta amo einge kajari mitia, “Eto donda ambu embopo ta degi hande embo ena avoeto amita ari javotoho avo daroho iresuja,” eto ke ainge mitia.

<sup>10</sup> Eto God na ve urari embo ta degi ve ikeoi umbuto ve ureuja eto pure ta be amite tapa ikeoi umbuto indiora avoeto ungoni ari jajavotoho tapa do do aisi uje aisova amo God na hondate ari ikau umbuto ururovo peni be aisuja. <sup>11</sup> Avoeto ari javotoho

do kito asi uje aisova amo God na ikau umbuto hande embomeni be ari haite aisova, amo unгона hande ikavo nangona umbuto embo nei ta ikitiroro embo isapamane na God osa ue jakeka aisora. <sup>12</sup> Eto ungotaha hande ikasova amo God ta embomeni ta ujeje avo pere mane rate God ta degi osa kageni ari pambuja avoeto ikasova. <sup>13</sup> Eto ungotaha hande ikasova aita amo ungotaha hande ta tunga enana ta degi eto embo tapa ta degi ere ikitova amite eto ungo Keriso ta duru javotoho avo hamo na pere mane rate jo te tapa ambo ambo ereova amite tapa avo embona kito God jakeka aisora <sup>14</sup> Eto God ta hondate ari isapamane ungotaha degi iketei umbeva avo God ta embomeni na kito ungo jo tapana osa ue ungoembo pari aisora. <sup>15</sup> Eto God ta hande pajire be avo kogue kore ue God osa ere ora.

## 10

### *Paul ta osaga*

<sup>1</sup> Eto na Paul ke nau avo ungotaha degita ere kaitona kivujo. Eto embo na ke eora amo na ungotaha mitie na ke embo mane rate na ungotaha irae amo ke ngahia na eto ke peni be eona ke ainge eora te na Keriso ta jo ari eto tunga humbari na ungotaha degi penunu erena amo erevira. <sup>2</sup> Eto ungotaha embo nei uhoho amina ari nau eto ke nau amo teho enda embota ari te ke te ra ke ainge eora avoeto na ungotaha degi pambuto ke ngahia be amina ke sapura avo taekasona avoeto ungo simba evujo <sup>3</sup> Eto ke be amo ungotaha enda ta mitie ari sasapura ta degi isoro ere orate amo enda ta isoro mane. <sup>4</sup> Eto enda ta ki emi amina isoro ae rate Utu ta ki emi sovera te amina Satan ta titi jigari ta degi isoro ereora amo erevira <sup>5</sup> Eto ke, eto ari deina au God ta kiari au sapura aisuja amita degi isoro eto embo ta hotembari tapa togeto umbuto eore Keriso ta ke agi eora <sup>6</sup> Eto ungo jo hapereketo nangota ke agi aisova kito ungotaha peive ari do mitia

avo kito hana kiari ikaro kogurovo irae aisuja.

<sup>7</sup> Eto ke erena emo asavi avo mane ingesova te ke ta susu be avo ingihe be kivujo. Eto embo amuna dago Keriso ta tohora ke ainge aisora embo amina dagote tapa ainge nombo Keriso ta toho ke ara erena. <sup>8</sup> Eto dagona ungo taro beava Bada na ikae rate ungo jigoro ereva Bada na ikena eto na pure avo ana Bada na ikena avoeto na ke ijie me mane kesona te pure avo aisona <sup>9</sup> Eto na ahari ta ke ngahia be na ere kaitena amo ungonaha kito joru ava kajae rate <sup>10</sup> embo nei nei na ke einge erera, “Paul na ahari ta ke ngahia na eriate ei ta iratija amo ke ngahia eria aingeko amo mane aetija te eita puvuto gamo ke ijirou ungotaha mane ingesora,” ke ainge eora te <sup>11</sup> Ke ainge ari embo amina ke erevi hotembeto kioja erena. Eto ahari ta kajeone kiova ainge nombo pambuto ungotaha titi ta heteto ke ngahia be na ano ingesova.

<sup>12</sup> Eto embo nei nei na ungo eonga, “Na, na” ijiroro ungonaha tumota ava eora avo dagona enana te dagote ari vahaira ke ainge avo mane aro ingosova te enana na God ta ari avo kogue ae rate enana ta ari avo ungo eonga teka ereora avoeto ari ainge amo sarika ue ere ora. <sup>13</sup> Eto dagona ari aingeko avo mane aisorate God na pure matu ikari avo kogue ke aisora. Eto God ta pure ikena amo ungotaha degi eora vahai avora. <sup>14</sup> Eto dagona Keriso ta duru ungotaha degi ikeo umbava avoeto dago ungo simba ere ora te dagota titi jigari ta tane amo nembeto pambaera. <sup>15</sup> Eto embo nei na God ta pure euja avo kogue nangona ari ke mane eora, te dagota uje amo ungonaha God tumota ari avo papajitirou dagona kito pure neite neite ungotaha degi ururoro pajito <sup>16</sup> inono au nangona ungotaha enda tane ovitihota embo nei nei mitera amita degi God ta ke hande aisora, eto enda nei donda be matu urari aita nangona mane urasora te enda



eha donda be urae aita pambuto be urasora. <sup>17</sup> Eto God ta ke ta einge kajari mitia, “Embo na ‘Na, na’ mane aisuja te Bada avoembo, ‘Na, na’ aisuja.” <sup>18</sup> ke amita be amo embona umo eonga, “Na, na” ijirou Bada na kito ke be ke mane aisuja te Bada na umo eonga kito ke be aisuja.

## 11

*Paul ta ke te ate poekari sokova embomeni amita ke te*

<sup>1</sup> Eto siro sapura ari embo na keko ke isapa aisona amo ungo ingovote? Eto na ere kogona amo ungo ke ano ingesova, avo ere kogona. <sup>2</sup> Eto God ta hotembari vahai avo nanena hotembitie ungo amo embona pegene umbuora segigi ue mitovona. Eto ungo ekalesia amo Keriso ta kerari avoeto na kakara ta mamu aingeko eto ungo tongopa ambu teho javotoho na mitirovo nanena ungo Keriso ta degi ikasona. <sup>3</sup> Eto o koso o na pamone Eve ta degi ke sokova na enu sapura ta bena ainge nombo ungo embota hotembari sasapura na aro ungota siro sapura au amo Keriso osa ari te tumota ari te avo toto pambuova simba ue mitovona. <sup>4</sup> Eto nanena kogona amo Iesu nangona umbuto puvua avo mane rate Iesu nei amite Ahihi nangona umbuto puvua avo mane rate ahihi nei amite eto duru javotoho hande uera avo mane rate duru nei umbuto hande eora avo ungoni ingihe aita porere mane pambuova. <sup>5</sup> Eto apostle sokova ungota degi puvuto ke eora avo embo peni, na isapa ke ainge avo nanena mane aisona <sup>6</sup> Eto na enana aingeko ke gamo na hande ari embo manera te nau degi ta amo God na kiari peni vahai be ikena amo ungotie mitie ke hande etene ingihava avoeto ke avo ungoni ke be ari inonora.

<sup>7</sup> Eto na ungota degi pambuto God ta duru javotoho hande uena amita mine na umbae ari amina ungo jogene eritava te ainge uena amomo

ari javotoho umitanete mo ari sapura umitanete? <sup>8</sup> Eto na ekalesia nei nei amita koro avo pegene arako eto jigama ue ungota degi pure amo uena. <sup>9</sup> Eto na ungotie mitie amo nau ujeje tapa do puvuna amo na ungota degi bouka nei do ikae rate ungota namei kamei enda Macedonia ta eto puvua amina na undua eto na ungota degi ombari asari ta eto bouka ikae mitovona ainge nombo bouka mane ikasona. <sup>10</sup> Eto Keriso ta ke be amo nau jota mitia avoeto amita hamota ke erevi erena amo enda Achaia ekalesia na ke nau erevi mane taekasora. <sup>11</sup> Eto na ungo osa ae avoeto koro umbae ari ke ijie hotembitevete? Na ungo osa ere ona amo God na ere kogua <sup>12</sup> Eto ke sokova ari embopo na nau pure vahai embo ke ijie koro umbasi pure eora avoeto na ke avo taekitie na ungota koro mane umbasona. <sup>13</sup> Eto embo aingeko amo apostle be mane rate pure sokova ue Keriso ta apostle ke ijie eora <sup>14</sup> Eto na enana ta ari avo kito jeneki honeki mane aisona te enana ta ari amo Satan na anera usasa te ke ijie isa euja. <sup>15</sup> Avoeto amita pure ari embopo na amita ari vahai avo ue ari jajavotoho ta pure ari embopo ke ijie ke sokova na eora. Avoeto enana ta pure eora amita iji tutumota amo God na hana kiari ikau kesora.

*Eto Paul na osaga kina ta ke*

<sup>16</sup> Eto na ke ehako erena amo na siro sapura ari embo ta ke ingito ingarako uore eora aingeko simba ururovo ke nau avo ane. <sup>17</sup> Eto ke nau avo “Na, na” ijirono ingesova amo Bada na mane aetija te na siro sapura ari embona keko aisona <sup>18</sup> amo enana apostel sokova na enda embo tapa na enana ta ari amita ke eora aingeko nanena aisona. <sup>19</sup> Eto ungoni dago tupo embora eova te siro sapura ari embomeni ta ke sau be ingiova <sup>20</sup> Amo ungo tupo embo sira ove apostel sokova na puvuto ate poekitore ungoni ke agi ue kajumba

ue ke tapa avo agi ue age ungota na timbuto indarako ereova. <sup>21</sup> Eto nangona ungota degi kiti pambuto ke sokova na ate poeketene ungo na na kajumba ue age ungota na timbuto indarako aeteva avo nau degi ta me kiari nombo be ra. Eto na siro sapura ari embo na keko ijie ke erevi aisona amo enana na ke ijie “Na, na” eora amo nangote tapa na ke amo “Na, na” ari inonora. <sup>22</sup> Eto enana amo Hebrew embopo rete? Namote tapa Hebrew embora, eto enana amo Israel embopo rete? Namote tapa Israel embora. Enana amo Abraham ta meniundi rete? Namote tapa Abraham ta menira. <sup>23</sup> Enana amo Keriso ta pure ari emboporete? Namote tapa Keriso ta pure ari embora te ungo ere kogova amo nau hotembari javotoho avo toto “Na, na” ijie erena te nau ari tapa amina enana nembari avoeto erena amo pure ngahia eona eto nei amo na tipura ta ikeora eto nei amo na teore memenga kiona eto iji nei nei amo na amburari ahumpa eona <sup>24</sup> Eto Judea embo na iji tapa 5 rate iji vahai vahai amita jo ta na ejembeto tea amo tapa 39 ainge toruera <sup>25</sup> Eto iji 3 amo ituha na toruera eto iji vahai amo atara na toruera eto iji 3 amo na e nga ta pahone e nga teto pejeo, iji vahai amina na iji vahai mume vahai eva ta daveto pambua. <sup>26</sup> Eto na enda tapa ta isa eona degi aita amo umo muenga ta degi osaga kiona eto degi ta embo teto pegene eora aita osaga kiona eto enda nau embomeni ta ingeni ta enda nei embomeni ta ingeni ta osaga kiona eto da jota eto degita eto eva hamota pahue osaga kiona, eto nei amo nau namei ke eora amita degi osaga kiona. <sup>27</sup> Eto nei amo na pure ngahia ue evae eona, eto nei amo indari te umo te na beuje uoi teho mitovona eto nei amo bo ambu eto jajemote avo kiona <sup>28</sup> Eto ari tapa amita hamota amo iji vahai vahai ekalesia avo hotembu hotembu ue iriona, <sup>29</sup> eto ekalesia embo vahai na ivo ambu euja amo na osaga kiona, eto embo vahai na engekari ta beuja

amo na osaga kiona.

<sup>30</sup> Eto na “Na, na” asona amo nau sovera ta ke avo mane aisona te ivo ambu ta ari avo ungo na kiova ari vahai erevi aisona. <sup>31</sup> Eto ke erevi aisona amo ke be pere avo Bada Iesu ta Mamo God daroho jakeka aisora amina ere kogua avoeto ke emo ke be pere erena. <sup>32</sup> Eto na da Damascus aita pambuto mitio King Aretas ta gavana na na andito umbasi amita isoro ari embopo ikenu da tapa joeketo mitio <sup>33</sup> nau namei kamei na na umbuto hambija peni vahai aita juruketo otohoto ta ikeo da tambuta beto kiae pambua.

## 12

### *Paul ta joremba ke ena*

<sup>1</sup> Eto nanena, “Na, na” ijie ungota degi ke ehako anote? Eto amita heta javotoho mane puvuresuja avo kogona te Bada ta ke nau degita harikitoi etureta kiarako uena avo ungota degi ano ingivujo. <sup>2</sup> Eto Keriso ta embo vahai nanena kiari amo jua 14 irae etija amita itikari ta embo vahai amo God na umbuto Utu i be ta pambuna amo hamote bisi te na pambunute hamo bisi ambuna pambunu amo na kiaera te God na vahai kina. <sup>3</sup> Te embo vahai amo andote rete ando ambu re amo God na vahai kina <sup>4</sup> embo amina Utu i God ta irari degi aita pambuto ke jajavotoho avo ingina te God na taekari avoeto embo na ke avo mane harikasuja <sup>5</sup> Eto na embo amita javota nane ke aisona te “na na” eonga amo ivo irae ke avo aisona. <sup>6</sup> Eto na ke nau be avo umbuto, “na, na” aetena amo ke be avoeto na me mane kiaetena te na embo peni rete isapa re avo embo ta hotembari na aerate nau ke te arite avo embona kogue na embo peni rete embo isapa re avo ara uje ere ona avoeto nanena, “na, na” mane aisona.

<sup>7</sup> Eto na degi javotoho aita pambuto ari jajavotoho neite neite kena avoeto na embo peni ke ijie one God na nau degita ambure vahai iketei Satan ta pure embo na arako

kaikari ereona avoeto na embo peni ke mane eona <sup>8</sup> Avoeto na ambure kaikari eona avoeto iji 3 ainge Bada na umbau irae aja pari uenate <sup>9</sup> Bada na ke mine einge ijija, “Eto na no ambure avo mane umbano irae aisuja te iji vahai vahai na umo hondate aisona amo inonora te umo ivo ambu embo ururo ivo nau avo no degita ikano peni vahai aisuja,” ke ainge ijija avoeto Keriso ta ivo avo nau degi ta iroja ivo nau irae avoeto tunga javotoho ue, “na, na” aisona. <sup>10</sup> Eto ke avoeto nau ivo ambuari embo ta isembari, hamota tari, atumbari neite neite Keriso ta javota kiona avoeto aita amo nau degi ta sovera ari puvuja.

*Paul na da Corinth embomeni avoembo osaga kina*

<sup>11</sup> Eto na siro sapura ari embo na arako ue ke erevi ere kaitena amo ujekari ungota avoembo ereona te ungonu osa ue ke be aeteva amo na ke einge emo mane kajaetena te ungo be kivujo, ungota apostel sokova amo peni, na isapa arako manera. <sup>12</sup> Eto na apostel be amita hajire pepeni neite neite avo ungota degi one ungonu iji koso be kogava <sup>13</sup> Eto nanena ungo avo ekalesia nei uhoho amiga inonora ainge ene ungonu kogovete? Eto kogava amo na ekalesia nei uhoho amita degi koro uhanate ungo nei nei amita degi amo koro umbae amina etei inono ae ari ke erevete? Avoeto ari nau kito hotembeto tovujo. <sup>14</sup> Eto na ungota degi iji heriso matu pahana te eha emo ehako pambuto ungota degi umoro ue ungonu ari ngahia nei do ava ke mane aisona. Eto na ungota degi pambuto umbasi uje ereona amo ungota koro mane rate ungota osa ari. Eto erena amo meni isasaraha na enanata e mamu mane unduorate emamo na meni-undi simba ue unduora. <sup>15</sup> Avoeto na ungota degi ta pambuto ungo hondate ururono nau koro te ando te amo jigama ano irae aetija. Eto na ungo osa peni vahai ereona avoeto ungonu na mine osa isapa be aeteva.

<sup>16</sup> Eto na ungota degi pambuto mitio na unditava aita osaga nei do tambae rate embo nei na eore ingiona amo nanena ungota degi pambuto ke gamo poekari ke na ene ingihava <sup>17</sup> Amo ke hande ari embomeni ungota degi iketene pahara amina ungo ke gamo na poekae <sup>18</sup> Eto na Titus pambaja ijie ungotenau namei vahai amiga iketene pahaja avoeto Titus na ungota degi ke gamo na poekae rate ungonu kogova amo Titus te namote amo ari vahai ahihi vahai amina eora.

<sup>19</sup> Eto nangona ke ere kaitera avo ungonu dago embo jajavotoho ke ava kajari ke ijie ere hotembitevete? Eto nau namei kamei, ke amo ainge ae rate God ta titi eto Iesu ta javota ungo avoembo ke emore ere kaitora. <sup>20</sup> Eto na ari vahai erevi joru ere ovona amo na aita pambuto ungota irari nei avo kogurono ungonu na kogue amo ngahia embo ke aisova avo na oju ere ona. Eto nei amo jujunete, embo nei ta donda uje ari te tumote, embo katekarite, javo ari sapura arite, ke sokova hande arite biso orongate, vasiri siosao arite, tapa avo aita tambanote avo na oju ere ona. <sup>21</sup> Eto na ungota degi pambasona amo ungo nei nei na tiha paiha te oine sasapura te hamo ta ujeje sasapura neite neite amo matu ere ovova avo toae avo na God ta titi ta me kesona avo joru ere ona.

## 13

*Kogue irivujo*

<sup>1</sup> Eto na ungota degi iji heriso pahana eto ehako pambasi ere ona. Eto ungota degi ari sasapura do mitia amo kiari embopo heriso eto nei heriso nei vahai amina pehumba ururoro ke be harikasova <sup>2</sup> Avoeto na matu ungotu mitie ijiena eto ehako na ungotu irae rate ehako erena avo ungo be ingivujo, na ungota degi pambasona amo ari sasapura matu te ehaha te avo mane toasona bera <sup>3</sup> Eto ungonu Keriso Paul ta degi ke eoite aere ainge eova ungo be

kiova ari ainge amo aisona. Eto ungo kogova amo Keriso ungota degi ivo ambu ae rate sovera euja <sup>4</sup> Eto ungo kogova amo Keriso ivo ambu enu i atahuta tea te eha oroho emo God ta sovera avoeto iriuja. Eto Keriso na ena ainge nombo nangota ivo irae rate nango aita pambuto pure ururoro ungonu God ta sovera avo be keisoa. <sup>5</sup> Avoeto ungo Iesu tumota ere ovetu aere avo ungota jo sirikevujō. Eto ungo Keriso ta toho be kito amo Keriso ungota jo ta iresuja avo kesova. <sup>6</sup> Eto dago amo Keriso ta toho be avo ungonu be kiova uje ere ona. <sup>7</sup> Avoeto ungo vasiri jajavotoho pere avu uje ue God ta degi pari ereona amo embo na nango kito ate poekari embo jajavotohora ke ainge ara ae rate dago embota titita javotoho rete sapurare avo mane aisora te ungo avo jajavotohora uje ere ora. <sup>8</sup> Eto ke be amo dagona mane taekasora te sigeto pambaja pure ere ora. <sup>9</sup> Eto dagona ivoambu aisora te ungo na ivo aisova avo peni bera te ungonu ari jajavotoho na pere inono ta aisova avoeto dago ungoembo pari ereora. <sup>10</sup> Eto Bada na nane ungo titi jigihō kito nau degi ta sovera ari ikenu amo na ungo tano beava ikae rate ungo jigono ereva ikenu eto na ungota degi pambae eita mitie ke erevi ere kaitenu amo ungonu kito jo hapereketo mitirovo pambuto ungota degi ke ngahia na mane aisona avoeto ke erevi ere kaitenu. <sup>11</sup> Avoeto nau namei kamei, ungota degi orere re erenu, javotoho na pere irivujō, eto nau ke erevi eteketo kivujō, eto hotembari vahai evujō, eto pekata irivujō. Eto osa arita, peka ari ta God ungota degi iresuja. <sup>12</sup> Eto otohu ari amina mune tavo mine ara evujō. <sup>13</sup> Eto God ta embo ototohu eita mitera amina ungo ere pekitera <sup>14</sup> Eto Bada Iesu Keriso ta hondate ari God ta osa ari eto Ahihi Otohu ta vahaita ari ungo tapa amita degi ta iresuja.



## GALATIANS

*Eto Paul na ahari erevi enda Galatia ta ekalesia tapa ta degi kajena*

<sup>1</sup> Na Paul na embo ta sovera na embo ta ke na ikae pambae rate Iesu Keriso te God Mamo Iesu jiginu vasiri te erena embo amite tapa na apostel umbuto ikeo pambua. <sup>2</sup> Eto namote nau namei kamei namote mitera amite tapa na ahari erevi kaitie ungo enda Galatia ekalesia miteva avo ere pekitera.

<sup>3</sup> Eto ungotenau Mama God te Iesu Keriso te ta hondateari te peka te avo ungota degi iroi. <sup>4</sup> Eto Iesu Keriso amo ungotena ari sasapuraga tapa enda erei ta irora uje ae ue hamo amita na ungotenau ari sasapura ombuto umbuna amo ungotenau Mama God ta uje ta ena, <sup>5</sup> amita degi usasa daroho iroi, amen.

*Duru Javotoho nei irae.*

<sup>6</sup> Eto God na Keriso ta orekari na ungo umbuna te ungo na God egikitie duru nei avo javotoho ke ijie aita borambu pambeve na kito mana mana ere ona. <sup>7</sup> Amo Keriso ta duru javotoho nei irae rate embo ungotite mitera amina ungota jo kajaro Keriso ta duru sapura aja ere ora. <sup>8</sup> Avoeto erena amo namo retemo anera nei amina ke kiti nangona hande etere uhava avo mane rate nei avo javotoho ke ijie hande ururou na uje ere ona amo God na embo amo tau memenga iji darohota kogue iresuja. <sup>9</sup> Eto ke etena amo ehako ano ingivujo, amo embo amuna ke kiti nangona hande etere ingito uhava avo mane rate nei avo javotoho ke ijie hande ururou na uje ereona amo God na embo amo tau memenga iji darohota kogue iresuja. <sup>10</sup> Eto na ke erevi erena amo embona ingito na embo javotoho ke ara erevete? Ainge manera te God na ingoja erena. Eto ke be amo na embo ta titi ta na ke be ara ari nau tapa avo mane eona te embo ta titi ta embo javotoho asi

aetena amo Keriso ta pure ari embo mane aetena.

*God na Paul jage eto umbuna.*

<sup>11</sup> Eto nau namei kamei ungo be ingova uje ere ona amo duru javotoho hande eona amo embo ta hotembari na puvuraera <sup>12</sup> eto embo na nau degi ta ae ingae eto ate poekae umbae rate Iesu Keriso na nau degi ta harikenu ingia. <sup>13</sup> Eto na Judea ta ari tapa jigama ue ere uaetena amo ungo ingarira amo God ta ekalesia tano irae aja hamota osaga memenga neite neite ere ikiti-aetena. <sup>14</sup> Eto nau namei kamei tapa Judea embomeni rate nane vahai Judea ohihi ta ari tapa avo inono ta asi uje eto jo tapa na jigama ere uaetena. <sup>15</sup> Te nau onde na na ingae pekota amo God ta hondate ari na na umbuna <sup>16</sup> amo amita Meni ta duru javotoho avo God kiae embomeni ta degi hande ana umbuna. Eto God na nau degi ta taeketo umbuna amo embo ta degi ke nei do ae <sup>17</sup> eto Apostel mamatu Jerusalem ta mitia amita degi ke asi pambae rate toto enda Arabia ta pambuto mitimite da Damascus ta egeremitana. <sup>18</sup> Eto na God degi ta tahana jua 3 amita ambota Peter tambuto tombu kesi da Jerusalem ta pambuto iji tapa 15 ai mitiena <sup>19</sup> te Apostel nei uhoho tambae rate Bada ta namei James vahai avo tahana. <sup>20</sup> Avoeto ke erena amo God ta tombu ta ke be na perekari ere kaitena.

<sup>21</sup> Eto amita ambota amo enda Syria te enda Cilicia te ta pahone <sup>22-23</sup> Keriso ta ekalesia Judea enda ta mitiaetera amina na enana ta kitoho embo ke ijioire ingiaora te tombu nau avo kiae pekota kito God tumota ara ke hande eona <sup>24</sup> avo ingito tunga javotoho be ue God jakeka ea.

## 2

*Paul da Jerusalem ta pambuto Apostel nei uhoho ga ke ena.*

<sup>1</sup> Eto jua 14 irae ena emita ambota na Barnabas ga da Jerusalem pambasi ue embo Titus umbuto amiga

pambua. <sup>2</sup> Eto ai ta pahana amo nau uje na pambae rate God ta uje ta pambuto ekalesia ta embo okokose aita mitera amita degi Iesu ta duru javotoho do do enda nei embomeni ta degi hande eona avo etene ingihara amo aravora arote avo eto etene enana embo okokose pere na <sup>3</sup> ingito jo vahai eto aravora ijiera. Eto nei amo embo Titus amo Judea embo mane enda nei Greek embora te Iesu tumota euja te hamo kakamba ae avo enana kito Judea ta ari avo hamo kakamba eto ekalesia ta toraja ke ae teho umbua. <sup>4</sup> Eto hamo kakamba ari ta ke amo mane aetera te enana ekalesia be mane amina imba puvuto nango Iesu Keriso ta jo ta iriora avo ke matu hamo kakamba ari ta ke amina ehako andiroja puvua <sup>5</sup> te enana ke amo nangota ke ahurekari inono ae etei Keriso ta ke ungota degi hande etere uhava ainge inono ta mitia. <sup>6</sup> Eto God ta titi ta embo tapa inono rate embomeni na enana Jerusalem ta mitera amo ekalesia ta titi jigari ke eora te nau degi ta amo tehora, amina Iesu ta ke hande eona amita hamota ke nei do ikae rate ke eona avo perera. <sup>7</sup> Eto Peter na Iesu ta duru javotoho avo judea embomeni ta degi hande aja God na umbuto ikena ainge nombo nanena enda nei embomeni ta degi hande ana umbuna avo enana ekalesia ta okokose amina kito ke be hotembea <sup>8</sup> amo erevira. Eto Peter na Judea embomeni ta degi ke hande ue pure uija aita God ta ingeni hajire kogara ainge nombo nanena enda nei embomeni ga pure uena aita God ta ingeni hajire kogara <sup>9</sup> avoeto James te John te Peter te amo ekalesia ta tutuvi be ari ke eora amina namote Barnabas te na God ta hondate ari na enana ga pure vahai eora avo kito ingeni uhue ke einge ea, namote Barnabas te avo enda nei embomeni ta degi pahuroro enana avo Judea embomeni ta degi pambasi ke ea. <sup>10</sup> Eto ke nei vahai amo hoivo embopo avo hondate ara etera avo na jo tapa na asi uje ere ona.

*Peter na oju ena avo Paul na kito harikena.*

<sup>11</sup> Eto Peter da Antioch ta pambuto mitie ari vahai erevi ena avo sapura kito amita degi harikitana <sup>12</sup> amo Peter kiti ta amo enda nei embomeni ga vahaita arumbeto ere indiaetija amo javotoho ere uaetija te Judea embo nei uhoho James ta degi eto puvua, amo enda nei embopo ekalesia ta ehaha toreora avo Judea ta ari ambo ambo eto hamo kakamba ara ke hande eora embopo puvua embomeni amina ke arote avo Peter na hotembeto joru ue ari sapura itiketo ena amo enda nei embomeni ga vahaita indari uje ae eto toturritinu <sup>13</sup> Judea embopo nei uhoho da Antioch ta ekalesia eto mitiaetera amina Peter enda nei embo ga vahaita indae uija avo kito ainge inono ta hotembari vahai avo uera. Eto sapura ainge uo Barnabas na enana ta ari sokova avo kito ai ta kaju unu <sup>14</sup> na aita pambuto enana ta ari avo kia amo duru javotoho embota degi hande eora aita irae avoeto ari sapura avoeto ekalesia ta tombu ta Peter ta degi ke einge ijiena, “Umo Judea embo rate enda nei embo ke kiae amina irarako ue enda nei embo na Judea ta ari umbuto irora ate ere poekitea amo ari sapura be ere kogona.”

*Judea embomeni te enda nei embo nei te na naingeto embomeni jajavotoho aisora*

<sup>15</sup> Eto ungotena aja ta oti ta eto puvurari amo Judea embopora te enda nei ari sasapura embopo ainge manera <sup>16</sup> te ungotena eha ere kogora amo embo God ta ke pepeni agi asora amina mane embo javotoho ke aisuja. Avoeto ungotena God ta titi ta embo jajavotoho aisi ue God ta ke pepeni neite neite avo hotembae ue Iesu Keriso vahai avo tumota ue mitera, eto ke be amo embo tapa na ke pepeni simba eora amina embo javotoho mane aisora. <sup>17</sup> Eto ungotena God ta ke pepeni agi ari amina embo jajavotoho ae rate Iesu Keriso tumota ari vahai amina

God ta titi ta embo javotoho eora avoeto Keriso tumota ari aita ere kogora amo embo tapa na ari javotoho amina embo javotoho ae rate embo tapa aemana embo sasapura pere rate Keriso amo ari sapura ta kiti umbari embo manera. <sup>18</sup> Eto ke pepeni neite neite agi ere uaetena amo embo javotoho anote ijie agi ere uaetena avo matu toturitana te ehako simba asona amina na pehumba au ari sapura embo aisona. <sup>19</sup> Eto ke be amo na God ta degi vasiri eha umbuto iresi God ta ke pepeni Moses ta degi ikena avo totorutana amo ai ta amo ari sasapura nau do aingere avo kogana. <sup>20</sup> Eto na Keriso ga tapa i atahu ta teo ambua avoeto vasiri sapura nau irae rate Keriso ta vasiri avo jo nau ta vasiri mitia amo God ta Meni na namo avoembo osa ue hamo amita ikena avo tumota one vasiri amita amo hamo nau ta mitia. <sup>21</sup> Avoeto ke pepeni simba ari amina God ta hande nau degi ta ikena avo mane ano sapura aisuja, avoeto erena amo ke pepeni agi eto ungotena embo jajavotoho aetera amo Keriso puvuto, teho ujeto amburaetija.

### 3

*Ke pepeni simba arotemo God tumota aro?*

<sup>1</sup> O ve, ungo da Galatia ingito ingarako embopo. Ungota titi mo amuna saruka etei kiae ere ove? Iesu Keriso i atahu ta ambuna amo ke araha ta etene ingihava te ungo na kiae kiae ereova, <sup>2</sup> avoeto na ke vahai erevi ungota degi eto ingesi uje ere ona amo God ta ke pepeni simba eteva amina God ta Ahihi Otohu ungota jo ta umbevetemo Keriso ta duru javotoho tumota ueva amina uhave? <sup>3</sup> Ungo ke kiae embopo. Eto ungo na God ta Ahihi ta sovera na itiketo ue mitena te aita amo hotembari ungota na kajueto iresi uje ere ove te? <sup>4</sup> Eto unгона God tumota ue amita hajire neite neite kogava amo teho kogavete? <sup>5</sup> Eto God na amita Ahihi Otohu ikeoi ari sovera neite neite eoi kiova amo unгона ke

pepeni neite neite simba eova Keriso ta duru javotoho ingihe ke be eova avoembo ikeoi?

<sup>6</sup> Eto Abraham ta ari erevi be hotembevujo, amina “God tumota unu kito embo javotoho ke ena” ke ainge kajari mitia <sup>7</sup> avoeto ungo kogova amo ari javotoho neite neite amina ae rate God tumota eora embomeni amo Abraham ta hajire vahai avoeto amita meniundi bera. <sup>8</sup> Eto enda nei embomeni tapa amuna God tumota ururoro God na kogue embomeni jajavotohora ke euja amita duru javotoho amo Abraham ta degi einge enu kajena amo “javotoho ari no degi ta eto enda embo tapa ta degi puvuresuja,” ainge kajena <sup>9</sup> avoeto Abraham na God tumota unu God ta javotoho ari ikenu kina ainge nombo embo amuna tumota eto kesuja <sup>10</sup> Rate God ta ke pepeni agi eto embo jajavotoho asi mitera embomeni amo God na au sapura ta beasi mitera amita ke amo einge kajari mitia “Eto embo amuna God ta ke pepeni kajari avo tapa inono ta jigama ae euja amo God na au sapura ta beto hajire kesuja” eto <sup>11</sup> ke nei einge mitia “Embo amuna God tumota aisuja embo amina God ta titi ta embo javotoho eto vasiri umbuto iresuja,” ainge mitia avoeto ungotena kesora amo embo na God ta ke pepeni agi eto God ta titi ta embo javotoho ari inono ae ra <sup>12</sup> te God na amita ke ta einge kajena amo, “Embo amuna nau ke peni te isapa te inono ta agi asuja amina vasiri tambasuja” ainge mitia avoeto ungotena kesora amo God tumota ari amo eonga eto God ta ke pepeni agi ari amo eonga <sup>13</sup> rate embo na agi ari inono ae avoeto ungotena sapura ta beto hajire kiaetera te Keriso na ungotena hondate eto ari sasapura ungotenau aravo hamo amita ta umbunu bitinu God na kito hajire ikenu ambuna avoeto Keriso ta ari avo kogue einge kajarira “Eto embo i atahu ta taro amburesuja amo God ta titi ta embo sapura be” ainge kajari ra. <sup>14</sup> Eto God na Iesu Keriso ikenu ungotena

sapura oreketo umbuna amo God ta titi ta ari javotoho ari Abraham ta degi ikasi onde ue nomai kajena avo enda nei embomeni na umbara Iesu Keriso ikena avoeto God ta Ahihi Otohu umbara onde ena amo Iesu Keriso tumota ururoro ikau umbasora.

*God na Abraham ta degi ikau umbaja onde ena.*

<sup>15</sup> Nau namei kamei ungo be kiova enda embomeni ta ari avo umbuto ate kitira aisona. Eto embo tapa na ke vahai amo jo vahai eto aravora asora amo ke peni avoeto ke embo vahai amina mane taekasuja eto ke nei amita hamota ikau mane hetasuja te ke vahai aravo aravora etera amina hetasuja. <sup>16</sup> Eto God na Abraham ga nomai kajena amo Abraham eto Abraham ta ahihije amita degi ari javotoho asi onde ue nomai kajena te kivujo, God ta ke ta kajari mitia amo “Umo te no ahihije te ta eto puvuroja” ke ae rate “umo te no ahije vahai amita degi eto puvuroja” ke enu kajena avo mitia. Eto Abraham ta Ahije amo embo nei mane rate Keriso ra. <sup>17</sup> Avoeto ke erena amita be amo God na embomeni ta degi ari jajavotoho ikasi onde ue nomai kajena amo toae rate jua tapa 430 amita ambota God na amita ke pepeni Moses ta degi ikenu kajena amina nomai Abraham ta iji te kajena avo mane au irae aisuja avoeto God na onde ena amo irae ae rate mitia. <sup>18</sup> Eto embomeni na God ta ke pepeni agi ue God ta tombu ta embo jajavotoho ari inono ae rate inono aetera amo God na javotoho ari ikau hande eto mane umbaetera. Rate God na umo eonga embo ta degi javotoho ari ikasi onde ena avoeto Abraham te tapa umbuto God ta tombuta embo javotoho ena. <sup>19</sup> Eto ungotena ere kogora amo embo na God ta ke pepeni avo agi eto embo jajavotoho ari haite mane rate do eto God na amita ke pepeni embo ta degi hande enu? amo Abraham irari iji te eto puvuto Iesu Keriso puvuna iji te amita ugorota embomeni na ari

sapura ta hajire do aingere avo kiora ikena. Eto ke pepeni amo God ta anera na Moses ta degi ikenu umbuto embomeni ta degi hande ena <sup>20</sup> te God na ari javotoho ikasi onde ena amo embo nei na Abraham ta ikaja ikae rate ikasi onde ena embo Abraham amita degi orereto ikena.

*God ta ke pepeni amita pure.*

<sup>21</sup> Eto hondate ari, God na Abraham ta degi ikasi onde ena amita degi God ta ke pepeni amina tumo ue mine tara ere orete? Ainge mane ra te ke pepeni God na ikena aita amo ungotena vasiri umbari haite aetera amo embo tapa na ke pepeni avo agi eto God ta tombu ta embo jajavotoho aetera, <sup>22</sup> te God ta ke kajari ta mitia amo enda tapa eto embo tapa amo ari sasapura ta sovera na jigei mitera avoeto vasiri javotoho ari avo God na embo ta degi hande ikasi onde ena amo Iesu Keriso tumota uore vasiri javotoho ari hande eoi umbuora. <sup>23</sup> Rate embo na Keriso tumota asora iji puvurae pekota God ta ke pepeni na ganoka uore tipura ta irarako uo Keriso tumota asora iji puvuna. <sup>24</sup> Amo embo na Keriso tumota ore God na au embo jajavotoho ara Keriso puvurae kiti ta God ta ke pepeni amina embo simba ere uaetija <sup>25</sup> te Keriso tumota asora amita iji matu puvuna avoeto God ta ke pepeni na ungotena mane simba aisuja. <sup>26</sup> Eto ungo amo Iesu Keriso tumota ue amiga kajueto miteva avoeto ungo God ta meniundi ra. <sup>27</sup> Ungona Keriso ga kajuasi bapataito ueva avoeto Keriso ta vasiri avo asuketo miteva. <sup>28</sup> Eto Judea embomeni te enda nei embomeni te pure ari embo te pure ta titi jigari embo te embo te pamone te tapa ke ainge eora amo ke peni mane Iesu Keriso ga kajueto vahai etera avo peni be ra. <sup>29</sup> Eto Abraham na God tumota ena ainge nombo ungoni Iesu Keriso avo tumota ue amita toho ue iriova avoeto Abraham ta meniundi be amo ungoni ere ova avoeto



God na Abraham ta ikasi onde ena amo ungo na hoteto umbasova.

## 4

### *God ta meniundi ta ke ra.*

<sup>1</sup> Eto ke erena amo eingera. Eto meni isapa amo pajito mamu ta donda tapa hoteto umbasova avoeto mamu ta donda amo amitara te meni irari iji te amo mamu ta ke agi ari menira. <sup>2</sup> Eto meni isapa avoeto embo nei na amita donda simba uore pajito embo eto mamu ta donda avo hoteto umbuja. <sup>3</sup> Eto ainge nombo ungotena God ta ke be ingae ue mitiaetera iji amite amo meni isasaraho na arako ue enda ta ahihi neite neite amita ke agi ere uaetera. <sup>4</sup> Rate iji inonota God na amita Meni ikenu benu pamone hamo bisi te amina ingenu God ta ke pepeni Judea ta degi ikari avo amina simba unu pajina. <sup>5</sup> Eto ungotena ke pepeni simba ari embomeni ta ari sasapura avo ombuto umbau tohota meniundi be ara Keriso amo Judea ta ke pepeni amina simba enu pajina. <sup>6</sup> Eto ungo God ta meniundi be eagova embo tapa na kiora God na amita Ahihi Otohu ikenu beto ungotenau jo ta mitie "God amo nau mama ra" euja. <sup>7</sup> Avoeto umo ke pepeni ta tipura embo mane rate God ta meni be avoeto God ta meniundi na hoteto uhuroro umote tapa hoteto umbasova.

### *Paul na Galatia embopota onde katari ikena.*

<sup>8</sup> Eto ungo God kiae mitiaetera iji amite amo ahihi sasapura neite neite God be mane amita ke agi ue tipura embo na irarako ere uaetera <sup>9</sup> te eha amo ungo God sovera te avo ere kogova eto God na ungo ere kogua te do eto ungo egerembeto enda ta ahihi ivo ambupu neite neite amita ke agi ari embopo asi ere pahove? <sup>10</sup> Amo ungonana ahihi sasapura ta ke ingihe iji te hariga te jua te tapa neite neite amo otohu ke ijie ereova <sup>11</sup> avoeto na ari avo kogua ungo hotembu hotembu ue na pure ungota degi uena amo teho uenete

avo ere hotembitena <sup>12</sup> avoeto nau namei kamei, na Judea ta ke pepeni avo toto ari ungota avo hamo eto eona ainge nombo ungonana Judea ta ke pepeni amina andiuja uje ae ere ona. Eto na ungota degi pahone amo ungonana nau degi ta sapura ae ueva. <sup>13</sup> Eto kivujo, na ungota degi kiti pambuto God ta duru javotoho hande uena amo na ambure umbuto ungota degi pahana <sup>14</sup> Eto nau ambure avoeto ungotete tapa osaga kogava te ungonana na egikae ue God ta anera umbaetera ainge eto na uhava eto nei Iesu Keriso uhue pekaetera ainge eto na uhava. <sup>15</sup> Eto ungota tunga javotoho ari osa osa ari pajire be kogana amo deina taeketei irae etei amo ungonana na osa ue nau degi ta donda nei do tapa umbuto nau degi ta hande ikasi uje ue kito ungota titi te tapa avo kuruketo nau degi ta hande ikaetera <sup>16</sup> avoeto na be kesi uje ere ona, amo na ungota degi ke be hande uena amina ungota kitoho ere onete? <sup>17</sup> Eto enana ke sokova ate poekari embopo ungota degi puvera amina ungo ga namei asi ke erera te ungota degi amo sasapura pere puvuresuja. Eto enana uje ereora amo na egiketo enana avo embo pepeni ke ava uje ereora. <sup>18</sup> Eto enanana ungota degi ari javotoho asi tunga humbaetera amo ari javotoho aetera. Eto na ungotete mitie one osa ueva ainge nombo enanana ururoro osa aetera <sup>19</sup> te nau osa ari meniundi, Eto ungonana pajito Keriso ta ari be umbava na pamone na meni ingasi ue memenga kiuja ainge nombo nane memenga osaga kogua mitena <sup>20</sup> avoeto na ungotete tombu mine kiara ue jo nei oi ke ngahia erena avo toto tunga jamo ari na ungota degi ke aisi ere ona amita be amo na ungo hotembu hotembu ere ona avoeto.

### *Pamone Hagar te Sarah te amita ke umbuto ate kitira ena.*

<sup>21</sup> Eto ungo embo nei nei amina God ta ke pepeni amita tu ta iresi uje ere ova te irari amo do aingere

avo ano ingesova. <sup>22</sup> Amo God ta ke kajari ta mitia amo embo Abraham ta meni heriso eto vahai amo amita pure pamone Hagar na ingena eto nei amo amita ae be pamone Sarah na ingena. <sup>23</sup> Eto pure pamone na meni ingena amo hamo ta ujeje ta ingena te amita ae be amina ingena amo God na ikasi onde ena avoeto ikenu ingena. <sup>24</sup> Eto pamone heriso amina ate kitira ea amo God ta noma kajari ta ke matu ikari eto God ta noma kajari ta ke eha ikari amita ate kitira avo ea. Eto pamone Hagar amo Abraham ta pure pamone avoeto embo amita ke na andirari avoeto amita meniundi te tapa amo embo neite neite ta ke na andirarira. Eto God na tiri Sinai ai ta Moses ta degi ke pepeni ikena amita ate kitira avo Hagar na ere ua. <sup>25</sup> Eto tiri Sinai enda Arabia jo aita amo Hagar na ate kitira ere ua eto nei amo da Jerusalem embomeni eha mitera amo Judea ta ke pepeni matu amina andirari avoeto Hagar na ate kitira ere ua. <sup>26</sup> Rate da Jerusalem eha Utu ita mitia amo nei deina andirae avoeto ungotenau ajara. <sup>27</sup> Amita ke amo God ta ke kajari ta einge mitia, “Meni ingae pamone, inena meni ingitie memenga kiae avoeto osa osa ue hori gagaha ijie tunga javotoho ejo. Eto pamone ivu na toari amita meniundi na pamone nei ivute amo nembasora.” Ainge kajari mitia amita be amo enda nei embomeni amo matu toari te eha oroho amo Keriso tumota ue tunga javotoho ere ora. <sup>28</sup> Avoeto nau namei kamei God na ke matu ikitie onde ena amo Sarah ta meni Isaac na ena ainge nombo ungo amo Abraham ta meniundi God na onde ena avoeto God ta meniundi bera. <sup>29</sup> Eto Abraham irari iji te enda ta vasiri na ingari meni amo Hagar ta meni amina God ta Ahihi na ikari meni amo Sarah ta meni amita degi memenga osaga ikenu kina, ainge nombo amo eha oroho ore ere koga. <sup>30</sup> Eto God na Abraham ta degi ke ena amo einge kajari mitia, “Eto no pure pamone ta meni amina no

ae be amita meni ga donda mane hoteto umbasuja avoeto kurumbejo pambare,” ke ainge mitia <sup>31</sup> avoeto nau namei kamei ungotena embo ta ke na andirari pamone amita meni undi mane rate ungotenau aja amo nei deina andiraera.

## 5

### *Ungotena nei deina andiraera.*

<sup>1</sup> Eto ungotena tambuta pambara Keriso na ungotenau ari sasapura bujekena avoeto ungo eonga ke pepeni neite neite amina mane pundesova <sup>2</sup> Paul, nane ke ano ingivujo, eto ungo na aravora avo hamo ungota jeto kakamba asora amo Keriso na ungo mane hondate aisuja <sup>3</sup> avoeto ehako ano ingivujo. Eto ungo vahai amuna aravora au hamo kakamba aisora amina God ta ke pepeni Moses ta degi ikenu kajena tapa avo inono ta simba aisuja <sup>4</sup> avoeto ungo amuna God ta ke pepeni agi ari amina God ta titi ta embo javotoho asi hotembasuja embo amo Keriso tumota ari matu egikari avoeto Keriso ta hondate ari umbae ue God ta titi ta amo embo javotoho manera <sup>5</sup> te ungotena ke be eora amo Keriso tumota ururoro God ta Ahihi Otohu na amita sovera na eoi God ta titi ta embo javotoho ere ora <sup>6</sup> avoeto ungote Iesu Keriso ta jo ta iresora amo hamo kakamba ari rete hamo kakamba ae re amo ke peni mane rate ke nombo be amo embo na Keriso tumota ue embomeni osa ue iresora. <sup>7</sup> Eto unгона Keriso tumota ari na pajirari javotoho be ove kogana te embo amuna ungota jo kaetei God ta ke ambo ambo ari totove? <sup>8</sup> Amo God ungo jage eto umbari embo amina aera <sup>9</sup> te ke sokova isapa be amina pajito embo ta jo eneteuja. <sup>10</sup> Rate ungote namote Bada ta jo ta mitera avoeto na kogona amo unгона ke nau mane egiketo embo nei ta ke ta tutuvasova. Eto ungota degi ke sokova tirari embo amunure, na kiae rate amo God na au hajire kesuja.

11 Eto nau namei kamei, na kogona amo embomeni amina Keriso ta embomeni ta ari sasapura orekasi i atahu ta ambuna avo ke be ae eora te Keriso na embo orekaeuja amita ke avo nane mane toasona te ke avo toto hamo kakamba ara ate poekaetena amo enana ke sokova tirari embopo na nau degi ta osaga memenga mane ikaro kiaetena. 12 Eto nau uje amo enana ungo hamo kakamba eto memenga sio kiova ate poekari embopo na asivo umbuto ungo oenga jorembeto bau te tapa tiukitie memenga kiaetera. 13 Rate ungo nau namei kamei amo ungo Moses ta ke pepeni na mane andiroja God na jage eto umbuna te ke pepeni na andirae ururou hamo ta uje sasapura mane aisova te osa ari na hondate mine ara evujo. 14 Amo eingera. God ta ke pepeni Moses ta ikenu kajena amo ke neite neite rate tapa amita ke susu amo “umo eonga osa ere oa ainge nombo namei osa ejo”. 15 Eto unгона isoro o na arako mine kambara ue isoro aisova amo ari amita tutumota amo ungo sasari eto irae aisova avoeto be kogue irivujo.

#### *Ahihi ta vasiri eto hamo ta vasiri.*

16 Eto ke erena amo ungota hamo ta uje sasapura ta mane tutuvasova te God ta Ahihi Otohu na ungo titi jigoja simba evujo. 17 Eto ungotenau hamo ta uje amina God ta Ahihi Otohu ta degi isoro ururou Ahihi Otohu na ungotenau hamo ta ujeje ta degi isoro euja. Eto enana heriso amo kitoho avoeto Ahihi Otohu na umotiti jigihirou uje no sasapura avo mane aisova 18 te Ahihi Otohu ta ke ambo ambo ue God ta ke pepeni amita simba ari ngahia mane hotembu hotembu ue iresoa. 19 Eto enda embomeni ta uje sasapura deire amo ungotena kiarira amo tiha paiha te oine sasapura uje ari te ari sasapura isapamane deina eoi jo tongopa euja 20 amite eto ingeni na ove eto God ke ijie jakeka ue saruka neite neite eora, eto embomeni na kateke kateke eto kitoho ue embo nei ta donda kito uje isapamane ue

naingeto umbasora avo hotembitie tumo eto isoro mine ara eora. 21 Eto hamo enana ta pere hotembitie umoteni vahai indito kava ue ke sokova eora. Eto ke matu eona avo ehako erena amo embomeni amuna ari ainge eora amina God ta titi jigari ta toreto hotari mane umbasora. 22 Rate ahihi na embo ta jo ta pure au be aisuja amo erevira amo tunga humbari, osa osa ari, pekari, embo tumo ae ue iji koso simba ari, tunga jamo jamo ari na embo simba ari, hondate ari, ari javotoho ari, tumota ari haite 23 meni isapa ke ijie tumo mane asuja eto hamo ta ujeje kikira aisuja. Eto ari kaetera emina God ta ke pepeni poekari iraera. 24 Eto Iesu Keriso ta embomeni toho amina enanata hamo ta ujeje sasapura neite neite avo umbuto Keriso ta i atahu ta teo irae ena 25 avoeto Ahihi Otohu ungotenau vasiri ikari embo amo ungotenau degi ta mitia avoeto amina ungotena titi jigoja aisora. 26 Eto ungotena oenga ‘na na’ ijie jo mine kaja mane aisora eto embo nei ta donda te ari te avo kito uje ue tumo mane aisora.

## 6

#### *Ungota emo bouka avo hondate hondate ue umbuvujo.*

1 Eto nau namei kamei, eto ungota embo vahai na ari sapura ururou tambuto kito hondate evu sapura avo toai. Eto avo hondate ue tini kambari na mane asoa te osari na hondate ue umoteni tapa engekari ta beasoa kogue ejo. 2 Eto Keriso ta ke peni agi ari amo ungota emo bouka avo hondate mine ara ue umbuvujo. 3 Eto embo teho amina umoteni eonga embo peni ke ijie ‘na na’ aisuja amo umoteni eonga ere urumbitia, 4 te ungo vahai vahai na ungota ari do aingere avo inono ta sirikitie ari javotoho kito tunga javotoho ue embo nei ta ari mane urumbasoa, 5 amo embo vahai vahai amo amita pure simba ari embora.

6 Eto God ta ke ingari embo na amita ate poekari embo hondate asi

ue amita donda jajavotoho na un-  
duresuja.

<sup>7</sup> Eto embo na titiha ta ari nei ue  
God ta degi ke sokova eora aingeko  
avojo, God na ari tapa be tapa amo  
kiuja avoeto embo na ari do aisuja  
amita hajire avo ikau kesuja. Amo  
eingera, <sup>8</sup> eto embo na amita hamo ta  
uje sasapura ta ke agi ere uma hajire  
kesuja amo amburari na tambasuja  
rate embo na Ahihi Otohu ta ke agi  
ereuma Ahihi Otohu na vasiri be  
ikau umbuto vasiri darohote iresuja  
<sup>9</sup> avoeto ungote ari jajavotoho ari ta  
pegogo mane aisora te toae kaiketo  
ere uma iji tutumota be au pure ta be  
jajavotoho kesora <sup>10</sup> avoeto iji tapa  
naingeto ari javotoho asi jombure  
ue embomeni tapa ta degi aisora eto  
nombo be amo ungotenau Keriso tu-  
mota vahai embomeni avo hondate  
aisora.

*Paul ta pekari ikena.*

<sup>11</sup> Eto na kikiva ari peni va-  
hai be ingeni nau na ere kaitena  
erevi kivujo. <sup>12</sup> Eto ungo hamo  
kakamba ava ate poekari embopo  
amo Keriso i atahu ta ambuna avo  
ate poekaetera te avo embo na in-  
gito osaga memenga aro kiorote avo  
hotembitie Keriso ta i atahu tium-  
beto embo na kiora hamo ta vasiri  
avo ate ere poekitera <sup>13</sup> Eto enana  
amo hamo kakamba eorate God ta  
ke pepeni nei nei amo agi ae rate  
ungo na enana ta ke agi eto hamo  
kakamba ere ova avo embo na kito  
jakeka ara eora. <sup>14</sup> Rate na amo  
ke nei do mane hande aisonate Iesu  
Keriso na i atahu ta ambuto vasiri  
te erena, ke avo pere nombo ke ijie  
hande aisona. Eto ke aita amo na  
enda ta ari sasapura amo nau degi  
ta matu amburari irae arira. <sup>15</sup> Eto  
ke be amo hamo kakamba anote  
mane ano ke amo nau degi ta peni  
mane rate ke peni be amo na matu  
amburari rate eha amo na vasiri  
daroho umbari embora. <sup>16</sup> Eto ungo  
ke avo ke be ari embomeni ta degi  
eto God ta embomeni tapa ta degi  
God ta peka te jo ari te ungota degi  
iroi. <sup>17</sup> Eto ke tutumota amo kitoho  
embo na tari pupuho hamo nau ta

mitia amo na Iesu Keriso ta hajire  
avo mitia, avo unгона kiova avoeto  
ungo nau degi ta osaga memenga nei  
ikavojo. <sup>18</sup> Eto nau namei kamei un-  
gotenau Bada Iesu Keriso ta hondate  
ari ungota degi iroi, Amen.



## EPHESIANS

### *Paul na Ephesus Ekalesia ta degi ahari erevi kajena*

<sup>1</sup> Na Paul, Iesu Keriso ta apostero ana God na umbuna nanena ungo Iesu Keriso tumota ue amita jo ta miteva embomeni ungota degi ahari erevi ere kaitena. <sup>2</sup> Eto God mamote Bada Iesu Keriso te ta hondate ari te peka te ungota degi iroi.

### *Javotoho ari Keriso ta degi umbuora.*

<sup>3</sup> Eto ungotena Keriso ga kajueto vahai etera avoeto God na Utu ta javotoho ari tapa ungotenau degi ta hande euja avoeto ungotenau Bada Iesu Keriso ta Mama God osa ue jakeka are. <sup>4</sup> Eto God na enda ove ae pekota ungotena osa ue amita Meni ga kajueto amita titi ta embo sasapura irae ototohu ara siriketo umbuna. <sup>5</sup> Eto God na Iesu Keriso ta pure amina ungotena amita meniundi be ara jo tapa na ungotena umbasi uje ena avoeto itikari ta nununga ena. <sup>6</sup> Eto God na ungotena hondate pajire be eto amita osa ari Meni avo ungotenau degi ta hande ikena avoeto ungotene God jakeka are. <sup>7-8</sup> Eto ungotenau degi ta hande pajire be overekena amo Keriso ta sasaga amina ungotenau ari sasapura ombuto uhue ungotena orekitie ari sasapura tapa hotembeto tona. <sup>9</sup> Eto God na amita kiari pajire be amina Keriso na ari do aisuja amo matu ondikari mitiaetija te ungotenau degi ta hariketo tambu ena. <sup>10</sup> Eto ke ai ta amo God na iji inono ta donda tapa amita ingeni na ena utu ta eto enda ta avo umbuto ikau enda vahai ari vahai eto irirou Keriso umbuto ikau heteto titi jigesuja. <sup>11</sup> Eto God na amita hotembari mane toasuja te aisuja avoeto God na uje amita avo itikari ta sirikena amo ungotena Keriso ga kajueto God ta toho ara iji itikari ta sirikena <sup>12</sup> avoeto nango Keriso puvuroja kiti

simba ere uaetera embomeni na God jakeka erera. <sup>13</sup> Eto eha emo ungo tapa na God ta duru javotoho ingito Keriso ke be ere oreketo umbei amita embomeni eteva. Eto ungo God ta toho avo embomeni kiora hajire ikena amo amita Ahihi Otohu ikasi onde ena avo iketei ungota jo ta mitia. <sup>14</sup> Eto Ahihi Otohu ungotenau degi mitia avoeto ungotena ke be erera amo amita hotari ungotenau degi ikasi onde ena avo amite tapa ikau umbasora. Avoeto ungotena God ta embomeni avo ari sasapura na andirae teho iresora avoeto ungotena God jakeka ijiroro amita degi usasa puvuroi.

### *Paul na enana avoembo pari ena.*

<sup>15</sup> Eto ke be avoeto ungo Bada Iesu tumota ue God ta embomeni osa ere ova ke avo nane ingito God ta degi osa ue <sup>16</sup> ungo embo pari kaiketo ijiroro <sup>17</sup> Bada Iesu Keriso ta Mamote God usasa te na ungota degi Ahihi amita ikau God ta vasiri tapa harikitirou kiova penunu erena. <sup>18</sup> Eto ungo God na siriketo umbuna embomeni ta uta hirikau God ta usasa kogue Utu i ta irari javotoho God na ikau umbasi simba miteva amo do aingere avo be kiova pari erena. Eto javotoho ari God na amita embomeni ta degi ikeuja amite <sup>19</sup> eto God ta sovera ungotena God ke be ari embomeni ta jo ta pure ere ua amite tapa ungo be kiova pari erena. Eto God ta sovera ungotenau jo ta pure ere ua sovera amina <sup>20</sup> Keriso amburari ta jiginu erenu umbuto Utu i ta ingeni be ta ikenu arumbeto mitie <sup>21</sup> titi jigirikari embopo tapa Utu ta eto enda ta amita siro ta titi jigihe mitia. Eto amita javo amo pajire be ra enda eha mitia ambota puvuresuja amita javo neite neite ainge manera. <sup>22</sup> Eto God na donda tapa be tapa umbuto Keriso na simba aja sovera iketo amita ekalesia ta titi jigari embo peni aja ikena. <sup>23</sup> Eto ungotena God ta ekalesia amo Keriso ta hamora. Amita be amo Keriso donda tapa ari embo na ungotenau

jo ta mitie eneteuja ainge nombo donda tapa ena amita jo ta iriuja.

## 2

*Ungotena matu amburari avo vasiri te ereto mitera.*

<sup>1</sup> Eto iji matu amo ungo God agi ae ue ari sasapura eaova avoeto ungota Ahihi amo amburari mitiaetija <sup>2</sup> iji amikote ungo na enda ta ari sasapura ambo ambo ue utu ta eto enda ta Ahihi sasapura ta ke agi ueva. Amo enana ta ke avo God uje ae embomeni na agi eora. <sup>3</sup> Eto ungotena matu kiti ta enana te tapa God uje ae embomenira avoeto hamo ta ujeje sasapura hotembari sasapura ta pahuma God na embomeni tapa ta degi tumo eto hajire ikau kesora avo ungotenamote tapa kiaetera <sup>4</sup> te God na ungotena osa peni vahai ue jo pajire enu <sup>5</sup> ungotena ke agi ae ore Ahihi amburari embomeni avoeto Keriso ga tapa jiginu vasiri te ereto mitera, avoeto amo God na ungo hondate eto umo oenga ari sasapura te amburari te oreketo ungo umbuna. <sup>6</sup> Eto avoeto Keriso Utu i ta titi jigihe mitia ainge nombo ungotena Ahihi ehaha umbuto Keriso ga titi jigihe mitera eto ari avoembo God na ungotena umbuto Keriso ga kajueto jiginu vasiri te erena <sup>7</sup> amo ungotena osa ue Iesu Keriso na hondate asi uje isapamane ena avo embo tapa na eha eto ambota kiora ena. <sup>8-9</sup> Avoeto ungo kogova amo ari ungotenau na ae rate embo na umo eonga ari sasapura ta orekari inono ke mane ara God na embo amuna God tumota ere ua avo hondate eto ari sapura oreketo umbuja amo God ta hande avoeto embo ta degi ikeuja. <sup>10</sup> Eto ungotena amo God ta ingeni hajire Iesu Keriso ga kajueto ari jajavotoho ara matu sirikena avo ara ungotena ove ena.

*Keriso ga vahaita ereora.*

<sup>11</sup> Eto ungo enda nei ta ingerekari embomeni ta degi ke erena ungo amo Judea embomeni hamo kakamba ari amina ungo hamo

kakamba ae ke eora ungota irari matu avo hotembevujo. <sup>12</sup> Eto iji amite ungo Keriso ta javota torae avoeto God na siriketo umbari embomeni mane enda nei embora. Eto God na embomeni amita avo hondate asi onde ue nomai kajena ke ai ta ungonu toraera. Eto God ungota jota irae avoeto ungota degi ari javotoho puvuresuja avo ungo simba aera. <sup>13</sup> Te eha oroho amo Keriso na hamo amita na ungo ombuna avoeto ungo hoi ta iriova amina Iesu Keriso ta degi puvuto kajueto miteva. <sup>14</sup> Eto Judea embomeni te enda nei embomeni te matu amo kitoho rate Keriso na hamo amita na tane titimbenu irae enu peka ta umbunu seri mine ara ue ere ova. <sup>15</sup> Eto Keriso na embo heriso javo eonga eonga avo umbuto amita jo ta embo vahai ara Judea ta ke pepeni neite neite amina andirari aravo bujeketo peka umbuna. <sup>16</sup> Eto Keriso i atahu ta ambuna amina kitoho irae enu embomeni heriso avo umbuto vahaita eto God ta degi ikena. <sup>17</sup> Avoeto erena amo Keriso na peka umbari ta duru javotoho enda hoi ta mitiaetera embomeni amita degi eto Judea embomeni auveto mitiaetera amita degi hande ena, <sup>18</sup> avoeto ungotena enda nei rete Judea rete amo Ahihi Otohu vahai amita sovera ari na God ta degi pari eore ingioi amita jota pambuora.

<sup>19</sup> Avoeto ungo enda nei embomeni amo kitoho embo javo nei mane ra te God ta embomeni be amita teka hoka vahaira. <sup>20</sup> Eto God ta bande Otohu amo amita embomeni ra, tutuvi peroveta te apostero na hurukari aita gerikari mitia eto ungo enda nei embomeni te tapa na bande amita pokukima ere ova, eto bande amita tutuvi vahai pajire be amo Iesu Keriso na ere ua. <sup>21</sup> Eto amina huruketo turi turi eto mitioi amita hamota Bada God na amita bande Otohu gerikeoi sovera eto peni ereua. <sup>22</sup> Eto ungotena tapa vahaita Iesu ga kajueto gerikeova God ta Ahihi na jo aita iriuja.

### 3

*Paul na enda nei embomeni avoembo pure ena.*

<sup>1</sup> Eto na Paul ungo enda nei embomeni ta degi Keriso ta ke hande one umbuto tipura ta gosuketere mitena, na ke ungota degi kaetena avoembo God ta degi pari ereona.

<sup>2</sup> Eto ungo ingihova amo God na ungota degi ari javotoho puvuroja hondate amita na pure erevi nau degi ta ikena. <sup>3</sup> Eto God na ari erevi aisuja amita ke amo matu ae ingae rate nau degi ta hariketei ingito ungo ingova kaetena <sup>4</sup> avoeto umbuto eteketo kogue Keriso ta ke matu ondikari amita ke susu deire avo kaetena avo umbuto eteketo kivujo <sup>5</sup> amita ke amo God na embo ta degi matu ae ingae rate eha amo amita Ahihi Otohu na apostero te peroveta te ta degi hariketei ingera. <sup>6</sup> Ke amo erevira, amo Judea embomeni na eonga ae rate enda nei embomeni te tapa na God ta degi javotoho ari umbasora, amo embomeni na Iesu Keriso ta degi ari javotoho umbara onde ena avo Judea te enda nei embomeni te na hamo vahai bisi vahai eto umbasora.

<sup>7</sup> Eto God na nau degi ta hande javotoho ikena amo amita sovera na amita duru javotoho hande ana amita pure embo umbuna. <sup>8</sup> Te na embo javote mane eto God ta embomeni tapa amita jo ta namo amo embo tehora te embomeni na Keriso ta degi ari javotoho be umbasora amita duru javotoho avo nane umbuto enda nei embomeni ta degi hande ana God na umbuna. <sup>9</sup> Eto God na naingeto embomeni oreketo umbuto titi jigesuja amita ke matu ondikari mitouva avo embo tapa na kiora umbuto araha ereona. Eto utu te enda te eto donda tapa ari God amina ke erevi matu ondikena te <sup>10</sup> embo pepeni javote Utu i ta mitera amina kogue God ta ekalesia enda ta eha ere uhua aita God ta kiari pajire neite neite avo kiora ere uhua. <sup>11</sup> Eto God na vasiri erevi aisuja

amo matu hotembena amo ungotenau Bada Iesu Keriso na ere ua erevira. <sup>12</sup> Avoeto ungotena tumota ari na Iesu Keriso ga kajuari avoeto me kiae teho God ta degi toreora. <sup>13</sup> Eto na ungo avoembo osaga memenga kogue mitena avo hotembitie God toasi hotembavojo amo ungota degi ari javotoho puvuroja ereona.

*Keriso ta osa ari.*

<sup>14-15</sup> Eto na ke erevi embo God Mamo, javo vahai embomeni tapa Utu ta eto enda ta amita javo ikerekari embo, amita tita ta paunge teteri eto tumotepain eona. <sup>16</sup> Eto God na amita usasa pajire be ai ta umbuto amita Ahihi na sovera ari ikau ungota hotembari jo ta sovera umbava God ta degi pari ereona. <sup>17</sup> Eto nei ungo tumota ururovo Keriso na ungota jo amo irari bande amita ke ijie ai ta iroja pari ereona. <sup>18</sup> Eto Keriso ai ta irirou ungotete God ta embomeni tapa te amina Keriso ta osa ari pajire be rate teka doitokore avo ungoni kiari haite avo pari ereona. <sup>19</sup> Eto embo tapa na Keriso ta osa ari peni vahai avo tapa inono ta kiari inono ae rate ungota jo amo God ta Ahihi na eto God ta ari na enetaja pari ereona.

<sup>20-21</sup> Eto ungotete God ta degi do umbasi penunu arote mo ikau umbasi hotembaro amo God ta sovera ungotenau jo ta pure ere ua avoeto nembeto ikari haitera avoeto ungotete ekalesia ta eto Iesu Keriso ta jo ta mitie God daroho ta jakeka are, amen.

### 4

*Ekalesia ta hamo vahai ari.*

<sup>1</sup> Eto na Bada ta pure embo avoeto tipura eto mitena nane ungoni ava erena amo God na ungo ehara ta jage eto umbuna iji te naingeto irova ena aingeto irova erena, <sup>2</sup> amo embo javote ke ijie “na na” mane aisova, sausau ereto tini kambari mane aisova. Eto namei ta ari nei eto ururou kito mane urumbasova te osa mine ara evujo. <sup>3</sup> Eto Ahihi

Otohu ta peka na ungo ajeketo pun-  
durari iriova avo ungota jo tapa na  
simba evujo. <sup>4</sup> Eto ekalesia neite  
neite irae rate ekalesia vahai eto  
Ahihi Otohu vahai eto God na ungo  
iji puvurou kiova jage ena amo va-  
haira. <sup>5</sup> Eto Bada vahai, tumota ari  
vahai, bapataito vahai, <sup>6</sup> eto God amo  
embomeni tapa ta Mamo donda tapa  
ta Bada avoeto donda tapa eto embo  
tapa ta jota mitie pure euja.

<sup>7</sup> Eto ungotena embo vahai va-  
hai na Keriso hande ikari embo be  
amita degi Ahihi ta sovera ari eonga  
eonga hande eto umbera <sup>8</sup> amita  
ke amo einge kajari mitia, “Amina  
isoro eto nembeto i be ita bitito em-  
bomeni ta degi hande ikerekena,”  
<sup>9</sup> ke ainge mitia, eto Keriso na Utu  
i be ta bitina amita be amo Keriso  
na Utu i ta eto beto enda kovari  
jo ta bena. <sup>10</sup> Eto Keriso enda ta  
bena amina Utu i be ta bitito Ahihi  
amita na Utu te enda te tapa eneteto  
iriuja. <sup>11</sup> Eto Keriso na embomeni  
ta degi hande ikerekena amo nei  
apostero ara ikena nei peroveta ara  
ikena nei amo God ta ke hande  
ara ikena, nei God ta embomeni  
simba ara ikena eto nei embo ate  
poekara ikena. <sup>12</sup> Eto hande ainge  
ikena amo God ta embomeni tapa na  
Keriso ta ke agi eto pure ue Keriso  
ta embomeni na ari jajavotoho ue  
pajirora ikena. <sup>13</sup> Avoeto ungotena  
na God ta Meni be avo kogue tu-  
mota ue embomeni vahai eto pajito  
embo be eto Keriso ta hajire vahai  
aisora. <sup>14</sup> Eto ungotena meni isas-  
araho mane avoeto atepoekari embo  
sapura puvuto embo kiti umbasi ke  
gamo poekasuja te ungoti ai ta mane  
tutuvasora <sup>15</sup> te ungotenau osa ari na  
ke be pere jigama ue Keriso ungotenau  
kiti umbari ke ijie ambo ambo  
ue ari amita na pajiresora. <sup>16</sup> Eto  
Keriso amo siro rate hamo uhu tapa  
amo ungotenamora. Eto ungotena  
osa mine ara ue pure eora amo hamo  
ta popo aingeko kaju ue pajuja.

*Keriso ta jo ta irari eha.*

<sup>17</sup> Eto na Bada ta javota erena  
ungo God kiae embomeni amita ari  
avo ambo ambo avojo. Enana ta  
hotembari amo ke be mane <sup>18</sup> eto  
enana ta kiari amo mume ta mitera.  
Eto enana ta jo ngahia amina kiari  
irae avoeto enana God ta degi vasiri  
eha mane umbasora be ra. <sup>19</sup> Eto  
enana amo ari sasapura kaiketo asi  
uje isapamane eora te me kiari avo  
irae ra.

<sup>20</sup> Eto Keriso ta ate poekari ai ta  
amo ari sasapura ainge amo iraera  
<sup>21</sup> te ungo amita ambotani ta degi  
ate poeketere ingihava amo Iesu ta  
ke be avo pere ingihava. <sup>22</sup> Avoeto  
ungota irari matu amo bo tongopate  
aingekora houketo gosukevu irae ai.  
Amo ungota hamo ta irari matu na  
uje sasapura amita na umo eonga  
sari uija. <sup>23</sup> Eto evu God ta Ahihi  
Otohu na au ungota hotembari jo  
eha ururou <sup>24</sup> ari eha bo eha aingeko  
asuketo irivujo. Eto ari eha aita amo  
God ta tombu hajire vahai ai ta amo  
ke be te otohu te avo embo na kiora.

<sup>25</sup> Avoeto ke sokova tapa tovujo  
irae ai. Ungotena Keriso ta jo  
ta avoeto hamo bisi vahai avoeto  
namei, Iesu ke be ari embo, amita  
degi ke be pere evujo. <sup>26</sup> Eto umo  
tumo ue kito amita tutumota ari sa-  
pura mane asoa te mume sihukae  
mitirou matu iji te no tumo avo ejo  
irae ai. <sup>27</sup> Eto Satan na umo en-  
gekeuja na simba ejo. <sup>28</sup> Eto matu  
pegene embo na ari avo toto ingeni  
amita na pure eto koro uhue om-  
bari asari amita avo simba ue donda  
irae embomeni hondate aja evujo.  
<sup>29</sup> Eto isembari ta ke avo toto ke  
javotoho na pere deirami ijiro embo  
nei hondate aisuja avo pere evujo.  
<sup>30</sup> Eto ungo God ta toho amita ha-  
jire amo amita Ahihi Otohu ungota  
jo ta mitia avo kogue God na ungo  
bujekasuja iji puvuto ere hua avo  
ke be eora avoeto ari deina eove  
God ta Ahihi Otohu osaga kiuja avo  
tovujo. <sup>31</sup> Amo jo memenga, ujeje  
sasapura, tumo sisire tini kambari  
boru jumbari, isembari ta ke avo pe  
te tovujo irae ururou <sup>32</sup> osa mine



ara ue God na umo Keriso avoembo ari sasapura no avo hotembeto tona ainge nombo namei ta ari sasapura hotembeto tojo.

## 5

### *Usasa ta irari.*

<sup>1</sup> Eto ungo God ta osa ari meni-undi avoeto God ta ari avo hamo eto evujo. <sup>2</sup> Eto Keriso na ungotena osa ue hamo amita avo God ta degi pene mune te avo ikitinu God na kito tunga javotoho ena avoeto ungota osa ari amina ungo titi jigoja evujo.

<sup>3</sup> Eto ungo God ta embomeni avoeto tiha pahia, oine sasapura uje neite neite amina ungota irari javotoho avoeto ke sasapura eremina ungota degi mane ereto pajiresuja. <sup>4</sup> Eto nei ke tongopa ganini sasapura ainge amo unгона mane jigama aisova te God ta degi osa jakeka ari ta ke avo pere evujo. <sup>5</sup> Eto ungo kogova amo tiha paiha embo eto ari sasapura ari embo eto donda uje isapamane ari embo (amo donda na amita god euja) eto embomeni aingeko amina Keriso ta titi jigari ta mane toreto God ta degi hotari umbasora. <sup>6</sup> Eto God ta ke agi ae ue ari avo ari embo ta degi God na tumo pajire be aisuja, avoeto embo amuna ungo ari sapura ainge ava ke sokova na jo kajasuja embo amita ke mane ingesova te <sup>7</sup> embomeni ainge avo tovujo eonga tinheto irore. <sup>8</sup> Eto ungo matu mume ta irari embomeni rate Bada ta embomeni ueva amina usasa ta toritava, avoeto usasa ta embomeni ta ari umbuto mitirovo <sup>9</sup> usasa ai ta amo be javotoho ekasuja amo ke sokova ai ta irae, ke be ari eto javotoho ari eketija avo tambasova <sup>10</sup> avoeto ari deirami avo Bada na kito tunga javotoho aisuja avo pere evujo. <sup>11</sup> Eto mume ta ari amo be ambu avoeto ari ainge mane aisova te tovujo. Eto ari sapura evu araha ta puvurou embomeni kiore. <sup>12</sup> Eto enana ta ari ondikari ta eora amo me kiari ta ari avoeto amita ke ijie me ki-aetera. <sup>13</sup> Eto ari tapa umbuto usasa ta iketo kiora amo ari amita tombu

hajire be avo kiora. <sup>14</sup> Amo usasa amina eoi ari tapa usasa euja amita ke amo einge kajari mitia, “Umo evari embo, amburari ta eto erao Keriso na no hamo ta gaitirou usasa aisuja”. Ke ainge mitia <sup>15</sup> avoeto irari ungota avo simba evujo, ungo kiae kiae embomeni mane ra, ungo kiari embomeni ra, irivujo. <sup>16</sup> Eto iji eha sapura avoeto ari jajavotoho deirami aisova avo jombure evujo. <sup>17</sup> Eto ungo uta irae embomeni na arako avojo te Bada na ungo do avo uje ere uo avo jombure evujo. <sup>18</sup> Eto ungo jae indito kava aisova amina ungo sapura aisuja avoeto ari avo toto Ahihi Otohu na ungo titi jigoja simba evujo. <sup>19</sup> Eto ‘psalms’ God ta ke ta kajari mitia amite eto haveni ototohu amite amita ke umbuto ke mine ara ijie jo tapa na Bada jakeka ijie evujo. <sup>20</sup> Eto Bada Iesu Keriso ta javota donda tapa eto ari tapa avoeto God Mamo ta degi osa evujo.

### *Ivu te ae te ta ke.*

<sup>21</sup> Eto ungo Keriso Otohu ere ova avoeto agi mine ara evujo. <sup>22</sup> Eto ungo airi na Bada ta ke agi eova ainge nombo ungota ipone ta ke agi evujo. <sup>23</sup> Eto Kerisona hamo amita na ekalesia orekena avoeto titi jigiuja ainge nombo ungo ipone na airi titi jigivujo. <sup>24</sup> Avoeto ekalesia na Keriso ta ke agi euja ainge nombo ungo airi na ipone ta ke agi inono ta evujo. <sup>25</sup> Eto ungo ipone ta degi erena, eto Keriso na ekalesia osa eto hamo amita avo ikitie ambuna ainge nombo ungota airi osa evujo. <sup>26</sup> Eto Keriso na amita duru javotoho eto amita bapataito ari umo amina amita ekalesia egeto hande javotoho be God ta degi ikena. <sup>27</sup> Eto ainge ena amo amita ekalesia amo sago kiari javotoho be sapura tongopa tapa irae donda javotoho be avo nau hande ra ijie umbuna. <sup>28</sup> Eto embo na ae osa euja amo hamo amita avo osa euja avoeto ungo embo na hamo ungota osa eova ainge nombo ungota airi osa ava erena. <sup>29</sup> Eto ungo kogova amo embo na hamo tohota avo uje

ae ari iraerate embo tapa na totohota hamo osa ue indari indie simba eora, eto ari ainge nombo Keriso na amita ekalesia simba euja. <sup>30</sup> Eto ungotena amo Keriso ta hamo amita utukoho hamo uhu ra. <sup>31</sup> Eto God ta ke kajari ta amo ke einge mitia, “Eto embo na avoembo amita emamo toto pambuto ae ga kajueto amiga bisi vahai aisuja” <sup>32</sup> ainge mitia te na kogona amo Keriso te amita ekalesia te ta timu hatirari ke rate <sup>33</sup> avo pere mane rate ungo ipone na hamo ungota osa eova ainge nombo airi osa ururovo airi na ipone tumota aisora amita ke ra.

## 6

*Emone mamone te meniundi te ta ke*

<sup>1</sup> Eto ungo meni isasaraho ungo Keriso ta toho avoeto emone mamone agi ari ta jata mane aisova te agi aisova. <sup>2</sup> Eto God ta ke 10 Moses ta ikenu kajena ai ta ke vahai amo embo na agi ururou javotoho ari amita degi puvuroja God na onde ena amo erevira “No aja mama avo Otohu ue ke agi ejo” ke ainge mitia eto javotoho ari God na onde ena amo eingera <sup>3</sup> “Eto ke agi ururovo God na au irari javotoho ue iji koso enda ta iresova” ainge God na ijie onde ena. <sup>4</sup> Eto ungo emamo ta degi erena, amo ungota meniundi na ungota degi tini kambari eora avo kaiketo mane isembasova te Keriso na embomeni ate poekena ainge nombo ue onde katitie ate poekavo ari jajavotoho na pajirore.

*Pure mamone te pure embomeni te ta ke*

<sup>5</sup> Eto ungo embo nei ta ke agi ue pure ari embomeni ta degi erena amo ungota pure mamone amo Otohu ue ungota jo te tapa na enana ta ke agi evujo, amo ungoni Keriso ta ke agi eova ainge inono ta enana ta ke agi evujo. <sup>6</sup> Eto enana na ungo koguroro jakeka ari ta pure mane aisova te ungo Keriso ta pure ari embopo avoeto God ta uje avo jo tapa

na eova ainge nombo enana ta ke agi evujo. <sup>7</sup> Eto jo tapa na pure ngahia asi ue embo avoembo mane aisova te Bada avoembo asi hotembevujo. <sup>8</sup> Eto ungo kogova amo embo nei ta pure embo rete tohota pure embo re amo Bada na ari jajavotoho tapa kogou mine inono ta ikau umbasora. <sup>9</sup> Eto ungo pure titi jigirikari embopo ta degi ke erena amo ari javotoho ainge amina ungota ke agi ari embopo ta degi evujo. Eto enana tasi ke mane aisova te titi jigari embo enana ta eto ungota amo utu i ta mitia amita titi ta amo embo nei peni embo nei isapa ainge manera te embo tapa inono inonora.

*Ari sasapura ta degi isoro evujo.*

<sup>10</sup> Eto ke tutumota erena amo Bada ta sovera umbuto irivujo. <sup>11</sup> Eto Satan ta ke gamo ta degi isoro asi Bada ta ki emi te isoro donda te umbuto asevujo. <sup>12</sup> Amo ungotena embo bisi te amita degi isoro ae rate mume ta titi jigirikari Ahihi neite neite eto mume ta sovera neite neite amo Satan ta isoro ari embopo Ahihi sasapura ta irari degi ta isoro eora amita degi isoro ereora <sup>13</sup> avoeto God ta ki emi tapa umbuto asuketo nununga evujo. Eto ari sapura puvuresuja iji te amo isoro ue mane beasoa te sovera ari umbuto heteto iresova. <sup>14</sup> Avoto isoro embo na pupuri tigitu euja aingeko God ta ke be jigito heteto irivujo, eto ungota jenge ta asukari amo javotoho ari na oreka aisuja. <sup>15</sup> Eto ungota utu goru amo God ta peka ta duru javotoho avo tehue hande asi uje evujo. <sup>16</sup> Eto God tumota ari amo beha aingeko ungo oreka ururou Satan ta ki bevere te amina ikau puvuto ungo mane kajaro evekasova. <sup>17</sup> Eto ungo God na oreketo umbasuja amo ungota siro kope ainge hotembevujo eto God ta ke Ahihi Otohu na ikasuja amo isoro asivo aingeko avo ikau umbuto jigivujo. <sup>18</sup> Eto iji tapa ari tapa avoembo pari evujo amo Ahihi ta sovera na kaiketo pari ue siro pure

eto God ta embomeni tapa hotem-bitie enana embo pari evujo. <sup>19</sup> Eto God na nau degi ta ke ikau ingito amita duru javotoho matu ondikari avo joru ae ue embo ta degi hande ana pari evujo. <sup>20</sup> Amo na amita ke hande ari embo 'chain' na tigere mitena te na embo joru ae ue sovera ari umbuto ke hande ana God na pari avo uje ere ua.

*Pekari ta ke*

<sup>21</sup> Eto Bada ta ke agi ari embo javotoho ungotenau namei Tychicus amina ungota degi pambuto ke nau eto ari nau na do ereona amo amina au ingesova <sup>22</sup> Avoeto ungota degi ikano pambuto dagota ke avo au ingito sovera ari umbasova.

<sup>23</sup> Eto God Mamo te Bada Iesu Keriso te na ungo namei kamei ekalesia tapa ta degi pekari te osa ari te tumota ari te avo ikaro umbasova <sup>24</sup> Eto jo tapa na Bada Iesu Keriso osa eora embomeni amita degi God ta hondate ari iresuja.

## PHILIPPIANS

### *Paul na Philippian ekalesia ta degi ahari kajena*

<sup>1</sup> Eto na Paul te Timothy te amo Iesu Keriso ta pure ari embopo na ungo God ta embomeni Keriso ga kaju ari da Philippi ta miteva amite ekalesia ta titi jigirikari embopo te hondate ari embopo te tapa ungota degi ahari erevi ere kaitera. <sup>2</sup> Eto ungotenau Mama God te Bada Iesu Keriso te enana ta hondate ari te pekari te ungota degi ikasora.

### *Paul ta pari*

<sup>3</sup> Eto na ungo hotembitie God ta degi osa ue <sup>4</sup> iji tapa ungo embo God ta degi pari eona amo tunga javotoho be ue pari eona <sup>5</sup> Amita be amo unгона na itiketo Keriso ta duru hande ea iji te eto puvuto eha oroho emite amo ungo na na hondate ue God ta duru javotoho embo ta degi hande ere ovova. <sup>6</sup> Eto na be kogona amo ungota jo ta amita pure itikena embo God na pure javotoho avo mane toasuja te ungota jo ta pure ere uma Iesu Keriso ta puvurari ijite pure irae aisuja. <sup>7</sup> Eto amo ke be eto matuainge na ungo hotembitione jo euja amo pure nau God na ikena ai ta unгона kajueto ere ova amo na tambuta mitie enda ta tehue ke sapura peikitie God ta duru javotoho avo hande ere uaetena amite eto eha tipura ta mitena emite amo unгона na hondate ere ova avoeto ungo osa ere ona. <sup>8</sup> Eto ke erena emita be amo God na ere kogua amo na Iesu Keriso ta jo ari na ungo osa peni vahai ere ona. <sup>9</sup> Eto ungota degi God kiari te ari sirikari te osa ari te ainge avo pajito inono ara God ta degi pari eona <sup>10</sup> Amo unгона ari jajavotoho davore avo be kiova pari ere ona. Eto ari ainge avo ungota degi inono aro Keriso puvuresuja iji te amo amina ungota degi sapura nei do mane tambasuja. <sup>11</sup> Te Iesu Keriso ta ari jajavotoho amina ungota irari

eneteto inono au kogurou God ta degi usasa te peka te puvuresuja.

### *Keriso ta degi vasiri be umbuora*

<sup>12</sup> Eto nau namei kamei, ungo be kiova uje ere ona amo osaga memenga nau degi ta puvija amo God ta duru javotoho hande ari ta pure avo peni aja puvija. <sup>13</sup> Amita be amo na Keriso ta pure ari embo avoeto na tipura etena avo tipura ta simba ari embopo te embomeni tapa eita mitera amite tapa amina na kiara. <sup>14</sup> Eto na tipura ta mitena te ungotenau namei kamei na na kogue joru ae rate Bada ta degi ando ta sovera ari uhue embomeni ta degi duru javotoho hande ere ora. <sup>15</sup> Eto ke nei amo embo nei uhoho na Keriso ta ke hande ere ora amo tini kambari na ere orate nei uhoho amo osari tunga humbari amina ke hande ere ora. <sup>16</sup> Eto enana osa ari na God ta ke hande ere ora embomeni amina na God ta ke avo simba ue hande ana God na umbuna amo embomeni amina kiari ra te <sup>17</sup> embo nei uhoho amina ungo eonga embo peni asi ue Keriso ta ke amo jo te tapa hande ae rate hamo na hande ere ora amo na tipura etena avoeto nau degi ta osaga hamota hamota puvuroja ari ainge amo ere ora.

<sup>18</sup> Rate ari ainge amo tehora. Embo nei amo ke sokova na hande ore embo nei amo ke be na Keriso ta ke hande ere ora te embomeni na Keriso ta ke hande ore embo na ere ingihera avoembo na tunga javotoho ere ona. <sup>19</sup> Eto na kogona amo ungota pari te Iesu Keriso ta Ahihi ta hondate ari te na aro tipura toto tambuta pambasona avoembo tumota ari ke be na osa osa te mitena <sup>20</sup> Eto na jo tapa na uje ereona amo pure nau mane toasona te sovera ari inono ta umbuto eha oroho eto ambota amo vasiri te ironote amburono amo pure nau avoembo embomeni na Keriso otohu ue jakeka aisora. <sup>21</sup> Amita be amo na eha vasiri te iresona amo Keriso avoembo iresona rate Keriso vahai amita javota amburesona amo nau degi ta javotoho pere puvuresuja. <sup>22</sup> Avoeto amburonote vasiri te mitie pure javo-



toho nei anote, na do asona amo na be kiaera. <sup>23</sup> Jo nau amo herisora, eto na nau vasiri toto pambuto Keriso ga mitie irari javotoho umbasi uje ere ona. <sup>24</sup> Rate na uje nau avo toto ungo avoembo hamo te bisi te ei ta iresona <sup>25</sup> Eto na kogona amo ungota tunga javotoho ari te God tumota ari te na peni vahai aja ungotate iresona. <sup>26</sup> Eto na ungotate mitirono ungo Keriso ga kajuari ai ta namo avoembo tunga javotoho ari pajire be umbasova.

<sup>27</sup> Eto ke peni be amo Keriso ta atepoekari avo kogue inono ta irivujo. Eto na ungota degi pambuto ungo kionote mane kiono ungo na jo vahai eto ari vahai na heteto God ta duru javotoho avo ke be ijie ari sasapura ta degi isoro ereova ke avo ingesi uje ere ona. <sup>28</sup> Avoeto ungota kitoho embo joru mane aisova te sovera ari umbuto ijirovo enana na kito ungonanembitirovo enana beasora avo ke be aisora amita be amo embo na nembari inono ae rate God na au nembasuja. <sup>29</sup> Eto ungo na Keriso ta pure ava God na umbuna amo ungota ke be ari amina pere mane rate ungota memenga osaga kiari amina Keriso ta pure ere ova. <sup>30</sup> Avoeto namoga kajueto isoro evujo. Amo isoro nei mane rate da ungota ta one kogueva eto oroho eore ingiova isoro vahai aravora.

## 2

### *Keriso na meni isapa sira ari*

<sup>1</sup> Eto ungo Keriso ta jo ta mitie amita degi sovera uhue amita osa ari na ungo simba eoi Ahihi Otohu ga tatapeketo ue ungo na namei jo eoi hondate mine ara eova <sup>2</sup> kito na tunga javotoho be ana eto ari erevi aeteva avoeto avo erena amo ungo hotembari vahai osa ari vahai eto jo vahai ue <sup>3</sup> ungo eonga embo pepeni ke ijie na na mane aisova te meni isapa sira ue ungo amo embo isapa embo nei amo embo peni ke ijie <sup>4</sup> Ari ungota pere mane hotembasova te embo nei ta vasiri amo ke be ke ijie irivujo. <sup>5</sup> Eto Iesu Keriso ta ari avo

eto hamo asova amo erevira: <sup>6</sup> Iesu amo God ta ari vahai rate buvure amita na God ga inono asi ae <sup>7</sup> rate uje amita na amita embo peni ari avo toto embo ta agi ari embo ta ari umbuna, amo embo ta hamo bisi avo umbuto embo ena. <sup>8</sup> Eto amina meni isapa sira eto God ta ke agi ere uaetija rate amo embo be avoeto i atahu ta ambuna. <sup>9</sup> Avoeto God na jiginu erenu umbuto i be i ta ikenu arumbenu javo peni be ikena, amo javo tapa tapa ta hamota avo ikena. <sup>10</sup> Avoeto embomeni tapa utu i ta eto enda ta eto enda tota amina paunge teteri eto Iesu jakeka ijie <sup>11</sup> Iesu Keriso amo ungotenau Bada peni be ke ijiroro God Mamo hena ta usasa pambasuja.

### *Ungotena enda ta usasa ra*

<sup>12</sup> Avoeto nau tunga humbari embomeni, na ungotate mitene ke nau agi ueva te na ungotate irae iji te peni be amo ke nau agi evujo. Eto ungo God otohu ue iji tutumota oreketo umbaja segigite jopapa te tapa ohare mamare ue pure evujo. <sup>13</sup> Amo God ta uje eto amita pure avo aisi uje ava God na ungota jo ta mitie pure ere ua. <sup>14</sup> Eto ungo kupi ambu ue boru jujune ke toto ari tapa avo evujo. <sup>15</sup> Eto ungo ari sasapura tehon tahon ari embomeni ga enda ta mitie God ta meniundi eto ari sasapura toto pehumba ari haite mane tongopa ambu irivujo. Eto kuro hunjara na utu i ta usasa euja ainge arako ue enda embomeni ta usasa ue God ta vasiri eha ikari ta ke avo hande evujo. <sup>16</sup> Eto ainge ere uma Bada ta puvurari iji te amo nanena ungo kogue pure ngahia ea amo aijaja ae rate be uena avo na kito tunga javotoho aisona. <sup>17</sup> Eto sasaga nau amo ungo God tumota ari amita hamota God ta degi pene overekanote asona amo na kiae rate sasaga nau overekasona kito amo ungotate namote tapa tunga javotoho aisona. <sup>18</sup> Avoeto namoga tapa tunga javotoho evujo.

*Embo Timothy te Epaphroditus te ta ke*

<sup>19</sup> Eto Bada na uje au kito na ungotu duru au ingito sovera umbasi Timothy ungotu degi sausau ikano pambaja uje ere ona. <sup>20</sup> Eto eita amo Timothy na vahai namote ungo osa ue ere hotembitia. <sup>21</sup> Te embo nei tapa amina Iesu Keriso ta pure hotembae ue ungotu ujeje avo pere hotembeora. <sup>22</sup> Eto Timothy amo pure ari embo javotoho amo ungo tapa na kiarira eto amite namote amo mamu te meni te na arako God ta duru javotoho avo amiga vahai ta pure ere ovora amo ungo matu kiarira. <sup>23</sup> Avoeto na nau degi ta ari do puvuresuja avo kiti kito Timothy ungotu degi ikano pahuru. <sup>24</sup> Na tumota ere ona ambota Bada na uje aisuja kito namote tapa ungotu degi sausau pambasona.

<sup>25</sup> Eto ungonu na hondate aja ikitava embo Epaphroditus amina namoga Keriso ta ke na isoro ue pure ere ouva te ungotenau namei avo ungotu degi ikano pambasuja. <sup>26</sup> Amo ambure ena avo ungonu ingava avo ingito osaga kogue iriujua avoeto ungo sausau pambuto kesi uje ere ua. <sup>27</sup> Eto amo ambure umbuto sari ari ahumpa be rate God ta jo ari amita degi eto nau degi ta avoeto enu kondena te sari aetija amo namote tapa na osaga pajire be kiaetena. <sup>28</sup> Avoembo na uje ere ona amo Epaphroditus ikano pambau ungo kito tunga javotoho ururovo osaga nau irae aisuja. <sup>29-30</sup> Avoeto ungotenau namei avo jo tapa na peketo umbuvujo. Amo ungo na na hondate ari inono ae rate amo ungotu hondate embo amina Keriso ta pure ue amburari ahumpa etija avoeto embomeni aingeko avo osa be evujo.

### 3

*Javotoho ari ta ke*

<sup>1</sup> Eto nau namei kamei, ke tutumota erena amo ungo Keriso ga kajuari avoeto tunga javotoho ue osa

evujo ke ainge amo matu etene ingihava amina ungo simba euja ke avo na me kiae rate ehako erena. <sup>2</sup> Eto enanu hamo jeto kakamba ue embo tapa na ainge ara ate poekari embomeni amo sapura be avoeto be kivujo amo ino sasapura aingeko donda sasapura ta pambuora. <sup>3</sup> Te hamo kakamba ari embo be amo enanu na ae rate ungotenanenu eona, amita be amo ungotenu Iesu Keriso ga kajueto tunga javotoho ue amita Ahihi ta sovera na God jakeka eora eto hamo ta vasiri amo tumota mane eora. <sup>4</sup> Eto ungo kogova, hamota ari amo nanenu tumota ere uaetenu avo eha aetenu amo embo nei na hamo ta ari tumota eora te nane ereuaetenu ainge manenu amo erevira. <sup>5</sup> Eto na aja na umbunu iji 8 irae enu hamo nau jeto kakamba ea, eto na Judea ta ohihi vahai Benjamin ta javo vahai avoeto Israel embo be, eto buvure nau ta amo Hebrew embomeni ta sasaga na pere mitia. Eto na Pharisee embo avoeto Judea ta ke pepeni tapa inono ta agi ere uaetenu. <sup>6</sup> Eto nau ohihi ta ari avo simba asi uje peni vahai ue Keriso ta ekalesia avo teo osaga memenga isapamane be kia avoeto embo na ke pepeni tapa agi eto God ta titi ta embo jajavotoho aetera amo nanenu vahai aetenu. <sup>7</sup> Rate ari ainge tapa amo Keriso ta degi ari javotoho umbasi toa. <sup>8</sup> Eto ari avo pere mane rate ari nei tapa amo be ambu ke ijie Iesu Keriso nau titijigari embo avo be kesi ari nei tapa toa amo ari nei tapa amo indari ta soka aingeko avoeto gosukeo pambunu irae ena te Keriso vahai avo nau degi ta iroja simba ue amiga kaju eto mitenu. <sup>9</sup> Avoeto na ke pepeni neite neite simba ari amina ke sokova ta javotoho ari umbae rate javotoho ari be amo Keriso tumota eto umbuora amo God na tumota ari nau kito embo javotoho ke euja. <sup>10</sup> Eto nau degi ta ke nombo be amo na Keriso ta degi kiari uhue amina ambuto vasiri te erenu amita sovera avo be kesi uje eto amina hamota memenga kina ainge nombo

nanena kogue amita amburari ta amiga embo vahai ue <sup>11</sup> Keriso vasiri te erena aingeko God na na jigou vasiri te erasi simba ereona.

#### *Utu i ta irari embomenira*

<sup>12</sup> Eto na ari avo matu umbari inono ari ke mane asona te ari avo nau be aja uje ue nembasi ere tutuvitena, amo na Keriso na umbei amita toho ere ona avoeto nembasi ere tutuvitena. <sup>13</sup> Eto nau namei kamei, eha oroho amo na nembae rate ari nau amo eingera, na nau ku hena ta do mitia amo matu jenete eto titi vuju ta do mitia avo tambasi ere pahona. <sup>14</sup> Amo siro kope javotoho avo nau be aja vasiri na ere tutuvitena, eto siro kope javotoho amita be amo Iesu Keriso avoembo God na vasiri eha ikau umbuto iresona. <sup>15</sup> Eto ungotena meni isasaraho mane rate God ta kiari umbari embomeni be avoeto hotembari vahai erena erevi evujo eto hotembari avo be hotembae asova amo God na harikau be kesova aingera. <sup>16</sup> Rate nombo be amo ungotena God ta ke ingito agi ereovora vahai avo mane toasora te agi matu ainge aisora. <sup>17</sup> Eto ungo nau namei kamei ta ate kitora ere ona avoeto nango ungota atekitira ari embo be avo ungonu kogue ambo ambo evujo. <sup>18</sup> Eto ke nei erevi kaikari ungota degi erena eto ehako titi sisivu te tapa erena ingivujo eto ke amo embo nei uhoho amita irari nei sapura amina Keriso i atahu ta ambuna amita kitoho embopora. <sup>19</sup> Eto enana ta hamo ta ujeje amo enana ta God ra amina Satan memenga kesuja degi ai ta memenga daroho kesi ere pahora. Eto enana na me kiari ta ari amina siro peni ue enda sapura emita ari avo pere hotembeora. <sup>20</sup> Rate ungotenamore utu i ta irari embomeni ra avoeto Bada Iesu Keriso ungotenau orekari embo utu i ta eto puvuresuja avo jo tapa na kesi simba mitera. <sup>21</sup> Amina donda tapa be tapa avo vahaita toreketo tihi jigihē mitia avoeto sovera amita na ungotenau sari ari hamo avo au amita hamo

usasa te ainge nombo eto sari mane aisuja.

## 4

#### *Onde katari ke*

<sup>1</sup> Avoeto nau namei kamei eto nau tunga humbari embomeni eto na ungo hotembeto osa ue na ungo ehako kesi uje ere ona. Eto ke ere kaitena avo eteketo kogue naingeto Bada ta javota heteto iresova avo ungo be kivujo. <sup>2</sup> Eto ungo pamone Euodia te pamone Syntyche te ta degi erena amo ungo Bada ta jo ta mitie jao tate ue tunga vahai evujo. <sup>3</sup> Eto umo nau pure vahai embo javotoho amina pamone heriso avo hondate ejo, eto enana amo namoga pure ngahia ue God ta ke avo hande uera amite eto embo Clement amite eto embo nei uhoho amite tapa pure uera amita javo amo God ta book javo vasiri aita kajari mitia.

<sup>4</sup> Eto ungo Bada ga kajueto iriova avoeto tunga javotoho evujo, eto ke ehako erena amo ungo tunga javotoho evujo. <sup>5</sup> Eto Bada puvuto ere hua avoeto embo tapa ta degi tunga humbari ke avo seima eto evujo. <sup>6</sup> Eto ari nei mane hotembasova te jote hotembari te na God osa ue ungota ujeje avo ikau umbasi penunu evujo. <sup>7</sup> Eto God ta peka amo embo na kiari inono ae rate amina ungo Iesu Keriso ga kajueto miteva embomeni amita jo te hotembari te avo simba aisuja. <sup>8</sup> Eto nau namei kamei ke tutumota amo ari javotoho jakeka ari haite avo pere hotembevujo. Ari ainge amo ke be ari donda te otohū ari te ke be ari te javotoho ari te ari sapura irae amite sago kiari te ari javotoho kito osa osa ari te tapa ainge avo be hotembevujo. <sup>9</sup> Eto ke nau eto vasiri nau na ate poekitane kogava avo eto kito ururovo peka ikari God amo ungota degi iresuja.

#### *Paul na Philippians ta hande umbuna*

<sup>10</sup> Eto ungo iji koso amo ungonu na hotembitie iriova amo nau degita hande ikari inono ae rate eha

iji tutumota amo nau hande iketeve umbena avoeto Bada ta javota ungo osa ere ona. <sup>11</sup> Eto nau degita do mitia amo inono ke ijie mitovona te na koro uje ue ke ae ra te <sup>12</sup> na ke erena amo do ondikarire avo nane vahai kiona amo nau degi ta donda iresuja eto irae amo na matu hamo arira eto indari ijite eto beuje ijite donda iresuja ijite eto donda irae ijite amo na matu hamo ngahia ari ra <sup>13</sup> Eto ainge eona amita be amo Keriso na sovera ari ikeoi umbuona avoeto ari tapa amo nau degi ta inonora. <sup>14</sup> Te ungonu nau osaga avo kito koro hande iketeve avoeto tunga javotoho be ere ona. <sup>15</sup> Eto na da Macedonia toto Iesu ta duru javotoho hande asi pambasi uo ekalesia nei nei na namote kaju ae rate ungo Philippians ekalesia vahai na namoga hande mine ara asi kaju ueva avo ungo kiari. <sup>16</sup> Eto iji nei nei ainge na da Thessolonica ta pambuto mitie ujeje kogone ungo na na hondate ueva. <sup>17</sup> Eto na hande umbasi ue ke ae rate na ungota hande ta be avo puvurou umbava uje ere ona. <sup>18</sup> Eto nau hande peni vahai iketeve amina nau uje amo nembetija avoeto ere kaitena erevira, kivujo. Eto ungota hande iketeve embo Epaphroditus na umbuto puvija amo hande mune te avo iketeve avoeto God na osa ere ua avoeto na inono be ra. <sup>19</sup> Eto nau God na haja vaja usasa te Iesu Keriso ta jo ta mitia avo umbuto ungota degi ikau uhurovo ungota ujeje tapa irae aisuja. <sup>20</sup> Ungotenau God Mamo ta degi usasa daroho iresuja, Amen.

*Pekari ta ke*

<sup>21</sup> Eto God ta embomeni amo Iesu Keriso ta toho avoeto ere pekitona eto ungotenau namei kamei namote mitera amina ungo ere pekitora <sup>22</sup> Eto God ta embomeni tapa da eita mitera amite eto Rome ta titi jigari embo Caesar ta bande ta pure embopo amite tapa na ungo ere pekitora. <sup>23</sup> Eto ungotenau Bada Iesu Keriso ta hondate ari amo ungota degi iresuja.



## COLOSSIANS

### *Paul na da Colossae embomeni ta ahari kajena*

<sup>1</sup> Na Paul God ta uje avoeto Iesu Keriso ta apostero namote eto ungotenau namei Timothy te na <sup>2</sup> Ungo God ta embomeni da Colossae ta mitie Keriso tumota ereova amita degi ahari erevi ere kaitena. Eto ungotenau Mama God na hondate ari te peka te ungota degi ikasuja.

### *Paul na osa ue pari ena*

<sup>3</sup> Eto nangona ungo embo iji tapa pari ue ungotenau Bada Iesu Keriso ta Mamo God avo osa eora <sup>4</sup> Amo ungonna Bada Iesu Keriso avo tumota ue God ta embomeni tapa avo osa eova amita ke avo ijioere ingiora. <sup>5</sup> Eto God ta duru javotoho ai ta amo ungota degi do puvuresuja amita ke amo ungonna kiti ingito donda javotoho avo hotembitie God osa eto tumota ueva donda amo utu ita ungota javota nununga ari mitia. <sup>6</sup> Eto duru javotoho sigeto eneteto enda tapa ta pahua ai ta amo embomeni na javotoho ari neite kainte uhovora. Eto God ta hondate ari amita ke be avo kiti ke ingari iji ta eto puvuto eha oroho amo ungota eto enda tapa ta be eketo beto ereto peni vahai ere ua. <sup>7</sup> Eto ungotenau namei eto pure vahai embo Epaphras amo nango hondate eto ungota degi Keriso ta pure ena amina God ta hondate ari avo ungota degi ari ingari. <sup>8</sup> Eto amina ungota osa ari Ahihi Otohu na hande ikenu umbava amita ke avo etei ingito <sup>9</sup> iji tapa ungo avoembo pari eora amo God na ungo ari tapa do ava uje ere ua avo Ahihi Otohu na amita kiari peni be ungo ta degi ikau uhue be kiova pari ere ora. <sup>10</sup> Eto ungonna ari tapa deirami umbuto irova Bada na uje ere ua avo umbuto God ta kiari na pajito ari jajavotoho neite kainte ururovo God na kito osa aisuja. <sup>11-12</sup> Eto God na

amita sovera usasa te avo ikau ungonna sovera ue osaga kiari iji te amo mane beasova te ngahia eto iresova. Eto God ta embomeni na hoteto umbasora donda avo amina amita titi jigari degi aite simba ue mitia eto God na ungo donda avo umbari haite aisova jo ungota ta pure javotoho ena avoeto God osa ue tunga javotoho aisova pari erera. <sup>13</sup> Eto ungotenau jota pure javotoho ena amo God na ungotena mume ta sovera amina tipura embo na irarako ue mitiaetera avo oreketo umbuto amita osa ari meni ta titi jigari degi ta ikenu torea. <sup>14</sup> Eto God ta Meni na ungotenamo avoembo pure ena amo ungotenau ari sasapura na andirari avo bujekenu tambu ta pahuo ari sasapura avo hotembeto tona.

### *Keriso ta pure ta ke*

<sup>15</sup> Eto God amo embo ta titi na mane kiorate Keriso amo God ta tombu hajire vahai avo kiora. Eto God na amita Meni avo vahai kiti iketo donda tapa amo ambota ikena amo Keriso ta tu ta ikena. <sup>16</sup> Eto donda tapa utu ita eto enda ta, eto donda kiari haite eto kiari haite mane amo ahihi neite neite sovera te eto embo pepeni te titi jigirikari embopote ahihi pepeni tapa amo God na Keriso na hondate unu amiga ena amo Keriso avoembo ena. <sup>17</sup> Eto donda tapa irae pekota amo Keriso na mitiaetija eto donda tapa amo Keriso ta jota mitia amo amita irari degi be avoeto. <sup>18</sup> Eto God ta ekalesia ta sirota amo Keriso mitia avoeto ekalesia ta vasiri amo Keriso ta degi umbuora. Eto God ta Meni bugo Keriso amo donda tapa amita titi jigoja amburari ta jiginu vasiri te erena. <sup>19</sup> Eto God na umo eonga siriketo amita Meni ta degi amita tombu eto hajire eto ari vahai avo ikena. <sup>20</sup> Eto God na donda tapa iketo tona avo amita Meni na Mamo ta toho aja ue amita Meni ikenu i atahu ta ambuto peka umbunu donda tapa ututa eto enda ta amo God ta degi egerembea. <sup>21</sup> Eto ainge

nombo iji matu amo ungoni ari sasapura te hotembari sasapura te amo God ta kitoho avoeto auvari inono aera. <sup>22</sup> Te God na amita Meni ta amburari amina ungote namei eto God ta eto embota titi ta pehumba ambu ungota ari sasapura irae eto tongopa ambu otohu embopo ainge irova umbuto amita jota ere ikitia. <sup>23</sup> Eto ungote tapa aita torari haite asova te ungo Keriso ta duru matu ingito ke be ijieva avo be na jigito turi eto heteto tumota ue mane ejekasova te aita heteto irivujo. Eto na Paul duru javotoho hande ari embora eto duru amina sigeto eneteto enda tapa ta pahoi embomeni tapa na ere ingihera.

*Paul amo ekalesia ta pure ari embora*

<sup>24</sup> Eto na ungo embo osaga memenga hamo nau ta kogue mitena avoeto na tunga javotoho ereona. Eto ekalesia amo Keriso ta hamora avoembo osaga memenga kina aita osaga memenga nau amo kaju ano inono aisuja. <sup>25</sup> Eto God na ungota degi ari javotoho puvuroja amita ke sinderi te avo na ungo ekalesia ta degi hande ana God na umbuna. <sup>26</sup> Eto embo matu mitiaetera amita degi God ta ke ondikari mitouva avo nanena harikano ungotena amita embomeni ototohu na ingora na umbija. <sup>27</sup> Eto God na ke matu asi sirikena amo God na ke javotoho matu asi sirikena amo embo ta degi ondikari iriuja avo ungo enda nei embomeni ta degi ere harikitia ke amo Keriso na ungota jota iriuja avoeto ungo tapa God ta usasa ta torasova. <sup>28</sup> Avoembo embo tapa ta degi Keriso ta ke hande ere ora. Avoeto kiari neite neite ondekataro neite neite na embo ate poekitiroro Keriso ga kajueto kiari na pajito embo ainge eto God ta degi torasora avo ate ere poekitera. <sup>29</sup> Eto pure erevi asi ue amo kupi ambu ue Keriso na vasiri te sinderi na pure ana nau jota sovera ere ikitia amina pure erevi sove sove eto ere ona.

## 2

<sup>1</sup> Eto ungo te da Laodicea embomeni te eto embomeni isapamane amo nau tombu kiari eto nei kiae rate ungo avoembo pure ngahia eona avo ano ingova uje ere ona. <sup>2</sup> Eto ari ainge eona amo ungoni osa ari na embo vahai jo vahai ue siro pure ue God ta ke avo kito kogo ue tupo embo ainge ue God ta ke matu ondikari avo be kiova eona. <sup>3</sup> Eto ke erena amo Kerisora amita jota amo God ta kore ari dombo be avo mitia. <sup>4</sup> Eto na ke erevi ungota degi erena amo embo na ungota degi ke gamo poekeora avo ere taekitena eto ungoni enana ta ke mane ambo ambo aisova. <sup>5</sup> Eto ke be amo na ungota degi irae rate jo nau ungota degi mitia eto ungo Keriso tumota ue jo vahai na heteto miteva avo kogue tunga javotoho ere ona.

*Vasiri be amo Keriso ta degi mitia*

<sup>6</sup> Eto Keriso na ungota Bada eto ungo titi jigoga umbeva avoeto amiga kajueto ambo ambo evujo. <sup>7</sup> Eto i peni amita susu enda tu ta ikeoi beuja aingeko Keriso ta ari na pajito ungo ke matu ingihava avo ambo ambo ue tumota ari na sovera umbuto mitie osa pajire be evujo. <sup>8</sup> Eto enda embo ta kiari amo ohihi ta degi eto anera sasapura ta degi puvuja amita be irae amo Keriso ta ate poekari mane avoeto amina ungota hotembari andioi sapura euja avoeto kiari ainge avo be tovujo. <sup>9</sup> Eto Keriso enda ta puvuna amita jo ta amo God ta ari eto amita hajire tapa avo mitia. <sup>10</sup> Eto Keriso amo utu te enda te amita ahihi tapa sovera te amita titi jigari embo rate ungoni amiga kajueto vasiri be avo amita degi umbuto miteva. <sup>11</sup> Eto ungo amo Keriso ga kajueto hamo ta kakamba umbari embomeni be ra. Eto kakamba amo embo ta ingeni na ae rate Keriso na ena, amita be amo ungo ta hamo ta ujeje ta titi jigari sapura amo matu tiukenu irae ena avoeto ari sasapura amo ungota degi sovera ambura. <sup>12</sup> Eto

ungo bapataito ueva ai ta amo ungo Keriso ga kajueto use ta toreto God ta sovera avo tumota ururave amina ungo Keriso ga tapa jiginu vasiri te ereto mitovova. <sup>13</sup> Eto iji matu amo ungo enda nei embo God ta ke pepeni umbae embomeni avoeto ari sasapura na ahihi amburari embomeni rate God na Keriso te ungote tapa ta degi vasiri eha ikena. Eto God na ari sasapura ungotenau tapa avo hotembeto touja. <sup>14</sup> Eto ungotena amita ke isasaraho te pepeni te tapa ungotenau vasiri tapa avo simba ara ikena te ke tapa avo agi ae ue peive eora te God na avo hotembeto toto ke tapa avo umbuto Keriso ta i atahu ta hamo ta teto enu irae ena. <sup>15</sup> Eto i atahu ai ta amo Keriso na ahihi sasapura neite neite sovera te amita degi isoro eto nembeto enana avo amita tipura embo ke ijie enana avo tunga ta tigitu umbuto embo tapa ta titi ta pahunu kito Keriso jakeka ea. Eto embona ungo pehumba ue <sup>16</sup> ungoni iji ototohu rete hariga eha ta pondo rete jangu indari iji rete amita ke pepeni neite neite avo agi ava aisora avo ingito ingarako evujo. <sup>17</sup> Ari tapa ainge amo ke be mane teho aririvo ainge rate ari be amo ambota puvourou kesova. Eto ambota kesora amo Keriso avo kesora. <sup>18</sup> Eto embo nei na eture ta ari neite neite kiuja avoeto ungo titi jigesi ke ijie meni isapa sira eto ari sokova ue anera neite neite jakeka ava ate poekeuja embo avo be tovujo, eto embo ainge amita ke amo be mane sokova amina keniga euja. <sup>19</sup> Eto Keriso amo ungotenau siro rate enana na amita ke avo matu egikari ra te Keriso ta titi jigari be amo ungotena Keriso ta hamo amina indari javotoho be Keriso ta degi umbuto indie vasiri javotoho ue God ta simba ari na javotoho pajiora.

*Keriso ga amburari eto Keriso ga irari*

<sup>20</sup> Eto ungo enda ta hotembari neite neite matu agi ere uaeteva te ungo Keriso ga amburari avo God

na ere kogua avoeto enda ta hotembari na ungo ehako mane peika tika aisuja te ungo do avoembo embo javotoho asi enda emita ari peni ke ijie iriove? Eto do avoembo enda ta ke pepeni neite neite amo agi eove? <sup>21</sup> Eto embomeni na ke einge eora amo, “Donda mane tame asoa,” eto, “Donda amo mane indesoa,” eto, “Donda amo mane jigeso,” <sup>22</sup> ke ainge eora amo teho enda ta donda jigama eoi irae euja amita ke ra eto ate poekari ainge amo teho enda embo ta ate poekari ra. <sup>23</sup> Eto nei amo ari ainge amo enda embo ta be kiari na arako amina tumotepain sokova sakova ara engekeora nei meni isapa sirako ara eora eto ungotenau hamo ta degi memenga ikau kiora eora rate ke pepeni amina ungotenau hamo mane simba aisuja te ai ta hamo ta ujeje sasapura amita gamo tambuora.

### 3

<sup>1</sup> Rate ungo amo God ta titi ta Keriso ga tapa vasiri te erari embopo avoeto ungota hotembari jo tapa na utu i ta ari avo be hotembevujo. Ai ta amo Keriso na God Mamo ta avo arumba peni amita ingeni be hena ta arumbeto mitia. <sup>2</sup> Avoeto enda ta ari toto ungota hotembari na degi amita ari avo eteteto hotembevujo. <sup>3</sup> Eto ungo Keriso ga amburari embopo rate ungota vasiri be amo Keriso, God ta degi mitia amita jota nununga ari mitia. <sup>4</sup> Eto Keriso amo ungota irari be avoeto Keriso egerembeto puvourou amo ungo amite tapa usasa javotoho be ai ta puvuresova.

*Irari matu eto irari eha amita ke*

<sup>5</sup> Eto enda ta ujeje sasapura ungota hamota mitia avo tevujou amburore, eto ari amo erevira tiha paiha oine sasapura neite neite ue ino na arako uje ue ari sasapura neite neite ue donda umbasi ue tunga ta hotembeova (amo donda rate embo ta God euja.) <sup>6</sup> Eto ainge eora embomeni amo God ta ke agi ae avoeto God na tumo peni vahai be aisuja. <sup>7</sup> Eto

ari ainge amina ungo titi jigihoi ere uaeteva <sup>8</sup> Te ari ainge amo eha oroho emikote tovujo irae ai. Eto ke amo tumo te tini kambari te embo nei uje ae ari te urumbari te ke sasapura masa te amo ungota pe ta eto ivivi ta mane puvuresuja. <sup>9-10</sup> Eto ungo na ke sokova mine ara mane aisova te ari tapa matu hamo ari avo toto ari eha eto hamo eha asuketo miteva amo no hamo eha ari embo God amina no jota pure ururou ungo amita tombu hajire vahai ue amita ari be kesova. <sup>11</sup> Eto ari amita heta amo enda nei embo rete Judea embo rete hamo kakamba umbari embo eto hamo kakamba umbae embo rete ke nei ari embo rete kiari kiae embo rete tapa amo Keriso ta titi ta amina titi jigihoi amita jota iriora. <sup>12</sup> Eto ungo amo God ta embomeni avoeto God na osa ue amita toho ava siriketo umbuna avoeto unгона ari erevi amo hambo turarako evujo. Eto hamo ta turasova amo jo ari, hondate ari, meni isapa sira ari, sasaimbari, embo osa vesa ari, <sup>13-14</sup> Eto ari ainge avo tureto ue tapa amita hamota amo osa ari amina tatapeketo umbasuja. Eto embo osa vesa ari amo erevira, embo amuna no degi ta tumo ue ke au ingito amo hotembeto tojo eto Bada na ari no hotembeto touja ainge nombo hotembeto toari mine ara evujo. <sup>15</sup> Eto God na ungo tapa toreketo umbei hamo vahai ere ova avoeto Keriso ta peka na ungota jo simba aja ue God osa evujo. <sup>16</sup> Eto Keriso ta ke javotoho neite neite ari amina ungota jota iroja umbuvujo. Eto kiari javotoho amina onde katari mine ara evujo. Eto God ta ke ta 'psalms' kajari mitia amite eto ekalesia ta haveni ototohu kajari mitia amite na God ta degi haveni ijie jo tapa na osa osa evujo. <sup>17</sup> Eto ungo ari do asova eto ke do aisova amo Bada Iesu ta javota eto amita Mamo God osa evujo.

#### *Ekalesia ta irari amita ke*

<sup>18</sup> Eto ungo pamone tapa ta degi ke erena amo ungo Bada avoeto ipone ta ke agi evujo. <sup>19</sup> Eto ungo ipone

na airi ta degi ngahia mane aisova te osa evujo <sup>20</sup> Eto ungo meniundi na Bada ta ari be avo ue ungota emone mamone ta ke avo iji tapa agi evujo. <sup>21</sup> Eto ungo emone mamone na meniundi isembeove pure peive eora avoeto isembari isapamane avo tovujo. <sup>22</sup> Eto ungo embo nei ta ke agi ue pure ari embomeni na ungota pure titi jigari embopo ta ke tapa avo agi evujo. Eto ungota pure simba ari embo mitie ungota pure kogue osa aja mane aisova te iji tapa pure ue Bada osa eova avoeto evujo. <sup>23</sup> Eto ungo pure tapa do aisova amo embo avoembo ae rate Bada avoembo pure ere ona ke ainge ijie jo tapa na pure evujo. <sup>24</sup> Eto ungo erevi be hotembevujo, ungota pure titi jigari embo be amo Keriso eto amita embomeni na hoteto umbasora donda amo unгона umbasova. <sup>25</sup> Eto God na embo tapa amo teka vahai ta ari sirikitie ari sasapura ari embo tapa ta hajire amo amina ikau kesora.

## 4

<sup>1</sup> Eto ungo embo nei ta titi jigirikari embopo na ungota pure embopo avo ari jajavotoho na simba evujo. Eto ungo be hotembevujo eto embo ungo ainge amo ungota titi jigari embo amo utu i ta mitia.

#### *Onde katari ke*

<sup>2</sup> Eto pari kaiketo evujo. Eto pari ue hotembari na ke ijie God osa evujo. <sup>3</sup> Eto pari ue dago hotembitie Keriso ta ke amo matu ae ingae avo God na dagota pe handekau embomeni ta degi ke aro ingora pari evujo. Eto na Keriso ta pure avoembo tipura etena. <sup>4</sup> Avoeto na God ta ke be ingari haiteko avo harikano ingesora avo God na uje ere ua avoembo pari evujo. <sup>5</sup> Eto enana Keriso ke be ae embomeni ta degi ari ungota tapa avo hotembari na ue iji javotoho jigama evujo <sup>6</sup> Eto enana ga umoro ue ke javotoho aso kambue gamo euja aingeko titiritiro enana na eto ingari aro ke deirami ijiro ke be kesora avo evujo.



*Pekari ta ke*

<sup>7</sup> Eto ungotenau namei be Tychicus amo ungotenau pure vahai embo eto Bada ta pure embo javotoho amina duru nau tapa ungota degi au ingesova. <sup>8</sup> Na avoembo Tychicus ungota degi ikano pambasuja amo amina nangota irari do aingere avo ungota degi ke na avo kakaja ururou ungota jenge erasuja. <sup>9</sup> Eto ungota ekalesia vahai embo Onesimus amo ungotenau namei hondate ari embo amina embo Tychicus ga ungota degi pambuto nangota degi ari do pu-vija avo au ingesova. <sup>10</sup> Eto nei embo Aristarchus namote tipura ere ua amina ungo ere pekitia eto nei Barnabas ta simbo Mark amina ungo ere pekitia. Eto Mark ungota degi pambau pekitie umbava amita ke matu etere ingihava, aravora. <sup>11</sup> Eto embo Joshua, amita javo nei Justus, amite tapa ungo ere pekitia. Eto embo nei heriso nei vahai erena amo Judea embo na pere God na embo titi jigesuja amita ke hande ue namoga pure ue hondate ari javotoho uore jo nau jamo jamo ere ua.

<sup>12</sup> Eto ungota ekalesia embo nei Epaphras amo Iesu Keriso ta pure ari embo amina ungo ahoka ue ungo embo pari ngahia euja amo ungo na God ta uje tapa agi ue Keriso ta ari na pajito inono eto heteto irova God ta degi iji tapa pari euja. <sup>13</sup> Eto amina pure ngahia ungoembo eto da Laodicea te da Hierapolis te embomeni avoembo ere ua amo titi nau na ere kogona. <sup>14</sup> Eto ungotenau tunga humbari embo sivo ikeuja embo Luke amite eto Demas amite na ungo ere pekitora.

<sup>15</sup> Eto nangota namei kamei da Laodicea ta mitera amite eto pamone Nympha amite eto ekalesia amita bande ta torukeora avo ere pekitona evujo ingore. <sup>16</sup> Eto ahari erevi umbuto etekano irae au amo umbuto pambuto da Laodicea aita etekevujō ingore. Eto ahari nei amo da Laodicea namei kamei na ungota degi ikaro umbuto etekevujō. <sup>17</sup> Eto embo Archippus ta degi ke einge

evujo, “Umo Bada ta pure vahai uha avo ejo irae ai,” ainge evujo. <sup>18</sup> Eto na Paul nanena pekari ta ke erevi ingeni nau na ere kaitona, Na Paul nanena ungo ere pekitona. Eto na ‘chain’ na pundera avo ungo jenambu avojo. Eto God ta hondate ari ungota degi iresuja.

## 1 THESSALONIANS

*Paul ta ahari Thessalonia ekalesia ta degi kajena*

<sup>1</sup> Oio da Thessalonia ekalesia embomeni God Mamo ta, eto Bada Iesu Keriso ta toho uho, dago Paul te Silas te Timothy te aingeto ungota degi ahari erevi ere kaitera kivujo. Eto God ta hondate ari te peka te ungota degi iroi.

*Da Thessalonia embomeni ta tumota ari*

<sup>2</sup> Eto nangona ungo avoembo God osa ue iji tapa pari eora amo ungo na Iesu Keriso tumota ue amita pure avo ngahia eto namei kamei osa ue ari javotoho ueva avo ungotenau mama God ta degi pari na ijie hotembeora, <sup>3</sup> eto ungo kupiambu ue ungotenau Bada Iesu keriso egerembeto puvuresuja avo jo tapa na simba ere ovova avo dago na hotembeora. <sup>4</sup> Eto dago ere kogora amo ungo nangota namei kamei avo God na osa ue amita toho ava siriketo umbuna <sup>5</sup> amita be amo nango ungota degi Iesu Keriso ta duru javotoho hande uera amo ke na pere ae rate ahihi otohu ta sovera na ungota jo ta enetenu ke be ava.

Eto dago ungote mitie ari tapa ungo avoembo do uera amomo do aingere amo ungo kiarira.

<sup>6</sup> Eto ungo na osaga memenga kogue toae rate Bada Iesu te dago te avo ambo ambo asi God ta ke avo uhove ahihi Otohu na ungota tunga jamo ari iketei osa ove <sup>7</sup> enda Macedonia embo te enda Achaia embo te God ke be erera amina ungota ari avo kogue ambo ambo ue ere uhora. <sup>8</sup> Eto ungo na Bada ta ke avo hande ove enda Macedonia te Achaia te pere mane rate ungo God tumota eova amita duru avo hande ore enda tapa ta sigeto ere pahua avoeto dago ke avo ehako mane aisora. <sup>9</sup> Eto nango na ungota degi pahuore dago kito pekitie dagota ke avo ingihe ungota god ingeni na ari

avo toto jo haperekeoi God vasiri te amita ke avo agi eova amo embo isapamane na eore dago na ingiora. <sup>10</sup> Eto God na amita Meni Iesu enu vasiri te hoeto pambuna avo utu ta eto puvuto ungotena orekitie mitova amo iji ke katari puvurou ungotena orekasuja avo ungo simba ere ovova.

## 2

*Paul na da Thessalonia ta pure do ena*

<sup>1</sup> Rate nau namei kamei ungo kogova amo dago ungota da ta teho pambae rate pure uera amita be avo uhaja. <sup>2</sup> Eto dago ungota degi pambae kiti ta da Philippi ta pahore embo na urumbitore osaga kogara te toae ungota degi pahore God na enu ando ngahia enu kitoho embopo ngahia ore God ta ke javotoho avo ungota degi hande uera.

<sup>3</sup> Eto dago ke hande eora amita ke be amo dago na ke sokova na mane eto dagota uje ta hotembari na mane eto ke gamo na poekitie ari ke mane <sup>4</sup> rate God ta ke javotoho avo dago na embo ta degi hande ara siriketo ikena avoeto God ta ke avo teto haito ae rate God na dagota jo te hotembari te kogue tunga javotoho aja amita ke avo hande eora. <sup>5</sup> Eto dago ungota degi ke ijiroro ungo na ingito nango osa ava ae eto hajae vajae ikavo umbasi ue ae ra amo God na kiarira. <sup>6</sup> Eto dago Keriso ta ke hande ari apostero be ra te dago embo peni ke ijie ke ae eto ungo na eto embo tapa na jakeka ava ae <sup>7</sup> ra te pamone na meni eha simba euja aingeko ari ejeha be ungota degi uera <sup>8</sup> amo ungo osa javotoho be ue God ta ke javotoho te dagota jo te hotembari te tapa ungota degi hande uera amo ungo dago tunga be uhava avoeto. <sup>9</sup> Eto dagota namei kamei, dago pure ngahia uera avo hotembevujo. Eto dago God ta ke javotoho avo hande ore amo ungonangota indari avoeto osaga kiova avoeto mume te iji te pure ngahia uera. <sup>10</sup> Eto dagota ari tapa ungo

God ke be ari embomeni ta degi uera amo hotembari heriso eto ae rate sapura irae javotoho pere uera amo ungote God te tapa kiarira <sup>11</sup> eto ungo kogova amo mamona meni ta degi euja ainge nombo ungo onde katitie sovera ari umbava ke ngahia na ijiera <sup>12</sup> amo ungo God na amita toho ke ijie au amita usasa peni ta iresova avoeto ari javotoho ue irirovo God na kito osa ai ke ainge onde katari ke ijiera. <sup>13</sup> Eto God ta ke erevi ingito uhava amo embo ta ke ra ainge ijie umbae rate ungo ke be ijie emo God ta ke ra ainge ijie uhava amo ungo ke be ari embopo ta jo ta ere papajitia avoembo dago iji tapa God osa eora <sup>14</sup> amo God ta ekalesia Iesu Keriso ta jo ta mitera amo Judea enda ta mitera amina eora ainge nombo ungo na ereova amita be amo Judea embomeni na ekalesia embomeni ta degi eo osaga te memenga te kia ainge nombo ungota da vahai embomeni na ore osaga ere kogova. <sup>15</sup> Eto Judea embomeni na God ta peroveta mamatu te Bada Iesu te tapa teo ambuvujekitio dago kurumbeo pambua. <sup>16</sup> Eto ari ainge ue God ta uje avo hotembae ue dago na enda nei embomeni ta degi God na ari sapura orekasuja amita ke avo hande ere ora avo uje ae ue embo tapa ta degi kitohe ue ere taekitora. Eto ari ainge ere ora amo enana te degi ari sapura hamo ta hamo ta ere ua avoeto eha iji tutumo emita God na enana ta degi tumo ere ua avoeto hajire ikau kesora.

*Eto Paul na enana ga umoro aisi ujena.*

<sup>17</sup> Rate nau namei kamei, Judea embomeni na etere iji isapa dago ungota degi pambae amo dagota jo te hotembari te tapa avo ungota degi mitia te dagota hamo na naingeto pambuto ungote tombu mine kia aro avo nango uje isapamane ere ovora <sup>18</sup> te na Paul nanena iji nei ainge eto kito pambasi ereona te Satan na na peikitoi pambae mitena.

<sup>19</sup> Eto ke erena amo Bada Iesu na egerembeto puvurou dago na amita tombu ta heteto mitie ungo avoembo tunga javotoho be aisora, amo Iesu na di kogombari umbuto dagota siro ta asukau sago keisora, <sup>20</sup> eto di kogombari dagota erena amo ungora.

### 3

<sup>1</sup> Avoeto nango iji koso be ungota ke ingae ue teho iresora avo inono ae ua avoeto dago heriso da Athens ta mitie <sup>2</sup> ungotenau namei Timothy amo God ta pure ari embo Keriso ta ke javotoho hande euja avo ungota degi ikaro pambaja ke sirikitera <sup>3</sup> amo ungo osaga memenga ere kogova avoeto egikeova Timothy ungo onde katitirou sovera umbuto God tumota be ava iketere pahaja. <sup>4</sup> Eto ungo kogova amo dago ungote mitie ke etere ingihava amo osaga te memenga te kiora God na uje ere ua amo mane taekasuja te kesora ainge ijiera avoeto osaga ere kogova. <sup>5</sup> Avoeto na ungota duru ingae iji koso iresona avo inono ae avoeto ungo Satan ta sovera na engekeoi egikeove dagota pure avo ajaja eora Timothy na ungota tumota ari do aingere avo kioja iketere pahaja. <sup>6</sup> Eto Timothy na ungota degi pambuto ungota vasiri kito egerembeto puvuto ungota osa ari te tumota ari te peni vahaira ainge etei ingito tunga javotoho ere ora eto ke nei etei ingera amo ungonaga dago hotembeto osa ue ehako dago kesi uje ereova ainge nombo dago ungo kesi uje ereora. <sup>7</sup> Avoeto dagota namei kamei dago osaga te memenga te kogora te ungo God tumota be ereova avo ingito tunga javotoho ue mitera. <sup>8</sup> Eto ungo Bada egikae sovera te tapa iresova amo dago ta irari javotoho iresuja. <sup>9</sup> Eto dago na ungo avoembo ungotenau Mama God ta tombu ta mitie tunga javotoho be ereora, eto ungo avoembo God osa isapamane ue <sup>10</sup> ungo tombu mine kia ue aro ungota tumota ari avo javotoho be aisuja ainge iji te mume te pari ta ke

avo eora. <sup>11</sup> Eto ke nei pari ta eora amo nango na ungota degi pambasora degi amo ungotenau Bada Iesu Keriso te Mama God te na sirikau tambu aisuja. <sup>12</sup> Eto nango na ungo osa eora ainge nombo Bada na ungota osa ari ungo ta degi eto embo tapa ta degi irerembeto peni vahai ururou <sup>13</sup> ungota jo avo God na au sovera ari puvutuhourou ungotenau Bada Iesu na amita embo ototohu ga egerembeto puvurou God Mamo na ungo kogoue amita toho avoeto ari sasapura irae teho kesuja avo pari ta eora.

## 4

*Vasiri javotoho God na kito osa aisuja.*

<sup>1</sup> Eto, nangota namei kamei, ke nei amo ungo naingeto God ta uje avo ue iresova avo nangona ungota degi ate poekitare ingito ambo ambo ereova eto ari avo be jigito kogoeto ava jo tapa na Bada Iesu ta javo ta erera. <sup>2</sup> Eto ungo ari do jigama ava Bada Iesu ta javota ikitara amo ungo kiarira <sup>3</sup> amo ungo God ta toho ue otohu ava uje ere ua avoeto tiha paiha avojo. <sup>4</sup> Eto ungota ae jimbasaova amo nombo be ra ainge ijie otohu ue <sup>5</sup> God kiae embomeni na ungota hamo ta ujeje avo hotembitie eora ainge avojo. <sup>6</sup> Eto ungota namei ta ae amo amita avoeto namei ta degi sapura avojo.

Eto ke peni be ungota degi matu ijiena amo eto ungo na ari sapura erena erevi ainge aisova amo Bada na ungota degi hana kiari ikasuja. <sup>7</sup> Eto ari tongopa sasapura ara siriketo umbae rate ari otohu ue amita toho ara God na umbuna. <sup>8</sup> Eto God Ahihi ikari embo amina ungota degi Ahihi Otohu ikeuja avoeto embo amuna ke erena erevi peive euja amo embo ta ke mane rate God ta ke avo peive euja.

<sup>9</sup> Eto nangota namei kamei. Ungo osa mine ara ava God na ate poekitia avoeto ke nei nanena mane kajasona, <sup>10</sup> eto ke be amo ungota namei

kamei enda Macedonia jo ta avo osa ere ova te nau namei kamei, ari avo jo tapa na ava penunu erera. <sup>11</sup> Eto irari no avo umo eonga tunga iketo eto kogoeto simba ue tunga jamo jamo te irivujo. Eto ungo na ava ijiera ainge nombo ungota ingeni na indari umbari pure ue embo nei ta degi penunu ae ururovo <sup>12</sup> embo nei ekalesia ta kaju ae mitera amina ungo kogoue jakeka aisora.

*Bada ta puvurari*

<sup>13</sup> Eto dagota namei kamei ungo ke erena be ingova uje ere ora amo enana Iesu ke be ijie ambuvujekea embomeni amita degi do puvuresuja avo aro ingihe God ke be ae embomeni na osaga peni vahai kogoue sisi sasi eora ainge nombo eova aro ingova erera <sup>14</sup> amo Iesu ambuto vasiri te erena avo ke be erera eto ainge nombo embo ambuvujekari amo God na Iesu ta degi au ingito au vasiri te eraro amiga tapa puvuresora. <sup>15</sup> Eto Bada na ke ena avo ungota degi erera amo ungotena vasiri te mitiroro Bada egerembeto puvurou embomeni ambuvujekari avo kiti vasiri te erasora. <sup>16</sup> Eto God ta anera peni amina jajage ijirou God ta huin hukitirou Bada na utu i ta eto beto puvuresuja. <sup>17</sup> Eto Keriso ta javo ta ambuvujekari embomeni kiti ereto pahuroro ungotena vasiri te enda ta irari embopo amite tapa avo God na sau eto umbuto oje ta ikau ojega tapa i ta bitito Bada utu i ta tambuto Bada ga tapa daroho iresora <sup>18</sup> avoeto ke erena erevi ke mine ara eto ingihe tunga javotoho evujo.

## 5

*Bada ta tombu kesi nununga ue irivujo.*

<sup>1</sup> Eto nangota namei kamei ari erevi iji deina puvurou kesora amita ke amo ungota degi ahari ta mane kajasora. <sup>2</sup> Ungo matu kiova amo Bada ta puvurari iji kombu te amo pegene embo mume jo ta puvuja



ainge nombo puvuresuja. <sup>3</sup> Eto embomeni na “Eha amo iji javotoho peka ta mitera,” ainge ijiroro ari sasapura ta isoro peni sau be puvuresuja amo pamone na meni umbasi ue hamo memenga titimbeuja ainge nombo puvurou kogue oju tiumbeto pambuto ondikari degi avo irae be ra. <sup>4</sup> Rate nau namei kamei, ungo mume ta irari embomeni mane rate iji ta eto usasa ta meniundi avoeto iji kombu na ungota degi pegene embo na puvuja ainge nombo mane puvuresuja. <sup>5</sup> Ungotena mume ta toho mane avoeto embo nei na evuora ainge avojo, <sup>6</sup> rate ereto titi kundeto kogue irivuho. <sup>7</sup> Eto embomeni evuora amo mumete evuora, eto umo indiore titivi euja amo mumete euja <sup>8</sup> te ungotena iji embopo avoeto siro jigama ue hotembari javotoho ue isoro embo na beha ingeni na peiketo jigiuja ainge nombo tumota ari osa ari avo be jigesora, eto God na ungotenau ari sasapura oreketo umbasuja amo ungotenau siro orekari kope mitia avo hotembeto tunga javotoho aisora. <sup>9</sup> Eto God na ungotena orekasuja ke amita be amo ungotena avo God na ungotenau ari sasapura avoeto amita tumo kiora ijie umbae rate Bada Iesu Keriso na ungotenau ari sasapura oreketo umbau amita toho ara umbuna <sup>10</sup> avo eto ungotena teho irorote mo ambuto iroro Iesu puvurou amiga vahaita daroho iresora avoeto ambuna. <sup>11</sup> Avoeto ungo ere ova ainge pere ue ke javotoho mine ara ijie osa kageni ue sovera ari umbuvujo.

*Onde katari te pekari te ta ke.*

<sup>12-13</sup> Eto dagota namei kamei ungota degi ke erevi erera amo Bada ta javo ta pure ere ora embo ungotemitie onde ere katitera embo avo pepeni ke ijie osa evujo enana ta pure avoeto. Eto tini kambari avo, teho peka ta irivuho.

<sup>14</sup> Eto dagota namei kamei, ke erevi ava erera amo kupi pegogo embomeni avo onde katevuho, eto sovera ae ere ora avo hondate evujo,

eto jopapa ere ora avo ke avo ando ngahia ururou embomeni amita degi tumo sausau mane aisova. <sup>15</sup> Eto embo na ari sapura ungota degi au kito mine ungo na amita degi ari sapura mine avojo, eto iji tapa ari javotoho embo tapa ta degi mine ara evujo. <sup>16-17</sup> Eto iji tapa tunga javotoho ue iji tapa pari evujo. <sup>18</sup> Eto iji nei javotoho puvurou amo osa evujo eto iji nei sapura puvurou kito amo God osa evujo amo ungo Iesu Keriso ta toho na ainge ava God na uje ere ua.

<sup>19</sup> Eto God ta ahihi otohu na ungota jo ta i evekarako ere ua avo seikavojo. <sup>20</sup> Eto embo na ke emo God ta ke ra ainge ijie au ingito sokova ke mane asova <sup>21</sup> te ke tapa avo eto kito ke be davore sokova davore avo kito ke be avo jigama ue <sup>22</sup> ke sokova nei te nei te tapa tovuho.

<sup>23</sup> Eto pari ta erera amo God, peka ikari embo amina au ungota jo tongopa irae au ungo otohu aisova. Eto God na au ungota ahihi te hamo te hotembari jo te tapa javotoho au pehumba ari inono ae ururovo Bada Iesu Keriso puvuresuja. <sup>24</sup> Eto ungo siriketo amita toho ava umbuna embo amo tumota ari haite avoeto erena amo aisuja. <sup>25</sup> Eto dagota namei kamei, dago avoembo pari evujo. <sup>26</sup> Eto namei kamei tapa avo mune tavo ue pekevujho. <sup>27</sup> Eto Bada ta javo ta erena, ekalesia namei kamei tapa ta degi ahari erevi etekevu ingore. <sup>28</sup> Aravora, ungotenau Bada Iesu keriso ta hondate ari avo ungota degi iresuja.

## 2 THESSALONIANS

*Paul na da Thessalonia ta ekalesia ta degi ahari kajena*

<sup>1</sup> Eto na Paul te Silas te Timothy te aingeto ungotenau Mama God te ungotenau Bada Iesu Keriso te ta toho uho ekalesia da Thessalonica ta miteva amita degi ahari erevi ere kaitera, <sup>2</sup> Eto ungotenau Mama God eto Bada Iesu Keriso na ungota degi peka te hondate ari te ikasora.

*Keriso na puvuto embota ari sirikasuja*

<sup>3</sup> Eto nangota namei kamei, ungoembo God ta degi iji tapa osa ere ora amo ungota degi God tumota ari eto osa mine ara ari na pajito peni vahai ere ouva avoeto osa ere ora. <sup>4</sup> Eto ungota kitoho embona ungo kesira ore memenga te osaga te ere kogova, eto kogue amo God toae rate ke be ijie ngahia na heteto miteva avoeto nangona ke avo God ta ekalesia nei nei ta degi hande ue tunga javotoho ere ora <sup>5</sup> Eto ke erevi tapa ai ta ere kogora amo God ta ari sirikari amo ke be pere eto amita tutumota amo ungo na God ta titi jigari degi ta toreto iresova, eto osaga memenga ere kogova amo ke avoembo ere kogova. <sup>6</sup> Eto God na ari javotoho erevi aisuja amo enana ungo kesira uore osaga memenga kiova avoembo amita degi amo God na osaga memenga mine ikau umbasora <sup>7-8</sup> Eto ungo osaga ere kogova ungota degi eto nangota degi tunga jamo ari ikau umbuto jangu indie iresora. Eto Bada Iesu na amita anera sovera te i peri te amiga utu i ta eto puvuto Bada Iesu ta duru javotoho amita ke agi ae embomeni amita degi hana kiari ikau kogue <sup>9</sup> amburari ta memenga iji darohota kogue iresora te Bada ta irari degi usasa te ai ta mane torasora. <sup>10</sup> Eto Iesu puvuresuja iji te amo amina amita ke be ari tumota ari embomeni ta degi otohū ari te jakeka ari te

ikau umbasora. Eto ungonā dago ta ke hande ore ingito ke be ijieva avoeto ungonā enanaga tapa degi ai ta asova. <sup>11</sup> Eto dago ari ainge avoembo ungo hotembitie iji tapa pari eora. Eto God na vasiri be ikau umbuto irova ungo jage eto umbuna avoeto ungo avo umbari haite ava pari eora. Eto God na amita sovera na ungota jo ta pure ururou ungonā embo jajavotoho asi uje eto God tumota be ava pari ere ora. <sup>12</sup> Eto ungo ainge aisova amina Bada Iesu ta javo avo nombo be ururou amina ungota degi ikasuja amo God eto Bada Iesu Keriso ta hondate ari na ari avo umbasova.

## 2

*Ari sapura ta keniga embo be*

<sup>1</sup> Eto Bada Iesu Keriso na egerembeto puvuto ungotena tapa toreketo umbasuja amita ke be avo ano ingivujo. Eto nau namei kamei <sup>2</sup> embomeni na ke sokova na Bada ta iji matu puvija ainge ijiove ingiova rate ke amo be mane avoeto ke avo ingovojo. Eto ke amo nangota pe na ari ke eora eto ahari ta kajari ke eora rate ke avo be hotembavojo. <sup>3</sup> Eto Bada ta iji puvuresuja amita kitita amo embo isapamane na God egikasora amita ijite amo ari sapura ari embo be avo puvuresuja. (Eto embo amina Satan memenga kesuja degi ai ta hana kesuja.) <sup>4</sup> Eto God ke pepeni Sinena Puriha Ari Embo amina puvuto God jakeka ari donda tapa avo sapura ke ijie umo eonga embo peni vahai ke ijie donda tapa ta hamota hetasi uje ue God ta Temple Otohū aita toreto umo eonga God ke ijie arumbasuja. <sup>5</sup> Eto ungo be hotembevujo, na ungotē mitie ke erevi tapa etene ingihava. <sup>6</sup> Eto ari erevi matu puvuraetija te ari vahai na ere taekitia amo ungo kiarira avoeto iji inonota amo Sinena Puriha Embo amina puvurou ungotena tapa kesora. <sup>7</sup> Rate ari sasapura aingeko amo matu enda ta puvuto ore ungotena ere kogora rate simba ari

embo mitia avoeto ari sapura amina pajito peni be mane aisuja te simba ari embo avo iji tutumota toto pahurou ari sasapura amo peni aisuja. <sup>8</sup> Eto pahurou Sinena Puriha Embo amo arahata koguroro Bada Iesu na puvuto amita sago kiari te hoenge te na Embo amo tau beasuja. <sup>9</sup> Eto Sinena Puriha Embo sapura puvuresuja amita ari amo Satan ta ari vahai avo kesora amo ari sovera neite neite amo be mane sokova avo ururou kogue embomeni na kito haha puha ara <sup>10</sup> ue embomeni ambuto daroho irari degi ta osaga kesi pahora amo ari sasapura neite neite amina kiti umbasuja. Eto embo amuna amburesora amo God ta ke be avo osa ae avoeto God na mane orekasuja te amburesora. <sup>11</sup> Eto God na enana ta siro au ngahia ururoro God na Sinena Puriha Embo avo ikau puvuto ke sokova na ijirou ingihe mitima <sup>12</sup> God ke be ae rate ari sasapura uje isapamane eora embomeni amite tapa hana kito ambuto osaga kogue daroho iresora.

### *God na ungo oreketo umbasuja*

<sup>13</sup> Eto nau namei kamei ungo God na osa ere ua avoeto dago ungo embo iji tapa God osa eora. Eto God na embo oreketo umbasuja amo ungo avo kiti Ahihi Otohu ta sovera na oreketo umbau God ta ke avo tumota eova avoeto amita embo ototohu aisova. <sup>14</sup> Eto God ta duru javotoho ungota degi hande ore ingihava amina ungo jage eto umbuto Bada Iesu Keriso ta usasa avo ikau hoteto umbasova. <sup>15</sup> Avoeto nau namei kamei, ke be amo pe na ahari na hande ore ingihava avo be jigito heteto irivujo.

<sup>16</sup> Eto ungotenau Bada Iesu Keriso te ungotenau Mama God amite na ando ta sovera ari ikeoi umbuto ari javotoho avo puvuroja simba eora <sup>17</sup> Eto amina andota sovera ari ikau umbuto ari javotohote ke javotohote avo iji tapa aisova.

## **3**

### *Dago avoembo pari evujo*

<sup>1</sup> Eto nangota namei kamei ke tumota amo Bada ta ke hande ore sigeto eneteto ere pahua amo ungonahava ainge nombo embomeni na otohu ke ijie umbara dago ke hande ari embo avoembo pari evujo. <sup>2</sup> Eto ke nei amo embo nei uhoho na God ta ke amo ke be mane ke eora avoeto God na embo sasapura ta ingeni ta oreketo umbaja nango embo pari evujo. <sup>3</sup> Eto Bada amo tumota ari embo avoeto Sapura Embo peikitie ungo oreketo umbuto sovera ari ikau umbasova. <sup>4</sup> Eto ungo Bada na ere ua avoeto ungo tumota ere ora avoeto dago ere kogora amo ke matu eo ingito ere ovova eto ehako aisova. <sup>5</sup> Eto Bada na hondate ururou God ta osa ari avo be kogue Keriso ta hondate ari na pure mane toasova te kaiketo aisova.

### *Kupi pegogo eora amita ke*

<sup>6</sup> Eto nau namei kamei ungo Bada Iesu Keriso ta javota ari erevi ava erera, amo ate poeketere uhava avo ungota namei vahai na ambo ambo ae kupi pegogo ururou kito amo be tovujo eonga iroi. <sup>7</sup> Eto ungo kogova amo ungo naingeto iresova avo ate kitira uera amo dago ungote mitie kupi pegogo ae <sup>8</sup> Eto indari amo teho umbuto indae rate dago mine ikitie umbuto indimitara. Eto ungo osaga kiova dago ungo embo mumete ijite pure ngahia uera. <sup>9</sup> Amita ke be amo dagota pure ta mine avoeto ungota undurari amo teho umbaetera te ungota ate kitira ainge ava eto ari ainge amo uera. <sup>10</sup> Eto ungote mitie ke peni erevi ungota degi ikitara amo "Pure ae embo na indari mane indesuja."

<sup>11</sup> Eto dago ke nei eha ingera amo kupi pegogo embo amo ungote mitiera amina pure be ue keko namei ta degi ta ke kaikari erera avo ingera. <sup>12</sup> Avoeto Bada Iesu Keriso ta javota erera amo embomeni amina ari enana ta avo simba ue ingeni pure eto ungo eonga indari umbara erera. <sup>13</sup> Eto nau namei kamei ungo ari javotoho asi ue kupi pegogo avojo. <sup>14</sup> Eto ke ahari ei ta ere

kaitera amo embomeni nei uhoho ungote mitera amina agi ari uje ae ururoro kito amo tovujo eonga mitie me kiore. <sup>15</sup> Eto embo amo kitoho mane rate no namei rate ngahia na teho isembejo.

*Javotoho ari ta ke*

<sup>16</sup> Eto Bada amo ungotenau peka umbari embo avoeto iji tapa te ari tapa te amita peka ikau uhurovo amina ungote iresuja. <sup>17</sup> Eto na Paul ingeni nau na ke erevi ere kaitona. Eto na Paul nanena ungo ere pekitona, eto nau ahari kajari tapa amita tutumota amo einge kajeona, amo kikiva ta hajire naura. <sup>18</sup> Eto Bada Iesu Keriso ta hondate ari amo ungote iresuja.



## 1 TIMOTHY

### *Paul na Timothy ta ahari kajena*

<sup>1</sup> Na Paul ungotenau orekari embo God eto ungotenau hondate ari embo Iesu Keriso ta ke na apostel ereona <sup>2</sup> eto nanena Timothy umo Keriso tumota ere oa avoeto umo nau meni be ra eto no degi ta ahari erevi ere kaitena. Eto God mamō te ungotenau Bada Iesu Keriso te amita hondate ari te jo ari te peka te tapa no degi ta iroi.

### *God ta ke sokova na atepoekari avo Paul na Timothy ta harikena.*

<sup>3</sup> Eto na enda Macedonia ta pahue umo da Ephesus ta iroa ke ngahia na ijiena eto ehako asa ta iroa erena amo da ai ta embomeni na God ta ke avo ke sokova nei te nei te na ate ere poekitera avo ke ngahia na taekejo. <sup>4</sup> Eto enana amo ohihi ta hihi avo nombo ke ijie Moses ta ke pepeni amiga kaju ue ate ere poekitera avoeto embomeni na ingihe ju-june isapamane be ere ora rate God ta pure be amo God vahai tumota ue eora. <sup>5</sup> Eto ke erena emo embomeni na osa mine ara aisora avoeto erena. Eto osa ari amo jo javotoho eto hotembari javotoho eto God tumota ari na puvuja <sup>6</sup> rate embo nenei na ari erevi toto degi nei ta pahue ke gurou nei te nei te erera. <sup>7</sup> Eto enana God ta ke pepeni ate poekari embo asi uje ere ora te ke erera avo ingihe ke amo be pere ra ainge erera te ke do erera amo ungo be ingito kogoera.

<sup>8</sup> Eto ungotena kiarira Moses ta ke pepeni amo javotoho ra te embo na mane jigito aro sapura aisuja. <sup>9</sup> Eto ke pepeni amo embo javotoho avoeto ikae rate ke poekari embomeni te ke ingae embomeni te God kiae embomeni te ari sasapura embomeni te ke te jo te tongopa embomeni te e mamō jigae embomeni te eto embo tari amburari embomeni te <sup>10</sup> Eto tiha embomeni te embo nei

pegene eto embo nei ta degi koro ombuto umbari te ke sokova ijie ke be ari ke eora eto ari nei do tapa amo God ta ate poekari mane avoeto God na Moses ta degi ke pepeni avo ikarira. <sup>11</sup> Eto God usasa te amita duru javotoho avo nanena simba ana ikena.

### *Bada na Paul ta degi hondate ari ikena.*

<sup>12</sup> Eto ungotenau Bada Iesu Keriso na na tumota ari embo kito amita pure ana iketo sovera ari ikena avoeto na God osa eona. <sup>13</sup> Rate na iji kiti ta amo na God ta degi sapura ue tumo eto amita embomeni ta degi memenga ikeo kia amo na God ke be ae ue kiae kiae ere uaetena <sup>14</sup> avo God na kito jo enu ungotenau Bada Iesu Keriso ta tumota ari te osa ari te hondate ari isapamane nau degi ta overekena. <sup>15</sup> Avoeto ke erevi asona amo ke be pere asona, Iesu Keriso na ari sasapura embomeni oreketo umbasi enda ta puvuna. Eto na amo ari sapura embo be ra te <sup>16</sup> Iesu Keriso na na toae jo enu umbuna avoeto embo amuna Iesu Keriso ke be ijie vasiri daroho umbasi uje aisuja kito embo amina na kogue ke be ava umbuna. <sup>17</sup> Eto God vahai daroho irari ta King amo titi na mane kiora eto mane sari aisuja eto amita degi jakeka ari te usasa te daroho iresuja, amen.

<sup>18</sup> Eto Timothy nau meni umo God ta pure do asoa avo peroveta na matu harikari avo kito inena pure erevi ae ere ikitona. Eto pure erevi asi hotembitie God tumota be ue hotembari javotoho na isoro javotoho ejo. <sup>19</sup> Eto ari erevi embo nei nei na toto God tumota ari amo etere samuna be etija. <sup>20</sup> Eto ari ainge ere ora embo heriso amo Hymenaeus te Alexander te aingeto God ta javo eore sapura euja Satan ta ingeni ta toturutana amo ai ta kiari umbara uena.

## 2

*Naingeto God jakeka asora amita ke ra.*

<sup>1</sup> Eto ke kiti ta amo ke nau erevi ava erena, God ta degi penunu ari eto jakeka ari eto God ta hondate avoeto osa ari eto embo tapa avoeto pari evujo. <sup>2</sup> Eto ungotena peka ta tunga jamo ari na otohu ue ari javotoho pere ue irora enda ta kings te titi jigirikari embopo avoembo pari evujo. <sup>3-4</sup> Eto ungotenau Orekari Embo God amina embo tapa na amita ke be avo ingihiroro oreketo umbasi uje ere ere ua avoeto pari einge amo javotoho avoeto God na ingito tunga javotoho euja. <sup>5</sup> Eto God vahai ra te embo vahai orohuta mitie embo ta ke ingito God ta degi eoi ingito ke mine Iesu ta degi eoi ingito embo ta degi euja embo amo Iesu Keriso <sup>6</sup> amina ungotena vasiri te irora amita vasiri avo ikena amo iji inono ta ikenu puvunu kia. <sup>7</sup> Eto amita ari avo embo ta degi ke hande ana God na na amita apostel ikena amo ke sokova mane ke be pere amo na enda nei embomeni ta degi God tumota ari amita ke avo ate poekana ikena.

<sup>8</sup> Avoeto embo tapa tumo irae tini kambari ke irae teho ingeni otohu na i ta jigito pari ara uje ere ona. <sup>9</sup> Eto pamone na me kiari irae bo javotoho pere evora uje ere ona amo siro pupu ta kogombeto hambo tureto umbuto mane asora te <sup>10</sup> ari jajavotoho God tumota ari pamone amina ombuto aisora. <sup>11</sup> Eto pamone na jamo eto mitie kiari nei eha umbasuja <sup>12</sup> eto pamone na embo titi jigesuja eto ate poekasuja avo na uje ae ra te pamone amo jamo eto iresuja. <sup>13</sup> Eto amita be amo God na embo Adam kiti eto pamone Eve amo ambota ena. <sup>14</sup> Eto Adam avo Satan na engekae rate Eve avo Satan na engekaka enu sapura ena <sup>15</sup> Rate pamone amuna meni umbasi ue memenga kogoue osa ari te otohu ari te na siro pure ue God tumota ururoro God na kito oreketo umbasuja.

### 3

*Bishop te Deacon te enana*

*naingeto iresora ta ke.*

<sup>1</sup> Ke peni amo erevira. Eto embo na bishop ta pure asi tunga ikasuja amo pure peni umbasi uje aisuja. <sup>2</sup> Eto bishop aisuja embo amo ari einge eto iresuja. Amita irari nei avoeto embo na mane pehumba aisora. Eto amita ae jimbari amo heriso mane, vahai jimbasuja eto amita okope unduresi evivi sununu mane asuja te amita vasiri te ari te na embo tapa avo unditirou embomeni na kogoue osa aisora. <sup>3</sup> Eto nei amo ate poekari embo aisuja. Eto nei amo wine peni mane indesuja eto tumo embo mane aisuja eto jujune ke mane aisuja rate pekari, osari embo aisuja eto koro osa mane aisuja. <sup>4</sup> Eto embo amina amita ae te meniundi te omena javotoho ue meniundi na embo amo otohu ke ijie amita ke agi ara ate poekasuja. <sup>5</sup> Eto ke erena amita be amo embo amina amita ae te meniundi te titi jigae aisuja amo God ta embomeni ekalesia naingeto titi jigou? <sup>6</sup> Eto embo eha itiketo God ambo ambo ere ua amina bishop mane aisuja amo Satan utu ta ari sapura eto enda ta bena ainge nombo embo amina hotembari peni ue “na na” aisuja. <sup>7</sup> Eto bishop asuja embo avo ekalesia na pere mane ra te embo tapa na kito osa aisora eto ainge ae amo embo tapa na pehumba aisora eto pehumba amo Satan ta bage ra.

*Deacon ta irari amita ke*

<sup>8</sup> Eto embo amuna deacon aisuja amo embomeni na kito jakeka asora embo amina deacon aisuja amo ke sokova embo mane aisuja, wine peni mane indesuja, eto koro uje eto ke popoja na ijie mane umbasuja. <sup>9</sup> Eto jo vivisako te na God ta ke be avo jigama aisuja. <sup>10</sup> Eto embo amo eto kioro amita pure javotoho au kito aro deacon aisuja. <sup>11</sup> Eto ainge nombo deacon ta ae amo jakeka ari haitekora eto ke sokova sio sao mane aisuja eto amita bisi ta undurari ujeje mane asuja avo embo tapa na pamone avo kito ari haiteko

ke aisora. <sup>12</sup> Eto nei amo deacon aisuja embo amina ae heriso mane jimbasuja te vahai be jimbasuja eto meni hatira simba aisuja. <sup>13</sup> Eto embo na deacon eto pure javotoho ere uma sovera ari umbuto amo Iesu Keriso tumota be ururou avo God na kito kore aisuja.

#### *God ta ari amo peni bera*

<sup>14</sup> Eto na Paul nane no degi ta sausau pambasi uje ere ona <sup>15</sup> te ari nei na puvuto peikau kito amo inena God ta ekalesia embomeni ta irari inena kioa ahari erevi ere kaitona. Eto God vasiri te amita ekalesia amo eingera, embo na bande tutuvi enda ta koveto hurukeore turi euja ainge nombo ekalesia amo ke be ari ta tutuvi ra. <sup>16</sup> Eto embo na ke nei do mane aisora te God ta ari amo peni be amo erevira

“Keriso bisi te puvuna

Amita ari sapura irae avo ahihi otohu na kito embo javotoho ke ena.

Eto anera na amita vasiri ere koguatera.

Eto embomeni na amita ke enda tapa ta hande uo ke be ea.

Eto God na amita usasa ta jiginu bitina”.

## 4

#### *Paul na Timothy ta onde katari ikena.*

<sup>1</sup> Eto iji kombu auvitirou embo nei nei na God tumota eora avo toto ahihi sasapura ambo ambo ue enana ta ari sasapura avo jigama asora avo ahihi otohu na ke araha ta ere harikitia <sup>2</sup> eto ate poekari sasapura ainge amo hotembari heriso embomeni na hande ere ora amo enana ta jo vahai ae amo ari sasapura na andirari avoeto ari einge emo eora. <sup>3</sup> Eto embo na mane jimbara taekeora, eto indari nei nei avo mane indora taekeora te ke be amo God ta ke jigama ari embomeni na indari avo God osa eto indora God na ena. <sup>4</sup> Eto indari te o te tapa God na ena amo javotoho pere ra te nei do mane ajirekasora te God osa ue umbuto indesora <sup>5</sup> amo embo na osa ue God

ta ke ikari ai ta pari uore indari avo otohu eoi umbuto indiora.

#### *Iesu Keriso ta ke agi ari embo be*

<sup>6</sup> Eto ke erena erevi no namei kamei ta ao ingihiroro inena Iesu Keriso ta ke agi ari embo aisoa eto ate poekari javotoho ambo ambo ereoa amite eto God tumota ari amita ke be amina umo simba ururou irari javotoho aisoa. <sup>7</sup> Eto embo na God kiae ue sarika pamone na hihi tirarako ere ora avo be toto God ta ke avo eto kogue ere pahuma ando ejo. <sup>8</sup> Eto embo na amita bisi te hamo te sovera aja eto kogue pahuma ando eto enda ei ta iresuja amo uhajahate aisuja, te embo na God ta ari be jigama asi uje eto kito amo eto kogue pahuma ando eto enda ei ta mitie ari javotoho amita degi puvurou kesuja eto ari ambota amite tapa inono aisuja. <sup>9</sup> Eto na ke asona avo ke be ingito kogo ejo <sup>10</sup> amo ungotena God ke be ari embo te eto embo tapa oreketo umbari embo God vasiri te amita hajire amo puvurou kesora avo ungotena na simba ere ovora. <sup>11</sup> Eto ungotena ke aravo embo pure ngahia ue osaga ere kogora avoeto ke ere kaitena tapa erevi embo ta degi atepoekejo are. <sup>12</sup> Eto umo embo kerembo mane rate embo eha avoeto no ke te vasiri te osa ari te tumota ari te ari javotoho amina God tumota ari embomeni ta degi ate kitira ao kito embo be ke are.

<sup>13</sup> Eto na pambasi eto mitena avoeto inena embo ta titi ta heteto God ta ke eteketo onde katitie embomeni ate poekejo kiore. <sup>14</sup> Eto ekalesia ta embo okokose na ingeni hamo ta tembitio embo nei na umo God ta hande erevi umbuto pure ejo ainge ijinu ingia avoeto do ingiha amite tapa jigama ejo. <sup>15</sup> Eto tunga be iketo pure ngahia ururo no pure avo embomeni na eteteto ke be aisora. <sup>16</sup> Eto no vasiri te eto ke do ate ere poekitea amite tapa simba ue eto kogoeto jigijo. Eto ainge ururo umo te no ke ingiora embomeni te tapa orekasuja.

## 5

*Pamone doru te embo okokose te ke agi ue pure ari embomeni ta onde katari ke.*

<sup>1</sup> Eto embo okose ta degi ke ngahia mane asoa te no mama ke ijie ke seima ejo ingito ai. Eto embo ehaha amo inena namei kamei ke ijie ejo. <sup>2</sup> Eto pamone okokose amo aja ke ijie ejo, eto pamone eha amo no du emone ke ijie ari jajavotoho pere ejo. <sup>3</sup> Eto pamone dodoru meniundi irae eonga mitera avo ohare mamare ejo. <sup>4</sup> Eto amita meniundi te ahihije te mitera amina e te mamote epe jape simba mine ara asora amo God na kito osa aisuja. Amita be amo ekalesia ta ari amo javo vahai simba eora avoeto ari avo kito umbasora. <sup>5</sup> Rate pamone doru amo eonga mitie iji te mume te God tumota ue God na hondate aja pari euja <sup>6</sup> te pamone doru nei amo enda ta vasiri amita gamo avo uje euja amo matu amburari rate teho iriuja. <sup>7</sup> Eto ke erena erevi ao ururoro amo ganoka mane asora. <sup>8</sup> Eto embo amuna amita javo vahai te eto sasaga vahai na beari embomeni, avo simba ae toasuja amo God tumota ari amo matu toari eto God ke be ae embopo amo sapura eto embo amo sapura bera. <sup>9</sup> Eto pamone dodoru nei nei amo ekalesia na simba asi javo kakajekasora amita ari amo erevira. Eto amita jua amo kakane 60 eto nembari, amina amita ivu amburae eha irari iji te amo vasiri javotoho ere uatija <sup>10</sup> amo amita ari jajavotoho einge euja amo embo tapa na kiora amo meniundi simba ari javotoho eto embo undurari javotoho te eto God ta pure ari embo ototohu ta utu egeuja eto osaga kiari embomeni hondate euja eto ari jajavotoho neite neite euja avoeto pamone amo ekalesia na simba aisora. <sup>11</sup> Eto pamone doru nenei kerembo mane ehaha amo ekalesia na simba ara javo mane kakajekasova amo hamo ta uje avo hotembitie Keriso ta pure amo jo te tapa mane asora te embo

eha jimbasi hotembitie <sup>12</sup> Keriso ta pure asi ke ijiera avo toaro enana ta degi pehumba puvuresuja. <sup>13</sup> Eto nei amo pamone doru ehaha na Iesu ta pure avo kupi pegogo ando ue bande ari na eora. Eto kupi pegogo pere mane rate ke nei te nei te eora eto hihi nei te nei te tiriora. <sup>14</sup> Avo eto pamone doru ehaha na jimbuto meni ingeto bande simba ue irora erena. Eto ainge asora amo kitoho embo na kito pehumba ari haite manera. <sup>15</sup> Rate pamone doru nei nei na Keriso ta ari toto egerembeto Satan ta ambota ere pahora.

<sup>16</sup> Eto God ke be ari pamone amita jao tate dodoru mitiroro kito amo amita javo vahai avoeto amina simba aisuja eto ekalesia ta degi pure amo mane bouka ikasora te pamone doru simba ari embo irae amo ekalesia na simba aisora.

<sup>17</sup> Eto ke nei amo erevira. Eto embo okose na ekalesia titi jigihē God ta ke onde katitie embomeni ate poekitirou embomeni na kito embo nombo ke ijie amita pure ta mine peni ikaro umbasuja. <sup>18</sup> Amo God ta ke ta einge kajari mitia, “Eto rice be overekeore o cow na hamo haito hoga segeuja amo cow ta pe mane togeora te amita pure ta mine avoeto tore indie pure euja.” Eto nei amo “Pure embo na mine umbasuja” ke ainge kajari mitia. <sup>19</sup> Eto ekalesia ta titi jigari embo amita degi pehumba sio mane aisova te embo heriso rete heriso nei vahai kiari amina pehumba aisora. <sup>20</sup> Eto embo amuna ari sapura kaiketo asora amo embo tapa ta titi ta isembavo embo tapa kito ari sapura asi mane hotembasora.

<sup>21</sup> Eto God te Iesu Keriso te anera enana ta titi kikinosa ta ke tapa ere kaitona erevi ambo ambo ae erena amore tapa haheto umbae erena.

<sup>22</sup> Eto ekalesia ta pure peni umbuto aja uje eto amo embo ta hamo ta ingeni sau mane tembasoa te be kito ejo. Eto ingeni hamo ta sau tembao ari sapura puvuresuja amo umote



tapa sapura embo asoa avoeto ari tongopa ambu pere irijo.

<sup>23</sup> Eto umo pere mane indesoia te no oti te eto no ambure nei te nei te avoeto wine isapa indijo.

<sup>24</sup> Eto embo nei nei ta ari sasapura amo araha ta pere avoeto embo kiti umbuto ganoka ari degi ta pambuja eto embo nei nei ta ari sasapura amo ku ta puvuto ambota pambuja. <sup>25</sup> Eto ainge nombo ari jajavotoho amo titi na kiora, eto embo na ondikasuja te araha ta puvurou kesora.

## 6

<sup>1</sup> Eto ke agi ue pure ari embomeni na pure mamu avo embo peni ke ijie pure aisora. Eto ainge ae amo pure mamu na God ta javo te dagota ate poekari te avo sapura ke aisuja. <sup>2</sup> Eto pure embo na pure ta mamu amo God ke be ari embo avoeto namei ke ijirou pure embo na mane peive aisuja te pure tunga iketo pure ururou pure ta be amo amita tunga humbari embo God ke be euja amina umbasuja avoeto ari erevi ara ate poekejo.

### *Koro osa ari ta ke.*

<sup>3</sup> Eto embo amuna God ta ate poekari javotoho te ungotenau Bada Iesu Keriso ta ke te avo ingari uje ae ue ke sokova na ate poekeuja <sup>4-5</sup> embo amo keniga embo eto amita hotembari irae be amita ari amo erevira. Embo amina boru jumbari jujune mine ara amita gamo avo uje isapamane euja embo amita hotembari sapura amo tumo, tini kambari, embo ta javo ari sapura ari hotembari sapura isapamane mitia. Eto ke be ari enana ta degi irae be avoeto enana koro umbari ta degi ke ijie ke sokova na God ambo ambo eora.

<sup>6</sup> Eto embo na God ta ke ingito kogo aisuja amo hajire be eto tunga jamo jamo ari te iresuja amo irari javotoho tambasuja. <sup>7</sup> Eto ungotena nei do umbae enda ta puvua ainge nombo pambari amo teho pambasora. <sup>8</sup> Eto enda ta ungotenau bo te indari te iresuja amo ungotena

inono ke asora. <sup>9</sup> Eto embo na hajae vajae embo asi uje eto amo ere pahuma engekari ta beora eto hamo ta ujeje isapamane na eoi embo ta vasiri sapura euja. <sup>10</sup> Eto ke amita be amo koro osa ari amo ari sapura isapamane amita susu be ra, eto embo nei nei na koro tunga umbuto tutuvitie God jenete eora embo amita jo amo osaga na enetarira.

### *Timothy ta irari naingeto iresuja avo ke ena.*

<sup>11</sup> Rate umo God ta embo avoeto ari sasapura toto ari javotoho erevi eteteto pambujo amo ari javotoho asoa eto God ta ari be jigesoia, eto God tumota asoa, eto osa asoa, eto titi turoturo eto mane ereto tini kambari asoa te sovera eto iresoa eto umo ereto tumo ke sausau mane aisoa. <sup>12</sup> Eto God tumota ue teka eto ari sapura nembejo. Eto umo embo isapamane ta titi ta God ke be ijie vasiri daroho uha avo be jigijo. <sup>13</sup> Eto Iesu Keriso na na embo ta orekari embo ke ainge ijie Pontius Pilate ta harikena amita titi ta eto God donda tapa amita vasiri ikari embo amita titi ta <sup>14</sup> inena ke erevi agi eto ae erena amo God ta ke erevi tapa javotoho na pere jigito ururo Bada Iesu Keriso puvuresuja. <sup>15</sup> Eto God na amita iji ikari ta puvuresuja. Eto God amo javotoho ari ta God, eto Titi Jigari Vahai eto King vahai eto Bada vahai <sup>16</sup> eto amina amburari irae eto umo eonga usasa ta iriujua amo embo ta titi na mane kiora eto amita degi otohu te sovera te daroho iresuja, amen.

<sup>17</sup> Eto enda ta hajae vajae te mitera avo na embo peni ke eora avo mane ke aingeko mane asora avo ejo ingore. Eto nau hajae vajae na na simba ururou javotoho iresona ke ainge avo mane aisora. Eto hajae vajae amo ke be manera te ungotena God tumota ururoro amina donda tapa amina ungotena unditirou osa aisora. <sup>18</sup> Eto haja vaja embo na ari jajavotoho amina hajae vajae embo ue hondate eto hande embo ara ejo are. <sup>19</sup> Eto ainge ue iji kombu amita

ambo avo hotembitie vasiri jajavo-toho avo harau ta nununga arako ue vasiri be avo ivo eto jigesora.

<sup>20-21</sup> Eto Timothy inena simba ae ikari avo be simba ejo. Eto embo nei uhoho na God tumota ari avo toto enana ta hotembari avo ke be ke ijie God hotembae ue ke taimbeora embo avo tojo.

Eto God ta hondate ari avo no degi ta iroi.

## 2 TIMOTHY

*Paul na Timothy ta degi ahari kaja*

<sup>1</sup> Eto embomeni na Iesu Keriso ta degi vasiri te irari umbasora avo God na ena avoembo na Paul Iesu Keriso ta apostel ana God na ikena. <sup>2</sup> Eto nau tunga humbari meni Timothy nanena no ahari erevi ere kaitena. Eto God mamu te ungotenau Bada Iesu Keriso te amita hondate ari te jo ari te peka te tapa no degi ta iroi.

*Timothy na God ta pure be na aja Paul na ena.*

<sup>3</sup> Eto nau mamamane na ere uatera ainge nombo nanena nau hotembari nei irae hotembari vahai na God ta pure ue iji te mume te amo God osa ue umu embo pari eona. <sup>4</sup> Eto umu si ijea avo hotembeto nau jo tapa na umu kito tunga javotoho asi uje ere ona. <sup>5</sup> Eto umu God tumota oe kogona amo no aja Eunice ta aja ta aja Lois te na God tumota ea avoeto na kogona amo inena ainge ere oa <sup>6</sup> avoembo nau ingeni no hamo ta tembeo God na no pure ta sovera ari hande ikena avo i hukarako ao perimbaja erena. <sup>7</sup> Eto amita be amo God na Ahihi Otohu ungotenau hande ena amo joru ari ta ahihi mane rate kiari te osa ari te amita sovera ikeuja. <sup>8</sup> Avoeto umu me mane kesoa te Bada ta ke embomeni ta degi hande ejo eto na Bada avoembo tipura etena avo hotembitie me mane kesoa rate na tipura ta mitie memenga ere kogona ainge nombo God ta sovera jigihē Iesu Keriso ta ke avoembo memenga kijo. <sup>9</sup> Eto ungotena otohu ue irora God na oreketo umbuna amo ungotenau ari avoembo ae rate amita uje na hondate ena. Eto enda ae kiti ta God na ungotena hondate aisuja amo Iesu Keriso ta degi nununga ena. <sup>10</sup> Eto eha oroho emu Iesu na puvuto ungotena oreketija amo ungotena hondate ari ta be puvija erevira eto ungotena amburari amo

Iesu na etei irae etija avoeto ungotena vasiri te daroho iresora avo Iesu na amita ke na hariketija <sup>11</sup> Eto Iesu ta ke hande ana eto amita ke ate poekana amita apostel God na ikena <sup>12</sup> avoembo na eha oroho memenga erekogona te na me kiae rate na ke be eona embo God amita degi ari nau te ahihi nau te avo iketena amo iji kombu avoeto simba aisuja avo kogona. <sup>13</sup> Eto inena nau ke iketene uha amo God ta ate poekari be ra ijie Iesu Keriso tumota ue amita osa ari na simba ejo. <sup>14</sup> Eto God ta ke no degi ta ikari avo Ahihi Otohu ungotenau jo ta mitia amita hondate ari na simba be ejo.

<sup>15</sup> Eto ke nei amo Asia province embo na na totora amo umu matu ingea. Avoeto embo Phygelus te embo Hermogenes te embo tapa na na totora.

<sup>16</sup> Eto na chain na pundera amo embo Onesiphorus na puvuto joru ue me kiae iji nei nei ainge puvuto na unduja. Avoeto Bada na Onesiphorus ta embomeni kogurou jo aisuja avo erena. <sup>17</sup> Eto embo amina Rome ta puvuto na jombure ere umite na tahaja. <sup>18</sup> Avoeto iji kombu te Bada na Onesiphorus kogurou jo aisuja avo erena. Eto embo amina da Ephesus ai ta na hondate isapamane uija amo umu kiarira.

## 2

*Iesu Keriso ta isoro ari singa be*

<sup>1</sup> Eto nau meni umu Iesu Keriso ta hondate ari na sovera ari umbuto <sup>2</sup> embo isapamane ta titi ta etene ingiha avoembo God ta pure ari haite amita degi hande ejo ingito embo nei nei ta ate poekaro ingito umbare. <sup>3</sup> Eto dago na ere ora ainge nombo Iesu Keriso ta isoro ari singa eto no degi ta ngahia puvurou kito sovera ejo. <sup>4</sup> Eto embo na isoro asi pure umbasuja amo enda ta ari neite neite avo mane hotembasuja te amita isoro ta titi jigari embo amina kito tunga javotoho aja aisuja. <sup>5</sup> Eto ke nei amo tutuvari embo na ke agi ae ue sio tutuveto nembasuja amina

siro ta pohan kogombari mane hoteto umbasuja. <sup>6</sup> Eto embo amuna pure ngahia eto donda ve kovasuja amo embo amina donda kiti umbasuja. <sup>7</sup> Eto na ke erena avo be hotembejo eto Bada na au be kesoa.

<sup>8</sup> Eto be hotembejo, Iesu Keriso amo ambuto vasiri te erena eto Iesu Keriso ta ohihi amo King David ra. Eto na God ta ke javotoho erevi embo ta degi hande ereona <sup>9</sup> avoeto na enda ta ke peni poekari embo ke ijie chain na tigere osaga te memenga te tapa mitena te God ta ke avo chain na tigaera <sup>10</sup> avoeto God na siriketo umbija embomeni avo Iesu Keriso na oreketo umbuto au usasa ta daroho irora ivo eto mitie pure ereona. <sup>11</sup> Eto ke erevi amo ke be perera. Eto Keriso ga i atahu ta ahara amo Keriso ga tapa vasiri te iresora. <sup>12</sup> Eto ivo eto iresora amo Keriso ga titi jigesora. Eto Keriso egikasora amo Keriso na ungotena egikasuja. <sup>13</sup> Eto ungotena Keriso tumota ae asora te Keriso na tumota ue amita ke avo mane toasuja.

### *God ta pure ari embo amita ari.*

<sup>14</sup> Eto ke erevi matuainge kaiketo ejo ingore. Eto ke be mane avo ijie boru ere juhora avo Bada ta titita taekejo. Eto ari ainge ere ora amo be mane amina ke ingari embo ta hotembari sapura euja. <sup>15</sup> Eto no vasiri iketo pure ururo God na kito nau pure embo be ra ke ainge aisuja eto umo God ta ke be avo kiari embo aisoa avoeto umo mane me kesoa. <sup>16</sup> Eto enana God kiae ue hihi tiritie ere pahuma sapura be aisora avoeto umo hihi tirari aingeko avo tojo. <sup>17</sup> Eto enana ta ate poekari sapura masa te sigeto pambuja <sup>18</sup> amo embo Hymenaeus te embo Philetus te na ainge ue ke be avo toto pahue embomeni ta degi ke einge eora “embo ambuto vasiri te erasora amo matu puvuto pambari ra” ke ainge ijie embomeni ta degi ate ere poekitore embomeni nei nei God tumota eora amo ere toturutora. <sup>19</sup> Rate God ta ekalesia amo sovera te mitia amita hajire amo einge kajari ra, “Eto Bada

na amita embomeni amo kiarira” eto “Embo tapa amuna Keriso amo nau Bada ke aisuja amina ari sasapura mane aisuja te toasuja.”

<sup>20</sup> Eto embo ta irari bande amita jo ta amo donda nei ‘gold’ na ari eto nei ‘silver’ na ari amo daroho irari donda eto bande vahai amita jo ta amo donda nei i te ovu enda te na ari amo pejeuja eto sari euja. Eto kiti amina pure javotoho eora te ambota amina pure sapura eora <sup>21</sup> eto ainge nombo embo na ari sasapura tapa avo toto pure javotoho ari embo eto otohu ue bande mamota ta pure ari donda javotoho arako ue God ta pure javotoho tapa amo amita degi ari inono be aisuja. <sup>22</sup> Eto meni singa na ari sapura asi uje euja aingeko avo toto javotoho ari, tumota ari, osa ari peka umbari avo eteteto ejo, eto Bada ta degi jo javotoho na pari eora embomeni na ari ainge amo eora. <sup>23</sup> Eto embomeni na sarika ue ke be mane hotembari na ijie tumo uore jujune puvuja amo umo kiari avoeto tojo. <sup>24</sup> Eto Bada ta pure ari embo na jujune mane aisuja te embo osa ue embo ta ari sasapura hotembeto toto ate poekasuja. <sup>25</sup> Eto amita degi ngahia ari embomeni enana tunga jamo jamo te ate poekitirou God na au enana ta jo haperekaute au pahuma amita ke be avo kesora. <sup>26</sup> Eto embomeni amo Satan ta uje avo ara bage ikari avo God ta ke avo kito hotembari javotoho umbuto Satan ta bage amo toto pambasora.

## 3

### *Eto iji tutumota embomeni na God hotembae asora.*

<sup>1</sup> Eto umo ke erevi be ingijo. Iji kombu puvuto auvitirou amo iji sapura be sapura avo puvuresuja <sup>2</sup> amikote amo embomeni na ungo eonga hamo ta ujeje avo hotembeto koro osa ue biso oronga ue ‘na na’ ijie God te embo te avo urumbitie e ta mamota ke peive ue otohu ari osa ari irae <sup>3</sup> amo embo jo ari amo irae ue embo ta ari sapura mane hotembeto



toasora te embo ta javo aro sapura aisuja eto enana ta isoro peikari irae eto ungo sasaga kesi uje ue ungo ari sasamuna avo uje isapamane avo eora. <sup>4</sup>Eto embomeni amina jo vahai na namei ke ijie jo nei na namei tasora avo hotembeora rate enana ta uje avo pere ue hotembari peni avo ue God uje ae eto enda ta gamo ta ere pahora. <sup>5</sup>Eto enana God ta sovera hotembae ue hamo na God jakeka erera embomeni ainge avo tojo. <sup>6</sup>Eto embo aingeko amina embo ta hande ta jijimeto pambuto toreto hotembari irae pamone ta degi hihi ti tiritiore enana ta ari sasapura isapamane amina bouka euja avoeto ari sasapura ta ujeje isapamane ue ke avo ingihe ambo ambo eora. <sup>7</sup>Eto enana ke ehaha ta gamo ano ingesi uje isapamane eora te ke be amo kiari inono aera. <sup>8</sup>Eto embo Jannes te embo Jambres te ta ke na Moses ta ke ga isoro ea ainge nombo embomeni eto embomeni emita siro matu sapura ari avoeto God na enana matu toarira. <sup>9</sup>Eto enana ta ke amo pajito degi hoi ta mane pambasuja te embo Jannes te Jambres te amita ke inono avoeto embo tapa na kito ke sokova ke aisora.

*Paul na Timothy onde katena*

<sup>10</sup>Eto nau ate poekari te ari te pure te tumota ari te embo hondate ari te osa ari te ando ngahia eto sovera ari te tapa amo umo kiarira. <sup>11</sup>Eto da Antioch te da Iconium te Lystra te ai ta osaga memenga embo na nau degi ta ikea te ando ta sovera ari umbua amo umo koga te Bada na na oreketo umbuna. <sup>12</sup>Eto ke be amo embo na God ta ke avo jigama ue Iesu Keriso ta jo ta iresi uje aisuja amo embo na osaga te memenga te ikaro kesuja. <sup>13</sup>Eto embo sasapura ke sokova ari embopo amina ke sokova mine ara ere uma sapura be aisora.

<sup>14-15</sup>Rate umo meni isapa ta itiketo God ta ke otohu kajari avo ingihe ere puvutuhua, eto amuna ijioi ere ingioa amo umo kiari avoeto umo Iesu Keriso tumota be ere oa

amo naingeto umo oreketo umbasuja amita kiari avo ere uhoa avoeto ke avo be jigito irijo. <sup>16</sup>Eto God ta ke kajari tapa amo God ta pe na ikari ra avoeto ke amina embo ate poekasora eto ari sapura harikasora eto degi javotoho davore amo au kesora eto irari javotoho au kesora, <sup>17</sup>eto God ta pure ari embo na God ta ke jigama ururou ari javotoho tapa amo au kito au inono aisuja.

**4**

<sup>1</sup>Eto God ta titi ta eto Iesu Keriso amo puvuto embo amburarite vasiri te amita ari siriketo umbuto enana ta king eto titi jigesuja amita tombu ta inena erevi ae erena. <sup>2</sup>Eto God ta ke embomeni ta degi hande ejo. Eto iji javotoho te eto iji sapura te ke hande asi nununga ejo. Eto ekalesia embomeni na sapura ururoro kito inena no ke na taeketo ejo javotoho are. Eto ke javotoho ejo ingihe sovera ari umbare. Eto inena embomeni avo mane toasoa te kogoue ate poekejo. <sup>3</sup>Eto erevi ao ingora erena amita be amo iji puvurou embomeni na God ta ke be ingari uje ae ue ungota ujeje sasapura avo ue ke gamo avo aro ingesi ate poekari embomeni isapamane siriketo umbasora <sup>4</sup>amina ke be avo ingari uje ae ue onde sunduto ahereketo hihi sokova avo ingesora. <sup>5</sup>Eto umo iji tapa no siro jigama ue memenga puvuresuja amo sovera ejo. Eto God ta ke javotoho avo hande ue no ekalesia ta pure avo ejo inono ai.

<sup>6</sup>Eto God ta pene ikari gaga ai ta wine overeketo God ta degi hande ikeora aingeko nombo nau pambari iji puvei hamo nau God ta degi hande ikasona <sup>7</sup>Eto na isoro javotoho etena, eto tutuvari ta javotoho etena, eto na God toae tumota ere ovona. <sup>8</sup>Avoeto ari javotoho ari ta siro kope avo nununga ari mitia avo, embo sirikari embo javotoho, ungotenau Bada amina iji kombu te umbuto na kogombasuja amo na pere mane rate embo amuna Iesu ta

puvurari simba ere ovora amite tapa kogombasuja.

<sup>22</sup> Eto Bada na no jo ta iresuja. Eto amita hondate ari ungota degi iroi.

*Ahari tutumota ke ena*

<sup>9</sup> Eto na embo tapa na toto pambari avoeto umu sau sau nau degi ta puvujo. <sup>10</sup> Eto embo Demas amo enda ta ari osa isapamane ue na toto da Thessalonica ta pahoi eto embo Crescens na enda Galatia ta pahoi eto embo Titus amo enda Dalmatia ta pahoi <sup>11</sup> Eto Luke na vahai namote mitia, avoeto embo Mark amo pure nau hondate ari inono avoeto Mark umbuto puvujo <sup>12</sup> Eto embo Tychicus amo da Ephesus ta iketene pahaja. <sup>13</sup> Eto nei amo nau pohukari bo amo da Troas embo Carpus ta degi toa avo umbuto puvujo. Eto peni be amo nau o hoga ta ke kajari amite nau books te aingeto umbuto puvujo. <sup>14</sup> Eto embo Alexander amo auri pure ari embo amina nau degi ta ari samuna be uija amo Bada na mine au kesuja <sup>15</sup> Eto embo amina ungotenau ke avo ingito tumo eto jujune uija avoeto umu te tapa embo avo be kijo.

<sup>16</sup> Eto na kiti koto ta ganoka etera amo na hondate ari embo amo oju ue puvurae etera amita degi Bada na memenga mane ikasuja evo erena <sup>17</sup> Eto Bada vahai na namote mitie sovera ari iketei umbuto amita ke tapa avo enda nei embomeni ta degi ingora hande etena. Eto na o lion ta pe ta oreto umbija <sup>18</sup> ainge nombo ari sapura te isoro te nau degi ta do puvuresuja amo Bada na oreto umbuto ere uma iji puvurou titi jigari degi utu i ta ikau iresona. Eto usasa te daroho amita degi iroi, Amen.

*Eto embo pekena*

<sup>19</sup> Eto pamone Priscilla te amita ivu Aquila te embo Onesiphorus ta embomeni te ere pekitona. <sup>20</sup> Eto embo Erastus amo pambae da Corinth ai ta mitia, eto Trophimus ambure umbei da Miletus ai ta toto puvena. <sup>21</sup> Eto jajemo iji puvurae ua emikote umu matu sau puvujo. Eto ungotenau namei kamei embo Eubulus te Pudens te Linus te Claudia te enana tapa na umu ere pekitora.

## TITUS

### *Paul na Titus ta ahari kajena*

<sup>1</sup> Na Paul, God ta ke agi ari embo eto God na siriketo umbari embomeni amina God tumota be ue amita ke be avo be kogue God ta ari javotoho avo be jigama ara na Iesu Keriso ta apostel nane ke hande ere ona <sup>2</sup> Amo ungotenau irari daroho avo umbasi ue God ta ke be avo tumota ara eona. Eto irari daroho avo God ke sokova embo mane ke be ari embo amina enda ae kiti ta embo ta degi ikasi ke ena <sup>3</sup> Amo amita iji inono ta embo na amita ke be avo kiora ungotenau orekari embo God amita ke avo nanena hande ana ikena. <sup>4</sup> Na Paul ungotena God ta ke tumota eora avoeto Titus umo nau meni avoeto no degi ta ahari erevi ere kaitona. Eto God Mamo te Iesu Keriso ungotenau orekari embo amita hondate ari te peka te no degi ta iroi.

### *Titus na pure erevi aja enda Crete ta Paul na ikena*

<sup>5</sup> Eto umo enda Crete ta toto puvuritana amo pure tuna toturitana avo inena ae umo toto puvuritana. Eto ke no degi ta ijiena ainge nombo da vahai vahai ta ekalesia titi jigari embo avo inena siriketo umbujo. <sup>6</sup> Eto titi jigari amo ari eingeko avo umbujo. Eto ari javotoho ari embo pamone vahai jimbari amita meniundi God ke be ijie e mamoma ta ke agi ue isa sio sao mane eora embo ainge avo umbujo. <sup>7</sup> Eto pure erena amo nei mane God ta pure avoeto ari jajavotoho euja embo amina aisuja, eto keniga embo eto tumo embo, wine indito titivi ari embo, sausau ereto embo isembari embo, ke sokova ijie ombuora embo amina mane aisuja <sup>8</sup> te embo undurari embo, ari javotoho osa ari embo, hotembari javotoho hotembeto ari embo ari javotoho ari embo otohū embo amita hotembari sasapura uje sasapura toari beari embo <sup>9</sup> amina titi jigihe ke tapa do

ate poekitara avo inono ta jigama ue hande ururou embo nei nei na sovera ari uhuroro embo nei ta ke sokova amo tau iraesuja.

<sup>10</sup> Eto ke sokova ari embopo ainge amo mitera amina God ta ke be ingito ingaesira ue ke sokova na embomeni umbuto ari neite neite amina kiti umbuto ere pahora. <sup>11</sup> Eto Judea embomeni na hamo kakamba eto God ta toho ara ke sokova na ijie ate poekitiore embo javo vahai amo kateketo eonga pamba eora avoeto enana ta ate poekari sapura avo taekejo, amo osa ue koro umbasi ere ora. <sup>12</sup> Eto ke sokova ainge ere ora amo enana da Crete embo vahai ungota peroveta vahai amina hariketo ke einge ena, “Eto Crete embomeni amo ke sokova hihi tirari isoro ngahia ari kupi ue okope undurari embomeni ra” <sup>13</sup> ke ainge ena amo ke be avoeto enana ta ari avo ngahia na taekejo God ta ke be avo tumota ue <sup>14</sup> Judea ta hihi sokova amite ari neite neite avo ke be ae ari embopo na ara eora avo toare <sup>15</sup> Eto otohū embo ta degi donda tapa amo otohū te God ke be ae ari sapura ari embopo ta degi donda tapa amo otohū manera. Eto ke be amo enana ta hotembari te jo te tapa amo sapura ari ra. <sup>16</sup> Eto enana na God ke be eona ainge eora te God ke be ari embopo na enana ta ari na harikeoi kiora amo enana God ke be ae embopo ra. Eto enana God ta ke agi ae ari sasapura embopo amina ari nei javotoho ari inono aera.

## 2

### *Eto Titus na ke erevi ate poekasuja.*

<sup>1</sup> Rate inena ate poekasoa amo erevira. Eto embo God ta ke ingihe irari javotoho iresora amita ke avo pere ate poekejo. <sup>2</sup> Eto embo be na ari erevi ara ate poekejo. Eto wine peni mane indesora, te ari javotoho pere ururoro embomeni na kito embo be ra ainge ijirore iresora amo ari tapa sio mane aisora

te ke be hotembeto aisora eto tumota ari na osa ari na memenga do puvurou kito amo mane toasora te sovera eto iresora. <sup>3</sup> Eto ainge nombo vaha pamone na ari einge ara ate poekejo. Eto pamone amina ari ainge ururoro amo embomeni na pamone emo otohu pamone ra ainge aisora. Eto embo nei ta javo mane aro sapura aisuja eto wine peni mane indesuja te vasiri javotoho ate poekari pamone aisuja <sup>4</sup> Eto ainge ururoro pamone ehaha na kito amita ivu te meniundi te osa ue daingeto simba aisora avo be kesora. <sup>5</sup> Eto umo eonga vasiri te ari te simba ue enana ta jo ta hotembari javotoho ue bande ta pure agari jivari te gajika boreka te eto embomeni ta osaga kito hondate ari te ivu ta ke agi ururoro embomeni na kito God ta ke sokova ke mane aisora. <sup>6</sup> Eto ainge nombo embo ehaha avo ejo enana ta ari te vasiri te simba are. <sup>7</sup> Eto inena no ari javotoho amina enana ta degi ate kitira ejo kiore. Eto embomeni ate poekitie kege ganini mane sio aisoa te embo tumota ari na ke be pere ijiro <sup>8</sup> kitoho embo na no ke javotoho avo ingihe ungotenau ari te ke te avo ingito urumbari inono ae avoeto me kito ke mane asora. <sup>9</sup> Eto embo nei ta ke agi ue pure ari embomeni na pure mamoma ta ke tapa avo ejo agi are. Eto ke mine mane sapura asora te pure ururoro pure mamoma na kito tunga javotoho aisuja <sup>10</sup> Eto pure mamoma ta donda mane pegene aisuja te javotoho be na pure ururoro pure mamoma na kito tumota aisuja. Eto ainge ururoro embomeni na ungotenau orekari embo God ta ate poekari avo kito uje asora.

<sup>11</sup> Eto God ta hondate ari puvuna amo embo tapa orekasi puvuna. <sup>12</sup> Eto God hotembae ue enda ta ujeje ta pahuore God ta hondate ari amina eoi ari avo toto God hotembeto ari javotoho jigama ue ungotenau vasiri avo kogue iriora <sup>13</sup> Eto ari ainge ue God sovera te Iesu Keriso ungotenau orekari embo usasa te puvuresuja avo simba ere ora <sup>14</sup> Eto embo amina

ari sasapura tapa amo amita hamo na ombuto ungotena umbuto egau otohu ue amita toho be ara umbuna amo ungotena jo tapa na ari javotoho pere ara ena. <sup>15</sup> Avoeto ke erena erevi ate poekejo. Eto ke emo na mane God ta ke avo eto ke eremina embo na sapura ururoro kito taeketo sovera ari ikejo umbare. Eto ari ainge ururo embomeni na umo kito ke be ari embo ke are.

### 3

#### *Eto embomeni na ari javotoho are.*

<sup>1</sup> Eto ke matu ijiera ainge nombo ejo no embomeni ingito enda ta titi jigari embopo ta ke agi ue ari javotoho tapa avo asi nununga are. <sup>2</sup> Eto embo na embo nei ta javo umbuto au mane sapura aisuja te peka ari tunga umbari ke ainge ijie, namei amo embo peni umo isapa ke ainge ijie iresora.

<sup>3</sup> Eto iji matu amo ungotena sarika ue ke agi ae degi nei sapura ta pahue enda ta uje neite neite na andirari amo ari sapura neite neite ue embo nei ta donda kito tumo ue mine tara asi ere uatera. <sup>4</sup> Rate ungotenau orekari embo God na kito jo enu osa ue <sup>5</sup> ungotena oreketo umbuna, amo ungotena ari jajavotoho avo eto ae rate amita jo ari na einge ena. Eto amita Ahihi Otohu na enu meni eha ingarako eto embo ehaha jajavotoho ea. <sup>6</sup> Eto God na ungotenau orekari embo Iesu Keriso ta pure avo kogue Ahihi Otohu ungotenau jo ta overekena <sup>7</sup> Eto amita hondate ari amina ungotena embo sasapura mane embo jajavotoho ere ora amo vasiri daroho avo hoteto iresi simba ere ora. <sup>8</sup> Eto ke erena erevi ke be avoeto no embomeni ta degi ao ingora erena. Eto God tumota ere ora embomeni na ke erevi ingihe ari jajavotoho asi tunga ikasora. Eto embo tapa amuna ke javotoho erevi ingihiroro amo ungota degi irari javotoho puvuresuja. <sup>9</sup> Rate Judea ta ke pepeni neite neite amite eto Judea ta Ohihi ta hihi sokova neite neite kakajekari avo kogue tumo ue boru



juhue ke sapura eora avo tojo. Eto ke sokova amo be ambu ra. <sup>10</sup> Eto ju-june ke aro ingesi sumi kurari embo amita degi ke ejo ingioi eto ao ingito toae au amo ehako ejo ingito toae au kito avo tojo eonga iroi <sup>11</sup> Eto umo kogoamo embo amo ari sapura na jo andirari avoeto ari sapura amita na pehumba aisuja.

*Ahari ta ke tutumo*

<sup>12</sup> Eto na jajemo iji amo na da Nicopolis ei ta iresona avoeto embo Artemis te embo Tychicus te ikano no degi ta pambaro kito umo etokito nau degi ta puvujo. <sup>13</sup> Eto enda ta ke pepeni papeni simba ari embo Zenas te embo Apollos te degi ta pahue indari te donda nei do jigama ue pambasora avo pere hondate ejo pambari pere are. <sup>14</sup> Eto ungotenau embomeni na kupi pegogo ambo ue ombari asari umbasi amo jo tapa na pure tunga iketo pure javotoho asora amita kiari avo umbara erena.

<sup>15</sup> Eto embomeni tapa namote mitera amina umo ere pekitora. Eto embomeni dago osa ue God tumota eora avo ere pekitora, ejo ingore.

Eto God ta hondate ari ungota degi iroi.

## PHILEMON

### *Paul na embo Philemon ta degi ahari erevi kajena*

<sup>1</sup> Oio nau namei eto nau pure vahai embo Philemon. Na Paul Iesu Keriso avo embo tipura etena te namei Timothy te na no degi ta ahari erevi ere kaitera, <sup>2</sup> te nangota du Apphia te Iesu ta pure ngahia ari embo Archippus te ekalesia no bande ta torukeora avo ere pekitera te ke erevi enana ta degi ikejo kiore. <sup>3</sup> Eto ungotenau Mama God te Bada Iesu Keriso te ta hondate ari te pekari te ungota degi iroi.

### *Philemon ta tumota ari te osa arira*

<sup>4</sup> Eto na pari ue kaiketo umu hotembeona <sup>5</sup> te umu Bada Iesu te God ta embomeni tapa osa ue tumota eoa duru avo ingihe ungotenau God jakeka eona. <sup>6</sup> Eto inena Iesu Keriso ta ke hande ururo ungotena Keriso ta ambotani na Keriso ta degi ta tunga jamo ari te hondate ari doitoko ere uhora avo be kesora ainge ijie pari eora.

<sup>7</sup> Eto nau namei no undurari javotoho na etei God ta embomeni na tunga javotoho be ere ora avo duru etere ingito tunga javotoho be ere ona.

### *Philemon na embo Onesimus hondate aja Paul na penunu ena*

<sup>8</sup> Eto na Keriso na no okose iketija avo eto na umu ari javotoho ai ke ngahia na ke aetena <sup>9</sup> rate osari avo eto ke ngahia toto ke erevi no degi ta seima asona. Amo embo mane na Paul Iesu ta ke hande ari embo te Iesu avoembo tipura etena nanena nau meni Onesimus avo eto no degi ta penunu erena. <sup>10</sup> Eto na tipura ta mitene amina puvuto Iesu ta ke tumota eto meni nau ainge uija. <sup>11</sup> Amina matu umu hondate ari haiteko mane rate eha amo degi no ta nau ta hondate ari haiteko aisuja. <sup>12</sup> Eto Onesimus avo no degi ta egerembeto ere ikitona rate nau

meni be ikarako ere ona. <sup>13</sup> Eto na Iesu ta duru javotoho avo eto tipura ta mitene umu hondate Onesimus na na hondate ue ei iroja uje ere ona. <sup>14</sup> Rate na no ke ingae mitie Onesimus mane taekasona te ikasona rate inena ikaetea amo jo ngahia eto mane ikaetea rate osa ari na hande ikaetea. <sup>15</sup> Eto Onesimus na umu toto pahaja amo God ta uje ta pahaite? Amo ke be eto amina iji isapa eto no degi ta eto pambuto no degi ta datoho aisuja avo God na uje enute? <sup>16</sup> Onesimus na nau namei etija rate no namei be aisuja. Eto no pure ari embo pere mane rate no tunga humbari eto ekalesia vahai embo aisuja.

<sup>17</sup> Avo eto Iesu Keriso ta ari avoeto ungotena namei kamei ra. Eto inena ke avo be hotembitea amo na pekaetea ainge nombo Onesimus puvourou javotoho eto pekejo. <sup>18</sup> Eto amina no degi ta sapura do uija amita be avo ejo nanena ombane. <sup>19</sup> Nau javo erevi ere kaitena. Na Paul nanena mine ikasona, rate umu kogoamo inena Iesu ta degi vasiri eha uha amo na Iesu ta ke hande uena avoeto uha. <sup>20</sup> Avo eto namei na do penunu erena avo Christian ta vasiri na ejo. Eto Bada Iesu avo embo nau degi ta Christian ta osari na ari erevi ejo tunga javotoho ane.

<sup>21</sup> Eto na ahari erevi kajitie kogona amo tapa do penunu erena avo ika-soa avo pere mane rate nei hamo ta ika-soa. <sup>22</sup> Eto ke nei amo nau evari bande nununga ejo amita be amo na hotembitea ungota pari isapamane avo eto God na na ikau ungota degi egerembasona.

### *Pekari ta ke*

<sup>23</sup> Eto na tipura vahai embo Epaphros na ungo ere pekitia amo namoga Iesu Keriso avoeto tipura ena. <sup>24</sup> Eto nau pure vahai ari embomeni Mark te embo Aristarchus te Demas te Luke te aingeto ungo ere pekitera. <sup>25</sup> Eto Iesu Keriso ta hande ari te hondate ari ungota degi iroi, orere re.

## HEBREWS

### *God ta ke amo Meni ta eto puvuna*

<sup>1</sup> Matu be matu amina God na ungotenau ohihi ta degi ke au ingora peroveta ta degi ke ikenu hande ue ere pahovora <sup>2</sup> Tutumota ke iketija amo amita Meni avo iketija. Eto amita Meni na donda tapa utu ta enda ta ikenu irerembena avoeto donda tapa amo Meni na hoteto umbaja ena. <sup>3</sup> Eto Meni amo God ta usasa eto God ta hajire vahai iriuja. Eto donda tapa amo amina amita ke sovera te na vasiri ikitie simba euja. Eto God ta Meni na ari saspura egenu irae enu utu ta bitito titi jigari embo okose amita ingeni be ta arumbeto.

### *God ta Meni amo peni bera*

<sup>4</sup> Anera ainge mane embo peni ena ainge nombo amita javo amo God ta Meni avoeto peni be eto anera ta javo ainge manera. <sup>5</sup> Eto ke be amo God na anera ta degi ae rate amita Meni ta degi ke einge ena. “Eto umo nau Meni eto na no Mama ra.” Eto ke nei amo, “Na amita mamona asona eto amo nau Meni aisuja,” ainge ena. <sup>6</sup> Eto God na amita Meni ikenu enda ta pahunu anera ta degi, “Ungo nau Meni jakeka evu” ke ainge ena. <sup>7</sup> Eto anera amo do aingere amita ke kajari amo einge mitia, “God na amita ke agi ari anera ta degi ke eoi sariketo pisara te i peri te eora.” ke ainge anera ta degi euja <sup>8</sup> te Meni ta degi amo ke einge euja, “Umo God avoeto ei ta arumbeto titi jigihedaro ho iresoa. Eto no titi jigari ta hajire amo ari jajavotoho ta kani avo jigito iresoa. <sup>9</sup> Eto umo ari jajavotoho osa ue ari sasapura uje ae ere ova avoeto, no God nanena umo tunga javotoho ari ta seha na umo vurito no namei kamei ta siro ta iketene hetetea.” <sup>10</sup> Eto ke nei amo einge ena, “Bada, itikari ta amo inena enda ove a, eto utu amo no ingeni ta hajire ra. <sup>11</sup> Eto Umo avo

daroho iresoa te utu ta enda te avo irae asora. Eto bo iji koso jigama uore sorerekeuja aingeko au <sup>12</sup> Inena bo matu avo egoveketo eha hondate ikarako aisoa, rate inena irari dato ho ta iresoa no iji tutumo irae.” <sup>13</sup> Eto God na amita anera vahai ta degi ke einge ae ra, “Umo huma nau ingeni be ta arumbao nanena ano kito ho embo ta hamo ta no utu tembasoa.” <sup>14</sup> Eto anera ta pure be amo God na embomeni amita avo oreketo umbasuja amita simba ari embopo ra.

## 2

### *Ungote onde jevito ke ingesora*

<sup>1</sup> Eto ke matu ingihara avo toto pambuora ungote onde jivito ehako be ingesi erena. <sup>2</sup> Eto anera na Moses ta degi ke enu kajena amo embo na ke vahai au sapura aisuja amo God na amita sapura ta mine ikau kesuja amo mane toasuja avoeto God na embo amita toho oreketo ere uhua. <sup>3</sup> Rate embo amuna God ta orekari avo ke be ae aisuja amo ari sapura ta memenga amo tiumbeto pambari inono aera. Eto God na ari sasapura orekitie embomeni umbasuja amo Bada na kiti embo ta degi harikenu ingia avo nangota degi eo ingia. <sup>4</sup> Eto God na ungotena kito ke be ara hajire neite neite ari sinderi neite neite ikenu kia. Eto Ahihi Otohu ta sovera ari amo ujena ikenu ungotena vahai vahai na umbuto pure eora.

### *Iesu amo namei kamei ga ungo vahaira aravora*

<sup>5</sup> Eto enda ambota puvuresuja amita ke erera amo anera na enda avo mane titi jigedora <sup>6</sup> rate embo amuna titi jigedsuja amita ke amo embo vahai na einge kajari mitia, “Eto umo God rate do eto embo hotembitie, eto embomeni simba ere oe? <sup>7</sup> Eto iji isapa anera amo peni eto embomeni amo isapa ainge amo inena ari rate inena jige bitito siro ta otohu pasari usasa te na kogombete koreora, amo donda tapa avo embomeni na titi jigora ika.” ke ainge kajari mitia <sup>8</sup> amita be amo God na au donda tapa enda ta eto utu ta

amo embo na titi jigesora amo eha oroho emo titi na kiae <sup>9</sup> Rate Iesu avo ungotere ere kogora amo iji isapa God ta anera ainge mane meni isapa sira ena amita be amo God na embo tapa hondate aisi ue Iesu ikenu memenga kogue embo tapa avoembo ambuna. Avo eto God na enu siro ta otohu pasari usasa te avo asuketo otohu ue embo peni eto mitia. <sup>10</sup> Eto God amo donda tapa ari embo avoeto donda tapa amo amita jo ta iriuja amina meniundi isapamane na usasa amita ta hururoro embo oreketo umbasi kiti Umbari Embo Iesu avo ikenu osaga memenga kina amina ari tapa inono ena. Eto ari erevi God na javotoho be ena. <sup>11</sup> Eto Embo Otohu Ari Embo te embo ototohu te tapa amo javo vahai avoembo Iesu na namei kamei ke ijie meki meki mane euja. <sup>12</sup> Amina ke einge God ta degi eria, "Nanena no javo avo nau namei kamei ta degi harikitie embo tapa ta titi ta haveni ta umo jakeka asona." <sup>13</sup> Eto "na embo eto umo tumota aisona" ainge eto, "Na nau meniundi God na iketija amiga mitena." ainge ena. <sup>14</sup> Eto amita meniundi amo bisi te sasaga te avoeto amina bisi umbuto embo eto amburari ta ivo simba ari embo Satan amita sovera ari avo purisa tirisa etei <sup>15</sup> embomeni amburari joru ue joru ta ke agi ue mitovora avo etei joru toto teho mitera. <sup>16</sup> Eto ke be amo anera hondate asi ae rate Abraham ta meniundi avo hondate ere ua <sup>17</sup> amo embo ta priest peni eto iji tapa God ta degi ungotena jo uoi embo ta ari sasapura tapa avo ajato ijioi ingito Iesu ta sasaga matu enda ta bena avoeto hotembeto touja eto Iesu na amita namei kamei ta bisi te sasaga te umbae toaetija amo ari ainge mane aetija. <sup>18</sup> Eto amita degi engekari puvunu osaga memenga kina amo matu kina avoeto ungotenau engekari puvuresuja amo amina kito jo ururou hondate aisuja.

### 3

*Iesu amo Moses ainge mane Embo Peni ra*

<sup>1</sup> Avoeto nau namei kamei ototohu ungo utu ta pondo ta oru umbari embopo ungo na ungotenau priest peni God ta ke hande ari embo Iesu ke be eora avo be hotembevujō. <sup>2</sup> Eto God ta javo vahai embomeni eto Moses na God tumota ena ainge nombo Iesu na Ikari Embo tumota ena. <sup>3</sup> Eto bande amo peni rate bande gerikari embo amo peni be ra ainge nombo Moses amo peni rate Iesu amo peni be ra. <sup>4</sup> Eto bande tapa amo gerikari embo eonga eonga rate donda tapa amo God na ena. <sup>5</sup> Eto God ta javo vahai embomeni eto embo vahai Moses na God tumota ue amita ke ingina avo inono ta hande enu ingia eto amita ambota God na ke nei ikenu puvuna amite tapa ungotena ere ingihera. <sup>6</sup> Rate God ta javo vahai embomeni rate Keriso vahai avo God ta Meni be ra. Te ungotenamo te tapa ando ta sovera ari umbuto Keriso tumota ue ke be ijie sovera ari iji kombu simba ue amo ungotena God ta hatira ere ora.

*God ta embomeni ta jangu indari iji*

<sup>7</sup> Avoeto Ahihi Otohu na ke einge eria amo, "Ungo na ke nau ingihe kito amo ungota jo ngahia mane aisova. <sup>8</sup> Eto ungota mamamane na degi sapura be ojabatambu ta jua 40 amita jo ta nau degi ta tumo ue. <sup>9-10</sup> Na undupa ue engekite ari nau avo kogue osaga ere koguatera. Eto enana ta ari avo nanena kito tumo ue ke einge ea, 'Enana na ari nau avo kiae ue jo ta hotembari na degi nei ta sio ere pahora <sup>11</sup> avoeto enana nau jangu indari degi ta mane torasora,' ke ainge tumo te tapa ngahia na ea." Eto ke ainge amo Ahihi Otohu na eria,

<sup>12</sup> Avoeto nau namei kamei ungo ari sapura asi jo ta hotembari na God ke be ae ue God vasiri te avo toto pambuova avo kito kogoevujō <sup>13</sup> Eto ari sasapura ta hotembari sokova amina eoi jo ngahia euja avo taekitie Iesu egerembeto puvurae eha emikote ungo eonga ke javotoho na hondate mine ara ue sovera ari uhue



irivujo. <sup>14</sup> Eto ungotena kiti Keriso tumota ea ainge pere tumota ere uma Keriso kito amiga javo vahai embomeni aisora avoeto ere ora. <sup>15</sup> Avoeto ke einge Ahihi Otohu na eria avo ungota degi ehako erena, “Eto ungo na ke nau ingihe kito ungota mamamane na degi sapura ojagatambu ta mitie jo ngahia ere uaetera aingeko mane aisova.” <sup>16</sup> Eto embo God ta ke ingihe jo ngahia ere uaetera amo amunure? Amo Moses na Egypt enda ta eto titi jigena embomeni amina ea. <sup>17</sup> Eto God na jua tapa 40 amita jo ta embo amita degi ta tumo ere uatei? Amo embo ari sasapura ue ojagatambu ta sasari ere uaetera amita degi ta ena. <sup>18</sup> Eto God na embo amuta degi, “Ungo nau jangu indari degi ta mane torasova.” ke ainge hariketo ena. Amo embo God ta ke agi ae embomeni ta degi ena <sup>19</sup> Avoeto God ke be ae embopo amina God ta jangu indari degi ta torae, avo ere kogora.

#### 4

<sup>1</sup> Eto God na amita jangu indari degi ai ta embo na torara ke ena amo irae ae mitia avoeto ungo na “na degi ai ta torari haite manera” ke ainge mane aisova <sup>2</sup> te God ta duru javotoho amo enana embo mamatu ta degi ta, eto ungotenau degi ta ikari avoeto enana God ta duru avo ingito ingarako ue tumota ae avoeto enana ta jangu indari irae <sup>3</sup> rate ungotena God ke be ijie tumota eora avoeto amita jangu indari ta toreora te enana ta degi God na ke ngahia na eto einge ena, “Enana nau jangu indari degi ta mane torasora.” ainge ena. Eto God na utu te enda te enu irae enu <sup>4</sup> jangu indina amita ke amo einge kajari mitia, “Eto iji <sup>7</sup> rate iji <sup>6</sup> pure eto <sup>7</sup> amo jangu indina.” ke ainge kajena <sup>5</sup> te “Enana nau jangu indari ta mane torasora.” ke ainge amo enana avoembo kajena.

<sup>6</sup> Eto enana God ta duru javotoho amo matu enu ingia te ke agi ae avoeto jangu indari ta torae rate

embo nei na torasora. <sup>7</sup> Avoeto God na iji nei ikena amita javo amo ‘iji eha’ avo King David ta degi enu ingito ke einge kajena. “Eto ungo iji eha emikote God ta ke ingito jo ngahia avojo.” Ke ainge David na kajari matu ta kajena. <sup>8</sup> Eto embo Joshua na enana ta degi jangu indari iji ikaetija amo God na jangu indari iji nei puvuresuja amita ke amo mane aetija. <sup>9</sup> Avoeto God ta embomeni ta jangu indari iji amo irae ae rate mitia <sup>10</sup> amita be amo God na pure enu irae enu jangu indina ainge nombo ungotena hoga memenga ta pure avo toto God ta degi jangu indesora <sup>11</sup> Avoeto embo mamatu ta ate kitira sapura ke agi ae avo toto jo tapa na God ta jangu indari ta eto kito torasora. <sup>12</sup> Eto God ta ke amo vasiri te sovera te mitia amita ti amo o heviri asiyo aingeko mane pe heriso amina embo ta ahihi te hotembari te amita jo ta jeto haunketo beto jo ta hotembari sasapura te hotembari jajavotoho te avo siriketo sapura eonga ikitie javotoho eonga ikeuja <sup>13</sup> Eto donda tapa amo God na ena avoeto donda nei God kiae titihata iraera te ari te hotembari te tapa amo araha ta pere mitia avo eto God na pehumba ururou amo ke mine aro ingesuja.

#### *Iesu amo ungotenau Priest Peni Dombo be ra*

<sup>14</sup> Eto ungotenau Priest Peni Dombo be God ta Meni Iesu na utu ta pambuto mitia avo ke be eora avoeto tumota be are. <sup>15</sup> Eto ungotenau Priest Peni Dombo be amo ungotena Satan na engekeuja ainge nombo avo engekena rate amina ari sapura aera te ungotena ivo ambu embopo amo amina kiuja amo jo euja. <sup>16</sup> Avoeto avo arumba peni ai ta arumbeto mitia amo osaga iji te amo meki mane kesora te amita jo ta auvaro kito jo ururou porere mane aisuja te sau sau hondate aisuja.

#### 5

<sup>1</sup> Eto priest peni ta pure amo einge euja, embo vahai umbuto ikeore am-

ina embo ta ari sasapura na kito-hosira eora avoeto God ta degi peka umbasi pene gaga ta hande ikeuja. <sup>2</sup> Eto embo amite tapa amo embo avoeto ivo ambu embo amo kiari avoeto embo amuna ari sapura ta pahuroro kito ke seima kekeha eto oreto umbasuja. <sup>3</sup> Eto embo tapa ta ari sasapura pere mane rate embo amite tapa amita ari sasapura avoeto peneha ikeuja. <sup>4</sup> Eto embo na priest peni umo eonga mane hetasuja te God na ijukau hetasuja amo priest peni Aaron na ena ainge nombo.

<sup>5</sup> Eto Keriso na umo eonga priest peni ae rate God na sago kiora amita degi usasa ikenu umbuto hetenu amita degi ke einge ena. “Umo Meni nau eto na no Mama ra.” <sup>6</sup> Eto ke nei amo, “Umo embo Melchizedek na ena ainge nombo inena Priest eto daroho iresoa.” ke ainge God na ena. <sup>7</sup> Eto Iesu na enda ta mitie hori gaga ijie si te titi sisivu te tapa God na amburari ta oreketo umbaja pari ena amo meni isapasira ue God otohu ue pari ena amo God na amita pari ingina. <sup>8</sup> Eto umo God ta Meni rate naingeto God ta ke agiari Meni aisuja avoeto osaga memenga ere koguaetija amina kiari umbunu inono ena. <sup>9</sup> Eto umbuto amita pure avo enu irae enu embo amuna amita ke agi eto amita degi vasiri daroho umbuto iresuja. <sup>10</sup> Eto embo Melchizedek na ena ainge nombo ungotenau priest peni dombo Keriso amo God na ikena.

### *Ungo God ta ke toto pambavojo*

<sup>11</sup> Eto amita ke neite neite nanena avo ingaeteva te ungo na ke ehaha ingari uje ae ue ingito ingarako ere ova avoeto naingeto ke ehaha emo aro ingovo. <sup>12</sup> Eto ungo na ke ate poekari embopo aeteva te God ta ke ngangahia mane, avo ungo na ingesova amo ehako ingesova ehako ingesova ainge ue indari ngahia indae meni isapa emi kajarako uore ere ovova. <sup>13</sup> Eto embo amuna God ta ke javotoho Keriso ta degi umbera amo umbuto ando ae avoeto emi mu

pere indiora amo meni isasarahora. <sup>14</sup> te embo na indari ngahia indiuja embo amo God ta ke ingito ando eto sapura davore javotoho davore amo kiari avoeto meni isapa mane rate embo be ra.

## 6

<sup>1</sup> Avoeto ungote Keriso ta ke ikari araha ta avo pere mane rate ke ngangahia amite tapa ingihe embo be are. Eto ke pepeni araha ta amo matu etere ingihava avo ehako mane aro ingesova, ke amo erevira, embo na ari sapura aisuja amo ahihi amita amo amburesuja eto embo na God tumota ue vasiri te iresuja <sup>2</sup> Amite bapataito ari te ingeni hamo ta tembari te eto ambuto ehako vasiri te erari amita ke te eto God na ari sirikari amita ke ta avo etere ingihave <sup>3</sup> ke avo toto God ta hondate ari na ke ngangahia avo aro ingesova.

<sup>4</sup> Eto embo amuna God ta degi vasiri eha umbuto usasa kogurou Ahihi Otohu jo ta torau <sup>5</sup> God ta ke ta hondate ari eto iji ambota puvuresuja amita sovera ari avo ere koguate <sup>6</sup> Avo toto pambasuja amo egerembeto aja to ari inono ae ra te vasiri eha ehako umbasi aisuja amo embo tapa ta titi ta Iesu i oreka (cross) ta tarako ue Iesu ere urumbitia. <sup>7</sup> Eto ga kaikari bouvoi enda na indie be javotoho enda mamu ta ikitie mine javotoho God ta degi umbuja <sup>8</sup> rate enda na bive pepe te avo ikasuja amo enda sapura avoeto God na au aro evekasuja, eto God egikeora amore ainge nombora.

<sup>9</sup> Eto ungo nau tunga humbari embomeni, na kogona amo ungota vasiri amo ke erena ainge mane avoeto ungo God na orekari embomeni avoeto ungota irari javotoho aita be javotoho God ta degi puvuja. <sup>10</sup> Eto God na ungota pure ngahia amo mane jenambuaisuja amo ungo na God osa ue amita meniundi ere unditovova. <sup>11</sup> Avoeto dago ta uje amo ungonu pure vahai avo tunga iketo ururovo iji tutumota puvurou

ungotena simba ere ovara avo kesora. <sup>12</sup> Eto ungo mane kupi pegogo asova te God tumota ari embomeni na simba ue hotari umbuora embomeni avo kogue ari ainge nombo avo umbasova.

*God ta ke amo kogue sovera ari umbuvujo*

<sup>13</sup> Eto God amo peni be eto embo nei na God ta javo nembraera avoeto Abraham ta degi do aisuja avo ijie javo amita avo umbuto ke einge ena, <sup>14</sup> “Eto na no degi ta hondate ari isapamane ikitie ano umo te no ahihije te na be ikitirovo embo isapamane aisuja.” ke ainge God na ena. <sup>15</sup> Avoeto Abraham na tumota ue simba ue mitinu ke amita be avo God na ikenu kina, <sup>16</sup> Eto embo na embo teho amita javo umbae rate ke mine ara ijioere peni eoi amo embo peni God amita javo umbuto eore ke irae euja. <sup>17</sup> Eto ainge nombo amita ke avo be pere avo hoteto umbasora embomeni na be kiora javo amita avo umbuto ena avoeto ke amita avo egikari inono aera. <sup>18</sup> Eto God na ungotenau degi ta ke ena amo amita javo umbuto ena avoeto ke sokova ae rate God amo ke be pere euja, avo kesora vahai avora. Eto ungotena tutuveto God ta degi pambuto hondate ari tambera avoeto tunga jamo ari uhue ungotenau degi ta do ikasi ena avo sovera ue amita ke avo be jigesora. <sup>19</sup> Avoeto ungotena do puvurou kesi simba ere ora amo ke be pere avoeto amo ungotenau ahihi ta orekari rate ungotena God titi na kiae rate ahihi ta orekari amo indiri ainge amina peikari bo avo pauketo tutumo God ta degi Otohu be Otohu ai ta eto tutumo nei embo ta degi ainge eto kajuarira. <sup>20</sup> Eto indiri ai ta Iesu na kiti embuto Priest matu javo Melchizedek amita javo ta ungotenamo avoembo Priest peni dombo eto ungotenau daroho embo ra.

## 7

*Priest Javo Melchizedek ta ari ra*

<sup>1</sup> Eto ungo hotembiteva amo embo Melchizedek amo enda Salem ta king eto God i be ta amita priest ra eto Abraham na king nei nei ga isoro eto nembeto puvutuhunu Melchizedek na pambuto tambuto Abraham ta degi javotoho ari ikenu, <sup>2</sup> Abraham na amita donda isoro ta umbuna avo kateketo tapa ten ainge iketo vahai avo Melchizedek ta ikena. Eto ‘Melchizedek’ ta be amo ‘ari javotoho ta king’ eto ‘Salem ta king’ emita be amo ‘Peka ta king’ ra. <sup>3</sup> Eto embo amita ohihi te e te mamote amita javo amo kajae avoeto amita ohihi te e te mamote avo amunure avo embo amuna kiae avoeto amita vasiri itikari ta eto puvuto tutumota avo irakora. Eto embo amo God ta Meni aingeko avoeto irari daroho ta priest ra.

<sup>4</sup> Eto ungo tapa hotembevu. Eto ungo Judea ta ohihi vahai Abraham na donda isoro ta umbari avo kateketo 10 ainge iketo vahai avo embo Melchizedek ta ikena avoeto embo Melchizedek amo peni be ra. <sup>5</sup> Eto embo Levi (Judea ta priests ta kiti umbari embora) ta ahihije nei uhoho na priest eto Judea ta ke pepeni agi ue donda tapa 10 ainge kateketo vahai embomeni ta degi umbuora. Amo Judea embomeni ta ohihi amo Abraham avoeto namei kamei ta degi hande umbuora. <sup>6</sup> Eto Abraham ta be isapamane kahaja God na onde ue javotoho ari ikena avoeto Abraham amo embo peni rate embo Melchizedek amo Judea embo mane rate Abraham na hande ikitinu Abraham ta javotoho ari ikena. <sup>7</sup> Eto ke be amo embo isapa na peni ta javotoho ari mane ikeuja te embo peni na embo isapa ta degi javotoho ari ikeuja. <sup>8</sup> Eto ingeni nei ta amo javo Levi ta priests amo sasari eora embopo amina embomeni ta donda tapa 10 rate vahai avo umbuora rate ingeni nei ta amo Melchizedek vasiri te irari ke eora amina hande avo umbuna. <sup>9-10</sup> Eto ke nei amo einge aetera. Eto Abraham na Melchizedek tambuto hande ikena iji te amo Abraham ta ahije

Levi hande umbari embopo ta ohihi amina puvurae Abraham ta poru ta irari iji te Melchizedek ta degi hande ikena amo Levi te tapa ikena ke ainge aetera.

<sup>11</sup> Eto ke nei amo Levi ta javo vahai embomeni na priests eora amita degi ta eto embo tapa na God ta ke pepeni avo umbua te embomeni amina ke pepeni avo agi ue amo God ta titi ta amo javotoho manera avoeto God na ungotenau priest nei ikenu puvuna amo Levi ta ahije Aaron amita javo ta puvurae rate Melchizedek ta javo ta puvuna. <sup>12</sup> Eto priest nei eha puvuna amita ke pepeni te tapa amo neira.

<sup>13</sup> Eto ke erena amo ungotenau Bada avoembo kajari ra eto amo Levi ta javo ta puvurae rate amo javo nei avoeto amita javo vahai embomeni na pene gaga ta God ta pure ae ra. <sup>14</sup> Eto ungotena kiarira Judah amo Iesu ta ohihi avoeto Moses na priest na pure do asora avo ikitie amo Judah na ara ae rate Levi na ara ena.

#### *Iesu amo ungotenau Priest Peni dombo be ra*

<sup>15</sup> Avoeto ungotena ere kogora amo ungotenau priest nei puvija amo Melchizedek aingeke amina puvija <sup>16</sup> Amo embo na ke pepeni ambo ambo ara amita priest manera te daroho irari ta priest ra. <sup>17</sup> Eto amita ke amo God ta ke ta einge kajari mitia, “Eto umo Melchizedek ta javo ta priest ue daroho iresoa.” ke ainge kajena. <sup>18</sup> Eto ke pepeni mamatu amo sovera ambu eto ari javotoho ari haite mane avoeto toari ra. <sup>19</sup> Te ke be amo Moses ta ke pepeni amo embo na aro javotoho aisuja inono ae rate ari eha javotoho puvija emina eoi God ta degi ta puvuto auvera. <sup>20-21</sup> Eto God na amita javo umbuto priest mamatu amo ikae rate God na amita javo umbuto ungotenau priest peni dombo Iesu ikena. Eto God na Iesu priest ikasi ue ke einge ena, “Eto na Bada God nanena javo nau uhue umo priest iketena amo mane toasona te daroho iresoa.” ke ainge ena. <sup>22</sup> Eto priests mamatu

ainge mane rate God na Iesu amo no-mai kajeora ainge nombo enu peni be ena.

<sup>23</sup> Eto nei amo eingera. Levi ta priests amina ambuvujikitie pure toa amita veta veta pure ere uaetera, <sup>24</sup> te Iesu amo daroho ta priest avoeto Iesu ta pure hondate ari avo irae ra, <sup>25</sup> te embomeni hondate ue God ta degi penunu ijie kekaha te mitioi embo amuna God ta degi pambasi Iesu ta degi puvuja amo eha eto daroho irari embo avo hondate euja.

<sup>26</sup> Avoeto ungotena hondate ari haite Priest Iesu amita arimo do aingere? Amo otohu embo, ari sasapura ta tongopa irae eto ari sasapura embo na engekari inono ae utu i be ta irari embo ra. <sup>27</sup> Eto priests tapa amina embo ta sasapura te amita sapura te tapa avoeto iji vahai vahai pene gaga ta pene ikeora, rate ungotenau priest vahai Iesu na iji tapa pene ikae rate iji vahai amita hamo na pene iketo ungotenau sasapura tapa avo ombuto umbuna. <sup>28</sup> Eto Moses ta ke pepeni God na ikena amita priests amo ivo ambupu avoeto ari sasapura embopo ra te amita ambota God na amita javo ta ungotenau Priest ikenu puvuna amo ari sapura irae daroho irari ta Priest ikena amo amita Meni be avo ikena.

## 8

#### *Ungotenau Priest Peni Dombo amo Iesu ra*

<sup>1</sup> Eto ke erera amita be amo erevira. Ungotenau priest peni dombo amo Keriso ra eto amita ari amo ke erena vahai aravora. Eto amina utu i ta avo arumba Bada God ta ingeni be hena ta arumbeto mitie <sup>2</sup> Utu i degi otohu ai ta Bada God ta tombuta God ta ke agi ue pure ere ua eto degi otohu amo embo na ae rate God na ena. <sup>3</sup> Eto priests pepeni na o teto heveto amite donda nei nei amite tapa God ta vivi itiora te ungotenau priest peni amita hande ikeuja amo mitia. <sup>4</sup> Eto enda ta priest na Moses ta ke pepeni simba ue vivi itiora avoeto Iesu na enda ta iratija amo



priest mane aetija <sup>5</sup> Amita be amo enda ta priests na pure do eora amo utu ta do mitia amita aririvo avo ate kitira eora eto Moses na amo ainge dombo pene ikasi oro gerikitu God na Moses ta degi ke einge ena, “Eto umo tiri hamo ta do kea ainge dombo inono ta ejo.” ke ainge God na ena. <sup>6</sup> Eto ke be amo Iesu na priest eto pure aja ikena amo peni be rate enana ta pure amo isapa ra, eto God na embo ta degi ke ijie nomai eha kajena ai ta eto be javotoho puvuroja ena amo nomai matu kajena ainge manera. <sup>7</sup> Eto nomai kiti embo ta degi kajena amo ivo irae kito amo nomai eha mane ikaetija <sup>8</sup> Rate God na amita embomeni ta sapura harikitie ke einge ena, “Eto na Bada God na ne erena, amo iji puvuto ere hua avoeto Israel embomeni ta eto Judah embomeni ta nomai eha kajasona <sup>9</sup> amo nomai matu enana ta ohihi ta ingeni ta umbuto Egypt enda toto pahue kajea aingeko mane aisuja. Eto nau nomai matu kajea amita ke amo enana agi ae avo kito toa te na Bada God nanena erena. <sup>10</sup> Amo Israel embomeni ta nomai eha amo ambota kaitie ke einge aisona amo ke pepeni nau avo enana ta siro ta ikitie jo ta kikiva aisona eto na enana ta God ano enana amo embomeni nau aisona. <sup>11</sup> Eto embo peni te isapa te tapa na ari nau mo do aingere avo kiae ke ko mane aisona avoeto da vahai embomeni na namei ta degi ate poekitie ke einge, ‘God avo be kijo.’ ke aingeko avo mane aetera. <sup>12</sup> Eto enana ta ari sasapura avo hotembeto toasona amo ehako daroho irari ta mane hotembasona.” ke ainge Bada God na ena. <sup>13</sup> Eto God na nomai eha kajari avo ke ijie nomai matu kajari avo toau jaise eto saivasuja.

## 9

### *Nomai matu te eha te amina mo naingeto God jakeka eora*

<sup>1</sup> Eto nomai kiti kajari amo embo na bande iketo bande jo ai ta God osa ue jakeka ijie ari do asora amita ke pepeni neite neite avo God na

ikitu agi ere uaetera. <sup>2</sup> Amo embo na horoma peni vahai iketo horoma jo kaneketo amo Otohu Degi enu horivo te gaga te God ta hande ikari bread amite aingeto jo otohu ai ta mitiaetija <sup>3</sup> Eto horoma ai ta bo petutu koso vahai amina bokiri ikari amo degi javo Otohu be Otohu. <sup>4</sup> Ai ta amo God ta pene ikari gaga amo ‘gold’ na ari ai ta mune donda avo ikeo evekitie iposi mune te bitina eto ai ta amo nomai kajari amita goru otohu avo ‘gold’ na togari amita jo ta amo ovu ‘gold’ na ari amita jo ta amo indari javo ‘Mana’ ojaga tambu ta God na utu ta eto ikenu benu indie mitiaetera amo ovu jo ai juruketo goru ta juruketo Aaron ta hetu osiri eto tivine ena amite God ta ke <sup>10</sup> atara heriso amita hamo ta kajari amite aingeto goru jo ai ta jurukari mitiaetija. <sup>5</sup> Eto goru amita i hena ai ta amo o heriso gati te sago kiari amina God iriujia degi ai ta ate kitira ue gati na kakareketo God na embo ta ari sasapura hotembeto toari degi ai ta horoma arako ea. Eto donda vahai vahai ei ta mitia amita ke amo ei ta mane aisona. <sup>6</sup> Te amita irari degi ta siriketo ikeo inono enu priests na horoma jo araha hena ta pure ue toritiaetera te <sup>7</sup> horoma jo kanekari javo Otohu be Otohu ai ta amo priest peni amina jo ai ta jua vahai vahai amita jo ta iji vahai vahai torena amo sasaga umbae amo mane toraetija te embomeni na sasapura eto jenambu ea te God na mane jenambu asuja amite eto priest ta sasapura amite avo eto o ta sasaga umbuto God ta degi ikasi torena <sup>8</sup> Avoeto Ahihi Otohu na ke araha ta eria amo erevira, horoma jo kanekari ai ta ari do tapa ai ta irirou kito amo embo na God ta degi Otohu ai ta amo torari haite manera. <sup>9</sup> Eto ari emo iji eha amita ate kitira amo embo na o teto heveto o te donda nei nei amite God ta degi hande ikasuja te hande amina au ikari embo ta jo javotoho mane aisuja. <sup>10</sup> Eto ari amo indari te umo te amo hamo naingeto simba ururou tongopa ambu iresuja

amita ke pepeni ra. Eto embomeni na ari ainge ere uatera Iesu puvuna iji te amo God na ari mamatu avo toto enu ari ehaha pere ena. <sup>11</sup> Eto ari eha puvuto mitia amita jo ta amo Keriso na ungotenau Priest peni dombo eto mitie horoma eha ta pure ere ua amo enda God na ena amina mane eto embo ta ingeni na ae eto horoma matu ainge mane horoma eha peni be eto ari javotoho be ai ta mitie pure ere ua. <sup>12</sup> Eto Keriso na amita horoma eha utu i ta Otohu be Otohu ai ta toritie amo o 'cow' sianda ta sasaga te o 'goat' ta sasaga te avo umbuto torae rate amita sasaga avo umbuto toreto ungotena orekitie daroho irora ombuto umbuna. <sup>13</sup> Eto Priest na o 'goat' te o 'cow' sianda amita sasaga te o 'cow' meni borari amita amisa te aingeto umbuto embo ta hamo ta ihaja eo kuteo embomeni ta ari sasapura irae ena. <sup>14</sup> Eto ari ainge amo o ta sasaga na ere uaetera te Keriso na Ahihi Otohu daroho irari amita sovera umbuto amita hamo tongopa ambu na God ta degi hande javotoho be ikena avoeto amita sasaga na ungotenau hotembari ari sasapura amburari ta kiti umbarua avo egau javotoho ururou God vasiri te amita ke agi ue iresora.

<sup>15</sup> Avoeto Keriso na nomai kajari amita ke avo eha siriketo ere ua eto nomai eha kajari amita ke amo eingera, embo amunure avo God na jage asi ena avo ai ta daroho mitie God na irari javotoho ikasi ena avo ikau umbasora. Eto nomai matu kajari ai ta embomeni na ari sasapura isapamane ea rate Keriso na ambuto embomeni ta ari sasapura oreketo umbuna.

<sup>16</sup> Eto embo na amburesi ue amita donda avo meniundi ta hekeri eto ikari <sup>17</sup> rate amburae mitioi amo mane umbuora te amburesuja amo donda tapa amo hekeri eto umbuora. <sup>18</sup> Eto ainge nombu nomai kiti kajari ai ta embomeni na o teo ambuto sasaga bovunu enana ta ari sasapura hotembeto toari amo ai ta umbua. Eto ari amo einge ea, <sup>19</sup> Eto Moses na God ta ke pepeni tapa avo embomeni

ta hande enu irae enu o 'goat' te o 'cow' sianda amita sasaga te umbo te aingeto konereketo o 'sheep' ta tu ove pangari amite, aingeto javo 'hyssop' amina timbuto umbuto God ta ke kajari aita eto embo ta hamo ta teterenu bovunu, <sup>20</sup> ke einge ena, "Eto ungo ke agi ava God na etija amo sasaga emina etei inono etija," ke ainge eto <sup>21</sup> horoma te pene ikari degi amite donda tapa amite aingeto Moses na sasaga amina tetere enu bena. <sup>22</sup> Eto ke be amo Moses ta ke pepeni mamatu amita ari amo sasaga amina ere egitiaetera. Eto sasaga overeketo beae amo ari sasapura mane hotembeto toaetija.

*Keriso ta hamo ikena amo daraho irari ta hande ikena*

<sup>23</sup> Eto God ta pene ikari donda amo utu i ta iriua amita ate kitira avo o sasaga na ere egitiaetera eto pene ikari donda be utu i ta mitia amo o sasaga na mane egeora te donda peni be amina egeora. <sup>24</sup> Rate ke be amo Keriso na embo ta ingeni na ae degi utu i otohu be otohu degi ai ta toreto God ta titi ta ungotenamo avoembo pure ue mitia. <sup>25</sup> Eto Judea embo ta priest pepeni na o sasaga umbuto degi Otohu be Otohu ai ta jua vahai vahai amita jo ta iji vahai vahai toreto God ta degi pene ere ikitiaetera <sup>26</sup> Rate Keriso na iji tapa hamo amita avo pene ikae rate iji vahai pene ikena. Rate God na enda te utu te ena eto puvuto eha emikote amo Keriso na hamo amita avo kaikari pene ikitie amo memenga iji neite neite kiaetija <sup>27</sup> te embo tapa na amburoro God na enana ta ari sirikasi ena <sup>28</sup> Avoeto Keriso na iji vahai amita hamo na pene ikitie ambuto embo isapamane ta ari sasapura ombuto umbunu irae ena, avoeto embomeni na Keriso ehako puvuresuja ijie simba ere ovora avo Keriso na puvuto ari sapura ta pene ehako mane ikasuja te embomeni avo orekitie toreketo umbuto utu ita pambasuja.

## 10

<sup>1</sup> Eto Moses ta ke pepeni agi ue Judea embomeni na iji tapa God ta degi pene gaga ta ere ikitiaetera te ke pepeni amina embo javotoho ari inono aera, amita be amo Moses ta ke pepeni amo ari be mane rate ari be puvuresuja amita ate kitira. <sup>2</sup> Eto embo na o teto pene ikari amina embo jajavotoho ari inono kito embo na amita ari sasapura matu umbari irae ari avo kito amo pene ehako mane ikaetija <sup>3</sup> rate enana jua vahai vahai amita jo ta enana ta ari sasapura avo hotembitie pene kaiketo ere ikitiaetera <sup>4</sup> amo o 'cow' sianda te o 'goat' te eto o tapa amita sasaga na embo ta ari sasapura amo egari irae ari inono ae ra. <sup>5</sup> avoeto Keriso na enda ta puvuresi ue God ta degi ke einge ena, "Eto embomeni na Umo jakeka ijie o teto heveto pene neite neite ue ikeora avo inena kogue jenge hoae ere ua avoeto hamo nau avo siriketo ikasi ere oa. <sup>6</sup> Eto nei amo embo ta ari sasapura irae aja o teto heveto pene gaga ta ikeore evekeuja avo inena kogue jenge hoae ere ua. <sup>7</sup> Avoeto, God nau, ke erena amo no uje ana ke matu kajari mitia avo ano inono inono aja asi uje ue puvena." ke ainge Keriso na ena. <sup>8</sup> Eto ungo ke ingeva amo Keriso na ke kiti ta einge ena, "Eto Moses ta ke pepeni agi ue ari sasapura avoeto o teto heveto ikeore i ta evekitioi pene neite neite eora te ari ainge avo inena kogue jenge hoae ere ua." ke ainge ena. <sup>9</sup> Te ke nei tutumota amo einge ena, "Na uje no avo asi puvena," ainge ena amo ari matu avo toau irae ururou ari eha itiketo asi ue ena. <sup>10</sup> Eto God ta uje ena amo hamo amita avo pene gaga ta ikena amo iji vahai ikena rate amo daroho irari ta pene avoeto amina ungotena otohū ere ora. <sup>11</sup> Eto ari matu amo eingingera, eto Judea ta priests na iji tapa o teto heveto pene gaga ta hande vahai aravo iji tapa kaikari ikeora te hande amina ari sasapura irae ari inono aera. <sup>12</sup> te ungotenau priest vahai eha puvija amina ari sasapura

ta hande iji vahai ikenu inono enu bitito God ta ingeni be ta arumbeto mitie <sup>13</sup> amita kitoho embomeni taro beau amita utu avo embomeni ta hamo ta haito iresuja iji avo simba ue mitia. <sup>14</sup> Eto God ta embomeni tongopa ambu ue au otohū ara God na siriketo umbuna avo pene vahai amina enu enana ta ari sasapura irae enu embo jajavotoho eora.

<sup>15</sup> Eto Ahihi Otohū na ungotenau degi ta ke aravo araha ta hariketo eria amo einge kajari mitia, <sup>16</sup> "Eto Bada God na ke einge eria 'Na nomai eha kajari ta ke asona amo einge asona, nau ke pepeni tapa amo embo ta jo ta eto hotembari ta kajasona.'" <sup>17</sup> Eto ke nei ena amo erevira, "Na enana ta ari sasapura te ke pepeni poekari te avo ehako mane hotemba-sona," ke ainge ena. <sup>18</sup> Amo ari sasapura matu hotembeto toari avoeto ehako mine mane aisora.

### *Ungotena God ta degi tombekasora*

<sup>19</sup> Avoeto namei kamei, ungotena kogora amo Iesu ta sasaga amina ungotena degi Otohū be Otohū amita jo ta torari haite <sup>20</sup> Amo degi peikari be matu avo toto bo eha vasiri te amo Iesu ta hamo ai ta torasora. <sup>21</sup> Eto God ta bande Otohū ai ta amo ungotenau Priest Peni Dombo be amina mitia <sup>22</sup> Avoeto ungotenau jo ari sasapura na tongopa avoeto hotembu hotembu eora avo sasaga na umbuto jahevau javotoho au umō javotoho na umbuto hamo ta tongopa egau javotoho au jo tapa na God tumota ue God ta degi puvuresora. <sup>23</sup> Eto ke Ikari Embo avo tumota ari haite avoeto amita degi do umbasi uje ere ora amo ihikitoki mane asora te titi tambueto ere pahuma umbasora <sup>24</sup> Eto ungotena naingeto osa mine ara ue ari jajavotoho asora amita ke avo onde katari mine ara aisora <sup>25</sup> Eto embo nei nei amo vahai ta torukari peive ere ora te ungotena vahai ta torukari avo mane toasora. Eto Bada ta puvurari iji avo puvuto ere hua avo kito sovera ari ta ke javotoho mine ara evujo.

<sup>26</sup> Rate embo amuna God ta ke be avo ingito ari sasapura toae kaikari aisuja amo amita ari sasapura ta pene Keriso na ikena avo iraera <sup>27</sup> te embo amina ari sapura ta hajire God ta degi umbasuja eto God na amita kito ho embo i bevere pajire be ta ikau evikitirou ari avo amita degi puvuresuja amo umo kiari avoeto joru ue iresuja. <sup>28</sup> Eto ari matu amo eingera, eto embo vahai na Moses ta ke pepeni avo amita uje na sapura unu embo nei heriso nei vahai na kito harikeo embo amo ihase ae teo ambuna. <sup>29</sup> Ainge nombo God ta Meni ta sasaga ari eha ta overekari amina embo egari javotoho ari haite rate embo amina God ta Meni ta sasaga be mane ke ijie Ahihi Otohu ta degi urumbitie God ta Meni haito jaevekasuja amo amita ari sapura avo eto hajire peni vahai ngahia na ikau kesuja. <sup>30</sup> Eto God na ke einge ena amo ungotena kiari amo, “Enana ta ari sapura ta mine amo nanena ikasona,” ainge ena eto ke nei amo, “Bada na amita embomeni ta ari tapa avo siriketo amita hajire ikasi ke ena.” <sup>31</sup> Avoeto embo na God vasiri te amita ingeni ta beaute avoeto joru pajire be ue osaga kesora. <sup>32</sup> Eto ungo God ta usasa kiti uhava avo hotembevu. Eto iji amikote amo ungo na embo nei ta degi osaga memenga uhava te toae sovera eto mitiaeteva. <sup>33</sup> Eto iji nei nei amo ungonā embo tapa ta titi ta urumbari te memenga te kogava eto iji nei amo ari ainge nombo namei kamei nei ta degi eo osaga koguo ungo na jo unu hondate ava. <sup>34</sup> Eto ungota namei kamei tipura ta ikeo mitio ungo na jo enu hondate ava. Eto ungota haja vajae egimbeto umbua te ungota daroho irari ta donda nununga ari avo hotembitie mine do ae toava. <sup>35</sup> Eto ungota ando ta sovera ari amina ungota hotari peni be avo umbasova avoeto ando ta sovera ari avo gosukavojo <sup>36</sup> Eto ungo God na hotari umbava ke ena avo sovera eto God na ungo do ava

uje ere ua avo ere uma hotari avo umbasova. <sup>37</sup> Amita ke amo einge kajari mitia, “Eto iji isapa eto Embo puvuresuja amo porere mane aisuja te puvuresuja. <sup>38</sup> Eto embo nau javotoho amina Na tumota ue iresuja te Na toasuja amo Na amita degi tumo aisona.” ke ainge kajari mitia. <sup>39</sup> Rate ungotena God egikari embo mane avoeto God na au daroho irari ta osaga memenga mane kesora te ungotena God tumota ururoro amo God na oreketo umbari embopo ra.

## 11

### *God tumota ari be amo erevira*

<sup>1</sup> Eto ari do puvuresuja amo kiae rate ke be ijie eora. Eto nei amo titi na kiae rate ke be eora eto ke ainge amo tumota ue eora. <sup>2</sup> Eto tumota ari ainge avo embo mamatu na uo God na kito javotoho ke ena <sup>3</sup> Eto ungotena titi na kiae donda avo God na amita ke na enu enda te utu te irerembena avo ungotena kogue tumota eora. <sup>4</sup> Eto matu be ta embo Abel na God tumota ue God ta hande javotoho ikena amo Cain ta hande ainge manera te Abel na God tumota ena avoeto God na Abel ta hande kito osa ue embo javotoho ke ena. Eto Abel sari ena te Abel ta tumota ari amina ungotenau degi ta ate kitira ue ke euja. <sup>5</sup> Eto embo Enoch na God tumota ere uaetija avo God na kito tunga javotoho eto Enoch amburae vasiri te utu ta umbuto pambunu embomeni na jombure ea rate tambae ea. <sup>6</sup> Eto embo na God ta degi sio mane huresuja rate God mitia avo ke be ijie God jo tapa na jombure euja embo avo God na hondate aja ke be ijie huresuja, te God tumota ae embo amina au God tunga javotoho mane aisuja. <sup>7</sup> Eto Noah na God tumota ena amo ari do puvuresuja avo God na harikenu ingito God otohu avo eto joru ue e nga pajire be geriketo amita ae te meni undi te orekena eto ari ainge amo embo vahai amo javotoho, eto embo tapa amo sasapura avoeto God na enu embo tapa sasari eo Noah



avo God tumota ena avoeto God na Noah embo javotoho ke ena. <sup>8</sup> Eto Abraham na God tumota unu kito God na enda nei amita ikasuja enda ai ta pambaja enu ingito da matu avo toto degi nainge pambasuja amo kiae rate teho pambuto <sup>9</sup> Enda ai ta God tumota ue hari tumbuto tembarako ue horoma eto mitiaetija amo amita meni Isaac te Jacob te aingeto enda amo God na ikau enana ta enda toho aisuja ai mitiaetera <sup>10</sup> Rate God na amita da be avo hotembeto kogombeto ikau daroho iresuja avo Abraham na simba ere uaetija. <sup>11</sup> Eto Abraham amo kerembo eto amita ae Sarah amo meni umbae mitiaetija rate God na Abraham ta degi onde ena avo Abraham na God ke be ijie tumota ena, avoeto be ikenu Sarah na meni umbuna. <sup>12</sup> Amo ainge nombo kerembo ena ijite amita degi be isapamane tarama ainge eto hora ainge etekari inono ae avo titimbeto degi enetena. <sup>13</sup> Eto embo tapa eremina God tumota ere uatera sasari ea. Eto enana God na do umbara onde ena amo umbuto titi na kiae rate hoi ta avo titi na kogue tunga javotoho ue dago enda erevi embo manera te ijo hujo ari embomeni enda nei ambota puvuresuja avo embopora ainge ijie mitiaetera. <sup>14-15</sup> Eto enana ta enda matu toto pambua avo kaiketo hotembae avoeto ke ainge ae amo egerembeto enana ta enda matu ta puvuraeterate enana ta enda be avo puvuresuja avoeto simba ue ke ainge ea. <sup>16</sup> Eto enana ta enda be eto da be amo God na nununga eto simba ue mitia eto enana God tumota ea avoeto God ke asora amo God na meki meki mane kesuja. <sup>17-19</sup> Eto God na Abraham ta degi onde ue no ahihije isapamane na no meni Isaac ta eto puvuresuja ainge onde ena rate Abraham na God tumota be aute avo God na kesi Abraham na God embo amburari au vasiri te erari haite embo Abraham amina God tumota ue meni tasi unu God na taekena te ungotena timu hatirari ke na Isaac vasiri te erenu Abraham ehako umbuna ainge aetera <sup>20</sup> Eto nei amo Isaac na God tumota ue iji

ambota do puvuresuja avo eto meni Jacob te Esau te amita degi onde katari javotoho ikena. <sup>21</sup> Eto Jacob na God tumota ena avoeto kerembo eto amburesi ue hetu umbuto kaeto heteto God jakeka ijie amita meni Joseph ta meniundi ta degi onde katari ikena <sup>22</sup> Eto Joseph God tumota ere uaetija amita amburari iji auvenu Israel embomeni na Egypt enda toto pambasi ue amita popo ga umbuto pambara ke ena <sup>23</sup> Eto Moses ta e te mamote na God tumota ere uaetera avoeto meni Moses ingena amo meni nei ainge mane meni javotoho kito king na meni singa isasaraho uhore toruaetija amo enana oju ae hariga 3 amita jo ta ondikeo mitiaetija. <sup>24</sup> Eto Moses na God tumota ere uaetija avo embomeni na Moses te King Pharoah ta iae ta meni ke eora uje ae ena <sup>25</sup> Eto ari sasapura ta gamo iji tuho avoeto toto God ta embomeni ga tapa osaga memengakina. <sup>26</sup> Amo Moses na ambota hotari pajire be umbasuja avo hotembitie Egypt enda ta hajae vajae tapa toto Keriso puvuresuja amo koguate amita embomeni ga tapa osaga kina. <sup>27</sup> Eto Embo titi na mane kiora avo tumota ue sovera umbuto king ta tumo joru ae ue Egypt enda toto titi tambueto pambuna. <sup>28</sup> Eto Moses na God tumota ue o ta sasaga umbuto bokiri pe i ta kutara enu kuteo anera na beto o ta sasaga kito Israel embo ta meni bugo tae toto jaruketo pambuna. <sup>29</sup> Eto Israel embomeni na God tumota ea avoeto umo eva pangari avo orohuta tiuketo ombo enu embomeni embuto ovitihio ta pahuo Egypt embomeni ambota puvuto pahuo umo na ajekenu indito sasari ea. <sup>30</sup> Eto Israel embomeni na God tumota ue da Jericho ta atara na huga tigarako eto joekari avo bambute bambute jorereto pahuo iji 7 irae enu atara karau eto benu da jo ta toreto isoro eto da Jericho amo umbua. <sup>31</sup> Eto Israel embopo na pambuto isoro embo doingere avo tapa poeto kito egerembasi uo viro pamone vahai javo Rahab amo

God tumota ari pamone amina embo hondate eto ondikenu isoro puvuto God ke be ae embopo tapa tea te pamone amo tae toa. <sup>32</sup> Eto ke nei do ano? Iji inono mitirou kito amo embo Gideon te Barak te Samson te Jephthah te David te Samuel te peroveta tapa amita hihi avo ka-jaetena <sup>33</sup> Enana amo kitoho embopo ta degi isoro eto nembeto God ke be ae embopo ta degi hajire iketo God na enana ta enda toho avo onde ena avo umbua. Eto enana amo o 'lion' ta pe vahaika <sup>34</sup> i peri eo jamo ena isoro asivo ta ti tiumbeto pambua eto enana ivo ambupu amo God na enu ivo ue isoro eto enana ta kitoho embopo amo nembea. <sup>35</sup> Eto embo ambuvujekari avo vasiri te ereo pamone na umbuto tunga javotoho ea. Eto embo nei amo kitoho embo na torore memenga ere kogora te ambuto vasiri te ereto javotoho kesora avoeto toto pambari uje ae ea <sup>36</sup> Eto nei amo kitoho embo na urumbitie ere ejimbitiaetera eto nei amo chain na punduto tipura ta gosukitiaetera. <sup>37</sup> Eto nei amo atara na tea nei amo 'saw' na jeto jirekitiaetera nei amo asivo na kajeo ambuvujekea. Eto nei amo ombari asari irae 'sheep' ta ando eto o 'goat' ta ando asuketo pahuaore kito hoivo embopo ke ijie urumbitie memenga ere ikitiaetera. <sup>38</sup> Amo enda ta mume avoeto enana embomeni ototohu amina kuho sindeto ojaga tambu ta eto tiri ta eto panga to ta eto enda to ta pambuto mitiaetera.

<sup>39</sup> Eto enana tapa God ke be ijie tumota ere uatera avo God na kito amo javotohora ainge ena te God na do umbara onde ena amo umbaera <sup>40</sup> te ungotenamote tapa umbuto tunga javotoho ue daroho iresora avo God na sirikena avoeto aisuja.

## 12

*Eto God na amita meniundi ta degi onde katari memenga te ikeuja*

<sup>1</sup> Avoto God tumota ari embo matu isapamane na ungotenau ate kitira ea amo ungotena enana na

joeketo kogue mitere vasiri tutumota tutuveto nembari embopo na arako ere pahora amo ari sasapura rete nei deina andirari avo tojikaro karaun eto beau ando ta sovera ari umbuto <sup>2</sup> Iesu titi na kon eto kogue tutuvasora. Eto ungotena God naingeto tumota eora amita ate kitira amo Iesu na matu kiti pambuna amo ungotenau kiti umbari embora. Eto Iesu na i atahu ta taro me kioja tea te iji ambota tunga javotoho ari God na ikasuja avo hotembitie me kiae teho ambuto vasiri te ereto pambuto God ta avo arumba peni ai ta ingeni be ta arumbeto mitia. <sup>3</sup> Eto Keriso na sasapura embopo ta ingeni ta memenga osaga kina te toae sovera ena avo ungo na hotembitie jopapa ue pegogo mane aisova te sovera eto irivujo.

<sup>4</sup> Eto ungo enda ta ujeje sasapura ta degi isoro ere ovova te isoro amita jo ta amo ungota sasaga enda ta beaera <sup>5</sup> Eto ungo Bada God ta meniundi ke ijie ungote ando ta sovera ari umbava kajari avo jenambu ue mitovova amo eingera. "Nau meni, Bada God ta onde katari ke avo ingito ganini ke aojo eto amita isembari avo oju aojo" <sup>6</sup> eto amita be amo God na embo osa ere ua avoeto onde katari ke aisuja eto amita meni be au umbasi ue amita degi memenga ikeoi kiuja <sup>7</sup> Eto mamone na meniundi onde katitiore kiari umbuora avoeto ungo ari memenga te kogue kito dago God ta meniundi be avoeto onde ere katitia ainge ijie sovera ambuvujo. <sup>8</sup> Eto God ta onde katari ke avo ingae aisova amo ungo amita meniundi mane rate tiha meni ra eto God amo ungota Mama manera. <sup>9</sup> Eto ke nei amo ungotenau enda ta mamamane mitera amina onde katitiore ingito otohu ue agi eora ainge nombo ungotenau Ahihi ta Mama amita ke agi ue vasiri te iresora. <sup>10</sup> Eto ungotenau enda ta mama na amita hotembari na onde kateuja te God amo otohu avoeto ungotena ainge otohu ue javotoho be ara onde katitie memenga ikeoi

kiora. <sup>11</sup> Eto memenga kogue amo osaga kiora te memenga amita be puvurou amo memenga kiuja embo amina God ta titi ta embo javotoho ue tunga javotoho ue peka ta iresuja.

*God egikeora amita onde katari ke*

<sup>12</sup> Avoeto ungota ingeni te utu paunge te buvure irae avo evu sovera ai <sup>13</sup> Eto ungota utu ta pambari degi avo evu bisi bisi au degi ai ta popora ari embo pahurou utu mane pouvasuja te pahue utu gorasora.

<sup>14</sup> Eto ungo pure tunga iketo embo tapa peka umbuto ari otohu jigama ue irivuho eto ari otohu umbae embo amina Bada ta tombu mane kesuja.

<sup>15</sup> Eto ungo ari erevi be kogue irivuho, eto embo na God ta hondate ari avo umbasi uje euja te eoi tarasembeoi touja amite eto embo ta hotembari sokova na ungota jo ta ereto ese saruka na embo ta jo ta saruka euja amite tapa simba evujo. <sup>16</sup> Eto embomeni tiha paiha eora avo simba evujo, eto nei embomeni na God hotembae eora eto embo matu Esau ainge God hotembae ue eambo ta degi hotari ombuto indari indinu irae enu <sup>17</sup> Amboṭa hotembeto hotari ehako umbasi si te kekaha te ena te mamona jo ahereketo ehako ikari inono ae ena avoeto simba evujo.

<sup>18</sup> Eto ungo eha miteva amina ae rate ungota ohihi na tiri amo ingeni na tame ari haite ai ta i perimbeto evikitie usasa unu mume kambujoro te ga te pisara te utu tururu te unu embomeni kito oju ea. <sup>19-20</sup> Eto huin ta asavi te ke peni vahai be eto embo rete o rete na tiri erevi tame aisuja amo atara na tevujō amburoi ainge ijinu ingito oju ue ke avo ingari uje ae ue penunu ea. <sup>21</sup> Eto Moses te tapa kiari nei kito oju ue tatatata ena.

<sup>22</sup> Eto ungo tiri nei javo 'Zion' amo God vasiri te iriujā amita da Jerusalem utu i ta mitia ai ta puveva. Eto ai ta amo anera isapamane be etekari haiteko mane amina vahaita toruketo tunga javotoho ue mitera.

<sup>23</sup> Eto God ta meniundi be javo utu

i ta kakajekari avoeto hotari ikau umbasora amita ekalesia ta degi puveva. Eto embo ta ari siriketo hajire ikari Embo, God, amina embomeni enu embo jajavotoho eto amita ahihi ta irari degi ta puveva. <sup>24</sup> Eto ungotena naingeto God ta degi pambasora amita kiti umbari embo Iesu amo ai ta mitia. Eto Abel ta sasaga overekena avo isapa rate Iesu na sasaga overekena amo ke be avoeto ungotena God Otohu ue jakeka eora.

<sup>25</sup> Avoeto Embo ungota degi ke eria avo ingito ingarako avojo. Eto enana enda ta mitie Embo amita ke ingari uje ae ue ari amita memenga avo tiumbeto pambari inono ae ere uaetera eto eha Embo utu i ta mitie ke eria avo ungo ingae asova amo naingeto God ta tumo te memenga te mo tiumbeto pambavo. <sup>26</sup> Eto iji matu kiti ta amo God na ke ijinu enda tiro tiro ena eto God na ke einge eria, "Na ke ehako ijirono amo Utu te enda te tiro tiro aisora." ke ainge ena.

<sup>27</sup> Amo God ta ingeni na ari avo tiro tiro eto irae aisuja te donda nei tiro tiro ari inono ae donda amina pere hetasuja. <sup>28</sup> Avoeto ingivuho, God ta irari degi amo tiro tiro ari inono ae ai ta ungotena simba ururou daroho iresora. Avoeto ungote God osa ue otohu ue jakeka asora. <sup>29</sup> God amo i ainge be donda tapa eveketo irae ari God aravora.

## 13

*Ari do ururoro God na kito osa aisuja*

<sup>1</sup> Eto iji tapa namei kamei ari na osa mine arā evujo. <sup>2</sup> Eto umo kiae embo avo puvurou kito amo osa ari na jumbuhe pagihe evujo, amita be amo iji nei nei ainge anera avo embo tambu ke ijie unduora. <sup>3</sup> Eto enana tipura ta mitera avo hotembevujō. Eto ungonā tipurata mitie tunga ta do hotembaeteva avo ungo na kogue enana hotembitie teki evujo. Eto enana embo nei ta ingeni ta mitie osaga memenga ere kogora avoeto

ungo na ainge osaga memenga kiateveva avoeto enana hotembevujō.

<sup>4</sup> Eto embo ta jimbari amo otōhura ainge evujō eto tiha pahia te oine sasapura eora amo God na kito memenga ikasuja.

<sup>5</sup> Eto ungota donda mitia avo kito tunga javotoho ue koro ta tunga mane ikasora te God na ke einge eria avo hotembevujō. “Na umo mane toto pambasona te ungote iresona,” ke ainge eria. <sup>6</sup> Avo hotembitie sove sove eto pahue ke einge evujō, “Bada amo nau hondate ari Embo avoeto embo na nau degi ta do aisuja avo joru mane aisona,” ainge evujō.

<sup>7</sup> Eto ungota titi jigari embopo amo God ta ke ungota degi hande ea amo enana ta ari avo ungota degi ate kitira ea amo God tumota ue ea avo ungo kogue ainge God tumota evujō.

<sup>8</sup> Eto Iesu Keriso na iji eha eto iji ambota eto iji mahainge irari ta hajire nei mane aisuja te hajire vahai avo iresuja.

<sup>9</sup> Eto ungotena God ta degi indari hande ikari amina indito ahihi ta sovera ari mane umbuora te God ta hondate ari amina ahihi ta sovera ari amo umbuora avoeto embo ta ate poekari sapura neite neite avo be hotembavojo <sup>10-11</sup> Eto Judea ta ari matu ai ta ari sasapura ta o teto pene ikari amo priests na ikeore priest peni amina sasaga umbuto degi otohu be otohu ai ta toreto embo ta ari sasapura avoeto ikeauja te o be avo indae umbuto pambuto da sahu ta undukeaore evekitiaetija.

<sup>12</sup> Eto Iesu na da sahu ta pambuto memenga kogunu sasaga amita na embomeni tohota avo otohu ea. <sup>13</sup> Avoeto Iesu na da sahuta pambuto osaga te memenga te urumbari te kina avoeto da sahu ta amita degi huma kesora. <sup>14</sup> Eto enda ei ta ungotenau da be iraera te ambota puvuresuja avo kesi simba ere ovora.

<sup>15</sup> Eto ungotenau pe na Iesu ta javo ke be ijie ke hande eora amo ungotenau pene God ta degi ikitie jakeka eora. <sup>16</sup> Eto embo ta degi ari javotoho ue hande ikari avo jenambu avojo ainge

amo God ta degi pene ikarako ere ova avoeto God na osa euja.

<sup>17</sup> Eto ungota titi jigirikari embopo na ungo simba ere ora amo enana ta embo okose ta aro ingesuja avoeto ungo simba javotoho be ere ora eto ungonā enana ta ke peive aisova amo memenga kogue ungota degi ari javotoho mane aisora avoeto enana ta ke agi ururovo enana tunga javotoho ue pure javotoho aisora. <sup>18</sup> Eto dago ei mitera avoembo pari evujō. Dago iji tapa ari jajavotoho pere ue iresi ere ora avoeto dagota jo ta ari sapura ta memenga iraera <sup>19</sup> Eto na ungota degi pambasi uje ere ona amo peni be avoeto ari vahai avo irae aja pari evujō na pambane.

#### *Pari*

<sup>20</sup> Eto peka umbari embo God na o ‘sheep’ simba ari embo javotoho Bada Iesu avo enu vasiri te erenu amita sasaga na ari eha ta daroho irora ena. <sup>21</sup> Eto God na ke amita avo agi ara ari jajavotoho ikau umbuto amita ujeje avo pere aisora. Eto ungotenau jo ta Iesu Keriso ta javota pure ere uma kito osa aisuja eto amita degi usasa iresuja, Amen.

#### *Ke tutumo*

<sup>22</sup> Nau namei kamei nau onde katari ke erevi ingova erena amo ke koso mane ere kaitona <sup>23</sup> Eto ungotenau namei Timothy avo tipura ta mitia avo etere tambuta puvija avo ingivujō, eto nau degi ta sausau puvurou kito amo amiga ungo kesi pambasona <sup>24</sup> Eto ekalesia ta titi jigirikari embomeni te ungo God ta embomeni te tapa ere pekitora. Eto enana Italy enda ta mitera amite tapa ungo ere pekitora. <sup>25</sup> God ta hondate ari ungota degi iroi.



## JAMES

### *James Otohu ta onde katari ke*

<sup>1</sup> Ahari erevi, na James, God ta Bada Iesu Keriso ta pure ari embo nane ere kaitena. Eto ungo Israel javo vahai tapa 12 enda tapa ta sio pambuto iriova avo ere pekitona.

### *Tumota ari te ke be kiari*

<sup>2</sup> Nau namei kamei ungo ta degi osaga nei te nei te puvuresuja avo kito tunga javotoho evujo. <sup>3</sup> Ungo kogova amo ungo osaga kogue irirovo God na ungota degi tunga jamo ari ikasuja eto ungo osaga avo tiumbeto pambasi mane hotembasova <sup>4</sup> rate God tumota ue tunga jamo ari ungo ta degi pajito inono au ambota ari sapura do puvuresuja ai ta mane ereto sapura aisova te ari javotoho aisova.

<sup>5</sup> Eto ungo amuna ari sapura davore ari javotoho davore amita kiari umbasi uje eto kito God ta degi penunu eto umbuvujo. Eto God amo hande embo be amina tumo ae ue embo ta degi kiari aravo hande ikeuja. <sup>6</sup> Rate embo amuna Bada be tumota ae ue hande avo penunu aisuja amina umbasi mane hotembasuja, tumota be ae avoeto. <sup>7</sup> Embo avo i sirivo eva piri hamo ta ainge pisara na umbuto egahu egahu ue <sup>8</sup> pambuja hotembari heriso ta ere pahua avoeto Bada ta degi nei do penunu aisuja avo mane ikau umbasuja.

### *Donda embo te donda irae embo*

<sup>9</sup> Avoeto Christian namei amuna donda ambu eto osaga ere kogue amo Keriso ta degi embo nombo eto tunga javotoho ere ua. <sup>10</sup> Eto namei nei embomeni na matu embo nombo eto haja baja embo ke ijiera rate donda irae etei embo teho ke eora embo amo Keriso ta tohora avoeto amina tunga javotoho aisuja <sup>11</sup> amita be amo amita haja baja avo sasaha koru ainge iji bevare na kajeoi jaise eto karaun eto beuja eto haja baja

embo ainge nombo amburesuja eto amita pure nei te nei te irae aisuja.

### *Ari sapura ta ke gamo ingito avojo*

<sup>12</sup> Eto embo na ari sapura amita ke gamo ingiua rate mane euja te sovera euja amina tunga javotoho aisuja amita be amo embo amina vasiri datofo God ta degi hoteto umbasuja. Eto embo tapa amuna God osa aisora amita degi God na hotari ikasi ke ena.

<sup>13</sup> Eto embo amuna ari sapura ta ke gamo ingito asi uje aisuja amina ke einge mane aisuja, “Ke emo God na etei ingito asi ereona.” ainge mane, God na ari sapura mane aisi uje euja eto embo ari sapura ara ke gamo mane euja. <sup>14</sup> Rate embo vahai vahai ta ujena ujena na ari sapura kito ai pambasi uje eora. <sup>15</sup> Eto uje sapura amita be ikari amo ari sapura ra, eto embo ta degi ari sapura pajito inono au amburari puvuresuja. <sup>16</sup> Avoeto nau namei kamei ke sokova ta pambavojo. <sup>17</sup> Ari sapura ta ke gamo God ta degi mane puvuja rate God ta hande tapa amo javotoho pere eto God Mamo Utu ta usasa ari embo amita degi hande tapa ikeoi puvuja, eto God mane nei aisuja eto kuho sindeto usasa seiketo nango mume ta irora mane aisuja. <sup>18</sup> Amo amita ke be na embo amita toho ere uhua eto donda tapa God na ena amita degi ta eto ungotena nombo be ara ere ua.

### *Ke ingari te ke agiari*

<sup>19</sup> Eto namei kamei ke erevi ungo matu kiarira avoeto ke mane sausau aisova te ke sausau ingivujo. Eto tumo sau sau mane aisova <sup>20</sup> amita be amo embo javotoho aja God uje euja rate embo amita tumo na javotoho mane aisuja. <sup>21</sup> Eto ungota degi hotembari sasapura te ari sasapura tapa do mitia avo ejo irae au God na ke ungota jo ta urena avo sisire ae osari na pekari na unduvujo ungo oreka ai.

<sup>22</sup> Eto God ta ke ingari pere ari irae amo sokova ra. <sup>23</sup> Embo amuna God ta ke ingito ae euja amo

embo na amita aririvo umo ta kiuja ainge nombora, <sup>24</sup> embo amina amita tombu do ainge kiuja rate umo toto pambuto jeneambu euja ainge nombora <sup>25</sup> rate God ta ke javotoho na embo orekeuja eto embo amuna ai ta kaiketo ingiuja eto ingari pere mane rate ingito jeneambu ae euja amina iji tapa tunga javotoho aisuja. <sup>26</sup> Eto amuna “Na God jakeka ari embora,” ke euja rate amita ivivi tongopa te ra embo amita tumotepain ari amo sapurara. <sup>27</sup> Rate God Mamo na tumotepain ari kito javotohora ke euja amo eingera. Embo na pamone dodoru te meni hojojo te ta osaga kito jo ue unduja eto enda ta ari sasapura ta mane pambuja ari ainge God na kito javotohora euja.

## 2

*Embo nei peni embo nei teho ke avojo*

<sup>1</sup> Eto nau namei kamei, ungo na ungotenau Bada usasa te kiari isapamane te Iesu Keriso tumota eova avoeto ungo na embo nei donda te avo nombo ke ijie embo nei donda ambu avo sapura ke mane aisova. <sup>2</sup> Eto ungo giu ururovo embo vahai bo javotoho asuketo ingeni pupunge gold na ari asuketo puvuresuja eto embo nei donda ambu te bo perarari te puvuresuja <sup>3</sup> eto ungo donda te embo jakeka ue amita degi ‘arumbari javotoho ei ta arumbaote’ ke asova te donda ambu embo ta degi ‘Umo ai hete’ o nei ‘Umo enda ta arumbe’ ainge asova <sup>4</sup> amo embo nei javotoho nei sapura ke aisova eto embo sirikari ainge amo sokova ra avo ungo kiaere? <sup>5</sup> Namei kamei ingivujo, enda embomeni na embo nei donda ambu embo ke eora, rate God na enu enda ta donda ambu embomeni na God be tumota eora. Avoeto enana na God ta degi hotari umbasora, avo tapa amuna God osa eora amita degi ikasi ke ena. <sup>6</sup> Rate ungo na donda ambu embopo ta degi me kiari ereova rate ungo kogova amo haja baja embo na ungota degi

ngahia ue andito umbuto ganoka ta ere ikitera <sup>7</sup> eto Iesu na amita javo otohu iketo ungo amina saso ari ke ena, <sup>8</sup> rate enana haja baja embopo na javo aravo eore sapura euja eto ungo ke be na God ta ke pepeni amita ke ta kajari avo “inena umo oenga osa ere oa, ainge nombo no namei osa ue amita degi javotoho ejo,” avo agi ereoa amo javotoho ere oa <sup>9</sup> rate umo embo nei javotoho nei sapura ke asoa amo God ta ke pepeni ere poekitea <sup>10</sup> eto embo amuna God ta ke pepeni vahai poekasuja amo ke tapa poeketea aravora <sup>11</sup> amita be amo God na, “Umo tiha mane aisoa.” eto, “Umo embo nei mane tao amburesuja.” ke ena te umo tiha ae rate embo tao amburesuja amo ari sapura eto God ta ke pepeni tapa poeketea aravora <sup>12</sup> rate God na enu ungo ari sapura na andiraera avo hotembu ue amita ke pepeni agi ue ke te ari te tapa javotoho pere evuja. <sup>13</sup> Eto embo amuna embo nei tunga umbae aisuja embo aravo God na kito tunga umbae aisuja rate embo amuna embo nei tunga umbasuja amina embo ta ari sirikari Embo mane joru aisuja.

*Tumota ari te vasiri ari*

<sup>14</sup> Nau namei kamei eto embo na God ke be ke aisuja rate ari jajavotoho ae God ke be ari pere amina embo amo orekaute? <sup>15</sup> Eto namei retemo du re bo-avo irae indari irae avoeto teho evesuja <sup>16</sup> eto ungo embo vahai amita degi ke einge aisoa, “Umo pambuto bo asukao hamo bevare ururou indari indijo” ainge aisoa rate bo te indari te ikae amo javotoho rete? <sup>17</sup> God ke be ari amo einge ra, ke pere ari irae amo amburari embo aingera. <sup>18</sup> Rate embo nei na ke mine einge aisuja. “Embo nei na God ke be eora rate ari javotoho ae eto embo nei na God ke be ae ue ari javotoho pere avo eora.” ainge aisuja rate erena amo ari irae umo God ke be eoa avo naingeto ao kiono. Nanena God ke be eona avo vasiri na ano kesoa. Umo God vahai ke be eoete? <sup>19</sup> Ke be eo amo javotoho rate

enana ahihi sasapura na God vahai ke be eora rate God tumota ae avoeto joru ue gatari gitari eora. <sup>20</sup> Umo sarika embora! Ari javotoho irae God ke be ari pere avo sokova amita ke erena be ingesi uje ere ovete? <sup>21</sup> Ungotenau Mama Abraham na do ena avo hotembējuo amina God agi ue amita meni Isaac andito God ta degi pene eto gaga ta ikena avo God na kito embo javotohora ena <sup>22</sup> amo Abraham na God ke be ena avo pere mane rate God ta ke agi enu God na kito “na ke be ere ua” ena. <sup>23</sup> Avoeto God ta ke kajari ta ke einge mitia, “Abraham na God ke be eto tumota unu God na embo javotohora ena.” eto tunga umbuto ‘namei’ ke ena. <sup>24</sup> Avoeto ungo kogova embo na God ke be aisuja rate avo pere mane rate ari jajavotoho ururou God na embo javotohora ke eto orekasuja. <sup>25</sup> Eto embo ta irari bande simba ari pamone javo Rahab hotembējuo, amina Israel ta imba ari embopo osa ue hondate eto ikenu degi pe nei ta beto pambua amo amita ari javotoho avo ena avoeto isoro iji te God na orekena. <sup>26</sup> Eto embo na God ke be aisuja rate ari javotoho amita degi irae amo embo amburari hoenge irae ainge nombora.

### 3

#### *Embo ta ivivi simba ari*

<sup>1</sup> Nau namei kamei ungo embo isapamane na embo nei ate poekavojo. Ungo kiarira ate poekari embopo na ke isapa te peni te tapa kiari irae arira avoeto God na enana ta ari kito hajire be ikau kesora <sup>2</sup> amita be amo ungotena tapa pe na sokova sakova eora eto titi na kiae eora eto embo amuna pe na sapura mane aisuja embo amina javotoho na amita titi te ingeni te hamo te tapa javotoho na jigama ari haiteko aisuja. <sup>3</sup> Eto embo na o horse ta pe ta auri iketo hamo ta bitio arumbeto pambujo. <sup>4</sup> Eto embo na o horse ta pe jigito do uje aisuja avo o horse na agi euja eto nei e nga peni eva ta pambuja avo kivujo, amo donda pajire be avo pisara peni

na umbuto pambuja, rate amita tari isapa avo embo vahai na jigama uore inono ta pambuja. <sup>5</sup> Eto ainge nombo embo ta ivivi amo donda isapa be rate ke pajire be ijioire pure pajire be euja eto sevahe pema pajire be rate i peri isapa amina undukau evekasuja. <sup>6</sup> Eto ivivi amo i peri ainge nombora, ari sapura na enetari i avo Satan na ivivi ta undukau hamo tapa ta evikitie pahurou embo tapa amita bevère na evekasora. <sup>7</sup> Eto di o neite neite avo embo na undurou hajire eto ke agi aisuja <sup>8</sup> rate embo na amita ivivi avo undurari hajire ari inono aera amo o koso o ainge embo agi ari irae hotembari sapura te ivivi saruka te iriuja. <sup>9</sup> Eto embo na amita ivivi na Bada God jakeka euja te embo avo God ta tombu vahai rate embo na embo ta degi tini kambari ke euja, <sup>10</sup> amo pe vahai ai ta ke sapura te jai te puvuja. Eto nau namei kamei ari avo sapura bera. <sup>11</sup> Umo pauka vahai ai ta umogamo te sogaga te puvuroute? <sup>12</sup> Eto i ‘olive’ ta be avo i ‘fig’ ta umbuorete? Nei i ‘fig’ ta be avo esi ‘grape’ ta umbuorete? ainge manera eto umogamo surusuru eva ta mane indiora.

#### *Utu i ta kiari*

<sup>13</sup> Avoeto nau namei kamei ungotega degi kiari embo miteite? Amina amita osari te pekari te kiari be ta eto puvua amina ari jajavotoho ururou kesora, <sup>14</sup> rate ungotega degi tini kambari te uje sapura te jo ta mitirou ungo mane embo peni asi uje ue ke sokova na no jo ta do mitia avo ondikasoa. <sup>15</sup> Kiari ainge na utu ta eto mane puvuja te amo enda ta ari embo ta jota eto Satan ta degi ta eto puvuja. <sup>16</sup> Eto embo damina embo nei uje ae ue ‘na, na’ eto eonga pepeni asi uje aisora ai ta ari sio sao ururoro ari sapura nei te nei te kesora. <sup>17</sup> Rate kiari be utu i ta eto puvuja amita degi sapura irae eto amo pekari osari te ra eto, embo nei ta ke tunga jamo ari na ingiuja eto embo hondate asi hotembitie tunga nei nei mane euja rate jo tapa na

euja <sup>18</sup> eto ari ainge amo i be ainge nombora pekari embo na urau be au ondeto uhue ari javotoho iji datoho iresuja.

## 4

*Enda ta ari sasapura ga namei kamei ari*

<sup>1</sup> Eto boru jumbari te jujune ari te isapamane ungota degi mitia avo naingeto ere puvutuhoi? Ungo ‘na, na’ ijie hamo ta uje neite neite ta ere pahova avo eto jujune ereovova. <sup>2</sup> Ungo uje eto umbae ue ereto embo teto donda umbuora eto uje isapamane ta pahue umbari inono ae kito isoro kaiketo eova eto donda javotoho amo God ta degi penunu ae avoeto umbae. <sup>3</sup> Eto nei penunu eova amo umo eonga embo peni asi penunu eova avoeto God na ikae. <sup>4</sup> Ungo God ta degi ke sokova ijie no ivu ta kitoho ga tiha eova eto ungo enda ta uje avo namei ururovo God avo ungota kitoho aisuja avo ungo kiae kiae ere ovete? <sup>5</sup> Eto God ta ke kajari ta ke einge mitia, ‘God ta Ahihi Otohu na embo ta jo aema na jigama asi uje ere ua’ ainge mitia avo peni ra. <sup>6</sup> Eto ke nei nombo be amo God na embo jo uoi hondate ari kaiketo ikeuja amita ke einge kajari mitia. “God na, ‘na, na’ ari embo avo mane hondate euja rate embo amuna ‘na, na’ ae ue God ta hondate ari jo tapa na uje aisuja embo avo God na hondate aisuja.” <sup>7</sup> Avoeto God tumota ue amita hondate ari uje evujo, eto Satan kuho sindavo toto pambai. <sup>8</sup> Eto unгона God ta degi hururovo God ungota degi huresuja. Ungo ari sasapura embomeni ungota ingeni egevujo, ungo hotembari heriso embomeni ungota jo ta tongopa evujo irae ai. <sup>9</sup> Ungota sasapura avoeto si evujo, ganini toto osaga kivujo, <sup>10</sup> meni isapa emi ta aingeto ahoheto eto Bada ta degi puvurovo amina jigou erasova.

*Namei ta ari sirikari sapura avojo*

<sup>11</sup> Nau namei kamei ke sapura mine ara avojo, eto embo amuna amita namei ta javo au sapura autemo amita namei embo sapura ke aute embo amina God ta ke mane eto jijigi ue ke amo peni ereua. Eto umo God ta ke peni jijigi aisoa amo ke peni agi ari embo mane rate sirikari embo ere oa. <sup>12</sup> Rate ke pepeni ikari vasiri sirikari embo vahai be mitia amina vasiri embo ta degi ikeuja rate umbuja avoeto umo no namei ta ari sirikari embo umo hotembitea amo umo God na sirikitete?

*‘Na, na’ ijie siro peni avojo*

<sup>13</sup> Eto ungo ke einge eova embomeni, “Nango eha oroho o evito ainge da nei ta pambuto jua vahai ai pure ue donda na ombuto koro peni umbasora.” ari ainge eova embomeni ta degi ke aisona ingivujo. <sup>14</sup> Evito do puvuresuja avo ungo kiae ue ereva. Ungota vasiri deire? Amo iposi ainge bitito tahun euja <sup>15</sup> avoeto ungo ke einge aeteva “Bada ta ujena nango vasiri te mitie pure do do aro avo kesora.” ainge aeteva <sup>16</sup> rate ere ova amo, “na, na” ijie ungo eonga pure do do aisi uje eova ai ta ere ovova amo ari sapura bera. <sup>17</sup> Eto embo amuna ari jajavotoho naingeto aisuja avo kiuja rate aijaja euja amina God ta degi ari sapura ere ua.

## 5

*Ungo haja baja embomeni be kivujo*

<sup>1</sup> Eto ungo haja baja embomeni ungo ta degi ke erena ingivujo. Ungota degi osaga nei te nei te puvuresuja avoeto matu itiketo hori gaga eto sisi sasi evujo. <sup>2</sup> Ungota kiari bo o soan na papasekari <sup>3</sup> te koro ain tivari te donda tapa sasari ari eto ungota ‘gold’ te ‘silver’ te ta ain tivari avo embomeni na kogue ungo ari sasapura embo hotembasora eto ungota donda ta ain tivari amina i bevere ainge ungota hamo bisi eveketo ohoho eto beasuja. Eto iji tutumota irae ere ua rate ungo donda hamo



ta hamo ta eto ere uhova. <sup>4</sup> Kivu, ungota pure ari embomeni na ungota donda urari ta be uhue pure ngahia ere ora te ungo na ke sokova ijie mine ikae umbae ue si ijioire utu te enda te ta Bada na onde jevito ere ingihia. <sup>5</sup> Ungo enda ta mitie donda nei te nei te pere avo ere hotembitie no hamo ta beuje ta pere pahue seha isapamane o ohu na arako ere ova rate ungota heviri iji auvetija. <sup>6</sup> Eto ungo na embo javotoho ganoka eto teove ambuora rate enana ungota degi mine ae.

#### *Pari ta ke*

<sup>7</sup> Eto nau namei kamei simba ururovo Bada puvuresuja amo embo na donda be ureto ga kiti beasuja eto simba ururo ga ambota beau enda ta donda be javotoho be au umbasuja. <sup>8</sup> Eto ungo ainge nombo ungota jo ta sovera umbuto Bada puvuto ere hua avo simba evujo. <sup>9</sup> Eto namei kamei ke sapura mine ara tovujo, eto God na ungo mane ganoka aisuja kivujo, te embo ta ari sirikari Embo na bokiri pe ta heteto torasi ere ua. <sup>10</sup> Eto ungo naingeto osaga kogue simba ue iresova avo be kesi uje eto kito peroveta Bada ta ke hande ari embomeni ta ari avo kogue hotembujo. <sup>11</sup> Enana hamo sovera te osaga te Bada ta pure ere uatera avo eto enana na tunga javotoho ere ora. Eto embo Job ungo kiarira amina osaga kito hamo sovera umbuto iji koso Bada tumota ere uatija eto tutumota God na jo enu hande isapamane Job ta degi ikena.

<sup>12</sup> Eto amo nombo be eto ungo Utu ta javo nei nei umbuto ke ngahia mane aisova nei enda ta javo mane umbuto ke ngahia aisova rate umo 'aravora' ke asi uje aisova kito teho 'aravora' ke ejo. Eto umo ari uje ae eto kito 'mane' ke ejo eto ainge aisoa amo God ta javo mane sapura ta jigama eto ari sapura aisoa. <sup>13</sup> Eto ungota degi embo amuna tunga osaga kesuja amina God ta degi hondate penunu aisuja. <sup>14</sup> Eto

amuna tunga javotoho kesuja amina haveni aisuja. Eto embo amuna ambure umbasuja amina ekalesia ta okokose jage au puvuto "Oil" na hamo ta kuteto Bada ta javo ta ambure avoembo pari aisora. <sup>15</sup> Eto embo na Iesu be tumota ururoro kondau Iesu na jigou erau amita ari sasapura do matu ari avo God na hotembeto toaisuja. <sup>16</sup> Eto ungo na ari sasapura do ueva avo donda mamu ta harikasova amo hotembeto toaisuja eto ari ainge avo mine ara evujo. Eto ungota ambure avoeto pari mine ara ururovo God na au kondasova. Eto embo javotoho ta pari amo sovera pajire bera, God na ai ta pure ere ua avo eto. <sup>17</sup> Peroveta Elijah hotembujo, embo amo ungotena ainge rate ga mane beaja pari enu ga amo jua vahai eto hariga six amita jo ta enda ta beae, <sup>18</sup> eto ehako pari enu ga na utu ta eto benu enda na ehako itiketo be ikena. <sup>19</sup> Eto nau namei kamei ungo vahai na God ta ke be toto sio pambasuja eto embo nei na embo avo peiketo au jo hapereketo God ta degi egerembasuja <sup>20</sup> amo hondate ari embo amina ari sapura etija embo amita ahihi amburesuja avo orekasuja eto au God na embo ta ari sapura isapamane hotembeto toaisuja.

# 1 PETER

## *Peter na ahari kiti kajena*

<sup>1</sup> Na Peter, Iesu Keriso ta apos-  
tero nanena ungo God na siriketo  
umbari embomeni ungota enda toto  
hari tumbuto pambuto enda Pontus  
ta enda Galatia ta Cappadocia ta Asia  
ta eto Bithynia ta mitovova avoeto  
ungo ta degi ahari erevi ere kaitona.  
<sup>2</sup> Eto ungo amo God Mamo na uje  
amita na siriketo umbuna eto ungo  
Iesu Keriso ta sasaga na kuteto javo-  
toho ue ke amita avo agi ava Ahihi  
Otohu na ungota jo ta pure amita oi  
Otohu ereova. Eto God ta hondate  
ari te peka te isapamane ungota degi  
iroi.

## *Ungotena daroho iresora*

<sup>3-4</sup> Eto ungotenau Bada Iesu Keriso  
ta Mamo God avo osa aro amina jo  
ari amita na vasiri eha iketei God ta  
meniundi be ere ora amita be amo  
Iesu Keriso ambuto erena avoeto un-  
gotenamote tapa vasiri eha umbera  
avoeto daroho iresora avo simba  
ereora eto donda javotoho ikasi ere  
ua amo amburari irae sapura ari irae  
eto irae ari mane donda avo God  
na ungota degi ikasi utu i ta simba  
ere ua. <sup>5</sup> Eto ungo God tumota ere  
ova avoeto sovera amita na ungo  
simba ere uma iji kombuta ungo  
naingeto oreketo umbasuja avo au  
kesova. <sup>6</sup> Avoeto ungon ari avo  
hotembitie tunga javotoho ere ova te  
eha oroho emina iji isapa memenga  
osaga kogue mitovova.

<sup>7</sup> Eto ungo memenga osaga ko-  
gova amita be amo ungo God tumota  
be ere ovetemo ae re avo be kesi  
embo na 'gold' i bevare ta boreore  
eveketo tongopa irae eto javotoho  
euja aingeko amina memenga osaga  
na ungota degi etokiari ere ikitia.  
Rate God tumota eora ainge mane ra  
'gold' amo irae aisuja te iji kombu te  
Iesu Keriso ikau puvurou ungo God  
tumota ari embomeni avo God na

kogue otohu usasa te ke ijie ungo  
jakeka aisuja.

<sup>8</sup> Eto Iesu amo ungo titi na kiae  
rate osa ueva eto eha amo mane  
kiova rate hotembitie ke be ijie  
tunga javotoho isapamane be ere  
ova, <sup>9</sup> amita be amo ungo iji kombu  
te umbasi tumota ere ova amo God  
na ungota Ahihi oreketo umbasuja.  
<sup>10</sup> Eto God na ungo oreketo umbasuja  
amita ke amo peroveta na hande ere  
uaetera te ke amita be amo deire  
avo mana mana ue jombure ngahia  
ere uaetera. <sup>11</sup> Eto Keriso na osaga  
te memenga te kito amita usasa ta  
torasuja amita ke avo Ahihi Otohu na  
enana ta siro ta harikenu ingito ari  
amo iji deina eto naingeto puvure-  
suja avo jombure ere uaetera. <sup>12</sup> Rate  
ke amo God ta peroveta avoeto ikae  
rate ungoembo ikari avo God na  
enana ta degi harikenu kito ke hande  
ere uaetera eto duru javotoho avo  
God ta ke hande ari embomeni na  
Ahihi Otohu utu i ta eto ikari pu-  
vurari amita sovera na ungota degi  
iketere ingeva, ke eremita be amo  
God ta anera te tapa na be kesi uje  
ere ora.

## *Ari sasapura toto otohu evujo*

<sup>13</sup> Avoeto hotembari neite neite  
tapa avo toto hotembari vahai  
avo be jigito God na Iesu Keriso  
iji kombu te ikau puvuto ungota  
hondate ari isapamane ikasuja avo  
jo tapa na hotembu hotembu ue  
irivujo. <sup>14</sup> Ungo God ta ke agi ari  
meniundi avoeto ungo kiae ue hamo  
ta ujeje isapamane ere uaeteva  
avo tovu. <sup>15</sup> Amita be amo ungo  
siriketo umbuna embo God amo  
otohu avoeto vasiri tapa otohu ue  
evujo <sup>16</sup> Amita ke ta amo einge kajari  
mitia "Na otohu avoeto otohu evujo"  
ke ainge God na ena. <sup>17</sup> Eto God na  
embo tapa amita ari sapura davore  
ari javotoho davore amo teka vahai  
amina sirikeuja eto ungo na God ta  
degi "Nau Mama" ke eova avoeto  
hari da ei mitie vasiri tapa avo be  
simba eto kogoeto irivujo. <sup>18</sup> Eto  
ungota ahihi ta ari sasapura avo

oreketo ungo umbasi God na Iesu Keriso ta sasaga javotoho amina ungo ombuto umbuna, amo 'gold' te 'silver' te sapura euja aingeko amina ombae <sup>19</sup> rate Keriso ta sasaga javotoho amo God ta o sheep meni aingeko amina ungo ombuto umbuna.

<sup>20</sup> Eto God na utu te enda te ae pekota amita Meni Iesu Keriso ikasi sirikena avo iji tutumo puvija emite ungoembo iketei puvuto ambunu <sup>21</sup> God na jiginu erenu amita degi sago kiari isapamane ikena avoeto ungo na God ke be ijie tumota ue ambota do puvuresuja avo simba ere ova. <sup>22</sup> Eto ungo God ta ke agi eova amina jo tongopa irae avoeto namei kamei osa ere ova te jo tapa na namei kamei osa peni vahai evujo.

<sup>23</sup> Eto ungo vasiri eha umbari embomeni amo embo na be ikari amina vasiri eha umbae rate amo irae euja avoeto, vasiri eha umbeva amo God ta ke vasiri te daroho iriuja ai ta umbeva. <sup>24</sup> Amita ke amo God ta ke ta einge kajari mitia, "Embo bisi te amo sasaha ainge eto embo ta sago kiari amo sasaha ta koru ainge ra. Eto sasaha giroro au amita koru karaun eto beto irae aisuja rate <sup>25</sup> Bada ta ke avo daroho iresuja" ainge kajari mitia eto ke javotoho aravo amo ungota degi hande ikari ra.

## 2

### *Bada amo God ta atara vasiri te*

<sup>1</sup> Avoeto namei ta degi tumo ue tini kambari eova eto nei namei ta degi ke be avo teto haito ke sokova eova eto nei namei ta donda javotoho kito umbasi tunga ta sirikeova eto nei namei ku ta hihhi tiriova amite eto ari sapura tapa eova avo tovujo be irae ai. <sup>2-3</sup> Eto Bada ta hondate ari ta gamo do aingere amo ungo kiari ra avoeto meni isasaraho na emi indesi tigaho eora ainge nombo God ta ke amo ahihi ta indari be avo uje ue pajitirovo God na siriketo umbau amita toho be aisova.

<sup>4</sup> Eto Bada amo God ta atara vasiri te aingeko avo kito God na amita

hamo ta bande otohu ere gerikitia. Eto atara avo embo na kito bande ikari haite mane kito tora te God na ere kogua avo nombo be avoeto bande ikasi siriketo umbuna avoeto amita degi havu. <sup>5</sup> Eto ungotote tapa atara vasiri te aingeko amina God na amita irari bande otohu ere gerikitia. Eto ungo na amita pure ari priests ototohu eto ungota pene otohu avo God ta degi ikitirovo God na Iesu Keriso avoembo hande jajavotoho ke ijie umbasuja.

<sup>6</sup> Eto ke erena amo God ta ke ta Keriso avoeto einge kajari mitia, "Kivujo, na atara javotoho siriketo umbuto 'Zion' ai ta ikano amita hamo ta nau embomeni na hetasora eto embo amuna atara avo ke be aisuja amina mane me kesuja", ke ainge kajari mitia <sup>7</sup> avoeto atara amo ungo ke be ari embomeni ta degi nombo bera. Rate enana ke be ae eora embomeni ta ke amo einge kajari mitia, "Embomeni na atara sapura ke eto toa avo God na umbuto bande ta atara nombo be ikena" ainge eto <sup>8</sup> ke nei amo "Embomeni na atara ai ta teto beasora, eto atara amina au embomeni burereketo beasora." Ke ainge mitia amita be amo embomeni na God ta ke mane ingora ena avoeto atara teto bea. <sup>9</sup> Rate ungo amo God na siriketo umbari embomeni eto ungotenau 'king' God amita priests pure ari embomeni eto amita embomeni ototohu eto God ta embomeni toho be ra. Eto ainge ere ova amita be amo ungo mume ta mitiaeteve God na jage enu amita usasa javotoho ta toritava amita ke avo umbuto embo tapa ta degi hande ava umbuna. <sup>10</sup> Eto matu kiti ta amo ungo embomeni mane ra te eha amo ungo God ta javo vahai embomeni be ra. Eto iji matu amo ungo na God ta jo ari do aingere amo kiae rate eha amo ungo God ta jo ari ere kogova avoeto irari javotoho miteva.

### *God ta ke agi ari embomeni*

<sup>11</sup> Eto nau namei kamei ungo enda embomeni mane utu embomeni hari

da ta miteva avo hamo ta ujeje isapamane amina ungota ahihi ta degi isoro euja avo be tovujo. <sup>12</sup> Eto God kiae embomeni ga miteva avoeto vasiri javotoho pere ue irivujo eto embomeni amina ungo ari sasapura embomeni ke eora avo ungota ari javotoho amina taekevujō. Eto ungota ari jajavotoho avo enana na kogue mitiroro iji kombu ta puvurou God jakeka aisora.

<sup>13</sup> Eto Bada avoembo gavana ta ke pepeni tapa agi evujo amo enda ta titi jigari embo peni amita ke te <sup>14</sup> eto amina embopo siriketo umbuto ikeoi pambuto titi jigihē ari sasapura embopo ta hajire ikeore kiora eto ari jajavotoho embopo avo tumota ue ari javotoho eora amite tapa ke agi evujo. <sup>15</sup> Eto God ta uje amo kiae embomeni na ungota ke amo sokova ra eora avo ungo na ari jajavotoho amina taekasova. <sup>16</sup> Eto ke be amo ungo enda embo ta ke pepeni ta torae rate God ta titi ta hetari embomeni avoeto ke pepeni poeketo ke amina ahurekasi mane hotembasova te God ta uje tapa asi ue irivujo. <sup>17</sup> Eto embo tapa be tapa tumota ue evujo eto God ke be eora embomeni tapa amo no namei kamei ra osa evujo, eto God otohu ra ijie joru evujo, eto nei enda ta titi jigari embo peni avo tumota evujo.

#### *Keriso memenga kina amo ungotenau ate kitira ena*

<sup>18</sup> Eto ungo embo nei ta pure ari embopo ta degi erena, ungota embo peni avo tumota ue agi evujo. Eto hande ari osa ari embo ta ke pere mane agi aisova te tumo ahua ari embo ta ke te tapa agi evujo. <sup>19</sup> Amita be amo embo na sapura nei do ae rate embo nei na osaga memenga au kogue God ta uje avo hotembitie jamo eto irirou God na kesuja amo tunga javotoho aisuja. <sup>20</sup> Eto ke be amo no ari sapura avoeto hajire ikau kogue jamo eto iresoa amo God na kesuja amo tunga nei do mane aisuja amo ujekari no rate umo ari sapura

ae rate embo na au memenga kogue jamo eto iresoa amo God na kesuja amo tunga javotoho aisuja. <sup>21</sup> Amo God na ungo ari ainge aisova avoeto siriketo umbuna amore Keriso na ungota ate kitira ue ungo avoembo memenga osaga umbuna amo amita utu tain hatirari asa ai ta hahitie pambava ena, <sup>22</sup> amo eingera, Keriso na ari sapura nei do ae, ke sokova ae mitiaetija <sup>23</sup> te embo na Keriso urumbēa rate mine urumbae eto hamo ta memenga ikeo kina rate mine asi hotembae rate embo ta ari ke be na sirikeuja embo God avo tumota ue hamo amita avo amita ingeni ta iketo tona. <sup>24</sup> Eto ungotena ari sasapura tapa toto ari jajavotoho pere ue irora Keriso na ungotenau ari sasapura tapa amita hamo ta bitinu umbuto cross ta bitina, amo Iesu ta hamo teto tiukea amina ungotenau hamo ta pupuho utekena. <sup>25</sup> Ke emita be re ungo o sheep maine pambari avo egerembeto o mamō Keriso amore ungota ahihi simba euja amita degi puveva.

### 3

#### *Ipone te airiri*

<sup>1-2</sup> Eto ungo pamone tapa ta degi erena, ungota ipone ta ke agi evujo. Eto ke agi ururovo ungota ipone nei nei amo God ta ke be ae eora amina ungota pe ta ke avo mane ingesora te ungota ke agi ari, osa ari eto tumota ari avo kogue enana God ke be aisora. <sup>3</sup> Eto umo kiari pamone asi eto kito amo siro buvunda jigesoa, hambo turasoa eto kiari bo asukasoa amina pere mane kiari pamone asoa <sup>4</sup> rate no jo te tapa osa ari pekari eto tumota ari amina umo kiari pamone aisoa, eto hambo sago te avo turasoa amo God ta titita daroho iresuja. <sup>5</sup> Eto ari ainge amo God tumota ari pamone mamatu na ue kiari pamone eto ipone ta ke agi ere uaetera, <sup>6</sup> ainge amo pamone vahai javo Sarah amina ivu Abraham ta ke agi ue “Nau Bada” ainge Abraham ta degi ere ijiaetija, eto ungo eha oroho miteva amina ari javotoho ue



joru ae teho iresova amina Sarah ta iariri aisova. <sup>7</sup> Eto embo ungo ainge nombu ungota airi amo embo ta buvure ainge mane rate God na ivu te ae te ta degi vasiri daroho avo inono inono ta ikau hotasora avoeto tunga humbuto tumota evujo. Eto ungota airi tumota ue pari aisova amo God na ingesuja.

#### *Ari jajavotoho eto memenga kiora*

<sup>8</sup> Eto ke tutumota aisona amo erevira, amo ungo tunga vahai eto pure evujo, Keriso ta toho amo namei kamei ra jo ue osa mine ara evujo. Eto namei embo peni na isapa ra ainge mine ara ijie irivujo.

<sup>9</sup> Eto ari sapura mine asi mane hotembasoa eto mine mane urumbasi hotembasoa te God ta hondate ari umbara ke ejo, amo ungo na ari ainge eto God ta degi ari javotoho umbava God na ungo umbei embomeni amita toho be ere ova. <sup>10</sup> Ke amore God ta ke ta einge kajari mitia, “Eto embo amuna amita vasiri osa ue iji javotoho kesi uje aisuja amina amita ivivi te petiki te simba ue amita pe ta embo nei hihi tirari te ke sokova sakova ari te mane puvuresuja <sup>11</sup> eto amina ari sapura kuho sindeto ari javotoho ue pekari avo eteteto pambasuja.” <sup>12</sup> Eto ke amita be amo Bada ta titi na embo jajavotoho amo kogue enana ta pari avo onde na ere ingihia rate ari sasapura ari embomeni amo Bada na kogue tumo ere ua.

<sup>13</sup> Eto ungoni ari jajavotoho jo tapa na asi uje aisova amo embo na kito osaga memenga aro kiovo? mane aisora <sup>14</sup> te ungo ari jajavotoho ere ova avo enana na kito aro osaga memenga kesova amo God na hondate au tunga javotoho aisova, avoeto enana do ere ora avo joru ue osaga kiovojo, <sup>15</sup> rate ungota jo tapa na evujo Keriso ungota Bada ai. Eto embo amuna ungo God tumota ere ova amita be deire avo ungota degi eto ingari ke umbuto puvuresuja amita degi ke mine do aisova avo siriketo nununga evujo. <sup>16</sup> Eto

ke mine aisova avo tini kambari na mane aisova te jokeka ke na eto hotembari javotoho ke ijirovo enana na ungota irari javotoho Keriso ta javo ta ere ova avo ungo urumbari embo na kito me kesora. <sup>17</sup> Eto ungo na ari sasapura eto memenga osaga kiaeteva amo sapura rate ungo na God ta uje ta ari jajavotoho ue memenga osaga ere kogova avoeto amita sapura amo iraera.

<sup>18</sup> Eto Keriso na ungotena God ta degi kiti umbuto pambasi iji vahai amina ambuna amo embo javotoho amina ari sasapura embomeni tapa avoeto ambuna, amo embo na amita hamo avo teo ambuna te God na amita Ahihi avo jiginu ereto <sup>19</sup> God ta ke agi ae embomeni mamatu ta ahihi amo God na andito umbari amita degi pambuto amita ke hande ena, <sup>20</sup> eto embomeni sasapura amore Noah na e nga gerikena iji amikote enana na jo haperekara God na iji koso simba ena te jo haperekae eoga peni vahai beto umu irerembeto ukomo unu embomeni sasari uo embo tapa 8 e nga jo ta mitia avo umu na oreketo umbuto i ta pambuna. <sup>21</sup> Eto ungo umu na bapataito eova amita ate kitira amo Noah ta iji te umu irerembena amina ena. Eto umu na embo orekeuja amo hamo tongopa egari amina ae rate God ta degi ke be ikitie jo javotoho ari umbuora. <sup>22</sup> Eto ungotena orekena embo Iesu Keriso amina vasiri te ereto God ta degi utu i ta bitito God ta ingeni be ta arumbeto anera te utu ta titi jigirikari embomeni tapa amita embo okose eto mitia.

## 4

### *Jo hapereketo irari nei*

<sup>1-2</sup> Eto Keriso na hamo ta memenga kina avoeto ungo ainge nombu ari sasapura toasi avo hotembitie sovera evujo, ke amita be amo hamo memenga kiari embo amita degi ari sasapura amo ivo ambu aisuja avoeto enda ta mitie hamo ta ujeje sasapura avo mane asi hotembasuja te God ta uje vahai

avo asi ue iresuja. <sup>3</sup> Eto God kiae embomeni ta ari sasapura ungote tapa ere uaeteva amo ke pepeni poekeora eto emo indito kava ue sarika ue eora eto oine sasapura eora eto pondo kando isapamane eora eto donda Otohu o, a, ijie jakeka eora aingeko amo ungo na eteve inono uija avoeto toturitava <sup>4</sup> avo enana na kito ungo do eto enana ga kajueto ari sasapura neite neite ae eova avo mana mana ue urumbitera <sup>5</sup> rate erevi hotembvujajo amo enana na embo ambuvujekari te embo vasiri te mitera amita ari sasapura siriketo hajire ikari Embo amita degi enana ta ari avoembo ke aro ingesi simba mitia. <sup>6</sup> Eto embomeni matu ambuvujekari amina eha vasiri te irari iji te ari do ere uaetera amo God na ijuketo kina avoeto enana ta ahihi avo God iriuja ainge nombo irora God ta duru javotoho avo enana ta degi hande ena.

#### *God ta hande simba ari*

<sup>7</sup> Eto iji tutumota ere puvutuhua avoeto uta javotoho be na pari evujo. <sup>8</sup> Eto pajire be avo jo tapa na osa mine ara evujo, eto osa ari amina ungota ari sasapura tau beto irae aisuja. <sup>9</sup> Eto osa ari na pekari na umoro kamoro ue hande puanda mine ara evujo. <sup>10</sup> Eto ungo God na amita pure do ava kiari hande ikena amina hondate mine ara ue God ta pure ari embomeni be evujo, <sup>11</sup> eto God na no hande ikena amo ke ra avoeto no jo tapa na God ta ke avo hande ejo, eto God na no hande ikena amo hondate ari avo ikena avoeto God ta sovera na embo nei hondate ejo. Eto ari ainge avo ururovo amo Iesu Keriso avoembo God ta degi usasa puvurou embomeni na sago javotoho kesora, eto Iesu Keriso ta degi usasa te sovera te matu ainge iroi, amen.

#### *Keriso ta embomeni na osaga memenga kiora*

<sup>12</sup> Nau namei kamei, eto ungota degi eto kiari memenga te puvuresuja avo kito tututu mane aisova

amo ungota degi ari nei do asi mane puvija te <sup>13</sup> Keriso ta memenga avo unгона amiga kajueto ere kogova avoeto tunga javotoho evujo. Eto iji kombu ta puvurou Keriso ta usasa sago kiari peni be araha ta puvurou kito tunga javotoho be aisova. <sup>14</sup> Eto embo na ungo Keriso ta javo ta iriova avo kito ungo urumbasora amo God ta Ahihi usasa te ungota hamota mitia avoeto urumbasora avoeto tunga osaga avojo. <sup>15</sup> Rate ungo vahai amuna embo tari retemo donda pegene retemo ari sapura retemo embo nei ta ke togeto umbuto hande aeteva amo ujekari ungota avoembo memenga kiaeteva rate ari ainge amo sapura be ra avoeto mane aisova. <sup>16</sup> Rate umo Keriso ta toho avoembo au memenga osaga kogue mane me kesoa te na Keriso ta tohora ijie God jakeka ejo. <sup>17</sup> Eto God na amita ke be ari embomeni ta ari do aingere avo sirikari iji puvuto ere hua amo ungotenau degi matu puvija rate God ta duru javotoho ingito ke be ae ari embomeni amita degi hajire do au? <sup>18</sup> Eto ke be amo ari jajavotoho ari embomeni na God ta irari degi ai torari haite rate ngahia be ra te God ke be ae ue ari sasapura ari embomeni na ai ta naingeto toraro? <sup>19</sup> Rate embo amuna ari jajavotoho ururou kitoho embo na aro osaga memenga kogue amita ahihi avo ove ari Embo God ta ingeni ta ikau umbuto simba ururou ari jajavotoho matuainge aisuja.

## 5

#### *God ta meniundi*

<sup>1</sup> Eto ungo ekalesia embo okokose ta degi ke erevi erena amo Iesu Keriso ta memenga amo titi nau na kogana avoeto amo puvutuhurou amita usasa aisuja ai ta namote tapa torasora avoeto ungotena embo pepeni pere rate nane ungota degi erena amo <sup>2</sup> ungota ekalesia amo God ta o meniundi ra unduvujo amo kupi ue hamo na mane unduresova

rate jo tapa na tunga iketo evujo. Eto amo koro umbari ta pure ke ijie mane aisova te God na uje ere ua avo jo tapa na pure evujo. <sup>3</sup> Eto na embo peni ra ijie mane ungota embomeni ta degi ngahia aisova te ungota ate kitira avo ue pahurovo ungota o meniundi avo ambota ambota are. <sup>4</sup> Eto ungo ari ainge avo ururovo o Simba Ari Embo Be avo puvourov kesova iji amikote amina siro kope javotoho usasa te avo ikau asukavo daroho iresuja. <sup>5</sup> Eto ungo embo ehaha ta degi erena embo okokose ta ke ingito agi evujo. Eto ungo tapa ta erena amo embo nei avo peni ke ijie umo isapa ke eto no pure ari bo asuketo hondate mine ara evujo. Eto ke amita be amo God ta ke ta einge kajari mitia "God na embo umo eonga na na ijie jakeka aisuja embo amita ke mane ingesuja te embomeni isapa sira eora amita degi hondate ari ikeuja." <sup>6</sup> Avoeto ungo meni isapa sira eto God ta ingeni sovera te amita temba tu ta mitirovo God na iji inono ta au ungo peni aisova. <sup>7</sup> Amo God na ungo simba ere ua avoeto ungota osaga tapa amita ingeni ta iketo tovujo. <sup>8</sup> Eto ungota kitoho embo Satan na isoro o 'lion' beuje oi jajavone ijie embo kambuto indesi enda ta ereto ere ua avoeto be kogue mitie <sup>9</sup> Bada tumota ue sovera umbuto Satan ta ari kito kiarako ue ngahia eto irivujo, eto ungo osaga ere kogova amore ungo eonga kiae rate ungota namei kamei enda tapa ta mitera amite tapa osaga memenga kogora avo eto ungo ere kogova. <sup>10</sup> Eto ungo na iji isapa osaga memenga kogurovo ungota jo ari hondate ari God ungo Keriso ta usasa ta daroho irova siriketo umbari Embo amina puvuto ungo oreketo umbuto degi javotoho ta iketo sovera ikau umbuto iresova, <sup>11</sup> amita degi sovera ari daroho iroi, amen.

*Pekari ta ke*

<sup>12</sup> Eto ungota namei Silvanus ungotena tumota ari haite amina ahari tuhaupa erevi Peter nane ene ere kaitia. Eto ahari emita jo ta amo

God ta hondate ari be amo do aingere avo ano umbuto eteketo kito sovera umbuto be iseto jigito irivujo. <sup>13</sup> Eto enda Babylon (embo nei nei na 'Rome' ke eora) ta ekalesia God na ungo umbuna ainge eto umbari amina ungo ere pekitera eto nau meni Mark amite tapa ungo ere pekitia. <sup>14</sup> Eto ungo namei kamei ue jao tate ue andito mune tavo mine ara evujo. Ungo Keriso ta embomeni be amita degi peka iroi. Orerere.

## 2 PETER

### *Peter na ahari erevi kajena*

<sup>1</sup> Na Simon Peter, Iesu Keriso ta apostero eto ke agi ari embo nana ungo God na eto Iesu Keriso na hondate ari avoeto God tumota eova amita degi ahari erevi ere kaitena amo God na embo tapa inono inono ke ijie euja avoeto ungota God tumota ari amo nango na God tumota eora ainge nombo eova.

<sup>2</sup> Eto ungonu God te Bada Iesu te kogurovo amita hondateari te peka te ungota degi pajito peni be ai.

### *God na ungo siriketo umbuna*

<sup>3</sup> Eto ungotena amita degi ta usasa te ari jajavotoho te hande iketo umbara jage euja embo God avo be kogurovo amita sovera na ari jajavotoho tapa ikau umbuto irari javotoho tambuto God ta vasiri ambo ambo aisora.

<sup>4</sup> Eto ke amita be amo God na ari jajavotoho ikasi onde ena avo ikau umbuto jigama ue enda ta uje sasapura avo tiumbitie God ta ari ikau umbuto amita hajire vahai ainge aisora <sup>5</sup> avoembo ungo God tumota ue kito ari jajavotoho amite tapa evujo <sup>6</sup> eto ari jajavotoho ue kiari eha umbuvujo, eto kiari eha uhue ungota tumo eto ungota tini kambari toturitie sovera ari umbuto ari jajavotoho ue irivujo eto ando sovera ari uhue God ta ari avo asi tunga ikevujo <sup>7</sup> eto tunga ikitie ekalesia emboga namei kamei evujo eto namei kamei ere uma Keriso ta osa ari na embo tapa osa evujo. <sup>8</sup> Eto ungonu ari tapa erena erevi aemana umbasova kito ungonu Bada Iesu Keriso ta ari be avo kogue sovera amita na asova <sup>9</sup> rate ari erevi amuna umbae asuja amo titi kuru ari embo ainge ambota do puvuresuja avo kiae ue amita ari sasapura matu egari iraeari avo matu jenete arira.

<sup>10</sup> Avoeto nau namei kamei ungo God na amita toho avo siriketo

jage etei puveva avoeto amita toho be eto iresova avoeto tunga iketo pure ngahia ue God mane egiketo pambasova. <sup>11</sup> Eto ari ainge aisova amo God na au umu Bada Iesu Keriso ungotena oreketo umbari embo na darohota titi jigari degi ai ta torasova.

<sup>12</sup> Eto na kogona amo ungonu ke erena erevi tapa be jigito ke be ijie ereova te <sup>13</sup> na hamo bisi te ei ta mitie ke eremina ungota jo ta undurono be hotembasova. <sup>14</sup> Eto ainge ere ona amita be amo Iesu na ke etei ingena amo na hamo te bisi te houketo pambasova iji ere auvitia. <sup>15</sup> Eto na pambuto mitirono ke erevi matuainge hotembu ue irova avo be eto kogoeto nununga ere ona.

### *Keriso ta usasa titi na kogara*

<sup>16</sup> Eto Bada Iesu Keriso usasate egerembeto puvuresuja amita ke umbuto puvuto ungota degi hande uera amo embo ta hihi sokova tirari avo hande ae rate nangota titina amita soverate avo kogara <sup>17</sup> amo nango amiga mitere God mamu na usasa te otoh te avo ikitie utu i ta usasa ta eto ke einge puvei ingihara, “Emo nau osa ari Meni ra avo kogue tunga javotoho ere ona” <sup>18</sup> ke ainge amo nango tiri otoh amita hamo ta mitere utu ita eto puvuritaja avoeto ke nangota amo ke be perera.

<sup>19</sup> Eto peroveta mamatu na ke do hande ere uaetera avo jo tapa na ke be erera amo ungo na hotembu ue siro pure evujo ke amina horivo ijimbeto mume ta jigoro usasa ururou Bada Iho bujitirou iho tarama na ungota jo usasa ururou ke hande uera avo be hotembasova <sup>20</sup> rate ke nombo be erevi hotembevujo, ke tapa peroveta na God ta ke ta kajari amo embo vahai amuna umu eonga hotembari amita na kajaera <sup>21</sup> te peroveta ta ke amo enana ta hotembari na ungo eonga ae rate ahihi Otoh na God ta ke avo umbuto enana ta jo ta ikeoi ingihe hande ere uaetera.



## 2

### *Ke sokova ate poekari embopo*

<sup>1</sup> Eto ungotenau ohihi ta iji te peroveta sokova na mitiaetera ainge nombo ke sokova ate poekari embopo ungota degi mitie enana ta orekari embo Iesu avo egikitie enana ta hotembari ke ga ondikari na God ta ke ga kajuto hande ue ungo oenga ahihi totoho ta avo borambu taro amburesuja. <sup>2</sup> rate enana ta me kiari ta ari avo embo isapamane na ambo ambo ue pahuroro embo na enana ta ari avo kito God ta ke javotoho amite tapa aro sapura aisuja. <sup>3</sup> Eto ate poekari sokova amina ungo ombuto koro umbasi uje isapamane aisora. Rate ari sapura ta hajire ikari embo God amo enana tasi evae teho mitouva. <sup>4</sup> Eto ke be amo God ta anera na ari sapura ea amo toae rate ambota hajire au kiora ikenu pambuto Satan ta tipura ari degi mume ai ta pundurari mitera. <sup>5</sup> Eto nei amo iji matu be matu God uje ae embomeni ta sapura amo God na hotembeto toae umo ikenu irerembeto umbunu sasari uo embo ari javotoho ara ke hande ari embo Noah te embo nei uhoho tapa ainge amite avo oreketo umbuna <sup>6</sup> Eto nei amo God uje ae ari embopo ta degi ate kitira ai kiora ena amo da Sodom te Gomorrah te avo i na ikenu beto evekena <sup>7-8</sup> rate da ai ta embo javotoho vahai avo Lot amina mitie enana ke pepeni poekitie ari sasapura neite neite uore kogue tunga osaga te tapa mitiaetija vahai avo God na oreketo umbuna.

<sup>9-10</sup> Eto ke erena amo Bada na embo jajavotoho ari sasapura uore osaga kiora avoeto oreketo umbuja te God ta ke peni avo otohu ae ue hamo ta uje ta tutuvitie ari sasapura neite neite eora embopo avo God na hajire ikau kogue mitiroro iji kombu ta ari sirikari iji puvuresuja. Eto ke sokova ate poekari embopo na ungo eonga embo peni ke ijie God ta anera utu i ta iriora avo otohu ae urumbeora <sup>11</sup> te anera sovera te amina God ta avo arumba peni amita engitita iriora amina mine mane

urumbeora <sup>12</sup> te embomeni amo God ta ke kiae avoeto urumbeora avoeto enana kiari embomeni mane ariri o ohu aingeko amina erera eto o ariri ta mitioi embo na teto heveto indiora ainge nombo God na enana tau ambuvujekasora <sup>13</sup> amo embo ta degi osaga memenga ikeora avoeto God na osaga memenga mine ikau kesora. Eto enana ta tunga humbari be amo iji te kava ue sarika ue ungote arumbeto indie hihi sokova sakova neite neite tiriora embopo amo ungo God tumota ari embomeni ta tongopa ra. <sup>14</sup> Eto ungota degi pamone ivo ambu jo suruha te avo amiga tiha asi poeto kiora avoeto enana ta ari sapura ta kakane iraea. Eto enana amo hamo ta ujeje umbari kiari isapamane be avoeto God na tasi simba mitia <sup>15</sup> Eto embo javo Beor ta meni javo Balaam na degi toto titi mimeto pambuna ainge nombo enana na ari sasapura ta gamo avo osa ue degi javotoho toto titi mimeto ere pahora <sup>16</sup> te Peroveta Balaam degi sapura ta pahunu o 'donkey' amo ke ambu rate embo na ke eora aingeko eto Balaam ta kava ere una avo isimbitie taekena.

<sup>17</sup> Eto ke sokova ate poekari embopo amo umo isogo sausau evekeuja ainge eto oje pisara na tahuneto umbuto pambuja ainge ra eto mume kambujoro be ai ta irora nununga etija. <sup>18</sup> Eto enana hamo ta gamo donda isapamane daingeto umbasora avo hihi tiritiore embomeni ingiora amo embo God ta javota eha toreora amina ke sokova ta gamo avo ingesi ambo ambo uore <sup>19</sup> "ungo God ta ke peni amina andiroujo" ainge eora te enana ari sasapura na andirarira amita be amo donda deina amita jo punduresuja embo amo amita agi ari embora. <sup>20</sup> Eto ke be amo embo amuna ungotenau orekari embo Bada Iesu Keriso avo be hotembitie enda ta ari sasapura touja te ehako tunga hapereketo ari sapura ta beoi andiuja amo embo amo kiae pekota ari sapura embo rate God kito

egिकासुजा amo sapura be tambasuja  
<sup>21</sup> Eto God ta ke otohu enana ta degi kiari avo ingito umbuto ehako ku sindeto ere pahora te enana na God ta ke otohu avo ingae aetera amo ari sapura ta hajire kiaetera te ingito ingarako ue pahora amo ari sapura ta hajire pajire kesora. <sup>22</sup> Eto ke erevi enana ta ke be ra “Ino na pere tuketo ehako indiuja” eto “Ino umo kuteore ehako amisa ta serekeoi tongopa euja” aingera.

### 3

#### *Bada ta egerembeto puvurari*

<sup>1-2</sup> Eto nau tunga umbari embomeni, na ahari matu kaitana amite eha ere kaitena amita jo ta amo ari do puvuresuja amita ke avo peroveta mamatu na kakajekea amite eto ungotenau orekari embo Bada Iesu na ungo daingeto iresova amita ke avo apostero na hande eora avo be hotembitie siro pure ava ere kaitona. <sup>3</sup> Eto ke kitita amo erevira, iji tutumota puvutohurou embo hamo ta ujeje osa ari embopo amina puvuto ungo kege ganini na ungo urumbitie <sup>4</sup> ke einge aisora, “Iesu puvurari ta onde ena amo naingere? Ungotenau mamamane matu sasari ea eto enda ehara ta ena ai ta eto puvuto eha oroho ere ora amo nei puvurae irari vahai avo iriora te Iesu naingetare?” ke ainge ijie <sup>5</sup> ke be erevi teto hahitie aisora amo iji ehara ta God na ke enu enda te utu te ena amo God na umo umbuto enda ena <sup>6</sup> te ari sasapura uo kito umo na ikenu irerembeto enda matu avo umbunu irae ena. <sup>7</sup> Eto utu te enda te eha mitia avo God ta ke na simba ururou God kiae embopo ta hajire ikau amburesora amita iji puvutuhurou God na enda te utu te avo i na ikau eveketo jaekau irae asuja.

<sup>8</sup> Rate nau tunga humbari embomeni ke vahai erevi jenambu avojo amo Bada ta degi ta jua tapa 1,000 amo iji vahai aingeko eto iji vahai amo jua tapa 1,000 aingekora

<sup>9</sup> te embo nenei na Bada na onde ena amo sausau ikae mitouva, amo ainge mane rate embo ambuto ari sasapura ta hajire kesora avo uje ae eto ari sapura toto jo haperekarote avoeto enana ta iji isapa kosoko jujumbeto ere ikitia.

<sup>10</sup> Rate Bada ta puvurari iji amo pegene embo na puvurarako ururou utu i ta asavi pajire ijie saivitirou utu i ta donda iriuja tapa amo eveketo jaekitirou enda te enda ta donda tapa amo irae aisuja. <sup>11</sup> Eto ari ainge amo ambota puvuto ere hua avoeto ungo nainge eto nununga ue irovo? <sup>12</sup> Ungo God ta ari be avo jigama ue vasiri be ue otohu ururovo iji avo sausau puvuroi. Eto iji amite utu i ta perimbeto bevere pajire be au donda tapa amo sigeto irae asuja. <sup>13</sup> Eto ungotena Bada na onde ari simba ere ovora amo utu eha enda eha eto ari jajavotoho ari da avo simba mitera <sup>14</sup> avoeto nau namei kamei ungo simba ue ari sasapura irae tongopa irae ue irirovo Bada puvuto ungo peka ta irirovo tambasuja.

<sup>15</sup> Eto ungo jo ahereketo God ta degi hurova Bada simba ere ua avo hotembevujou, amita ke amo ungotenau namei Paul amo ungotenau tunga humbari embo amina ungota degi kajena amita kiari amo God na hande ikari umbari ra <sup>16</sup> te Paul ta ahari kajena amo do aingere amo na kiarira amo ke pepeni amo ke be tambari haite rate ngahia avoeto embo kiae embopo eto hotembari sasapura embopo amina Paul ta ke jigiore okokombeuja eto God ta ke tapa amo eore sapura euja avoeto enana ta ahihi avo amburesuja.

<sup>17</sup> Aravora te nau namei kamei ungo onde katetena aravora avoeto ungo embo God ta ke pepeni poekari embopo amita ambo ambo mane aisova te God ta ke be ai ta heteteva aita mitie <sup>18</sup> ungotenau orekari embo Bada Iesu Keriso be kogue amita hondate ari na pajivujou, amita degi usasa eha oroho eto daroho iresuja, aravora.

# 1 JOHN

## *Keriso amo vasiri te irari ta ke*

<sup>1</sup> Eto enda ae pekota amo ungotenau orekari embo mitiaetija amita ke avo dago apostels na onde na ingihara titi na kogara ingeni na tame uera eto vasiri te irari ta ke amita degi ta eto puvuja amita ke avo ungota degi ta ere kaitera. <sup>2</sup> Eto Keriso amo Mamoga mitiaetija te ikenu enda ta puvunu titi na kogara avoeto vasiri te daroho irari amo amita degi ta, avo nango na ungota degi hande eora. <sup>3</sup> Eto dago na Mamo te Meni Iesu Keriso amiga tunga vahai ue osa mine ara eora ai ta kaju avote do ingihara eto do kogara avo ungota degi hande ereora <sup>4</sup> eto ere kaetera avo ungo kogue ururovo nango tunga javotoho be aisora.

## *God amo usasara*

<sup>5</sup> Eto God ta Meni ta degi ke ingito ungota degi hande eora amo erevira: God amo usasa avoeto amita degi mume irae be <sup>6</sup> avoeto ungotena God ga tunga vahai eto osa osa ari ke ijie mume ta mitera amo ari na eto ke na sokova erera. <sup>7</sup> Rate God usasa ta mitia avoeto usasa ta mitie tunga vahai ue osa osa te tapa iriroro God ta Meni Iesu ta sasaga na ungotenau ari sasapura tapa egeoi irae euja. <sup>8</sup> Eto ungotenau ari sapura irae ke asora amo ungotena ke be ari haite mane rate ke sokova eora. <sup>9</sup> Rate God ta degi ari sasapura harikitiroro amina ari javotoho ikasi onde ena amo ari sasapura hotembeto toturitie jo egau javotoho aisuja. <sup>10</sup> Rate ari sapura irae ke asora amo God ke sokova ke asora avoeto ke amita avo jo ungotenau ta irari haite mane aisuja.

## 2

*Iesu Keriso ungotenau hondate ari embo.*

<sup>1</sup> Nau meniundi ungo ari sapura mane ava ke erevi ere kaitona te inena ari sapura aisoa kito embo javotoho Iesu Keriso amina God ta degi ke ijie ungotena ere orekitia. <sup>2</sup> Eto Iesu Keriso avoembo ungotenau ari sasapura hotembeto touja amo ungotena ari sapura ta pene na matu ombari eto ungotenau pere mane rate enda tapa embomeni ta pene ra. <sup>3</sup> Eto ungotena God kiari retemo kiaere amita eto kiari amo erevira, amo God ta ke peni avo ambo ambo asora amo God be kesora <sup>4</sup> te embo na God kiari ke ijie amita ke peni ambo ambo ae asuja amo ke sokova embo eto ke be ari haite mane <sup>5-6</sup> rate God ta osa ari na God ta ke peni amita agi euja embo amita jo ta pajito enetasuja. Eto embo na God ta jo ta matu torari ke ijie kito Iesu na do ue mitiaetija avo pere ururovo kito amo God ta embo be ke aetera.

## *God ta ke peni eha*

<sup>7</sup> Eto nau tunga umbari embomeni ungo God ta ke peni erevi ava ere kaitena amo ke eha mane itikari ta eto ungota degi ikari eto ungota degi matu hande ari aravora <sup>8</sup> te ungota jo ta mume irae oi iho bujarako oi ke matu amo eha puvurarako ere ua ke peni amo “osa mine ara evujo” Keriso na ere uaetija ainge nombro ere ova avoeto ungota jo usasa ere ua. <sup>9</sup> Rate embo amuna usasa ta irari ke ijie namei tumo aisuja amo mume ta mitia aravora. <sup>10</sup> Te embo amuna namei osa aisuja amo usasa ta mitia avoeto teto be ari mane joru aisuja <sup>11</sup> rate namei ta degi tumo euja embo amina mume ta mitie nainge nainge ere pahua amo be kiaera, mume avoeto kiari inono ae ra. <sup>12</sup> Nau meniundi ungota ari sasapura God na Iesu ta javota hotembeto tona amita degi ere kaitena <sup>13</sup> eto ungo embo okokose daroho irari embo amo ungo kiari avoeto ungota degi ere kaitena, eto ungo embo ehaha ungo na Ari Sapura embo Satan, sovera eto nembari avoeto ungota degi ere kaitena. <sup>14</sup> Eto meni memeni ungo God Mamo matu kiari avoeto

ungota degi ere kaitena. Eto ungo embo okokose ungota degi kaetena amo unгона itikari ta eto irari embo kiarira avoeto kaetena. Eto ungo embo ehaha sovera eto mitiouve God ta ke ungota jo ta mitouva amina Ari Sapura embo nembeto ere ova avoeto ungota degi kaetena. <sup>15</sup> Ungo enda te eto enda ta donda tapa amite avo osa avojo. Eto embo na enda ta donda osa asuja amo God Mamo ta osa ari, embo amita jo ta mane torasuja. <sup>16</sup> Amita be amo enda ta ari sasapura tapa bisi ta hamota ujeje sasapura amite eto donda neite neite umbari amite eto embo ta titi ta embo peni asi hotembari amite tapa eingeko amo God Mamo ta degi puvurae rate enda ta vasiri na puvuja. <sup>17</sup> Eto enda eto enda ta ujeje tapa amo irae asi ere puvutuhua te God ta ke agi ari embomeni amina daroho iresora.

### *Keriso ta kitoho*

<sup>18</sup> Nau meniundi ungotena iji tumo auvetija amo iji tutumo auvitiro Keriso ta kitoho puvuroja ke eore ingiora amo kitoho nei nei amo matu puvuto mitera avoeto iji tumo matu auvetija. <sup>19</sup> Eto Keriso ta kitoho amo ungotena vahai mane rate ungotenau ekalesia ta jo ta eto puvuto pampera. Eto ungotenau toho kito mane pambaetera te ungotenau toho mane avo embo na kiora toto pampera. <sup>20</sup> Rate Keriso na ungota jo ta Ahihi Otohu overekena avoeto ungo ke be kiarira. <sup>21</sup> Eto ungo ke be kiari eto ke be ai ta ke sokova irae amo ungo kiari avoeto ungota degi ere kaitena <sup>22</sup> rate embo amuna Iesu amo Keriso ungotenau orekari embo mane ke aisuja amo ke sokova eria avoeto Keriso ta kitoho ra eto Meni ke be ae ue Mamo te tapa ke be ae euja <sup>23</sup> eto God Meni ke be ae euja, embo amina God Mamo te tapa ke be ae euja te God Meni umbuja amo Mamo te tapa umbasuja. <sup>24</sup> Avoeto ungo itikari ta eto ke umbeve ungota jo ta vovaja avo simba evujo eto ke avo

egikae iketo mitie unгона Mamo te Meni te ga kajueto daroho iresova. <sup>25</sup> Eto Keriso na pe amita na onde ena amo vasiri te daroho irora onde ena. <sup>26</sup> Ungo degi aemo kateto pam-bava ke sokova onde katari embopo avo kiova ke erevi ere kaitena <sup>27</sup> te Keriso na ungota jo ta Ahihi Otohu overekena avoeto ungota degi Ahihi Otohu mitia avoembo ungo embo nei amuna mane ate poekara hotembasova te Ahihi amina javotoho davore sapura davore ate poekasuja amo ke sokova irae ke be pere avoeto ke tapa asi ue Keriso ta toho eto irivujo. <sup>28</sup> Avoeto nau tunga umbari meniundi, Keriso ta jo ta irivujo eto mitirovo Keriso egerembeto puvouro me kogue mane ondikasova te titi vuju ta hetasova. <sup>29</sup> Eto Keriso ari javotoho ari embo amo ungo kiarira avoeto ari jajavotoho ari embomeni amo God ta meniundi avo be kivujo.

## 3

### *Ungo God ta meniundi ra.*

<sup>1</sup> Eto kivujo, God Mamo na ungotena osa pajire be ere ua avoeto ungotena amita meniundi ke euja avoeto ungotena amita meniundira te enda embomeni God kiae avoeto ungotenamote tapa kiaera. <sup>2</sup> Eto nau tunga umbari embomeni ungotena eha emo God ta meniundira te ambota embo ta hamo uhu hajire do ainge asuja amo God na ae ingae rate ungotena kiari amo Keriso amo hajire do ainge ere ua amo egerembeto puvouro titi na be kesora avoeto amita tomбу vahai ainge aisora. <sup>3</sup> Eto Keriso amo tongopa ambu avoeto Keriso ainge nombo asi simba mitia embo amina amita vasiri ta tongopa irae euja. <sup>4</sup> Eto embo amuna ari sapura aisuja amo God ta ke pepeni poekasuja eto ke be amo ari sasapura tapa amo God ta ke peni avo poekasora. <sup>5</sup> Eto ungo kiarira amo Keriso na embo ta ari sapura umbuto pambasi enda ta puvuna eto amita degi ari sapura tapa amo irae <sup>6</sup> avoeto embo amita jo



ta iresuja amo ari sapura matuainge aisuja embo amo God kiae be kiaera. <sup>7-8</sup> Nau meniundi ungo embo nei ta ke ambo ambo ue degi aemo ta pambavojo, Keriso amo ari javotoho ari embo eto embo ari javotoho aisuja amite tapa God ta titi ta embo javotoho aisuja, rate Satan na itikari ta eto ari sapura ere ouva ainge embo amuna ari sapura matuainge aisuja amo Satan ta tohora. Rate Satan ta pure sosou asi God ta Meni enda ta puvuna. <sup>9</sup> Eto God ta meniundi na ari sapura mane aisora amo God hajire avoeto, eto God amo enana ta mamavoeto ari sapura amo toasora. <sup>10</sup> Eto God ta meniundi davore Satan ta meniundi davore amita etokiari erevira, eto embo na ari sapura eto namei osa ae asuja embo amo God ta meni manera.

#### *Osa mine ara ari.*

<sup>11</sup> Eto ke peni itikari ta ingihava amo ungo osa mine ara evujo <sup>12</sup> amo embo Cain na ena ainge mane aisova amo Satan ta toho ena avoeto namei tenu ambuna. Eto tenu ambuna amita be amo Cain na amo ari sapura ere uaetija eto namei Abel amo ari javotoho uoi kogue tunga osaga ere uaetija avoeto tenu ambuna <sup>13</sup> ainge nombo ungo ari javotoho ere ova avo enda embo na kito ungo uje ae ururoro kito hotembari nei avojo. <sup>14</sup> Eto ungotena namei osa eora avoeto ungotena amburari toto vasiri ta embari embopo amo ungotena kogora, rate namei osa ae embo amo amburari ta matuainge iriuja. <sup>15</sup> Eto namei uje ae euja embo amo embo teore ambuora ainge ra eto tari amburari embo amina vasiri te daroho mane iresuja. <sup>16</sup> Eto namei osa ari amo eingera: eto Iesu na ungotena avoeto vasiri amita avo toto ambuna ainge eto ungotena ue namei kamei avoeto ungotenau vasiri toari haite aisora <sup>17</sup> Eto namei donda te amina namei nei donda ambu avo kito jo ae aisuja amina God ta osa ari amita jo ta naingeto irou? <sup>18</sup> Avoto nau meniundi teho pe na

ivivi na ijirou mane osa aisora te ari be avo ururo ke be aisora.

#### *God ta tombu ta hetasora*

<sup>19</sup> Eto ari ainge ue amo ungotenau hotembari jo ta avo pehumba mane aisora te God ta meniundi be hotembasora. <sup>20</sup> Eto ungotenau jo ta hotembari avo pehumba ururo God sovera isapamane te amina ungotenau hotembari tapa avo kito hondate aisuja. <sup>21-22</sup> Avoto nau osa ari embomeni ungotenau hotembari jo ta amita pehumba irae kito God ta degi pari ijie amita tombu ta heteto pari ue jopapa mane aisora te ungotena amita uje tapa eto amita ke tapa amo agi ereora avoeto do penunu aisora amo ikau umbasora. <sup>23</sup> Eto ungotena do ara amita ke peni iketija amo erevira: Ungotena God ta Meni Iesu Keriso hotembitie ke be ijie osa mine ara ue irora etija <sup>24</sup> Eto amuna God ta ke agi euja embo amo God ta jo ta mitia eto God amo embo amita jo ta mitia, eto amuna ungotenau jo ta iriuja amita hajire amo amita Ahihi Otohu avo ungotenau jo ta ikeuja.

## 4

#### *Ahihi ta etokiari*

<sup>1</sup> Nau osa ari embomeni ungota degi erena, embo na Ahihi ta sovera na ke asi ijie puvuresora te God ta Ahihi Otohu retemo Ahihi neire avo be eto kogo eto kivujo amo peroveta sokova neite neite enda ta tehue mitera <sup>2</sup> avoeto God ta Ahihi Otohu be amita etokiari ikena amo erevira eto Ahihi Otohu be amo Iesu Keriso God ta degi puvuto bisi umbuna avo ke be aisuja <sup>3</sup> te Iesu Keriso God ta degi puvurae ke asuja amo Ahihi nei avoeto Keriso ta kitohora eto Ahihi nei puvurari ke ingihava amo matu enda ta toreto ere ua. <sup>4</sup> Te nau meniundi God ta Ahihi Otohu sovera peni vahai ungota jo ta mitia amina Ahihi sasapura enda ta mitia amo nembarira avoeto enda ta peroveta sokova amite tapa ungonanembarira. <sup>5</sup> Rate enana enda ta toho avoeto enda ta ke avo ijioere

enda embomeni na ingiora <sup>6</sup> te ungotena God ta meniundi amina ke ijioire God ta toho na ingiora te God ta toho mane amina mane ingesora avoeto ke erena amo ke be ta Ahihi Otohu davore ke sokova ta Ahihi davore amo etokiari emina eoi kiora.

*Osa ari ta ke.*

<sup>7</sup> Oio nau osa ari embomeni, osa ari God ta degi puvuja amo osa ari embo amo God ta meni ra eto God kiuja avoeto ungotena osa mine ara aisora. <sup>8</sup> Eto God amo osa ari ta susu avoeto osa ae embo amina God mane kiuja. <sup>9</sup> Eto ungotena God ta osa ari be kiora ari erevi ena: Ungotena vasiri amita degi umbuto daroho irora amita Meni avo vahai ikenu enda ta puvuna. <sup>10</sup> Eto osa ari erena amo ungotena God osa eora avo mane rate God na ungotena osa eto amita Meni avo vahai amina ungotenau ari sasapura hamo amita ta bitou umbuto amburoja ikenu puvuna. <sup>11</sup> Nau osa ari embomeni, eto God na ungotena osa ue ari aingeko ena avoeto ungotena osa mine ara aetera. <sup>12</sup> Eto embo amuna God titi na kiaera te osa mine ara ururoro God ungotenau jo ta mitie osa ari amita avo pajito inono aisuja. <sup>13</sup> Eto God na amita Ahihi Otohu ungotenau degi overekena amina God ungotenau jo ta eto ungotena God ta jo ta amo kiora. <sup>14</sup> Eto God Mamo na Meni enda ta embomeni orekaja ikena amo nango na titi na kia avoeto ke hande eora <sup>15</sup> avoeto Iesu amo God ta Meni be ke asuja embo amo God ta jo ta, God amo embo amita jo ta ra <sup>16</sup> avo eto God na ungotena osa euja avo ke be ijie be hotembeora. Eto God amo osa ari ta susu ra. Eto embo amuna osa ue iresuja amo God amo amita jo ta eto amo God ta jo ta iresuja. <sup>17</sup> Eto ungotena enda ta mitie God ta hajire vahai avo ue iriroro ungotenau degi ta osa ari avo pajito inono au ke katari iji puvurou oju mane aisora te titi ta hetasora. <sup>18</sup> Eto embo na ari sapura ta hajire avo oju aisuja te osa ue iresuja amina au oju avo irae asuja amo osa ari javotoho aita

oju irae rate embo oju ue iresuja amo amita osa ari pajito inono mane aisuja. <sup>19</sup> Eto ungotena osa eora amo God na matu osa arita eora <sup>20</sup> te embo na namei ta degi tumo ue God osa ari ke euja amo ke sokova ra amita be amo embo amina namei titi na kiuja rate osa ae ra te God amo titi na kiae ra te naingeto osa amo eoi? <sup>21</sup> Avoeto God na ke peni erevi ikena: Eto embo na God osa asuja amo namei te tapa osa asuja.

## 5

*Ungotena enda ta ari nembetera*

<sup>1</sup> Eto embomeni amuna Iesu avo Keriso ungotenau orekari embo be hotembasora amo God ta meniundi be asora, eto Mamo osa asuja amo meniundi te tapa osa asuja. <sup>2</sup> Eto ungotena God ta meniundi osa ere oretemo aere amita etokiari amo erevira: amo embo amuna God osa ue amita ke agi aisuja embo amina meniundi te tapa osa aisuja. <sup>3-4</sup> Eto God osa ue amita ke agi aetera te ungotena God ta meniundi avoeto sovera umbera amina enda ta ari nembetera avoeto God ta ke agi aisora amo ngahia mane aisuja, eto ungotena God tumota eora amina enda ta ari sovera eto nembeora. <sup>5</sup> Avoeto erena amo enda ta ari sovera eto nembeora embo amo amunure? Amo Iesu avo God ta Meni be ke asuja amina nembasuja.

*Iesu amo God ta Meni bera*

<sup>6</sup> Eto Iesu amo God ta Meni be ra amo ari deina harikau kioro? Amo umo na bapataito unu God na “Meni nau be ra” ainge ijinu ingia eto nei amo teo sasaga bena ai ta ere kogora avoeto Iesu God ta Meni be ere kogora amo umo ta eto sasaga ta kogora. <sup>7</sup> Eto avo pere mane rate Ahihi Otohu na harikeoi ingiora eto Ahihi Otohu amo ke be perekari euja avoeto harikeoi ingiora <sup>8</sup> amo donda tapa heriso nei vahai amo umo te sasaga te Ahihi Otohu te amina harikeora. <sup>9</sup> Eto embo na kito harikeore ingiora amo peni mane

rate God na kito harikasuja amo pajire be ra eto harikari amita be amo hajire heriso nei vahai etena aravora <sup>10</sup> eto embo amuna God ta Meni ke be aisuja amo hajire heriso nei vahai erena amina amita jo ta iresuja rate God na amita Meni Iesu ere harikitia avo tumota ae ue ke be ae aisuja amo God ta ke sokova ke eria aravora. <sup>11</sup> Eto God na ungotenau degi ta ke hande ena amo erevira amo vasiri te daroho irari embo ta degi hande ikeuja amo Meni ta degi ta eto umbuora <sup>12</sup> avoeto God ta Meni umbasuja amita degi vasiri iresuja rate umbae amo vasiri iraera.

ungo God sokova sakova neite neite avo eto kogoeto kivujo, aravora.

### *Vasiri te daroho irari*

<sup>13</sup> Eto ke erevi ungota degi ere kaitena amo ungo God ta Meni ke be ereva avoeto vasiri te daroho iresova avoeto be kiova ere kaitena. <sup>14</sup> Eto ungotena kiarira amo God na do hotembitia avo kogue penunu aisora amo ingito ikau kesora <sup>15</sup> avoeto ungotenau pari God na ere ingihia avo ke be erera avoeto pari ta mine matu ere ikitia avo ke be aisora. <sup>16</sup> Eto embo na namei amo ari sapura ta pambasuja amo amita Ahihi amo God na tau amburesuja avo kito namei avoembo pari ijirou God na vasiri ikasuja, rate ari sapura nei ururou God na kito embo ta Ahihi tau ambuto iresuja avoembo pari avojo. <sup>17</sup> Eto ke be amo ari sasapura neite neite tapa amo javotoho mane rate ari sapura nei nei amina embo ta Ahihi tari amburari haite manera. <sup>18</sup> Aravora ungotena ere kogora amo God ta Meni Iesu Keriso amina God ta meniundi oreketo simba ururou Ari Sasapura embo Satan na tame ari inono ae ra avoeto God ta meniundi na ari sapura mane matuainge ue iresora te toasora. <sup>19</sup> Eto ke nei ere kogora amo enda eto enda ta ari tapa amo Satan ta sovera na andirari rate ungotena God ta tohora. <sup>20</sup> Eto ke nei ere kogora amo ungotena God be avo kiora God ta Meni be amina puvuto sovera ari ikena eto ungotena God be eto amita Meni Iesu Keriso ta jo ta mitera, amo God be eto vasiri daroho irari ta susura. <sup>21</sup> Nau meniundi

## 2 JOHN

### *John na ari erevi kajena*

<sup>1-2</sup> Na John ekalesia ta okose nana umu God na umbari pamone no degi ta ahari erevi ere kaitena amo God ta ke be ari na umu osa ue no meniundi te tapa ere pekitona eto ke be amina ungotenau degi ta oroho eto daroho iresuja avoeto nane vahai ae rate ke be kiari embomeni amite tapa na umu osa ere ora. <sup>3</sup> Eto ungotena osa ari na ke be ari na mitiroro God Mamo ta eto amita Meni Iesu Keriso ta hondate ari te jo ari te pekari te na ungotenau degi ta iresuja.

### *Ke be ari te osa ari*

<sup>4</sup> Eto no meniundi na God Mamo ta ke peni agi ue ke be ari na mitovoreija avo ingito tunga javotoho be ereona <sup>5</sup> Eto nau osa ari pamone ke ere kaitena amo ke eha kajae rate ke matu itikari ta ingihava amo osa mine ara ari ta ke avo be simba ava ere kaitena. <sup>6</sup> Eto itikari ta ingihava amo osa ari na irova ena eto osa ari ta ke susu amo God ta ke agi ava ena vahai aravora. <sup>7</sup> Eto ke sokova hande ari embomeni na enda tapa ta tehue Iesu Keriso amo mamo ta degi ta eto puvuto bisi umbae ke eora amo Keriso ta kitoho avoeto ke sokova eora <sup>8</sup> te ungo pure ngahia eto umbeva avo beto pam-buoi ungo hotari mane umbuova na simba evujo. <sup>9</sup> Eto embo Iesu Keriso na ate poekena avo toto degi nei ta tutuvasuja amo amita degi God irae rate Keriso ta ate poekari ai ta iresuja amo God Mamo te God Meni te amita jo ta iresuja. <sup>10</sup> Avoeto embo na puvutuhue ke sokova avo hande ururoro ingito Keriso ta atepoekari mane kito inena embo avo mane pekitie umbao bande ta torasuja <sup>11</sup> Eto pekasoamo embo amita pure sapura ai ta kaju ere oa aravora.

### *Ke tutumota*

<sup>12</sup> Eto na no degi ta ke neite neite aetena te na no degi ta sausau pam-basona avoeto ahari eita ke koso mane kajasona te nane pambuto ungotu tombo mine kiara ue ke neite neite amo ijie tunga javotoho aisora. <sup>13</sup> Eto no jao ta meniundi God na siriketo umbari amina umu ere pekitera, Orere re.



## 3 JOHN

### *John na ahari erevi embo Gaius ta degi kajena*

<sup>1</sup> Na John, na ekalesia ta okose nanena nau osa ari embo Gaius no degi ta ahari erevi ere kaitena. Eto nau ke be na umo osa ere ona. <sup>2</sup> Eto nau namei no Ahihi javotoho mitei kogona ainge eto no hamo te ari nei nei tapa amite javotoho na ue iroa pari ere ona. <sup>3</sup> Eto umo God ta ke be avo tumota ue irioa avo ungotenau namei kamei nei uhoho na puvuto etere ingito tunga javotoho be etena. <sup>4</sup> Eto nau meniundi na ke be ta iriora avoeto duru vahai amina eoi tunga javotoho eona.

### *Embo Gaius ta ari jakeka ena*

<sup>5</sup> Eto nau namei no namei kamei umo hamoari amite umo hamo ae amite tapa umbuto unduo <sup>6</sup> amina puvutuhue ekalesia eita mitera amita degi ere ingihe tunga javotoho ereora. Avoeto hondate ari deina ao enana ta pambari amo ejeha au avo ejo God kito osa ai. <sup>7</sup> Amo Keriso ta javota pahue God kiae embomeni ta degi ta hondate ari mane umbuora <sup>8</sup> avoeto ungotena enana ta namei kamei na hondate ikitiroro uhuroro God ta ke be avo ungotenane hande asora.

### *Embo Diotrefes te embo Demetrius te*

<sup>9</sup> Eto na ahari koso mane tuhaupa ekalesia ta degi iketena te embo Diotrefes na titi jigari amina asi uje ue nau ke umbae euja <sup>10</sup> avoeto aita pambuto amina ari do euja avo harikano ingesora amo amina ke sokova hande uoi nangota javo sapura ere ouva eto avo pere mane rate ungotenau namei kamei aita pambuora amina umbae ue namei kamei nei nei na umbasi eora te amina taeketo ekalesia toto pambara kurumbeuja. <sup>11</sup> Eto nau namei, ate kitira sapura ainge avo toto ate kitira javotoho amo davore avo kito

ambo ambo ue erevi hotembejo: ari javotoho ari embo amo God ta meni rate ari sapura eora embo amo God mane kiora. <sup>12</sup> Eto ke nei amo embo Demetrius amo embo tapa na avo Demetrius javotoho ke eora eto God ke be ari Ahihi amite tapa Demetrius javotohora euja avoeto nango te tapa Demetrius javotoho ke eora eto nango ke be eora amo ungo kiara.

### *Ke tutumota*

<sup>13</sup> Aravora na ke isapamane ano ingaeteva te ahari eita mane kaja-sona te <sup>14</sup> na sausau pambuto ungotetombu mine kiara ue ke amo ano ingesova. <sup>15</sup> God ta peka no degi ta iroi. Eto no namei kamei eita mitera amina umo ere pekitera. Eto nangota pekari avo namei kamei umote mitera avo vahai vahai ejo ingore.

## JUDE

### *Jude ta Ahari*

<sup>1</sup> Na Jude, Iesu Keriso ta pure embo eto James ta namei nanena ungo God na umbuto osa euja embomeni Iesu Keriso na simba euja avo engekari ta beova ungota degi ahari erevi ere kaitena <sup>2</sup> Eto God ta peka te jo ari te osa ari te ungota degi peni vahai ai.

### *Ekalesia ta kitoho embopo*

<sup>3</sup> Nau osari namei kamei eto God na ungotena oreketo umbari ta ke kajasi uje eto itiketo kaetena te ngahia nei puvei avo toto God ta ke ungotena amita embomeni ta degi ikari avo sovera eto jigihē kitoho ta degi isoro ava ere kaetena <sup>4</sup> amita be amo erevira amo embo nei uhoho na ungota jo ta kiae ondikari na toreto hamo ta ujeje sasapura asi uje isapamane uore ari sasapura teto hahaitie God na ari sasapura hotembeto toari ta ke avo jigiore eundu uoi ari sasapura eoi ungotenau Bada eto embo okose Iesu Keriso avo ere egikitera, avoeto hajire amo God uje ae ue ere ora kesora amo God ta ke ta matu kajari mitia ainge nombo avo God na ikau osaga pajire be kesora. <sup>5</sup> Amita ate kitira avo ingivujo, eto emita ke emo ungo matu kiari rate hotembari avo umbuto puvurovote avo ere kaitena amo Israel embomeni enda Egypt ta mitio Bada God na oreketo umbunu pahuo embo nei uhoho God egikea avo tenu ambuvujekea. <sup>6</sup> Eto amita ke nei amo anera ta degi God na utu i ta pure pajire be sovera te avo ikena te enana ungo pure avo ujeae eto toto pahuo God na kito umbuto “chain” na punduto umbuto mume ta ikenu iriora amo iji ke katari puvurou hajire God na ikau kesora avo simba ereora. <sup>7</sup> Ainge nombo da Sodom te Gomorrah te da nei uhoho amita engitita amita embomeni na tiha paiha ue ari sapura neite neite avo uo God na kito i na ikenu beto evekena amo embo

na ari sasapura ururoro umbuto i ta gosukau daroho ta evekasora amita ate kitira avo ena. <sup>8</sup> Eto ainge nombo embo ungote mitera amita titi amo ari sasapura na titi bavahaikari amina ari sapura uore amina hamo ta tongopa euja God ta titi jigari egikeora eto God ta anera ototohu amo urumbeora. <sup>9</sup> Eto ke be amo God ta anera okose javo Michael amina Moses ambuna amita hamo amita eto Satan ga boru jumbuna amo Satan hoviro ae rate ke einge ena “Bada na hajire ikau kesoa” ainge ena <sup>10</sup> te embomeni sasapura emina God ta anera te ke pepeni te tapa avo be hotembae ue hoviro eora te enana ta hotembari amo o ohu ta hotembari vahai aingeko amina enana ta Ahihi tetere ambuvujeketera avoeto God na hajire ngahia na ikau kesora. <sup>11</sup> Jove Jove, enana embo Cain na ari ena vahai avo ere ora eto enana koro mine umbasi embo Balaam na ari sapura ena vahai avo ere ore eto enana God egiketera amo embo Korah na Moses egiketo hajire kina ainge nombo avo vahai kesora. <sup>12</sup> Eto ungo Keriso ta pondo ta vahaita uove enana na puvuto ungote vahaita eto God hotembae ue enana ta bisi unduresi puvuora amo ungota tongopa mitia amo enanara avoeto enana amo oje ainge pisara na umbuto piroun eto pahuoi ga beae euja eto nei amo i jaise ainge be ari ijira te be mane euja avoeto koheketo beto sape euja aingera <sup>13</sup> eto nei amo enana ari sapura ue me ambuko eora amo eva vasiri pajire be eto horo na papajiketo tongopa umbuto bitito hora ta ikeuja aingekora, eto nei amo embomeni amina tarama na sohuketo beto mumeta daroho ue iresora aingekora. <sup>14-15</sup> Eto enana embo sasapura amina puvuresora amita ke amo Adam ta teka hoka tapa 6 puvuo ambota <sup>7</sup> amo embo Enoch na puvuto ke einge ena, “kivujo, Bada God na amita embo ototohu tapa ‘thousand’ doitokore avo umbuto ere puvutuhua amina God uje ae ue ari sasapura neite

neite ue God hovi ro eora eto God ta javo urumbeora embopo amita hajire ikaro memenga osaga kiora ere puvutohora”, ke ainge ijie Enoch na harikena. <sup>16</sup> Eto embo emo ari urumbari embo uje amita ta pahue umo eonga na na ijie na javotoho rate embo nei sapura ra ke ainge ijie donda embo nei ta degi umbasi ue donda mam o ta degi ando na osa ue umbuto ambota amo ehako sapura euja.

### *Kogue irivujo*

<sup>17</sup> Avoeto nau namei kamei erevi hotembevujo. Embo ainge puvuresora amo Bada Iesu Keriso ta Apostels na ke einge ijie harikeo ingia. <sup>18</sup> “Iji tutumo aovitirou embo puvuresora amina God uje ae ue ungo kege ganini na urumbitie enana ta uje ta tutuvasora” ainge ea <sup>19</sup> avoeto puvurora ea embopo amo puvuto enana ta hamo ta uje ta pahue ungo kateke kateke eora amo enana ta degi Ahihi Otohu irae be ra. <sup>20</sup> Rate nau namei kamei ungo God ta ke Otohu avo be kito ambo ambo ue Ahihi Otohu ta sovera na pari evujo <sup>21</sup> Eto God ta osa ari ta mitie Bada Iesu Keriso na ungo jo au vasiri daroho ikaja simba evujo. <sup>22</sup> Eto ungo God tumota ae embopo avo jo evujo. <sup>23</sup> Eto enana avo i peri ta evekara gosukitiroro oreto umbuvujo rate ungote tapa na enana ta ari sapura ta beova na kogue mitie enana jo ururou ari sapura tapa uje ae ue irivujo.

### *God jakeka ari ta pari*

<sup>24</sup> Eto ungo ari sapura ta beova Simba Ari Embo na ungo oreketo umbuto amita usasa ta ikau heteto ari sapura irae tunga javotoho te iresova. <sup>25</sup> Eto Bada Iesu Keriso ta ari avo embo ungotenau orekari embo God jakeka ijie amita degi usasa te sovera te titi jigari te sago kiari te tapa oroho eto daroho iresuja, aravora.

## REVELATION

*Ari ambota puvuresuja amita ke John ta degi ikenu kajena*

<sup>1</sup> Eto Book emita jo ta amo ari ambota do puvuresuja avo God na Iesu Keriso ta degi enu ingito amita pure ari embopo na iji isapa mitiroro do puvuresuja avo be ingora amita anera ikenu puvuto pure meni John ta degi unu kogue kajena. <sup>2</sup> Eto God ta ke Iesu Keriso ta degi ikenu umbuto ehako John ta degi ikenu uhue amo ke be perekarira ainge John na ena <sup>3</sup> Eto ari erei ta kajari amo porere mane sausau puvuresuja avoeto embo amuna ke erevi etekaro ingito mane toasuja te be hotembitie tunga javotoho ari umbasuja.

*John na Ekalesia tapa 7 pekena*

<sup>4</sup> Na John nane ekalesia tapa 7 enda “Asia” jo ta mitera amita degi ke erevi ere kaitena. Eto embo matu iriauja, eto eha mitia eto ambota iresuja eto amita avo arumba peni ai ta Ahihi tapa 7 areto mitera <sup>5</sup> eto Iesu Keriso amo God ta ari kito harikari embo eto vasiri te erari ta kiti umbari embo, eto enda ta kings tapa ta titi jigari embo, aingeto amita degi ta eto ungota degi hondate ari te pekari te puvuresuja. Eto ungotena osa ari Embo Iesu na amita sasaga na ungotena ari sasapura na andirari aravo bujeketo umbunu <sup>6</sup> embomeni amita toho eto priests ea avoeto God Mama ta ke agi ue iresora avoeto Iesu Keriso ta degi usasa te sovera te daroho iresuja aravora, <sup>7</sup> Eto kivujo, amina oje ga puvutuhurou embo tapa na titi na kogue avo tari embopo amite eto enda embopo tapa amite na osaga kogue sisitasi aisora, avo puvuroi ejo, aravora. <sup>8</sup> Eto Bada God na ke einge eria, “Na matu iriaona eto eha mitena eto ambota iresona avoeto iji susu te kombu te donda tapa simba ari Embo Sovera te amo namora”, ainge eria.

*John na Keriso kina*

<sup>9</sup> Eto na ungota namei John ungotete tapa Iesu Keriso ta toho eto memenga te osaga te kogue sovera ari umbuto iriora embo nanena God ta ke avo ke be ijie Iesu tumota eona avoeto tipura ana ikeo ituka javo Patmos ai ta pambuto mitene, <sup>10</sup> Bada ta jangu indari iji puvei God ta Ahihi Otohu ta sovera na jigei mitene nau kuho ta huihavi ainge pajire be avo puvutuhoi ke einge ingena. <sup>11</sup> “Umo o hoga umbuto tapa do kesoa avo kaeto ekalesia tapa 7 eremita degi ikejo amo da Ephesus te da Smyrna te da Pergamum te da Thyatira, te Sardis te Philadelphia te Laodicea te amita degi ikejo”. <sup>12</sup> Ainge ijinu ingito amuna erei avo kesi egerembeto tutuvi gold na ari tapa 7 ainge avo usasa hamo ta tetembetere evekitera avo kena. <sup>13</sup> Eto usasa ta jo ta amo Embo ta Meni avo heteto mitei kiarako etena amita bo amo koso kaso tunga ta eto beto utu singi ta ari avo asuketija eto pupuri gold na ari avo temaketo heteto mitei kena. <sup>14</sup> Eto amita siro amo parara be oje ainge eto o sheep ta tu ainge eto amita titi amo i peri bitiuja ainge kena. <sup>15</sup> Eto amita utu amo auri i ta boreore eviketo pangeuja ainge eto amita ke havi amo umu muenga na tindu euja aingera. <sup>16</sup> Eto amita ingeni be ta amo kuro tapa 7 ainge jigito mitia eto asivo amo ovitihovitihi ti perekari avo amita pe ta eto puvutuhua, eto amita tombo amo iji na heri heri euja aingera. <sup>17</sup> Eto na avo kito joru ue beto amita utu ta ambuto mitene amita ingeni be na nau siro ta tembitie ke einge ijija, “Umo joru mane asoa, na iji kombu ta eto iji susu ta irari embo <sup>18</sup> vasiri te daroho iriona. Eto na embo ambuvujekeora avo simba ue ambuto pambuto iriora amita degi javo ‘Hades’ amita bokiri tahi jigito iriona. <sup>19</sup> Avoeto iji eha amita ari te ambota do puvuresuja amite avo eha ururono kogue kajejo embomeni eteketo kiore. <sup>20</sup> Eto kuro 7 ainge nau



ingeni be ta mitia eto usasa 7 tutuvi hamo ta tetembetere mitia amita be amo erevira, kuro 7 amo ekalesia tapa 7 amita anera eto usasa 7 amo ekalesia tapa 7 aingera.

## 2

### *Ke erevi da Ephesus ta ekalesia ta degi ikena*

<sup>1</sup> Eto da Ephesus ta ekalesia ta ke hande ari anera ta degi ke einge kajejo 'Eto embo vahai amina usasa tapa 7 tutuvi hamo ta tetembari amita ugorota tehue kuro tapa 7 ingeni be ta jigito mitia amina einge eria ingivujo, <sup>2</sup> ungo na hamo ngahia eto pure ngahia ue ari neite neite avo ere ova eto ungo na ke sokova na ate poekari embopo uje ae ue God ta apostero ke ijie ungota degi irari embopo ta degi eto kiari iketo enana ke be mane avo tambeva. <sup>3</sup> Eto ungonu javo nau tumota ere ova avoeto embo na eore memenga osaga kiova te pegogo eto toae hamo ngahia eto iriova. <sup>4</sup> Rate ungota sapura vahai eove kiona amo erevira. Amo ungonu matu kiti ta Keriso osa ue osa mine ara uove kiaona avo toto tu be ta heteteve irae etija <sup>5</sup> avoeto jo hapereketo kiti ueva ainge nombo evujo. Eto ungo jo haperekae aisova amo na puvuto ungota usasa tutuvi hamo ta tembari avo umbano irae aisuja. <sup>6</sup> Rate ungota ari javotoho vahai amo na 'Nicolaitan'\* ta ari uje ae eona ainge nombo ungo uje ae eova. <sup>7</sup> Eto ungota onde irirou kito Ahihi Otohu na ekalesia tapa ta ke do eria avo ingivujo. Eto embo amuna sovera eto nembasuja amo ano God ta 'paradise' ta toreto i vasiri ta be indesuja.'

### *Ke erevi da Smyrna ta ekalesia ta degi ikena*

<sup>8</sup> Eto Da Smyrna ta ekalesia ta ke hande ari anera ta degi ke einge kajejo 'Eto iji susu ta eto pambuto kombu ta irari embo ambuto ehako vasiri te erari amina ungota degi ke

einge eria, <sup>9</sup> Ungo memenga osaga kogoe donda ambu teho mitovova amo na kogona te ungota ari javotoho amina ungo hajae vajae embopo ere ova. Eto Judea embopo nei uhoho na ungota degi ta pehumba ere ora amo na ere kogona te amo Judea embopo be manera te Satan ta toho uho na ere ora <sup>10</sup> eto ungota degi memenga puvuresuja avo oju avojo rate na ungota degi erena amo Satan na ungo nei uhoho avo eto kesi tipura ta ikau mitirovo iji tapa 10 ainge amita jo ta memenga ikaro osaga kesova. Eto enana na ungo taro amburesi ahumpa ue kito na egikae asova amo na ungota siro ta vasiri daroho irari na kogombasona. <sup>11</sup> Eto ungota onde irirou kito Ahihi Otohu na ekalesia tapa ta ke do eria avo ingivujo. Eto ke be amo sovera eto iresuja embo amita Ahihi mane amburesuja.'

### *Ke erevi da Pergamuna ta ekalesia ta degi ikena*

<sup>12</sup> Eto Da Pergamum ta ekalesia ta ke hande ari anera ta degi ke einge kajejo 'Embo Asivo ti ovitihote ovitihote jigama ari embo amina ungota degi ke einge eria, <sup>13</sup> Eto ungota da vahai embomeni ta ari sasapura isapamane amo Satan na da aita irarako oi kogona rate ungo na na ke be ijie javo nau tumota eova amo na kogona. Eto ungota da ai ta Satan iriuja avoeto ai ta nau ke hande ari embo javotoho javo Antipas avo teo ambuna te ungonu na egikae tumota ue mitovova. <sup>14</sup> Rate ungota ari sasapura ere ova amo eingera: Peroveta sapura matu javo Balaam amina King Balak ate poekenu Israel embomeni na indari God ingeni na ove ari amita degi pene ikari avo indie tiha paiha ue oine sasapura te tapa ara ena. Eto ungota embo nei uhoho na ate poekari ainge amo ere ora. <sup>15</sup> Eto ungota embopo nei nei amina Nicolaitans ta ate poekari sasapura

\* **2:6:** Nicolaitans: Enana amina ari sasapura ta gamo kesi uje isapamane ere uaetera.

avo jigama ere ora. <sup>16</sup> Avoeto enana jo haperekara erena te jo haperekae amo nau pe ta asivo mitia amina umbuto enana ga isoro asona. <sup>17</sup> Eto ungota onde irirou kito Ahihi Otohu na ekalesia tapa ta ke do eria avo ingivujo, eto embo amuna sovera eto iresuja amita degi Utu ta indari javo 'mana' ondikari avo umbuto ikano indirou atara orina parara be amita hamo ta javo eha kaeto ikano umbuto umo oenga kesuja.'

*Ke erevi da Thyatira ta ekalesia ta degi ikena.*

<sup>18</sup> 'Eto Da Thyatira ta ekalesia ta ke hande ari anera ta degi ke einge kajejo: Ke emo God ta Meni titi i perimbarako euja eto amita utu amo auri gajukeore piriki piriki euja aingeko amina eria. <sup>19</sup> Na ungota ari jajavotoho te osa ari te tumota ari te pure kiti isapa isapa ueva ainge mane pure eha amo pajire be rate pegogo eto toae ereova. <sup>20</sup> Rate ungota ari sapura vahai amo erevira. Amo ungota pamone vahai 'Jezebel' amo oenga peroveta ke ijie nau pure ari embomeni na tiha ue oine sapura ue indari god sokova ingeni na ove ari amita degi hande ikari avo indora ate poekeuja te ungo na taekae eova <sup>21</sup> avoeto na amina jo ahereketo ari sasapura avo toaja iji iketena te toari uje ae ere ua <sup>22</sup> avoeto na pamone avo umbuto gosukano evari besi ta beto mitie osaga memenga kogue mitirou enana amiga tiha eora embomeni amina jo ahereketo toae asora amo amite tapa ano osaga te memenga te peni vahai be kesora <sup>23</sup> amo na pamone amita meniundi te tapa tano ahuroro ekalesia tapa na na kogue embo ta hotembari te jo te sirikari embo ke asora eto na ungo vahai vahai ta ari tapa siriketo hajire ikasona aingera. <sup>24</sup> Eto na ungo nei uhoho Thyatira ta miteva amina pamone amita ate poekari umbae ue Satan ta ke ondikari ta iriuja avo umbae iriova ungota degi bouka nei do mane ikasona te <sup>25</sup> ungota tumota

ari be avo jigito irirovo puvuresona. <sup>26</sup> Eto embo amuna sovera ue uje nau avo ururou iji kombu puvurou nau Mama na enu na heteto iriona ainge nombo ano <sup>27</sup> embo amina heteto enda tapa titi jigihе daho ngahia ikano umbuto jigito mitie enda tapa embomeni taro beasora amo oyu enda na ari teoi karaun eto bearako aisora. <sup>28</sup> Eto embo avo ano iji te kuro na kaeto usasa arako aisuja. <sup>29</sup> Eto ungota onde irirou kito Ahihi Otohu na ekalesia tapa ta ke do eria avo ingivujo.'

### 3

*Ke erevi da Sardis ta ekalesia ta degi ikena.*

<sup>1</sup> Eto da Sardis ta ke hande ari anera ta degi ke einge kajejo 'ke erevi amo embo God ta Ahihi tapa 7 eto kuro tapa 7 jigito mitia amina eria. Nane ungota ari kogona amo embomeni na ungo vasiri te ke erera te na kogona amo ungo amburari embopora. <sup>2</sup> Avoeto ungo erevu! Ungota ari tapa avo God na kogua avo inono ae be ra avoeto ungota sovera isapa do mitia ano beto pambuto irae asi ere pahua <sup>3</sup> avoeto ungo nau ke do ingito uhava avo ehako hotembeto jo ahereketo agi evujo, rate ungo erae asova amo na iji nei hotembae asova amikote pegene embo na puvurarako aisona. <sup>4</sup> Eto ungo da Sardis embo heriso amina ungota bo tongopa na hatikae eova amo ungota ari jajavotoho inono mitia avoeto nane ano bo parara asuketo namote isa aisova. <sup>5</sup> Eto embo amuna enana ainge sovera eto irirou bo parara ikano asukasuja. Eto amita javo amo Book javo vasiri eha aita kajari mitia avo mane purasona te daroho irirou Mama te Mama ta anera te amita degi ano ingesora <sup>6</sup> Eto ungota onde mitirou kito Ahihi Otohu na ekalesia tapa ta degi ke eria avo ingesuja.'

*Ke erevi da Philadelphia ta ekalesia ta degi ikena.*

<sup>7</sup> Eto da Philadelphia ta ekalesia ta ke hande ari anera ta degi ke einge kajejo 'ke emo ke be ari embo otohu, David, ta bokiri tahi God ta irari da avo hirikasuja avo jigito iriujua amina eria. Eto na da avo embo ta degi hirikasona amo embo na ahurekari inono ae eto na da avo embo ta degi ahurekasona amo embo na hirikari inono ae ra. <sup>8</sup> Eto na ungota ari tapa kogona avoeto, kivujo, na ungota titi ta bokiri iketo pe hiriketene mitia amo embo na ahurekari inono aera eto na kogona amo ungota sovera isapa be rate ungo na javo nau egikae mitie ke nau agi ere ova <sup>9</sup> avoeto enana Satan ga kajuari embomeni amina dago Judea ra ijie ke sokova na erera avo ano ungota utu ta beto gombuto God na ungo osa ere ua ke ainge ara aisona. <sup>10</sup> Eto ungo na memenga kito toae ke nau agi ue sovera eto iriova avoeto enda embomeni tapa ta degi eto kiari ikasona amo ungo na mane kesova te oreketo umbasona.

<sup>11</sup> Eto na sausau puvuresona avoeto ungota degi ari javotoho do mitia avo ngahia na jigivujo eto embo nei na ungota siro kope mane egimbeto umbasuja. <sup>12</sup> Eto embo amuna sovera eto irirou amo na nau mama ta bande otohu ai ta ano tutuvi vahai eto hetasuja eto amina bande avo mane toto pambasuja te nau God ta javo eto nau God ta da Jerusalem eha Utu i ta eto beasuja amita javo te eto nau javo eha amite tapa amita hamo ta kajasona. <sup>13</sup> Avoeto ungota onde irirou kito Ahihi Otohu na ekalesia tapa ta degi ke do eria avo ingivujo.'

*Ke erevi da Laodicea ta ekalesia ta degi ikena.*

<sup>14</sup> Eto da Laodicea ta ekalesia ta ke hande ari anera ta degi ke einge kajejo 'Eto ke erevi amo donda tapa God ta ingeni na ari amita titi jigari embo amina God ta ke avo tapa inono ta hande euja avoeto tumota ari haite embo amina einge eria. <sup>15</sup> Na ungota ari tapa ere kogona amo jo na ae hamo na ere ova avoeto javotoho

manera. Eto ungonana ari javotoho aeteva amo tunga javotoho aetena te <sup>16</sup> amo ari javotoho be mane eto ari sapura be mane avoeto nau pe na ungo isuva ano beto irae aisova. <sup>17</sup> Amo ungo na 'Na haja vaja embo avoeto inonora' ainge ereva te ke be amo ungo donda ambu, titi kuru ari hoivo iri bo irae hamo uhu teho miteva amo ungo kiaera <sup>18</sup> avoeto ungo 'gold' i bevere ta ikeore eveketo sapura tapa karaun eto beau javotoho pere avo nau degi ta ombuto haja vaja embo be evujo, eto hamo uhu teho avoeto bo parara umbuto asuketo me mane kesova, eto sivo umbuto titi ta kaimbavo titi hirikau javotoho kesova. <sup>19</sup> Eto na embo osa ue ari javotoho ate poekeona avo umbara memenga ikeona avoeto ungota jo tapa na jo ahereketo ari saspura tovujo. <sup>20</sup> Eto kivujo, na bande pe ta bahihiri ue mitena avoeto embo amuna ke nau ingito bande pe hirikau toreto amiga arumbeto indesona.

<sup>21</sup> Eto na sovera ereuatena avoeto puvuto nau Mama ga amita avo arumba ta arumbeto mitena avoeto embo amuna sovera aisuja avo umbano nau avo arumba ta namo ga arumbasuja. <sup>22</sup> Eto ungota onde mitirou kito Ahihi Otohu na ekalesia tapa ta degi ke do eria avo ingivujo'."

## 4

*God ta avo arumba Utu i ta mitia.*

<sup>1</sup> Eto ke avo nau degi ta etei irae etei Utu i ta pe avo nau titi buju ta hiriketo mitei kogone ke huin ta havi ainge ingihana amina ehako nau degi ta ke einge etija "Umo ei huma hetejo, na iji ambota do puvuresuja avo ano kesoa" ke ainge etei <sup>2</sup> Ahihi na na umbuto pambuto iketei Utu i ta avo arumba peni ai embo arumbeto mitia amita titi buju ta heteto mitie embo hajire einge kena. <sup>3</sup> Amita bo amo i kiro be na kembari ainge kiarako etena eto eriri ove green avo terito embo avo jorereto mitei kena.

<sup>4</sup> Eto avo arumba peni amita engitita amo avo arumba tapa 24 amina jorerari eto embo okokose tapa 24 amina bo parara asukari eto siro kope gold na ari amo asukari amina areto mitere kena. <sup>5</sup> Eto sariambu sariambu ue (pipiri te tururu te) avo arumba peni ta eto puvutohoi amita titi buju ta amo usasa tapa 7 ainge eveketo peri peri ore kena amita be amo God ta Ahihi Otohu vahai amita uhoho tapa 7 ra eto avo arumba peni amita titi buju ta amo umo ukomo pajire eto bisibisi be eto amita kiari javotoho be usasa perekari avo mitia.

<sup>6</sup> Eto avo arumba peni ai ta amo o tapa 4 vasiri te hajire nei amina joeketo mitera amita ku te joga te tapa amo titi perekari <sup>7</sup> vahai amo o lion aingeko nei amo o cow sianda aingeko nei amita tombu amo embo ta tombu aingeko eto nei amo di tuna gati na pambuja aingekora. <sup>8</sup> Eto o vahai vahai amita gati tapa 6 eto hamo uhu tapa amo titi perekari ra. Eto o tapa 4 amina iji te mume te matuainge ke einge eora. "Otohu, Otohu, Otohu, Bada God sovera isapamane te amo matu iriauja eha mitia eto ambota iresuja embo ra." <sup>9</sup> Ainge eora amina daroho irari embo avo arumba peni ta mitia avo Otohu ue jakeka ijie osa uore <sup>10</sup> embo pepeni tapa 24 amina beto gombuto mitie daroho irari embo avo jakeka ijie enana ta siro kope houketo avo arumba peni amita engitita tembitie ke einge eora, <sup>11</sup> "Donda tapa amo ingeni no na ove ari iriora avoeto dagota Bada eto dagota God inena sovera ari te usasa te osa ari te avo umbari inono ra." ke ainge eora.

## 5

*O Sheep Meni na o hoga ta ke kajari avo umbuna*

<sup>1</sup> Eto nei kena amo avo arumba peni ta arumbeto mitia amita ingeni be ta o hoga egovekari ai ta ke kajari amo joga te ku te kajari pere avo jigito mitei kena eto o hoga

amita pe amo pangire tapa 7 amina bavahaikari <sup>2</sup> Eto anera vahai peni sovera te amina jage eto ke einge ijija, "Embo javotoho vahai damina ke eremita pangire seuketo hirikari haitere?" ainge ijinu <sup>3</sup> Utu ta eto enda ta eto embo ambuto pambuto iriora degi ai ta jombure etera te ke erevi hiriketo jo ta kiari haiteko embo avo tambaera. <sup>4</sup> Eto o hoga hiriketo ke jo ta kiari embo aravo tambae avoeto osaga kogue si ijie mitene <sup>5</sup> embo okose vahai amina puvuto nau degi ta ke einge ijija, "Umo si toto ke nau inga! Israel javo tapa 12 rate vahai Judah ta embo sovera te vahai javo 'Lion' ke eora amo King David ta susu be amina tapa nembeto heteto titi jigihemitia avoeto pangire 7 amo seuketo hiriketo ke jo ta amo kiari haitera" ke ainge ijinu <sup>6</sup> avo arumba peni amita engitita o vasiri te tapa 4 eto embo okokose te tapa joeketo mitera avo arumba peni amita ugorota amo O Sheep Meni tari amburari avo heteto mitei kena eto amita perema tapa 7 eto titi tapa 7 kena amita be amo God ta Ahihi tapa 7 enda tapa ta ikeoi pambuora avo kena. <sup>7</sup> Eto O Sheep Meni amina imite embo avo arumba peni ta arumbeto mitina amita ingeni be ta o hoga ta ke kajari avo uhunu <sup>8</sup> o vasiri te tapa 4 eto embo okokose 24 enana vahai vahai ainge 'guitar' jigito atungu gold na ari amita jo ta 'incense' ikeo evekitina amo embo ototohu ta pari avoeto jigito O Sheep Meni ta utu ta beto gombuto <sup>9</sup> haveni eha ganitie einge ea, "Umo embo na teo ambuto sasaga no na God ta toho ara enda embo tapa eto ke hajire nei te nei te tapa avo ombuto umba avoeto inena vahai pangire na o hoga vahaikari avo seuketo hiriketo kesoa inonora. <sup>10</sup> Eto God na embomeni amita toho avo simba ururou amita ke agi ue enda tapa titi jigisora" haveni na ainge ea.

<sup>11</sup> Eto na arerembeto kena amo anera isapamane be etekari haiteko



mane amina haveni ijie puvuto avo arumba peni amite o vasiri te eto embo okokose amite tapa joeketo haveni ea <sup>12</sup> amo havi pajire be ijie einge ea “O Sheep Meni tari amita degi sovera te haja vaja te ari te kiari te otohū ari te usasa te embo jakeka ari amite tapa amita degi puvuroi”, haveni ainge ijio <sup>13</sup> o te embo te tapa Utu i ta eto enda ta eto eva jo ta eto embo ambuvujekari amite tapa na haveni einge ijiera, “Avo arumba peni ta mitia amite eto O Sheep Meni amita degi jakeka ari te otohū ari te usasa te sovera te daroho matuainge irore”, ainge eo <sup>14</sup> o vasiri te 4 amina aravora ainge ijio embo okokose amina beto gombuto jakeka ea.

## 6

*O Sheep Meni na o hoga ta ke kajari itiketo pangire seukena*

<sup>1</sup> Eto na kogue mitene O Sheep Meni na itiketo pangire vahai seuketei o vasiri te 4 rate vahai amina ke ‘hae’ ainge amo tururu na keko etei ingihone <sup>2</sup> o horse hamo parara amina sariketo embo hamo ta arumbari eto ki te peva te jigari puvei enana na amita degi siro kope iketere asuketo amita kitoho ga isoro eto nembasi pambija. <sup>3</sup> Eto O Sheep Meni na pangire nei seuketei O Vasirite nei amina ‘hae’ ainge ijinu <sup>4</sup> o horse nei hamo i peri ainge hamo pangari amina embo hamota arumbari sariketo puvera amita degi peka taeketo isoro asora sovera ari amite eto isoro asivo peni te avo iketere umbuto pahaja. <sup>5</sup> Eto O Sheep Meni na pangire heriso seuketei irae etei nei avo seukitinu O Vasirite nei amina ‘hae’ ainge ijinu o horse hamo mume amina nau titita sariketo puvei kena. Eto o amita hamota embo arumbeto puvija amo donda tembeto bouka teka umbari avo ingeni na jigito puvija. <sup>6</sup> Eto O Vasirite tapa 4 amita jo ta ke einge

puvei ingena “Eto ejo embomeni na koro pajire be na indari isapa be umbare amo embo na pure iji vahai asuja amo ‘wheat’\* be avo litre vahai umbautemo ‘barley’† be 3 litre uhue koro ikau irae aisuja ainge ejo are, rate esi ‘grape’‡ eto i ‘olive’§ amita pure avo ao mane sapura aisuja!” ainge ena. <sup>7</sup> Eto O Sheep Meni na pangire heriso nei vahai seuketei irae etei nei seukitinu O Vasiri te tutumota vahai amina ‘hae’ ainge ijinu <sup>8</sup> o horse nei hamo goe ari amo embo javo Tari Amburari avo hamo ta arumbari puvutuhunu amita ambota amo embo ambuto pambuto iriora da javo Hades amite tapa embo na puvurarako etei kena. Eto embo javo Tari Amburari amite eto embo javo Hades amina enda embomeni tapa avo umbuto kateke kateke eto tapa 4 ainge iketo heriso nei vahai avo toto vahai avo asivo na tasora, indari pure sosou aro beuje na amburesora eto isoro o na kambaro amburesora eto ari tapa erevi ara sovera ari amo embo javo tari amburari amite eto embo javo Hades amita degi iketere umbera.

<sup>9</sup> Eto pangire heriso nei heriso seuketo nei seukitinu God ke be ari embopo amo God egikae ue iriaora avo kitoho embo na teo ambuvujekea amita Ahihi amo pene ikari gaga suvu ai kogone <sup>10</sup> enana amina ke peni vahai be eto einge etera, “Bada God donda tapa simba ari embo umo ke be eto Embo Otohū avoeto iji doinge simba eto enda embo ta ari sasapura sirikitie nango kitoho na teo ambuvujekea amita sasaga beari amita mine uhue hajire ikao kiaeterete avo simba mitovora,” <sup>11</sup> ke ainge ijio enana ta degi bo parara kokoso avo ikerekenu ase, “iji isapa simba ururovo ungota namei kamei God ta ke agi ari embopo nei uhoho avo kitoho na taro amburoro teka inono ai avo simba evujo,” ainge ena.

\* **6:6:** ‘wheat’: be amina jaseto ‘flour’ eto ‘bread’ boreora. † **6:6:** ‘barley’: be amo ‘wheat’ be aingera. ‡ **6:6:** ‘grape’: esi ‘grape’ ta be amina wine eora. § **6:6:** ‘olive’: i ‘olive’ be amina ‘oil’ eora.

<sup>12</sup> Eto na kogue mitene o hoga ta ke kajari amita pangire 5 seuketei irae etei God ta O Meni na 6 seukitei enda ta titira pajire puvutuhoi embo amburari ta sinena ue pusu kuteora hajire avo iji na mume etei hariga na sasaga ta hajire arako etei <sup>13</sup> kuro tapa enda ta betera amo i junga be sari pisara na jaheveoi beuja aingeko betera. <sup>14</sup> Eto utu amo keta na egov-eketo pambuja aingeko oi tiri te ituka te na toto degi nei ta pampera. <sup>15</sup> Eto enda ta kings te embo pepenite isoro kiti umbari embopo te haja vaja embopote, sovera embopote embo nei ta ke agi ue pure ari embomeni te eto embo teho te tapa na pambuto panga to ta eto tiri temba ta karu to ta ondisiketo mitie <sup>16</sup> tirite atarate ta degi ke einge etera, “O sheep meni na tumo ere ua avoeto embo avoarumba peni ta arumbeto mitia amita tombu titiha eto nangota hamota beto ahureke ondiketo irore. <sup>17</sup> Amo embo siriketo hajire ikari iji peni puvija amo enda embo amuna hetari haitere?” ke ainge etera.

## 7

*Eto God na embo tapa 144,000 ainge siriketo umbasuja.*

<sup>1</sup> Eto amita ambota ari einge puvei kena. Amo anera tapa 4 amina kaina ta patina ta ihane ta eto sose ta pambuto heheteketo pisara enda ta pambuja taeketere eva ta enda ta eto isivasi ta pambae toturutei <sup>2-4</sup> anera nei vahai amina God ta hajire avo iketei amita ingeni na jigito ihane ta eto puvuto anera tapa 4 amita degi ta ke peni vahai eto einge ijija “Ungota sovera na enda te eva te isivasi te sosou asi miteva te isapa simba ururovo ungotenau God ta hajire erevi amita pure ari embomeni ta beo ta vahaikaro kakamba ai”. ke ainge ei Israel ta ohihi javo tapa 12 amita embomeni tapa 144,000 ainge avo God ta hajire ikereketera

<sup>5</sup> amo Judah ta embomeni tapa 12,000 eto nei Reuben ta embomeni

tapa 12,000 eto nei Gad ta embomeni tapa 12,000

<sup>6</sup> eto nei Asher ta embomeni tapa 12,000 eto nei Naphtali ta embomeni tapa 12,000 eto nei Manasseh ta embomeni tapa 12,000

<sup>7</sup> eto nei Simeon ta embomeni tapa 12,000 eto nei Levi ta embomeni tapa 12,000 eto nei Issachar ta embomeni tapa 12,000

<sup>8</sup> eto nei Zebulon ta embomeni tapa 12,000 eto nei Joseph ta embomeni tapa 12,000 eto nei Benjamin ta embomeni tapa 12,000 aingeto God ta hajire beo ta iketere umpera.

*Embomeni isapamane be bo parara asari amina toruketo mitera.*

<sup>9</sup> Eto amina ambota kena amo embomeni isapamane be etekari haiteko mane avo toruketo mitere kena amo enda neite neite amita embomeni tapa ke neite neite tapa eto ohihi javo neite neite tapa amina puvuto avo arumba peni amita eto O Sheep Meni amita titi buju ta toruketera amo bo parara kokoso aseto koropa gigi jigiriketo mitie <sup>10</sup> ke peni vahai be eto einge ijiera “Embo oreketo umbari amo ungotenau God avo arumba peni ta arumbeto mitia amita degi mitia eto O Sheep Meni amita degi ta mitia”, ainge ijiera. <sup>11</sup> Eto anera tapa na avo arumba peni te embo okokose te o vasiri te 4 amite avo jorereto beto gombuto God jakeka ijie <sup>12</sup> ke einge ijiera. “Aravora, jakeka ari te usasa te kiari te osa ari te Otohu ari te titi jigari te sovera ari te avo ungotenau God ta degi daroho iroi, aravora” ainge ijio <sup>13</sup> embo okose vahai amina nau degi ta ahereketo ke einge eto ingija “Embomeni bo parara kokoso asari emo davo embore eto nainge eto puvure?” ainge etei <sup>14-15</sup> “Mama, embomeni emo umo kiarira” ainge etene ke mine jandireketo einge etija. “Embomeni emina enda ta osaga memenga kesora iji puvuresuja ai ta eto puvuto enana ta bo avo O Sheep Meni ta sasaga ta egetere parara etija avoeto enana God ta

degi otohu ai toreto iji matuainge avo arumba ta titi buju ta God ta ke agi ue mitera <sup>16</sup> avoeto enana God na utumo au umo beuje indari beuje mane kesora eto iji na mane evekau bevere kesora <sup>17</sup> te O Sheep Meni avo arumba peni ugorota mitia amina enana avo o simba arako ue enana urumbeto umbuto pambuto umo vasiri te kuru bitiuja ai ta au indiroro God na enana ta titi sisivu tuhasuja". ainge ijija.

## 8

### *Pangire tutumota seukitaja.*

<sup>1</sup> Eto o hoga pangire tutumota seukitei Utu i ta asavi ae iji '1/2 hour' ainge jamo uija. <sup>2</sup> Eto na kogone anera tapa 7 God ta titi buju ta hetetere huin tapa 7 ainge iketei umbera. <sup>3</sup> Eto anera nei vahai amina iposi mune te bitiuja amita atungu gold na ari avo ingeni na jigito pene gaga ta pambuto hetetei donda evekitie mune asuja avo isapamane iketei umbuto embo ototohu ta pari amiga umbuto avo arumba engitita pene gaga gold na ari ai ta tembetei eveketo <sup>4</sup> iposi mune te amina embo ototohu ta pari ga anera ta ingeni ta eto God ta degi bitija. <sup>5</sup> Eto anera na pene gaga ai ta i buju umbuto atungu gold na ari ai ta joseketei pe vitei umbuto enda ta gosuketei betei sariage oi pipiri tururu pajire be ei enda titira uija.

### *Anera itiketo huin hukitara.*

<sup>6</sup> Eto anera tapa 7 amita degi huin 7 ainge ikari avo hukasi nununga eto mitere <sup>7</sup> anera vahai na kiti hukitei 'ice' te i peri te sasaga te omba omba ari avo enda ta jojeketei vovoi enda te i te tuna, 1/3 ainge amina eveketei sasaha avo irae evikitaja. <sup>8</sup> Eto anera nei amina huin hukitei tiri pajire be amina peri peri evikitoi umbuto eva ta gosuketere bovoi eva tuna 1/3 ainge amina sasaga sariketei <sup>9</sup> eva o tuna, 1/3 ainge, amina ambuvujikitore e nga tuna, 1/3 ainge, avo hururumbeto eva jo ta bovara.

<sup>10</sup> Eto anera heriso amo huin huketere irae etei nei vahai amina hukitoi kuro pajire be amina horivo na ijimbarako eto utu ta eto beto umo eto umo be tuna 1/3 ainge aita bovaja. <sup>11</sup> Eto kuro amo sogaga te amina beto umo ta sigeto umo sogaga oi embomeni indito ambuvujikitarata. <sup>12</sup> Eto anera heriso nei vahai amo huin huketere irae etei anera nei amina hukitoi iji tuna eto hariga tuna eto kuro tuna tapa 1/3 ainge amina mume ore iji te hariga te amita usasa tuna avo irae uija. <sup>13</sup> Eto na kogue mitene di tuna na gati na enda ta puvutuhue ke einge isara na ijija, "Jove jove jove enda embomeni tapa ta degi erena anera 3 amina huin hukae mitera avoeto erena."

## 9

<sup>1</sup> Eto anera tapa 4 amina huin huketere irae etei nei vahai amina hukitoi kuro vahai Utu i ta eto beto enda ta iriuja amita anera ta degi bokiri tahi God na iketija amo ahihi sasapura enda tu ta iriora amita degi ta hoto koveto beto peun ari amita bokiri tahi avo God na iketei <sup>2</sup> umbuto enda to ta bokiri hiriketei iposi kumbo kumbo enda to ta eto bitina amo embo na ehe undukeore eveketo bitiuja aingeko bitito iji te utu te peiketei mume etei <sup>3</sup> o boruga avo iketei iposi jo ta eto enda ta betei God na o saiho ta sovera avo boruga ta degi iketo <sup>4</sup> mane embo ta indari pure te isivasi te avo hatikasora te embo God ta hajire beo ta umbae amita degi isoro ara etija <sup>5</sup> rate mane taro amburora etija te teho kambaro o saiho na kambuoi memenga kiora aingeko avo hariga 5 amita jo ta kogue <sup>6</sup> embomeni na amburesi uje eto amburari jombure aisora te amburari na enana tiumbeto pambasuja. <sup>7</sup> Eto o boruga ta kiari amo o horse isoro o ainge ki emi hamo ta nununga arira eto enana ta siro ta amo king ta kope gold na ari aingeko kena eto enana ta tombu amo embo ta tombu hajire ainge kena. <sup>8</sup> Eto enana ta siro tu amo

pamone ta ainge eto ti amo o 'lion' ta ti ainge ra. <sup>9</sup> Eto enana ta jenge ta beha ari asuketera amo 'iron' na ari avo asuketo gati na pahore tuhesi ingena amo horse isapamane be na isoro gaga handuketo umbuto isoro ta pambuora aingeko avo ingena. <sup>10</sup> Eto o boruga ta etumbu ta amo o saiho na kambuoi memenga hariga tapa 5 amita jo ta kiora aingeko avo mitia. <sup>11</sup> Eto enana ta embo okose amo anera sasapura enda tu ta iriora amita titi jigari anera amita javo amo Hebrew ta ke na 'Abaddon' ke eora eto Greek ta ke na eora amo 'Apollyon' ke eora. <sup>12</sup> Eto osaga vahai amo irae etija te osaga nei heriso amo puvurae mitera puvuresora. <sup>13</sup> Eto anera tapa 5 amo huin huketere irae etei anera nei vahai amina hukitoti God ta titi buju ta pene gaga gold na ari ai ta o ta perema tapa 4 ainge mitera amina anera huin huketija amita degi ta <sup>14</sup> ke einge eria, "Anera 4 ainge umo pajire javo 'Euphrates' aita pundurari mitera avo bujekejo pambare", ke ainge etere <sup>15</sup> anera 4 avo iji amikote tambuta pambara pupundukeo iji aravo simba ue iriora avo anera na bujeketere embomeni tapa amo kateke kateke eto huru 3 ainge iketo huru vahai avo tetere ambuvujeketera. <sup>16</sup> Eto enana ta isoro embopo horse hamo ta areto pambera amo embo tapa '200 million' ainge pambereiija. <sup>17</sup> Eto horse te embo te pambera amita kiari one amo eture ta einge kena. Eto jenge ta beha iketera amo i peri ainge pangari te mume te ovevari te na kaneke kaneke arira. Eto o horse ta siro amo o lion ta siro ainge eto o amita pe to ta amo i peri te johi te enda pusu masa te tapa puvija. <sup>18</sup> Eto embomeni huru 3 rate i peri te johi te pusu masa te avo munehembeto huru vahai amo ambera. <sup>19</sup> Eto o horse ta sovera amo pe ta eto amita etumbu ta ra. Eto amita etumbu amo o koso o ta etumbu aingera eto siro na memenga ikeuja. <sup>20</sup> Eto osaga puvija amina embomeni nei uhoho amburae mitera enana amina

ari sasapura ingeni na ari avo oju ue tunga ahereketo toae amo ahihi sasapura na jakeka ari amo toae eto enana ta 'god' 'gold' na ari, 'silver' na ari, 'bronze' na ari atara na ari eto i na ari amo titi irae amo onde irae eto amo hae ambu rate toae jigama ere ora <sup>21</sup> eto nei embo tari amburari te saruka ari te tiha paiha ari te pegene ari te amo toae jigama ue mitera.

## 10

### *Anera o hoga isapa te*

<sup>1</sup> Eto anera nei sovera isapamane te amo Utu ta eto beto mitei kena amo oje na togari eto amita siro kombu ta amo eriri kaeto mitei kena eto amita tombu amo iji ta titi ainge eto amita utu amo i peri koso vahai bitiuja aingekora. <sup>2</sup> Eto o hoga isapa ai ta ke kajari avo ingeni joga ta tembeti mitei kena. Eto anera amina utu be na eva ta haito anga na ombo ta haito mitie <sup>3</sup> o 'lion' na hori gagaha euja ainge ei pipiri tapa 7 amina ke etera. <sup>4</sup> Eto ke etera avo itiketo kaitone ke nei Utu i ta eto puvuto ke einge ijie taeketija "Eto pipiri tapa 7 ainge amina ke etera amo mane kajaso te no jo ta tojo iroi" ke ainge etei <sup>5</sup> anera eva ta haito ombo ta haito amita ingeni be avo Utu i ta jigei bivitei Utu te <sup>6</sup> enda te eva te amita jo ta donda tapa mitera amita ari embo amo daroho iriuja amita tombuta ke einge etija, "Eto anera tapa 6 amo matu huketere irae etija te iji porere mane aisora <sup>7</sup> te anera nei vahai amita huin hukasi simba ururou God na ari matu ondikari iriuja avo au kesora amita ke amo God ta ke agi ari peroveta ta degi ikena". <sup>8</sup> ke ainge etei ke nei Utu i ta puvei ingena amo nau degi ta ke einge etija, "Pambuto anera utu eva ta haito ombo ta haito mitia amita ingeni ta o hoga hirikari tembeti mitia avo pambuto umbujo", ainge etei <sup>9</sup> ingito pambuto anera ta degi o hoga ke kajari isapa avo penunu etene ikitie ke einge etija, "Umbuto inda! pe ta amo iruha muko gamo te ra te oti ta amo sogaga te ra"



ke ainge etei <sup>10</sup> anera ta ingeni ta umbuto indena amo pe ta amo iruha ta gamoko kena te oti ta betija amo sogaga etija. <sup>11</sup> Eto ke nei einge puvei ingena “Umo embomeni te enda te eto embomeni ta ke te kings te ta degi do puvuresuja amita ke avo kajejo” ainge etija.

## 11

### *Ke kito harikari embo heriso*

<sup>1</sup> Eto anera vahai na God ta Bande Otohu ta teka umbana ituha ikitie ke einge etija, “Umo pambuto God ta temple te God ta pene gaga te amita teka mo doitokore avo uhue embomeni ai ta God jakeka ue mitera amite tapa etekejo. <sup>2</sup> Rate temple apupu ta enda amo Judea ta mane rate enda nei embomeni ta degi ikarira avoeto teka amiga mane umbasoa te tojo amo enda nei embomeni amina hariga tapa 42 amita jo ta God ta da Otohu haito hatikasora. <sup>3</sup> Eto na kito nau ke hande ari embo heriso ta degi sovera ari ikano bo baiki asuketo iji tapa 1,260 amita jo ta amo ari do puvuresuja amita ke avo embomeni ta degi hande aisora. <sup>4</sup> Eto nau ke hande ari i amo i ‘olive’ herisora amina horivo ijimbari heriso avo tembeto enda ta Bada ta tombu ta heteto mitera. <sup>5</sup> Eto embo amuna avo tasi aisora amo i peri na enana ta pe to ta eto puvuto kitoho amo tau ambuvujekasora. <sup>6</sup> Eto embo heriso amina enda ta ari do puvuresuja amita ke avo hande ururoro enana ta sovera na Utu i peikau ga mane beasuja. Eto embo heriso amita sovera na enana ta uje na aro umo sasaga pere aetija enda taro osaga memenga puvuraetija amo enana ta degi inonora.

<sup>7</sup> Eto enana ta ke hande aro irae au o sapura be sovera te amina enda to ta eto bitito embo heriso amo kambau amburoro <sup>8</sup> enda timu hatirari ke na Sodom te Egypt te ai enana ta Bada Iesu teo ambuna da ai ta sari ururoro <sup>9</sup> enda neite neite embomeni eto ke neite neite ari embomeni amina puvutuhue kesora rate embo heriso amita hamo mane

kovasora <sup>10</sup> amo peroveta heriso amina enda embomeni sasapura ta degi osaga ere ikitiaetera avoeto puvuto kogue tunga javotoho ue pondo kando ue hande puanda mine ara aisora.”

<sup>11</sup> Eto iji 3 eto tuna irae etei God ta hoenge na jo ta toretei embo heriso amo ereto utu ta hetetere embomeni na kito tututu ue joru pajire be ore. <sup>12</sup> Utu i ta eto ke einge ingena “Ungo einge have” ainge etei oje jo ta toreto Utu i ta pahore kitoho embomeni na arerembeto kera. <sup>13</sup> Eto iji amikote titira pajire be etei da ta bande tuna, 1/10 ainge amina karauneto betei embomeni tapa 7,000 ainge ambuvujeketere embo nei tuna amina oju peni vahai ue itiketo Utu ta God avo jakeka ea. <sup>14</sup> Aravora osaga heriso irae etera te nei vahai puvuto ere hua.

### *Anera 7 amina huin huketija*

<sup>15</sup> Eto anera tapa 6 na huin huketere irae etei anera nei na hukitei Utu i ta ke isara na einge puvija, “Enda ta king irae etija eto ungotenau Bada Keriso amina God ta king eto hetetija amina titi jigihedaro ho iresuja”, ke ainge. <sup>16</sup> Embo okokose tapa 24 amo God ta tombu ta arumbeto mitera amina tombu na beto gombuto God jakeka <sup>17</sup> einge etera, “Bada God sovera isapamane te daroho irioa inena sovera no umbuto itiketo titi jigihoa avoeto no degi ta osa be ere ora, <sup>18</sup> Eto enda embomeni tapa na no degi ta isoro ere ovora avoeto inena enana ta degi tumo etea. Embo ambuvujekari ta ari sirikari iji puvija erevira avoeto no pure ari embomeni te peroveta te embo jajavotoho isapa te peni te tapa amuna no javo Otohu eora amita degi hotari ikao umbasora eto enda sosou ari embopo avo tao irae aisora” ainge etere irae etei <sup>19</sup> God ta Temple Utu i ta avo pe hiriketei God ta ke pepeni amita donda ototohu ta irari ‘box’ ai ta mitei kogue mitene pipiri sariambu oi tururu pajire be ei titira oi ga ‘ice’ te tapa betija.

## 12

### *Pamone te o javo 'dragon' te*

<sup>1</sup> Eto Utu i ta hajire pajire be irerembetei kena amo pamone iji ta usasa na togari hariga amita utu joga ta eto amita siro kope amo kuro tapa 12 ainge amina kogombari <sup>2</sup> amina meni ingasi ue memenga oi si ei kogue mitene <sup>3</sup> hajire nei Utu i ta irerembena amo o koso o pajire be javo 'dragon' hamo pangari amita siro tapa 7 ai ta perema tapa 10 eto kope tapa 7 ainge avo mitei kena, <sup>4</sup> Eto o amita etumbu na jiheto kuro tapa kateke kateke eto huru 3 ikari avo huru vahai avo tetei enda ta karaun eto betija. Eto koso o 'dragon' na pamone ta titi ta heteto meni ingitirou umbuto indesi simba oi <sup>5</sup> meni singa amo enda tapa embomeni daho ngahia avo jigito titi jigesuja meni avo ingitoi God na egimbeto umbuto amita avo arumba peni ai ta simba ue mitei <sup>6</sup> pamone amo oju tutuveto pambuto degi ojaga tambu God na nununga ena ai ta iji tapa 1,260 ainge mitei God na simba etija. <sup>7</sup> Eto Utu i ta amo anera okose javo Michael te amita anera te na o koso o 'dragon' ga isoro etere <sup>8-9</sup> 'dragon' te amita anera te avo ivo ambu eto nembari inono ae etere, Michael na koso o 'dragon' te amita anera te tapa avo umbuto gosuketei enda ta bigo bigo betera. Eto o koso o amita javo Satan na amita ke gamo na enda embo tapa avo kiti umbuto ari sapura ta pambuora. <sup>10</sup> Eto ke Utu i ta eto puvei ingena amo einge etija, "Embo iji te mume te God ta titi ta heteto ungotenau namei kamei pehumba euja avo umbuto gosuketere betija avoeto God ta sovera na embo orekitie titi jigihirou ungotenau hondate ari embo Keriso na heteto king asuja. <sup>11-12</sup> Eto God ta ke be ari embopo amina God ta o 'lamb' ta sasaga te God ta ke hande ari te amina Satan nembetera. Eto enanana amita vasiri peni avo osa ae avoeto embo na tari amburari avo joru ae ra. Avoeto ungo Utu ta

irari embomeni tapa tunga javotoho ue osa evujo, rate jove jove enda ta eva ta degi erena, Satan na ungota degi pambija avoeto. Eto amita iji koso mane irae ere ua avoeto amita tumo sisire tini kambari amina jo enetarira," ke ainge etei ingena.

<sup>13</sup> Eto koso o 'dragon' amo enda ta gosuketere betija avo kito pamone meni singa umbija avo etetasona ainge hotembitei <sup>14</sup> God na kito pamone amita degi di tuna ta gati heriso avo iketei asuketo degi ojagatambu God na amita irari degi sija etija ai pambei God na simba oi jua tapa nei heriso nei vahai eto nei tuna ai ta mitei o koso o na avo tame ari inono ae etija. <sup>15</sup> Eto o koso o aramina pamone avo umo na umbaja etei amita pe to ta umo pajire be beto pahoi <sup>16</sup> enda na pamone avo hondate eto eonga haunketo pahoi umo amo ai ta beto pambei <sup>17</sup> koso o 'dragon' amo pamone amita degi tumo pajire eto pamone amita meniundi ta degi isoro asi pambija. Eto pamone ta meniundi amo Iesu ta ke avo ke be ijie God ta ke agi eora embomeni ra.

## 13

### *Isoro o heriso*

<sup>1</sup> Eto o 'dragon' amo pambuto eva hora ta heteto mitei, o nei isoro o eva jo ta eto bitei kena amita siro tapa 7 ai ta perema tapa 10 eto kope tapa 10 perema vahai vahai amita tumo ta asukari eto amita beo vahai vahai ta God ta javo avo urumbitie ke kakajekari ainge avo mitei kena. <sup>2</sup> Eto o amita kiari amo o javo 'leopard' amita kiari aingeko rate amita utu amo o 'bear' ta utu ainge eto pe amo o 'lion' ta aingera. Eto o 'dragon' na o sapura amita degi sovera pajire ke iketo avo arumba iketei arumbeto titi jigihia. <sup>3</sup> Eto o amita siro vahai ai ta amo pupuho pajire be kena amo amburari haite rate konditaja. Eto enda embo tapa na o avo kito mani mini ue aha puha ijie itiketo o avo ambo ambo ue. <sup>4</sup> o 'dragon' amina

o sapura amita degi sovera iketija avoeto o 'dragon' amite eto o sapura amite tapa jakeka ijie ke mine ara eto einge erera, "O erevi nei eingeke iraera eto embo amuna amita degi isoro ari haitere?" <sup>5</sup> Eto o 'dragon' na o sapura ta degi ke aisuja amita pe iketei umbuto amina na javotoho ra ijie God ta javo urumbetei hariga tapa 42 amita jo ta sovera amita jigama <sup>6</sup> ue pe haunketo God ta javo te eto God ta irari degi te eto God ta toho Utu i ta iriora avo hoviro ue urumbetei sapura be etija.

<sup>7</sup> Eto o 'dragon' na sovera nei iketei o sapura amina umbuto God ta embopo ototohu ta degi isoro eto nembeto ke neite neite eora embomeni tapa enda tapa ta mitera amita sovera na titi jigaha. <sup>8</sup> Eto enda embopo tapa na o sapura avo jakeka ijie tumote pain asora rate book javo vasiri amita jo ta javo kakajekari amo o Lamb Utu te enda te ae pekota embo avoembo ikari amburari amita toho embomeni amina mane tumote pain aisora <sup>9</sup> te ungo embo amuta onde irirou kito ke erena erevi ingivujo. <sup>10</sup> Eto embo na kitoho ta ingeni ta pambaja aisuja amo pambasuja eto asivo na jau amburoja aisuja amo jau amburesuja avoeto erena amo ungo God ta embo ototohu ungo God tumota ue sovera eto irivujo.

<sup>11</sup> Eto na o nei enda jo ta eto puvotohoi kena amita siro ta amo O Sheep Meni ta perema ainge heriso avo mitera te amita ke hajire amo o koso javo 'dragon' ta ke hajire vahaira. <sup>12</sup> Eto o pupuho te eva jo ta eto bitina amina o nei eha puvija amita degi sovera iketei umbuto jigama ue enda embo tapa na o matu eva ta eto bitina amita degi tumotepain ara ke <sup>13</sup> ijie amita hajire kiora etei i peri na Utu i ta eto evikitie bovuoi embo tapa kogore hajire pepeni nei te neite etija <sup>14</sup> Eto ari sovera ainge oi embo tapa na amita ke sokova avo ke be ijie ambo ambo etera ore eto asivo na jari pupuho te o avo kogue

ingeni na ove eto tumotepain ara etei ore <sup>15</sup> sovera nei umbuto o ove etera amita degi hoenge iketei itiketo ke eria avo tumotepain ae etere tetere ambara <sup>16</sup> Eto ari nei etija amo embo pepeni te isapa te eto embo koro te koro ambupu te eto pure mamu te pure embo te tapa amina beo ta rete mo ingeni be ta retemo hajire umbara etija, <sup>17</sup> Eto 'number' umbara amo o sapura ta 'number' eto amita javo ta hajire ra. Eto embo amuna 'number' aravo hamo amita ta umbae aisuja embo amina donda nei do mane ombuto umbasuja. <sup>18</sup> Avoeto umu kiari embo kito o ta 'number' avo eto kito eteketo tambujo amo embo na donda etekeora amita number avoeto 666 ra.

## 14

### *O 'lamb' te amita embomeni te*

<sup>1</sup> Eto na arerembeto kogue mitene nau titi ta amo tiri javo Zion amita hamo ta amo O 'Lamb' heteto mitia eto amiga mitera amo embo tapa 144,000 ainge amita beo ta o 'lamb' ta javo te amita Mamu ta javo te avo kakajekari avo mitere kena. <sup>2</sup> Eto Utu i ta havi ingena amo umu muenga ta tindu ainge eto tururu pajire be amita havi aingeke rate gita javo 'harp' embo isapamane na teora amita havi aingeke avo ingena <sup>3</sup> eto God ta avo arumba peni amite eto o vasiri te tapa 4 amite eto embo okokose tapa amita tombu ta embomeni tapa 144,000 amina haveni eha ganeto haveni erera amo embo eha God na enda ta ombuto umbari amina pere haveni amo umbari haitera. <sup>4</sup> Eto embomeni aramina pamone ga tiha paiha ae ari jajavotoho pere ere uaetera amina iji matuainge O 'Lamb' ambo ambo ue pambuora amo i eha ureore ereto be jajavotoho pepeni ekeuja aingeke amina embo aravo embo tapa ta degi ombuto umbuto O 'Lamb' ta degi eto God ta degi hande ikari ra. <sup>5</sup> Eto enana ta pe ta ke sokova irae eto ke sasapura irae avoeto enana amo pehumba ari haite manera.

*Anera nei heriso nei vahai*

<sup>6</sup> Eto anera vahai i ta kin eto pahoi kena amina God ta duru javotoho daroho iriujua avo ke neite neite ari embomeni enda tapa ta iriora amita degi ke hande ue <sup>7</sup> ke isara na einge etija. “Embo ta ari siriketo hajire ikari iji puvija avoeto Utu te enda te eva te umo kuru bitiuja amite tapa ari embo God avo joru ue jakeka ijirovo amita degi usasa puvuroi,” <sup>8</sup> ainge ijie pahoi anera nei amita ambota puvutuhue ke einge etija “Eto enda peni Babylon amita tiha pamone na eoi enda embo tapa na amita esi mu indie ari sasapura uje peni vahai eora avoeto enda Babylon avo karaun eto ere vovua,” ke ainge etei <sup>9</sup> anera nei vahai ambota puvutuhue ke isara na einge etija, “Eto embo amuna o sapura aririvo embo na ove ari amite avo kogoue tumotepain ue eto amita hajire ‘number’ avo beo ta rete o ingeni ta rete umbasuja <sup>10</sup> amo God na tumo pajire be eto amita degi wine saruka sovera te overekau umbuto indirou umbuto anera ototohu te O ‘Lamb’ te amita tombu ta ikau evikitie memenga kogurou <sup>11</sup> amita iposi na daroho ta bivitie iresuja. Eto embo amuna o sapura amita javo ta hajire uhue o amite amita aririvo te avo jakeka aisuja amina iji te mume te tapa jangu indari mane kesuja,” ke ainge anera amina etija <sup>12</sup> avoeto ungo embo ototohu God ta ke agi ue Iesu tumota eova avo ungo sovera eto irivujo.

<sup>13</sup> Eto ke nei Utu i te ei ingena amo eingera, “Ke erevi kajejo: Eto embo amuna eha oroho eto ambota Bada ke be ere ijima amburesuja amita degi ta javotoho be puvuresuja.” ainge eto Ahihi na einge eria, “ke be, amo enana ta pure irae au jangu indie iriroro pure ta be ambota puvurou kesora.”

*Enda ta be kahumbasora*

<sup>14</sup> Eto na titi i ta eto kena amo oje parara be ai ta Embo ta Meni kiarako etena amita siro ta kope gold na ari

avo asuketo asivo okokombari ti te avo jigito mitei kena. <sup>15</sup> Eto anera nei na ‘temple’ jo ta eto puvuto embo vahai oje parara hamota arumbeto mitina amita degi ke isara na einge etija, “Enda ta be javotoho avo sari ari iji puvija no asivo umbuto pambuto kahumbeto umbujo” ke ainge etei <sup>16</sup> embo oje hamota arumbeto mitia amina asivo na jiheto enda ta be kahumbetei iratija.

<sup>17</sup> Eto anera nei Utu i ta temple jo ta mitina amite tapa asivo okokombari ti te avo jigito puvei <sup>18</sup> anera nei i evekeuja amita simba ari anera amina pene gaga ta eto puvuto anera nei asivo te amita degi ta ke isara na einge etija, “Enda ta esi ‘grape’ be sari eto mitia avo kahumbeto umbuto puvujo” ainge etei <sup>19</sup> anera na asivo umbuto enda ta ‘grape’ be jiheto kahumbeto umbuto God na tini kambari ue haito saheuja degi ai gosuketei betei <sup>20</sup> da sahu ai ta sahitore sasaga na pevitito gavinoketo beto ‘300 kilometres’ eto ukomo eto bitito o ‘horse’ ta pe ga inono etija.

## 15

*Anera tapa 7 amina aro osaga memenga kesora*

<sup>1</sup> Eto na hajire nei pajire be avo Utu i ta kena amo anera tapa 7 amina osaga memenga hajire neite neite tapa 7 ainge avo embota degi aro koguroro God ta tumo irae asuja avo jigito mitere kena. <sup>2</sup> Eto eva visi visi javotoho i peri na ombuto ombuto ari kena amita hora ta o sapura te amita aririvo ove ari te amita javo ta number hajire te umbae sovera eto nembari embopo amina gita javo ‘harp’ God ta degi umbera ai ta torue <sup>3</sup> Moses, God ta pure ari embo te eto God ta O Lamb te amita haveni avo einge ijie etera, “Bada God sovera isapamane te no ari tapa avo pajire be eto javotohora. Eto vasiri no tapa amo ke be ke be umo iji daroho ta king. <sup>4</sup> Oarie Bada embo tapa na umo oju ururoro usasa javo no ta puvuroi no ari jajavotoho eoe kiora



avoeto enda embo tapa na no degi ta puvuto tumote pain ue jakeka asora”. <sup>5</sup> haveni ainge etere irae etei Utu i ta God ta irari degi Otohu be Otohu avo hirikitoi <sup>6</sup> anera tapa <sup>7</sup> amina osaga memenga tapa <sup>7</sup> ainge avo jigiriketo tambuta puvutuhore kena amo enana bo parara be asari eto jenge ta amo pupuri gold na ari avo kajari ainge avo puvutuhore <sup>7</sup> o vasiri tapa <sup>4</sup> rate vahai amina atungu gold na ari tapa <sup>7</sup> ainge avo ikereketija amita jo ai ta amo God ta tumo pevitari avo mitia. <sup>8</sup> Eto temple jo ai ta amo God ta sovera te eto God ta usasa te amina i iposi ainge eto kumbo kumbo bitito temple jo enetetei embo torari haite mane kiti anera <sup>7</sup> amina osaga memenga tapa <sup>7</sup> avo aro embomeni na kioro irae au ambota torasora.

## 16

### *God ta tumo atungu tapa 7 ta ra*

<sup>1</sup> Eto temple jo ta ke isara na anera tapa <sup>7</sup> amita degi ta ke einge ei ingena, “Ungo pambuto, atungu tapa <sup>7</sup> ainge God ta tumo na pevitari avo umbuto enda embomeni ta degi josekevujō beare,” ke ainge etei <sup>2</sup> anera vahai amina pambuto amita atungu avo enda ta juseketēi beto embo o sapura amita aririvo ingeni na ove ari avo jakeka ue hajire umbari embomeni amita hamota matu memenga te masa te pajire be avo paukena. <sup>3</sup> Eto anera nei amina atungu nei avo eva hamota juseketēi beto embo amburari ta sasaga ainge avo irerembetei eva ta o vasiri te tapa be tapa amo ambuvjeketera. <sup>4</sup> Eto anera heriso juseketere irae etei anera nei amina atungu umbuto umo kombu te avo te ai ta amite umo kuru bitiuja ai ta juseketēi beto sasaga irerembetei, <sup>5</sup> anera umo simba euja amina ke einge etija, “Umo daroho irari Embo Otohu inena enana ta ari sasapura ta hajire ere ikitoa amo javotohora amo <sup>6</sup> enana na peroveta te embo ototohu te amita hamo tiuketere

sasaga betija avoeto inena sasaga ikitoe enana ta ari hajire avoeto kogue ere indera” ainge etei <sup>7</sup> pene gaga kena ta ke mine einge puvija “Ke be umo Bada God sovera isapamane te embo sasapura ta degi no hajire ikari amo be perera”, ainge etija. <sup>8</sup> Eto anera heriso nei vahai juseketere irae etei nei amina iji hamo ta juseketēi iji bevere pajire be eto itiketo embomeni eveketēi <sup>9</sup> bevere memenga koguroro amo God na osaga memenga embomeni na kogora avo taekari haite rate embomeni na memenga kogue ari sasapura toto jo hapereketo God jakeka ae hoviro etera.

<sup>10</sup> Eto anera nei heriso nei heriso juseketere irae etei nei amina atungu o sapura amita avo arumba peni ai ta juseketēi mume kambujoro pajire be sihuketija. <sup>11</sup> Eto embomeni na osaga memenga eto masa kera avo hotembeto tunga hapereketo ari sasapura toae rate Utu i ta God avo hoviro etera. <sup>12</sup> Eto anera tapa <sup>5</sup> juseketere irae etei nei amina umo pajire javo Euphrates ai ta juseketēi eveketo irae etei kings nei nei ihane hena ta eto isoro ue puvurora etija. <sup>13</sup> Eto na kogue mitene Ahihi sasapura o kana ainge tapa heriso nei vahai amo vahai o koso o javo ‘dragon’ ta pe to ta puvija eto nei amo o sapura amita pe to ta eto puvija eto nei amo peroveta ke sokova na ke hande euja amita pe to ta eto puvija. <sup>14</sup> Eto Ahihi sasapura amina pambuto enda tapa ta ‘kings’ amita tombuta ari sovera neite neite eora amore God sovera te ta iji peni amite vahai ta puvuto isoro pajire be ara ari ainge amo eora. <sup>15</sup> Eto God na ke einge eria, “Ingivujo, na pegene embo na joru paseto puvurarako asona avoeto embo amuna evo ae ue bo asuketo ereto iresuja embo amina hamo teho mane avoeto me mane kesuja”, ainge eria.

<sup>16</sup> Eto enana na enda tapa ta ‘kings’ avo siriketo iketere pambuto ‘Hebrew’ ke na degi javo ‘Armageddon’

eora ai ta toruketera. <sup>17</sup> Eto anera tapa 6 amina God ta tumo atungu ta avo jouseketera irae etei nei vahai amina atungu umbuto jiginu bitinu i ta jouseketei betei temple jo ta avo arumba peni ai ta ke isara na “Irae etija aravora”, ainge etei <sup>18</sup> pipiri te tururu te asavi ei enda titira pajire be ereto enda tiroki koheki etija amo embo ari iji te eto puvuto eha emikote amina titira aingeko ae peko ta eha etei <sup>19</sup> da pajire be avo enda haeto tapa heriso nei vahai ainge oi enda tapa ta da pepeni tapa amo karaun eto betera. Amo da sapura javo Babylon avo hotembeto atungu ta ‘wine’ jousekarako eto amita tumo avo jouseketo iketei indija. <sup>20</sup> Eto eva ituka tapa amo irae oi tiri tapa amo karaun eto beto visi visi etera. <sup>21</sup> Eto Utu i ta eto ‘ice’ moti pepeni papeni bouka ‘50 kilo’ ainge amina embo ta hamo ta betei osaga memenga pajire be kogoue God ta degi hoviro peni vahai etera.

## 17

### *Tiha pamone pajire be*

<sup>1</sup> Eto anera 7 atungu 7 rate vahai amina puvuto nau degi ta ke einge etija, “Umo einge hae tiha pamone pajire be umo isapamane amita hamo ta arumbeto mitia amita ari sasapura ta hajire God na do ainge au kesuja avo ano kesoa, <sup>2</sup> amo enda tapa ta ‘kings’ na amiga tiha eora avo eto enda tapa embomeni na amita tiha ‘wine’ ainge amina indere titivi oi ere ora,” ainge eto <sup>3</sup> anera amina Ahihi nau umbuto pambei tiha pamone avo ojaga tambu ai ta o hamo pangari eto o amita hamota amo God ta javo urumbitie kajari eto o amita siro tapa 7 amita perema tapa 10 ainge amita hamota arumbeto mitei kena. <sup>4</sup> Eto amita bo amo ove ohoma te ovihasuku ta ove kaneke kaneke ari eto bo hamota amo ‘gold’ te atara orina uhuruma memeni jajavotoho amina kogombari avoeto pingi sara etija. Eto amita ingeni ta amo atungu ‘gold’

na ari avo jigito mitia eto atungu jo ta amo amita tiha paiha ta tongopa te eto donda sasapura neite neite amina pevitari avo jigito mitia <sup>5</sup> eto amita beota amo ke ondikari na einge kajari kena: “Enda ta ari sasapura tapa amite eto tiha paiha ari pamone tapa amita e amo da peni javo Babylon”. <sup>6</sup> Eto pamone amina Iesu ta ke hande ari embopo ototohu ta sasaga avo indito kava oi kena. Eto na pamone avo kogoue mana mana one <sup>7</sup> anera na nau degi ta ke einge hariketei ingena, “Umo mana mana ere oate pamone emite eto o siro 7 amite perema 10 amite amita be avo harikano ingesoa, <sup>8</sup> amo o sapura ere kogoa amo matu mitiaetija te eha amo iraera te enda jo tu ta eto bitito pahurou God na tau irae asuja amo embomeni enda eha ra ta ari iji te eto puvuto eha eremikote avo enana ta javo book vasiri amita jo ta kajae avoeto o sapura aravo kogoue ti kakambuketo mana mana aisora amita be amo o sapura amo matu mitiaetija rate eha amo irae avoeto ambota puvuresuja. <sup>9</sup> Eto ke nei asi ereona amo embo uta hotembari javotoho te amina kesuja amo pamone amina heti tapa 7 ai arumbeto mitia amo amita siro tapa 7 ra eto nei amo enda ta ‘kings’ tapa 7 ra, <sup>10-11</sup> te 5 amo enana ta titi jigari matu irae ari nei vahai amo titi jigihe mitia eto nei amo eha heteto iji tuho be titi jigesuja. Eto o sapura amo matu mitiaetija te eha amo irae ra te eha ereto enana 7 amiga king inono ue king 8 aisuja rate God na tau irae asuja. <sup>12</sup> Eto perema 10 amina atekitira oi ere kogoa amo ambota kings heteto o sapura amiga tapa iji tuho be titi jigihe <sup>13</sup> uta vahai asora amo enana na o sapura amita sovera ari ikitie <sup>14</sup> O Lamb ta degi isoro asora te O Lamb amo bada tapa te amita Bada eto king tapa te amita King avoeto amita ambotani jajage eto siriketo umbari amiga heteto isoro eto o sapura amo nembasora” ainge eto <sup>15</sup> anera na ke

nei einge etija, “Eto tiha pamone na umo hamo ta arumbeto mitia umo amo enda tapa te amita ke neite neite avo ijie iriora embomeni ra. <sup>16</sup> Eto o sapura amite eto perema 10 amite na tiha pamone ta degi tumo ue ereto tiha pamone amita bo jigito houketo taro amburou bisi indie i ta ikaro evekasuja <sup>17</sup> eto ainge asora amita be amo God na amita uje avo ara jo ta hotembari ikau tunga vahai eto o sapura ta degi sovera ari ikitiroro God na ke etija amita be avo puvurou kesora. <sup>18</sup> Eto pamone ere kogoamo amo enda sapura ta da okose vahai amina enda tapa ta ‘kings’ titi jigihē mitia amita ate kitira avo ere ua.”

## 18

### *Da Babylon karaun eto beasuja*

<sup>1</sup> Eto ari avo kene irae etei anera nei Utu i ta eto beto puvutuhoi kena amo anera okose be amina puvutuhoi amita usasa pajire be amina enda tapa daha daha oi <sup>2</sup> amina ke isara na einge etija, “Da pajire be javo Babylon amina karaun eto betei irae etei embahe te ahihi sasapura te di sasapura te amina ai ta mitera. <sup>3</sup> Amo da tapa embomeni na amita tiha ta ‘wine’ indito kava ue ere vovora eto enda ta kings tapa na amiga tiha uoi enda ta donda ombari embopo na amita degi ombuto uhue koro mamone ere ovora” ainge anera amina etei <sup>4</sup> Utu i ta eto ke einge etija, “Nau embomeni ungo pamone avo toto have eto ungote tapa na pamone ta ari sasapura ta beasova amore pamone amita degi osaga memenga ikasona avo ungo te tapa kiova uje ae ereona <sup>5</sup> amo pamone ta ari sasapura hamota hamota ue bitito Utu tame ere ua avo God na jenambu ae rate kogue mitia <sup>6</sup> eto pamone amita sapura do iketija avo mine ikari avo inono ta mane ikasuja rate nei hamota ikitie aisuja amo pamone ta atungu ta inja mitia ai ta God na inja nei sovera te amo hamota joseketo ikau indesuja. <sup>7</sup> Eto pamone amina haja vaja te usasa te

do ainge umbija amo God na kito memenga te osaga te amo ainge inonota ikau kesuja. Eto pamone amina jo ta einge ere hotembitia, ‘Na pamone doru mane na ‘queen’ pajire be avoeto si mane asona te daroho ta tunga javotoho ue iresona’ ainge eria <sup>8</sup> te amita ari siriketo hajire ikari embo Bada God amo sovera isapamane be amina iji vahai osaga memenga ikau puvutuhurou sorara umbasuja, amburesuja, eto beuje kesuja, eto i na evekau irae asuja,” ainge etija.

<sup>9</sup> “Eto enda ta kings amita hajae vajae indie amiga tiha ere ova avoeto pamone avo memenga kogua avo joru ue ahen ta heteto amita iposi kumbo kumbo bitesuja <sup>10</sup> avo kogue si ijie ke einge asora, ‘Oio, da peni Babylon sovera te, iji isapa amita tutumota irae ereoa,’ ainge ijiroro <sup>11</sup> enda ta donda ombuto umbari embopo na donda na ombuto koro umbari degi irae ere ua avoeto bija puri aisora <sup>12</sup> amo enana ta ‘gold’ te ‘silver’ te bo ove neite neite na kembari te i savari te donda neite neite o ti na i na ‘bronze’ te ‘iron’ te na eto atara na ove ari amite eto <sup>13</sup> donda mune te i angere hoga te jeune te joriva te ‘wine’ te seha te ‘wheat’ be jasari te jasae amite o ‘cow’ te o ‘sheep’ te o ‘horse’ te amita gaga te eto embo ta hamo te ahihi te tapa amo ombuto umbari degi irae avoeto <sup>14</sup> enana na ke einge aisora, ‘No i be neite neite uje isapamane ereova amita gamo ehako mane kesoa eto no hajae vajae tapa irae ere ua ehako egerembari inono ae,’ <sup>15</sup> ainge donda na pamone amita degi ombuto koro isapamane umbuora embopo amina joru ue hoi ta heteto pamone amina memenga kogurou si ijie <sup>16</sup> einge aisora, ‘Oio da pajire no bo ove hohoma te ovihāsuko te na kembari eto no bo hamota gold te atara orina uhuruma jajavotoho amina kogombari amina pingi sara euja te <sup>17</sup> iji isapa amita tutumota tetei hajae vajae irae ere ua,’ ainge ijio e nga tari jigari embo te titi jigari

embo te e nga ta eora embomeni tapa amina hoi ta heteto <sup>18</sup> amita iposi kumbo kumbo bivitirou kogue ke einge aisora, ‘Da pajire be eingeke matu be matu amo iraera’ ainge ijie <sup>19</sup> amisa timbuto siro ta kutitie bija puri ijie ke einge aisora ‘Oio da pajire be, nango e nga titi jigirikari embopo na no degi ta pambuto donda na ombuto koro mamone ere ovora te iji isapa amita tutumota tetei irae ere ua,’ ainge amo enana na aisora te <sup>20</sup> ungo Utu i ta irari embopo tunga javotoho evujo amo ungo embo ototohu te apostero te peroveta te tapa tunga javotoho ue haveni evujo, amo ungoti degi sapura euja avoeto God na hajire mine iketei kogua,” ainge anera amina etei <sup>21</sup> anera nei buyure te amina atara pajire be ‘wheat’ jaseora aingeke avo umbuto eva ta gosuketei betei ke einge etija “Vasiri pajire be eingeke amina da peni Babylon amo gosukaro beto irae au ehako tambari haite mane aisuja. <sup>22</sup> Eto amita huin hukari te isaumpuri hukari te gitari te haveni ganari te amo embo na ehako mane ingesora eto amita ingeni na pure ari embopo ai ta mane tambasora eto ‘wheat’ jasari ta havi ai ta mane ingesora. <sup>23</sup> Eto amita jo ta usasa mane undukaro evekasuja eto singa te kakara te jimbari ta ke mane ingesora. Eto no donda na ombuto umbari embopo amo enda ta embo okokose avoeto no saruka ke na enda tapa embomeni kiti umbuto sapura ta pambua. <sup>24</sup> Eto embo tapa enda ta tari te peroveta te embo ototohu te ta sasaga amo da amita jo ta tambera.”

## 19

<sup>1-2</sup> Eto ari ainge etija amita ambota Utu ita embomeni isapamane na ke o a ijie einge etera, “Aleluia God na embomeni ta ari avo ke be na siriketo enana ta hajire ikitie tohota embomeni avo oreketo siriketo umbija, amo usasa te sovera te amita degi iroi. Eto tiha pajire be ari pamone amina amita tiha na etei enda tapa sapura be etei God ta pure

embopo tetei sasaga betija avoeto God na amita sapura ta hajire iketei umbuto ere ahua,” <sup>3</sup> ainge eto ke o a ijie ehako einge etera “Aleluia, pamone avo evikitie amita iposi na kumbo kumbo bivitie daroho ta ire-suja”, ainge ijio, <sup>4</sup> Embo okokose tapa <sup>24</sup> amite o vasiri te tapa <sup>4</sup> amite na God avo arumba peni ai ta arumbeto mitia amita tombu ta beto gombuto God jakeka ijie, “Amen, Aleluia,” ainge ere

### *O ‘lamb’ ta jimbari dorovu*

<sup>5</sup> Ke avo arumba peni ai ta eto einge puvija, “Ungo God ta pure ari embomeni pepeni te memeni te ungo God joru ue otohu eona embomeni avo God jakeka evujo,” ke ainge etei ingihone <sup>6</sup> ke nei umopajire be ta tindu ainge eto pipiri pajire be ta havi ainge amina ke mine einge etija, “Aleluia, ungotenau Bada God sovera te na heteto titi jigihemitia. <sup>7-10</sup> Ungotena osa osa ue jakeka ijie haveni ijiro amita degi usasa puvuroi, amo God ta o ‘lamb’ ta jimbari iji puvei amita kerari kakara amo amita ekalesia avo nununga oi bo parara javotoho tongopa ambu iketei asuketija amita be amo embo ototohu tapa amita ari jajavotoho avo asuketija,” ainge etere anera na nau degi ta ke einge etija, “Ke erena erevi kajejo, O ‘lamb’ ta jimbari dorovu indora oru umbari embopo amina osa osa ue tunga javotoho aisora” eto nei amo “Ke kaitona amo God ta ke be ra,” ke ainge kajana etei, anera jakeka ijie utu ta gombuto mitene taekitie ke einge etija “Na mane jakeka asoa te namote umote eto no namei kamei Iesu ta ke hande eora amite tapa God ta pure embopora te ambota do puvuresuja avo ene ere kogo amita be amo Iesu ta ke vahai aravora avoeto God vahai avo jakeka ejo.”

### *O ‘horse’ parara*

<sup>11</sup> Eto Utu pe hirikari ai ta o ‘horse’ hamo parara heteto mitei amita hamota arumbeto mitia amo



embo javo Tumota ari Ke Be ari amo embo ta ari avo siriketo hajire ikari embo eto isoro embo avo mitei kena, <sup>12</sup> amita titi amo i peri ainge amita siro ta kope isapamane be eto amita javo hamo ta kajari amo embo tapa kiae rate umo eonga ere kogua <sup>13</sup> amita bo amo sasaga ta jauketo pohukari eto amita javo amo “God ta ke” ra. <sup>14</sup> Eto amita ambota amo Utu i ta isoro embopo avo bo parara javotoho tongopa ambu avo asuketo horse hamo parara ai ta areto puvutohore kena. <sup>15</sup> Eto embo amita pe ta amo asivo koso vahai ti te amina enda embo tapa jasuja avo pe ta eto puvutuhoi kena. Eto embo amina daho ngahia be avo jigito embo tapa titi jigesuja. Eto Embo amina God sovera te tumo avoeto embomeni ta hajire ikau kesora amo ‘grape’ ta hamo ta haito saharako aisuja <sup>16</sup> eto amita bo pohukari hamota eto utu poru ta amo embo amita javo amo einge kajari mitia “King tapa ta king eto Bada tapa ta bada” ainge kajari kena. <sup>17</sup> Eto anera nei kena amina iji ta heteto di i ta ere pahua amita degi jage eto einge etija “Ungo God ta pondo indova na have, <sup>18</sup> amo kings te isoro titi jigirikari embopo te buvure embopo te, o horse hamota arumbeto pambari embopo te o horse te embo okokose te pure embopo te eto peni te isapa te indova na have”, ainge etei <sup>19</sup> o sapura amite eto enda ta kings te enana ta isoro embopo te na embo o horse parara ai ta bo parara asari amite eto amita isoro embopoga isoro asi torukea <sup>20</sup> rate peroveta sokova o sapura amita javota ari sovera neite neite oi embomeni kogue o sapura ta hajire kikiva ari avo umbuto o sapura ta aririvo ingeni na ove ari avo tumotepain etera peroveta amite eto o sapura amite tapa avo andito umbura te tae amburae umo joremba i peri masa te ai ta gosuketere beto eveketere <sup>21</sup> o sapura amita isoro embopo nei uhoho amo embo o horse hamota arumbari amita asivo pe to

ta eto puvuto mitia amina jetei ambere di na beto bisi indere oti guru etija.

## 20

### *Jua tapa 1,000*

<sup>1</sup> Eto anera vahai Utu i ta eto beto puvutuhoi kena amo ingeni vahai amo enda jo tu ta amita bokiri hirikari ‘key’ avo jigito ingeni nei na amo ‘chain’ pajire be jigija <sup>2</sup> amina beto o koso o sapura be javo ‘dragon’ amo ke gamo poekari embo ‘Satan’ embo avo andito punduto enda jo tu beta gosuketei <sup>3</sup> beto jua tapa 1,000 ainge ai ta iroja iketo ahureketo arinako etija amo enda tapa embomeni engikitioi amita ujeta ambo ambo eora avoeto enda tuta jua tapa 1,000 ainge mitirou aro araha ta puvuto iji isapa isa aisuja. <sup>4</sup> Eto avo arumba pepeni ai ta kena amo embomeni ta ari sirikari embopo avo God na siriketo iketei areto mitere kena eto nei amo God ta ke avo ke be ijie Iesu ta ke hande ari embopo avo tunga tiukari amita ahihi avo kena. Eto enana amo o sapura te eto amita aririvo ingeni na ove ari amite avo tumotepain ae eto amita hajire beo ta eto ingeni ta umbae avoeto enana amina ereto Iesu ga jua tapa 1,000 ainge amita jo ta heteto titi jigesora <sup>5</sup> te titi jigari iji amita tutumota amo embomeni amburari tapa amina vasiri te erasora <sup>6</sup> te enana kiti erasora amina Otohu be ue tunga javotoho be aisora eto enana ta degi God na sovera ari ikau ehako mane amburesora te vasiri te daroho ta mitie God ta eto Keriso ta priests ue amiga jua tapa 1,000 amita jo ta titi jigesuja.

### *Satan na daroho ta memenga ke-suja*

<sup>7</sup> Eto jua tapa 1,000 irae au Satan tipura ta avo hirikau bitito <sup>8</sup> pahue God ta kitoho enda tapa ta mitera (amita javo amo Gog te Magog te ainge amo eora) avo jajage au puvuto isoro asi vahaita torukasora amo eva hora etekari inono ae

aingeko <sup>9</sup> amina enda tapa ta eto puvuto God ta osa ari da amita embomeni mitera avo joeketo mitiroro i na Utu i ta eto beto embo amo evekau ahuroro <sup>10</sup> enana engekari embo Satan avo umbuto o sapura te peroveta sokova matu gosukari beari degi i peri masa te umo joremba ta evekeuja ai ta gosukau beto mitie iji te mume te daroho ta memenga kesuja.

### *Ari sirikari iji tutumota*

<sup>11</sup> Eto avo arumba pajire hamo parara be amita hamota Ari Sirikari Embo mitei kena amita degi ta eto Utu te enda te na joru pambere irae etija amo ehako tambari haite manera, <sup>12</sup> Eto embo pepeni amburari te isapa ambuvujekari te tapa amina avo arumba peni amita titi buju ta heheteketo mitere enda ta ari do ere uaetera tapa books ai ta kajari avo hiriketo ai ta kogue siriketo hajire iketija. <sup>13</sup> Eto book nei hiriketija amo vasiri ta book ra eto use te embo amburari ta ahihi irari degi te eto eva te na amburari embomeni tapa iketere puvera <sup>14-15</sup> Eto embo amita javo book vasiri amita jo ta kajari irae kito amo ehako amburoja umbuto umo joremba i peri ai ta gosukaro beto mitie i bevere daroho kogue iresora. Eto i peri aita amo embo amburari te degi javo Hades amite tapa irae aisuja.

## 21

### *Utu eha te enda eha*

<sup>1</sup> Eto Utu te enda te eva te mamatu irae etere Utu te enda te ehaha avo kena <sup>2</sup> Eto kerari kakara kogombeore amita ivu na sago pajire be kiuja aingeko avo da eha Jerusalem Otohu amo God ta degi Utu i ta eto bovuoi kogone <sup>3</sup> ke pajire be avo arumba peni ai eto einge puvija “God ta irari degi avo embo ta degi puvija amo emboga iresuja eto enana amo amiga mitiroro God na enana ta God ue <sup>4</sup> enana ta titi sisivu tapa avo tuhasuja amo donda tapa be tapa eto ari tapa mamatu amo irae etija

avoeto amburari sorara umbari bija puri ari memenga tapa amo embo na ehako mane kesuja,” ainge eto <sup>5</sup> avo arumba peni ta arumbeto mitia amina ke einge etija “Na donda tapa ehaha ereona amo ke be ijie tumota ari haite ra, tapa book ta kikiva ejo kiore,” ainge ijie <sup>6</sup> nau degi ta einge etija “Aravora, irae etija namo amo itikari ta eto pambuto tutumota ra (amo Alpha te Omega te ra) eto embo umo beuje asuja amo umo vasiri kuru bitiuja ai ta nane mine vahai timbuto ikano indesuja te mine mane ikasuja. <sup>7</sup> Eto embo amina sovera eto nembasuja amina hotari erevi umbau na amita God ururono amo nau meni aisuja <sup>8</sup> rate joru ue ke hande ae embopo te God ke be ae embopo te ari sasapura embopo te embo tari amburari embopo te tiha paiha embopo te saruka embopo te God ingeni na ove eto tumota ari embopo te ke sokova eora embopo te tapa amita irari degi amo umo joremba i peri masa te evekeuja aita amo enana ari ainge eora amita amburari nei amo aravora,” ke ainge etei

### *Da Jerusalem eha*

<sup>9</sup> Anera tapa 7 atungu 7 aita osaga memenga na pevitari overeketera ta anera vahai amina nau degi ta puvuto ke einge etija “Na O ‘Lamb’ ta ae kerari avo ano kioana hae” ke ainge <sup>10</sup> eto ahihi nau umbuto pambuto tiri pajire koso vahai aita iketei hetetene Da Otohu Jerusalem Utu i God ta degi ta eto iketei bouvoi etei kena. <sup>11</sup> Eto amina God ta sovera te usasa te amina gain eto atara orina javo ‘jasper’ na usasa pingi sara euja ainge amina etei kena <sup>12</sup> eto huga atara na hamota hamota iketo bitari koso vahai be amina joekari aita pe tapa 12 ainge paukari aita amo anera tapa 12 amina heteto simba ue iri-ora eto pe bokiri amita hamota amo Israel embomeni ta Ohihi javo tapa 12 amina kakajekari mitia <sup>13</sup> eto pe tapa 12 rate 3 ainge amo ihane ta nei 3 ainge amo sose ta nei 3 ainge amo

kaina ta eto nei 3 ainge amo patina ta <sup>14</sup> eto da ta huga jigito ngahia iroja kuteha ikari atara tapa 12 amita hamota amo O 'Lamb' ta apostels 12 amita javo kakajekari avo mitere kena.

<sup>15</sup> Eto anera namote ke etija amina teka umbari ituha gold na ari amina da ta teka do aingere eto huga amita teka do aingere eto bokiri ta teka doaingere avo umbasi jigija. <sup>16</sup> Eto teka umbija amo i ta eto tu ta kaina eto patina ihane eto sose amo teka inono inono ta ikari avoeto 1,400 kilometres koso ra <sup>17</sup> eto ehako huga ta teka umbija amo huga apupu ovitiho ta eto pambuto apupu ovitiho ta eto teka umbija amo 65 miters ra amo embo teka umbuora ainge nombo amina jigama etija. <sup>18</sup> Eto da ta huga amo atara orina javotoho javo 'jasper' amina gerikari eto da be amo 'gold' javotoho usasa euja amina gerikarira. <sup>19</sup> Eto da ta huga jigito ngahia iroja kuteha ikari atara tapa 12 amo atara orina kiari jajavotoho ove neite neite amina kogombari ra eto vahai amo 'jasper' na kogombari nei amo 'sapphire' na kogombari nei amo 'chalcedony' na kogombari nei amo 'emerald' na kogombari nei amo 'sardonyx' na kogombari nei amo 'sardus' na kogombari nei amo 'chrysolite' na kogombari nei amo 'beryl' na kogombari nei amo 'topaz' na kogombari nei amo 'chrysoprase' na kogombari nei amo 'jacinth' na kogombari eto ambo nombota amo 'amethyst' na kogombari ra. <sup>21</sup> Eto huga pe ta bokiri 12 amo eva ta gagina uhuruma parara be eto pajire vahai vahai amina bokiri tapa 12 amo ahurekari mitia eto da jo ta degi pambari amo gold javotoho usasa te amina beuketo pambarira. <sup>22</sup> Eto da amita jo ta amo embo vahai vahai amina degi tapa ta ue Bada God sovera te eto O Lamb amite jakeka eora avoeto da jo ta Temple amo irae ra. <sup>23</sup> Eto God ta usasa te eto O Lamb ta usasa te na da jo ai ta usasa euja avoeto iji te hariga te ta usasa amo

mane euja. <sup>24</sup> Eto enda tapa amita embomeni na amita usasa ta iriroro enda ta 'kings' na enana ta sago kiari te hajae vajae te umbuto da ai ta torasora <sup>25</sup> eto da ai ta mume mane sihukasuja avoeto huga ta pe bokiri amo mane ahurekasora te hirikari mitirou <sup>26</sup> enda tapa embomeni na donda sago kiari jajavotoho umbuto ai ta torasora te <sup>27</sup> donda sapura te ari sapura te ke sokova te avo mane ai torasora te O Lamb ta book javo vasiri ai ta javo kakajekari embomeni amina pere torasora.

## 22

<sup>1</sup> Eto anera na vasiri ikari umo avo God ta eto O Lamb ta avo arumba peni ai ta eto puvutuhoi etei kena <sup>2</sup> umo amina da amita jo ta degi tambu orohu ai ta puvuto pahoi umo ahone ta vasiri ikari i amina ereto be ekari iji amo hariga vahai vahai amita jo ta ekasuja eto amita gigi amo enda embo tapa ta sivo avoeto indie kokondekasora. <sup>3</sup> Eto enda ta saruka ari memenga ikari neite neite tapa amo irae asuja. Eto God te O Lamb te na da jo ta avo arumba peni ta arumbeto mitiroro amita pure embopo na ke agi aisora. <sup>4</sup> Eto embomeni na God ta tombu kesora eto God ta javo avo enana ta beo ta kajasuja. <sup>5</sup> Eto da ai ta mume mane sihukasuja avoeto embo na mane usasa undukasora te usasa amo Bada God ta degi puvuresuja avoeto usasa iji ta avo mane kesora. Eto embomeni na heteto God ga daroho mitie titi jigisora.

### *Bada Iesu ta puvurari*

<sup>6</sup> Eto anera na nau degi ta ke einge etija "Eto ke erevi erena amo ke be ijie tumota ue evujo amo Bada God peroveta tapa ta Ahihi amita God na amita pure ari embopo na ari tapa do puvuresuja avo be kiora amita anera namo avo iketei puvena."

<sup>7</sup> "Kivujo na eha puvuto ere hona avoeto embo amuna ambota do puvuresuja avo book eita kajari mitia avo toae jigama ue iresuja am-

ina tunga javotoho be aisuja,” ainge Bada na eria.

<sup>8</sup> Na John nanena ke erevi kena eto ingena avoeto na ari kiari anera avo jakeka asi beto gohone taekitie ke einge etija. <sup>9</sup> “Na jakeka aojo. Namote umote peroveta tapa amo no namei kamei ra amite eto book amita ke agi eora embo tapa amiga God ta pure ari embora avoeto God vahai avo jakeka ejo,” ainge ijie ke nei <sup>10</sup> einge etija, “Ari do asora avo o hoga bujekari ei ta kajari mitia amita iji avo auvetija avoeto o hoga mane egovekasova. <sup>11</sup> Eto ari sapura embo amo ari sapura matuainge ue iresuja God kiae embo amo God kiae ue matuainge iresuja, ari javotoho embo amo ari javotoho matuainge ue iresuja eto embo otohu amo embo otohu matuainge ue iresuja,” ke ainge anera na etija. <sup>12</sup> Eto Iesu na ke einge eria “Kivujo, na puvuto ere hona, eto na embo jajavotoho te sasapura te amita ari ta hajire amo mine nau degi ta mitia avo inonota ikasi ere puvutuhona <sup>13</sup> na itikari tutumota, kiti eto ambota, susu eto kombura. <sup>14</sup> Eto embo amuna da peni ta torasi bo egasuja amo God na au huga pe ta toreto vasiri ikari i ta be avo indito tunga javotoho ue iresuja. <sup>15</sup> Rate da ahone ta amo embo sasapura amina ino na arako ue mitera amina saruka te tiha paiha te embo tari amburari te god sokova ingeni na ove ari avo tumotepain ue iriora ke sokova na tiritie osa ue iriora amina da ahone ta mitera.

<sup>16</sup> Eto na Iesu nanena ekalesia nau tapa avo ke erevi kiora uje eto nau anera emina au kioa iketene puvija, na Susu ra, na David ta Meni ra eto na Iho Tarama usasa te ra,” <sup>17</sup> ainge eto Ahihi te O Lamb ta kerari kakara te na “Ungo havu” erera eto ke ingari embo na ke einge aisuja “Ungo havu, umo beuje kogue havu, ungo ujena vasiri ikari umo avo mine vahai indesi havu,” ainge aisuja.

### *Ke tutumo*

<sup>18</sup> Eto iji ambota do puvuresuja avo book eita kaetena erevi ingari

embo ta degi erena amo amuna ke nei hamota ikasuja amita degi God na memenga osaga book erei ta kajari mitia amo au kesuja. <sup>19</sup> Eto embo amuna book eremita ke davo purasuja amo God na au Da Otohu ta vasiri ikari i book erei ta kajari amita be amo mane indesuja. <sup>20</sup> Eto ke erevi ikari embo na einge eria “Ke be, puvurari iji nau auvetija,” ainge eria avoeto ‘Bada Iesu umo hae!’ ke ainge na John na erena aravora. <sup>21</sup> Eto Bada Iesu ta hondate ari avo God ta embomeni ta degi iroi. Aravora.



## Read the New Testament daily

### January

date	Scripture
1	Matthew 1:1-2:12
2	Matthew 2:13-3:6
3	Matthew 3:7-4:11
4	Matthew 4:12-25
5	Matthew 5:1-26
6	Matthew 5:27-48
7	Matthew 6:1-24
8	Matthew 6:25-7:14
9	Matthew 7:15-29
10	Matthew 8:1-17
11	Matthew 8:18-34
12	Matthew 9:1-17
13	Matthew 9:18-38
14	Matthew 10:1-23
15	Matthew 10:24-11:6
16	Matthew 11:7-30
17	Matthew 12:1-21
18	Matthew 12:22-45
19	Matthew 12:46-13:23
20	Matthew 13:24-46
21	Matthew 13:47-14:12
22	Matthew 14:13-36
23	Matthew 15:1-28
24	Matthew 15:29-16:12
25	Matthew 16:13-17:9
26	Matthew 17:10-27
27	Matthew 18:1-22
28	Matthew 18:23-19:12
29	Matthew 19:13-30
30	Matthew 20:1-28
31	Matthew 20:29-21:22

### February

### March

date	Scripture
1	Matthew 21:23-46
2	Matthew 22:1-33
3	Matthew 22:34-23:12
4	Matthew 23:13-39
5	Matthew 24:1-28
6	Matthew 24:29-51
7	Matthew 25:1-30
8	Matthew 25:31-26:13
9	Matthew 26:14-46
10	Matthew 26:47-68
11	Matthew 26:69-27:14
12	Matthew 27:15-31
13	Matthew 27:32-66
14	Matthew 28:1-20
15	Mark 1:1-28
16	Mark 1:29-2:12
17	Mark 2:13-3:6
18	Mark 3:7-30
19	Mark 3:31-4:25
20	Mark 4:26-5:20
21	Mark 5:21-43
22	Mark 6:1-29
23	Mark 6:30-56
24	Mark 7:1-23
25	Mark 7:24-8:10
26	Mark 8:11-9:1
27	Mark 9:2-29
28	Mark 9:30-10:12

date	Scripture
1	Mark 10:13-31
2	Mark 10:32-52
3	Mark 11:1-26
4	Mark 11:27-12:17
5	Mark 12:18-37
6	Mark 12:38-13:13
7	Mark 13:14-37
8	Mark 14:1-21
9	Mark 14:22-52
10	Mark 14:53-72
11	Mark 15:1-47
12	Mark 16:1-20
13	Luke 1:1-25
14	Luke 1:26-56
15	Luke 1:57-80
16	Luke 2:1-35
17	Luke 2:36-52
18	Luke 3:1-22
19	Luke 3:23-38
20	Luke 4:1-30
21	Luke 4:31-5:11
22	Luke 5:12-28
23	Luke 5:29-6:11
24	Luke 6:12-38
25	Luke 6:39-7:10
26	Luke 7:11-35
27	Luke 7:36-8:3
28	Luke 8:4-21
29	Luke 8:22-39
30	Luke 8:40-9:6
31	Luke 9:7-27

date	Scripture
1	Luke 9:28-50
2	Luke 9:51-10:12
3	Luke 10:13-37
4	Luke 10:38-11:13
5	Luke 11:14-36
6	Luke 11:37-12:7
7	Luke 12:8-34
8	Luke 12:35-59
9	Luke 13:1-21
10	Luke 13:22-14:6
11	Luke 14:7-35
12	Luke 15:1-32
13	Luke 16:1-18
14	Luke 16:19-17:10
15	Luke 17:11-37
16	Luke 18:1-17
17	Luke 18:18-43
18	Luke 19:1-27
19	Luke 19:28-48
20	Luke 20:1-26
21	Luke 20:27-47
22	Luke 21:1-28
23	Luke 21:29-22:13
24	Luke 22:14-34
25	Luke 22:35-53
26	Luke 22:54-23:12
27	Luke 23:13-43
28	Luke 23:44-24:12
29	Luke 24:13-53
30	John 1:1-28

date	Scripture
1	John 1:29-51
2	John 2:1-25
3	John 3:1-21
4	John 3:22-4:3
5	John 4:4-42
6	John 4:43-54
7	John 5:1-23
8	John 5:24-47
9	John 6:1-21
10	John 6:22-40
11	John 6:41-71
12	John 7:1-29
13	John 7:30-52
14	John 7:53-8:20
15	John 8:21-30
16	John 8:31-59
17	John 9:1-41
18	John 10:1-21
19	John 10:22-42
20	John 11:1-53
21	John 11:54-12:19
22	John 12:20-50
23	John 13:1-30
24	John 13:31-14:14
25	John 14:15-31
26	John 15:1-27
27	John 16:1-33
28	John 17:1-26
29	John 18:1-24
30	John 18:25-19:22
31	John 19:23-42

date	Scripture
1	John 20:1-31
2	John 21:1-25
3	Acts 1:1-26
4	Acts 2:1-47
5	Acts 3:1-26
6	Acts 4:1-37
7	Acts 5:1-42
8	Acts 6:1-15
9	Acts 7:1-29
10	Acts 7:30-50
11	Acts 7:51-8:13
12	Acts 8:14-40
13	Acts 9:1-25
14	Acts 9:26-43
15	Acts 10:1-33
16	Acts 10:34-48
17	Acts 11:1-30
18	Acts 12:1-23
19	Acts 12:24-13:12
20	Acts 13:13-41
21	Acts 13:42-14:7
22	Acts 14:8-28
23	Acts 15:1-35
24	Acts 15:36-16:15
25	Acts 16:16-40
26	Acts 17:1-34
27	Acts 18:1-21
28	Acts 18:22-19:12
29	Acts 19:13-41
30	Acts 20:1-38

date	Scripture
1	Acts 21:1-16
2	Acts 21:17-36
3	Acts 21:37-22:16
4	Acts 22:17-23:10
5	Acts 23:11-35
6	Acts 24:1-27
7	Acts 25:1-27
8	Acts 26:1-32
9	Acts 27:1-20
10	Acts 27:21-44
11	Acts 28:1-31
12	Romans 1:1-17
13	Romans 1:18-32
14	Romans 2:1-24
15	Romans 2:25-3:8
16	Romans 3:9-31
17	Romans 4:1-12
18	Romans 4:13-5:5
19	Romans 5:6-21
20	Romans 6:1-23
21	Romans 7:1-14
22	Romans 7:15-8:6
23	Romans 8:7-21
24	Romans 8:22-39
25	Romans 9:1-21
26	Romans 9:22-10:13
27	Romans 10:14-11:12
28	Romans 11:13-36
29	Romans 12:1-21
30	Romans 13:1-14
31	Romans 14:1-23

date	Scripture
1	Romans 15:1-21
2	Romans 15:22-16:7
3	Romans 16:8-27
4	1 Corinthians 1:1-17
5	1 Corinthians 1:18-2:5
6	1 Corinthians 2:6-3:4
7	1 Corinthians 3:5-23
8	1 Corinthians 4:1-21
9	1 Corinthians 5:1-13
10	1 Corinthians 6:1-20
11	1 Corinthians 7:1-24
12	1 Corinthians 7:25-40
13	1 Corinthians 8:1-13
14	1 Corinthians 9:1-18
15	1 Corinthians 9:19-10:13
16	1 Corinthians 10:14-11:1
17	1 Corinthians 11:2-16
18	1 Corinthians 11:17-34
19	1 Corinthians 12:1-26
20	1 Corinthians 12:27-13:13
21	1 Corinthians 14:1-17
22	1 Corinthians 14:18-40
23	1 Corinthians 15:1-28
24	1 Corinthians 15:29-58
25	1 Corinthians 16:1-24
26	2 Corinthians 1:1-11
27	2 Corinthians 1:12-2:11
28	2 Corinthians 2:12-17
29	2 Corinthians 3:1-18
30	2 Corinthians 4:1-12
31	2 Corinthians 4:13-5:10

August

September



date	Scripture
1	2 Corinthians 5:11-21
2	2 Corinthians 6:1-13
3	2 Corinthians 6:14-7:7
4	2 Corinthians 7:8-16
5	2 Corinthians 8:1-15
6	2 Corinthians 8:16-24
7	2 Corinthians 9:1-15
8	2 Corinthians 10:1-18
9	2 Corinthians 11:1-15
10	2 Corinthians 11:16-33
11	2 Corinthians 12:1-10
12	2 Corinthians 12:11-21
13	2 Corinthians 13:1-14
14	Galatians 1:1-24
15	Galatians 2:1-16
16	Galatians 2:17-3:9
17	Galatians 3:10-22
18	Galatians 3:23-4:20
19	Galatians 4:21-5:12
20	Galatians 5:13-26
21	Galatians 6:1-18
22	Ephesians 1:1-23
23	Ephesians 2:1-22
24	Ephesians 3:1-21
25	Ephesians 4:1-16
26	Ephesians 4:17-5:2
27	Ephesians 5:3-33
28	Ephesians 6:1-24
29	Philippians 1:1-26
30	Philippians 1:27-2:18

date	Scripture
1	Philippians 2:19-3:6
2	Philippians 3:7-4:1
3	Philippians 4:2-23
4	Colossians 1:1-20
5	Colossians 1:21-2:7
6	Colossians 2:8-23
7	Colossians 3:1-17
8	Colossians 3:18-4:18
9	1 Thessalonians 1:1-2:9
10	1 Thessalonians 2:10-3:13
11	1 Thessalonians 4:1-5:3
12	1 Thessalonians 5:4-28
13	2 Thessalonians 1:1-12
14	2 Thessalonians 2:1-17
15	2 Thessalonians 3:1-18
16	1 Timothy 1:1-20
17	1 Timothy 2:1-15
18	1 Timothy 3:1-16
19	1 Timothy 4:1-16
20	1 Timothy 5:1-25
21	1 Timothy 6:1-21
22	2 Timothy 1:1-18
23	2 Timothy 2:1-21
24	2 Timothy 2:22-3:17
25	2 Timothy 4:1-22
26	Titus 1:1-16
27	Titus 2:1-14
28	Titus 2:15-3:15
29	Philemon 1:1-25
30	Hebrews 1:1-14
31	Hebrews 2:1-18

date	Scripture
1	Hebrews 3:1-19
2	Hebrews 4:1-13
3	Hebrews 4:14-5:14
4	Hebrews 6:1-20
5	Hebrews 7:1-19
6	Hebrews 7:20-28
7	Hebrews 8:1-13
8	Hebrews 9:1-10
9	Hebrews 9:11-28
10	Hebrews 10:1-18
11	Hebrews 10:19-39
12	Hebrews 11:1-16
13	Hebrews 11:17-31
14	Hebrews 11:32-12:13
15	Hebrews 12:14-29
16	Hebrews 13:1-25
17	James 1:1-18
18	James 1:19-2:17
19	James 2:18-3:18
20	James 4:1-17
21	James 5:1-20
22	1 Peter 1:1-12
23	1 Peter 1:13-2:10
24	1 Peter 2:11-3:7
25	1 Peter 3:8-4:6
26	1 Peter 4:7-5:14
27	2 Peter 1:1-21
28	2 Peter 2:1-22
29	2 Peter 3:1-18
30	1 John 1:1-10

*December*

date	Scripture
1	1 John 2:1-17
2	1 John 2:18-3:2
3	1 John 3:3-24
4	1 John 4:1-21
5	1 John 5:1-21
6	2 John 1:1-13
7	3 John 1:1-14
8	Jude 1:1-25
9	Revelation 1:1-20
10	Revelation 2:1-17
11	Revelation 2:18-3:6
12	Revelation 3:7-22
13	Revelation 4:1-11
14	Revelation 5:1-14
15	Revelation 6:1-17
16	Revelation 7:1-17
17	Revelation 8:1-13
18	Revelation 9:1-21
19	Revelation 10:1-11
20	Revelation 11:1-19
21	Revelation 12:1-18
22	Revelation 13:1-18
23	Revelation 14:1-20
24	Revelation 15:1-8
25	Revelation 16:1-21
26	Revelation 17:1-18
27	Revelation 18:1-24
28	Revelation 19:1-21
29	Revelation 20:1-15
30	Revelation 21:1-27
31	Revelation 22:1-21